

李太白诗集 注

王琦

文硕阁

wenshuoge.com

目录

关于我们	4
提要	6
卷一	7
卷二	35
卷三	61
卷四	83
卷五	102
卷六	121
卷七	137
卷八	155
卷九	172
卷十	190
卷十一	202
卷十二	219
卷十三	233
卷十四	243
卷十五	252
卷十六	267
卷十七	283
卷十八	299
卷十九	312
卷二十	327
卷二十一	344
卷二十二	358
卷二十三	376
卷二十四	387
卷二十五	407
卷二十六	429
卷二十七	444
卷二十八	457
卷二十九	472
卷三十	490
卷三十一	507
卷三十二	520
卷三十三	526
卷三十四	538

卷三十五		560
卷三十六		580
跋五则		609

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部二

李太白集注 别集类一【唐】

提要

【臣】等谨案 李太白集注三十六卷

国朝王琦撰琦字琢崖钱塘人注李诗者自杨齐贤萧士贇後明林兆珂有李诗钞述注十六卷简陋殊甚胡震亨驳正旧注作李诗通二十一卷琦以其尚多漏略乃重为编次笺释定为此本其诗参合诸本益以逸篇厘为三十卷以合曾巩序所言之数别以序志碑传赠答题咏诗文发语年谱外纪为附录六卷而缪氏本所谓考异一卷散入文句之下不另列焉其注欲补三家之遗阙故采摭颇富不免微伤於芜襍然捃拾残賸时亦寸有所长自宋以来注杜诗者如林而注李诗者寥寥仅二三本録而存之亦足以资考证是固物少见珍之义也乾隆四十六年十一月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

卷一

钦定四库全书

李太白集注卷一

钱塘王琦撰

古赋八首

大鹏赋【并序 庄子北冥有鱼其名为鲲鲲之大不知其几千里也化而为鸟其名为鹏鹏之背不知其几千里也怒而飞其翼若垂天之云是鸟也海运则将徙于南冥南冥者天池也齐谐者志怪者也谐之言曰鹏之徙于南冥也水击三千里抟扶摇而上者九万里去以六月息者也汤之问棘也是已穷髮之北有冥海者天池也有鱼焉其广数千里未有知其修者其名为鲲有鸟焉其名为鹏背若泰山翼若垂天之云搏扶摇羊角而上者九万里絶云气负青天然後图南且适南冥也斥鷃笑之曰彼且奚适也我腾跃而上不过数仞而下翱翔蓬蒿之间此亦飞之至也而彼且奚适也此小大之辩也】

余昔于江陵见天台司马子微谓余有仙风道骨可与神游八极之表因着大鹏遇希有鸟赋以自广此赋已传于世往往人间见之悔其少作未穷宏达之旨中年弃之及读晋书覩阮宣子大鹏赞鄙心陋之遂更记忆多将旧本不同今复【萧本缪本俱作腹非】存手集岂敢传诸作者庶可示之子弟而已【唐时江陵郡即荆州也隶山南东道大唐新语司马承祯字子微隐于天台山自号白云子有服饵之术则天中宗朝频徵不起睿宗雅尚道教稍加尊异承祯方赴召无何苦辞归乃赐宝琴花帔以遣之淮南子廓四方拆八极高诱注八极八方之极也神异经崑仑山有大鸟名曰希有南向张左翼覆东王公右翼覆西王母背上小处无羽一万九千里西王母岁登翼上之东王公也其鸟铭曰有鸟希有緑赤煌煌不鸣不食东覆东王公西覆西王母王母欲东登之自通陰阳相须唯会益工杨修答临淄侯牋修家子云老不晓事强着一书悔其少作晋书阮修字宣子尝作大鹏赞曰苍苍大鹏诞自北溟假精灵鳞神化以生如云之翼如山之形海运水击扶摇上征翕然层举背负太清志存天地不屑雷霆鸞鹄仰笑尺鷃所轻超然高逝莫知其情韵会将与也】其辞曰

南华老仙【一作仙老】发天机于漆园吐峥嵘之高论开浩荡之奇言徵至【一作志】怪于齐谐谈北溟之有鱼吾不知其【缪本脱其字】几千里其名曰鲲化成大鹏质凝胚浑脱髻鬣于海岛张羽毛于天门刷渤澥之春流曦扶桑之朝暾【缪本作烜】赫乎宇宙凭陵乎崑仑一鼓一舞烟濛沙昏五岳为之震荡【缪本作落】百川为之崩奔【唐书天宝元年诏封庄子为南华真人史记庄子者蒙人也名周尝为蒙漆园吏其学无所不闳然其要本归于老子之言故其着书十余万言大抵率寓言也正义曰括地志云漆园故城在曹州冤句县北十七里庄周为漆园吏即此按其城古属蒙县陆德明庄子音义齐谐人姓名郭璞江赋类胚浑之未凝李善注胚胎浑混尚未凝结木华海赋巨鳞插云髻鬣刺天李善注髻鱼背上鬣

也增韵凡鱼龙颌旁小髻皆曰鬣司马相如子虚赋浮渤澥顔师古曰渤澥海别枝也司马贞曰案齐都赋海旁曰渤断水曰澥也淮南子曰出于阳谷浴于咸池拂于扶桑是谓是明楚词瞰将出兮东方照吾槛兮扶桑王逸注谓日始出东方其容瞰瞰而盛貌东方有扶桑之木其高万仞日下浴于汤谷上拂其扶桑爰始而登照耀四方牛弘乐府扶桑上朝瞰萧士贇曰燁赫旧作烜赫庄子曰惊扬而奋鬣白波若山海水震荡声侔鬼神燁赫千里世本作烜字由传写者作烜字之误人不能解遂作烜字今厘正之初学记四方上下谓之宇往古来今谓之宙或谓天地为宇宙左传凭陵我城郭杜预注凭迫也博物志地部之位起形高大者有崑仑山广万里高万一千里神物之所生圣人仙人之所集也出五色云气五色流水其泉南流入中国名曰河也其山中应于天最居中八十城布绕之中国东南隅居其一分说苑五岳泰山东岳也霍山南岳也华山西岳也常山北岳也嵩山中岳也诗小雅百川沸腾谢灵运诗岿岸屡崩奔吕向注水激其岸崩颓而奔波也 崢嶸音撑横胚音坯澥音蟹瞰音吞燁音阐平声】尔

【繆本脱尔字】乃蹶厚地揭太清亘层霄突重溟激三千以崛起向九万而迅征背巢太山

【一作太虚繆本作大山】之崔嵬翼举长云之纵横左迴右旋倏陰忽明历汗漫以天矫狙

【许本作塌】闾阖之崢嶸 鸿蒙扇雷霆斗转而天动山摇而海倾怒无所雄无所争固可

想像其势髣髴其形【高诱淮南子注太清元气之清者也抱朴子上昇四十里名曰太清太清之中其气甚刚霄近天云气天有九重故曰层霄孙绰天台山赋或倒影于重溟李善注重溟海也韵会勃起曰崛起天台山赋落五界而迅征吕向注迅疾也尔雅石戴土谓之崔嵬淮南子徙倚于汗漫之宇高诱注汗漫无生形形生元气之本神也故卢敖见若士者言曰吾与汗漫期于九垓之上是也郭璞江赋吸翠霞而夭矫扬雄甘泉赋登掾栾而狙天门苏林注狙至也淮南子排闾阖钥天门高诱注闾阖始升天之门也夭矫飞腾貌崢嶸高峻貌庄子云将东游过扶摇之野而适遭鸿蒙陆德明音义鸿蒙自然元气也一云海上气也 崛音掘狙音贡】若乃足萦虹蜺目耀日月连轩沓拖挥霍翕忽喷气则六合生云洒毛则千里飞雪邈彼北荒将穷南图运逸翰以傍击鼓奔飈而长驱烛龙衔光以照物列缺施鞭而启途块视三山杯观【一作看】五湖其动也神应其行也道俱任公见之而罢钓有穷不敢以弯弧莫不投竿失鏃仰之长吁【春秋元命苞虹蜺者陰阳之精雄曰虹雌曰蜺初学记凡虹双出色鲜盛者为雄雄曰虹暗者为雌雌曰蜺木华海赋翔雾连轩长波濔 张铚注连轩飞貌李周翰注濔

延长貌张协七命翕忽挥霍云迴风列刘良注并飞走乱急也王肃家语注天地四方谓之六合郭璞客傲藹若邓林之会逸翰翰鸟羽也奔飈风疾也山海经西北海之外赤水之北有章尾山有神人面蛇身而赤直目正乘其暝乃晦其视乃明不食不寝不息风雨是谒是烛九陰是为烛龙郭璞注离骚曰日安不到烛龙何曜诗含神雾曰天不足西北无有陰阳消息故有龙衔精以往照天门中云谢惠连雪赋若烛龙衔耀照崑山扬雄羽猎赋霹雳列缺吐火施鞭应邵曰霹雳雷也列缺天隙电光也史记海中有三神山名曰蓬莱方丈瀛洲仙人居住之初学记周官扬州其浸五湖案张勃吴録五湖者太湖之别名以其周行五百余里故以五湖为名又虞翻云太湖有五道别谓之五湖或说以太湖射贵湖上湖洮湖淞湖为五湖按国语吴越战于五湖直在笠泽一湖中战耳则知或说非也鷖冠子至人不遗动与道俱庄子任公子为大钩巨缁五十犗以为饵蹲乎会稽投竿东海旦旦而钓期年不得鱼已而大鱼食之牵巨钩鎔没而下鰲扬而奋鬣白波若山海水震荡声侔鬼神燁赫千里任公子得若鱼离而腊之自制河以东苍梧以北莫不厭若鱼者史记正义帝王纪云帝羿有穷氏未闻其姓何先帝嘗以上世掌射正至嘗賜以彤弓素矢封之于鋤为帝司射历虞夏羿学射于吉甫其臂长故以

善射闻 颺音标弧音胡】尔其雄姿壮观块轧【萧本作映背】河汉上摩苍苍下覆漫漫盘古开天而直视羲和倚日以【缪本作而】旁叹缤纷乎八荒之间掩映乎四海之半当胸臆之掩昼若混茫之未判忽腾覆以迴转则霞廓而雾散【贾谊鵬鸟赋块圠无垠扬雄甘泉赋忽軼轧而无垠顔师古注軼轧远相映也块圠軼轧音义俱同初学记天河谓之天汉亦曰河汉庄子天之苍苍其正色耶其远而无所至极耶晋书天了无质仰而瞻之高远无极眼瞽精絶故苍苍然也楚词路漫漫其修远兮此用其字对上天体苍苍而言盖谓天地之形漫漫濶远无有穷极之意艺文类聚徐整三五历记曰天地混沌如鸡子盘古生其中万八千岁天地开辟阳清为天陰浊为地盘古在其中一日九变神于天圣于地天日高一丈地日厚一丈盘古日长一丈如此万八千岁天数极高地数极深盘古极长後乃有三皇山海经东南海之外甘水之间有羲和之国有女子名曰羲和方浴日于甘渊羲和帝俊之妻生十日郭璞注羲和盖天地始生主日月者也广雅曰御谓之羲和贾谊过秦论囊括四海并吞八荒之心顔师古曰八荒八方荒忽极远之地也尔雅九夷八狄七戎六蛮谓之四海郑康成周礼注四海犹四方也庄子古之人在混茫之中陆德明注混混芒芒未分时也 块轧音近央札】然後六月一息至于海湄歛翳景以横翥【萧本作櫨】逆高天而下垂憩乎泱泱之野入乎汪湟之池猛兽所射余风所吹溟涨沸渭岩峦纷披天吴为之怵栗海若为之躩踞巨鳌冠山而郤走长鲸腾海而下驰缩殼挫鬣莫之敢窥吾亦不测其神怪之【萧本作而】若此盖乃造化之所为【嵇康琴赋俯阍海湄吕向注海湄海畔也歛忽也翳景蔽遮日月之景也司马相如上林赋过乎泱泱之野张揖曰山海经所谓大荒之野也如淳曰大貌也谢灵运诗溟涨无端倪李周翰注溟涨皆海也王褒洞箫赋雷霆輶輳佚豫以沸渭李善注埤苍曰沸渭不安貌刘良注沸渭声踊跃不定貌又洞箫赋飘风纷披山海经朝阳之谷神曰天吴是为水伯其为兽也八首人面八足八尾背青黄怵栗恐惧貌初学记海神曰海若王延寿鲁灵光殿赋虬龙腾骧以蜿蜒颌若动而躩踞李善注躩踞动貌左思吴都赋巨鳌鼉首冠灵山吕向注巨鳌大龟也灵山中蓬莱山而大鳌以首戴之冠犹戴也刘劭赵郡赋巨鳌冠山陵鱼吞舟古今注鲸鱼者海鱼也大者长千里小者数十丈一生数万岁常以五六月就岸边生子至七八月导从其子还大海中鼓浪成雷喷沫成雨水族惊畏皆逃匿莫敢当者其雌曰鲛大者亦长千里眼为明月珠张衡思玄赋玄武缩于壳中歛音忽翳音意翥音注沸音费怵音出鯨一音擎】岂比夫蓬莱之黄鹄夸金衣与菊裳耻苍梧之玄凤耀彩质与锦章既服御【萧本作御服】于灵仙久驯扰于池隍精卫殷勤【缪本作勤苦】于衔木鷓鴣悲愁乎荐觴天鸡警晓【缪本作曙】于蟠桃峻鸟晰耀于太阳不旷荡而纵适何拘挛而守常未若兹鹏之逍遥无厥类乎比方不矜大而暴猛每顺时而行藏参玄根以比壽饮元气以充肠戏阳谷而徘徊冯炎洲而抑扬【西京杂记始元元年黄鹄下太液池上为歌曰黄鹄飞兮下建章羽肃肃兮行蹢蹢金为衣兮菊为裳唼喋荷苳出入蒹葭自顾菲薄媿尔嘉祥按太液池中起三山以象瀛洲蓬莱方丈故曰蓬莱黄鹄也陈子昂诗葳蕤苍梧凤嘹唳白露蝉又诗崑山见玄凤岂复虞云罗说文隍城池也有水曰池无水曰隍山海经发鸠之山有鸟焉其状如鸟文首白喙赤足名曰精卫其鸣自詵是炎帝之少女名曰女娃游于东海溺而不反化为精卫常衔西山之木石以湮于东海国语海鸟曰爰居止于鲁东门之外三日臧文仲使国人祭之展禽曰今兹海其有灾乎夫广川之鸟兽恒知而避其灾也是岁也海多大风冬暖庄子昔者海鸟止于鲁郊鲁侯御而觴之于庙奏九韶以为乐具太牢以为膳鸟乃眩视忧悲不敢食一禽不敢饮一杯三日而死述异记东南有桃都山上有大树曰桃都枝相去三千里上有天鸡日初出照此木天鸡则鸣天

下之鸡皆随之鸣河图括地象桃都山有大桃树盘屈三千里上有金鸡日照则鸣淮南子曰中有踔乌高诱注踔犹蹲也谓三足乌晰明也後汉书帝知羣寮拘挛章怀太子注拘挛犹拘束也玄根道之本也卢谿诗处其玄根廓焉靡结李善注玄道也张衡玄图曰玄者无形之类自然之根作于太始莫与为先尚书分命羲仲宅嵎夷曰阳谷孔安国传曰阳明也日出于谷而天下明故称阳谷隋书东曰阳谷日之所出西曰蒙汜日之所入十洲记炎洲在南海中地方二千里去北岸九万里亦多仙家 鵠音斛鷄鷄与爰居同踔音逯又音蹲晰音浙挛间员切恋平声阳音阳】俄而希有鸟见谓之曰伟哉鹏乎此之乐也吾右翼掩乎西极左翼蔽乎东荒跨蹑地络周旋天纲以恍惚为巢以虚无为场我呼尔游尔同【萧本作呼】我翔于是乎大鹏许之欣然相随此二禽已登于寥廓而斥【缪本作尺】鷄之辈空见笑于藩离【吴都赋包括於越跨蹑荆蛮地络者地之脉络谓山川之属天纲者天之纲维谓南北二极不动之处鲍照游思赋仰尽兮天经俯穷兮地络汉书玉衡杓建天之纲也司马相如难蜀父老文焦朋已翔乎寥廓而罗者犹视乎藪泽颜师古注寥廓天上宽广之处陆德明庄子音义斥小泽也本亦作尺鷄鷄雀也今野泽中鹑鹌是也 古赋辩体太白盖以鹏自比而以希有鸟比司马子微赋家宏衍巨丽之体楚骚远游等作已然司马班扬犹尚此此显出庄子寓言本自宏濶太白又以豪气雄文发之事与辞称俊迈飘逸去骚颇近 跨蹑音夸捻络音落寥廓音聊扩】拟恨赋【古恨赋齐梁间江淹所作为古人志愿未遂抱恨而死者致慨太白此篇段落句法盖全拟之无少差异酉阳杂俎李白前後三拟文选不加意辄焚之惟留恨别赋今别赋已亡惟存恨赋矣】

晨登太山一望蒿里松楸骨寒宿草【缪本作草宿】坟毁浮生可嗟大运同此于是仆本壮夫慷慨不歇仰思前贤饮恨而没【元和郡县志泰山一曰岱宗在兖州乾封县西北三十里蒿里山在乾封县西北二十五里一统志泰山在泰安州北五里亭禅山在泰安州西南五里一名蒿里山上有蒿里祠古蒿里曲蒿里谁家地聚敛魂魄无贤愚盖古时蒿里为茔墓之所故言葬埋处多借蒿里为名犹之九原北邙也礼记朋友之墓有宿草而不哭焉郑康成注宿草谓陈根也何逊诗行路一孤坟路成坟欲毁庄子其生也若浮其死也若休何晏景福殿赋乃大运之攸戾李周翰注大运天运也】昔如汉祖龙跃羣雄竞奔提劔叱咤指挥【缪本作麾】中原东驰渤海西漂崑仑断蛇奋旅【缪本作怒】扫清国步握瑶图而倏昇登紫坛而雄顾一朝长辞天下缟素【刘孝标辩命论覩汤武之龙跃後汉书四方锋起羣雄竞逐史记高祖曰吾以布衣提三尺劔取天下此非天命乎字林叱咤发怒也左传晋楚治兵遇于中原扬雄长杨赋横巨海漂崑仑李善注漂摇荡之也渤海崑仑已见大鹏赋注史记高祖以亭长为县送徒酈山到丰西泽中止饮夜乃解纵所送徒曰公等皆去吾亦从此逝矣徒中壮士愿从者十余人高祖被酒夜径泽中令一人行前行前者还报曰前有大蛇当径愿还高祖醉曰壮士行何畏乃前拔劔击斩蛇蛇遂分为两径开行数里醉因卧後人来至蛇所有一姬夜哭人问何哭姬曰人杀吾子故哭之其人曰姬子何为见杀姬曰吾子白帝子也化为蛇当道今为赤帝子斩之人以姬为不诚欲笞之姬忽不见後人至高祖觉後人告高祖高祖乃心独喜自负汉书叙传爰兹发迹断蛇奋旅神母告符朱旗乃举诗大雅国步斯频毛传云步行也徐陵檄周文躬膺宝历嗣奉瑶图艺文类聚汉旧仪曰皇帝祭天紫坛帷幄杨升庵曰汉行宫用紫泥为坛齐梁郊祀歌所谓紫坛也战国策天下缟素小尔雅缁之精者曰缟缟之粗者曰素叱尺栗切噀入声咤丑亚切嗟去声漂音蟹漂音飘缟音杲】若乃项王虎鬬白日争辉拔山

力尽盖世心违【繆本作微】闻楚歌之四合知汉卒之重围帐中劒舞泣挫雄威雅兮不逝暗恶【繆本作鸣】何归【史记项羽本纪项王军壁垓下兵少食尽汉军及诸侯兵围之数重夜闻汉军四面皆楚歌项王大惊曰汉皆已得楚乎是何楚人之多也起饮帐中有美人名虞常幸从骏马名雅常骑之于是项王乃悲歌慷慨自为诗曰力拔山兮气盖世时不利兮雅不逝雅不逝兮可奈何虞兮虞兮奈若何歌数阕美人之和项王泣数行下左右皆泣莫能仰视于是项王乃上马骑直夜溃围南出驰走平明汉军乃觉之令骑将灌婴以五千骑追之项王至东城自度不得脱乃自刎而死淮陰侯传项王暗恶叱咤千人皆废索隐曰暗恶懷怒气也雅音追暗於禁切因去声恶乌路切汗去声】至如荆卿入秦直度易水长虹贯日寒风飒起远譬始皇拟报太子奇谋不成愤惋而死【战国策燕太子丹质于秦亡归见秦且灭六国兵已临易水恐其祸至荆轲见太子太子曰丹之私计以为诚得天下之勇士使于秦劫秦王使悉反诸侯之侵地不可因而刺杀之此丹之上愿唯荆卿留意焉荆轲许诺燕国有勇士秦武阳年十三杀人不敢忤视乃令秦武阳为副太子宾客知其事者皆白衣冠以送之至易水上既祖取道高渐离击筑荆轲和而歌为变徵之声士皆垂泪涕泣又前而为歌曰风萧萧兮易水寒壮士一去兮不复还复为羽声慷慨士皆瞋目髮尽上冲冠于是荆轲遂就车而去终已不顾至秦秦王见燕使者咸阳宫荆轲奉樊於期之头函秦武阳奉地图匣以次进至陞秦武阳色变振恐羣臣怪之荆轲顾笑武阳前为谢曰北蛮夷之鄙人未尝见天子故振慄愿大王少假借之起取武阳所持图奉之秦王发图图穷而匕首见因左手把秦王之袖而右手持匕首搃之未至身秦王惊自引而起袖絶拔劒劒坚不可立拔环柱而走卒惶急不知所为左右乃曰王负劒王负劒遂拔以击荆轲断其左股荆轲乃引匕首以提秦王不中中柱秦王复击轲轲被八创自知事不就倚柱而笑箕踞以骂曰事所以不成者乃欲生劫之必得约契以报太子也左右前斩荆轲如淳史记注列士传曰荆轲发後太子自相气见虹贯日不彻曰吾事不成矣後闻轲死事不立曰吾知其然也 飒悉合切音撒】若夫陈后失宠长门掩扉日冷金殿霜凄锦衣春草罢緑秋萤乱飞恨桃李之委絶思君王之有违【汉书孝武陈皇后擅宠骄贵十余年而无子又挟妇人媚道颇觉上遂穷治之使有司赐皇后策罢退居长门宫楚辞虽萎絶其亦何伤兮哀衆芳之芜秽王逸注萎病也絶落也】昔者屈原既放迁于湘流心死旧楚魂飞长楸听江风【繆本作枫】之嫋嫋闻岭猿之啾啾永埋骨于渌水怨怀王之不收【楚辞章句屈原与楚同姓仕于怀王为三闾大夫同列大夫上官靳尚妒害其能共譖毁之王乃疏屈原屈原执履忠贞而被谗衰忧心烦乱不知所愬乃作离骚经是时秦昭王使张仪譖诈怀王令絶齐交又使诱楚请与俱会武关遂胁与俱归拘留不遣卒客死于秦其子襄王复用谗言迁屈原于江南屈原放在山野复作九章援天引圣以自证明终不见省不忍以清白久居浊世遂赴汨渊自沈而死楚辞渔父云屈原既放游于江潭盖原所迁之地在江之南湘水经由之处也又九章云望长楸而太息兮涕淫淫其若霰王逸注长楸大梓也言顾望楚都见其大道长树悲而太息涕下淫淫如雨霰也又九歌云嫋嫋兮秋风王逸注嫋嫋秋风摇木貌又九歌云猿啾啾兮猿夜鸣刘逵三都赋注异物志曰猿类露鼻尾长四五尺树上居两则以尾塞鼻建安临海北有之韵会渌水清也张衡东京赋渌水澹澹太白诗中多用渌水字疑本此或有改作緑水者非是 嫋音鸟猿音又渌音緑】及夫李斯受戮神气黯然左右垂泣精魂动天执爱子以长别叹黄犬之无缘【史记二世二年其李斯五刑论腰斩咸阳市斯出狱与其中子俱执顾谓其子曰吾欲与若复牵黄犬出上蔡东门追逐狡兔岂可得乎遂父子相哭而夷三族】或有从军永诀去国长违天涯迁客海外思归此人忽见愁云蔽日日断

心飞莫不攢眉痛骨擦血沾衣【江淹别赋写永诀之情又云擦血相视李善注擦拭也 擦音刎沾音詹】若乃错綉轂填金门烟尘晓杳歌钟昼誼亦复星沈电灭闭影潜魂【楚辞车错轂兮短兵接王逸注错交也韵会轂者居轮之正中而为辐之所凑也填塞也满也扬雄解嘲历金门上玉堂应劭注金门金马门也韵会杳合也国语女乐二八歌钟二肆韦昭注歌钟歌时所奏】已矣哉桂华满兮明月辉扶桑晓兮白日飞玉颜灭【萧本作减】兮蝼蚁聚碧台空兮歌舞稀与天道兮共尽莫不委骨而同归【酉阳杂俎旧言月中有桂扶桑已见大鹏赋注宋玉神女赋苞温润之玉颜鲍照芜城赋委骨穷尘李善注委犹积也】

惜余春赋

天之何为令北斗而知春兮迺指于东方水荡漾兮碧色兰葳蕤兮红芳试登高而望远极云海之微茫魂一去兮欲断泪流颊兮成行吟清风【缪本作枫】而咏沧浪怀洞庭兮悲潇湘何余心之缥缈兮与春风而飘扬【鵽冠子斗柄东指天下知春何休公羊传注昏斗指东方曰春指南方曰夏指西方曰秋指北方曰冬荡漾水摇动貌楚辞七谏上葳蕤而防露王逸注葳蕤盛貌广韵葳蕤草木花垂貌韵会江水出荆山东南流为沧浪之水括地志云水出嶓冢山为沮为瀆为沔为汉至均州为沧浪之水楚辞渔父歌曰沧浪之水清兮可以濯吾缨沧浪之水浊兮可以濯吾足一统志洞庭在今岳州府城西南禹贡九江孔殷注云即洞庭也沅渐元辰叙西澧澧湘九水皆合于此故名九江又九江沅澧湘最大皆自南而入荆江自北而过洞庭瀘其间名为五瀘战国策云秦与荆战大败之取洞庭五瀘是也每岁六七月间岷峨雪消水暴自荆江逆入洞庭清流每为之改色潇水源出九疑山南流至三江口东北与迤水合又东北流至永州府城外北流至湘口会于湘湘水源出广西兴安县阳海山西北流至永州与潇水合曰潇湘至衡阳与蒸水合曰蒸湘至沅州与沅水合曰沅湘会衆流以达洞庭 蕤儒迫切音綏】飘扬兮思无限念佳期兮莫展平原萋兮绮色爱芳草兮如剪惜余春之将阑每为恨兮不浅【楚辞与佳期兮夕张尔雅大野曰平广平曰原後人合称之以谓旷野之地说文绮文缯也顏师古曰即今之细绦也韵会阑晚也又尽也衰也 绮音起】汉之曲兮江之潭把瑶草兮思何堪想游女于岷北愁帝子于湘南恨无极兮心氤氲目眇眇兮忧纷纷披卫情于淇水结楚梦于阳云【张衡南都赋游女弄珠于汉皋之曲楚辞屈原既放游于江潭汉曲谓汉水湾曲处江潭谓湘江深滙处瑶草草之珍美者故以美玉喻犹琪花玉树之谓江淹诗云瑶草正翦绝诗周南汉有游女不可求思太平寰宇记岷山在襄州襄阳县南十里楚辞帝子降兮北渚目眇眇兮愁余王逸注帝子谓尧女也尧二女娥皇女英随舜不反堕于湘水之渚因为湘夫人眇眇好貌氤氲聚而不散之意诗卫风淇水在右源泉在左巧笑之瑳佩玉之傕鲍照诗发郢流楚思涉淇兴卫情太平御览襄阳有耆旧传曰楚襄王与宋玉游于云梦之野将使宋玉赋高唐之事望朝云之馆上有云气崒乎直上忽而改容须臾之间变化无穷王问宋玉曰此何气也对曰所谓朝云者也昔者先王游于高唐怠而昼寢梦一妇人暖乎若云皦乎若星将行未至如浮如倾详而视之西施之行王悦而问焉对曰我夏帝之季女也名曰瑶姬未行而亡封于巫山之阳台精魂为草实为灵芝媚而服焉则与梦期所谓巫山之女高唐之姬闻君游于高唐愿荐枕席王因幸之去而辞曰妾在巫山之阳高丘之岨旦为朝云暮为行雨朝朝暮暮阳台之下早旦视之果如其言故为立庙号朝云焉江淹诗相思巫山渚怅望阳灵台一统志阳台山在夔州府巫山县北高百尺上有阳云台遗址阳云台即阳台也 岷

胡典切贤上声今人作硯音读者非氲於云切醞平声】春每归兮花开花已阑兮春改叹长河之流速【繆本作春】送驰波于东海春不留兮时已失老衰飒兮逾疾恨不得挂长绳于青天系此西飞之白日【上林赋驰波跳沫傅玄诗岁暮景迈羣光絶安得长绳系白日】若有人兮情相亲去南国兮往西秦见游丝之横路网春辉以留人沈吟兮哀歌踟躕兮伤别送行子之将远看征鸿之稍灭醉愁心于垂杨随柔条以纠结望夫君兮咨嗟横涕泪兮怨春华遥寄影【萧本作寄遥影】于明月送夫君于天涯【楚辞若有人兮山之阿韵会踟躕住足也鲍照诗居人掩闔卧行子夜中饭江淹诗云边有征鸿楚辞望夫君兮未来苏武诗努力爱春华莫忘欢乐时李善注春华喻少时也 踟躕音掷逐纠音九】

愁阳春赋

东风归来见碧草而知春荡漾惚恍何垂杨旖旎之愁人天光青【萧本作清】而妍和海气绿而芳新野【萧本少野字】彩翠兮阡眠【繆本作芊緜】云飘飏【繆本作飘飘】而相鲜演漾兮夤缘窥青【一作新】苔之生泉缥缈分翩緜见游丝之萦烟魂与此兮俱断醉【一作对】风光兮凄然【江淹别赋春草碧色上林赋纷容萧瑟旖旎从风张揖曰旖旎犹阿那也王粲柳赋览兹树之丰茂纷旖旎以修长韵会旖旎柔弱貌鲍照诗天色净绿气妍和楚辞望远兮阡眠广韵阡眠广远也陆机诗林薄杳阡眠吕延济注阡眠原野之色说文演长流也演漾水流而动貌吴都赋夤缘山岳之岳韵会夤缘连络也 旖旎音衣尼又去声作□柅读妍音近延演音衍夤音寅】若乃陇水秦声江猿巴吟明妃玉塞楚客枫林试登高而望远痛切【一作咸痛】骨而伤心春心荡兮如波春愁乱兮如雪兼万情之悲欢兹一感于芳节【後汉书郡国志陇州有大阪名陇坻刘昭注三秦记其坂九迴不知高几许欲上者七日乃越高处可容百余家清水四注下郭仲产秦川记曰陇山东西百八十里登山岭东望秦川四五百里极目泯然山东人行役升此而顾瞻者莫不悲思故歌曰陇头流水分离四下念我行役飘然旷野登高望远涕零双坠艺文类聚宜都山川记曰峡中猿鸣至清山谷传其响泠泠不絶行者歌之曰巴东三峡猿鸣悲猿鸣三声泪沾衣明妃即昭君也晋人以文帝讳昭君改明君後人又改为明妃艺文类聚琴操曰王昭君者齐国人也顔色皎洁闻于国中献于孝元帝讫不幸纳积五六年昭君心有怨旷伪不饰其形容元帝每历後宫疎略不过其处後单于遣使者朝贺元帝陈设倡乐令後宫粧出昭君怨恚日久乃便循饰善粧盛服光辉而出俱列坐元帝谓使者曰单于何所愿乐对曰珍奇怪物皆悉自备唯妇人丑陋不如中国乃令後宫欲至单于者起坐昭君喟然越席前曰妾幸得备在後宫粗丑卑陋不合陛下之心诚愿得行帝大惊悔之良久太息曰朕已误矣遂以与之昭君至单于心思不乐乃作怨旷思惟歌曰秋木萋萋其叶萎黄有鸟处山集于苞桑养育毛羽形容生光既得升云游倚曲房离宫絶旷身体摧藏志念抑冗不得颡颥虽得餽食心有徊徨我独伊何改往变常翩翩之鸞远集西羌高山峩峩河水泱泱又父兮母兮道里悠长呜乎哀哉忧心惻伤谢庄舞马赋桑玉塞而归宝玉塞谓玉门关乃入西域之路昭君入胡之路未必由此盖借作边关字用耳楚辞宋玉怜哀屈原忠而斥弃愁懣山泽魂魄放佚厥命将落故作招魂欲以复其精神延其年壽其卒章曰湛湛江水兮上有枫目极千里兮伤春心王逸注言湛湛江水浸润枫木使之茂盛伤已不蒙君惠而身放弃曾不若树木得其所也或曰水旁林木中鸟兽所聚不可居也高唐赋登高望远使人心悴枚乘七发陶阳气荡春心刘绘诗心中乱如雪宁知有所思刘铄诗徘徊去芳节梁元

帝纂要春节曰芳节】若有一人【一作我所思】兮湘水滨隔云霓而见无因洒别泪於尺波寄东流于情亲若使春光可揽而不灭兮吾欲赠天涯之佳人【陆机诗尺波岂徒旋古赋辨体先用连绵字以起下句之意是学九辨第一首若乃以下则是梁陈体】

悲清秋赋

登九疑兮望清川见三湘之潺湲水流寒以归海云横秋而蔽天余以鸟道计于故乡兮不知去荆吴之几千【史记正义括地志云九疑山在永州唐兴县东南一百里太平御览湘中记曰九疑山在营道县九山相似行者疑惑因名九疑盛弘之荆州记曰九疑山盘基数郡之界连峯接岫竞秀争高含雾卷霞分天隔日隋书五行志巴陵南有地名三湘太平寰宇记湘潭湘乡湘源是为三湘岳州府志三湘浦在临湘县南四十五里湘中记曰湘水至清深五六丈下见底了了石子如樗蒲白沙如雪霜赤岸如朝霞湖岭之间湘水贯之凡水皆会焉无出湘之右者与潇水合则曰潇湘与蒸水合则曰蒸湘与沅水合则曰沅湘故谓之三湘琦按湘水源出广西桂林府东北流至湖广永州府城西潇水自南来会焉至衡州府城东蒸水自西南来会焉又北流环长沙府城东北至湘陰县违青草湖而入于洞庭凡行二千五百余里大小诸水会入者颇衆若沅水则不与湘会而自入于洞庭虽沅湘之称起自屈平但双举二水并未言其会同相合也三湘之名恐未必由此广韵潺湲水流貌庾信麦积崖佛龕铭鸟道乍穷羊肠忽断李善文选注南中八志曰交趾郡治龙编县自兴古鸟道四百里以其险絶兽犹无蹊惟上有飞鸟之道耳後人称高峻之径曰鸟道本此】于时西阳半规映岛欲没澄湖练明遥海上月念佳期之浩荡渺怀燕而望月【西阳谓西落之日其半为峯所蔽仅见其半如半规然谢灵运诗远峯隐半规谢惠连诗分袂澄湖陰古赋辨体澄湖练明遥海上月与赤壁赋人影在地仰见明月语意同谓之倒语若云遥海上月澄湖练明仰见明月人影在地语意一顺意味大减琦按太白故乡在西蜀而荆吴则其东也燕地居北越地居南盖登高而徧览四方之意翻作雨层抒写便觉变幻不可测 澄音丞】荷花落兮江色秋风嫋嫋兮夜悠悠临穷溟以有美思钓鳌于沧洲无修竿以一举抚洪波而增忧归去来兮人间不可以托些吾将采药于蓬丘【楚辞九歌嫋嫋兮秋风又九辨袭长夜之悠悠木华海赋翔天沼戏穷溟穷溟即庄子所云穷髮之北溟海也汉书古人有言曰临渊羡鱼不如退而结网列子龙伯之国有大人举足不盈数步而暨五山之所一钓而连六鳌阮籍为郑冲劝晋王賸临沧洲而谢支伯登箕山以揖许由沧洲谓沧海中之洲渚也楚辞招魂归来归来不可以托些朱子注些说文语辞也沈存中云即今夔峡湖湘及南北江獠人凡禁呪句尾皆云些乃楚人旧俗十洲记蓬邱蓬莱山也对东海之东北岸周回五千里

古赋辨体太白诸短赋雕脂镂冰是江文通别赋等篇步骤】

劔阁赋【原注送友人王炎入蜀 通志地理略劔阁在劔州普安县界今谓之劔门左思蜀都赋缘以劔阁阻以石门刘逵注劔阁谷名自蜀通汉中道一由此背有阁道在梓潼郡东北一统志劔阁在劔州北三十里两岸峻拔凿石架阁而为栈道连山絶险故谓之劔阁秦司马错由此道伐蜀】

咸阳之南直望五千里见云峯之崔嵬前有劔阁横断倚青天而中开上则松风萧飒瑟?有巴

猿兮相哀旁则飞湍走壑洒石喷阁汹涌而惊雷【通典京兆郡咸阳县东十五里有故咸阳城秦所都也三辅黄图咸阳在九嵕山渭水北山水俱在南故名咸阳今文士槩指秦地曰咸阳也说文?大风也韵会颺?风貌江洪诗颺?夕风高?音聿】送佳人兮此去复何时兮归来望夫君兮安极我沉吟兮叹息视沧波之东注悲白日之西匿鸿别燕兮秋声云愁秦而暝色若明月出于劒开兮与君两乡对酒而相忆【鲍照观漏赋波沈沈而东注日滔滔而西属曹植诗白日忽西匿古赋辩体其前有上则旁则等语是拏斂上林两都铺叙体格而裁入小赋所谓天吴与紫凤颠倒在短褐者欵故虽以小赋亦自浩荡而不伤俭陋盖太白天才飘逸其为诗也或离旧格而去之其赋亦然】

明堂赋【并序按新旧唐书及通监隋无明堂季秋大享常寓雩坛唐高祖太宗时?于圆丘高宗永徽二年勅令所司与礼官学士考□故事造立明堂于是太常博士柳宣依郑玄义以为明堂之制当为五室内直丞孔志约据大戴礼及卢植蔡邕等义以为九室诸儒纷争互有不同乾封二年二月诏以制造明堂宜及时起作于是大赦天下改元为总章分万年县置明堂县示必欲立之而议者益纷然乃下诏率意班其制度至取象黄琮上设鸛尾其言益不经而明堂亦不能立则天临朝儒者屡上言请创立明堂则天以高宗遗意乃与北门学士议其制尽弃羣言垂拱三年春毁东都之乾元殿以其地立明堂为三层下层象四时各随方色中层法十二辰上层法二十四气凡高二百九十四尺广三百尺明堂以下圜绕施铁渠以为辟雍之象四年正月明堂成号万象神宫证圣元年正月为火所焚又令重造规模率小于旧制其上施一金涂铁凤高二丈後为大风所损更为铜火珠羣龙奉之天册万岁二年三月重造明堂成号为通天宫玄宗开元五年幸东都将行大享之礼以武太后所造明堂有乖典制遂依旧拆改为乾元殿讫唐之世季秋大享皆寓圆丘太白此赋盖在开元五年未复改乾元殿以前所作者也考赋中所言多系书传所载古时规模制度与则天所造明堂或有不同盖身在远方闻其事而赋之固未来至东都得之目见以古准今约当如是以修词焉耳】

昔在天皇告成岱宗改元乾封经始明堂年纪总章时締构之未集【繆本作辑】痛威灵之遐迈天后继作中宗成之因兆人之子来崇万祀之丕业盖天皇先天中宗奉天累圣纂就鸿勲克宣臣白美颂恭惟述焉【册府元龟唐高宗上元元年八月皇帝称天皇皇后称天后以避先帝先后之称旧唐书高宗本纪麟德三年春正月戊辰朔车驾至泰山顿是日亲祀昊天上帝于封祀坛以高祖太宗配享巳巳帝升山行封禅之礼庚午禅于社首祭皇地祇以太穆太皇太后文德皇太后配享壬申御朝觀坛受朝贺改麟德三年为乾封元年乾封三年二月丙寅以明堂制度历代不同汉魏以还弥更讹舛遂增损古今新制其图下诏大赦改元为总章元年初学记太山五经通义云一曰岱宗言王者受命易姓报功告成必于岱宗也岱者代也东方万物始交之处宗长也言为羣岳之长左思魏都赋締构之初李善注締结也韵会十万为亿十亿为兆左传天子曰兆民诸侯曰万民诗大雅庶民子来万祀万年也南都赋弥万祀而无衰司马相如封禅文天下之壮观王者之丕业顔师古注丕大也周易先天而天弗违後天而奉天时孔颖达正义先天而天勿违者若在天时之先行事天乃在後不违是天合大人也後天而奉天时者若在天时之後行事能奉顺上天是大人合天也】其辞曰伊皇唐之革天创元也我高祖乃仗大顺赫然雷发以首之于是横八荒漂九阳扫叛换开混茫景星耀而太阶平虹蜺灭而日月张【革命谓改革天命创元谓创造基业之始刘琨劝进表抗明

威以摄不类仗大顺以肃宇内楚辞夕曦予身兮九阳王逸注九阳谓天地之涯也汉书项氏畔换顔师古注畔换强恣之貌犹言跋扈诗大雅皇矣篇有曰无然畔援子华子混茫之初是名太初此喻隋季扰乱有若混沌茫昧之世也史记天精而见景星景星者德星也其状无常常出于有道之国孟康注精明也有赤方气与青方气相连赤方中有两黄星青方中有一黄星凡三星合为景星宋书景星大星也状如半月生于晦朔助月为明太平御览孙氏瑞应图曰景星者星之精也先後月出于西方王者不私人以官使贤者在位则见佐月为明汉书愿陈泰阶六符以观天变孟康注泰阶三台也每台二星凡六星应劭注黄帝泰阶六符经曰泰阶者天之三阶也上阶为天子中阶为诸侯公卿大夫下阶为士庶人上阶上星为男主下星为女主中阶上星为诸侯三公下星为卿大夫下阶上星为元士下星为庶人三阶平则陰阳和风雨时社稷神祇咸获其宜天下大安是为太平三阶不平则五神乏祀日有食之水润不浸稼穡不成冬雷夏霜百姓不宁故治道倾长杨赋玉衡正而太阶平晋书虹蜺日旁气也斗之乱精主惑心主内淫主臣谋君天子诎后妃顛妻不一】钦若太宗继明重光廓区宇以立极缀苍颢【繆本作昊】之颢纲淳风沕穆鸿恩滂洋武义烜赫于有截仁声馭【萧本作沓】乎无疆【书尧典钦若昊天周易大人以继明照于四方书顾命昔君文王武王宣重光蔡沈注武犹文谓之重光犹舜如尧谓之重华也张衡东京赋区宇义宁班固答宾戏超忽荒而踳颢苍顔师古注颢颢天也元气颢汗故曰颢天其色苍苍故曰苍天晋书振千载之颢纲落周孔之绳网谷梁传疏上下无序纲纪頽壤故曰颢纲北史扇之以淳风浸之以太和贾谊鵬赋沕穆无穷兮胡可胜言顔师古注沕穆深微貌李善注沕穆不可分别也汉书匈奴传大化神明鸿恩博洽汉郊祀歌福滂洋迈延长顔师古注滂洋饶广也羽猎赋仁声惠于北狄武义动于南邻吕向注武义武事也萧士贇曰按诗赫兮咺兮当作烜又按尔雅释诗者曰赫兮烜兮者威仪也郭璞注云貌光宣陆德明音义曰赫火格反烜吁远反烜者光明宣着唐宋以前诗之咺字皆作烜今作咺者缘宋朝旧讳故改耳诗商颂海外有截郑笺曰截整齐也四海之外率服截尔齐整广韵馭 马行也喻仁声之流行如马行之疾速也周易牝马地类行地无疆馭 音飒踏】若乃高宗绍兴佑统锡美神休旁臻瑞物咸荐元符剖兮地珍见既应天以【萧本作而】顺人遂登封而降禪将欲考有洛崇明堂惟厥功之未辑兮乘白云于帝乡天后勤劳辅政兮中宗以钦明克昌遵先轨以继作兮扬列圣之耿光【甘泉赋恤胤锡美拓迹开统应劭注锡与也美饶也言神明饶与福祥也又甘泉赋拥神休尊明号晋灼注休美也言见佑护以休美之祥也长杨赋方将俟元符李善注元符大瑞也周易汤武革命顺乎天而应乎人东京赋登封降禪则齐德乎黄轩薛综注登谓上太山封土降谓下禪梁父也辑集也古字通用庄子千岁厌世去而上仙乘彼白云至于帝乡书尧典钦明文思孔安国传钦敬也郑玄云敬事节用谓之钦照临四方谓之明诗周颂克昌厥後三国志敷弘大猷光济先轨书立政以觀文王之耿光】则使轩辕草图羲和练日经之营之不彩不质因子来于四方岂殫税于万室乃准水臬攢云梁磬玉石于陇坂空壤材于潇湘巧夺神鬼高穷昊苍听天语之察察拟帝居之将将【繆本作锵锵】虽暂劳而永固兮始圣谟于我皇【汉书上欲治明堂奉高旁未晓其制济南人公玉带上黄帝明堂图孔安国书传云重黎之後羲氏和氏世掌天地四时之官汉书郊祀歌练时日候有望顔师古注练选也诗大雅经始灵台经之营之庶民攻之不日成之经始勿急庶民子来广韵殫尽也周礼匠人建国水地以县置 以县眡以景郑康成注于四角立植而县以水望其高下高下既定乃为位而平地 古文臬假借字于所平之地中央树八尺之臬以悬正之眡之以其景将以正四方也何晏景福殿赋制无细而不协

于规景作无微而不违于水臬又曰涣若云梁之承天张铄注梁高如云虹之状通典天水郡有大坂名曰隄亦曰隄山三秦记其坂九迴上者七日乃越顏师古汉书注隄谓隄坂即今之隄山也班固西都赋因瓌材而究奇吕延济注瓌美也图经潇水去陵零县三十里源出九疑山至永与湘水合湘水在陵零县北十五里其原自全来与潇水合二水合流谓之潇湘甘泉赋配帝居之悬圃兮西京赋仰福帝居薛综注帝居谓太微宫五帝所居福犹同也言长安宫上与之法矣诗大雅乃立应门应门将将毛传云将将严正也瓌音规】观夫明堂之宏壮也则突兀矐矐乍明乍蒙若【萧本繆本俱脱若字】大古元气之结空龕嵒嵒若鬼若巢似天阊地门之开闔【突兀高也说文矐矐日欲明也子虚赋龕嵒崔巍郭璞注龕嵒崔嵬皆高峻貌西京赋状鬼峩以岌巢张铄注鬼峩岌巢高壮貌甘泉赋天阊决兮地垠开顏师古注天阊天门之阊也嵒音竦又音宗】尔乃划崙以岳立郁穹崇而鸿纷冠百王以【繆本作而】垂勲烛万象而腾文孳惚恍以洞启呼嵌岩而傍分又比乎崑山之天柱矗九霄而垂云【增韵划剖也木华海赋后龙门之崙李善注崙高貌司马相如长门赋正殿嵬以造天兮鬱并起而穹崇鲁灵光殿赋彤彤灵宫岌穹崇又羌瓌譎而鸿纷刘良注鸿大也纷多也言奇异之壮大而多也孝经钩命诀地以舒形万象咸载潘岳藉田赋闾闔洞启甘泉赋嵌岩岩其龙鳞韵会嵌岩山险貌河图玉版崑仑山天中柱也神异经崑仑之山有铜柱焉其高入天所谓天柱也围三千里圆如削韵会矗耸上貌沈约诗托慕九霄中张铄注九霄九天仙人所居也按道书九霄之名谓赤霄碧霄青霄绛霄黔霄紫霄练霄玄霄缙霄也一说以神霄青霄碧霄丹霄景霄玉霄琅霄紫霄大霄为九霄划音画崙音宅音额孳音哮嵌音近龕音触】于是结构乎黄道迢嶢乎紫微络句陈以繚垣辟闾闔而启扉峥嵘嶷粲宇宙兮光辉崔嵬赫奕张天地之神威【谢朓诗结构何迢迢李善注结构谓结连构架以成屋宇也晋书黄道日之所行也半在赤道外半在赤道内李善文选注七略曰王道师天体地而行是以明堂之制内有太室象紫微宫南出明堂象太微西都赋周以钩陈之位李周翰注钩陈星名卫紫微宫今离宫别卫以取象焉鲁灵光殿赋高门拟于闾闔张载注闾闔天门也王者因以为名西都赋临峻路而启扉张铄注启开也扉门扉也迢嶢峥嵘嶷崔嵬并言山之高峻借以喻室之高峻也迢音条音层】夫其背泓黄河垠濬清洛太行郤立通谷前廓远则标熊耳以作揭豁龙门以开关点翠彩于鸿【繆本作洪】荒洞清陰乎羣山及乎烟云卷舒忽出乍没岌嵩喷伊倚日薄月雷霆之所鼓荡星斗之所伾扞【萧本作仡】掣金龙之蟠蜿挂天珠之硃硃【萧本作兀广韵泓水深也垠岸也韵会濬说文水流沙上也师古曰濬疾流也又湍也元和郡县志洛水在洛阳县西南三里河南县北四里郭璞山海经洛水出於上洛冢岭山东北经弘农至河南巩县入河潘岳籍田赋清洛浊渠引流激水元和郡县志太行山在怀州河内县北二十五里河南志太行山在怀庆府城北其山西自济源东北接河内修武辉县林县至磁州界縣亘数十里其间峯谷岩洞景物万状虽各因地立名实太行一山也为中州巨镇曹植洛神赋背伊关越轘轅经通谷陵景山李善注华延之洛阳记曰城南五十里有大谷旧名通谷史记正义括地志云熊耳山在虢州卢氏县南五十里水经注洛水之北有熊耳山双峦竞举状同熊耳东京赋太室作镇揭以熊耳薛综注揭犹表也归田錄西京龙门山夹伊水上自端门望之如双阙故谓之阙塞一统志阙塞山在河南府城西南三十里一名伊阙亦名阙口大禹疏龙门伊水出其门汉服?谓南山伊阙是也俗名龙门山鸿荒大荒也谓旷远之地也史记正义括地志云嵩山亦名太室山亦名外方山山在洛州阳城县北二十三里元和郡县志伊水在河南县东南十八里郭璞山海经注伊水出上洛卢氏县熊耳山东北至河南

洛阳县入洛广韵扞磨也隋唐佳话明堂始微于西南倾工人以木于中荐之武后不欲人见因加为九龙盘紮之状其圆盖本施一金凤至是改凤为珠羣龙捧之东京赋龙雀蟠蜿韵会挈说文持也又牵引也蟠蜿龙蛇动也郭璞江赋巨石砢砢以前郤广韵砢砢不稳貌垠音银扞音滑蟠音盘蜿音剡砢勒没切论入声】势拔五岳形张四维轧地轴以盘根摩天倪而创规楼台崛岉以奔附城阙崑岑【萧本作嵌崑】而蔽亏珍树翠草含华扬蕤日瑤井之荧荧拖玉绳之离离华盖以倪潏仰太微之参差【淮南子横四维而含陰阳又曰东北为报德之维西南为背阳之维东南为常羊之维西北为号通之维高诱注四角为维也初学记纂要曰东西南北曰四方四方之隅曰四维说文轧轳也初学记河图括地象曰崑仑者地之中也地下有八柱柱广十万里有三千六百轴互相牵制名山大川孔六相通北堂书钞河图括地象云崑仑之山横为地轴庄子和之以天倪陆德明注倪李云分也崔云或作霓际也天倪谓天之边际也鲁灵光殿赋隆崛岉乎青云刘良注隆崛岉极高貌子虚赋崑崙参差日月蔽亏思玄赋慕历阪之崑崙张铄注崑崙高貌左思魏都赋珍树猗猗曹摅诗严霜凋翠草南都赋芙蓉含华吴都赋羽毛扬蕤说文蕤草木花垂貌鲍照诗参差玉绳高掩映瑤井没瑤井玉井也晋书玉井四星在参左足下主水浆以给厨博雅荧荧光也太平御览春秋元命苞曰玉衡北两星为玉绳玉之为言沟刻也瑕而不掩折而不伤宋均注曰绳能直物故名玉绳沟谓作器甘泉赋?北极之嶙嶙应劭注?至也说文?刺也甘氏星经华盖十六星在五帝座上正吉帝道昌星邪倾凶陆机感时赋望八极之曛潏普宇宙而寥廓倪潏即曛潏广大之貌史记正义太微宫垣十星在翼轸北天子之宫庭五帝之座十二诸侯之府也张衡灵宪太微为五帝之庭明堂之房春秋合诚图太微其星十二四方 轧音握倪音厓又音霓崛音倔岉音物崑音吟岑音近层荧音萤倪他曩切汤上声】拥以禁局横以武库献房心以开凿瞻少阳而举措采殷制酌夏步杂以代室重屋之名括以辰次火木之数壮不及奢丽不及素层檐屹【萧本作岬】其霞矫广厦郁以云布掩日道遏风路阳乌转影而翻飞大鹏横霄而侧度【禁局禁门也西京赋武库禁兵薛综注武库天子主兵器之宫也史记索隐春秋说题辞云房心为明堂天王布政之宫晋书天文志房四星为明堂天子布政之宫也心三星天王正位也中星曰明堂天子位鲁灵光殿赋承明堂於少阳汉书少阳者东方也考工记夏后氏世室堂修二七广四修一五室三四步四三尺九阶四旁两夹牕白盛门堂三之二室三之一郑康成注夏度以步令堂修十四步其广益以四分修之一则堂广十七步半堂上为五室象五行也三四步室方也四三尺以益广也木室于东北火室于东南金室于西南水室於西北其方皆三步其广益之以三尺土室于中央方四步其广益之以四尺此五室居堂南北六丈东西七丈代室即世室也唐以太宗讳改世为代也又考工记殷人重屋堂修七寻堂崇三尺四阿重屋郑康成注重屋者王宫正堂若大寝也其修七寻五丈六尺放夏周则其广七寻七丈二尺也五室各二寻蔡邕明堂论夏后氏曰世室殷人曰重屋周人曰明堂春秋合诚图明堂在辰巳者言在水火之际辰水也已火也水生数三火成数七故在三里之外七里之内汉书广夏之下细旃之上师古注广夏大屋也夏厦通用西都赋星罗云布汉书日有中道中道者黄道一曰光道北至东井去北极近南至牵牛去北极远东至角西至娄去极中张协七命阳乌为之顿羽李善注春秋元命苞曰阳成于三故日中有三足乌乌者阳精张铄注阳乌日中乌也 局音駒屹鱼乞切银入声】近则万木森下千宫对出熠乎光碧之堂灵乎琼华之室锦烂霞駮星错波沕飒萧寥以飏飏宵陰郁以栢密含佳气之青?吐祥烟之郁嶺【缪本作律 十洲记有墉城金台玉楼相鲜如流精之阙光碧之堂琼华之室韵会熠盛光也广韵灵光也鲁灵光殿赋霞

駁云蔚木华海赋激势相沕刘良注沕浪相拂也锦烂霞駁者言其鲜丽如锦彩之灿烂云霞之斑驳也星错波沕者言其布列如天星之错落水波之叠起也吴都赋与风?扬?浏飏飏张铄注飏飏风声也韵会窈深远也通作窈马融长笛赋密栳叠重李善注密栳密如栳也论衡王莽时谒者苏伯阿能望气使过舂陵城郭郁郁葱葱及光武到河北与伯阿相见问曰卿前过舂陵何用知其佳气也伯阿对曰见其郁郁葱葱耳尔雅青谓之葱淮南子青葱苓茏江总诗几遇祥烟初郭璞江赋时郁律其如烟李善注郁律烟上貌玉海洛阳宫阙疏偃师去宫四十三里望朱爵玉阙德阳其上郁律与天连 熠音逸炅音憬飏音搜窈音杳】九室窈窕五闾联绵飞楹磊砢走拱夤缘云楣立岌以横绮彩桷攢栾【萧本作岌】而仰天皓壁昼朗朱薨晴鲜赭栏各落偃蹇霄汉翠楹回合蝉联汗漫杳苍穹之絶垠跨皇居之大半远而望之赫煌煌以辉辉忽天旋而云昏迫而察之粲炳焕以照烂倏山讹而晷换蔑【萧本作夸】蓬壶之海楼吞岱宗之日观【三辅黄图大戴礼云明堂九室考工记云明堂五室称九室者取象阳数也五室者象五行也郭璞尔雅注窈窕闲隙也说文窈深远也窕深肆极也韵会闾宫中之门也增韵宫中相通小门西京赋繚垣繚联薛综注绵联犹连蔓也鲁灵光殿赋万楹丛倚磊砢相扶李善注磊砢壮大貌李周翰注磊砢参差不齐貌拱柱头斗拱也夤缘连络也吴都赋夤缘山岳之岵西京赋绣栒云楣薛综注楣梁也吕延济注云楣画云饰之说文桷榑也椽方曰桷韵会栾曲栒木也柱上横木承栋者谓之栒曲栒谓之栾说文薨屋栋也广韵赭赤色也西都赋神明郁其特起遂偃蹇而上跻李善注偃蹇高貌吴都赋蝉联邱陵刘逵注蝉联不絶貌汗漫空中元气弥布之处详见大鵬赋注苍穹天也梁书感誓苍穹张华鹪鹩赋或托絶垠之外李善注絶垠天边之地也何晏景福殿赋备皇居之制度汉书今汉有天下太半韦昭曰凡数三分有二为太半有一分为少半景福殿赋远而望之若摘朱霞而曜天文迫而察之若仰崇山而戴垂云博雅煌煌光也说文晷日影也拾遗记三壶海中三山也一曰方壶则方丈也二曰蓬壶则蓬莱也三曰瀛壶则瀛洲也形如壶器此三山上广中狭下方皆如工制犹华山之似削成水经注应劭汉官仪云泰山东南山顶名曰日观鸡一鸣时见日始欲出长三丈许故以名焉 磊音垒砢音裸拱音拱夤音寅薨音萌赭音怪晷音癸】猛虎失道潜虬蟠【萧本作登】梯经通天而直上俯长河而下【萧本作复】低玉女攀星于网户金娥纳月于璇题藻井彩错以舒蓬天牕桷翼而衔霓扶标川而罔足拟跟絪而罢跻要离欻矐而外丧精视冰背而中迷【失字当是夹字之讹猛虎夹道谓刻为猛虎以夹立道上潜虬蟠梯谓镂作虬龙以蟠绕梯侧也楚辞章句有角曰龙无角曰虬谢灵运诗潜虬媚幽姿蔡邕明堂论通天屋径九丈陰阳九六之变也高八十一尺黄钟九九之实也二十八柱列于四方亦七宿之象也楚辞网户朱缀王逸注网户绮文镂也雍録网户者刻为连文通相缀属其形如网也宋玉曰网户朱缀刻方连是也既曰刻则是雕木为之其状如网耳鲍照诗璇题纳行月吕向注璇玉也题椽头也甘泉赋璇题玉英应劭注题头也桷椽之头皆以玉饰言其英华相矐也西京赋蒂倒茄于藻井薛综注藻井当栋中交木方为之如井干也梦溪笔谈屋上覆檁古人谓之绮井亦曰藻井又谓之覆海今令文中谓之鬪八吴人谓之罍顶唯宫室祠观有之海録碎事藻井屋栋之间为井形而加水藻之饰所以压火灾也胡三省通监注风俗通云殿堂象东井刻为荷菱荷菱水物所以厌火杜佑曰汉宫殿率号屋仰为井皆画水藻莲芡之属以厌火何晏景福殿赋繚以藻井编以綵疏又王文考灵光殿赋圆渊方井反植荷蕖盖为方井而画荷蕖其上也鲁灵光殿赋天牕绮疏张载注天牕高牕也西京赋突倒投而跟絪说文跟足踵也毛萑诗传跻升也韵会矐失明也要离事用此处不合恐误精视亦未详 虬音求桷音奭又音赫

跟音根絪音卦欸音忽】亘以复道【萧本下多一而字】接乎宫掖坳入西楼是【缪本作实】为崑仑前疑後丞【缪本作前丞後疑】正仪躅以出入九夷五狄顺方面而来奔【韵会亘横亘也广韵通也增韵延袤也史记乃作复道韦昭曰复道阁道也韵会宫掖宫旁舍也司马相如赋坳入曾宫之嵯峨张揖注坳并也汉书济南人公玉带上黄帝时明堂图明堂中有一殿四面无壁以茅盖通水水圜宫垣为复道上有楼从西南入名曰昆仑天子从之入以拜祀上帝焉尚书大传古者天子必有四邻前曰疑後曰丞左曰辅右曰弼天子有问无以对责之疑可志而不志责之丞可正而不正责之辅可扬而不扬责之弼其爵视卿其禄视次国之君礼记昔者周公朝诸侯于明堂之位天子负斧依南鄉而立三公中阶之前北面东上诸侯之位阼阶之东西面北上诸伯之国西阶之西东面北上诸子之国东北面东上诸男之国西面东上九夷之国东门之外西面北上八蛮之国南门之外北面东上六戎之国西门之外东面南上五狄之国北门之外南面东上九采之国应门之外北面东上四塞世告至此周公明堂之位也後汉书夷有九种曰畎夷于夷方夷黄夷白夷赤夷元夷风夷阳夷礼记正义东方谓之夷者风俗通云东方人好生万物觝触地而生夷者觝也其类有九依东夷传九种一曰元菟二曰乐浪三曰高骊四曰满饰五曰鳧與六曰索家七曰东屠八曰倭人九曰天鄙北方曰狄者风俗通云父子嫂叔同穴无别狄者辟也其行邪辟其类有五李巡注尔雅云一曰月支二曰秽貊三曰匈奴四曰单于五曰白屋 复音福掖音亦坳房刎切焚上声躅音逐】其左右也则丹陛嵒嵒彤庭煌煌列宝鼎敌金光流辟雍之滔滔像环海之汤汤辟青阳啓总章廓明台而布元堂俨以太庙处乎中央发号施令采时顺方【薛道衡隋高祖颂序趋事紫宸驱驰丹陛韵会陛升堂之阶也西都赋玉阶彤庭李善注汉书曰昭阳舍中庭彤朱而殿上髹漆张铣注彤赤色也以丹漆饰庭旧唐书万岁通天元年铸铜为九州鼎既成置于明堂之庭各依方位列焉神都鼎高一丈八尺受一千八百石冀州鼎名武兴雍州鼎名长安兖州鼎名日观青州鼎名少阳徐州鼎名东源扬州鼎名江都荊州鼎名江陵梁州鼎名成都其八州鼎高一丈四尺各受一千二百石司农卿宗晋卿为九鼎使都用铜五十六万七千一百一十二斤鼎上图写本州山川物产之象仍令工书人著作郎贾膺福等分题之左尚方署令曹元廓图画之鼎成自元武门外曳入令宰相诸王南北牙宿卫兵十余万人并仗内大牛白象共曳之则天自为曳鼎歌令相倡和九鼎初成欲以黄金千两涂之纳言姚璿曰鼎者神器贵于质朴无假别为浮饰臣观其状先有五采辉焕错杂其间岂待金色为之炫耀乃止大戴礼明堂外水曰辟雍艺文类聚桓谭新论曰王者作圆池如璧形实水其中以圜雍之名曰辟雍言其上承天地以班教令流转王道周而复始独断天子曰辟雍谓流水四面如璧以节观者李善文选注三辅黄图曰明堂辟雍水四周于外象四海也毛萇诗传滔滔流貌汤汤水盛貌班固辟雍诗乃流辟雍辟雍汤汤蔡邕明堂论明堂者天子太庙所以崇祀其祖以配上帝者也东曰青阳南曰明堂西曰总章北曰玄堂中曰太室人君南面向明而治故虽有五名而主以明堂也其正中皆曰太庙取其宗祀之貌则曰清庙取其正室之貌则曰太庙取其尊崇则曰太室取其向明则曰明堂取其四门之学则曰太学取其四面周水环如璧则曰辟雍异名而同事其实一也书罔命发号施令罔有不臧高诱淮南子注明堂王者布政之堂上圆下方堂四出各有左右房谓之个凡十二所王者月居其房告朔朝历颁宣其令宋均礼含文嘉注明堂者布政之宫在国之阳三室四面十二法十二月也天子孟春上辛于南郊总受十二月之政还藏于祖庙月取一政颁于明堂也蔡邕明堂月令论天子发号施令祀神受职每月异礼故谓之月令所以顺陰阳奉四时効气物行王政也成法具备各从时月藏之明堂所以示承

祖考神明不敢泄瀆之义 𪔐音谔汤音商】其阊域也三十六户七十二牖度筵列位南七西九【繆本作西八东九】白虎列序而躔踞青龙承隅而蚺螭【大戴礼明堂凡九室一室而有四户八牖三十六户七十二牖考工记周人明堂度九尺之筵东西九筵南北七筵堂崇一筵五室凡室二筵尔雅东西墙谓之序邢昺疏云此谓室前堂上东厢西厢之墙也所以序次分别内外亲疏故谓之序也尚书顾命云西序东向敷重底席东序西向敷重丰席及礼经每云东序西序皆谓此也沈括笔谈今谓两廊为东西序非也序乃堂上东西壁在室之外者躔踞动貌详见大鹏赋注上林赋青龙蚺螭于东厢李善注蚺螭龙行貌 蚺於九切忧上声螭音柳】其深沈奥密也则赤燁掌火招拒司金灵威制阳叶【萧本作汁】光摧阴坤斗主土据乎其心【南齐书按礼及孝经援神契并云明堂有五室天子每月于其室听朔布教祭五帝之神配以有功德之君艺文类聚黄图曰明堂者明天地之堂也所以顺四时行月令宗祀先王祭五帝故谓之明堂尚书帝命验帝者承天立五府以尊天重象苍曰灵府赤曰文祖黄曰神斗白曰显纪黑曰元矩郑康成注天有五帝集居太微降精以生圣人故帝者承天立五帝之府是为天府唐虞之天府夏之世室殷之重屋周之明堂皆同矣其苍帝灵威仰之府名灵府周曰青阳其赤帝赤燁怒之府名文祖火积光明文章之祖故名文祖周曰明堂其黄帝含枢纽之府名曰神斗斗主也土精澄静四行之主故谓神斗周曰太室其白帝白招拒之府名显纪纪统也金精断割万物以成故谓之显纪周曰总章其黑帝叶光纪之府名曰元矩矩法也水精元昧能权轻重故谓元矩周曰元堂据此本文坤斗当是神斗之讹 燁音飘叶音协或作汁亦读为协】若乃熠燿五色张皇万殊人物禽兽奇形异模势若飞动瞪眄睢盱明君暗主忠臣烈夫威政兴灭表示贤愚【繆本作表贤示愚 此言室中图画之象韵会熠燿鲜明貌书康王之诰张皇六师正义云皇大也鲁灵光殿赋齐首目以瞪眄徒 以眊眊又曰鸿荒朴略厥状睢盱广韵瞪直视貌说文眄邪视也睢仰目也盱张目也 熠音揖燿音耀瞪音瞪眄音勉睢音挥盱音吁】于是王正孟月朝阳登曦天子乃施苍玉饗苍螭临乎青阳左个方御瑶瑟而弹鸣丝展乎国容辉乎皇仪傍瞻神台顺观云之轨俯对清庙崇配天之规欽若肸鬻维清缉熙崇牙树羽荧煌葳蕤纳六【萧本作五】服之贡受万邦之籍张龙旗与虹旌攢金戟与玉戚延五更进百辟奉【萧本作举】珪瓚献琛帛顒昂俯倮俨容叠迹乃洁蒹醢修粢盛奠三牺荐五牲享于神灵太祝正辞庶官精诚鼓大武之隐辘张钧天之铿鍠【繆本作匊】孤竹合奏空桑和鸣尽六变齐九成羣神来兮降明庭盖圣王之所以孝治天下而享祀宵冥也【春秋春王正月正义云正是时王所建故以王字冠之言是今王之正月也广韵曦日光也淮南子孟春之月天子衣青衣乘苍龙服苍玉建青旗东宫御女青色衣青采鼓琴瑟朝于青阳左个以出春令高诱注马七尺已上曰龙明堂中方外圜通达四出各有左右房谓之个犹隔也东出谓之青阳南出谓之明堂西出谓之总章北出谓之元堂是月天子朝日告朔行令于左个之房东向堂北头室也甘泉赋四苍螭兮六素虬吕向注苍螭苍龙也凡称龙者皆马也言龙美之也班固东都赋究皇仪而展帝容吕延济注言尽帝王之容仪也太平御览礼统曰所以置灵台者何以尊天重民备灾御害豫防未然也夫王者当承顺天地御节阴阳也夏所以为清台何明明相承太平相续故为清台殷为神台周为灵台何质者具天而王天者称神文者具地而王地者称灵是其易也後汉书建初三年正月宗祀明堂礼毕登灵台望云物左传清庙茅屋杜预注清庙肃然清静之称也正义曰清庙者宗庙之大称孝经昔者周公郊祀后稷以配天宗祀文王于明堂以配上帝上林赋肸鬻布写顔师古注肸鬻盛作也李善注司马彪曰肸过也芬芳之过若鬻之布写也吕延济注肸鬻天中游气也言香气发越积

浮而似之诗周颂维清缉熙文王之典郑笺曰缉熙光明也又周颂设业设虞崇牙树羽毛传曰业大板也所以饰栒为悬也捷业如锯齿或曰画之植者为虞横者为栒崇牙上饰卷然可以悬也树羽置羽也正义曰设其横者之业又设其植者之虞其上刻为崇牙因树置五采之羽以为之饰又云虞者立于两端栒则横入于虞其栒之上加于大板侧着于栒其上刻为崇牙似锯齿捷业然故谓之业牙即业之齿矣以其形卷然得挂绳于上故言可以悬也树羽置羽者置之于栒虞之上角汉礼器制度云为龙头及颌曰衔璧壁下有旄牛尾礼记夏后氏之龙箎虞殷之崇牙周之璧翬郑康成注箎虞所以悬钟磬也横曰箎饰之以鳞属植曰虞饰之以羸属羽属箎以大板为之谓之业殷又于龙上刻画之为崇牙以挂悬紃也周人画翬为翬载以璧垂五采羽于其下树于箎之角上饰弥多也正义曰殷之崇牙者谓于箎之上刻画木为崇牙之形以挂钟磬皇氏云崇牙者崇重也谓刻画大板重叠为牙杜氏通典乐悬横曰箎豎曰虞饰箎以飞龙节趺以飞廉钟虞以鸞兽磬虞以鸞鸟上则树羽旁悬流苏周制也悬以崇牙殷制也饰以博山後代所加也何晏景福殿赋流羽毛之葳蕤张铉注葳蕤羽毛美貌周礼邦畿方千里其外方五百里谓之侯服其贡祀物又其外方五百里谓之甸服其贡宾物又其外方五百里谓之男服其贡器物又其外方五百里谓之采服其贡服物又其外方五百里谓之卫服其贡材物又其外方五百里谓之要服其贡货物郑康成注此六服去王城三千五百里相距方七千里公侯伯子男封焉书周官六服羣辟罔不承德正指此六服又益稷篇云弼成五服则指甸侯绥要荒五服也诗周颂龙旗阳阳正义云龙旗者旗上画为交龙左思魏都赋虹旌摄麾以就卷李周翰注虹旌画为虹者公羊传朱干玉戚以舞大夏何休注戚斧也以玉饰斧礼记遂设三老五更羣老之席位焉郑康成注三老五更各一人也皆年老更事致仕者也天子以父兄养之示天下之孝弟也名以三五者取象三辰五星天所因以昭明天下者独断天子父事三老者适成于天地人也兄事五更者训于五品也更者长也更相代至五也能以善道改更已也取首妻男女完具者古者天子亲袒割牲执酱而馈三公设几九卿正履使者安车輶轮送迎而至其家天子独拜于屏其明旦三老诣阙谢以其礼过厚故也又五更或为叟叟老称与三老同义也通典大唐制仲秋吉辰皇帝亲养三老五更于太学所司先奏定三师三公致仕者用其德行及年高者一人为三老次一人为五更诗大雅百辟卿士媚于天子礼记王制赐圭瓚然後为鬯郑康成注圭瓚鬯爵也又祭统君执圭瓚康成注圭瓚裸器也以圭璋为柄又明堂位灌用玉瓚大圭康成注瓚形如盘容五升以大圭为柄是谓圭瓚又康成毛诗笺圭瓚之状以圭为柄黄金为勺青金为外朱中央矣诗鲁颂来献其琛毛传曰琛宝也诗大雅颙颙印印如圭如璋毛传曰颙颙温貌印印盛貌郑笺曰体貌则颙颙然敬顺志气则印印然高朗史记一命而倭再命而伋三命而俯服?注倭伋俯皆恭敬之貌也刘孝标广絶交论趋走丹墀者叠迹此言俯倭者状其鞠躬将事叠迹者状其骏奔在庙礼记水草之菹陆产之醯郑康成注水草之菹芹茆之属陆产之醯蜃蜾之属谷梁传天子亲耕以供粢盛范甯注黍稷曰粢在器曰盛左传为六畜五牲三牺以奉五味杜预注五牲麋鹿麋狼兔三牺祭天地宗庙三者谓之牺东都赋于是荐三牺效五牲礼神祇怀百灵周礼太祝掌六祝之辞以事鬼神示祈福祥求永贞唐书百官志太祝六人正九品上祭祀则跪读祝文左传祝史正辞信也杜预注正辞不虚称君美也正义曰正其言辞不欺诳鬼神是其信也书臯陶谟无旷庶官郑康成周礼注大武武王乐也武王伐纣以除其害言其德能成武功也上林赋隐鳞郁?是言堆垄不平之貌此作乐声用未详或者即殷麟之讹甘泉赋振殷麟而军装顔师古注殷麟盛貌也史记赵简子疾五日不知人七日寤语大夫曰我之帝所甚乐与百神游于钧天广

乐九奏万舞不类三代之乐其声动人心按淮南子九野之名中央曰钧天钧天之乐谓天乐也东都赋钟鼓铿鍠广韵铿鍠钟鼓声相杂也周礼孤竹之管空桑之琴瑟郑康成注孤竹竹特生者空桑山名述异记东海畔有孤竹焉斩而复生中为管周武王时孤竹之国献瑞笋一株空桑生大野山中为琴瑟之最者空桑也周礼凡六乐者一变而致羽物及川泽之示再变而致羸物及山林之示三变而致鳞物及邱陵之示四变而致毛物及坟衍之示五变而致介物及土示六变而致象物及天神凡乐圜钟为宫黄钟为角太簇为徵姑洗为羽鼙鼓鼙鼗孤竹之管云和之琴瑟云门之舞冬日至于地上之圜丘祭之若乐六变则天神皆降可得而礼矣郑康成注变犹更也乐成则更奏也书益稷箫韶九成正义曰成谓乐曲成也郑云成犹终也每曲一终必变更奏故经言九成传言九奏周礼谓之九变其实一也公羊传疏郑氏云乐备作谓之成王应麟曰节奏俱备谓之成备而更新谓之变邢昺孝经疏按史记云黄帝接万灵于明庭明庭即明堂也子华子黄帝之治天下也百神出而受职于明堂之庭孝经昔者明王之以孝治天下也刘峻辨命论未达宵冥之情未测神明之数宵冥幽远之意螭音鸱肸音迄蠃音响琛音郴菹音赳鍠音轰宵音杳辟音璧】然後临辟雍宴羣后陰阳为庖造化为宰餐【繆本作飧】元气洒太和千里鼓舞百寮賡歌于斯之时云油雨霈恩鸿溶兮泽汪濊四海归兮八荒会咙聒乎区宇骈闐乎阙外羣臣醉德揖让而退【书益稷羣后德让广韵庖食也贾公彦周礼疏宰者调和膳修之名周易保合太和书臯陶谟百僚师师孔传曰僚官也又书益稷臯陶拜手稽首扬言乃賡载歌曰元首明哉股肱良哉庶事康哉孔传曰賡续也赵岐孟子注油然兴云貌楚辞九叹波淫淫而周流兮鸿溶溢而滔荡汉书泽汪濊辑万国顔师古注汪濊言饶多也司马相如难蜀父老文威武纷纭湛恩汪濊顔师古注汪濊深广也说文咙杂语也聒謹语也马融长笛赋咙聒其前後李善注咙聒杂声也?即宇字籀文从禹王勃游武担山寺序龙鑣翠辇骈闐上路之游古今注阙观也古每门树两观于其前所以标表宫门也其上可居登之则可远观故谓之观人臣将朝至此则思其所阙故谓之阙其上皆丹堊其下皆画云气仙灵奇禽怪兽以昭示四方焉韵会阙说文门观也盖为二台于门外作楼观于上上图下方以其县法谓之象魏象治象也魏者言其状巍巍然高大也使民观之因谓之观两观双植中不为门阙而为道故谓之阙醉德即诗所谓饱德之义洒所蟹切筛上声濊音秒咙音彫闐音田】而圣主犹夕惕若厉惧人未安乃目极於天耳下于泉飞聪驰明无远不察考鬼神之奥推陰阳之荒下明诏班旧章振穷乏散敖仓毁玉沉珠卑宫頽墙使山泽无间往来相望帝躬乎天田后亲于郊桑弃耒反本人和时康建翠华兮萋萋鸣玉銮之缺缺游乎昇平之圃憩乎穆清之堂天欣欣兮瑞穰穰巡陵于鹑首之野讲武于骊山之旁封岱宗兮祀后土掩栗陆而苞【萧本作包】陶唐遨游乎崆峒之上汾水之阳吸沆瀣之精英黜滋味之馨香贵理国其若梦几华胥之故乡【自遨游以下至故乡三十五字繆本作遂邀崆峒之礼汾水之阳吸沆瀣之精黜滋味而贵理国其若梦华胥之故乡三十字】於是元元澹然不知所在若羣云从龙衆水奔海此真所谓我大君登明堂之政化也【周易君子终日乾乾夕惕若厉无咎王弼注终日乾乾至于夕惕犹若厉也太玄经目上于天耳下于渊东都赋申旧章下明诏礼记命有司发仓廩赐贫穷振乏絶郑玄注振犹救也史记敖仓天下转输久矣臣闻其下乃有藏粟甚多正义曰敖仓在郑州荥阳县西十五里石门之东北临汴水南带三皇山秦时置仓于敖山上故名敖仓东都赋捐金于山沈珠于渊上林赋頽墙填塹使山泽之民得至焉刘良注頽崩也言崩去苑墙以通山泽之利东都赋躬三推于天田修帝籍之千亩吕延济注天田天子之籍田也何休公羊传注礼天子亲耕东田千亩诸侯百亩后夫人亲西郊采桑以

供粢盛祭服躬行孝道以先天下东都赋遂令海内弃末而反本背伪而归真上林赋建翠华之旗顏师古注翠华之旗以翠羽为旗上葆也说文萋草盛也言旗上之翠羽萋萋然如草色之鲜缛也楚辞鸣玉鸾之啾啾王逸注鸾鸾鸟也以玉作之着于衡东京赋鸾声啾啾和铃鈇鈇薛综补注鸾在衡和在轼皆以金为铃也鈇鈇小声玉銮即玉鸾字异而义同也汉书受命于穆清顏师古注穆美也言天子有美德而政化清也甘泉赋粟穰穰兮委如山顏师古注穰穰多也唐会要贞观式令春秋仲月命使巡陵春则扫除枯朽秋则芟薙繁芜据此巡陵乃公卿事文则借为天子谒陵之称矣汉书自井十度至柳三度谓之鹑首之次秦之分也一统志骊山在陕西临潼县东南二里因骊戎所居故名山之麓温泉所出唐书开元元年十月癸卯讲武于骊山骊山固唐时讲武之地也周易正义女娲氏没次有大庭氏柏黄氏中央氏栗陆氏骊连氏赫胥氏尊卢氏混沌氏皞英氏有巢氏朱襄氏葛天氏陰康氏无怀氏凡十五世皆褒庖牺氏之号也庖包古字通用邢昺论语疏书传云尧年十六以唐侯升为天子遂以为号或谓之陶唐氏书曰惟彼陶唐世本云帝尧为陶唐氏韦昭云陶唐皆国名犹易称殷商也案经传契居商故汤以商为国号後盘庚迁殷故殷商双举历捡书传未闻帝尧居陶而以陶冠唐盖以二字为名所称或单或复也庄子黄帝立为天子十九年令行天下闻广成子在于崆峒之上故往见之又曰尧治天下之民平海内之政往见四子藐姑射之山汾水之阳窅然丧其天下焉楚辞飡六气而饮沆瀣王逸注陵阳子明经言冬饮沆瀣者北方夜半气也张衡思玄赋餐沆瀣以为粮注云沆瀣夕霞也吕向注沆瀣露气也列子黄帝昼寝梦游於华胥氏之国华胥氏之国相传在弇州之西台州之北不知斯齐国几千万里盖非舟车足力之所及神游而已其国无师长其民无嗜欲自然而已不知乐生不知恶死故无夭殤不知亲已不知疏物故无爱憎不知背逆不知向顺故无利害都无所爱憎都无所畏忌入水不溺入火不热斫挞无痛伤指摘无痠痒乘空如履实寝虚若处牀云雾不碍其视雷霆不乱其聽美恶不滑其心山谷不蹶其步神行而已黄帝既寤怡然自得召天老力牧太山稽告之曰朕闲居三月斋心服形思有以养身治物之道弗获其术疲而睡所梦若此今知至道不可以情求矣朕知之矣朕得之矣而不能以告若矣又二十有八年天下大治几若华胥氏之国後汉书下为元元所福章怀太子注元元谓黎庶也史记索隐战国策云制海内子元元高诱注元元善也又按姚察云古者谓人云善人也因善为元故云黎元其言元元者非一人也顾野王云元元犹喁喁可怜爱貌未安其说聊记异也长杨赋海内澹然李善注澹安也李周翰注谓晏然无事也汾音焚沆下党切杭上声瀣音械】岂比夫秦赵吴楚争高竞奢结阿房与丛【萧本作崇】台建姑苏及章华非享祀与严配徒掩月而凌霞由此观之不足称也况瑶台之巨丽复安可以语哉【史记秦始皇以为咸阳人多先王之宫庭小吾闻周文王都丰武王都镐丰镐之间帝王之都也乃营作朝宫渭南上林苑中先作前殿阿房东西五百步南北五十丈上可以坐万人下可以建五丈旗周驰为阁道自殿下直抵南山表南山之巔以为阙为复道自阿房渡渭属之咸阳以象天极阁道絶汉抵营室也阿房宫未成成更欲择令名名之作宫阿房故天下谓之阿房宫水经注丛台六国时赵王之台也郡国志曰邯鄲有丛台故刘劭赵郡赋曰结云阁于南宇立丛台于少阳也一统志丛台在广平府邯鄲县北赵灵王所筑因其丛杂而名吴越春秋吴王起姑苏之台三年聚材九年乃成高见三百里吴地记姑苏台在吴县西南三十五里阖闾造经营九年始成其台高三百丈望见三百里外作九曲路以登之左传楚子成章华之台杜预注台今在华容城内水经注离湖在华容县东七十五里湖侧有章华台台高十丈基广十五丈左邱明楚筑台于章华之上故韦昭以为章华亦地名也王与伍举登之举

曰台高不过望国之氛祥大不过容宴之俎豆盖讥其奢而谏其失也太平寰宇记章华台在荆州江陵县东三十里按渚宫故事云楚灵王所筑台形三角孝经孝莫大于严父严父莫大于配天淮南子晚世之时帝有桀纣为旋室瑶台象廊玉牀新序纣作瑶台疲民力殫民财】敢扬国美遂作辞曰

穹崇明堂倚天开兮寵嵒鸿蒙构瓌材兮偃蹇块莽【萧本作潏】邈崔嵬兮周流辟雍岌灵台兮赫奕日喷风雷宗祀肸鬯王化弘恢镇八荒通九垓四门启兮万国来考休徵兮进贤才俨若皇居而作固穷千祀兮悠哉【司马相如长门赋鬱并起而穹崇李善注穹崇高貌羽猎赋鸿蒙沆茫顔师古注鸿蒙沆茫广大貌寵嵒瓌材偃蹇俱已见前注块莽广远寥廓之意上林赋过乎泱潏之野杜甫八哀诗征尘昏块潏泱潏块莽其义同也封禅书上畅九垓下泝八埏服?注该重也天有九重东都赋登灵台考休徵刘良注休美也徵应也张载劔阁铭作固作镇左思魏都赋虽踰千祀而怀旧藴于遐年古赋辨体太白明堂赋从司马杨班诸赋来气豪辞艳疑若过之论其体格则不及远甚盖汉赋体未甚俳而此篇与大猎赋则悦于时而俳甚矣晦翁云白有逸才尤长于诗而其赋乃不及魏晋斯言信夫穹音芎从音宗瓌音规垓音该】

大猎赋【并序】

白以为赋者古诗之流辞欲壮丽义归博远【萧本作达】不然何以光赞盛美感天动神【班固两都赋序赋者古诗之流也李善注毛诗序曰诗有六义二曰赋故赋为古诗之流也子夏诗序动天地感鬼神莫近于诗】而相如子云竞夸辞赋历代以为文雄莫敢诋訾臣谓语其略窃或徧其用心子虚所言楚国不过千里梦泽居其大半而齐徒吞若八九三农及禽兽无息肩之地非诸侯禁淫述职之义也【司马相如子虚赋臣闻楚有七泽臣之所见盖特其小小者耳名曰云梦云梦者方九百里乌有先生曰齐东渚巨海南有琅琊观乎成山射乎之罘浮渤澥游孟诸邪与肃慎为邻右以汤谷为界秋田乎青邱旁徨乎海外吞若云梦者八九其于胷中曾不蒂芥上林赋亡是公曰夫使诸侯纳贡者非为财币所以述职也封疆画界者非为守御所以禁淫也从此观之齐楚之事岂不哀哉地方不过千里而囿居九百是草木不得垦辟而民无所食也周礼一曰三农生九谷郑康成注郑司农云三农平地山泽也玄谓三农原泽及平地也左传子驷请息肩于晋杜预注以负担喻也】上林云左苍梧右西极考其实地周褒才经数百【上林赋独不闻天子之上林乎左苍梧右西极丹水更其南紫渊经其北文穎注苍梧郡属交州在长安东南故言左尔雅云西至于豳国为西极在长安西故言右汉书武帝广开上林东南至宜春鼎湖御宿昆吾旁南山西至长杨五柞北绕黄山滨渭而东周褒数百里师古曰褒长也褒音茂】长杨夸远设网为周陆放麋鹿其中以搏攫充乐

羽猎于灵台之囿围经百里而开殿门当时以为穷【萧本作雄】壮极丽迨今观之何齷齪之甚也【杨雄长杨赋序上将大夸远人以多禽兽命右扶风发民入南山西自褒斜东至弘农南驱汉中张罗网置罟捕熊罴猪虎豹犵狁狐猫兔麋鹿载以槛车输长杨射熊馆以网为周陆纵禽兽其中令远人手搏之自取其获上亲临观焉是时农民不得收敛雄从至射熊馆还上长杨赋李善注李奇曰陆遮禽兽围阵也扬雄羽猎赋帝将惟田于灵之囿虎落三峻以

为司马围经百里而为殿门吴都赋嶢嶢而算张铄注嶢嶢局小貌 陆音区】但王者以四海为家万姓为子则天下之山林禽兽岂与衆庶异之而臣以为不能以大道匡君示物周博平文论苑之小窃为微臣之不取也【史记天子以四海为家汉书宣帝纪奉承祖宗子万姓陈书太建六年诏王者以四海为家万姓为子一物乖方夕惕犹厉】今圣朝园池遐荒殫穷六合以孟冬十月大猎于秦亦将曜威讲武扫天荡野岂荒淫【繆本作淫荒】侈靡非三驱之意耶臣白作颂折中厥美【西都赋耀威灵而讲武事周易王用三驱失前禽正义曰三驱之礼先儒皆云三度驱禽而射之也三度则已又汉书田狩有三禽之制顔师古注三驱之礼一为乾豆二为宾客三为充君之庖也楚辞令五帝以折中王逸注折犹分也分明言是与非也赋意谓分之而求其中惟兹所颂美较胜古人也】其辞曰

粤若皇唐之契天地而袭气母兮粲五叶之葳蕤惟开元廓海?而运斗极兮总六圣之光熙诞金德之淳精兮漱玉露之华滋文章森乎七曜兮制作参乎两仪括衆妙而为师明无幽而不烛兮泽无远而不施慕往昔之三驱兮顺生杀于四时【庄子狝韦氏得之以契天地伏羲氏得之以袭气母陆德明音义挈司马云要也得天地要也崔云成也司马云袭入也气母元气之母也崔云取元气之本叶世也自高祖至玄宗凡五世葳蕤草木盛貌喻言其粲美如草木之盛也尔雅北戴斗极为空桐邢昺疏斗北斗也极者中宫天极星其一明者太乙之常居也以其居天之中故谓之极极中也北斗拱极故曰斗极长杨赋高祖奉命顺斗极运天阙李善注服?曰随天斗极星运转也雒书曰圣人受命必顺斗极宋均尚书中候注曰顺斗机为政也六圣者高祖太宗高宗武后中宗睿宗也玄宗诞生于八月故以金德玉露颂言也古诗缘叶发华滋初学记日月五星谓之七曜河图括地象易有太极是为两仪两仪未分其气混沌清浊既分伏者为天偃者为地傅玄洪业篇神圣参两仪刘琨表陛下明并日月无幽不烛】若乃严冬惨切寒气凜冽不周来风玄冥掌雪木脱叶草解节土囊烟陰火井冰闭是月也天子处乎玄堂之中滄【繆本作淩】八水兮休百工考王制兮遵国风乐农人之闲隙兮因校猎而讲戎【凜冽寒气严猛之意传咸神泉赋六合萧条严霜凜冽春秋正义易纬通卦验云立冬不周风至史律书不周风居西北主杀生月令孟冬之月其神玄冥谢庄月赋木叶微脱国语本见而草木节解韦昭注本氏也谓寒露之後十日阳气尽草木之枝节皆理解也宋玉风赋盛怒于土囊之日李善注土囊大穴也盛弘之荆州记曰宜都佷山县有山山有穴口大数尺为风井土囊当此之类也华阳国志临邛县有火井夜时光映上照民欲其火光以家火投之顷许如雷声火焰出通耀数十里以竹筒盛其光藏之可拽行终日不灭鲍照诗水闭寒方壮月令孟冬之月天子居玄堂左个郑康成注玄堂左个北堂西偏也说文滄寒也三辅黄图关中八水皆出入上林苑霸水出蓝田谷西北入渭滻水亦出蓝田谷北至霸陵入霸泾水出安定泾阳开头山东至阳陵入渭渭水出陇西首阳县鸟鼠同穴山东北至华陰入河丰水出鄠县南山丰谷北入渭镐水在昆明池北牢水出鄠县西南入潦谷北流入渭潏水在杜陵从皇子陂西北流经昆明池入渭骆宾王诗五纬连影集星纏八水分流横地轴许景先诗千门望成锦八水明如练皆谓此八水也吕氏春秋霜始降则百工休高诱注霜降天寒朱漆不坚故百工休不复作器东都赋若乃顺时节而蒐狩简车徒以讲武则必临之以王制考之以风雅李善注礼记王制曰天子诸侯无事则岁三田田不以礼曰暴天物诗国风驹虞驷铁是也诗小雅车攻吉日是也左传春蒐夏苗秋猕冬狩皆于农隙以讲事也汉书成帝纪行幸长杨宫从外客大校猎如淳曰合军聚衆有幡校擊鼓也周礼校人掌王田猎之马故谓之校猎顔

师古曰如说非也此校谓以木自相贯穿为阑校耳校人职云六廐成校是则以遮阑为义也校猎者大为栏校以遮禽兽而猎取也军之幡旗虽有校名本因部校此无豫也上林赋天子校猎李奇曰以五校兵出猎也李周翰注校猎谓出校队而猎也 滄音创】乃使神兵出于九阙天仗罗于四野徵水衡与林虞辨土物之衆寡千骑飚扫万乘雷奔梢扶桑而拂火云兮括月窟而搜寒【萧本作塞】阊赫壮观于今古橐摇荡于乾坤此其大略也而内以中华为天心外以穷髮为海口豁咽喉以洞开吞荒裔而【缪本作以】尽取大章按步以来往夸父振策而奔走足迹乎日月之所通囊括乎陰阳之未有【陆机辩亡论神兵东驱奋寡犯衆九阙即九门也谢朓郊祀曲整蹕游九阙清箫闻八埏汉书水衡都尉武帝元鼎二年初置掌上林苑应劭注古山林之官曰衡掌诸池苑故称水衡张宴注主都水及上材苑故曰水衡周礼有山虞泽虞皆掌山泽之官今称林虞者变文言之也扶桑在东方日出之地详见大鹏赋注长杨赋西压月窟服注月窟月所生也大人赋軼先驱于寒门应劭注寒门北极之门也庄子穷髮之北李注云髮毛也司马彪注北极之下无毛之地也咽喉谓险要扼塞之地李尤函谷关铭函谷险要襟带咽喉潘岳西征赋胸中豁其洞开荒裔荒服诸裔之地班固燕然山铭铄王师兮征荒裔方言裔外国之总名郭璞注边地为裔亦四夷通以为号也淮南子禹乃使大章步自东极至于西极二亿三万三千五百里七十五步使竖亥步自北极至于南极二亿三万三千五百里七十五步高诱注大章竖亥善行人皆禹臣也列子夸父不量力欲追日影逐之于隅谷之际渴欲得饮赴饮河渭河渭不足将走北饮大泽未至道渴而死弃其杖尸膏肉所浸生邓林邓林弥广数千里焉张协七命夸父为之投策策杖也顏延之诗振策睠东路贾谊过秦论囊括四海之意张晏注括结囊也言其能包含天下也刘良注括盛也犹囊盛而结之飚音标夸音夸】君王于是撞鸿钟发銮音出凤阙开宸襟驾玉辂之飞龙历神州之层岑游五柞兮瞰三危挟细柳兮过上林攢高牙以总总兮驻华盖之森森于是擢倚天之劍弯落月之弓崑仑叱兮可倒宇宙噫兮增雄河汉为之却流川岳为之生风羽毛【缪本作旄】扬兮九天絛猎火然兮千山红【礼记正义尚书传曰天子将出撞黄钟之钟右五钟皆应入则撞蕤宾之钟左五钟皆应羽猎赋撞鸿钟建九旒尔雅翼有虞氏之辂谓之鸾车亦曰鸾辂明堂月令春则乘之蔡邕称以金为鸾鸟悬铃其中施于衡为迟速之节崔豹古今注亦以为五辂衡上金雀者朱鸟也口衔铃铃谓之銮礼云衡前朱雀或谓朱雀者鸾鸟以前有鸾鸟故谓之鸾鸾口有铃故谓之銮事一而义异然则鸟之鸾主形铃之銮主声铃之为銮亦以象鸾鸟之声为名耳史记建章宫其东则凤阙高二十余丈水经注汉武故事曰凤阙高二十丈关中记曰建章宫圆阙临北道有金凤在阙上高丈余故号凤阙也何逊诗宸襟动时豫岁序属凉氛释名天子所乘曰玉辂以玉饰车也东都赋登玉辂乘时龙南都赋驪飞龙兮騏驎李善注飞龙言疾也河图括地象崑仑东南地万五千里名曰神州中有五岳地图帝王居之江淹诗四睨乱层岑吕延济注层高也岑峰也三辅黄图五柞宫汉之离宫也在扶风盩厔宫中有五柞树因以为名五柞皆连抱上枝覆数亩甘泉赋攀璇玑而下视兮行游目乎三危张铣注言台高可攀北斗下视三危山史记正义括地志云三危山上有三峯故曰三危俗亦名卑羽山在沙州炖煌县东南三十里上林赋登龙台掩细柳郭璞注细柳观名也在昆明池南西京赋斜界细柳薛综注细柳在长安西北潘岳诗桓桓梁征高牙乃建李善注牙牙旗也薛综东京赋注兵书曰牙旗者将军之旗古者天子出建大牙旗竿上以象牙饰之故云牙旗甘泉赋齐总总搏搏其相胶葛兮顏师古注总总搏搏聚貌也古今注华盖黄帝所作也与蚩尤战于涿鹿之野常有五色云气金枝玉叶止于帝上有花葩之象故因而作华盖也宋玉大言赋方地为

车圆天为盖长劔耿耿倚天外吴都赋羽毛扬蕤吕延济注羽毛旌旗类扬动也蕤羽毛好貌楚辞指九天以为正王逸注九天谓中央八方也淮南子天有九野中央曰钧天东方曰苍天东北方曰变天北方曰玄天西北方曰幽天西方曰皓天西南方曰朱天南方曰炎天东南方曰阳天班固燕然山铭玄甲耀日朱旗绛天猎火纵火焚草莱以驱禽兽也柞音昨瞰苦滥切音勘噫音呃又音?】乃召蚩尤之徒聚长戟罗广泽呵雨师走风伯棱威耀乎雷霆烜赫震于蛮貊陋梁都之体制鄙灵囿之规格而南以衡霍作襟北以岱恒【繆本作常】作祛【繆本作祛】夹东海而为塹兮拖西冥而流渠麾九州之珍禽兮迴千羣以坌入联八荒之奇兽兮屯万族而来居【艺文类聚龙鱼河图曰黄帝摄政时有蚩尤兄弟八十一人并兽身人语铜头鍊额食沙石子造立兵仗刀戟大弩威震天下诛杀无道不仁不慈万民欲令黄帝行天子事黄帝仁义不能禁止蚩尤仰天而叹天遣玄女下授黄帝兵信神符制伏蚩尤帝因使之主兵以制八方蚩尤歿後天下复扰乱黄帝遂画蚩尤形像以威天下天下咸谓蚩尤不死八方万邦皆为蹶伏风俗通飞廉风伯也玄冥雨师也搜神记风伯者箕星也雨师者毕星也龙鱼河图太白星主兵凶其精下为雨师之神荧惑星主司非其精下为风伯之神扬雄河东赋呵雨师于西东汉书威棱憺乎邻国李奇曰神灵之威曰棱潘勗册魏公九锡文棱威南迈术以陨溃烜赫已见大鹏赋注梁都当是梁邹之北东都赋制同乎梁邹义合乎灵囿章怀太子注鲁诗传曰古有梁邹者天子之田也三辅黄图灵囿文王囿也灵者言文王之有灵德也在长安县西四十二里衡山南岳也又谓之岫崦山唐时属江南道衡州衡阳县霍山南岳之副也又谓之天柱山唐时属淮南道舒州怀宁县岱岱宗也即泰山唐时属江南道衡州衡封县泰山为东岳而此云北者以天下大势计之泰山不在正东而近于东北故云北也恒山北岳也汉时避文帝讳改称常山唐时属河北道定州恒阳县襟字以下文作祛为塹流渠例之当是襟字之讹方言襟格也类篇今竹木格盖篱落之属若以襟带义解之与文义不合上林赋江河为陆郭璞注因山谷遮禽兽为陆苏林曰陆猎者圜阵遮禽兽也说文陆旅山谷为牛马圈也广韵塹遶城水也西溟西海也渠沟渠也书依?珍禽奇兽不育于国坌入并入也详见明堂赋注祛音区坌焚上声塹七艳切籤上声】云罗高张天网密布置罟罾原峭格掩路螭螭过而犹碍螭螭飞而不度彼层霄与殊榛罕翔鸟与伏兔【鲍照舞鹤赋掩云罗而见羈吕延济注云罗言罗高及云也易林行触天网马死牛伤郑康成礼记注兽罟曰置罟鸟罟曰网罗吴都赋峭格周施吕向注峭高也格张网之木也郭璞尔雅注螭螭小虫似蚺喜乱飞列子江浦之间生麼虫其名曰螭螭羣飞而集于蚊睫勿相触也栖宿去来蚊勿觉也离朱子羽方昼拭眦扬眉而望之弗见其形触俞师旷方夜摘耳俛首而听之弗闻其声晏子春秋东海有虫巢于蚊睫再乳再飞而蚊不为惊臣婴不知其名而东海渔者命曰焦冥上林赋腾殊榛张揖注殊榛异枿也顔师古注殊榛特立株枿也张守节注尔雅曰木丛生为榛也殊异也西京赋超殊榛薛综注殊犹大也汉书上覆飞鸟下不见伏兔 置音嗟罟音孚又音浮峭音俏螭音灭螭音蒙又上声榛音臻又锄臻切音近神】从营合技弥峦被冈金戈森行洗晴野之寒霜虹旗电掣卷长空之飞雪吴骖走练宛马蹀血紫衆山之联绵隔远水之明灭【西京赋弥臯被冈薛综注弥犹覆也谢朓诗翠葆随风金戈动日刘向九叹襄虹旗于玉门梁简文帝金罍赋野旷尘昏星流电掣论衡顔渊与孔子俱上鲁太山孔子东南望吴阊门有系白马引顔渊指以示之曰若见吴阊门乎曰见之孔子曰门外何有曰有如系练之状汉书贰师将军广利斩大宛王首获汗血马来应劭注大宛旧有天马种蹋石汗血汗从前肩膊出如血号一日千里西京赋繚垣縣聯四百余里薛综注縣聯犹连蔓也张铄注縣聯不絶貌 蹀音叠】使五丁摧峯

一夫拔木下整高颓深平险谷摆桩栝开林丛喤喤呬呬尽奔突于场中【华阳国志时蜀有五丁力士能移山举万钧楚辞招魂一夫九首拔木九千些王逸注言丈夫一身九头强梁多力从朝至暮拔大木九千枝也韵会摆开也拔也桩杙也类篇栝木杖也吴都赋諠譁喤呬韵会喤呬衆声 桩音庄栝音忝呬呼甲切喊入声】而田疆【缪本作强】古冶之畴乌获中黄之党越崢嶸猎莽苍暗鸣【缪本作呼】哮?风旋电往脱文豹之皮抵玄熊之掌批狻手猱挟三挈两既徒搏以角力又挥锋而争先行翹号以鸛睨兮气赫火而敌烟拳封獬肘【缪本作引】巨狻臬羊应叱以毙踣?獠亡精而坠巔或碎脑以折脊或歆髓而【缪本作以】飞涎穷遐荒荡林藪扼土狍殄天狗脱角犀顶探牙象口扫封狐于千里捩雄虺之九首咋腾蛇而仰吞拖奔兕以郤走【晏子春秋田开疆古冶子事景公以勇力搏虎闻赵岐孟子注乌获古之有力人也能移举千钧孙奭孟子疏皇甫士安帝王世说云秦武王好多力之士乌获之徒并皆归焉秦王于洛阳举周鼎乌获两目血出西京赋乃使中黄之士李周翰注中黄国名其俗多勇力尸子中黄伯曰予左执太行之猱而右搏雕虎庄子适莽苍者三月而反司马彪注莽苍近郊之色崔氏注草野之色韵会暗大呼也陆机辨亡论哮 之羣风驱李周翰注哮 虎震声言兵勇叫之声若虎之震声也说苑晋文公时翟人有献封狐文豹之皮者说文抵侧手擊也尔雅翼熊类大豕人足黑色春出冬蛰轻捷好缘高木见人自投而下亦以革厚而筋弩用此自快故称熊轻鸟伸方冬蛰时惟自舐其掌故其掌特美鲁灵光殿赋玄熊蚺?以斷斷韵会批手擊也狻有二义一音酸乃狮子之类尔雅狻如虬猫食虎豹者是也一借用音俊又音逡又音詮乃狡兔之名战国策东郭逡者海内之狡兔也或作?亦有作狻者此赋与猱类用而继之以挟三挈两是可用之于么麼之兽而难以试之雄猛之狮当作兔解为当陆机诗疏猱獠猴也楚人谓之沐猴老者为獠长臂者为猿说文挟俾持也挈悬挂也西都赋脱角挫脰徒?独杀章怀太子注徒空也谓空手搏杀之也尔雅曰暴虎徒搏也张协七命举戈林竦挥锋电灭尔雅翹白虎宋书接冲拔距鷹瞵鸛视言猎徒勇健其声猛如虎之号其视精如鸛之睨也广韵獬野豚也字林獬兽似豕而肥西京赋鼻赤象圈巨狻薛综注巨狻麇也怒走者为狻郭璞尔雅注狻狻臬羊也山海经曰其状如人面长唇黑身有毛反踵见人则笑交广及南康郡山中多有此物大者长丈许俗呼之曰山都尔雅?獠类獠虎爪食人迅走述异记?獠兽中最大者龙头马尾虎爪长四百尺善走以人为食遇有道君即隐藏无道君即出食人淮南子云台之高墮者折脊碎脑汉书力扼虎顔师古注扼谓捉持也说文狍如狼善驱羊古赋辨体狍似狼有角韵会殄杀也山海经西山经曰陰山有兽焉其状如狸而白首名曰天狗其音如榴榴可以御凶大荒西经曰大荒之中金门之山有赤犬名曰天犬其所下者有兵郭璞注周书云天狗所止地尽倾余光烛天为流星长十数丈其疾如风其声如雷其光如电吴楚七国反时吠过梁国者是也埤雅犀形似水牛大腹卑脚脚有三蹄黑色三角一在顶上一在额上一在鼻上鼻上者即食角也亦有一角者犀亦絶爱其角 墮角即自埋之交州记曰犀有二角鼻上角长额上角短或曰三角者水犀也二角者山犀也尔雅翼象南越之大兽兽之最大者形体特诡三岁一乳其身倍数牛而目不踰豕鼻长六七尺大如臂其牙长一尺每雷震必仓卒间似花暴出逡巡隐没其齿岁脱犹爱惜之掘地而藏焉削木为伪齿潜往易之觉则不藏故处楚辞蝮蛇綦綦封狐千里些雄虺九首往来儵忽吞人以益其心些王逸注封狐大狐也大狐健走千里雄虺一身九头捩紆也咋啮也郭璞尔雅注腾蛇龙类也能兴云雾而游其中通志略兕如野牛青色重千斤一角长三尺余形如马鞭柄其皮坚厚可制铠陈琳与魏文帝书骇鲸之决细网奔兕之触鲁縞 哮音嘍 音喊抵音止猱奴刀切恼平声翹音酣鸛音谔獬

音彖踣音匍与仆字同?音札獠音与歎音噴狍音粕殪音意振音列虺音毀咋音責】君王于是戕通天靡星旃奔雷车挥电鞭观壮士之効获顾三军而欣然笑曰夫何神扶【繆本作挟】鬼擣之骇人也又命建夔鼓励武卒虽躡躡【繆本作蹠】之已多犹拗怒而未歇集赤羽兮照日张乌号兮满月戎车轹轹以陆离轂骑煌煌而奋发鹰犬之所腾捷飞走之所蹉蹶攫磨麋之咆哮蹂豺貉以挂格膏锋染锔填岩掩窟观殊材与【诸本皆作举今从唐文粹本校正】逸羣尚挥霍以出没【蔡邕独断天子冠通天冠後汉书通天冠高九寸正竖顶少邪却乃直下为铁卷梁前有山展筩为述乘輿所常服唐书礼乐志通天冠者冬至受朝贺祭还燕羣臣养老之服也二十四梁附蝉十二首施珠翠金博山黑介帻组纓翠纓玉犀簪导琦按子虚赋靡鱼须之桡旃靡字本此靡偃也方猎而偃其旗者即王制天子杀则下大绥之义广韵旃曲柄旗以招衆士也羽猎赋立历天之旗曳捎星之旃吕向注言旗旃之高历拂于天星也扬雄河东赋奋电鞭骖雷辐顔师古注淮南子云电以为鞭策雷以为车轮雄用此言也羽猎赋神扶电撃顔师古注言所扶撃如鬼神雷电也李善注埤苍曰扶答撃也广韵擣击也山海经东海中有流波山其上有兽状如牛苍身而无角一足出入水则必风雨其光如日月其声如雷其名曰夔黄帝得之以其皮为鼓擣以雷兽之骨声闻五百里以威天下汉书魏氏武卒衣三属之甲操十二名之弩负矢五十个置戈其上冠胄带劔羸三日之粮日中而趋百里中试则复其户利其田宅上林赋徒车之所躡躡郭璞曰躡蹠也蹠蹠也西都赋蹂躡其十二三乃拗怒而少息李善注拗犹抑也家语白羽若月赤羽若日子虚赋左乌号之雕弓右夏服之劲箭史记索隐张揖云黄帝乘龙上仙小臣不得上挽持龙髯髯拔堕黄帝弓羣臣抱弓而号故名弓乌号见封禅书及郊祀志又韩诗外传云弓工之妻曰此弓是泰山南乌号之柘案淮南子云楚有柘桑其材坚劲乌栖其上将飞枝劲复起擣呼其上伐取其材为弓因曰乌号古史考风俗通皆同此说也诗小雅戎车啍啍韵会轹车声通作檻诗国风大车檻檻毛诗曰檻车行声也上林赋先後陆离顔师古注陆离分散也史记轂骑万三千索隐曰如淳云轂骑张弓之骑也毛诗传煌煌明也楚辞白鹿麇麇兮或腾或倚朱子注麇麇也按韵会麇即麇字埤雅麇麇也齐人谓麇为麇麇如小鹿而美或曰麇性善惊盖麇鹿皆健骇而麇胆尤怯饮水见影辄奔道书曰麇鹿无魂又曰麇鹿白胆善怖为是故也说文麇牡鹿以夏至解角埤雅豺似狗而长尾白颊高前广後其色黄季秋取兽四面陈之以祀其先世谓之豺祭兽故先王候之以田貉似狸善睡其营窟与驪皆为曲穴以避雨阳亦以防患殊材逸羣指兽之健捷者而言挥霍谓飞走乱急也旃音𩇛扶音叱擣音鰓躡音吝蹠音历拗音郁轹音檻轂音妬麇音均麇音加貉音鹤锔音谔】别有白狻飞骏穷奇𧈧?【萧本作?】牙若【萧本作如】错劔鬣如丛竿口吞殳鉞目极枪櫓碎琅弧攫玉弩射猛𧈧透奔虎金鏃一发旁叠四五虽啗齿磨牙而致伉谁谓南山白额之足覩【白狻飞骏俱未详山海经邽山其上有兽焉其状如牛蝟毛名曰穷奇音如嗥狗是食人尔雅𧈧?似狸郭璞注今山民呼𧈧虎之大者为𧈧𧈧邢昺疏字林云𧈧似狸而大一名?释文云?一作?是𧈧?即𧈧?也韵会说文𧈧?似狸者能捕兽祭天陆佃云虎五指为𧈧吴都赋干仞殳鉞张铤注殳鉞戈类也广韵殳兵器长一丈二尺无刃鉞小矛也枪也櫓大盾也琅弧玉弩者以玉石饰弧弩之上为观美也鲁灵光殿赋奔虎攫拏以梁倚尔雅金鏃翦羽谓之鏃邢昺疏鏃箭头也魏文帝诗发机若雷电一发连四五长杨赋啗齿之徒相与磨牙而争之服?曰啗齿齿长五尺似啗亦食人伉即抗也古字通用晋书周处传以南山白额虎为三害之一白额虎盖虎之老者力雄势猛人所难御今以啗齿磨牙之怪兽尚能与之相抗而不惧彼南山白额虎又焉在目耶深状猎士之勇 狻音眉𧈧音枢?音?殳音殊琅

音郎】总八校搜四隅驰专诸走都卢趋乔林撇绝壁抄獬独揽豹 囚鼪鼯于峻崖顿穀【萧本作?】 矍于穹石养由发箭奇肱飞车巧?更羸妙兼菟且坠鸚鵡于青云落鸿雁于紫虚捎鷓鴣【萧本作鴝】漂鸬 弹地庐与神居斩飞鹏于日域摧大风于天墟龙伯钓其灵鳌任公获其巨鱼穷造化之譎诡何神怪之有余【汉书中垒校尉屯骑校尉步兵校尉越骑校尉长水校尉胡骑校尉射声校尉虎贲校尉凡八校尉皆武帝初置通典汉武帝初置中垒屯骑步兵越骑长水胡骑射声虎贲等校尉为八校文献通考汉八校尉领禁卫诸军皆尊显之官吴越春秋勇士专诸堂邑人也碓颡而深目虎膺而熊背汉书地理志有都卢国颜师古注都卢国人劲捷善缘高故张衡西京赋曰乌获扛鼎都卢寻橦又曰非都卢之轻趋孰能超而究升也西域传作巴俞都卢之戏李奇曰都卢体轻善缘者也广韵趋缘木也韵会撇略也引也抄与钞同说文钞又取也徐铉曰今俗别作抄上林赋獬独胡穀蛭张揖曰獬独似猕猴头上有髦腰以後黑薛综西京赋注獬独猿类而白腰以前黑在木表陆机诗疏猿之白腰者为獬独胡獬独捷于猕猴其鸣嗷嗷而悲太平御览蜀地志曰僊道有兽名獬独似猴而四足短为兽奇捷常在树上欻然腾跃可一百五十步若迅鸟之飞取此皮为狐白之用盈百方成说文揽撮持也刘逵三都赋注独兽毛黑白臆似熊而小以舌舐铁须臾便数十斤出建宁郡章怀太子後汉书注南中八郡志曰独大如驴状颇似熊多力食铁所触无不拉广志曰独色苍白其皮温暖□音义俱无考说文囚系也郭璞尔雅注鼪似鼯赤黄色大尾啖鼠江东呼为鼪埤雅鼪鼠健于捕鼠今俗谓之鼠狼郭璞尔雅注鼫鼠状如小狐似蝙蝠肉翅翅尾顶肋毛紫赤色背上苍艾色腹下黄喙颌杂白脚短爪长尾三尺许飞且乳亦谓之飞生声如人呼食烟火能从高赴下不能从下上高西都赋超回壑越峻崖顿僵也仆也史记索隐郭璞曰穀似鼪而大腰以後黄一名黄腰食猕猴尔雅矍父善顾郭璞注猓矍也似猕猴而大色苍黑能攫持人好顾盼邢昺疏大猿也说文矍母猴也上林赋触穹石张揖注穹石大石也汉书养由基楚之善射者也去杨叶百步百发百中杨叶之大加百中焉可谓善射矣博物志奇肱国民能为飞车从风远行汤时西风至吹其车至豫州汤破其车不以视民後十年东风至乃复作车遣反其国去玉门关四万里战国策更羸与魏王处京台之下谓魏王曰臣为王引弓虚发而下鸟魏王曰射可至此乎更羸曰可有间雁自东方来更羸以虚发而待之王曰然则射可至此乎更羸曰此孽也其飞徐而鸣悲飞徐者故疮痛也鸣悲者久失羣也故疮未息惊心未忘闻弦音烈而高飞故疮陨也淮南子蒲且子之连鸟於百仞之上高诱注蒲且子楚人善弋射者蒲蒲通用史记正义鸚鵡郭云似鸭而大长颈赤目紫绀色辟水毒晋灼汉书注属玉水鸟似鷓鴣韵会捎取也掠也子虚赋双鷓下颜师古注鷓鷓也今关西呼为鷓鹿山东通谓之鷓鄙俗名为错落错落者言鷓声之急耳又谓之鷓将鷓鹿鷓将皆象其鸣声也史记正义司马彪云鷓似雁而黑亦呼为鷓括韩诗外传云胎生也按本草鷓者水鸟也食于田泽洲渚之间大如鹤青苍色亦有灰色者顶无丹两颊红长颈高脚羣飞尔雅谓之麋鷓关西呼曰鷓鹿山东呼曰鷓鷓南人呼曰鷓鸡江人呼为麦鸡天将霜鷓先知而鸣不过旬日而霜下鷓者今谓之天鹅禽经云鷓鸣咭咭故谓之鷓身大于雁羽毛白泽所谓鷓不日浴而白也亦有黄鷓丹鷓其翔极高而善步所谓黄鷓一举千里是也湖海江汉之间皆有之漂当作漂击也埤雅鷓鷃水鸟似鷓而黑一名鷓嘴曲如钩食鱼入喉则烂其热如汤其骨主哽及噎盖以类推之者也此鸟吐而生子神农书所谓鷓鷃不卵生口吐其雏独为一异是也杨孚异物志云鷓鷃能没于深水取鱼而食之不生卵而孕雏于池泽间既胎而又吐生多者生七八少生五六相连而出若丝绪焉水鸟而巢高树之上上林赋烦鷓鷃□汉书作庸渠郭璞曰庸渠似鳧灰色而鸡

脚一名章渠顏师古曰庸渠即今之水鸡也弹当作殫尽也魏都赋天宇骇地庐惊木华海赋惟神是宅亦只是庐刘良住宅居也言神祇之所居处长杨赋东震日域顏师古注日域日所出之处也大凤非瑞鸟之凤也若是瑞鸟之凤则下文有解凤凰与鸞鷟之语而此又云摧大凤不但重复兼亦自相矛盾考杨升庵字说引通史缴大凤于青邱戮修蛇于洞庭大凤作大风云云是古书先有以大风为大凤者而太白因之欤淮南子云尧之时猋獠凿齿九婴大风封豨修蛇皆为民害尧乃使羿诛凿齿于畴华之野杀九婴于凶水之上缴大风于青邱之泽下杀猋獠断修蛇于洞庭擒封豨于桑林夫大风与猋獠凿齿封豨修蛇并称是亦物类中之凶怪者而高诱注云大风风伯也能坏人屋舍则又以为神名矣风俗通云飞廉风伯也汉书音义应劭曰飞廉神禽能致风气者也晋灼曰身似鹿头如爵有角而蛇尾文如豹文岂大风即飞廉之神鸟而因以讹为风伯欤姑广其说以俟知者升庵又引内典凤当作凤中从马非凤凰之凤然凤字他书不载恐未足据海赋北洒天墟李善注尔雅曰北陆天墟今尔雅本云北陆虚也与李所引不同龙伯国人钓得六鳌详见悲清秋赋注任公子获东海大鱼详见大鹏赋注东京赋瑰异譎诡薛综注譎诡变化也校音效趨音跷撇音僻獬音谗貊音麦鼯音又穀音忽鸛音觉鸛音烛瑯音玉捎音笱音斛墟音区】所以喷血流川飞毛洒雪状若乎高天雨兽上坠於大荒又似乎积禽为山下崩於林穴阳乌沮色於朝日陰兔丧精於明月思腾装上猎於太清所恨穹昊於路絕而忽也莫不海晏天空万方来同虽秦皇与汉武兮复何足以争雄【子虚赋获若雨兽揜草蔽地梁元帝晋安寺碑铭峰下阳乌林生陰兔阳乌详见明堂赋注枚乘七发如三军之腾装李善注装束也封禅书肇自顓穹生民顏师古注顓穹皆谓天也顓言气顓汗也穹言形穹窿也礼斗威仪君乘土而王其政太平则河海夷晏海晏天空见天地清平之意诗鲁颂淮夷来同】俄而君王茫然改容愀然有失於居【繆本少居字】安思危防险戒逸斯驰骋以狂发非至理之弘术且夫人君以端拱为尊玄妙为宝暴殄天物是谓不道乃命去三面之网示六合之仁已杀者皆其犯命未伤者全其天真虽剪毛而不献岂割鲜以焯【繆本作淬】轮解凤凰与鸞鷟兮旋驹虞与麒麟获天宝于陈仓载非熊于渭滨【上林赋天子茫然而思顏师古注茫然犹罔然也又上林赋愀然改容超若自失李善注郭璞曰愀然变色貌左传书曰居安思危思则有备有备无患老子驰骋田猎令人心发狂道德指归论眇然独存玄妙独处尚书暴殄天物害虐烝民礼王制无事而不田曰不敬田不以礼曰暴天物正义曰田猎不以其礼杀伤过多是暴害天之所生之物也史记汤出见野张网四面祝曰自天下四方皆入吾网汤曰嘻尽之矣乃去其三面祝曰欲左左欲右右不用命乃入吾网诸侯闻之曰汤德至矣及禽兽毛萇诗传面伤不献剪毛不献正义曰面伤不献者谓当面射之剪毛不献者谓在旁而逆射之二者皆为逆射不献者嫌诛降之意子虚赋割鲜染轮李奇曰鲜生也染濡也切生肉濡车轮盐而食之也吕向注鲜牲也谓割生之血染于车轮也又子虚赋將割轮焯韦昭曰焯谓割鲜焯轮也郭璞曰焯染也顏师古注焯亦搵染之意言齧割其肉搵车轮盐而食之埤雅凤神鸟也俗呼鸟王羽虫三百六十而凤为之长鸿前麟後蛇颈鱼尾鸛颡鸳思龙文龟背燕颌鸡喙五色备举出东方君子之国翱翔四海之外过崑仑饮砥柱濯羽弱水暮宿风穴见则天下大安宁旧云凤凰其翼若干其声若箫不喙生虫不折生草不羣居不旅行不罹罗网非梧桐不栖非竹实不食非醴泉不饮诗曰凤凰鸣矣於彼高冈梧桐生矣於彼朝阳此之谓也陆玕诗疏雄曰凤雌曰凰其雏为鸞鷟说文鸞鷟凤属神鸟也江中有鸞鷟似鳬而大赤目张华禽经注凤之小者曰鸞鷟五彩之文三岁始备埤雅驹虞尾参于身白虎黑文西方之兽也王者有至信之德则应不践生草食自死之肉传曰白虎仁

即此是也夫其色见于白其文见於黑又义兽也而名之曰虎则宜只以杀为事今反不履生草食自死之肉盖仁之至也故序诗者曰仁如驹虞则王道成也山海经曰驹虞五采毕具尾长于身乘之日行千里陆玑诗疏麟麕身牛尾马足黄色圆蹄一角角端有肉音中钟吕行中规矩游必择地详而後处不履生虫不践生草不羣居不偕行不入陷阱不罹罗网王者至仁则出史记索隐张揖云雄曰麒麟雌曰麟其状麕身牛尾狼蹄一角郭璞云麒麟似麟而无角京房传云麟有五采腹下黄色羽猎赋追天宝应劭注天宝陈宝也晋灼注天宝鸡头而人身太康记曰秦文公时陈仓人猎得兽若彘而不知其名道逢二童子曰此名?弗述?弗述亦语曰彼二童子名为宝鸡得雄者王得雌者霸陈仓人舍?弗述逐二童子化为雉雌止陈仓化为石雄如楚止南阳搜神记吕望钓于渭阳文王出游猎占曰今日猎得一狩非龙非螭非熊非罴合得帝王师果得太公于渭之阳与语大悦同车载而还 焯音近翠鸞音岳鸞音泥】於是享猎徒封劳苦轩行炁【繆本作庖】骑酌酤韬兵戈火网罟【西都赋陈轻骑以行炁腾酒车以酤酤说文炁毛炙肉也酤一宿酒也萧士贇曰韬藏也火焚也以示不用意 炁音庖酤音顾】然後登九霄之台宴八紘之圃开日月之扃辟生灵之户圣人作而万物覩览蒐岐与狩敖【繆本作蒐敖与狩岐】何宣成之足数晒穆王之荒诞歌白云之西母【九霄详见明堂赋注淮南子九州之外乃有八殛方千里八殛之外乃有八紘亦方千里高诱注紘维也维落天地而为之表故曰紘也说文扃外闭之关也徐曰古人言外户是也周易圣人作而万物覩左传成有岐阳之蒐杜预注周成王归自奄大蒐於岐山之阳岐山在扶风美阳县西北诗小雅建旐设旐?兽於敖美宣王田猎之诗也东京赋?兽於敖既琐琐焉岐阳之狩又何足数薛综注敖郑地今之河南荥阳也谓宣王所狩之地岐阳岐山之阳谓成王所狩之地穆天子传吉日甲子天子宾於西王母乃执白圭元璧以见西王母好献锦组百纯组三百纯西王母再拜受之乙丑天子觴西王母於瑶池之上西王母为天子謠曰白云在天山陵自出道里悠远山川间之将子无死尚能复来天子答之曰予归东土和洽诸夏万民平均吾顾见汝比及三年将复而野 紘音洪扃音近穷蒐音搜】曷若饱人以淡泊之味醉时以淳和之觴鼓之以雷霆舞之以陰阳虞乎神明狃於道德张无外以为置琢大朴以为杙顿天网以掩之猎贤俊以御极若此之狩罔有不克【虞乐也狃习也公羊传王者无外盖谓普天之下莫非王者之土无有内外之分也韵会杙说文槩也本作弋今作杙所以格兽曹植与杨德祖书吾王于是设天网以该之顿八紘以掩之北史儒林传隋文膺期纂历平一寰宇顿天网以掩之贲旌帛以礼之】使天人晏安草木繁殖【繆本作植】六宫斥其珠玉百姓乐于耕织寝郑卫之声却靡曼之色天老掌图风后侍侧是三阶砥平而皇猷允塞岂比夫子虚上林长杨羽猎计麋鹿之多少夸苑囿之大小哉【史记节事以时诸产繁殖韵会繁殖滋生也周礼以陰礼教六宫郑康成注妇人称寝曰宫宫隐蔽之言后象王立六宫而居之正寝一燕寝五又曰诏王后率六后之人郑康成注六宫之人夫人以下分居后之六宫者旧唐书开元二年六月内出金玉锦绣等服玩令于正殿前焚之所谓六宫斥其珠玉在当时实有其事矣然玩全节文义槩是奨劝其当然之词非颂美其已行之政不当作实事解礼记郑卫之音乱世之音也汉书目不视靡曼之色靡细也曼泽也靡曼之色谓色之美者也高诱淮南子注黄帝云梦见两龙挺白图即帝以授于河之都天老曰天其授帝图乎黄帝乃斋河洛之间至于翠妫泉大卢鱼折溜而至泛白图兰菜朱文以授黄帝舒受之史记正义帝王世纪曰黄帝梦大风吹天下之尘垢皆去帝寤而叹曰风为号令执政者也垢去土后在也天下岂有姓风名后者哉于是依占而求之得风后于海隅登以为相晋书职官志案黄帝时风后为侍中于周为常伯之任三阶即三台

星也三阶平则天下大安详明堂赋注魏都赋长庭砥平喻言其平如砥也魏书帝道休明皇猷允塞皇猷皇道也允信也塞满也言皇道信塞满于天下也砥音纸又音底】方将延荣光於後昆軼玄风於邃古拥嘉瑞臻元符登封於太山篆德於社首岂与乎七十二帝同条而共贯哉【延施及也荣荣名也光光华也即长杨赋所谓延光比荣之意後昆後代也书仲虺之诰垂裕後昆軼过之也玄风玄妙之风宋书将洒玄风於四区道斯民於至德楚辞遂古之初谁传道之王逸注遂往也邃古遂古义同班固典引以望元符之臻章怀太子注元大也符瑞也长杨赋俟元符以禅梁父之基增泰山之高延光于将来比荣于往号汉书管仲曰古者封泰山禅梁父者七十二家而夷吾所记者十有二焉昔无怀氏封泰山禅云云虞羲封泰山禅云云神农氏封泰山禅云云炎帝封泰山禅云云黄帝封泰山禅云云颛顼封泰山禅云云帝喾封泰山禅云云尧封泰山禅云云舜封泰山禅云云禹封泰山禅云云会稽汤封泰山禅云云周成王封泰山禅於社首风俗通封太山封者立石高一丈二尺刻之曰事天以礼立身以义事父以孝成名以仁四守之内莫不为郡县四夷八蛮咸来供职与天下无极人民蕃息天禄永得祭上玄尊而俎生鱼坛广十二丈高三尺阶三等必於其上示增高也刻石纪号着已绩也或曰金泥银绳印之玺下篆德谓篆刻于石以颂功德也应劭曰社首山名在博县元和郡县志社首山在兖州乾封县西北二十六里汉书夫帝王之道岂不同条共贯欤軼音逸邃音粹】君王于是回蜺旌反銮輿访广成於至道问大隗之幽居使罔象掇玄珠於赤水天下不知其所如也【上林赋拖霓旌张揖注析羽毛染以五采缀以缕为旌有似虹蜺之气也西都赋乘銮輿备法驾庄子黄帝立为天子十九年令行天下闻广成子在于空同之上故往见之曰我闻吾子达于至道敢问至道之精吾欲取天地之精以佐五谷以养人民吾又欲官陰阳以遂羣生为之奈何又庄子黄帝将见大隗乎具茨之山方明为御昌?骞乘张若謠朋前马昆阇滑稽後车至于襄城之野七圣皆迷无所问途适遇牧马童子问途马曰若知具茨之山乎曰然若知大隗之所存乎曰然黄帝曰异哉小童非徒知具茨之山又知大隗之所存陆德明注大隗或云大司神名也又庄子黄帝游乎赤水之北登乎崑仑之邱而南望还归遗其玄珠使知索之而不得使离朱索之而不得使吃诟索之而不得乃使象罔象罔得之黄帝曰异哉象罔乃可以得之乎陆德明注赤水在崑仑山下又庄子吾闻至人尸居环堵之室而百姓猖狂不知其所如往古赋辩体大猎赋与子虚上林羽猎等赋首尾布叙用事遣辞多相出入又曰太白天才英卓所作古赋差强人意但俳之蔓虽除律之根故在虽下笔有光焰时作奇语只是六朝赋尔隗音危】

李太白集注卷一

卷二

钦定四库全书

李太白集注卷二

钱塘 王琦 撰

古诗五十九首

古风五十九首

大雅久不作吾衰竟谁陈王风委蔓草战国多荆榛龙虎相啖食兵戈逮狂秦正声何微茫哀怨起骚人杨马激颓波开流荡无垠废兴虽万变宪章亦已沦自从【一作蹉跎】建安来绮丽不足珍圣代复元古垂衣贵清真羣才属休明乘运共跃鳞文质相炳焕衆星罗秋旻我志在删述垂【繆本作重】辉映千春希圣如有立絶笔於获麟【郑玄毛诗笺小雅大雅者周室居西都丰镐之时诗也王制命太史陈诗以观民风诗大序关雎麟趾之化王者之风顔师古汉书注春秋之後周室卑微诸侯强盛交相攻伐故总谓之战国韵会榛木丛生貌班固荅宾戏于是七雄虓阬分裂诸夏龙战虎争隋书人相啖食十而四五陶潜诗漂流逮狂秦昭明太子文选序楚人屈原含忠履洁君匪从流臣进逆耳深思远虑遂放湘南耿介之意既伤壹郁之怀靡愬临渊有怀沙之志吟泽有憔悴之容骚人之文自兹而作扬马扬雄司马相如也史记推而大之至于无垠无垠谓无畔岸也建安汉末年号于时曹氏父子及邺中七子作焉诗体一变世谓之建安体自是而後每降每变下逮梁陈隋氏靡丽极矣世总谓之六朝体宪章谓诗之法度圣代谓李唐也周易黄帝尧舜垂衣裳而天下治傅玄诗我皇叙羣才谢朓诗惟昔逢休明十载朝云陛王彪之诗飞鸿振羽腾龙跃鳞王珪诗高祖起丰沛乘运以跃鳞左思魏都赋丹青炳焕尔雅秋为旻天李巡注秋万物成熟皆有文章故曰旻天弘明集妙会与春冰等释至趣若秋旻共朗梁简文帝采莲曲千春谁与乐夏侯湛闵子骞赞圣既拟天贤亦希圣杜预左传集解仲尼伤周道之不兴感嘉瑞之无应故因鲁春秋而修中兴之教絶笔于获麟之一句所感而作固所以为终也 杨齐贤曰诗大雅凡三十六篇诗序云雅者正也言王政之所由废兴也大雅不作则斯文衰矣平王东迁黍离降于国风终春秋之世不复能振战国迭兴王道榛塞干戈相侵以迄于秦中正之声日远日微一变而为离骚轩翥诗人之未奋飞词家之前司马扬雄激扬其颓波疏导其下流使遂闢肆法乎无穷而世降愈下宪章乖离建安诸子夸尚绮靡摘章绣句竞为新奇雄健之气由此萎蕤至于唐八代极矣扫魏晋之陋起骚人之废太白盖以自任乎览其着述笔力翩翩如行云流水出乎自然非由思索而得岂欺我哉琦按吾衰竟谁陈是太白自叹吾之年力已衰竟无能陈其诗于朝廷之上也杨氏以斯文衰萎为释殊混唐仲言诗解引孔子吾衰之说更非徐昌谷谓首二句为一篇大旨绮丽不足珍以上是申第一句意圣代复元古以下是申第二句意其说极为明了学者试一玩味前之二解不待辩而确知其误矣本事诗曰李白才逸气高与陈拾遗齐名先後合德其论诗云梁陈以来艳薄斯极沈休文又尚以声律将复古道非我而谁此诗乃自明其素志欤

榛音近神垠音银绮音起旻音民】

其二

蟾蜍薄太清蚀此瑶台月圆光亏中天金魄遂沦没蟾蜍入紫微大明夷朝晖浮云隔两曜万象昏陰霏萧萧长门宫昔是今已非桂蠹花不实天霜下严威沈吟终永夕感我涕沾衣【淮南子精神训月中有蟾蜍高诱注蟾蜍虾蟆也又说林训月照天下蚀于詹诸高诱注詹诸月中虾蟆食月故曰蚀于詹诸薄侵也迫也释名日月亏曰蚀稍稍侵亏如虫食草木叶也沈约诗含吐瑶台月陈子昂诗微月生西海幽阳始化昇圆光正东满陰魄已朝凝沈佺期诗玉流含吹动金波度云来魄月体黑暗处朔日之月谓之死魄望日之月谓之生魄金魄者是言满月之影光明灿烂有似乎金故曰金魄也毛诗正义蟾蜍虹也色青赤因云而见春秋潜潭巴虹出日旁后妃陰胁主後汉书凡日旁气色白而纯者名为虹琦按蟾蜍亦日之光气但日在东则蟾蜍见西方日在西则蟾蜍见东方与日旁白色之气均有虹之名而实则判然二物也太白以日旁之虹呼为蟾蜍不无混称晋书紫宫垣十五星其西蕃七东蕃八在北斗北一曰紫微大帝之座也天子之常居也主命主度也郑康成礼记注大明日也广韵夷灭也陆机诗扶桑升朝晖初学记日月谓之两曜汉书孝武陈皇后长公主嫖女也初武帝得立为太子长主有力取主女为妃及帝即位立为皇后擅宠骄贵十余年而无子闻卫子夫得幸几死者数焉上愈怒后又挟妇人媚道颇觉元光五年上遂穷治之女子楚服等坐为皇后巫蛊祠祭祝诅大逆无道相连及诛者三百余人使有司赐皇后策曰皇后失序惑于巫祝不可以承天命其上玺绶罢退居长门宫楚辞桂蠹不知所淹留汉书成帝时歌謡曰桂树花不实黄雀巢其颠潘岳西征赋弛秋霜之严威刘峻广絶交论尹班陶陶于永夕新唐书玄宗皇后王氏同州下邳人梁冀州刺史神念之裔孙帝为临淄王聘为妃将清内难预大计先天元年立为皇后久无子而武妃稍有宠后不平显诋之然抚下素有恩终无肯潜短者帝密欲废后以语姜皎皎漏言即死后兄守一惧为求厌胜浮屠明悟教祭北平取霹雳木刻天地交及帝讳合佩之曰后有子与则天比开元十二年事觉帝自临劾有状乃制诏有司皇天后天命不佑花而不实有无将之心不可以承宗庙母仪天下其废为庶人赐守一死当时王諲作翠羽帐赋讽帝未几卒以一品礼葬後宫思慕之此诗盖咏其事也萧士贇曰王后事与汉武陈后事极相类二后虽各以无子巫蛊厌胜废然推原其由实卫子夫武惠妃争宠有以激之也陈后之废司马相如作长门赋王后之废王諲亦作翠羽帐赋先後一致太白引此为证最为切当桂蠹不实是采废后制中语唐仲言曰蟾蜍蚀月比武妃逼后月光亏而魄没见后已废而忧死也蟾蜍借日之光以成形今入紫微而日反为所蔽比武妃既得幸而蛊惑帝心至于荒乱也苟日月俱为陰邪所伤而苍生无以仰照则万象皆昏冥矣因言后之被废正如陈后之居长门然陈后以嫉妒几絶皇嗣实有可废之条今王后抚下有恩明皇特以武妃之故而谋废之则非陈后比矣所谓昔是而今非也且帝以后无子罪其花而不实然不观诸桂树乎桂蠹则不能成实宠分则不能有子奈何遽以天霜之威加之哉大抵国家之乱起自宫闈我因念及此事为之感叹沾衣也其後武妃幸早世而明皇卒以太真乱国太白可谓知几矣琦按旧唐书开元十二年秋七月壬申月蚀既已卯废皇后王氏为庶人太白此篇首以月蚀为喻是虽比而实赋也】

其三

秦王扫六合虎视何雄哉挥【萧本作飞】劒决浮云诸侯尽西来明断自天启【一作雄图发英断】大略驾羣才收兵铸金人函谷正东开铭功会稽岭骋望琅邪台刑徒七十万起土骊山隈尚采不死药茫然使心【一作人】哀连弩射海鱼长鲸正崔嵬额鼻象五岳扬波喷云雷髻鬣蔽青天何由覩蓬莱徐市载秦女楼船几时回但见三泉下金棺葬寒灰【贾谊过秦论及至始皇吞二周而亡诸侯履至尊而制六合西都赋周以龙兴秦以虎视章怀太子注龙兴虎视喻盛强也庄子天子之劒直之无前举之无上按之无下运之无旁上决浮云下絶地纪此劒一用匡诸侯天下服矣诸侯尽西来者六国之王皆为所虏而西入於秦也左传天之所启人弗及也杜预注启开也汉书如武帝之雄材大略史记秦始皇二十六年收天下兵聚之咸阳销以为锺鐻金人十二重各千石置宫廷中水经注潼关历北出东淆通谓之函谷关也遂岸天高空谷幽深涧道之峡车不容轨号曰天险函谷正东开者当六国未灭之时虑其侵伐以函谷为守御之要枢启闭甚严六国已灭天下一统无事守御函谷可以常开矣史记始皇三十七年上会稽祭大禹望于南海而立石刻颂秦德又云二十八年南登琅邪大乐之留三月乃徙黔首三万户琅邪台下复十二岁作琅邪台立石刻颂秦德明德意太平御览伏滔地记曰琅邪东南十里有琅邪山即古琅邪台也秦始皇二十八年至琅邪大乐之留三月作琅邪台台亦孤山也然高显出于衆山之上高五里下周二十五里山上垒石为台石形为砖长八尺广四尺厚八寸三级而上级高三丈上级平厰二百余步刊石立碑纪秦功德史记始皇三十五年隐宫徒刑者七十余万人分作阿房宫或作骊山发北山石椁又云三十一年使韩终侯公石生求仙人不死之药又云二十八年齐人徐市等上书言海中有三神山名曰蓬莱方丈瀛洲仙人居之请得斋戒与童男女求之于是遣徐市发童男女数千人入海求仙人徐市等入海求神药数岁不得费多恐譴乃诈曰蓬莱药可得然常为大蛟鱼所苦故不得至愿请善射者与俱见则以连弩射之始皇梦与海神战如人状问占梦博士曰水神不可见以大鱼蛟龙为候今上祷祠备谨而有此恶神当除去而善神可致乃令入海者齎捕巨鱼具而自以连弩候大鱼出射之自琅邪北至荣成山弗见至之罘见巨鱼射杀一鱼木华海赋鱼则横海之鲸巨鳞插云髻鬣刺天颅骨成岳流膏为渊史记葬始皇郿山始皇初即位穿治郿山及并天下天下徒送诣七十余万人穿三泉下铜而致棺宫观百工奇器珍怪徙藏满之正义曰顔师古曰三重之泉言其深也韩非子死者始死而血已血而蝼已蝼而灰已灰而土】

其四

凤飞九千仞五章备彩珍衔书且虚归空入周与秦横絶历四海所居未得邻吾营紫河车千载落风尘药物秘海岳采铅青溪滨时登大楼山举首【萧本作手】望仙真羽驾灭去影飈车絶回轮尚恐丹液迟志愿不及申徒霜镜中髮羞彼鹤上人桃李何处开此花非我春惟应清都境长与韩衆亲【太平御览春秋後语云宋玉曰凤凰上击九千仞翱翔乎窈冥之上左传为九文六采五章以奉五色杜预注青与赤谓之文赤与白谓之章白与黑谓之采黑与青谓之黻五色备谓之绣集此五章以奉成五色之用宋书有凤凰衔书游文王之都书曰殷帝无道虐乱天下黄命已移不得复久灵祇远离百神吹去五星聚房昭理四海汉书羽翮已就

橫絕四海顏師古注絕謂飛而直度也蕭士贇曰道家蓬萊修煉法河車是水朱雀是火取水一斗鎗中以大炷之令沸致聖石九兩其中初成姤女次謂之玉液後成紫色謂之紫河車白色曰白河車青色曰青河車赤色曰赤河車亦曰黃芽徐禎卿曰落脫也謝也一統志清溪在池州府源出洿溪山與石人嶺水合北流匯為王鏡潭又東流經府門外復折而北至清溪口入大江大樓山在池州府城南七十里沈約詩若蒙羽駕迎得奉金書召桓麟西王母傳王母所居宮闕在龜山春山西那之都崑崙之圃閼風之苑左帶瑤池右環翠水其山之下弱水九重洪濤萬丈非飈車羽輪不可到也楊齊賢曰羽駕言乘鸞駕鶴飈車言御風乘雲漢武內傳其次藥有九丹金液子得服之白日升天此飛仙之所服非地仙之所見也列子王實以為清都紫微鈞天廣樂帝之所居楚詞見韓衆而宿之兮問天道之所在王逸注韓衆仙人也抱朴子韓衆服菖蒲十三年身生毛日視書萬言皆誦之冬恒不寒鉛音延飈音標液音亦】

其五

太白何蒼蒼星辰上森列去天三百里邈爾與世絕中有綠髮翁披雲【一作十春】卧松雪不笑亦不語冥栖在岩穴我來逢真人長跪問寶訣粲然啟玉齒【一作忽自哂】授以鍊藥說銘骨傳其語竦身已電滅仰望不可及蒼然五情熱吾將營丹砂永世與人別【水經注太白山在武功縣南去長安二百里不知其高幾許俗云武功太白去天三百杜彥達曰太白山南連武功山于諸山最為秀杰冬夏積雪望之皓然陶潛詩邈與世相絕謝靈運詩披雲卧石門顏延年詩山明望松雪曹植飛龍篇我知真人長跪問道谷梁傳軍人粲然皆笑范甯注粲然盛笑貌郭璞詩靈妃顧我笑粲然啟玉齒李善注啟齒笑也吳越春秋早朝晏罷切齒銘骨抱朴子夫得道者上能竦身於雲霄下能潛形于川海蒼然忽遽貌曹植上責躬應詔詩表形影相吊五情愧赧劉良注五情喜怒哀樂怨也陶潛詩身沒名亦盡念之五情熱】

其六

代馬不思越越禽不戀燕情性有所習土風固其然昔別雁門關今戍龍庭前驚沙亂海日飛雪迷胡天虬虱生虎鷁心魂逐旌旃苦戰功不賞忠誠難可宣誰憐李飛將白首沒三邊【代馬代地所產之馬曹植詩願聘代馬倏忽北徂張協詩土風安所習由來有固然徐禎卿曰代北代南鳥獸各有所戀以比去家就戍非人之情也山西通志雁門山在代州北三十五里雙闕陡絕雁欲過者必由此徑故名一名雁門塞倚山立關謂之雁門關山西之關凡四十有余皆踞隘保固而聳拔雄壯則雁門為最趙李牧漢鄧都備邊于此匈奴不敢近塞固皆一時良將然不可謂非藉地險也班固燕然山銘蹶冒頓之區落焚老上之龍庭章懷太子注匈奴五月大會龍庭祭其先天地鬼神梁書鳥塞同文胡天共軌淮南子甲冑生虬虱燕雀處帷幄而兵不休息後漢書武冠俗謂之大冠環纓無蕤以青系為緄加雙鷁尾豎左右為鷁冠五官左右虎賁羽林五中郎將羽林左右監皆冠鷁冠紗縠單衣虎賁將虎文袴白虎文劔佩刀虎賁武騎皆鷁冠虎文單衣襄邑歲獻織成虎文衣鷁者勇雉也其鬪對一死乃止故趙靈王以表武士秦施安焉太白所謂虬虱生虎鷁者蓋謂其生于虎衣鷁冠之上猶之甲冑生虬虱也周禮通帛為旃析羽為旌鄭康成注通帛謂大赤從周正色無飾析羽五采系之于旌之上所謂注旌于干首也史記李廣為右北平太守匈奴聞之號曰漢之飛將軍避之數歲不敢入右北

平元狩四年从大将军青击匈奴引兵出东道军无导惑失道後大将军大将军使长史问失道状欲上书报太子军曲折广谓其麾下曰广结髮与匈奴大小七十余战今幸从大将军出接单于兵而大将军徙广部行回远而又迷失道岂非天哉广年六十余矣终不能复对刀笔之吏遂引刀自刭顾炎武曰昔人讥此诗以飞将军剪截作飞将然古人自有此语後汉班勇传班将能保北鹵不为边害乎後魏唐永正光中为北地太守数与贼战未尝败北时人语曰莫陆梁恐尔逢唐将并以将军为将小学紺珠三边幽并凉三州也】

其七

客有鹤上仙飞飞凌太清扬言碧云里自道安期名两两白玉童双吹紫鸾笙去影忽不见回风送天声举首【萧本作手】远望之飘然若流星愿餐金光草壽与天齐倾【一作五鹤西北来飞飞凌太清仙人緑云上自道安期名两两白玉童双吹紫鸾笙飘然下倒影倏忽无留行遗我金光草服之四体轻将随赤松去对博坐蓬瀛又举首远望之一作我欲一问之 凌经历也楚辞九叹譬若王乔之乘云兮载赤霄而凌太清江淹诗日暮碧云合张铣注碧云青云也史记李少君曰臣尝游海上见安期生安期生食臣枣大如瓜安期生仙者通莱蓬中合则见人不合则隐于是天子遣方士入海求蓬莱安期生之属萧士贇曰白玉童言童之顔如玉之白也陈子昂诗驰驱翠虬驾伊郁紫鸾笙楚辞悲回风之摇蕙兮王逸注回风谓之飘风释名流星星转行如流水也 餐音餐】

其八【此首繆本编入二十二卷题作感寓与诸本不同】

咸阳二三月宫柳黄金枝緑幘谁家子卖珠轻薄儿【一作咸阳二三月百鸟鸣花枝玉劒谁家子西秦豪侠儿】日暮醉酒归白马骄且驰意气人所仰【一作倾】冶游【繆本作游冶】方及时子云不晓事晚献长杨辞赋达身已老草玄鬢若丝投阁良可叹但为此辈嗤【谢尚大道曲青阳二三月柳青桃复红汉书帝姑馆陶公主号窦太主堂邑侯陈午尚之午死主寡居近幸董偃始偃与母以卖珠为事偃年十三随母出入主家左右言其姣好主召见曰吾为母养之因留第中教书计相马御射颇读传记至年十八而冠出则执轡入则侍内为人温柔爱人以主故诸公接之名称城中号曰董君主因推令散财交士令中府曰董君所发一日金满百斤钱满百万帛满千匹乃白之安陵爰叔与偃善谓偃曰足下私侍汉主挟不测之罪将欲安处乎何不白主献长门园此上所欲也如是则上知计出于足下则安枕而卧者无惨怛之忧偃入言之主主立奏书献之上大悦更名窦太主园为长门宫上以钱千万从主饮後数日上临山林主自执宰蔽膝道入坐未定上曰愿谒主人翁主乃下殿去簪珥徒跣顿首谢有诏谢主簪履起之东厢自引董君董君緑幘傅鞬随主前伏殿下主乃赞馆陶公主庖人臣偃昧死再拜谒因叩头谢上为之起有诏赐衣冠上当是时董君见尊不名称为主人翁是日饮大驩乐主乃请赐将军从官金钱杂繒各有数于是董君贵宠天下莫不闻沈约诗洛阳繁华子长安轻薄儿杨修荅临淄侯牋吾家子云老不晓事汉书扬雄字子云蜀郡成都人孝成帝时待诏承明之庭从至射熊馆还上长杨赋以风哀帝时丁传董贤用事诸附离之者或起家至二千石时雄方草太玄有以自守泊如也王莽时刘歆甄丰皆为上公莽既以符命自立即位之後欲絶其原以神前事而丰子寻歆子棻复献之莽诛丰父子投棻四裔辞所连及便

收不请时雄校书天禄阁上治狱事使者来欲收雄雄恐不能自免乃从阁上自投下几死莽闻之曰雄素不与事何故在此间请问其故乃刘棻尝从雄学作奇字雄不知情有诏勿问然京师为之语曰惟寂寞自投阁爰清静作符命古诗但为後世嗤唐仲言曰此刺戚里骄横而以子云自况所谓緑帟必有所指 嗤音鸱】

其九

庄周梦胡蝶胡蝶为庄周一体更变易万事良悠悠乃【一作那】知蓬莱水复作清浅流青门种瓜人旧日东陵侯富贵故【一作苟繆本作固】如此营营何所求【庄子昔者庄周梦为蝴蝶栩栩然蝴蝶也自喻适志与不知周也俄然觉则蘧蘧然周也不知周之梦为蝴蝶与蝴蝶之梦为周与周与蝴蝶则必有分矣此之谓物化神仙传麻姑云接待以来见东海三为桑田向到蓬莱水又浅於往日会时略半耳岂将复为陵陆乎王远叹曰圣人皆言海中行复扬尘也三辅黄图长安城东出南头第一门曰霸城门民见门色青名曰青城门或曰青门门外旧出佳瓜广陵人邵平为秦东陵侯秦破为布衣种瓜青门外瓜美故时人谓之东陵瓜】

其十

齐有倜傥生鲁连特高妙明月出海底一朝开光曜却秦振英声後世仰末照意轻千金赠顾向平原笑吾亦澹荡人拂衣可同调【史记鲁仲连者齐人也好奇伟倜傥之画策而不肯仕宦任职适游赵会秦围赵闻魏将欲令赵尊秦为帝乃见平原君曰事将奈何平原君曰胜也何敢言事前亡四十万之衆于外今又内围邯鄲而不去魏王使客将军辛垣衍令赵帝秦今其人在是鲁仲连曰梁客辛垣衍安在吾请为君责而归之鲁仲连见辛垣衍而无言辛垣衍曰吾视居此围城之中者皆有求于平原君者也今观先生之玉貌非有求于平原君者也曷为久居此围城之中而不去鲁仲连曰彼秦者弃礼义而工首功之国也权使其士虏使其民彼即肆然而为帝过而为政于天下则连有蹈东海而死耳吾不忍为之民也所为见将军者欲以助赵也辛垣衍曰先生助之将奈何鲁连曰吾将使梁及燕助之齐楚则固助之矣辛垣衍曰吾乃梁人也先生恶能使梁助之鲁仲连曰梁未覩秦称帝之害耳使梁覩秦称帝之害则必助赵矣秦无已而帝则且变易诸侯之大臣夺其所不肖而与其所贤夺其所憎而与其所爱又将使其子女谗妾为诸侯妃姬处梁之宫梁王安得晏然而已乎而将军又何以得故宠乎於是新垣衍起再拜谢曰吾请出不敢复言帝秦秦将闻之为却军五十里适会魏公子无忌夺晋鄙军以救赵击秦秦军遂引而去於是平原君欲封鲁连鲁连辞让使者三终不肯受平原君乃置酒酒酣起前以千金为鲁连壽鲁连笑曰所为贵于天下之士者为人排患释难解纷乱而无所取也即有取者是商贾之事也而连不忍为也遂辞平原君而去终身不复见广韵倜傥不羈也史记明月之珠出于江海淮南子明月之珠不能无纈高诱注夜光之珠有似月光故曰明月朱穆崇厚论振英声于百世谢朓楚江赋愿希光於秋月承末照于遗簪杨齐贤曰澹荡犹放荡也宋书王弘之拂衣归耕踰历三季谢灵运诗谁谓古今殊异代可同调 倜音惕】

其十一

黄河走东溟白日落西海逝川与流光飘忽不相待春容舍我去秋髮已衰改人生非寒松年貌【一作顔色】岂长在吾当乘云螭吸景驻光彩【一作谁能学天飞三秀与君采 顔延年诗日观临东溟吕向注东溟东海也谢瞻诗逝川岂住复曹植诗流光正徘徊春容谓少年之容秋髮谓衰暮时之髮郭璞诗虽欲腾丹谿云螭非我驾吕延济注云螭龙也杨齐贤曰吸景吸日月之景 螭音鸱】

其十二

松柏本孤直难为桃李顔昭昭严子陵垂钓沧波间身将客星隐心与浮云闲长揖万乘君还归富春山清风洒六合邈然不可攀使我长叹息冥栖岩石间【刘孝绰诗竞娇桃李顔将犹与也後汉书严光字子陵会稽余姚人少有高名与光武同游学及光武即位乃变名姓隐身不见帝思其贤令以物色访之後齐国上言有一男子披羊裘钓泽中帝疑其光备安车玄纁遣使聘之三反而後至舍于北军给牀褥太官朝夕进膳车马即日幸其馆光卧不起帝即其卧所抚光腹曰咄咄子陵不可相助为理耶光眠不应良久张目熟视曰唐尧着德巢父洗耳士固有志何至相迫乎帝曰子陵我竟不能下汝耶於是升舆叹息而去复引光入论道旧故相对累日因共偃卧光以足加帝腹上明日太史奏客星犯帝座甚急帝笑曰朕故人严子陵共卧耳除为谏议大夫不屈乃耕於富春山後人名其钓处为严陵濑汉书酈生长揖不拜顔师古注长揖者手自上而极下汉书天子畿方千里提封百万井定出赋四十六万井戎马四万匹兵车万乘故称万乘之主张载诗昔为万乘君一统志富春山在桐庐县西三十里一名严陵山清丽奇絶号锦峰绣岭乃汉严子陵隐钓处前临大江上有东西二钓台张华诗穆如洒清风陶潜诗袁安困积雪邈然不可干】

其十三

君平既弃世世亦弃君平观变穷太易探元【一作玄】化羣生寂寞缀道论【一作真道】空帘闭幽情【一作清】驹虞不虚【一作复】来鸞鸞有时鸣安知天汉上白日悬高名海客去已久谁人【一作能】测沈冥【鲍照诗君平独寂寞身世两相弃李善注身弃世而不仕世弃身而不任汉书严君平卜筮于成都市以为卜筮者贱业而可以惠衆人有邪恶是非之问则依蓍龟为言利害与人子言依于孝与人弟言依于顺与人臣言依于忠各因势道之以善从吾言者已过半矣裁日閱数人得百钱足自养则闭肆下帘而授老子博览无不通依老子严周之旨着书十余言列子有太易有太初有太始有太素太易者未见气也太初者气之始也太始者形之始也太素者质之始也孝经钩命诀天地未分之前有太易有太初有太始有太素有太极是为五运形象未分谓之太易元气始萌谓之太初形气之端谓之太始形变有质谓之太素质形已具谓之太极郑康成乾凿度注以其寂然无物故名之为太易汉书太史公习道论于黄子谢灵运诗委讲缀道论毛萇诗传驹虞义兽也白虎黑文不食生物有至信之德则应之国语周之兴也鸞鸞鸣于岐山韦昭解鸞鸞凤凰之别名也萧士贇曰二句喻圣贤不虚生其出也有时博物志旧说云天河与海通近世有人居海滨者年年八月有浮槎去来不失期人有奇志立飞阁于槎上多齎粮乘槎而去十余日中犹观日月星辰自後茫茫忽忽亦不觉昼夜去十余月至一处有城郭状屋舍甚严遥望宫中多织妇见一丈夫牵

牛渚次饮之牵牛人乃惊问曰何由至此此人具说来意并问此是何处荅曰君还至蜀郡访严君平则知之竟不上岸因还如期後至蜀问君平曰某年月日有客星犯牵牛宿计其年月正是此人到天河时也博雅天河谓之天汉汉书蜀严湛冥不作苟见不治苟得久幽而不改其操孟康注蜀郡严君平沈深玄默无欲也扬子蜀庄沈冥李轨注沈冥犹玄寂泯然无迹之貌吴秘注晦迹不仕故曰沈冥陈子昂诗玄感非象识谁能测沈冥鷺音岳鷺音泥】

其十四

胡关饶风沙萧索【一作飒】竟终古木【缪本作岁】落秋草黄登高望戎虏荒城空大漠边邑无遗堵白骨横千霜嵯峨蔽榛莽借问谁陵虐天骄毒威武赫怒我圣皇劳师事鼙鼓阳和变杀气发卒骚中土三十六万人哀哀泪如雨且悲就行役安得营农圃不见征戍儿岂知关山苦【一本此下多争锋徒死节秉钺皆庸?战士涂蒿莱将军获圭组四句】李牧【一作卫霍】今不在边人饲豺虎【胡关近胡地之关若雁门玉门阳关之类张正见诗胡关辛苦地楚辞长无絶兮终古班固燕然山铭经鹵磧絶大漠李周翰注大漠沙漠也说文堵垣也五版为一堵张载诗周墉无遗堵刘琨上怀帝表白骨横野古乐府延年壽千霜广雅嵯峨高也榛木丛生也莽草深茂也汉书单于遣使遗汉书曰南有大汉北有强胡胡者天之骄子也诗大雅王赫斯怒郑笺曰赫怒意说文鼙骑鼓也骚扰也魏武善哉行惋叹泪如雨张载诗萌隶营农圃史记李牧赵之北边良将也常居代雁门备匈奴匈奴小入佯北不胜单于闻之大率衆来入李牧多为奇阵张左右翼击之大破杀匈奴十余万骑灭襜褕破东胡降林胡单于奔走其後十余岁匈奴不敢近赵边城张载诗季世丧乱起盗贼如豺虎 鼙音皮】

其十五

燕昭延郭隗遂筑黄金台剧辛方赵至【一作往】邹衍复齐来奈何青云士弃我如尘埃珠玉买歌笑糟糠养贤才方知黄鹤【一作鹄】举千里独徘徊【史记燕昭王即位卑身厚币以招贤者谓郭隗曰齐因孤之国乱而袭破燕孤极知燕小力少不足以报诚得贤士以共国以雪先王之耻孤之愿也先生视可者得身事之郭隗曰王必欲致士先从隗始况贤於隗者岂远千里哉於是昭王为隗改筑宫而师事之乐毅自魏往邹衍自齐往剧辛自赵往士争趋燕李善文选注上谷郡图经曰黄金台在易水东南十八里燕昭王置千金于台上以延天下之士史记非附青云之士恶能施于後世哉古诗弃我如遗迹左思诗视之如尘埃韩诗外传田饶事鲁哀公而不见察谓哀公曰臣将去君黄鹄举矣哀公曰何谓也曰鸡有五德君犹曰鹩而食之者何也以其所从来者近也夫黄鹄一举千里止君园池食君鱼鼈啄君黍粱无此五德君犹贵之以其所从来者远也臣将去君黄鹄举矣苏武诗黄鹤一远别千里顾徘徊 隗音危又上声剧音极】其十六【此首缪本编入二十三卷与咸阳二三月一首俱题作感寓】

宝劒双蛟龙雪花照芙蓉精光射天地雷【缪本作电】腾不可冲一去别金匣飞沉失相从风胡歿已久【一作圣人歿已久萧本作风胡灭已久】所以潜其锋吴水深万丈楚山邈千重雌雄终不隔神物会当逢【越絶书客有能相剑者名薛烛越王句践召而问之乃召掌者

使取纯钩薛烛望之手振拂扬其华粹如芙蓉始出又越絕书楚王召风胡子而问之曰寡人闻吴有干将越有欧冶子此二子甲世而生天下未尝有寡人愿齎邦之重宝以奉子因吴王请此二人作铁劍可乎于是乃令风胡子之吴见欧冶子干将使作铁劍欧冶子干将凿茨山泄其溪取铁英作为铁劍三枚风胡子奏之楚王楚王见此三劍之精神大悦问之曰此三劍何物所象其名为何风胡子对曰一曰龙渊二曰泰阿三曰工布楚王曰何为龙渊泰阿工布风胡子对曰欲知龙渊观其状如登高山临深渊欲知泰阿观其觚巍巍翼翼如流水之波欲知工布觚从文起至脊而止如珠不可衽文若流水不絕太平御览雷焕别传曰焕字孔章鄱阳人善星历卜占司空张华夜见异气起斗牛问焕见之乎焕曰此为宝剑气华曰时有相吾者曰君当贵达身佩宝剑此言欲效矣乃以焕为丰城令焕至县移狱掘入三十余尺得青石函一枚中有双劍文彩未甚明焕取南昌西山黄白土用拭劍光艳照耀乃送一劍并少黄土与华自留一劍华得劍并土曰此干将也莫耶何复不至然天生神物终当合耳乃更以华陰赤土一斤送与焕焕得磨劍鲜光愈亮及华诛劍与玉匣莫知所在後焕亡焕子爽带劍经延平津劍无故堕水令人投入逐觅见二龙长数丈盘交须臾光彩徵发曜日映川鲍照赠故人马子乔诗双劍将别离先在匣中鸣烟雨交将夕从此忽分形雌沈吴江水雄飞入楚城吴江深无底楚关有崇局一为天地别岂直限幽明神物终不隔干祀倘还并太白此篇盖拟之也然鲍诗为故人而赠别其居要处在神物一联李诗感知已之不存其警策处在风胡二语辞调虽近意旨自别】

其十七

金华牧羊儿乃是紫烟客我愿从之游未去髮已白不知繁华【一作朱顏】子扰扰何所迫崑山采琼蘂【一作蕤】可以链精魄【神仙传黄初平者丹溪人也年十五家使牧羊有道士见其良谨便将至金华山石室中四十余年不复念家其兄初起入山寻索历年不得後见市中有一道士问之曰吾有弟名初平因令牧羊失之四十余年莫知死生所在愿道君为占之道士曰金华山中有一牧羊儿姓黄名初平是卿弟非耶初起闻之即随道士去遂得相见悲喜语毕问初平羊何在曰近在山东初起往视之不见但见白石而还谓初平曰山东无羊也初平曰羊在耳但兄自不见之初平与初起俱往初平叱曰羊起於是白石皆变为羊数万头初起曰弟独得仙道如此吾可学否初平曰惟好道便可得之初起便弃妻子留住就初平学共服松脂茯苓至五百岁能坐在立亡行于日中无影而有童子之色後乃俱还乡里诸亲族死亡略尽乃复还去初平改字为赤松子初起改字为鲁班列仙传丹火翼辉紫烟成盖沈约诗所愿从之游阮籍诗昔日繁华子古诗戚戚何所迫司马相如大人赋叽琼华张揖注琼树生崑仑西流沙滨大三百围高万仞华蘂也食之长生陆机诗上山采琼蘂穹谷饶芳兰吕延济注琼蘂玉英也江淹诗隐沦驻精魄吕向注精魄魂魄也徐干中论形体者人之精魄也】

其十八

天津三月时千门桃与李朝为断肠花暮逐东流水前水复【一作非】後水古今相续流新【一作今】人非旧人年年桥上游鸡鸣海色动谒帝罗公侯月落西上阳【一作上阳西】

余辉半城楼衣冠照云日朝下散皇州鞍马如飞龙黄金络马头行人皆辟易志气横嵩丘入门上高堂列鼎错珍羞香风引赵舞清管随齐讴七十紫鸳鸯双双戏庭幽行乐争昼夜自言度千秋功成身不退自古多愆尤黄犬空叹息绿珠成衅讎何如鸱夷子散髮棹【一作弄】扁舟【元和郡县志天津桥在河南县北四里隋炀帝大业元年初造此桥以驾洛水用大船维舟皆以铁锁钩连之南北夹路对起四楼其楼为日月表胜之象然洛水溢浮桥辄壤唐贞观十四年更令石工累方石为脚尔雅曰斗牛之间为天汉之津故取名焉刘庭芝诗可怜杨柳伤心树可怜桃李断肠花杨齐贤曰海色晓色也鸡鸣之时天色昧明如海气朦胧然旧唐书东都上阳宫在宫城之西南隅南临洛水西距谷水东即宫城北连禁苑宫内正门正殿皆东向正门曰提象正殿曰观风其内别殿亭观九所上阳之西隔谷水有西上阳宫虹桥跨谷行幸往来皆高宗龙朔後置吴均诗落月有余辉谢朓诗春色满皇州张铉注皇州帝都也晋书食货志车如流水马若飞龙古鸡鸣曲黄金络马头颍颍何煌煌汉书杨喜人马俱惊辟易数里顔师古注辟易谓开张而易其本处嵩丘即嵩山也又艺文类聚俗说曰傅亮北征在黄河中垂至洛遥见嵩高山于时同从客在坐问傅曰潘安仁怀旧赋云前瞻太室旁眺嵩高嵩高太室是一山何以言旁眺亮曰有嵩丘山去太室有七十里此是写书误耳据此则嵩丘别是一山矣家语列鼎而食王融诗香风流梵管何妥诗清管调丝竹初学记梁元帝纂要曰齐歌曰讴吴歌曰歛古鸡鸣曲鸳鸯七十二罗列自成行西京杂记茂陵富人袁广汉於北邙山下筑园养白鸚鵡紫鸳鸯牝牛青兕奇兽怪禽委积其间尔雅翼鸚鵡亦鸳鸯之类其色多紫李白诗所谓七十紫鸳鸯双双戏庭幽谓鸚鵡也汉书人生行乐耳须富贵何时老子功成名遂身退天之道也黄犬叹息李斯事详见拟恨赋注晋书石崇有妓曰绿珠美而艳善吹笛孙秀使人求之崇时在金谷别馆方登凉台临清流妇人侍侧使者以告崇尽出其婢妾数十人以示之皆蘊兰麝被罗縠曰任所择使者曰君侯服御丽则丽矣然本受命指索绿珠不识孰是崇勃然曰绿珠吾所爱不可得也使者曰君侯博古通今察远照迕愿加三思使者出而又反崇竟不许秀怒乃劝赵王伦诛崇崇正宴于楼上介士到门崇谓绿珠曰我今为尔得罪绿珠泣曰当效死于官前因自投于楼下而死崇母兄妻子无少长皆被害汉书越王句践困于会稽之上乃用范蠡计然十年国富厚赂战士遂报强吴刷会稽之耻范蠡乃乘扁舟浮江湖变姓名适齐为鸱夷子皮孟康曰扁舟特舟也顔师古注自号鸱夷者言若盛酒之鸱夷多所容受而可卷怀与时弛张也张华诗散髮重陰下抱杖临清渠张铉注散髮言不为冠所束也徐祜卿曰黄犬句应前贵宠之言绿珠句应前歌舞之言鸱夷句应前功成身退之言辟音辟】

其十九

西上【一作岳】莲花山迢迢见明星素手把芙蓉虚步蹑太清霓裳曳广带飘拂昇天行邀我登云台高揖卫叔卿恍恍与之去驾鸿凌紫冥俯视洛阳川茫茫走胡兵流血涂野草豺狼尽冠缨【初学记华山五岳之西岳也周官豫州其镇山曰华山华山记云山顶有池生千叶莲花服之羽化因曰华山陕西志华山北上有莲花峯视诸峰为更高古诗迢迢牵牛星吕延济注迢迢远貌太平广记明星玉女者居华山服玉浆白日升天古诗纖纖出素手楚辞章句芙蓉莲花也楚辞青云衣兮白霓裳慎蒙名山记云台峰在太华山东北两峰峥嵘四面陡絶上冠景云下通地脉巖然独秀有若灵台神仙传卫叔卿者中山人也服云母得仙汉元封二

年八月壬辰孝武皇帝闲居殿上忽有一人乘云车驾白鹿从天而下来集殿廷其人年可三十许色如童子羽衣星冠帝惊问为谁荅曰我中山魏叔卿也帝曰子若是中山人乃朕臣也可前共语叔卿本意谒帝谓帝好道见之必加优礼而帝问曰是朕臣也於是大失望默然不应忽焉不知所在帝甚悔恨即遣使者梁伯至中山推求叔卿不得见但见其子度世共之华山求寻其父未到其岭于絶岩之下望见其父与数人博戏于石上紫云郁郁于其上白玉为牀有数仙童执幢节立其後郭璞诗驾鸿乘紫烟此诗大抵是洛阳破没之後所作胡兵谓禄山之兵豺狼谓禄山所用之逆臣萧氏以胡兵为回纥以豺狼尽冠纓为用官爵赏功不分流品似未是】

其二十

昔我游齐都登华不注峯兹山何峻秀綠翠如芙蓉萧飒古仙人了知是赤松借予一白鹿自挟两青龙含笑凌倒景欣然愿相从【水经济水又东北径华不注山酈道元注单椒秀泽不连丘陵以自高虎牙桀立孤峯特拔以刺天青崖翠发望同点黛山下有华泉通典齐州历城县有华不注山其山直上如笋山东通志华不注山在济南府城东北十五里不字即柎字如诗棠棣之华鄂不韡韡之不华之蒂也喻此山孤秀如华柎之注于水者然列仙传赤松子者神农时雨师也服水玉以教神农能入火自烧往往至崑仑山上常止西王母石室中随风雨上下炎帝少女追之亦得仙俱去至高辛时复为雨师司马相如大人赋贯列缺之倒景兮服?注人在天上下向视日月故景倒在下也张揖注陵阳子明经曰倒景气去地四千里其景皆倒在下也汉书登遐倒景如淳注在日月之上反从下照故其景倒也沈约诗一举陵倒景无事适华嵩华不音花孚】泣与亲友别欲语再三咽勗君青松心努力保

霜雪世路多险艰白日欺红颜分手【繆本作首】各千里去去何时还【苏武诗努力爱春华又云去去从此辞 咽音噎】在世复几时倏如飘风度空闻紫金经白首愁相误抚已忽自笑沉吟为谁故名利徒煎熬安得闲余步终留赤玉舄东上蓬莱【一作山】路秦帝如我求苍苍但烟雾【陶潜归去来辞寓形宇内复几时尔雅回风为飘郭璞注旋风也毛萇诗传飘风暴起之风论衡天地之间尤疾速者飘风也紫金经炼丹之书也王逸九思我心兮煎熬聊是兮用忧沈约诗聊可闲余步张铣注间缓也列仙传安期生者琅琊阜乡人也卖药于东海边时人皆言千岁翁秦始皇东游请见与语三日三夜赐金璧度数千万出于阜乡亭皆置去留书以赤玉舄一緌为报曰後十年求我于蓬莱山始皇即遣使者徐士卢生等数百人入海未至蓬莱山辄逢风波而还立祠阜乡亭海边十数处云 此诗古本昔我游齐都以下五韵作一首泣与亲友别以下四韵作一首在世复几时以下六韵作一首萧本合作一首而解之曰此游仙诗意分三节第一节谓从仙人以远游第二节谓别亲友而呜咽第三节是泣别之际忽翻然自悟而笑曰沉吟泣别者为谁故哉在世几时不过为名利煎熬耳于已分上事初何所益於是决意远游终当高举但留遗迹于人间虽帝王求之且不可得岂更复为亲友之恋哉琦按中节语意与上下全不相类当弃世远游何事犹作儿女子态与亲友泣别至于欲语再三咽耶韦穀才调集只选中四韵作一首而前後不録是知古本似未失真萧本未免误合但首章语意似未完或有缺文未可知朱子谓太白诗多为人所乱有一篇分为三篇者有二篇合为一篇者岂指此章而言耶今姑仍萧本俟识者再为定之】

其二十一

郢客吟白雪遗响飞青天徒劳歌此曲举世谁为传试为巴人唱和者乃数千吞声何足道叹息空凄然【新序客有歌于郢中者其始曰下里巴人国中属而和者数千人其为阳陵采薇国中属而和者数百人其为阳春白雪国中属而和者数十人而已引商刻角杂以流徵国中属而和者不过数人是其曲弥高其和弥寡陆机诗哀音绕栋宇遗响入云汉鲍照诗吞声踯躅不敢言萧士贇曰此感叹之辞高才者知遇之难卑污者投合之易负才不遇者能不为之吞声叹息也欤】

其二十二

秦水别陇首幽咽多悲声胡马顾朔雪蹀躞长嘶鸣感物动我心缅然含归情昔视秋蛾飞今见春蚕生嫋嫋桑结【一本作枯俗本作柘误】叶萋萋柳垂荣急节谢流水羈心摇悬旌挥涕且复去惻怆何时平【太平御览辛氏三秦记曰陇右西关其坂纡回不知高几里欲上者七日乃越高处可容百余家上有清水四注流下俗歌曰陇头流水鸣声幽咽遥望秦川肝肠断絶陇首即陇头也沈约诗西征登陇首通监地理通释秦州陇城县有大陇山亦曰陇首山陆机诗胡马如云屯吴均诗蹀躞青骢马广韵蹀躞行貌缅远也江淹赋秋蛾兮载飞沈约诗宁忆春蚕起广雅嫋嫋弱也萋萋茂也枚乘柳赋枝逶迤而含紫叶萋萋而吐绿杨齐贤曰毛诗昔我往矣杨柳依依今我来思雨雪霏霏曹子建诗昔我初迁朱华未希今我旋止素雪云飞太白意亦同此昔我在此见秋蛾之飞今既改岁春蚕生矣桑叶如结柳条争荣犹未得归曹植与吴质书日不我与曜灵急节吕延济注急节谓迁移速也杨齐贤曰谢去也谓时节之去如流水之急也史记心摇摇然如悬旌而无所终薄家语无挥涕王肃注挥涕不哭流涕以手挥之咽音噎蹀音雙蹀音叠缅音勉羈音鸡怆音昌又音创】

其二十三

秋露白如玉团团下庭绿我行忽见之寒早悲岁促人生鸟过目胡乃自结束景公一何愚牛山泪相续物苦不知足得【一作登】陇又望蜀人心若波澜世路有【一作多】屈曲三万六千日夜夜当秉烛【谢惠连诗团团满叶露王融诗秋风下庭绿庭绿谓庭中草木也张协诗人生瀛海内忽如鸟过目古诗荡涤放情志何为自结束列子齐景公游于牛山北临其国城而流涕曰美哉国乎郁郁芊芊若何滴滴去此国而死乎使古无死者寡人将去斯而之何艾孔梁丘据皆从而泣曰臣赖君之赐疏食恶肉可得而食弩马棊车可得而乘也且犹不欲死而况吾君乎晏子独笑于旁公雪泣而顾晏子曰寡人今日之游悲孔与据皆从寡人而泣子之独笑何也晏子对曰使贤者常守之则太公桓公将常守之矣使勇者常守之则庄公灵公将常守之矣数君者将常守之吾君方将蓑笠而立畎亩之中惟事之恤何暇念死乎则吾君又安得此位而立焉以其迭处之迭去之至于君也而独为之流涕是不仁也见不仁之君见谄谀之臣见此二者臣之所为独窃笑也景公慙焉举觞自罚罚二臣者各二觞焉後汉书敕岑彭书曰人苦不知足既平陇复望蜀陆机诗休咎相乘蹀翻覆若波澜三万六千日约计百年岁月有此数也抱朴子百年之寿三万余日耳沈炯诗百年三万日处处此伤情古诗昼

短苦夜长何不秉烛游】

其二十四

大车扬飞尘亭午暗阡陌中贵多黄金连云开甲宅路逢鬪鸡者冠盖何辉赫鼻息干虹蜺行人皆怵惕世无洗耳翁谁知尧与跖【初学记纂要云日在午曰亭午孙绰天台山赋羲和亭午游气高褰刘良注亭至也阡陌田间道也史记索隐风俗通曰南北曰阡东西曰陌河东以东西为阡南北为陌史记天子使中贵人从李广索隐曰案董巴舆服志云黄门丞主密使听察天下天下谓之中贵人使者崔浩云在中而贵幸非德望故云中贵也服?曰内臣之贵幸者甲宅犹甲第魏书阉官列传太后嘉其忠诚为造甲宅新唐书宦者传开元天宝中宦官黄衣以上三千员衣朱紫千余人其称旨者辄拜三品将军列戟于门其在殿头供奉委任华重持节传命光焰殷殷动四方所至郡县奔走献遗至万计修功德市禽鸟一为之使犹且数千缗监军持权节度反出其下于是甲舍名园上腴之田为中所占者半京畿矣又高力士传中人若黎敬仁林昭隐尹凤翔韩庄牛仙童刘奉廷王承恩张道斌李大宜朱光辉郭全边今诚等并内供奉或外监节度军修功德市鸟兽皆为之使使还所褒获动巨万计京师甲第池园良田美产占者十六与力士略等又王鉷传鉷子准为卫尉少卿以鬪鸡供奉禁中李林甫子岫亦亲近准骄甚凌岫出其上过驸马都尉王繇以弹弹其巾折玉簪为乐既置酒永穆公主亲视供具万年尉韦黄裳长安尉贾季邻等候准经过饌具倡乐必素办无敢逆意陈鸿东城老父传贾昌长安宣阳里人生七岁超捷过人善应对解鸟语音玄宗在藩邸时乐民间清明节鬪鸡戏及即位治鸡坊于两宫间索长安雄鸡金毫铁距高冠昂尾千数养于鸡坊选六军小儿五百人使驯扰教饲之上好之民风尤甚诸王世家外戚家公主家侯家倾帑破产市鸡以偿鸡直都中男女以弄鸡为事贫者弄假鸡帝出游见昌弄木鸡于云龙门道旁召入为鸡坊小儿衣食右龙武军昌三尺童子入鸡羣如狎羣小壮者弱者勇者怯者水谷之时疾病之候悉能知之举二鸡鸡畏而驯使令如人护鸡坊中谒者王承恩言于玄宗召试殿庭皆中玄宗意即日为五百小儿长加以忠厚谨密天子甚爱幸之金帛之赐日至其家开元十三年笼鸡三百从封东岳父忠死太山下奉尸归葬雍州县官为葬器丧车乘传洛阳道十四年三月衣鬪鸡服会玄宗于温泉当时天下号为鸡神童时人为之语曰生儿不用识文字鬪鸡走马胜读书贾家小儿年十三富贵荣华代不如能令金距期胜负白罗绣衫随软輦父死长安千里外差夫治道挽丧车顔氏家训印组光华车骑辉赫曹植七启挥袂则九野生风慷慨则气成虹蜺广雅怵惕恐惧也高士传尧之让许由也由以告巢父巢父曰汝何不隐汝形藏汝光若非吾友也击其膺而下之由怅然不自得乃过清泠之水洗其耳曰向闻贪言负吾友矣遂去终身不相见庄子柳下季之弟名曰盗跖从卒九千人横行天下侵暴诸侯穴室枢户驱人牛马取人妇女贪得忘亲不顾父母兄弟不祭先祖所过之邑大国守城小国入保万民苦之史记正义按跖者黄帝时大盗之名以柳下惠弟为天下大盗故世放古号之盗跖陌音麦跖音职】

其二十五

世道日交丧浇风散淳源不采芳桂枝反栖恶木根所以桃李树吐花竟不言大运有兴没羣

动争飞奔归来广成子去入无穷门【庄子世丧道矣道丧世矣世与道交相丧也萧士贇曰世不知有道之可尊是世丧道矣有道者见世如此遂亦无心用世焉非所谓道丧世者欤故曰交相丧也王中头陀寺碑文淳源上派浇风下黷汉书桃李不言下自成蹊大运天运也已见前注神仙传广成子者古之仙人也居崆峒之山石室之中黄帝闻而造焉请问治身之要广成子曰至道之精杳杳冥冥无视无听抱神以静形将自正必静必清无劳尔形无摇尔精乃可长生慎内闭外多知为败我守其一以处其和故千二百岁而形未尝衰得我道者上为皇失吾道者下为土将去汝入无穷之门游无极之野与日月参光与天地为常人其尽死而我独存矣浇音梟】

其二十六

碧荷生幽泉朝日艳且鲜秋花冒绿水密叶罗青烟秀色空绝世馨香谁为【萧本作竟谁】传坐看飞霜满凋此红芳年结根未得所愿托华池边【曹植诗朱华冒绿水李善注冒犹覆也张协七命飞霜迎节高风送秋古诗结根太山阿楚辞鼃龟游乎华池王逸注华池芳华之池也陆机诗移居华池边】

其二十七

燕赵有秀色绮楼青云端眉目艳皎月一笑倾城欢常恐碧草晚坐泣秋风寒纤手怨玉琴清晨起长叹焉得偶君子共乘双飞鸾【陆厥中山孺子妾歌一笑倾城一顾倾市陆机诗佳人抚琴瑟纤手清且闲江淹扇上彩画赋玉琴兮散声素女兮弄情萧士贇曰此与二十六首同意怀材抱艺之士惟恐未能见用而老之将至思得君子附离与共爵位而用世也】

其二十八

容颜若飞电时景如飘风草绿霜已白日西月复东华鬓不耐秋飒然成衰蓬古来贤圣人一一谁成功君子变猿鹤小人为沙虫不及广成子乘云驾轻鸿【毛萇诗传飘风回风也艺文类聚抱朴子曰周穆王南征久而不归君子为猿为鹤小人为虫为沙今本抱朴子云三军之众一朝尽化君子为鹤小人成沙与古书所引迥异徐禎卿曰谁成功言未有能仙举者也为猿鹤为虫沙言君子小人皆莫逃于阴阳变化之中也广成子已见前注沈约诗朋来握石髓宾至驾轻鸿】

其二十九

三季分战国七雄成乱麻王风何怨怒世道终纷拏至人洞玄象高举凌紫霞仲尼欲【一作亦】浮海吾祖之流沙圣贤共沦没临岐胡咄嗟【汉书三季之後厥事放纷顔师古注三季三代之末也东京赋七雄并争薛综注七雄谓韩魏燕赵齐楚秦也史记其後秦遂以兵灭六王并中国外攘四夷死人如乱麻毛萇诗传乱世之音怨以怒其政乖正义曰乱世之政教与民心乖戾民怨其政教所以忿怒述其怨怒之心而作歌故乱世之音亦怨以怒也史记汉匈

奴相纷拏正义曰三苍解诂云纷拏相牵也师古曰纷拏乱相持搏也拏音女居反楚辞穀乱兮纷拏淮南子芒繁乱泽巧为纷拏按说文拏牵引也从手奴声女加切拏持也从手如声女加切盖义虽别而音则同至韵会始以拏入麻韵拏入鱼韵析而为二然考之经史传注拏拏二字通用并有二音义亦相互从合可也至人谓圣人玄象谓天象庄子不离于真谓之至人後汉记玄象错度日月不明列仙传关令尹喜者周大夫也老子西游喜先见其气知有真人当过物色而遮之果得老子老子亦知其奇为着书授之後与老子俱游流沙化胡服巨胜实莫知其所终萧士贇曰唐以老子为祖太白乃兴圣皇帝九世孙故云吾祖公羊传疏咄嗟犹叹息即里语曰咄嗟之间也 咄当没切敦入声】

其三十

玄风变太古道丧无时还扰扰季叶【一作市井】人鸡鸣趋四关但识金马门谁【一作诘】知蓬莱山白首死罗绮笑歌无休【一作时】闲渌【萧本作绿】酒晒丹液青娥凋素颜【一作萋萋千金骨风尘凋素颜】大儒挥金槌琢之【一作发塚】诗礼间苍苍三珠树冥目焉能攀【阮籍诗季叶道陵迟季叶季世也李善文选注云陆机洛阳记曰洛阳有四关东成皋南伊阙北孟津西函谷史记索隐关中咸阳也东函谷南崤武西散关北萧关在四关之中三辅黄图金马门宦者署武帝得大宛马以铜铸象立于署门因以为名东方朔主父偃严安徐乐皆待诏金马门即此後汉书孝武皇帝时善相马者东门京铸作铜马法献之有诏立马於鲁班门外则更名鲁班门曰金马门十洲记蓬莱山对东海之东北岸周围五千里上有九老丈人九天真王宫盖太上真人所居惟飞仙能到其处耳陶潜诗清歌散新声绿酒开芳颜广雅晒笑也宋南平王白紵舞曲佳人举袖曜青娥庄子儒以诗礼发塚大儒胪传曰东方作矣事之若何小儒曰未解裙襦口中有珠诗固有之曰青青之麦生于陵陂生不布施死何含珠为接其鬓压其颞儒以金椎控其颐徐剔其颊无伤口中珠山海经三珠树生赤水上其为树如栢叶皆为珠一曰其为树如棼也萧士贇曰此太白感时忧世之作意谓古道日丧季世之人不复返朴汨没於名利声色之场至死不悟所谓儒者又皆假经欺世借儒术以行其窃取之心汉谚所谓悬牛头卖马脯盗跖行孔子语者也彼岂知大道无为自然之化哉三珠之树喻大道也虽苍苍在前乃如之人冥然无见安能攀而至乎忧愤之意微而显矣琦按三珠树乃仙境所生冥目焉能攀谓至死而不得采以照上文焉知蓬莱山之意】

其三十一

郑客西入关行行未能已白马华山君相逢平原里璧遗镐池君【缪本作公】明年祖龙死秦人相谓曰吾属可去矣一往桃花源千春隔流水【搜神记秦始皇三十六年使者郑客从关东来将入函谷西至华阴望见素车白马从华山上下疑其非人道住止而观之遂至问郑客曰安之郑客曰之咸阳车上人曰吾华山使也愿托一牋书致镐池君所子之咸阳道过镐池见一大梓有文取石欸梓当有应者即以书与之客如其言以石欸梓果有人来取书云明年祖龙死史记秦始皇三十六年使者从关东夜过华阴舒平道有人持璧遮使者曰为吾遗镐池君因言曰今年祖龙死使者问其故因忽不见置其璧去使者奉璧俱以闻始皇默然良久曰山鬼固不过知一岁事也退言曰祖龙者人之先也使御府视璧乃二十八年行渡江所

沉璧也张晏曰武王居镐池君则武王也武王伐商故神云始皇荒淫若纣矣今亦可伐也孟康曰长安西南有镐池索隐曰镐池君按服?云水神是也江神以璧遗镐池之神告始皇之将终也且秦水德王故其君将亡水神先自相告也苏林曰祖始也龙人君象谓始皇也搜神後记晋太元中武陵人捕鱼为业缘溪行忘路远近忽逢桃花夹岸数百步中无杂树芳草鲜美落英缤纷渔人甚异之复前行欲穷其林林尽水源便得一山山有小口髣髴若有光便舍舟从口入初极狭才通人复行数十步豁然开朗土地旷空屋舍俨然有良田美池桑竹之属阡陌交通鸡犬相闻男女衣着悉如外人黄髮垂髫并怡然自乐见鱼人大惊问所从来具答之便要还家为设酒杀鸡作食村中人闻有此人咸来问讯自云先世避秦难率妻子邑人至此絶境不复出焉遂与外人隔问今是何世乃不知有汉无论魏晋此人一一具言所闻皆为叹惋余人各复延至其家皆出酒食停数日辞去此中人语曰不足为外人道也既出得其船便扶向路处处志之及郡乃诣太守说如此太守刘歆即遣人随之往寻向所志不复得焉】

其三十二

蓐收肃金气西陆弦海月秋蟬号阶轩感物忧不歇良辰竟何许大运有沦忽天寒悲风生夜久衆星没惻惻不忍言哀歌达【萧本作逮】明发【礼记孟秋之月其神蓐收山海经西方蓐收左耳有蛇乘两龙郭璞注金神也人面虎爪白毛执钺北堂书钞汉书云立春春分月行东方青道曰东陆立夏夏至月行南方赤道曰南陆立秋秋分月行西方白道曰西陆立冬冬至月行北方黑道曰北陆释名弦月半之名也其形一旁曲一旁直若张弓弛弦也阮籍诗良辰在何许凝霜沾衣襟谢朓诗良辰竟何许夙昔梦佳期吕延济注许处也言平生良时竟在何处徐祯卿曰良辰建功策名之时也大运天运也沦忽暮也岁华纪丽秋风曰悲风诗小雅明发不昧毛传曰明发发夕至明正义曰夜地而暗至旦而明明地发後故谓之明发也集传曰明发谓将旦而光明开发也】

其三十三

北溟有巨鱼身长数千里仰喷三山雪横吞百川水凭陵【缪本作凌】随海运燁【缪本作烜】赫因风起吾观摩天飞九万方未已【北溟巨鱼用庄子逍遥游中事详见大鹏赋注陆德明庄子音义海运司马彪云运转也向秀云非海不行故云海运梁简文云运徙也阮籍诗高鸟摩天飞凌云共游戏余俱见大鹏赋注】

其三十四

羽檄如流星虎符合专城喧呼救边急羣鸟皆夜鸣白日曜紫微三公运权衡天地皆得一澹然四海清借问此何为荅言楚徵【一作征楚】兵渡泸及五月将赴云南征怯卒非战士炎方难远行长号别严亲日月惨光晶泣尽继以血心摧两无声困兽当猛虎穷鱼饵奔鲸千去不一回投躯岂全生如何舞干戚一使有苗平【史记吾以羽檄徵天下兵裴駙注魏武奏事曰今边有小警辄露檄插羽非羽檄之意也駙按推此言则以鸟羽插檄书谓之羽檄取其急速若飞鸟也顔师古汉书注檄者以木简为书长尺二寸用徵召也有急事则加以鸟羽插之

示疾速也又淮南王传持羽檄从南方来顏师古注羽檄徵兵之书也後汉书旧制发兵皆以虎符其余徵调竹使符而已潘岳马汧督谏剖符专城紆青拖墨之司张铚注专擅也擅一城也谓守宰之属梁简文帝诗轻兵救边急庄子乱天之经逆物之情玄天弗成解兽之羣而鸟皆夜鸣萧士贇曰言一时喧呼惊扰栖鸟亦不得安其巢至于夜鸣也韩诗外传三公者何曰司空司马司徒也司马主天司空主地司徒主人故陰阳不和四时不节星辰失度灾变非常则责之司马山陵崩弛川谷不流五谷不殖草木不茂则责之司空君臣不正人道不和国多盗贼下怨其上则责之司徒通典周以太师太傅太保为三公汉以丞相大司马御史大夫为三公後汉魏晋宋齐梁陈後魏北齐皆以太尉司徒司空为三公後周以太师太傅太保为三公隋以太尉司徒司空为三公大唐因之老子天得一以清地得一以宁河上公注一无为道之子也天得一故能垂象清明地得一故能安静不动摇琦按泸水即禹贡梁州之黑水也汉时名泸唐名金沙江今云南姚州之金沙江是也其源出吐蕃界中为丽水下流至四川叙州府为马湖江水经注泸峯最为高秀水之左右马步之径裁通而时有瘴气三月四月迳之必死非此时犹令人吐闷五月以後行者差得无害故诸葛亮表言五月渡泸并日而食臣非不自惜也顾王业不可以偏安于蜀故也益州记曰泸水源出曲罗旧山下三百里曰泸水两峰有杀气暑月旧不行故武侯以夏渡为难太平寰宇记十道记云泸水出蕃中入黔府历越嶲郡界出拓州至此有泸津关关上有石峯高三十丈四时多瘴气三四月间发人冲之立死非此时中则人多闷吐唯五月上伏即无害故诸葛武侯征越嶲上疏云五月渡泸深入不毛之地旧唐书南蛮质子阁罗凤亡归帝怒欲讨之杨国忠荐阆州人鲜于仲通为益州长史令率精兵八万讨南蛮与罗凤战于泸南全军陷没国忠掩其败状叙其战功仍令仲通上表请国忠兼领益部十载国忠权知蜀郡都督府长史充劔南节度副大使知节度事国忠又使司马李宓率师七万再讨南蛮宓渡泸水为蛮所诱至太和城不战而败李宓死于阵国忠又隐其败以捷书上闻自仲通李宓再举讨蛮之军其徵发皆中国利兵然於土风不便沮洳之所陷瘴疫之所伤馈饷之所乏物故者十八九凡举二十万衆弃之死地只轮不返人衔冤毒无敢言者新唐书杨国忠传国忠虽当国常领劔南召募使遣戍泸南饷路险乏举无还者旧勲户免行所以宠战功国忠令当行者先取勲家故土无鬪志凡募法愿奋者则籍之国忠岁遣宋昱郑昂韦僊以御史迫促郡县吏穷无以应乃诡设饷召贫弱者密缚置室中衣絮衣械而送屯亡者以送吏代之人人思乱寻遣劔南留後李宓率兵十余万击阁罗凤败死西洱河国忠矫为捷书上闻自再兴师倾中国骁卒二十万踣履无遗天下冤之通监天宝十载夏四月劔南节度使鲜于仲通讨南诏蛮大败于泸南制大募两京及河南北兵以击南诏人闻云南多瘴疠未战士卒死者十八九莫肯应募杨国忠遣御史分道捕人连枷送诣军所旧制百姓有勲者免征役时调兵既多国忠奏先取高勲于是行者愁怨父母妻子送之所在哭声振野说苑下蔡威公闭门而哭三日三夜泣尽而继以血潘岳寡妇赋痛切怛以摧心左传困兽犹鬪谢朓诗奔鲸自此曝吕向注奔鲸大鱼吞食小物喻不义也鲍照诗投躯报明主身死为国殇艺文类聚帝王世纪曰有苗氏负固不服禹请征之舜曰我德不厚而行武非道也吾前教由未也乃修教三年执干戚而舞之有苗请服萧士贇曰此诗盖讨云南时作也首即徵兵时景象而言当此君明臣良天清地宁海内澹然四郊无警之时而忽有此举问之于人始知徵兵者讨云南也乃所调之兵不堪受甲所谓驱市人而战之如以困兽当虎穷鱼饵鲸吾见师之出而不见师之入矣末则深叹当国之臣不能敷文德以来远人致有覆军杀将之耻也】

其三十五

丑女来效顰还家惊四邻壽陵失本步笑杀邯鄲人一曲【一作东西】斐然子雕虫丧天真
棘刺造沐猴三年费精神功成无所用楚楚且华【一作荣】身大雅思文王颂声久崩沦安
得郢中质一挥成风斤【一作承风一运斤萧本作一挥成斧斤 庄子西施病心而瞶其里之
丑人见而美之归亦捧心而瞶其里之富人见之坚闭门而不出贫人见之挈妻子而去之走
陆德明注蹙额曰瞶又庄子子独不闻夫壽陵余子之学行于邯鄲与未得国能又失其故行
矣直匍匐而归耳扬子或问吾子少而好赋曰然童子雕虫篆刻俄而曰壮夫不为也韩非子
燕王好微巧卫人曰能以棘刺之端为母猴燕王悦之养以五乘之奉王曰吾试观客为棘刺
之母猴客曰人主欲观之必半岁不入宫不饮酒食肉雨霁日出视之晏陰之间而棘刺之母
猴乃可见也燕王因养卫人不能观其母猴郑有台下之冶者谓燕王曰臣削者也诸微物必
以削削之而所削必大于削今棘刺之端不容削锋难以治棘刺之端王试观客之削能与不
能可知也王曰善谓卫人曰客为棘刺之端以削吾欲观见之客曰臣请之舍取之因逃冶人
谓王曰计无度量言谈之士多棘刺之说也诗国风衣裳楚楚毛传楚楚鲜明貌庄子庄子送
葬过惠子之墓顾其从者曰郢人垺漫其鼻端若蝇翼使匠石斲之匠石运斧成风听而斲之
尽垺而鼻不伤郢人立不失容宋元君闻之而召匠石曰尝试为寡人为之匠石曰臣则尝能
斲之虽然臣之质死久矣自夫子之死也吾无以为质矣吾无与言之矣萧士贇曰此篇盖讥
世之作诗赋者不过藉此以取科第干禄位而已何益于世教哉太白尝论诗曰将复古道非
我而谁雅颂之作太白自负者如此然安得雅颂之人识之使郢中之质能当匠石之运斤耶
顰音贫或写瞶或写嘖音义俱同邯音寒】

其三十六

抱玉入楚国见疑古所闻良宝终见弃徒劳三献君直木忌先伐芳兰哀自焚盈满天所损沈
冥道为羣东海泛【萧本作沈】碧水【一作流】西关乘紫云鲁连及柱史可以蹶清芬【
韩非子楚人和氏得玉璞楚山中奉而献之厉王厉王使玉人相之玉人曰石也王以和为诳
而刖其左足及厉王薨武王即位和又奉其璞而献之武王武王使玉人相之又曰石也王又
以和为诳而刖其右足武王薨文王即位和乃抱其璞而哭于楚山之下三日三夜泪尽而继
之以血王闻之使人问其故曰天下之刖者多矣子奚哭之悲也和曰吾非悲刖也悲夫宝玉
而题之以石贞士而名之以诳此吾所以悲也王乃使玉人理其璞乃得宝焉遂命曰和氏之
璧墨子和氏之璧隋侯之珠三棘六异此诸侯之所谓良宝也庄子直木先伐甘井先竭太平
御览金楼子曰蚌怀珠而致剖兰含香而遭焚高士传老子生于殷时为周柱下史後周德衰
乃乘青牛车去入大秦过西关关令尹喜望气先知焉乃物色遮候之已而老子果至乃强使
着书作道德经五千余言为道家之宗陆机文赋诵先人之清芬李善注清美芬芳之德沈冥
及鲁连欲蹈东海事已见前注】

其三十七

燕臣昔恸哭五月飞秋霜庶女号苍天震风击齐堂精诚有所感造化为悲伤而我竟何辜远

身金殿旁【一本少此二句】浮云蔽紫闥白日难回光羣沙秽明珠衆草凌孤芳古来共叹息流泪空沾裳【论衡邹衍无罪见拘于燕当夏五月仰天而叹天为陨霜淮南子庶女叫天雷霆下击景公台陨支体伤折海水大出高诱注庶贱之女齐之寡妇无子不嫁事姑谨敬姑无男有女女利母财令母嫁妇终不肯女杀母以诬妇妇不能自明冤结叫天天为行雷霆下击景公之台陨坏毁景公之支体海水为之大溢出也江淹上建平王书贱臣叩心飞霜击于燕地庶女告天振风袭于齐堂江淹诗列坐金殿侧孔融诗谗邪害公正浮云翳白日崔駰达旨攀台阶闥紫闥曹植求通亲亲表注心皇极结情紫闥刘良注皇极紫闥天子所居也孤芳芳草之孤生者萧士贇曰此诗其遭高力士潜於贵妃而放黜之时所作乎浮云比力士紫闥比中宫白日比明皇羣沙衆草以喻小人明珠孤芳以喻君子】

其三十八

孤兰生幽园衆草共芜没虽照阳春晖复悲高秋月飞霜早淅沥緑艳恐休歇若无清风吹香气为谁发【说文晖日光也岁华纪丽九月曰高秋亦曰暮秋谢惠连雪赋霰淅沥而先集刘良注淅沥细下貌抱朴子芳兰之芬烈者清风之功也萧士贇曰诗谓君子在野未能自拔于衆人之中虽蒙主知而小人之谗潜已至若非在位之人引类拔萃而荐用之虽有馨香何以自见哉】

其三十九

登高望四海天地何漫漫霜被羣物秋风飘大荒寒荣华东流水万事皆波澜白日掩徂晖浮云无定端梧桐巢燕雀枳棘栖鸞且复归去来劒歌行【一作悲】路难【一本自第四句後云杀气落乔木浮云蔽层峦孤凤鸣天霓遗声何辛酸游人悲旧国抚心亦盘桓倚劒歌所思曲终涕洟澜大荒谓荒野之地楚辞及荣华之未落王逸注荣华喻顔色也吕氏春秋水泉东流日夜不休徂辉落日之光也骆宾王诗别情伤去盖离念惜徂辉鸞当是鸞字之讹庄子南方有鸟其名鸞雏发于南海而飞于北海非梧桐不止非练实不食非醴泉不饮陆德明注鸞雏鸞凤之属也广韵鸞雏似凤埤雅鸞赤色五采鸡形鸣中五音颂声作则至一曰青凤为鸞後汉书枳棘非鸞凤所栖陈书枳棘栖鸞常以增叹劒歌谓弹其劒而歌也行路难乐府曲名详见後三卷注琦按登高望四海天地何漫漫见宇宙广大之意霜被羣物秋风飘大荒寒见生计萧索之意荣华东流水言年华日去如水之东流滔滔不返万事皆波澜言生事扰扰反覆相乘如水之波澜无有静时白日掩徂晖谓日将落而无光如人将有去志而意色不快浮云无定端言人生世上行踪原无一定何必恋恋於此或以落日为浮云所掩喻英明之人为谗邪所惑两句作一意解者亦可梧桐之本本凤凰所止而燕雀得巢其上喻小人得志枳棘之树本燕雀所萃而鸞反栖其间喻君子失所以上皆即景而寓感叹於间以见不得不动归来之念意者是时太白所投之主人惑于羣小而不见亲礼将欲去之而作此诗旧注以时世昏乱陰小用事为解专指朝政而言恐未是漫谟官切满平声鸞与鸞同音冤】

其四十

凤饥不啄粟所食唯琅玕焉能与羣鸡刺蹙【一作蹙促】争一飡朝鸣崑丘树夕饮砥柱湍
归飞海路远独宿天霜寒幸遇王子晋结交青云端懷恩未得报感别空长叹【艺文类聚庄
子曰吾闻南方有鸟其名为凤所居积石千里天为生食其树名琼枝高百仞以璆琳琅玕为
实天又为生离珠一人三头逴卧逴起以伺琅玕淮南子凤凰曾逝万仞之上翱翔四海之外
过崑仑之疏圃饮砥柱之湍濞山海经西海之南流沙之滨赤水之後黑水之前有大山名曰
崑仑之丘元和郡县志底柱山俗名三门山在陕州硤石县东北五十里黄河中禹贡曰导河
积石至于龙门又东至于底柱注云河水分流包山而过山见水中若柱然也又以禹理洪水
山陵当水者破之以通河三穿既决河出其间有似於门故亦谓之三门水经注王子晋好吹
凤笙招延与道士浮丘同游伊洛之浦 啄音卓刺音七飡同餐砥同底】

其四十一

朝弄紫泥海【一作朝驾碧鸾车萧本作朝弄紫沂海】夕披丹霞裳挥手折若木拂此西日
光云卧【一作举】游八极玉颜已千霜飘飘入无倪稽首祈上皇呼我游太素玉杯赐琼浆
一飡历万岁何用还故乡永随长风去天外恣飘扬【洞冥记东方朔去经年乃归母曰汝行
经年一归何以慰我也朔曰儿至紫泥海有紫水污衣仍过虞渊湔洗朝发中返何云经年乎
谢朓七夕赋厌白玉而为饰霏丹霞而为裳楚辞折若木以拂日兮聊逍遥以相羊王逸注若
木在崑仑西极其华照下地拂击也折取若木以拂击日使之还去或谓拂蔽也以若木鄣蔽
日使不得过鲍照诗云卧恣天行黄庭内景经减却百邪玉链颜袁象诗万古方一春千霜岂
二发倪际也楚辞信上皇而质正王逸注上皇上帝也真诰晨游太素宫控辔观玉河太平御
览王君内传曰紫清宫太素三元道君之所治也楚辞华酌既陈有琼浆些左思吴都赋习御
长风刘逵注长风远风也萧士贇曰或疑首二句为不类起句不知正是取法选诗如朝发邳
都桥暮济白马津朝发广莫门暮宿丹水山朝旦发阳崖景落憩陰峰之类皆起句也而其文
法则又皆自楚辞中来如朝发轍于天津兮夕济乎西极朝驰予马乎江皋夕济乎西澨是
也】

其四十二

摇裔双白鸥鸣飞沧江流宜与海人狎岂伊云鹤俦寄影【萧本作形】宿沙月沿芳戏春洲
吾亦洗心者忘机从尔游【摇裔犹摇荡也卢思道诗丰茸鸡树密摇裔鹤烟稠谢朓诗回瞰
沧江流列子海上之人有好沕鸟者每旦之海上从沕鸟游沕鸟之至者百住而不止其父曰
吾闻沕鸟皆从汝游汝取来吾玩之明日之海上沕鸟舞而不下埤雅鳬好没鷺好浮故鷺一
名沕列子曰沕鸟今字从鸟後人加之也苍颉解诂曰鷺鸥也今鸥一名水鵀似白鸽而羣飞
谢朓诗喧鸟覆春洲 裔音曳沿即沿字】

其四十三

周穆八荒意汉皇万乘尊淫乐心不极雄豪安足论西海宴王母北宫邀上元瑶水闻遗歌玉
杯竟空言灵迹成蔓草徒悲千载魂【列子周穆王肆意远游命驾八骏之乘右服 骝而左

綠耳右驂赤驥而左白 主车则造父为御离□为右次车之乘右服渠黄而左踰轮左驂盜驪而右山子百天主车参百为御奔戎为右驰驱千里遂宾于西王母觴于瑤池之上西王母为王瑶王和之其辞哀焉汉武外传元封元年七月七日王母至天仙咸住殿下王母惟将二侍女上殿东向坐帝跪拜问寒暄毕而立因呼帝坐帝面南王母乃遣侍女与上元夫人相闻云王九光之母敬谢比不相见四千余年天事劳我致以愆面夫人可暂来否若能屈驾当停相须帝问王母上元何真也曰是三天真王之母上元之官统十万玉女名録者也俄而夫人至年可二十余天姿精耀灵眸艳絶服青霜袍云彩乱色非锦非绣不可名字头作三角髻余髮散垂至腰戴九云夜光之冠带火山大玉之佩结凤林华锦之绶腰流黄挥精之劒上殿向王母拜王母坐止之呼同坐北向王母勅帝曰此真元之母尊贵之人汝当起拜问寒温还坐夫人笑曰五浊之人耽酒营利嗜味淫色固其常也且彻以天子之贵其乱目者倍于凡焉而复于华严之墟折嗜欲之根愿无为之事良有志矣按汉武内传外传诸书载王母及上元夫人来降汉庭俱不言所在宫名北宫则礼神君之地也此云北宫邀上元当另有所本王融曲水诗序穆满八骏如舞瑤水之陰刘良注瑤水瑤池也三辅黄图庙记曰神明台武帝祭仙人处上有承露盘有铜仙人舒掌捧铜盘玉杯以承云表之露以露和玉屑服之以求仙道太平御览汉武故事上崩後鄠县有一人于市货玉杯吏疑其御物欲捕之因忽不见县送其器推问乃茂陵中物也霍光自呼吏问之说市人形貌如先帝其事载在杯类中而今本多作玉碗盖今本误矣按二事注此皆可通但未知太白所用者何事耳若旧注引新垣平玉杯则文帝时事非武帝也恐未是】

其四十四

綠萝纷葳蕤缭绕松柏枝草木有所托岁寒尚不移奈何夭桃色坐叹葑菲诗玉顔艳红彩云髮非素丝君子恩已毕贱妾将何为【郭璞诗绿萝结高林吕向注綠萝松萝也陆机文赋纷葳蕤以馱逌吕向注纷葳蕤盛美貌广韵缭绕纏也诗小雅芻与女萝施於松柏广雅女萝松萝也诗国风桃之夭夭灼灼其华毛传曰天天其少壮也诗国风习习谷风以陰以雨黽勉同心不宜有怒采葑采菲无以下体德音莫违及尔同死序云谷风刺夫妇失道也卫人化其上淫于新婚而弃其旧室夫妇离絶国俗伤败焉江淹诗庭树发红彩张铣注红彩花也诗国风鬢髮如云毛传曰如云言美长也王融诗骚首乱云髮江淹诗君子恩未毕古诗贱妾亦何为琦按古称色衰爱弛此诗则谓色未衰而爱已弛有感而发其寄讽之意深矣 菲音斐】

其四十五

八荒驰惊飈万物尽凋落浮云蔽颓阳洪波振大壑龙凤脱罔罟飘飖将安托去去乘白驹空山咏场藿【惊飈暴风也陆机诗惊飈褰反信谢宣远诗颓阳照通津吕延济注颓阳落日也殷仲文表洪波振壑庄子大壑之为物也注焉而不满酌焉而不竭陆德明注大壑东海也列子渤海之东不知几亿万里有大壑焉实惟无底之谷其下无底名曰归墟八紘九野之水天汉之流莫不注之而无增无减焉诗小雅皎皎白驹食我场苗毛传曰宣王之末不能用贤贤者有乘白驹而去者次章云皎皎白驹食我场藿毛传曰藿犹苗也萧士贇曰此诗前指禄山之乱乘輿播迁天下惊扰後言已之罹难脱身羈囚无所依托】

其四十六

一百四十年国容何赫然隐隐五凤楼峨峨横三川王侯象星月宾客如云烟【一本首六句云帝京信佳丽国容何赫然劒戟拥九关歌钟沸三川蓬莱象天构珠翠夸云仙】鬪鸡金宫【一作城】里蹴鞠瑶台【一作走马兰台】边举动摇白日指挥回青天当涂何翕忽失路长弃捐独有扬执戟闭关草太玄【唐自武德元年至天宝十四载得一百三十八年此诗约是天宝初年太白在翰林时所作四字疑误赫然盛貌汉书司马法曰国容不入军初学记关中记云泾与渭洛为关中三川唐书五行志玄宗好鬪鸡贵臣外戚皆尚之贫者或弄木鸡识者以为鸡西属帝生之岁也鬪者兵象近鸡祸也史记处後蹴鞠正义曰谓打球也汉书蹴鞠刻镂顔师古注蹴足蹴之也鞠以韦为之中实以物蹴蹋为戏乐也荆楚岁时记刘向别録曰蹴鞠黄帝所造本兵势也或云起于战国按鞠与球同古人蹋鞠以为戏也萧士贇曰白日青天以比其君鬪鸡蹴鞠明皇所好此等得志用事举动指挥足以动摇主听扬雄解嘲当涂者升青云失路者委沟渠翕忽疾貌吴都赋神化翕忽太白意谓此辈幸臣当其得志不过翕忽之顷一朝失宠长于弃捐不用盖言不足恃之意而萧注谓得其蹊径而依附之可以翕忽而暴贵不得其蹊径而不依附终于弃捐而不用似失其解曹植与杨修书昔扬子云先朝执戟之臣耳闭关犹闭门也鲍照诗闭帟草太玄兹事殆愚狂汉书哀帝时丁傅董贤用事诸附离之者或起家至二千石时扬雄方草太玄有以自守泊如也 蹴音蹙鞠音菊】

其四十七

桃花开东园含笑夸白日偶蒙春【萧本作东】风荣生【一作矜】此艳阳质岂无佳色但恐花不实宛转龙火飞零落早相失讵知南山松独立自萧飈【阮籍诗东园桃与李史通今俗文士谓鸟鸣为啼花发为笑鲍照诗艳阳桃李节张协七命龙火西颓李善注汉书曰东宫苍龙房心心为火故曰龙火也江淹诗松柏转萧瑟刘良注萧瑟风吹松柏声萧士贇曰此诗谓士无实行偶然荣遇者宠衰则易至于弃捐孰若君子之有持操者独立而不改其节哉】

其四十八

秦皇按宝劒赫怒震【缪本作振】威神逐日巡海右驱石驾【缪本作架】沧津徵卒空九寓作桥伤万人但求蓬岛药岂思农鴈春力尽功不贍千载为悲辛【艺文类聚三齐略记曰秦始皇作石桥欲过海观日出处于时有神人能驱石下海城阳十一山石尽起立嶷嶷东倾状似相随而去云石去不速神人辄鞭之尽流血石莫不悉赤至今犹尔江淹恨赋秦帝按劒诸侯西驰削平天下同文共规雄图既溢武功未毕方架鼃鼃以为梁巡海右以送日九?犹九州牛弘神州歌九?载宁史记秦使徐福入海求神异物还为伪辞曰臣见海中大神言曰汝西皇之使耶臣荅曰然汝何求曰愿请延年益壽药神曰汝秦王之礼薄得观而不得取即从臣东南至蓬莱山见芝成宫阙有使者铜色而龙形光上照天于是臣再拜问曰宜何资以献海神曰以令童子若振女与百工之事即得之矣秦皇帝大悦遣振男女三千人资之五谷种种百工而行徐福得平原广泽止王不来独断少昊之世置九农之官春扈氏农正趣民耕种夏

扈氏农正趣民芸除秋扈氏农正趣民收敛冬扈氏农正趣民盖藏棘扈氏农正掌人百果行扈氏农正画为民驱鸟宵扈氏农正夜为民驱兽桑扈氏农正趣民养蚕老扈氏农正趣民收麦陈子昂诗愿罢瑶池宴来观农扈春宋之问诗吾君不事瑶池乐时雨来观农扈春扈扈古字通用说文贍给也?即宇字扈音户】

其四十九

美人出南国灼灼芙蓉姿皓齿终不发芳心空自持由来紫宫女共妬青蛾眉归去潇湘沚沈吟何足悲【曹植诗南国有佳人又诗谁为发皓齿左思诗列宅紫宫里李周翰注紫宫天子所居处曹植诗夕宿潇湘沚尔雅小渚曰沚萧士贇曰此太白遭谗摈逐之诗也去就之际曾无留难然自後人而观之其志亦可悲矣】

其五十

宋国梧台东野人得燕石【一作宋人枉千金去国买燕石】夸作天下珍却晒赵王璧赵璧无缁磷燕石非贞真流俗多错误岂知玉与珉【艺文类聚阚子曰宋之愚人得燕石于梧台之东归而藏之以为宝周客闻而观焉主人斋七日端冕玄服以发宝革匱十重缁巾十袭客见之掩口而笑曰此特燕石也其与瓦璧不殊主人大怒曰商贾之言医匠之心藏之愈固史记赵惠文王时得楚和氏璧刘孝威诗白玉遂缁磷野客丛书论语磨而不磷涅而不缁今读磷字多作去声读缁字多作平声而古来文士以磷字为平声如摯虞傅咸以至李杜元白之流皆然缁字作去声协见沈约高士赞今礼部押韵缁字只平声一音盖当时未分四声故耳韵会珉音与民同说文石之美者礼君子贵玉而贱珉珉石似玉而非也萧士贇曰此讥世人不识真儒而假儒反得用世以非笑真儒焉辞简意明切中古今时病缁音支又音子磷音隣】

其五十一

殷后乱天纪楚怀亦已昏夷羊满中野蓂【缪本作緑】施盈高门比干諫而死屈平窜湘源虎口何婉变女嬃【缪本作顔】空婵娟彭咸久沦没此意与谁论【胤征傲扰天纪正义曰始乱天之纪网也陶潜诗嬴氏乱天纪国语商之兴也禱机次于丕山其亡也夷羊在牧韦昭解夷羊神兽牧商郊牧野离骚蓂蓂施以盈室兮判独离而不服王逸注蓂蒺藜也蓂王葛也施泉耳也三者皆恶草以喻谗谄盈满于侧也楚辞章句紂惑妲己作糟丘酒池长夜之饮断斲朝涉刳剔孕妇比干正諫紂怒曰吾闻圣人心有七窍于是杀比干剖其心而观之史记屈原者名平楚之同姓也为楚怀王左徒博闻强识明于治乱娴于辞令入则与王图议国事以出号令出则接遇宾客应对诸侯王甚任之上官大夫与之同列争宠而心害其能因谗之王怒而疏屈平屈平疾王听之不聪也谗谄之蔽明也邪曲之害公也方正之不容也故忧愁幽思而作离骚所谓蓂蓂施以盈室及女嬃彭咸事皆离骚中语也其後又信上官之谗迁屈原于湘江之南乃顷襄王时事非怀王也诗盖互言之耳萧士贇曰虎口事如史记秦二世拜叔孙通为博士通曰我几不脱于虎口之类谓比干以諫死是?于虎口何所为而婉变如是哉诗

云婉兮变兮注曰皆顾慕貌陆机诗婉变崑山陰注曰婉变存思貌琦按虎口二句是反言以起下文见贤者所为衆人不知反以为非之意离骚女嬃之婵媛兮申申其詈予王逸注女嬃屈原姊也婵媛犹牵引也言女嬃见已施行不与衆合以见流放故来牵引数怒重詈我也又离骚虽不周于今之人兮愿依彭咸之遗则王逸注彭咸殷贤大夫也諫其君不听自投水而死变音恋婵音蝉娟音蠲】

其五十二

青春流惊湍朱明【一作火】骤回薄不忍看秋蓬飘扬竟何托光风灭兰蕙白露洒葵藿【一作委萧藿】美人不我期草木日零落【楚辞青春受谢王逸注青东方春位其色青也潘岳诗惊湍激岩阿刘良注湍急流也尔雅夏为朱明郭璞注气赤而光明也贾谊鵬赋万物回薄震荡相转埤雅蓬蒿草之不理者也其叶散生如蓬末大於本故遇风辄拔而旋说苑曰秋蓬恶於根本而美於枝叶秋风一起根且拔矣楚辞光风转蕙汜崇兰些王逸注光风谓雨已日出而风草木有光也王祜农书葵阳草也其菜易生郊野甚多不拘肥瘠地皆有之为百菜之主备四时之饌本丰而耐旱味甘而无毒可防荒俭可以菹腊其枯枿可以榜簇根子又能疗疾咸无遗弃诚蔬茹之要品民生之资益者也而今人不复食之亦无植者说文藿菽之少也盖谓豆之初生者广雅豆角谓之荚其叶谓之藿王逸楚辞注零落皆堕也草曰零木曰落萧士贇曰楚辞日月忽其不淹兮春与秋其代谢惟草木之零落兮恐美人之迟暮诗意全出於此美人况时君也时不我用老将至矣怀材而见弃於世能不悲夫】

其五十三

战国何纷纷兵戈乱浮云赵倚两虎鬪晋为六卿分奸臣欲窃位树党自相羣果然田成子一旦杀【缪本作弑】齐君【魏书战国纷纷年过十纪史记赵以藺相如功大拜为上卿位在廉颇之右廉颇宣言曰我见相如必辱之相如闻不肯与会每朝时常称病不肯与廉颇争列已而相如出望见廉颇引车避匿于是舍人相与諫相如相如曰秦所以不敢加兵于赵者徒以吾两人在也今两虎共鬪其势不俱生吾所以为此者先国家之急而後私仇也汉书田氏篡齐六卿分晋顔师古注晋之衰也六卿擅权其後范氏中行氏智氏灭而韩赵魏并其土田人衆故总言六卿分晋也按史记晋世家曰顷公十二年晋之宗家祁奚孙叔向子相恶於其君六卿欲弱公室乃遂以法尽灭其族而分其邑为十县各令其子为大夫晋益弱六卿皆大太白所谓晋为六卿分者盖用此事指大夫专政而言以起下文循至窃位弑君之事史记范中行氏反晋晋攻之急范中行请粟于齐田乞欲为乱树党于诸侯乃说齐景公曰范中行数有德于齐齐不可不救齐使田乞救之而输之粟田乞卒子常代立是为田成子田成子与监止俱为左右相相简公田常心害监止监止幸于简公子我者监止之宗人也常与田氏有隙田常于是击子我子我率其徒攻田氏不胜出亡田氏之徒追杀子我及监止简公出奔田氏之徒追执简公于徐州恐简公复立而诛已遂杀简公庄子田成子一旦杀齐君而盗其国】

其五十四

倚劒登高台悠悠送春日苍榛蔽层丘琼草隐深谷凤鸟【缪本作皇】鸣西海欲集无珍木鸞斯得所居【一作匹居一作所栖】蒿下盈万族晋风日已颓穷途方恸哭【一本後六句云翩翩衆鸟飞翱翔在珍木羣花亦便娟荣耀非一族归来怆途穷日暮还恸哭江淹诗倚劒临八荒李周翰注倚佩也谢朓诗远近送春日庾阐诗琼草蔽神丘刘桢诗珍木郁苍苍张铣注珍木谓珍异之木尔雅鸞斯鸛鵒郭璞注鸛鸟也小而多羣腹下白江东亦呼为鸛鸟郑樵注亦谓之雅鸟盖雀类差小多羣飞食谷粟俗呼必乌江淹诗鸞斯蒿下飞晋书阮籍时率意独驾不由径路车迹所穷辄恸哭而反萧士贇曰三四比小人据高位而君子在野五句至八句谓当时君子亦有用世之意而在朝无君子以安之反不如小人之得位呼俦引类至于万族之多也末句借晋为喻君子道消风俗颓靡若阮籍途穷恸哭母乃见事之晚乎鸞音豫又音余】

其五十五

齐瑟弹【一作挥】东吟秦弦弄西音慷慨动颜魄使人成荒淫彼美【缪本作女】佞邪子婉变来相寻一笑双白璧再歌千黄金珍色不贵道诂惜飞光沈安识紫霞客瑶台鸣素【一作玉】琴【曹植诗秦筝发西气齐瑟扬东讴魏文帝诗齐倡发东舞秦筝奏西音汉书婉变董公惟亮天工顔师古注婉变美貌古诗一笑双白璧再顾千黄金沈约诗飞光忽我遄张铣注飞光日月也嵇康诗习习谷风吹我素琴素琴谓琴之素朴不用金玉珍宝以为饰者也】

其五十六

越客采明珠提携出南隅清辉照海月美价倾皇【一作鸿】都献君君按劒怀宝空长吁鱼目复相晒寸心增烦纡【越南越也今广东是其地当天下之南而临南海海中有珠池产明珠东都赋嘉祥阜兮集皇都邹阳上梁王书明月之珠夜光之璧以暗投入于道衆莫不按劒相眄者无因而至前也张协诗鱼目笑明月张铣注鱼目鱼之目精白者也张衡诗何为怀忧心烦纡李周翰注烦纡思乱也】

其五十七

羽族禀万化小大各有依周周【缪本作啁啁】亦何辜六翮掩不挥愿衔衆禽翼一向黄河飞飞者莫我顾叹息将安归【汉书千变万化未始有极韩非子鸟有翩翩者重首而尾屈将欲饮于河则必颠乃衔其羽而饮之人之所贪饮不足者不可以不索其羽也阮籍诗天网弥四野六翮掩不舒】

其五十八

我行【萧本作到】巫山渚寻古登阳台天空彩云灭地远清风来神女去【萧本作知】已久襄王安在哉荒淫竟沦没【萧本作替】樵牧徒悲哀【宋玉高唐赋楚襄王与宋玉游於云梦之台望高唐之观其上独有云气崑崙分直上忽兮改容须臾之间变化无穷王问玉曰此

何气也玉对曰所谓朝云者也昔者先王尝游高唐怠而昼寝梦见一妇人曰妾巫山之女也为高唐之客闻君游高唐愿荐枕席王因幸之去而辞曰妾在巫山之阳高丘之岨旦为朝云暮为行雨朝朝暮暮阳台之下旦朝视之如言故为立庙号曰朝云通典夔州巫山县有巫山一统志阳台在夔州府巫山县治西北南枕大江宋玉赋云楚王游于阳云之台望高唐之观即此王阮亭曰巫山形絶肖巫字其东即阳云台在县治西北五十步高一百二十丈二山皆土阜殊乏秀色而古今艳称之以楚大夫词赋重耳江淹诗相思巫山渚怅望阳云台王融诗巫山彩云合阮籍诗三楚多秀士朝云进荒淫 渚音主】

其五十九

惻惻泣路岐哀哀悲素丝路岐有南北素丝易【一作有】变移万事固如此人生无定期田窦相倾夺宾客互盈亏世途多翻覆交道方嶮巇【一本少万事固如此四句世途多翻覆作谷风刺轻薄交道以下皆同】斗酒强然诺寸心终自疑张陈竟火灭萧朱亦星离衆鸟集荣柯穷鱼守枯【一作空】池嗟嗟失懽客勤问何所规【一作悲又作窥 淮南子杨子见逵路而哭之为其可以南可以北墨子见练丝而泣之为其可以黄可以黑吕氏春秋墨子见染素丝者而叹曰染于苍则苍染於黄则黄所以入者变其色亦变五入而已为五色矣故染不可不慎也刘子墨子所以悲素丝杨朱所以泣路岐史记魏其侯窦婴喜宾客诸游士宾客争归魏其侯武安侯田蚡新用事为相卑下宾客进名士家居者欲以倾魏其诸将相武安侯以王太后故亲幸数言事多效天下吏士趋势利者皆去魏其归武安又史记齐有孟尝君赵有平原君魏有信陵君方争下士招致宾客以相倾夺辅国持权刘峻广絶交论世路险巇一至于此李善注嶮巇犹颠危也汉书灌夫喜任侠已然诺後汉书张陈凶其终萧朱隙其末章怀太子注张耳陈余初为刎颈交後构隙耳从汉为将兵杀陈余于泚水之上萧育字次君朱博字子元二人为友着闻当代後有隙不终故时以交为难左思诗块苦枯池鱼萧士贇曰此诗讥市道交者太白罹难之余友朋之交道其不能始终如一者谅亦多矣徒有一类失懽之客勤勤问劳亦何所规益乎 嶮与险同巇音羲】

【刘克庄曰太白古风与陈子昂感遇之作笔力相上下唐之诗人皆在下风胡震亨曰太白古风其篇富于子昂之感遇俭于嗣宗之咏怀其抒发性灵寄托规讽实相源流也但嗣宗诗旨渊放而文多隐避归趣未易测求子昂淘洗过洁韵不及阮而浑穆之象尚多包含太白六十篇中非指言时事即感伤已遭循径而窥又觉易尽此则役于风气之通感不得不以才情相胜宣泄见长律之往制未免言表系外尚有可议亦时会使然非後贤果不及前哲也宋漫堂诗说阮嗣宗咏怀陈子昂感遇李太白古风韦苏州拟古皆得十九首遗意】

李太白集注卷二

卷三

钦定四库全书

李太白集注卷三

钱塘王琦撰

乐府三十首

远别离【江淹作古别离梁简文帝作生别离太白之远别离久别离二作大?本此】

远别离古有皇【缪本作黄误】英之二女乃在洞庭之南潇湘之浦海水直下万里深谁人不言此离苦日惨惨兮云冥冥猩猩啼烟兮鬼啸雨我纵言之将何补皇穹窃恐不照余之忠诚雷【萧本作云】凭凭兮欲吼怒尧舜当之亦禅禹君失臣兮龙为鱼权归臣兮鼠变虎或云【萧本作言】尧幽囚舜野死九疑联绵皆相似重瞳孤坟竟何是帝子泣兮绿云间随风波兮去无还恸哭兮远望见苍梧之深山苍梧山崩湘水绝竹上之泪乃可灭【列女传有虞二妃者帝尧之二女也长娥皇次女英娥皇为后女英为妃水经注大舜之陟方也二妃从征溺于湘江神游洞庭之渊潇湘之浦潇者水清深也湘中记曰湘川清照五六丈下见底石如擣菹矣五色鲜明白沙如霜雪赤崖如朝霞是纳潇湘之名矣故民为立祠于水侧焉海水直下二句是倒装句法谓生死之别永无见期其苦如海水之深无有底止也惨惨无光貌冥冥阴晦貌楚辞九叹云冥冥而暗前左思蜀都赋猩猩夜啼刘逵注猩猩生交趾封溪似猿人而能言语夜闻其声如小儿啼潘岳寡妇赋仰皇穹兮叹息李善注皇穹天也史记正义括地志云故尧城在濮阳鄆城县东北十五里竹书云昔尧德衰为舜所囚也又有偃朱故城在县西北十五里竹书云舜囚尧复偃塞丹朱使不与父相见也广弘明集汲冢竹书云舜囚尧于平阳取之帝位今见有囚尧城琦按今竹书并无此荒谬之说意者起自六朝君臣之间多有惭德乃伪造此辞谓古圣人已有行之者以自文饰其过欤太白虽用其事而以或云冠其上以见其说之不可信也国语舜勤民事而野死韦昭注野死谓征有苗死于苍梧之野山海经南方苍梧之丘苍梧之渊其中有九疑山舜之所葬在长沙零陵界中郭璞注山今在零陵营道县南其山九谿皆相似故云九疑古者总名其地为苍梧也述异记九疑山隔湘江跨苍梧野连营道县界九山相似行者望之有疑因名九疑山宋书舜生于姚墟目重瞳子故名重华楚辞帝子降兮北渚王逸注帝子谓尧女也鲍照诗垂彩绿云中述异记舜南巡葬于苍梧之野尧之二女娥皇女英追之不及相与恸哭泪下沾竹竹上文为之斑斑然萧士贇曰此篇前辈咸以为上元间李辅国张后矫制迁上皇于西内时太白有感而作余曰非也此诗大意谓无借人国柄借人国柄则失其权失其权则虽圣哲不能保其社稷妻子其祸有必至之势诗之作其在天宝之末乎按唐史高力士传曰天宝中帝尝曰朕春秋高朝廷细务问宰相蕃夷不龚付诸将宁不暇耶又尝斋大同殿力士侍帝曰海内无事朕将吐纳导引以天下事付林甫若何力士对曰天下大柄不可假人威权既振谁敢议者自是国权卒归于林甫国忠兵权卒归于禄山舒翰太白熟观时事欲言则惧祸及已不得已而形之诗聊以致其爱君忧国之志

所谓皇英之事特借之以引喻耳曰日曰皇穹比其君也曰云比其臣也日惨惨兮云冥冥喻君昏于上而权臣障蔽于下也猩猩啼烟鬼啸雨极小人之形容而政乱之甚也尧舜当之亦禅禹而下乃太白所欲言之事权归臣下祸必至此诗意切直着明流出胷臆非识时忧世之士存怀君忠国之心者其孰能与于此哉胡震亨曰此篇借舜二妃追舜不及泪染湘竹之事言远别离之苦并借竹书杂记见逼舜禹南巡野死之说点缀其间以着人君失权之戒使其词闪幻可骇增奇险之趣盖体干于楚骚而韵调于汉铙歌诸曲以成为一家语参观之当得其源流所自】公无渡河【王僧?技録相和歌瑟调三十八曲中有公无渡河行即箜篌引也古今注箜篌引朝鲜津卒霍里子高妻丽玉所作也子高晨起刺船而櫂有一白首狂夫披髮提壶乱流而渡其妻随呼止之不及遂堕河水死于是援箜篌而鼓之作公无渡河之歌甚凄怆曲终亦投河而死子高还以其声语妻丽玉丽玉伤之乃引箜篌而写其声闻者莫不坠泪饮泣丽玉以其声传邻女丽容名曰箜篌引焉】

黄河西来决崑仑咆哮万里触龙门波滔天尧咨嗟大禹理百川儿啼不窥家杀湍堙【萧本作湮】洪水九州始蚕【一作桑】麻其害乃去茫然风沙披髮之叟狂而痴清晨径【一作临】流欲奚为旁人不惜妻止之公无渡河苦渡之虎可搏河难冯公果溺死流海湄有长鲸白齿若雪山公乎公乎挂罥【缪本作骨】于其间箜篌所悲竟不还【初学记按水经注及山海经注河源出崑仑之墟东流潜行地下至规期山北流分为两源一出葱岭一出于阗其河复合东注蒲昌海复潜行地下南出积石山西南流又东回入塞过炖煌酒泉张掖郡南与洮河合过安定北地郡北流过朔方郡西又南流过五原郡南又东流过云中西河郡东又南流过上都河东郡西而出龙门至华陰潼关与渭水合又东回过砥柱及洛阳云云按龙门山在今陕西西安府韩城县东北五十里黄河经其间两岸对峙高数百尺望之若门禹贡导河积石至于龙门即此是也此塞外诸河率皆归此故水势最盛酈道元谓其崩浪万寻县流千丈浑洪赑怒鼓若山腾李复谓禹凿龙门起于东受降城之东自北而南两岸石壁峭立大河盘束于山峡间千数百里至此山开岸涧豁然奔放怒气喷风声如万雷其险可觀矣史记尧曰嗟四岳汤汤洪水滔天浩浩怀山襄陵下民其忧有能使治者汉书夏乘四载百川是道列女传涂山氏长女夏禹娶以为妃既生启辛壬癸甲启呱呱泣禹去而治水三过其家不入其门顔师古汉书注急流曰湍庄子昔者禹之湮洪水决江湖而通四夷九州也陆德明注堙塞也诗小雅不敢暴虎不敢冯河毛传云徒搏曰暴虎徒涉曰冯河海湄海滨也洛阳伽蓝记鉢和山之南界有大雪山朝融夕结望若玉峰木华海赋或挂罥于岑?之峰李善注声类曰罥系也通典箜篌汉武帝使乐人侯调所造以祀太一或云侯辉所作其声坎坎应节谓之坎侯声讹为箜篌侯者因乐工人姓耳古施郊庙雅乐近代专用於楚声或谓师延靡靡之乐非也旧说亦依琴制今按其形似瑟而小七弦用拨弹之如琵琶也萧士贇曰诗谓洪水滔天下民昏垫天之作孽不可违也当地平天成上下相安之时乃无故冯河而死是则所谓自作孽者其亦可哀而不足惜也矣故诗曰旁人不惜妻止之 当时不靖之人自投天网借以为喻云耳堙音因鲸音擎罥音絹】

蜀道难【按乐府诗集王僧?技録相和歌瑟调三十八曲内有蜀道难行乐府古题要解蜀道难备言铜梁玉垒之险】

噫吁嚱危乎高哉蜀道之难难于上青天【宋景文公笔记蜀人见物惊异辄曰噫嘻嚱李白作蜀道难因用之 噫音衣嚱音希】蚕丛及鱼凫开国何茫然尔来四万八千岁不【一作乃】与秦塞通人烟西当太白有鸟道可【一作何】以横绝峨眉巅地崩山摧壮士死然後天梯石栈相【一作方】钩连【刘逵三都赋注扬雄蜀王本纪曰蜀王之先名蚕丛栢灌鱼凫蒲泽开明是时人民椎髻咙言不晓文字未有礼乐从开明上至蚕丛积三万四千岁华阳国志蜀侯蚕丛其目纵始称王死作石棺石椁国人从之故俗以石棺椁为纵目人冢次王曰栢灌次王曰鱼凫鱼凫田於湔山忽得仙道蜀人思之为立祠元和郡县志太白山在凤翔府郿县东南五十里慎蒙名山记太白山在凤翔府郿县东南四十里锺西方金宿之秀关中诸山莫高于此其山巅高寒不生草木常有积雪不消盛夏视之犹烂然故以太白山上有湫池虽三伏亦凝冰关中遇旱则登山取湫水山既高寒冰雪常凝身弱衣薄登山者多死俗传以为太白神能留人非也鸟道谓连山高峻其少低缺处惟飞鸟过此以为径路总见人迹所不及至也太平寰宇记嘉州峨眉县有峨眉山按益州记云峨眉山在南安县界两山相对状似蛾眉张华博物志以为牙门山一统志峨眉山在四川眉州城南二百里来自峨山连冈叠嶂延袤三百余里至此突起三峯其二峯对峙宛若蛾眉自州城望之又如人之拱揖于前也华阳国志秦惠王知蜀王好色许嫁五女于蜀蜀遣五丁迎之还到梓潼见一大蛇入穴中一人揽其尾掣之不禁至五人相助大呼拽蛇山崩时压杀五人及秦五女并将从而山分为五岭】上有六龙回日之高标【一作横河断海之浮云】下有冲波逆折之回川黄鹤之飞尚不得过【缪本少过字】猿猱欲度愁攀援【缪本作缘一作牵】青泥何盘盘百步九折萦岩峦扞参历井仰胁息以手抚膺坐长叹【初学记淮南子云爰止羲和爰息六螭是谓悬车注曰日乘车驾以六龙羲和御之日至此而薄於虞泉羲和至此而回六螭蜀都赋羲和假道于峻岐阳乌回翼乎高标琦按高标是指蜀山之最高而为一方之标识者言也吕延济注以为高树之枝恐非萧士贇曰图经高标山一名高望乃嘉定府之主山岿然高峙万象在前是亦一说上林赋横流逆折转腾激洌司马彪注逆折旋回也顔师古急就篇注黄鹄一举千里其鸣声鹄鹄云合璧事类鹄禽之大者色白又有黄者善高翔湖海江汉间有之埤雅猿猴属长臂善啸便攀援韵会猱母猴也似人严氏曰猱即王孙杜诗胡孙是也尔雅猱猿善援郭璞注便攀援也萧士贇曰黄鹤飞之至高者猿猱最便捷者尚不得度其险绝可知矣元和郡县志青泥岭在兴州长举县西北五十三里接溪山东即今通路也悬崖万仞上多云雨行者屡逢泥淖故号为青泥岭九域志兴州有青泥岭山顶常有烟雾霰雪中岩间有龙洞其岭上入蜀之路尔雅岵山堕郭璞注谓山形长狭者荆州谓之岵扞参历井者谓仰视天星去人不远若可以手扞及之极言其岭之高也参井二宿本相近参三星居西方七宿之末占度十为蜀之分野井八星店南方七宿之首占度三十三为秦之分野青泥岭乃自秦入蜀之路故举二方分野之星相联者言之汉书豪强胁息顔师古注胁敛也屏气而息唐高赋胁息增歛李善注胁息缩气也胡三省通监注胁息者屏气鼻不敢息唯两胁潜动以舒气息耳 猱音饶参音森】问君西游何时还畏途巉岩不可攀但见悲鸟号古木雄飞雌从【萧本作从雌】绕林间又闻子规啼夜月愁空山蜀道之难难于上青天使人听此凋朱顔【李善文选注巉岩山石高峻之貌雉子斑古辞雉子高飞止黄鹄高飞已千里雄来飞从雌视张华禽经注望帝修道处西山而隐化为杜鹃鸟或云杜宇鸟亦云子规鸟至春则啼闻者凄惻按子规即杜鹃也蜀中最多南方亦有之状如雀鹞而色惨黑赤口有小冠春暮即鸣夜啼达旦至夏尤甚昼夜不止鸣必向北若云不如归去声甚哀切王康琚诗凝霜凋朱顔】连峰去天不盈尺【一作入烟

几千尺】枯松倒挂倚絕壁飞湍瀑流争喧豗砅崖转石万壑雷其险也若【萧本作如】此嗟尔远道之人胡为乎来哉【木华海赋磊砢而相逐李善注相逐相击也韵会逐喧声郭璞江赋砅岩鼓作李善注砅水击岩之声也瀑音仆逐音灰砅音烹】劔阁峥嵘而崔嵬一夫当关万夫【一作人】莫开所守或匪亲【一作人】化为狼与豺【华阳国志梓潼郡有劔阁道三十里至险水经注又东南径小劔戍北西去大劔三十里连山絕嶮飞阁通衢故谓之劔阁也张载铭曰一人守嶮万夫 赳信然故李特至劔阁而叹曰刘氏有如此地而面缚于人岂不奴才也图书编蜀地之险甲于天下而劔阁之险尤甲于蜀盖以羣峰剑插两山如门信有所谓一夫当关万夫莫敌者左思蜀都赋一人守隘万夫莫向张载劔阁铭一人荷戟万夫 赳形胜之地匪亲勿居】朝避猛虎夕避长蛇磨牙吮血杀人如麻锦城虽云乐不如早还家蜀道之难难于上青天侧身西望长咨【一作令人】嗟【左传吴为封豕长蛇以荐食上国山海经图赞长蛇百寻其鬣如虺飞羣走类靡不吞噬极物之恶尽毒之利广韵吮漱也陈子昂书杀人如麻流血成泽初学记益州记曰锦城在益州南笮桥东流江南岸昔蜀时故锦官处也号锦里城墉犹在元和郡县志锦城在成都县南十里故锦官城也古诗客行虽云乐不如早旋归张衡四愁诗侧身西望涕沾裳萧士贇曰有客曰洪驹父诗话云新唐书严武传武在蜀放肆房琯以故宰相为巡内刺史武慢倨不为礼最厚杜甫然欲杀甫数矣李白作蜀道难者乃为房与杜危之也书据范摅云溪友议言之耳按唐书摭言载李白始自西蜀至京道未甚振因以所业贄谒贺知章知章览蜀道难一篇曰子谪仙人也按白本传天宝初因吴筠被召亦至长安时往见贺知章则与严武帅蜀岁月悬远尝见李集一本于蜀道难题下注讽章仇兼琼也考其年月近之矣谓危房杜者非也新唐书第勿深考耳沈存中笔谈曰前史称严武为劔南节度不法李白为作蜀道难按孟棨所记白初至京师贺知章闻其名首诣之白出蜀道难读未毕称叹数四时乃天宝初也严武为劔南在至德以後肃宗时代甚远小说所记率多舛讹子以何说为是乎予曰以臆断之其说皆非也史不足徵小说传记反足信乎所谓尝见李集一本于蜀道难下注讽章仇兼琼者黄鲁直尝於宜州用三钱买鸡毛笔为周维深作草书蜀道难亦于题下注云讽章仇兼琼也然天宝初天下又安四郊无警劔阁乃长安入蜀之道太白乃拳拳然欲严劔阁之守不知将何所拒乎以此知其不为章仇兼琼也尝以全篇诗意与唐史参考之盖太白初闻禄山乱华天子幸蜀时作也若曰为房琯杜甫章仇兼琼而作何至始引蚕丛开国终言劔阁之险复及所守匪亲化为豺狼等语哉引喻非伦是以知其不为章与房杜也唐史哥舒翰兵败潼关不守杨国忠首倡幸蜀之策当时臣庶皆非之马嵬父老遮道谏曰宫阙陛下家居陵寝陛下坟墓今舍此欲何之又告太子曰若殿下与至尊皆入蜀中原百姓谁为主建宁王倓亦曰今殿下从至尊入蜀若贼兵烧絕栈道则中原之地拱手授贼既上至扶风士卒潜怀去就往往言不逊比至成都而从官及六军至者千三百人而已太白深知幸蜀之非计欲言则不在其位不言则爱君忧国之情不能自已故作诗以达意也噫吁嚱危乎高哉蜀道之难难于上青天极路险难之形容言当时欲从君于难者至蜀之难如上天之难也蚕丛及鱼鳧开国何茫然尔来四万八千岁不与秦塞通人烟言蕞尔之蜀僻在一隅自古声教所不暨虽秦塞之近且不相通非可为中国帝王之都也西当太白有鸟道可以横絕峨眉巔言五丁未开道之前惟长安正西太白山仅有鸟道可以横絕峨眉之巔非人迹所能往来也地崩山摧壮士死然後天梯石栈相钩连言五丁既开道之後梯栈相连始与秦通今焉安处于蜀设若烧絕栈道则中原道断矣上有六龙回日之高标下有冲波逆折之回川言其险上际于天下极于地也黄鹤之飞尚不得过猿猴欲度愁攀援

言鸟兽犹憚其险人其可知也青泥何盘盘百步九折萦岩峦历言蜀道险难之所也扞参历井仰胁息以手抚膺坐长叹参与井为蜀分野扞参历井言环蜀之境道里险难所在皆然令人胁敛屏气而息惟有抚膺长叹而已也问君西游何时还君字实指明皇非泛然而言犹杜子美北征诗恐君有遗失及君诚中兴主之义言既西幸蜀矣何时可还中原而为生灵之主也畏途巉岩不可攀言忠臣义士虽欲从君于难道路险阻不可以猝然攀附也但见悲鸟号古木雄飞雌从绕林间又闻子规啼夜月愁空山言朝夕之间空山丛木惟有禽鸟飞鸣则人迹之稀少可知也复申之曰蜀道之难难于上青天言其险之极一言之不足再言之也使人听此凋朱颜乃太白自述感伤於心而形诸颜色也连峰去天不盈尺枯松倒挂倚絶壁飞湍瀑流争喧豗砢崖转石万壑雷其险也如此嗟尔远道之人胡为乎来哉备言蜀道险难之状疏远之臣若白者虽欲从君於难胡为而能来也剑阁峥嵘而崔嵬一夫当关万人莫开所守或匪亲化为狼与豺言赞帝幸蜀者不过谓有剑阁之险而已然守关者任非其人豺狼反噬此则尤可忧也朝避猛虎夕避长蛇磨牙吮血杀人如麻言蜀与羌夷杂处如虎如蛇朝夕皆当避之其或变生肘腋是又可忧之大者也锦城虽云乐不如早还家言蜀都之乐不如早还中国之乐也复申之曰蜀道之难难于上青天侧身西望长咨嗟再言之不足故三言之谓从君于难者至蜀之难真如上天之难矣夫如是则白也侧身西望吾君惟有长叹咨嗟以致吾倦恋之意云耳诗意亦微而显矣客曰是则然矣上皇西巡南京歌胡为而作耶予曰蜀道难是初闻上皇仓卒幸蜀之时见得事理不便者如此情发于中不得已而言也西巡南京歌是事已定之後所作成事不说遂事不谏朝廷处分已定何必更为异议乎客又曰太白为宋中丞撰请都金陵表胡为称美蜀中欲使上皇安居之耶予曰操辞者太白也命意者宋中丞也太白方依于中丞乃不从中丞之意而自为异论乎此又不待辨而自明者也胡震亨曰此诗说者不一有谓为严武镇蜀放恣危房琯杜甫而作者出范攄云溪友议新史所采也有谓为章仇兼琼作者沈存中洪驹父驳前说而为之说者也有谓讽玄宗幸蜀之非者萧士贇注语也兼琼在蜀无据险跋扈之迹可当斯语而严武出镇在至德後玄宗幸蜀在天宝末与此诗见赏贺监在天宝初者年岁亦皆不合则此数说似并属揣摩愚谓蜀道难自是古相和歌曲梁陈间拟者不乏诂必尽有为而作白蜀人自为蜀咏耳言其险更着其戒如云所守或匪亲化为狼与豺风人之义远矣必求一时一人之事以实之不凡失之凿乎 吮徂究切前上声】

梁甫吟【按乐府诗集古今乐録曰王僧?技録相和歌楚调曲有梁父吟行今不歌谢逸希琴论曰诸葛亮作梁父吟陈武别传曰武常骑驴牧羊诸家牧竖数十人或有知歌谣者武遂学太山梁甫吟幽州马客吟及行路难之属蜀志曰诸葛亮好为梁甫吟然则不起于亮矣李勉琴说曰梁甫吟曾子撰琴操曰曾子耕泰山之下天雨雪冻旬日不得归思其父母作梁山歌蔡邕琴颂曰梁甫悲吟周公越裳西溪丛语乐府解题有梁父吟不知名为梁父吟何义张衡四愁诗云欲往从之梁父艰注云泰山东岳也君有德则封此山愿辅佐君王致于有德而为小人谗邪之所阻梁父泰山下小山名诸葛亮好为梁父吟恐取此义】

长啸梁甫吟何时见阳春【楚辞恐溘死而不得见乎阳春】君不见朝歌屠叟辞棘津八十西来钓渭滨宁羞白髮照清【繆本作淥】水逢时壮【一作吐】气思经纶广张三千六百钩【一作钧】风期暗与文王亲大贤虎变愚不测当年颇似寻常人【韩诗外传太公望少为人壻老而见去屠牛朝歌赁于棘津钓于磻溪文王举而用之封于齐路史注冀之枣阳东

北二十里有棘津城吕望乞食于此有卖浆台水经注徐广曰棘津在广川司马彪曰县北有棘津城吕尚卖食之困疑在此也刘澄之曰譙郡鄆县东北有棘津亭故邑也吕尚所困处也司马迁曰吕望东海人也老而无遇以钓于周文王又云吕望行年五十卖食棘津七十则屠牛朝歌行年九十身为帝师史记吕尚之遇文王也身为渔父而钓于渭滨耳若是者交疏也已说而立为太师载与俱归者其言深也风期犹风度也晋书习凿齿风期俊迈世说注文遁风期高亮周易大人虎变】君不见高阳酒徒起草中长揖山东隆准公入门不拜【一作入门开说一作一开游说】骋雄辩两女辍洗来趋风东下齐城七十二指挥【缪本作麾】楚汉如旋蓬狂客【一作生】落魄【缪本作拓】尚如此何况壮士当羣雄【史记酈生食其者陈留高阳人也好读书家贫落魄无以为衣食业县中皆谓之狂生沛公略地陈留郊麾下骑士适酈生里中子也酈生见谓之曰若见沛公谓曰臣里中有酈生年六十余长八尺人皆谓之狂生生自谓我非狂生骑士从容言如酈生所诫者沛公至高阳传舍使人召酈生酈生至入谒沛公方偃牀使两女子洗足而见酈生酈生入则长揖不拜曰足下欲助秦攻诸侯乎且欲率诸侯破秦也沛公骂曰竖儒天下同苦秦久矣故诸侯相率而攻秦何谓助秦攻诸侯乎酈生曰必聚徒合义兵诛无道秦不宜偃见长者于是沛公辍洗起摄衣延酈生上坐谢之酈生因言六国纵横时沛公喜号为广野君尝为说客驰使诸侯汉三年汉王使酈生说齐王伏轼下齐七十余城又曰初沛公引兵过陈留酈生踵军门上谒使者入通沛公方洗问使者曰何如人也使者曰状貌类大儒衣儒衣冠侧注沛公曰为我谢之言我方以天下为事未暇见儒人也使者出谢酈生瞋目按劔叱使者曰吾高阳酒徒非儒人也使者惧而失谒跪拾谒还走复入报曰客天下壮士也叱臣臣恐至失谒沛公遽延入郑氏曰魄音薄应邵注落魄志行衰恶之貌也顔师古注落魄失业无次也郑音是汉书高祖为人隆准而龙顔应邵注隆高也准颊权准也李斐注准鼻也吴迈远诗正为隆准公杖劔入紫微南史骋黄马之剧谈纵碧鸡之雄辩左传免胄而趋风杜预注疾如风也汉书高祖孽子悼惠王王齐七十二城准音拙】我欲攀龙见明主雷公砰訇震天鼓帝旁投壶多玉女三时大笑开电光倏烁晦冥起风雨闾阖九门不可通以额扣关阍者怒【後汉书其计固望其攀龙鳞附凤翼以成其所志耳初学记雷天之鼓也雷神曰雷公顾凯之电赋砰訇轮转倏闪罗曜广韵砰訇大声也神异经东王公与玉女投壶每投千二百矫设有入不出者天为之嘘矫出而脱误不投者天为之笑张华注言笑者天口流火焰灼今天不雨而有电光是天笑也汉书雷电晦冥顔师古注晦冥谓暗也後汉书闾阖九重章怀太子注闾阖天门也淮南子道出一原通九门高诱注九门天之门也庾肩吾诗钩陈万乘转闾阖九门通说文阍闭门隶也砰音烹訇音烘】白日不照吾精诚杞国无事忧天倾猘磨牙竞人肉驹虞不折生草茎手接飞猱搏雕虎侧足焦原未言苦智者可卷愚者豪世人见我轻鸿毛力排南山三壮士齐相杀之费二桃吴楚弄兵无剧孟亚夫哈尔为徒劳【列子杞国有人忧天地崩坠身无所寄废寝食者山海经少咸之山有兽焉其状如牛而赤身人面马足名曰窳窳其音如婴儿是食人窳窳即猘也余详大猎赋注陆诗疏驹虞即白虎也黑文尾长于躯不食生物不履生草君有德则见应信而至者也张衡思玄赋注尸子中黄伯曰予左执太行之猱而右搏雕虎惟象之未与吾心试焉有力者则又愿为牛欲与象鬪以自试今二三子以为义矣将乌乎试之夫贫穷太行之猱也疎贱义之雕虎也而吾日遇之亦足以试之莒国有石焦原者广五十步临百仞之溪莒国莫敢近也有以勇见莒子者独却行齐踵焉所以称於世夫义之为焦原也亦高矣贤者之于义必且齐踵此所以服一时也太平寰宇记焦原在莒县南三十六里俗名横山抱朴子愚夫行之自矜为豪

汉书司马迁传死有重于泰山或轻于鸿毛晏子春秋公孙接田开疆古冶子事景公以勇力虎闻晏子过而趋三子者不起晏子入见公曰臣闻明君之蓄勇力之士也上有君臣之义下有长率之伦内可以禁暴外可以威敌故尊其位重其禄今君之蓄勇力之士也上无君臣之义下无长率之伦内不以禁暴外不可威敌此危国之器也不若去之公曰三子者搏之恐不得刺之恐不中也晏子因请公使人少馈之二桃曰三子何不计功而食桃公孙接曰接一搏而再搏乳虎若接之功可以食桃而无与人同矣援桃而起田开疆曰吾仗兵而却三军者再若开疆之功亦可以食桃而无与人同矣援桃而起古冶子曰吾尝从君济于河鼃衔左骖以入砥柱之流治逆流百步顺流九里得鼃而杀之左操骖尾右挈鼃头鹤跃而出津人皆曰河伯也治视之则大鼃之首若治之功亦可以食桃而无与人同矣二子何不反桃公孙接田开疆曰吾勇不子若功不子逮取桃不让是贪也然而不死无勇也皆反其桃挈领而死古冶子曰二子死之治独生之不仁耻人以言而夸其声不义恨乎所行不死无勇亦反其桃挈领而死公殓之以服葬之以士礼焉诸葛亮梁父吟步出齐南城遥望荡阴里里中有三坟累累正相似问是谁家冢田疆古冶氏力能排南山文能绝地纪一朝被谗言二桃杀三士谁能有此谋相国齐晏子汉书吴楚反时条侯为太尉乘传东将至河南得剧孟喜曰吴楚举大事而不求剧孟吾知其无能为已天下骚动大将军得之若一敌国云说文哈嗤笑也王逸楚辞注楚人谓相啁笑曰哈此节诗意婉转曲折若断若联骤读之几不知为何语以意逆之大抵谓君既不能照鉴我之精诚我亦无容以国事为忧何则廷臣之中贤奸不一其倾险一流如食人之恶兽一犯其怒立见死亡其忠良一流则专一保全善类如驺虞之不肯有伤草木我处贫穷疎贱之中而确然践义以行虽履险犯难亦所不忌然揣时度势在智者惟有卷而怀之一着若不顧利害逞其豪气直言峻节以蹈危机则愚甚矣世人见我处而不出轻我如鸿毛是岂知予之心哉试观古来如公孙接等为时相所忌致之死地初不费力我安可复蹈其覆辙耶若夫爱惜人才之大臣知士之用与不用实有关于国家大计而思得人为我用如周亚夫得一剧孟而以为喜者世固不乏也我亦俟之而已 猘音札?音与剧音极哈呼来切海平声】梁甫吟声正悲张公两龙劒神物合有时风云感会起屠钓大人 岬当安之【晋书吴之未灭也斗牛之间常有紫气道术者皆以吴方强盛未可图也惟张华以为不然及吴平之後紫气愈明华闻豫章雷焕妙达纬象乃要焕宿屏人曰可共寻天文知将来吉凶因登楼仰观焕曰仆察之久矣惟斗牛之间颇有异气华曰是何祥也焕曰宝劒之精上彻于天耳华曰在何郡焕曰在豫章丰城华曰欲屈君为宰密共寻之即补焕为丰城令焕到县掘狱屋基入地四丈余得一石函光气非常中有双劒并刻题一曰龙泉一曰太阿其夕斗牛间气不复见焉焕以南昌西山北岩下土以拭劒光芒艳发遣使送一劒并士与华留一自佩或谓焕曰得两送一张公岂可欺乎焕曰本朝将乱张公当受其祸此劒当撃徐君墓树耳灵异之物终当化去不永为人服也华得宝劒爱之常置座侧报焕书曰详观劒文乃干将也莫邪何复不至虽然天生神物终当合耳华诛失劒所在焕卒子爽为州从事持劒行经延平津劒忽于腰间跃出坠水使人没水取之不见劒但见两龙各长数丈蟠紫有文章没者惧而反须臾光彩照水波浪惊沸爽叹曰先君化去之言张公终合之论此其验乎後汉书咸能感会风云奋其智勇 岬不安貌书曰邦之机隍易曰困于艱脆其义一也萧士贇曰长啸梁父吟何时见阳春者喻有志之士何时而遇主也君不见两段聊自慰解谓太公之老食】

【其之狂当时视为寻常落魄之人犹遇合如此则为士者终有遇合之时也我欲攀龙见明

主于时事有所见而欲告于君也雷公砰訇震天鼓帝旁投壶多玉女三时大笑开电光倏烁晦冥起风雨喻权奸女谒用事政令无常也阊阖九门不可通以额扣关阊者怒喻言路壅塞下情不得以上达而言者往往获罪于权近也白日不照吾精诚杞国无事忧天倾太白灼见当时贵妃国忠林甫禄山窃弄权柄祸已胎而未形欲谏则言无证而不信倘使君不鉴吾之诚则正所谓杞人忧天之类耳猘磨牙竞人肉驹虞不折生草茎叹当时小人在位为政害民有如猘磨牙竞食人肉使有道之朝则当仁如驹虞虽生草不履况肯以肉为食哉况肯轻杀一士哉手接飞猱雕虎侧足焦原未言苦智者可卷愚者豪世人见我轻鸿毛力排南山三壮士齐相杀之费二桃白意谓当有道之朝得君而佐之为国出力刺奸击邪不憚勤劳如接搏猱虎虽侧足焦原未足言苦今时事若此则当卷其智而为愚乃为人豪世不我知谓为真愚而轻我如鸿毛我亦卒不改行者思古之壮士勇力如此一忤齐相用计杀之特费二桃特不劳力白也倘不卷其智而怀之适足使权近得以甘心焉耳吴楚弄兵无剧孟亚夫哈尔为徒劳又自慰解当国者终须得人为用必有遇合之时也梁甫吟声正悲张公两龙剑神物合有时风云感会起屠钓大人 岷当安之申言有志之士终当感会风需如神剑之会合有时则夫大人君子遭时屯否 岷不安且当安时以俟命可也琦按萧氏解驹虞数句似与诗意不甚相合当分别观之 音孽】

乌夜啼【乐府古题要解乌夜啼宋临川王义庆所造也宋元嘉中徙彭城王义康于豫章郡义庆时为江州相见而哭文帝闻而怪之徵还宅义庆大惧妓妾闻乌夜啼叩斋阁云明日应有赦及旦改南兖州刺史因作此歌故其词云笼窗窸不开夜夜望郎来亦有乌栖曲不知与此同否乐府诗集古今乐录曰西曲歌有乌夜啼】

黄云城边【一作南】乌欲栖归飞哑哑枝上啼机中织锦秦川女【一作闺中织妇秦家女】碧纱如烟隔窗语停梭怅然忆远人独宿孤房泪如雨【一作停梭向人问故夫知在关西泪如雨又怅然忆远人一作怅然望远人一作问人忆故夫又独宿孤房一作独宿空堂一作知在流沙一作欲说辽西 吴均诗惟闻哑哑城上乌晋书窦滔妻苏氏始平人名蕙字若兰善属文苻坚时滔为秦州刺史被徙流沙苏氏思之织锦为迴文旋图诗以赠滔宛转循环以读之词甚凄惋凡八百四十字庾信诗弹琴蜀郡卓家女织锦秦川窦氏妻胡三省通监注关中之地沃野千里秦之故国谓之秦川魏武帝诗惋叹泪如雨】

乌栖曲【梁简文帝梁元帝萧子显并有此题之作乐府诗集列于西曲歌中乌夜啼之後】

姑苏台上乌栖时吴王宫里醉西施吴歌楚舞欢未毕青山欲【缪本作犹】衔半边日银箭金壶【一作金壶丁丁】漏水多起看秋月坠江波东方渐高奈乐【一作尔】何【述异记吴王夫差筑姑苏之台三年乃成周旋诘曲横亘五里崇饰土木殫耗人力官妓千人上别立春宵宫为长夜之饮造千石酒锺作天池池中造青龙舟舟中盛陈妓乐日与西施为水嬉晋书吴歌杂曲并出江南汉书为我楚舞江总诗虬水银箭莫相催鲍照诗金壶启夕沦刘良注金壶贮刻漏水者以铜为之故曰金壶本事诗李白初自蜀至京师贺知章见其乌栖曲叹赏苦吟曰此诗可以泣鬼神矣或言是乌夜啼二篇未知孰是】

战城南【按宋书汉鼓吹铙歌十八曲中有战城南曲乐府古题要解战城南其辞大略言战城南死郭北野死不得葬为乌鸟所食愿为忠臣朝出攻战而暮不得归也】

去年战桑乾源今年战葱河道洗兵条支海上波放马天山雪中草万里长征战三军尽衰老匈奴以杀戮为耕作古来惟见白骨黄沙田秦家筑城备【萧本作避】胡处汉家还有烽火燃烽火燃不息征战【一作长征】无已时野战格鬪死败马号鸣向天悲乌鸢啄人肠衔飞上挂枯树枝【一作衔飞上枯枝】士卒涂草莽将军空尔为乃知兵者是凶器圣人【一作君】不得已而用之【太平寰宇记桑乾河在朔州马邑县东三十里源出北山下一统志桑乾河在山西大同府城南六十里源出马邑县北洪涛山下与金龙池水合流东南入芦沟河汉书西域传其河有两源一出?岭山一出于阾于阾在南山下其河北流与?岭河合东注蒲昌海太平寰宇记西河旧事云?岭在炖煌西八千里其山高大上悉生?故曰?岭河源潜发其岭分为二水凉州异物志云?岭水分流东西西入大海东为河源张骞使大宛而穷河源谓极于此不达崑仑也说苑武王伐纣风霁而乘以大雨散宜生曰此其妖欤武王曰非也天洗兵也左思魏都赋洗兵海岛李善注魏武兵接要曰大将将行雨濡衣冠是谓洗兵後汉书西域传条支国城在山上周围四十余里临西海海水曲环其南及东北三面路絶惟西北隅通陆道元和郡县志天山一名白山一名时罗漫山在伊州北一百二十里春夏有雪出好木及金铁匈奴谓之天山过之皆下马拜史记索隐西河旧事云祁连山在张掖酒泉二界上东西二百余里南北百里有松柏五木美水草冬温夏凉宜畜牧养一名天山亦曰白山也王褒四子讲德论匈奴百蛮之最强者也其耒耜则弓矢鞍马播种则扞弦掌拊收秋则奔狐驰兔获刈则颠倒殪仆太白匈奴以杀戮为耕作二语盖本于此而锻链之妙更觉精采不侔史记秦已并天下乃使蒙恬将三十万衆北逐戎翟收河南筑长城因地形用险制塞起临洮至辽东延袤万余里汉书音义文颖曰边方备胡寇作高土橧橧上作桔槔桔槔头兜零以薪草置其中常低之有寇即燃火举之以相告曰烽古战城南词泉骑格鬪死弩马徘徊鸣章怀太子後汉书注相拒而杀之曰格六韬圣人号兵为凶器不得已而用之萧士贇曰开元天宝中上好边功征伐无时此诗盖以讽也 乾音干】

将进酒【一作惜空酒樽 宋书汉鼓吹铙歌十八曲有将进酒曲乐府诗集将进酒古词云将进酒乘大白大略以饮酒放歌为言宋何承天将进酒篇曰将进酒庆三朝备繁礼荐佳肴则言朝会进酒且以濡首荒志为戒若梁昭明太子云洛阳轻薄子但叙游乐饮酒而已】

君不见黄河之水天上来奔流到【萧本作倒】海不复回君不见高堂明镜悲白发朝如青丝暮成【一作如】雪人生得意须尽欢莫使金樽空对月天生我材必有用【一作天生我身必有财又作天生吾徒有俊材又用一作开】千【一作黄】金散尽还复来烹羊宰牛且为乐会须一饮三百杯岑夫子丹丘生进酒君莫停【一作将进酒杯莫停】与君歌一曲请君为我倾【萧本作侧】耳听钟鼓饌玉不足贵【一作钟鼎玉帛岂足贵】但愿长醉不用【一作复萧本作愿】醒古来圣贤皆寂寞【一作死尽】惟有饮者留其名陈王昔时【一作日】宴平乐斗酒十千恣欢谑主人何为言少钱径须沽取对君酌【一作且须沽酒共君酌】五花马千金裘呼儿将出换美酒与尔同销万古愁【曹植诗中厨办丰膳烹羊宰肥牛世说注郑玄别传曰袁绍辟玄及去饯之城东欲玄必醉会者三百余人皆离席奉觞自旦及

暮度玄饮三百余杯而温克之容终日无怠陈暄与兄子秀书郑康成一饮三百杯吾不以为多岑夫子即集中所称岑徵君是丹丘生即集中所称元丹丘是皆太白好友也鲍照诗为君歌一曲礼记倾耳听之不可得而闻也何晏论语注饌饮食也左思吴都赋矜其宴居则珠服玉饌李周翰注玉饌言珍美可比于玉曹植以太和六年封为陈王其所作名都篇有曰归来宴平乐美酒斗十干李善注平乐观名五花马谓马之毛色作五花文者读杜甫高都护骢马行云五花散作云满身厥状可觀矣杜阳杂编谓代宗御马九花虬以身被九花故名亦是此义或谓据图画见闻志云唐开元天宝之间承平日久世尚轻肥三花饰马旧有家藏韩干画贵戚閱马图中有三花马兼曾见苏大参家有韩干画三花御马晏元献家张萱画虢国出行图中有三花马三花者剪鬣为三瓣白乐天诗云凤笺裁五色马鬣剪三花乃知所谓五花者亦是剪马鬣为五瓣耳其说亦通萧注谓其义出於隋丹元子步天歌五个吐花王良文言马之纹上应星宿而嗤杜注无举此者则大谬矣史记孟尝君有一狐白裘直千金天下无双】行行且游猎篇【胡震亨曰行行且游猎篇始梁刘孝威其辞咏天于游猎事太白咏边城儿游猎为不同耳】

边城儿生来不读一字书但知【萧本作将】游猎夸轻趫胡马秋肥宜白草骑来蹑影何矜【一作可怜误】骄金鞭拂雪挥鸣鞘半酣呼鹰出远郊弓弯【一作弯弧】满月不虚发双鵰迸落连飞髯【繆本作】海边观者皆辟易猛气英风振沙碛儒生不及游侠人白首下【繆本作垂】帷复何益【韵会趫捷也梁简文帝诗边秋胡马肥汉书鄯善国多白草孟康注白草草之白者顔师古注白草似莠而细无芒其乾熟时正白色牛马所嗜也曹植七启忽蹑景而轻骛逸奔骥而超遗风李善注景日景也蹑之言疾也广韵鞘鞭鞘也萧士贇曰满月弯弓圆满之状子虚赋弓不虚发中必决毗列子蒲且子之弋也弱弓纖缴乘风振之连双鵰於青云之际鵰鵰鸡也详见大猎赋注韵会髯鸣镝也或作 辟易却退而易其本处详见二卷注孔稚珪北山移文张英风於海甸沙碛即沙漠也唐人多变称沙碛唐书秦陇以西多沙碛少行人胡三省通监注碛大碛也即所谓大漠荀悦汉纪立气势作威福结私交以立强於世者谓之游侠汉书董仲舒少治春秋孝景时为博士下帷讲诵弟子传以久次相受业或莫见其面趫音跷鞘音梢髯音器辟音辟碛音迹】

飞龙引二首【按乐府诗集飞龙引乃琴曲歌辞太白二篇皆借黄帝上昇事为言乃游仙诗也】

黄帝铸鼎于荆山链丹砂丹砂成黄金骑龙飞上太清【繆本作飞去太上】家云愁海思令人嗟宫中彩女顔如花飘然挥手凌紫霞从风纵体登鸾【一作鸾】车登鸾车侍轩辕遨游青天中其乐不可言【史记黄帝采首山铜铸鼎于荆山下鼎既成有龙垂胡髯下迎黄帝黄帝上骑羣臣後宫从上者七十余人龙乃上去余小臣不得上乃悉持龙髯龙髯拔堕堕黄帝之弓百姓仰望黄帝既上天乃抱其弓与龙髯号故後世因名其处曰鼎湖其弓曰乌号李少君言上曰祠竈则致物致物而丹砂可化为黄金黄金成以为饮食器则益壽益壽而海中蓬萊仙者乃可见见之以封禪则不死黄帝是也黄帝九鼎神丹经乘云驾龙上下太清梁豫章王诗云悲海思徒揜抑抱朴子黄帝以千二百女昇天鲍照诗合神丹戏紫房紫房彩女弄明璫宋之问诗越女顔如花陆机诗轻举乘紫霞曹植洛神赋忽焉纵体以遨以嬉吕延济注纵

体轻举之貌太平御览尺素诀曰太微天帝登白鸾之车驾黑羽之凤史记黄帝者少典之子姓公孙名曰轩辕有土德之瑞故号黄帝】

其二

鼎湖流水清且闲轩辕去时有弓劒古人传道留其间後宫婵娟多花颜乘鸾飞烟亦不还骑龙攀天造天关造天关闻天语屯【萧本作长】云河车载玉女载玉女过紫皇紫皇乃赐白兔所捣之药方後天而老凋三光下视瑶池见王母蛾眉萧飒如秋霜【通典弘农郡湖城县故曰胡汉武帝更为湖县有荆山黄帝铸鼎于荆山其下曰鼎湖即此也九域志陕州陕郡有鼎湖黄帝采首山之铜铸鼎于荆山之下帝升天因名其地史记正义括地志云湖水源出虢州湖城县南三十五里夸父山北流入河即鼎湖也闻者是水止而不动之意陆机诗惠心清且闲水经注黄帝崩惟弓劒存焉故世称黄帝仙矣韵会婵娟美好貌宋书尧梦攀天而上汉武内传上元夫人歌步玄之曲曰负笈造天关借问太上家列子化人之宫出云雨之上而不知下之据望之若屯云焉此言屯云河车言车之多若屯云也楚辞建日月以为盖兮载玉女於後车吕氏春秋身好玉女高诱注玉女好女也仙传多称侍女为玉女亦是此义谓其美如玉也沈约郊居赋降紫皇於天阙延二妃於湘渚太平御览秘要经曰太清九宫皆有僚属其最高者称天皇紫皇玉皇古董逃行教敕凡吏受言采取神药若木端白兔长跪捣药虾蟆丸奉上陛下一玉杵服此药可得神仙拾遗记服之得道後天而老初学记日月星谓之三辰亦曰三光杨齐贤曰凋三光者言三光有时凋落而真身则常存也太平广记西王母所居宫室九层玄室紫翠丹房左带瑶池右环翠水司马相如大人赋吾乃今日覩西王母皛然白首戴胜而穴处所谓蛾眉萧飒如秋霜即白首之意嫌王母已有衰老之容以反明轩辕之後天而老也】天马歌【汉书武帝纪元鼎四年秋马生渥洼水中作天马之歌太初四年春贰师将军广利斩大宛王首获汗血马来作西极天马之歌胡震亨曰汉郊祀天马二歌皆以歌瑞应太白所拟则以马之老而见弃自况思蒙收赎似去翰林後所作】

天马来出月支【萧本作氏】窟背为虎文龙翼骨嘶青云振緑髮兰筋杈奇走灭没腾崑仑历西极四足无一蹶鸡鸣刷燕晡秣越神行电迈蹶恍惚【史记天子得乌孙马好名曰天马及得大宛汗血马益壮更名乌孙马曰西极名大宛马曰天马云郭璞山海经注月支国多好马史记正义万震南州志云大月支在天竺北可七千里地高燥而远國中骑乘常数十万匹城郭宫殿与大秦国同人民赤白色便习弓马土地所出及奇伟珍物被服鲜好天竺不及也外国称天下有三衆中国为人衆大秦为宝衆月支为马衆汉天马歌虎脊两化若鬼应劭注马毛色如虎脊者有两也顔延年赭白马赋垂稍植髮李善注髮额上毛也陈琳为曹洪与魏文帝书整兰筋李善注相马经云一筋从玄中出谓之兰筋玄中者目上?如井字兰筋坚者千里吕向注兰筋马筋节坚者千里足也汉天马歌志俶傥精杈奇赭白马赋精杈奇兮张铤注杈奇善行貌列子天下之马者若灭若没若亡若失若此者絶尘弭 淮南子经纪山川蹈腾崑仑高诱注腾上也崑仑山名在西北其高万九千里汉天马歌天马徕从西极涉流沙九夷服说文蹶僵也赭白马赋旦刷幽燕昼秣荆越刘良注刷括也秣饲也幽燕北地名荆越南地名韵会晡日加申时也杜预左传注秣谷马也晡音逋】天马呼飞龙【一作黄】趋目明长庚臆双鳧尾如流星首渴乌口喷红光汗沟珠【当作朱】曾陪时龙跃【萧本作蹶】天衢

羈金络月照皇【一作星】都逸气棱凌九区白璧如山谁敢沽回头笑紫燕但觉尔辈愚【黄伯仁龙马颂耳如剡箒目象明星初学记长庚太白星也史记索隐韩诗云太白晨出东方为启明昏见西方为长庚齐民要术马胸欲直而出鳧间欲开望之如双鳧又曰双鳧欲大而上注飞鳧胸两边肉如鳧埤雅旧说相马擎头如鹰垂尾如彗後汉书作翻车渴乌施于桥西用洒南北郊路章怀太子注渴乌为曲筒以气引水上也此言马尾流转有似奔星马首昂矫状类渴乌即如彗如鹰之意齐民要术相马之法口中欲得红而有光又曰口中欲得色红白如火光为善材气多良且壽张率舞马赋露沫喷红沾汗流赭赭白马赋膺门沫赭汗沟走血李善注相马经云膺门欲开汗沟欲深孔融荐弥衡表龙跃天衢振翼云汉楚辞蹶天衢兮长驱王逸注衢路也说文羈马络头也庄子齐之以月题陆德明注月题马额上当颇如月形者也赭白马赋雨杈协月李善注相马经曰颊欲圆如悬璧因谓之双璧其盈满如月异相之表也黄伯仁龙马颂曰双璧似月曹植诗应会皇都赭白马赋罄九区而率顺李善注九区九服也沈约诗紫燕光陆离李善注尸子曰我得民而治则马有紫燕兰池吕延济注紫燕良马也臆音益】天马奔恋君轩駉跃惊矫浮云翻万里足踟躕遥瞻闾阖门不逢寒风子谁采逸景孙【鲍照诗疲马恋君轩公羊传临南駉马而由乎孟氏何休注駉捶马衔走也汉天马歌天马来龙之媒游闾阖观玉台应劭注闾阖天门也吕氏春秋古之善相马者寒风氏相口齿天下之良工也陆云与陆典书逸影之迹永繫幽冥之坂駉音聿】白云在青天丘陵远崔嵬盐车上峻坂倒行逆施畏日晚伯乐翦拂中道遗少尽其力老弃之愿逢田子方惻然为我悲【一作思】虽有玉山禾不能疗苦【一作我】饥【繆本作肌】严霜五月凋桂枝伏枥衔冤摧两眉请君赎献穆天子犹堪弄影舞瑶池【王母謠白云在天丘陵自出战国策夫骥之齿至矣服盐车而上太行蹄申膝折尾湛附溃漉汁洒地白汗交流外坂迁延负棘而不能上伯乐遭之下车攀而哭之解紵衣以羈之骥于是俛而喷仰而鸣声达于天若出金石者何也彼见伯乐之知己也刘峻广絶交论曰翦拂使其长鸣正用此事翦拂谓修剪其毛鬣洗拭其尘垢史记伍子胥曰吾日暮涂远吾故倒行而逆施之陆德明庄子音义伯乐姓孙名阳善驭马石氏星经云伯乐天星名主典天马孙阳善驭故以为名韩诗外传田子方出见老马於道胃然有志焉以问于御者曰此何马也曰故公家畜也罢而不为用故出放也田子方曰少尽其力而老弃其身仁者不为也束帛而赎之穷士闻之知所归心矣鲍照诗诚不及青鸟远食玉山禾张协七命琼山之禾李善注琼山禾即崑仑山之木禾山海经曰崑仑之上有木禾长五寻大五围韵会枥牛马阜也通作历盖今之马槽也汉书马不伏历不可以趋道顔师古注?历谓伏槽历而秣之也列子穆王肆意远游命驾八骏之乘驰驱千里遂宾于西王母觴于瑶池之上杨师道咏饮马诗清晨控龙马弄影出花林王融曲水诗序穆满八骏如舞瑶水之陰刘良注如舞谓马行貌萧士贇曰此诗为逸羣絶伦之士不遇知己者叹也】

行路难三首【乐府古题要解行路难备言世路艰难及离别伤悲之意多以君不见为首】

金樽清酒斗十千玉盘珍羞直万钱停杯投筯不能食拔劒四顾心茫然欲渡黄河冰塞川将登太行雪满山【一作暗天】闲来垂钓碧【一作坐】溪上忽复乘舟梦日边行路难行路难多岐路今安在长风破浪会有时直挂云帆济沧海【曹植诗美酒斗十千北史韩晋明好酒纵诞招饮宾客一席之费动至万钱犹恨俭率鲍照诗对案不能食拔劒击柱长叹息古诗四顾何茫然鲍照舞鹤赋冰塞长川雪满羣山太行山见明堂赋注宋书伊挚将应汤命梦乘

船过日月之旁列子杨子之邻人亡羊既率其党又请杨子之竖追之杨子曰亡一羊何追者之衆隣人曰多岐路宋书宗慤少时叔父炳问其志慤曰愿乘长风破万里浪马融广成颂张云帆施蛻悖释名随风张幔曰帆】

其二

大道如青天我独不得出差逐长安社中儿赤鸡白狗【一作雉】赌梨栗弹劒作歌奏苦声曳裾王门不称情淮陰市井笑韩信汉朝公卿忌贾生君不见昔时燕家重郭隗拥簪折节无嫌猜剧辛乐毅感恩分输肝剖胆效英【一作俊】才昭王白骨萦蔓【萧本作烂】草谁人更扫黄金台行路难归去来【旧唐书京师秦之咸阳汉之长安也隋开皇二年自汉长安故城东南移二十里置新都今京师是也史记冯驩闻孟尝君好客蹑屣而见之孟尝君置传舍十日孟尝君问传舍长曰客何所为荅曰冯先生甚贫犹有一剑耳又蒯綆弹其剑而歌曰长铗归来乎食无鱼孟尝君迁之幸舍食有鱼矣五日又问传舍长荅曰客复弹剑而歌曰长铗归来乎出无舆孟尝君迁之代舍出入乘舆车矣五日孟尝君复问传舍长荅曰先生又尝弹剑而歌曰长铗归来乎无以为家孟尝君不悦汉书邹阳曰饰固陋之心则何王之门不可曳长裾乎史记韩信淮陰人淮陰屠中少年有侮信者曰若虽长大好带刀剑中情怯耳衆辱之曰信能死刺我不能死出我胯下於是信熟视之俯出胯下蒲伏一市人皆笑信以为怯又史记天子议以为贾生任公卿之位绦灌东阳侯冯敬之属尽害之乃短贾生曰洛阳之人年少初学专欲擅权纷乱诸事於是天子後亦疏之不用其议又史记邹衍如燕燕昭王拥簪先驱索隐曰簪带也为之扫地以衣袂拥带而却行恐尘埃之及其长者所以为敬也战国策主折节以下其臣臣推体以下死士鲍彪注折节屈折肢节也江淹恨赋蔓草萦骨昭王郭隗及黄金台事俱见二卷注隗音危簪音遂剧音极】

其三【此首一作古兴】

有耳莫洗颍川水有口莫食首阳蕨含光混世贵无名何用孤高比云月吾观自古贤达人功成不退皆殒身子胥既弃吴江上屈原终投湘水滨陆机雄才岂自保李斯税驾苦不早华亭鹤唳讵可闻上蔡苍鹰何足道君不见吴中张翰称【一作真】达生秋风忽忆江东行且乐生前一杯酒何须身後千载名【高士传许由耕於中岳颍水之阳箕山之下尧召为九州长由不欲闻之洗耳于颍水滨史记武王已平殷乱天下宗周而伯夷叔齐耻之义不食周粟隐于首阳山采薇而食之索隐曰薇蕨也梁书阮孝绪传周德虽兴夷齐不厌薇蕨汉道方盛黄绮无闷山林薇蕨本二草而古人亦多混称太白改以叶韵盖有自也吴越春秋吴王闻子胥之怨恨也乃使人赐属镂之剑子胥伏剑而死吴王取子胥尸盛以?夷之器投之於江中子胥因随流扬波依潮来往荡激崩岸拾遗记屈原以忠见斥隐於沅湘披榛茹草混同禽兽不交世务采栢实以和桂膏用养心神被王逼逐乃赴清泠之水楚人思慕谓之水仙其神游于天河精灵时降湘浦晋书成都王颖起兵讨长沙王乂假陆机後将军河北大都督督北中郎将王粹冠军牵秀等诸军二十余万人战於鹿苑机军大败宦人孟玖潜机于颖言其有异志颖怒使秀密收机机释戎服着白帻与秀相见神色自若既而叹曰华亭鹤唳岂可复闻乎遂遇害于军中世说注八王故事曰华亭吴由拳县郊外墅也有清泉茂林吴平後陆机兄弟共游

于此十余年语林曰机为河北都督闻警角之声谓孙丞曰闻此不如华亭鹤唳故临刑而有此叹说文唳鹤鸣也史记李斯为丞相长男由为三川守诸男皆尚秦公主女悉嫁秦诸公子李由告归咸阳李斯置酒於家百官长皆前为寿门庭车骑以千数李斯喟然叹曰吾闻之荀卿曰物禁太盛夫斯乃上蔡布衣闾巷黔首上不知其驕下遂迁擢至此当今人臣之位无居臣上者可谓富贵极矣物极则衰吾未知所税驾也索隐曰税驾犹解驾言休息也李斯言已今日富贵已极未知向後吉凶止泊在何处也太平御览史记曰李斯临刑思牵黄犬臂苍鹰出上蔡东门不可得矣考今本史记李斯传中无臂苍鹰字而太白诗中屡用其事当另有所本晋书张翰字季鹰吴郡吴人也有清才善属文而纵任不拘齐王罔辟为大司马东曹掾罔时执权翰因见秋风起乃思吴中菰菜蓴羹鲈鱼脍曰人生贵得适志何能羁宦数千里以要名爵乎遂命驾而归俄而罔败人皆谓之见机翰任心自适不求当世或谓之曰卿乃可纵适一时独不为身後名耶荅曰使我有身後名不如即时一杯酒时人贵其旷达唳音丽】

长相思【长相思本汉人诗中语古诗客从远方来遗我一书札上言长相思下言久离别苏武诗生当复来归死当长相思李陵诗行人难久留各言长相思六朝始以名篇如陈後主长相思久相忆徐陵长相思望归难江总长相思久别离诸作并以长相思发端太白此篇正拟其格】

长相思在长安络纬秋啼金井阑【繆本作栏】微【一作凝】霜凄凄簷色寒孤灯不明【一作眠一作寐】思欲絶卷帷望月空长叹美人如花【一作佳期迢迢】隔云端上有青冥之高【萧本作长】天下有绿水之波澜天长路远魂飞苦梦魂不到关山难长相思摧心肝【吴均诗络纬井边啼古今注莎鸡一名促织一名络纬一名蟋蟀促织谓其鸣声如急织络纬谓其鸣声如纺绩也按今之所谓络纬似蚱蜢而大翅作声絶类纺绩秋夜露凉风冷鸣尤凄紧俗谓之纺绩娘非蟋蟀也或古今称谓不同欵金井阑井上阑干也古乐府多有玉牀金井之辞盖言其木石美丽价值金玉云耳宋玉神女赋炜乎如花温乎如玉枚乘诗美人在云端天路隔无期楚辞据青冥而攄虹兮陈後主孙瑒铭天长路远地久云多欧阳建诗痛哭摧心肝】

上留田行【繆本少行字按乐府诗集王僧?技録相和歌瑟调三十八曲有上留田行古今注上留田地名也其地人有父母死兄不字其孤弟者邻人为其弟作悲歌以风其兄故曰上留田太白所谓弟死不葬他人举铭旌之事与古今注所说不同岂别有异词之传闻抑於时实有斯事而借古题以咏新闻耶】

行至上留田孤坟何峥嵘积此万古恨春草不复生悲风四边来肠断白杨声借问谁家地埋没蒿里莹古老向予言言是上留田蓬科马鬣今已平昔之弟死兄不葬他人於此举铭旌一鸟死百鸟鸣一兽走百兽惊桓【一作常】山之禽别离苦欲去回翔不能征田氏仓卒骨肉分青天白日摧紫荆交让【萧本作柯】之木本同形东枝顛顛西枝荣无心之物尚如此参商胡乃寻天兵孤竹延陵让国扬名高风缅邈颰波激清尺布之谣塞耳不能听【本草拾遗白杨北土极多人种墟墓间树大皮白古诗出郭门直视但见丘与坟白杨多悲风萧萧愁杀人七哀诗借问谁家坟古薤露歌蒿里谁家地汉书蒿里召兮郭门宏顔师古注蒿里死人里

说文莹墓也贾山至言使其後世曾不得蓬颗蔽冢而托葬焉顏师古注颗谓土块蓬颗言块上生蓬者耳蓬科蓬颗义同礼记孔子之丧有自燕来观者舍于子夏氏子夏曰昔夫子言之曰吾见封之若堂者矣见若防者矣见若覆夏屋者矣见若斧者矣从若斧者焉马鬣封之谓也正义曰子夏既道从若斧形恐燕人不识故举俗称马鬣封之谓也以语燕人马驥鬣之上其肉薄封形似之又礼记铭明旌也以死者为不可别已故以其旗识之家语孔子在卫昧旦晨兴顏回侍侧闻哭者之声甚哀子曰回汝知此何所哭乎对曰回以此哭声非但为死者而已又有生离别者也子曰何以知之对曰回闻桓山之鸟生四子焉羽翼既成将分於四海其母悲鸣而送之哀声有似于此为其往而不返也回窃以音类知之孔子使人问哭者果曰父死家贫卖子以葬与之长诀子曰回也善於识音矣楚辞归雁兮于征王逸注征行也言将去续齐谐记京兆田真兄弟三人共议分财生赀皆平均唯堂前一株紫荆树共议欲破三片明日就截之其树即枯死状如火然真往见之大惊谓诸弟曰树本同株闻将分斫所以憔悴是人不如木也因悲不自胜不复解树树应声荣茂兄弟相感更合财宝遂为孝门述异记黄金山有楠树一年东边荣西边枯後年西边荣东边枯年年如此张华云交让树也左传昔高辛氏有二子伯曰閼伯季曰实沉居于旷林不相能也日寻干戈以相征讨后帝不臧迁閼伯于商丘主辰商人是因故辰为商星迁实沉于大夏主参唐人是因以服事夏商杜预注寻用也史记伯夷叔齐孤竹君之二子也父欲立叔齐及父卒叔齐让伯夷伯夷曰父命也遂逃去叔齐亦不肯立而逃之又史记吴王壽梦有子四人长曰诸樊次曰余祭次曰余昧次曰季札季札贤而壽梦欲立之季札让不可於是乃立长子诸樊摄行事当国诸樊已除丧让位季札季札谢曰曹宣公之卒也诸侯与曹人不义曹君将立子臧子臧去之以成曹君君子曰能守节矣札虽不才愿附於子臧之义吴人固立季札季札弃其室而耕乃舍之季札封於延陵故号曰延陵季子潘岳寡妇赋緬邈兮长乖吕延济注緬邈长远貌汉书淮南厉王长令男子但等七十人与棘蒲侯柴武太子奇谋以輶车四十乘反谷口令人使闽越匈奴事觉治之当弃市制曰其赦长死罪废勿王有司奏请处蜀严道邛邰淮南王不食而死民有作歌歌淮南王曰一尺布尚可缝一斗粟尚可舂兄弟二人不相容李陵诗游子暮思归塞耳不能听莹音营参音森緬音勉】

春日行【胡震亨曰鲍照春日行咏眷游太白则拟君王游乐之辞】

深宫高楼入紫清金作蛟龙盘绣【一作绣作】楹佳人当窗弄白日弦将手语弹鸣箏春风
吹落君王耳此曲乃是昇天行因出天池泛蓬瀛楼船【萧本作台】蹙沓波浪惊三千双蛾
献歌笑挝钟考鼓宫殿倾万姓聚舞歌太平我无为人自宁三十六帝欲相迎仙人飘飏下云
軿帝不去留镐京安能为轩辕独往入宵冥小臣拜献南山壽陛下万古垂鸿名【真诰仰眄
太霞宫金阁曜紫清河子朗诗美人弄白日灼灼当春牖弦将手语谓弦与手相戛而成声也
风俗通箏谨案礼乐记五弦筑身今并凉二州箏形如瑟不知谁所改作也或曰秦蒙恬所造
隋书箏十三弦所谓秦声蒙恬所作者也通典傅玄箏赋序曰代以为蒙恬所造今观其器上
崇似天下平似地中空准六合弦柱拟十二月设之则四象在鼓之则五音发斯乃仁智之器
岂蒙恬亡国之臣所能关思哉曹植诗抚弦弹鸣箏昇天行古乐府名乐府古题要解昇天行
曹植日月何肯留鲍照家世宅关辅皆伤人世不永俗情险巇当求神仙翱翔六合之外其辞
盖出楚辞远游篇也天池指御苑池沼而言史记太液池中有蓬莱方丈瀛洲壶梁象海中神

山龟鱼之属西京杂记昆明池中有楼船数百艘上建楼橹韵会挹击也毛茌诗传考击也书武成万姓悦服老子我无为而民自化按道书有三十六天上帝东方八天太皇黄曾天帝太明玉完天帝清明何童天帝玄胎平育天帝元明文举天帝上明七曜摩夷天帝虚无玉衡天帝太极蒙翳天帝南方八天赤明和阳天帝玄明恭华天帝曜明宗飘天帝竺落皇笏天帝虚明灵曜天帝观明端靖天帝元明恭庆天帝太燠极瑶天帝西方八天元载孔昇天帝太安皇崖天帝显定极风天帝始皇孝芒天帝太皇翁重浮容天帝无思江油天帝上揲阮乐天帝无极昙誓天帝北方八天皓庭霄度天帝渊通元洞天帝太文翰宠妙成天帝太素秀乐禁上天帝太虚无上常融天帝太释玉隆腾胜天帝龙变梵度天帝太极平育贾奕天帝中央四帝昊天金阙玉皇上帝先天圣祖长生大帝上天紫微天皇大帝中天北极紫微大帝真浩庐江潜山中有学道者郑景世张重华以四月十九日北玄老太一迎以云輶白日升天苍颉篇輶衣车也诗大雅宅是镐京元和郡县志周武王镐京在长安县西北十八里自汉武帝穿昆明池於此镐京遗址遂沦陷焉庄子黄帝再拜稽首而问曰敢问治身奈何而可以长久广成子曰我为汝遂于大明之上矣至彼至阳之原也为汝入於窅冥之门矣至彼至阴之原也诗大雅如南山之寿不骞不崩独断陛下者陛阶也所由升堂也天子必有近臣执兵陈於陛侧以戒不虞谓之陛下者羣臣与天子言不敢指斥天子故呼在陛下者而告之因卑达尊之意也上书亦如之封禅书前圣之所以永保鸿名而常为称首吕向注鸿大也挹张瓜切音鬚輶音瓶镐音浩窅音窈】

前有樽酒行二首【即古乐府之前有一樽酒也傅玄张正见诸作皆言置酒以祝宾主长寿之意太白则变而为及时行乐之辞】

春风东来忽相过金樽绿酒生微波落花纷纷稍觉多美人欲醉朱颜酡青轩桃李能几何流光欺人忽蹉跎君起舞日西【一作将】夕当年意气不肯倾【萧本作平】白髮如【一作首垂】丝叹何益【水清曰绿所谓绿酒即清酒之义也楚辞美人既醉朱颜酡韵会酡饮而赭色着面也虞炎诗青轩明月时王适诗青轩桃李落纷纷紫庭兰蕙日氛氲流光日月之光也曹植诗流光正徘徊说文蹉跎失时也王融诗畅哉人外赏迟迟眷西夕酡音驮】

其二

琴奏龙门之绿桐玉壶美酒清若空催弦拂柱与君饮看朱成碧颜始红【一作眼白看杯颜色红】胡姬貌如花当垆笑春风笑春风舞罗衣君今不醉将【缪本作欲】安归【周礼龙门之琴瑟於宗庙中奏之郑康成注龙门山名枚乘七发龙门之桐高百尺而无枝使琴挚斫斩以为琴王僧儒诗谁知心眼乱看朱忽成碧古乐府胡姬年十五春日独当垆汉书乃令文君当垆颜师古注卖酒之处累土为垆以居酒瓮四边隆起其一面高形如煨炉故名垆而俗之学者皆谓当垆为对温酒火炉失其义矣】

夜坐吟【夜坐吟始自鲍照其辞曰冬夜沉沉夜坐吟含情未发已知心霜入幕风度林朱灯灭朱颜寻体君歌逐君音不贵声贵意深盖言听歌逐音因音托意也】

冬夜夜寒觉夜长沈吟久坐坐北堂冰合井泉月入闺金釭青凝照悲啼金釭灭啼转多掩妾泪听君歌歌有声妾有情情声合两无违一语不入意从君万曲梁尘飞【古诗天寒知夜长西都赋金釭衔璧吕延济注金釭灯盏也鲍照诗万曲不关心陆机诗再唱梁尘飞刘向别录汉兴以来善雅歌者鲁人虞公发声清哀盖动梁尘釭音江】

野田黄雀行【按王僧?技录相和歌瑟调三十八曲中有野田黄雀行】

游莫逐炎洲翠栖莫近吴宫燕吴宫火起焚巢【缪本作尔】巢炎洲逐翠遭网罗萧条两翅蓬蒿下纵有鹰鹯奈尔【一作若】何【郭璞山海经注翠似燕而绀色陈子昂诗翡翠巢南海雌雄珠树林杀身炎洲里委羽玉堂阴炎洲谓海南之地在汉为朱崖儋耳二郡唐为崖儋振三州今为琼州其地居大海之中广袤数千里四时常燠故曰炎洲多产翡翠越绝书记吴地传有东宫西宫东宫周一里二百七十步西宫在长秋周一里二十六步秦始皇帝十一年守宫者照燕失火烧之鲍照诗犹胜吴宫燕无罪得焚巢尔稚翼鹰鸟之鸷者雌大雄小一名鸕陆玕诗疏鸕似鸕青黄色黄颌勾喙向风摇翅乃因风飞急疾击鸕鸕燕雀食之】

箜篌谣【乐府诗集箜篌谣不详所起大略言结交当有终始与箜篌引异旧注以为即箜篌引误矣】

攀天莫登龙走山莫骑虎贵贱结交心不移惟有严陵及光武周公称大圣管蔡宁相容汉谣一斗粟不与淮南春兄弟尚路人【一作行路】吾心安所从他人方寸间山海几千重轻言托朋友对面九疑峰多【萧本作开】花必早落桃李不如松管鲍久已死何人继其踪【严子陵事见二卷注史记武王崩成王少周公旦专王室管叔蔡叔疑周公之为不利于成王乃挟武庚以作乱周公承成王命伐诛武庚杀管叔而放蔡叔斗粟谣见本卷上留田注方寸心也列子吾见子之心矣方寸之地虚矣方舆胜览九疑山在道州宁远县南六十里亦名苍梧山九峰相似望而疑之谓之九疑一曰朱明峰二曰石城峰三曰石楼峰四曰娥皇峰五曰舜源峰六曰女英峰七曰萧韶峰八曰桂林峰九曰梓林峰说苑鲍叔死管仲举上衽而哭之泪下如雨从者曰非君父子也此亦有说乎管仲曰非夫子所知也吾尝与鲍子负贩于南阳吾三辱於市鲍子不以我为怯知我之欲有所明也鲍子尝与我有说君者而三不见听鲍子不以我为不肖知我之所遇明君也鲍子尝与我临财分货吾自取多者三鲍子不以我为贪知我之不足於财也生我者父母知我者鲍子也士为知己者死而况为之哀乎】

雉朝飞【一本作雉朝飞弦古今注雉朝飞者犊牧子所作也犊牧子齐处士湣宣王时人年五十无妻出薪于野见雉雌雄相随而飞意动心悲乃作雉朝飞之操将以自伤焉】

麦陇青青三月时白雉朝飞挟两雌锦衣绮【萧本作绣】翼何离襍犊牧采薪感之悲春天和白日暖啄食饮泉勇气满争雄鬪死绣颈断雉子班奏急管弦心倾美酒【萧本作倾心酒美】尽玉碗枯杨枯杨尔生稊【缪本作萑】我独七十而孤栖弹弦写恨意不尽瞑目归黄泥【王僧达诗麦陇多秀色尔雅释雉有十四种白雉其一种也名鶡雉江东呼白鶡枚乘七发麦秀渐兮雉朝飞潘岳射雉赋逸羣之雉擅场挟两徐爰注逸羣雉异之雉不但欲擅一场

又挾两雌也吴均雉朝飞曲何辞碎锦衣射雉赋莺绮翼而頽搥木华海赋鸟雏离襍李善注离襍羽毛始生貌埤雅雉死耿介妒垄护疆善鬪虽飞不越分域一界之内要以一雄为主余者虽衆莫敢鸣雉射雉赋灼绣颈而袞背徐爰注颈毛如绣宋书汉鼓吹铙歌十八曲有雉子斑曲梁元帝诗金卮玉碗共君倾周易枯杨生稊老夫得其女妻无不利王弼注稊者杨之秀也虞翻注稊稊也杨叶未舒称稊襍音斯犊音读稊音题】

上云乐【原注老胡文康辞或云范云及周舍所作今拟之 胡震亨曰梁武帝制上云乐设西方老胡文康生自上古者青眼高鼻白髮导弄孔雀凤凰白鹿慕梁朝来游伏拜祝千岁壽周舍为之词太白拟作视舍本词加肆而龙飞咸阳数语似又谓此胡游肃宗朝者亦各从其时备一代俳乐尔琦按隋书乐志梁三朝乐第四十四设寺子导安息孔雀凤凰文鹿胡舞登连上云乐歌舞伎知上云乐者乃舞之名色令乐人扮作老胡之状率珍禽奇兽而为胡舞以祝天子万壽其时所歌之辞即舍所作之辞也舍本辞曰西方老胡厥名文康遨游六合傲诞三皇西观蒙汜东戏扶桑南泛大蒙之海北至无通之乡昔与若士为友共弄彭祖扶牀往年暂到崑仑复值瑶池举觴周帝迎以上席王母赠以玉浆故乃壽如南山老若金刚青眼瞿瞿白髮长长蛾眉临髭高鼻垂口非直能俳又善饮酒箫歌从前门徒从後济济翼翼各有分部凤凰是老胡家鸡师子是老胡家狗陛下拨乱反正再朗三光泽与雨施化与风翔覩云候吕来游大梁重脩路始届帝乡伏拜金阙瞻仰玉堂从者小子罗列成行悉知廉节皆识义方歌管愔愔铿鼓锵锵响震钧天声若鸞凰前却中规矩进退得宫商举伎无不佳胡舞最所长老胡寄篋中复有奇乐章齎持数万里愿以奉圣皇乃欲次第说老耄多所忘但愿明陛下壽千万岁欢乐未渠央太白此篇拟之而作辞义多相出入故全録之以见其所自焉耳】

金天之西白日所没康老胡雏生彼月窟巉岩容仪戍削风骨碧玉灵灵【一作皎皎】双目瞳黄金拳拳两鬓【一作鬢髮】红华盖垂下睫嵩岳临上唇不覩诡譎貌岂知造化神【张衡思玄赋顾金天而叹息兮吾欲往乎西嬉吕向注金天西方少昊所主也长杨赋西压月窟月窟谓近西月没之处盖指西域极远之地而言上林赋眇閭易以戍削徐广注戍削言如刻画之碧玉灵灵言其眼色碧而有光黄金拳拳言其髮色黄而稍卷华盖垂下睫言其眉长而下覆于目嵩岳临上唇言其鼻巨而上压於唇黄庭内景经眉号华盖覆明珠又云外应中岳鼻齐位梁丘子注中岳鼻也王褒洞箫赋惊合逴以诡譎李善注诡诡犹奇怪也 戍音恤灵音憬睫音接】大道是文康之严父元气乃文康之老亲抚顶弄盘古推车转天轮云见日月初生时铸冶火精与水银阳乌未出谷顾兔半藏身女娲戏黄土团作愚下人散在六合间蒙蒙若沙尘生死了不尽谁明此胡是仙真西海栽若木东溟植扶桑别来几多时枝叶万里长【道德指归论道德为父神明为母孙楚石人铭大象无形元气为母沓兮冥兮陶冶衆有述异志盘古氏天地万物之祖也路史浑敦氏即代所谓盘古氏神灵一日九变盖元混之初陶融造化之主也木华海赋状如天轮胶戾而激转李善注吕氏春秋曰天地如车轮终则复始淮南子积阳之热气生火火气之精者为日积陰之寒气为水水气之精者为月初学记范子计然曰日者火精也阳乌日中乌也详明堂赋注顾兔月中兔也楚辞夜光何德死则又育厥利维何而顾兔在腹太平御览风俗通曰俗说天地初开辟未有人民女娲团黄土为人剧务力不暇供乃引绳於泥中举以为人故凡富贵贤智者黄土人也贫贱凡愚者引絙人也録异记房州上庸界有伏羲女娲庙云是抁土为人民之所古迹在焉淮南子若木在建木西末有

十日其花照下地高诱注末端也若木端有十日状如莲花光照其下也东溟东海也顏延之诗日观临东溟十洲记扶桑在碧海之中地方万里有榘树长数千大大二千围树两两同根偶生更相依倚是以名为扶桑仙人食其榘而一体皆作金光色飞翔空玄其树虽大其叶榘故如中夏之桑也但榘稀而色赤九千岁一生实耳味絶甘香美齐民要术玄中记云天下之高者扶桑无枝木焉上至天盘蜿而下屈通三泉也 娲音戈】中国有七圣半路颺鸿【萧本作洪】荒陛下应运起龙飞入咸阳赤眉立盆子白水兴汉光叱咤四海动洪涛为簸扬举足蹋紫微天关自开张【中国有七圣谓高祖太宗高宗中宗睿宗玄宗六君其一则武后也考先天二年睿宗诰有运光五圣业盛百龄之辞贞元二十一年顺宗诰有九圣储祥万邦咸休之语皆数武后在内知当时称谓如此也半路颺鸿荒喻禄山倡乱两京覆没有似鸿荒之世也陛下应运起谓肃宗即位于灵武龙飞入咸阳谓西京剋复大驾还都也赤眉立盆子谓禄山既死羣贼又立安庆绪为主也叱咤四海动洪涛为簸扬喻天下震动寰宇洗清也举足踏紫微喻践天子之位也天关自开张喻四远关塞悉开通出入不事闭守也鲁灵光殿赋鸿荒朴略张载注鸿大也上古之世为鸿荒之世也东京赋龙飞白水凤翔参墟薛综注龙飞凤翔以喻圣人之兴後汉书建武元年赤眉贼率樊崇逢安等共立刘盆子为天子然崇等视之如小儿百事自由初不恤録宋书光武起于舂陵之白水郷章怀太子後汉书注光武旧宅在今随州枣阳东南宅旁二里有白水焉即张衡所谓龙飞白水也太平御览天官星占曰紫微者天帝之座也】老胡感至德东来进仙倡五色师子九苞凤凰是老胡鸡犬鸣舞飞帝乡淋漓飒沓进退成行能胡歌献汉酒跪双膝并【萧本作立】两肘散花指天举素手拜龙顔献圣壽北斗戾南山摧天子九九八十一万岁长倾万岁【一作年】杯【西京赋总会仙倡薛综注仙倡伪作假形谓如神也束皙发蒙记狮子五色而食虎于巨山之岫一噬则百人仆惟畏鈎戟南齐书王敬则梦骑五色狮子论语摘衰圣凤有九苞九苞者一曰口包命二曰心合度三曰耳听达四曰舌拙伸五曰彩光色六曰冠矩朱七曰距鋭鈎八曰音激扬九曰腹文户傳毅舞赋飒沓合并张铣注飒沓盘旋貌春秋元命苞黄帝龙顔得天庭阳文王龙顔柔肩望羊宋玉大言赋北斗戾兮太山夷说文戾曲也九九八十一万六字出战国策】

夷则格上白鸞拂舞辞【通典白鸞吴朝拂舞曲也琦按拂舞者乐人执拂而舞以为容节也乐府诗集古今乐録曰鞞铎巾拂四舞梁并夷则格钟磬鸞拂和故白拟之为夷则格上白鸞拂舞辞】

铿鸣钟考朗鼓歌白鸞引拂舞白鸞之白谁与邻霜衣雪襟诚可珍含哺七子能平均食不噎【缪本作咽】性安【一作可】驯首农政鸣阳春天子刻玉杖镂形赐耆人白鹭【一作鹰】之【缪本作亦】白非纯真外洁其色心匪仁阙五德无司晨胡为啄我葭下之紫鳞鸞鸞鵠贪而好杀凤凰虽大圣不愿以为臣【楚辞铿钟摇簴王逸注铿撞也诗国风我有钟鼓勿鼓勿考毛传考击也何承天歌朗鼓节鸣笳鸞类甚多毛色各异白者不常有有则以为异故瑞应图曰白鸞成汤时至王者养耆老尊道德不以新失旧则至诗国风鸞鸞在桑其子七兮陆玕疏鸞鸞有均一之德饲其子旦从上而下暮从下而上平均如一尔雅翼鸞鸞一名鵠鸞又名布谷以此鸟鸣时布种其谷似鵠长尾牝牡飞鸣翼相靡拂月令云鸣鸞拂其羽是也按鸣鸞拂羽乃三月中候也张华禽经注鸞鸞此鸟鸣时耕事方作农人以为候後汉书礼仪志仲秋之月县道皆按户比民年始七十者授之以玉杖舖之糜粥八十九十礼有加赐玉杖

长九尺端以鸕鸟为饰鸕者不噎之鸟也欲老人不噎释名人六十曰耆耆指也不从力役指事使人也陆玕诗疏云鹭水鸟好而洁白汶阳谓之白鸟齐鲁之间谓之春鉏辽东乐浪吴扬人皆谓之白鹭大小如青脚高尺七八寸尾如鹰尾喙长三寸头上有毛十数枚长寸余粲然与衆毛异甚将欲取鱼时则弭之韩诗外传君独不见夫鸡乎首戴冠者文也足搏距者武也敌在前敢鬪者勇也得食相告仁也守夜不失时信也鸡有此五德襄阳记鸡主司晨大主吠盗毛茈诗传葭芦也说文葭苇之未秀者蜀都赋鲜以紫鳞鹰古者谓之鸕鸕一岁色黄曰黄鸕二岁色变次赤曰鸕鸕又曰鸕鸕三岁以後色变苍白曰苍鸕隋魏彦深鸕赋所谓毛衣屡改厥色无常寅生酉就总号为黄二周作鸕三岁成苍是也世俗通谓之角鸕以其顶有毛角微起也鸕诗所谓晨风似鸕而小好乘风展翅鸣则风生世俗谓之鸕鸕与鸕极类惟尾长翅短为异强悍多力鸕尤勇健善搏乃鸕鸟中之殊特者故邹阳书曰鸕鸟累百不如一鸕禽经曰鸕鸟之善搏者曰鸕孟康汉书注鸕大雕也诗经正义鸕之大者又名鸕盖言其似鸕而大也或以鸕鸕混为一物或以鸕为王睢鱼鸕之异名皆非也四鸟皆禽中之鸕者形状亦相似曲喙金睛剑翮利爪盘旋空中俟物而击之鸕形最小所搏者惟鸽雀小鸟之类鸕稍大能搏雉兔雕则大于鸕能擒鸿鹄大鸟鸕则又大于雕能搏狐鹿羊豕鸕多生北地鸕则是处有之鸕鸕惟产边境世人不辨或多混称故详释之哺音步葭音嘉鸕音刁鸕音诤】

日出入行【胡震亨曰汉郊祀歌日出入言日出入无穷人命独短愿乘六龙仙而升天太白反其意言人安能如日月不息不当违天矫诬贵放心自然与溟溟同科也】

日出东方隈似从地底来历天又入海【缪本作历天又复入西海】六龙所舍安在哉其始与终古不息【一作其行终古不休息】人非元气安得与之久徘徊草不谢荣於春风水不怨落於秋天谁挥鞭策驱四运万物兴歇皆自然羲和羲和汝奚汨没於荒淫之波鲁阳何德驻景挥戈逆道违天矫诬实多吾将囊括大块浩然与溟溟同科【庄子日出于东方而入于西极说文隈水曲隈也六龙见蜀道难注庄子日月得之终古不息陆德明注崔云终古久也郑玄注周礼云终古犹言常也法苑珠林元气者依河图曰元气无形昏昏蒙蒙偃者为地伏者为天礼统曰天地者元气之所生万物之祖帝王世纪曰元气始萌谓之太初三五历纪曰未有天地之时混沌如鸡子溟溟鸿蒙滋分岁起摄提元气启肇郭象庄子注暖焉若阳春之自和故蒙泽者不谢凄乎若秋霜之自降故凋落者不怨太白谢荣怨落二语本此殷仲文诗四运虽鳞次吕向注四运四时也广雅曰御谓之羲和淮南子百姓曼衍于荒淫之陂而失其大宗之本刘勰新论蔓衍於荒淫之波留连於是非之境淮南子鲁阳公与韩构战酣日暮援戈而挥之日为之反三舍郭璞诗媿无鲁阳德日向三舍书仲虺之诰矫诬上天贾谊过秦论囊括四海之意淮南子大块载我以形高诱注大块天地之间也庄子大不同于溟溟司马彪曰溟溟自然元气也张衡灵宪太素之前幽清玄静寂寞冥默不可为象厥中惟灵厥外惟无如是者永久焉斯谓溟溟盖乃道之根也葛洪枕中书二仪未分溟溟鸿蒙未有成形天地日月未具状如鸡子混沌玄黄 隈音近威汨音骨溟音茗溟音悻】塞上曲【按乐府诗集王僧?技録相和歌瑟调三十八曲中皆有塞上曲】

严风吹霜海草凋筋干精坚边马骄汉家战士三十万将军兼领【一作谁者】霍嫖姚流星白羽腰间插剑花秋莲光出匣天兵照雪下玉关羽箭如沙射金甲云龙风虎尽【一作尽】

交回太白入月敌可摧敌可摧旄头灭壮士投戈同?血策名丹霄上扬威紫塞旁武功成汉道昌【初学记梁元帝纂要曰冬风曰严风周礼凡为弓冬析干而春液角夏治筋秋合三材韵会骄马壮貌汉书武帝元光二年遣五将军三十万衆伏马邑下欲袭单于单于觉之而去汉书霍去病善骑射再从大将军大将军受诏予壮士为票姚校尉与轻勇骑八百直奔大将军数百里赴利斩捕首虏过当服?注票姚音飘摇顔师古曰票音频妙反姚音羊召反票姚劲疾之貌也荀悦汉纪作票鹞字去病後为栗骑将军尚取票姚之字耳今读者音飘摇则不当其义也按唐人诗中用嫖姚字者多从服音不从顔说即杜工部亦然不独太白是诗矣上林赋弯繁弱满白羽文颖注以白羽饰箭故言白羽也扬雄长杨赋天兵四临李善注天兵言兵威之盛如天也汉书地理志敦煌郡龙勒县有玉门关史记正义括地志曰玉门关在沙州壽昌县西北一百十八里元和郡县志玉门关在瓜州晋昌县东二十里一统志玉门关在陕西故瓜州西北十八里汉霍去病破走月支开玉门关班超在西域上书愿生入玉门关即此云龙风虎皆阵名李卫公问对太宗曰天地风云龙虎鸟蛇斯八阵何义也靖曰古人秘藏此法故诡说八名於八阵本一也旧注引周易云从龙凤从虎之文恐于诗义未当後汉书永平十五年十一月乙丑太白入月中为大将戮晋书凡五星入月岁其野有逐相太白将戮元帝太兴三年十二月巳未太白入月在斗成帝咸康元年二月乙未太白入月六年二月乙未太白入月其占又皆另有所主俱未尝为摧敌之兆太白斯语其别有所据欤汉书昂曰旄头胡星也淮南子白刃合流矢接涉血履肠輿死扶伤古今注秦筑长城土色皆紫汉塞亦然故称紫塞焉】陛下之壽三千霜但歌大风云飞扬安用猛士兮守四方【汉高祖歌诗大风起兮云飞扬威加海内兮归故乡安得猛士兮守四方苏子由讥此诗末三句为不达理萧士贇曰诗至汉道昌一篇之意已定一本云无此三句者是也使苏子由见之必不肯轻致不识理之诮矣东坡云今太白集有悲来乎笑已乎赠怀素草书数诗决非太白之作盖唐末五代间齐己辈诗也仆亦曰此诗末後三句安知非此辈所增乎致使太白贻讥于数百载之後惜哉今遂删去後人具正法眼藏者必蒙赏音後人録此诗者悉删去後三句盖多从萧本也琦按酉阳杂俎云禄山反太白制胡无人言太白入月敌可摧及禄山死太白蚀月萧氏注从之谓此诗必作於上元间据太史之占而言今考唐书天文志初未尝有太白入月之事而萧妄引上元元年三年月掩昂之文以当之误矣玩天兵照雪下玉关之句当是开元天宝之间为征讨四夷而作庶几近是】

北风行【鲍照有北风行伤北风雨雪行人不归太白拟之而作】

烛龙栖寒门光耀犹旦开日月照之何不及此【一作日月之赐不及此】惟有北风号怒天上来燕山雪花大如席片片吹落轩辕台幽州思妇十二月停歌罢笑双蛾摧倚门望行人念君长城苦寒良可哀别时提剑救边去遗此虎文金鞞鞞中有一【萧本作二】双白羽箭蜘蛛结网生尘埃箭空在人今战死不复回不忍见此物焚之已成【一作以为】灰黄河捧土尚可塞北风雨雪恨难裁【一作哉淮南子烛龙在雁门北蔽於委羽之山不见日其神人面龙身而无足高诱注龙衔烛以照太陰盖长千里视为昼暝为夜吹为冬呼为夏又淮南子北方曰北极之山曰寒门高诱注积寒所在故曰寒门太平寰宇记燕山在蓟州渔阳县东南七十里一统志燕山在蓟州玉田县西北二十五里自西山一带迤 东来延袤数百里抵海崖然诗家用燕山字?举燕地之山犹秦山楚山之类不专指一山也直隶名胜志轩辕台在保安

州西南界之乔山上山海经云大荒内有轩辕台射者不敢西向畏轩辕故也唐之幽州又谓之范阳郡属河北道鞞当作鞞为是韵会鞞盛箭室子虚赋作步又北史突厥传帝取桃竹白羽箭一枝以赐射匱後汉书朱浮传此犹河滨之人捧土以塞孟津多见其不知量也鞞音丙鞞音步鞞音差】

侠客行

赵客缦胡缨吴钩霜雪明银鞍照白马飒沓如流星十步杀一人千里不留行事了拂衣去深藏身与名闲过信陵饮脱劒膝前【一作上】横将炙啖朱亥持觞劝侯嬴三杯吐然诺五岳倒为轻眼花耳热後意气素霓生救赵挥金槌邯鄲先震惊千秋二壮士烜【繆本作烜】赫大梁城纵死【萧本作使】侠骨香不慙世上英谁能书阁【萧本作合】下白首太玄经【庄子赵太子曰吾王所见剑士皆蓬头突鬓垂冠缦胡之缨短後之衣司马彪曰曼胡之缨谓粗纓无文理也鲍照诗锦带佩吴钩李周翰注吴钩钩类头少曲梦溪笔谈吴钩刀名也刃弯今南蛮用之谓之葛党刀辛延年诗银鞍何煜爚杜笃论都赋军如流星庄子臣之剑十步一人千里不留行司马彪曰十步与一人相击辄杀之故千里不留于行也韵会将奉也賁也持也丘迟诗丈夫吐然诺受命本遗家张华轻薄篇三雅来何迟耳热眼中花张华壮士篇慷慨成素霓嘯咤起清风史记魏公子无忌者魏昭王少子而魏安厘王异母弟也安厘王即位封公子为信陵君魏有隐士曰侯嬴年七十家贫为大梁夷门监者公子闻之往请欲厚遗之不肯受公子于是乃置酒大会宾客坐定公子从车骑虚左自迎侯生至家引侯生坐上坐徧赞宾客宾客皆惊于是罢酒侯生遂为上客侯生谓公子曰屠者朱亥此子贤者世莫能知故隐屠间耳公子数往请之朱亥故不复谢魏安厘王二十年秦已破赵长平军又进兵围邯鄲魏王使将军晋鄙将十万衆救赵秦王使使告魏王曰吾攻赵旦暮且下诸侯敢救者已拔赵必移兵先击之魏王恐使人止晋鄙留军壁邺名为救赵实持两端以观望公子数请魏王及宾客辩士说王万端魏王畏秦终不听公子侯生曰嬴闻晋鄙之兵符常在王卧内而如姬最幸出入王卧内力能窃之嬴闻如姬父为人所杀如姬为公子泣公子使客斩其仇头敬进如姬如姬之欲为公子死无所辞公子诚一开口请如姬如姬必许诺则得虎符夺晋鄙军北救赵而西却秦此五霸之伐也公子从其计请如姬如姬果盗晋鄙兵符与公子侯生曰将在外主令有所不受以便国家公子即合符而晋鄙不授公子兵而复请之事必危矣臣客屠者朱亥可与俱此人力士晋鄙听大善不听可使击之于是公子请朱亥朱亥笑曰臣乃市井鼓刀屠者而公子亲数存之所以不报谢者以为小礼无所用今公子有急此乃臣效命之秋也遂与公子俱至邺矫魏王令代晋鄙晋鄙合符疑之欲无听朱亥袖四十斤铁椎椎杀晋鄙公子遂将晋鄙军进兵击秦军秦军解去遂救邯鄲存赵韵会烜赫明照貌又云烜光明也诗赫兮烜兮注宣着貌一曰有威仪貌通作烜礼记引诗赫兮烜兮又作喧琦按後汉书张让传有威形言赫之语諠赫烜赫皆倒用赫烜字以成文耳字虽异而义则一也张华游侠曲生从命子游死闻侠骨香李密诗寄言世上英虚生良可愧扬雄草太玄经及校书天禄阁详见二卷注缦音慢邯音寒】

李太白集注卷三

卷四

钦定四库全书

李太白集注卷四

钱塘 王琦 撰

乐府三十七首

关山月【乐府古题要解关山月伤离别也萧士贇曰关山月者乐府鼓角横吹十五曲之一王褒诗云无复汉地关山月】

明月出天山苍茫云海间长风几万里吹度玉门关汉下白登道胡窥青海湾由来征战地不见有人还戍客望边色【一作邑】思归多苦颜高楼当此夜叹息未应闲【一作还 汉书贰师将军与右贤王战於天山晋灼注天山在西域近蒲类国去长安八千余里颜师古注天山即祁连山也匈奴谓天为祁连今鲜卑语尚然輿地广记伊州伊吾县有天山胡人呼为折漫罗山每过之皆下马拜一名雪山北边备对天山即祁连山也又名时漫罗山又名祁漫罗山盖虏语谓祁连也时漫罗也祁漫罗也皆天也通典元和志於张掖县既着祁连山矣而伊西庭三州皆有此山则是自甘张掖而西至於庭州相去三千五六百里而天山皆能周徧其地则此山亦广长矣月出於东而天山在西今日明月出天山盖自征夫而言已过天山之西而回首东望则俨然见明月出於天山之外也陆机诗长风万里举玉门关详见前卷注汉书匈奴引兵南踰句注攻太原至晋阳下高帝自将兵往击之会冬大寒雨雪卒之堕指者十二三於是冒顿阳败走诱汉兵汉兵逐击冒顿冒顿匿其精兵见其羸弱於是汉悉兵三十二万北逐之高帝先至平城步兵未尽到冒顿纵精兵三十余万骑围高帝於白登七日汉兵中外不得相救饷颜师古注白登在平城东南去平城十余里輿地广记云州云中县有白登山匈奴围汉高祖於此周书吐谷浑治伏侯城在青海西十五里青海周围千余里建德五年其国大乱高祖诏皇太子征之军渡青海至伏侯城夸吕遁去虏其余衆而还一统志西海在陕西西宁卫城西三百余里海方数百里一名卑禾羌海俗呼青海潜确居类书洮州卫有青海在洮水之西周围千里中有小山隋将段文振西征逐虏於青海即此琦按青海隋时属吐谷浑唐高宗时为吐蕃所据仪凤中李敬元开元中王君?张景顺崔希逸皇甫惟明王忠嗣先後与吐蕃攻战皆近其地相去不远】

独漉篇【萧士贇曰独漉篇即拂舞歌五曲中之独禄篇也特太白集中禄字作漉字其间命意造辞亦模仿规拟但古词为父报仇太白言为国雪耻耳古词曰独禄独禄水深泥浊泥浊尚可水深杀我嗢嗢双雁游戏田畔我欲射雁念子孤散翩翩浮萍得风遥轻我心何合与之同并空牀低帟谁知无人夜衣锦绣谁别伪真刀鸣鞘中倚牀无施父冤不报欲活何为猛虎斑斑游戏山间虎欲杀人不避豪贤琦按乐府诸书亦有引古词作独鹿者亦有作独漉者是禄鹿漉古者通用非始於太白也】

独漉水中泥水浊不见月不见月尚可水深行人没【右为一解刘履曰独漉疑地名琦按上谷郡涿州有地名独鹿一名浊鹿者是也又小网名罍?荀子作独鹿成相篇曰恐爲子胥身离凶进谏不听到而独鹿弃之江杨倞注国语曰鸟兽成水虫孕水虞於是乎禁罍?贾云罍?小罍也或谓此未可知】越鸟从南来胡雁【萧本作鹰】亦北度【萧本作渡】我欲弯弓向天射惜其中道失归路【右为二解】落叶别树飘零随风客无所托悲与此同【右为三解】罗帷舒卷似有人开明月直入无心可猜【右为四解】雄劒挂壁时时龙鸣不断犀象绣【缪本作羞】澁苔生国耻未雪何由成名【右为五解梁简文帝七励拭龙泉之雄劒莹魏国之宝刀拾遗记帝颞顼有曳影之剑腾空而舒若四方有兵此剑则飞起指其方则剋伐未用之时常於匣里如龙虎之吟曹植七启步光之劒华藻繁缛陆断犀象未足称?李周翰注言劒之利也犀象之兽其皮坚晋书国耻未雪夙夜忧愤】神鹰梦泽不顾鸱鸢爲君一击鹏抔【缪本作?鹏】九天【右为六解太平广记楚文王好猎有人献一鹰王见其殊常故为猎於云梦之泽毛羣羽族争噬共搏此鹰瞪目远瞻云际俄有一物鲜白不辨其鹰竦翮而升矗若飞电须臾羽堕如雪血下如雨良久有大鸟坠地其两翅广十余里喙边有黄衆莫能知时有博物君子曰此大鹏雏也出幽明录萧士贇曰此比兴之意谓士之用世当为国雪耻立大功以成名如神鹰之不顾凡鸟而但擊九天之鹏也 琦按此诗依约古辞当分六解解各一意峰断云连似离似合其体固如是也若强作一意释去更无是处】登高丘而望远海【此题旧无传闻郭茂倩乐府诗集编是诗於相和曲中魏文帝登山而远望一篇之後疑太白拟此也然文意却不类】

登高丘望远海六鳌骨已霜三山流安在扶桑半摧折白日沉光彩银台金阙如梦中秦皇汉武空相待精卫费木石鼃鼃无所凭君不见骊山茂陵尽灰灭牧羊之子来攀登盗贼劫宝玉精灵竟何能穷兵黩武今如此鼎湖飞龙安可乘【列子渤海之东不知几亿万里有大壑焉实惟无底之谷其中有五山焉一曰岱舆二曰员峤三曰方壶四曰瀛洲五曰蓬莱五山之根无所连着常随潮波上下往还不得暂峙焉仙圣毒之诉之於帝帝恐流於西极失羣圣之居乃命禺疆使巨鳌十五举首而戴之迭为三番六万岁一交焉五山始峙而龙伯之国有大人举足不盈数步而暨五山之所一钓而连六鳌合负而趋归其国灼其骨以数焉於是岱舆员峤二山流於北极沉於大海仙圣之播迁者巨亿计山海经汤谷上有扶桑十日所浴在黑齿北居水中有大木九日居下枝一日居上枝江淹别赋日下壁而沉彩张衡思玄赋聘王母於银台注云银台王母所居史记自威宣燕昭使人入海求蓬莱方丈瀛洲此三神山者其传在渤海中去人不远患且至则船风引而去盖尝有至者仙人及不死之药皆在焉其物禽兽尽白而黄金银为宫阙未至望之如云及到三神山反居水下临之风辄引去终莫能至云及至秦始皇并天下至海上则方士言之不可胜数始皇自以为至海上而恐不及矣使人乃齎童女入海求之船交海中皆以风为解曰未能至望见之焉今天子遣方士入海求蓬莱安期生之属居久之求蓬莱安期生莫能得精卫鸟常衔西山木石以湮东海洋见大鹏赋注竹书纪年穆王三十七年大起九师东至於九江架鼃鼃以为梁遂伐越至于紆精卫二句盖言海之深广非木石可填而鼃鼃为梁之说亦虚而无所凭据以明三山之必不可到也汉书秦皇帝葬於骊山之阿下锢三泉上崇山坟其高五十余丈周回五里有余石椁为游馆人膏为灯烛水银为江海黄金为鳧雁珍宝之藏机械之变棺槨之丽宫馆之盛不可胜原又多杀宫人生埋工匠计以万数天下苦其役而反之骊山之作未成而周章百万之师至其下矣项籍燔

其宫室营宇往者咸见发掘其後牧儿亡羊羊入其菑牧者持火照求羊失火烧其藏椁汉武外传元狩二年二月丁卯帝崩三月葬茂陵北齐书终自灰灭晋书汉天子即位一年而为陵天下供赋三分之一供宗庙一供宾客一充山陵汉武帝享年久长比葬而茂陵不复容物其树皆已可拱赤眉取陵中物不能减半於今犹有朽帛委积金玉未尽三国志陆抗传穷兵黷武动费万计抱朴子黄帝於荆山之下鼎湖之中飞九开成乃乘龙登天也】

阳春歌【宋吴迈远作阳春歌梁沈约作阳春曲此诗似拟之而作】

长安白日照春空绿杨结烟桑【一作垂】袅风披香殿前花始红流芳发色绣户中绣户中相经过飞燕皇后轻身舞紫宫夫人絶世歌圣君三万六千日岁岁年年奈乐何【三辅黄图未央宫有披香殿雍录庆善宫有披香殿鲍照诗文窗绣户垂罗幕赵后外传飞燕缘主家大人得入宫召幸自此特幸号赵皇后独异志赵飞燕身轻能为掌上舞西京赋正紫宫於未央薛综注天有紫微宫王者象之李善注辛氏三秦记曰未央宫一名紫微宫然未央为总称紫宫其中别名汉书孝武李夫人本以倡进初夫人兄延年性知音善歌舞武帝爱之延年侍上起舞歌曰北方有佳人絶世而独立一顾倾人城再顾倾人国宁不知倾城与倾国佳人难再得上叹息曰世岂有此人乎平阳主因言延年有女弟上乃召见之实妙丽善舞由是得幸】

杨叛儿【通典杨叛儿本童謡也齐隆昌时女巫之子曰杨旻少随母入内及长为太后所宠童謡云杨婆儿共戏来而歌语讹遂成杨叛儿】

君歌杨叛儿妾劝新丰酒何许最关人乌啼白门柳乌啼隐杨花君醉留妾家博山炉中沉香火双烟一气凌紫霞【梁元帝诗试酌新丰酒遥劝阳台人宋书宣阳门民间谓之白门胡三省通监注白门建康城西门也西方色白故以为称古杨叛由暂出白门前杨柳可藏乌欢作沉水香依作博山炉吕大临考古图按汉朝故事诸王出阁则炷博山香炉晋东宫旧事曰太子服用则有博山香炉一云炉象海中博山下有盘贮汤使润气蒸香以象海之回环此器世多有之形制大小不一南方草木状交趾有蜜香树干似桤柳其花白而繁其叶如橘欲取香伐之经年其根干枝节各有别色也木心与节坚黑沉水者为沉香法苑珠林南州异物志曰沉水香出日南欲取当先斫坏树着地积久外自朽烂其心至坚者置水则沉名曰沉香杨升庵曰古杨叛曲仅二十字太白衍之为四十四字而乐府之妙思益显隐语益彰其笔力似乌获扛龙文之鼎其精光似光弼领子仪之军矣书曰葛伯仇饷非孟子解之後人不知仇饷为何语沉水博山之句非太白以双烟一气解之乐府之妙亦隐矣】

双燕离【初学记琴历曰琴曲有双燕离】

双燕复双燕双飞令人羡玉楼珠阁不独栖金窗绣户长相见栢梁失火去因入吴王宫吴宫又焚荡雒尽巢亦空憔悴一身在孀雌忆故雄双飞难再得伤我寸心中【张超灵帝河间旧庐碑金窗郁律玉壁内璫汉武内传太初元年十一月巳酉天火烧栢梁台三辅黄图栢梁台武帝元鼎二年春起此台在长安城中北阙内三辅旧事云以香栢为梁也太初中台灾太平御覽吴地记曰春申君都吴宫加巧饰春申君死吏照燕窟失火遂焚沈约诗可怜桂树枝单

雄忆故雌列女传夜半悲鸣想其故雄】

山人劝酒【此题未详所始而乐府诗集编太白是作入琴曲歌辞中】

苍苍云松落落绮皓春风尔来为阿谁胡蝶忽然满芳草秀眉霜雪颜桃花【繆本作桃花貌】骨青髓绿【繆本作青髓绿髮】长美好称是秦时避世人劝酒相欢不知老各守麋【一作兔】鹿志耻随龙虎争?起佐【一作安】太子汉皇乃复惊顾谓戚夫人彼翁羽翼成归来商山下泛若云无情举觞酌巢由洗耳何独【一作太】清浩歌望嵩岳意气还【一作遥】相倾【史记上欲废太子立戚夫人子赵王如意吕后恐留侯为画计曰上不能致者天下有四人四人者年老矣皆以为上慢侮人故逃匿山中义不为汉臣然上高此四人今诚能无爱金玉璧帛令太子为书卑辞安车因使辩士固请宜来来以为客时时从入朝令上见之则必异而问之上知此四人贤则一助也於是吕后令吕泽使人奉太子书卑辞厚礼迎此四人十二年上疾益甚愈欲易太子及燕置酒太子侍四人从太子年皆八十有余须眉皓白衣冠甚伟上怪之问曰彼何为者四人前对各言姓名曰东园公角里先生绮里季夏黄公上大惊曰吾求公数岁公避逃我今公何自从吾儿游乎四人皆曰陛下轻士善骂臣等义不受辱故恐而亡匿窃闻太子为人仁孝恭敬爱士天下莫不延颈欲为太子死者故臣等来耳上曰烦公幸卒调护太子四人为寿已毕趋去上目送之召戚夫人指示四人曰我欲易之彼四人辅之羽翼已成难动矣吕后真而主矣戚夫人泣上曰为我楚舞我为若楚歌歌曰鸿鹄高飞一举千里羽翮已就横绝四海横绝四海当可奈何虽有矰缴尚安所施歌数阕戚夫人嘘唏流涕上起去罢酒竟不易太子者留侯本招此四人之力也路史园公绮里季夏黄公角里先生代之所谓四皓者遭秦苛政避地商之蓝田山中汉高招之以皇帝善慢士不至迫帝为戚姬故欲易太子高后以留侯计致之太子以定四老人之力也去勿复见後俱葬於安陵三国志龐统传向者之论阿谁为失古诗不知贻阿谁後汉书郑玄秀眉明目容仪温伟神仙传鲁女生絕谷八十余年日少壮色如桃花黄庭内景经骨青筋赤髓如霜阮籍诗自非王子晋谁能长美好陶潜诗丈夫志四海我愿不知老张华诗龙虎方交争七国并抗衡北史陛下不以刘裕起纳其贡使韵会?暴起也通典商州上洛县有商山亦名地肺山亦名楚山四皓所隐通监地理通释商山在商州商洛县南一里广韵酌以酒沃地也李善文选注琴操曰尧大许由之志禅为天子由以其言不善乃临河而洗耳李陵诗曰许由不洗耳後世有何徵魏子曰昔者许由之立身也恬然守志存已不甘禄位洗耳不受帝尧之让谦退之高也益都耆旧传秦宓对王商曰昔尧优许由非不弘也洗其两耳皇甫谧逸士传曰巢父者尧时隐人也及尧让位乎许由也由以告巢父焉巢父责由曰汝何不隐汝光见若身扬若名令闻若汝非吾友也乃擎其膺而下之由怅然不自得乃过清泠之水洗其耳皇甫谧高士传曰巢父闻许由之为尧所让也以为污乃临池水而洗耳譙周古史考曰许由尧时人也隐箕山恬泊养性无欲於世尧礼待之终不肯就时人高其无欲遂崇大之曰尧将以天下让许由由耻闻之乃洗其耳或曰又有巢父与许由同志或云许由夏常居巢故一号巢父不可知也凡书传言许由则多言巢父者少矣范曄後汉书严子陵谓光武曰昔唐尧着德巢父洗耳士各有志何至相迫乎书传之说洗耳参差不同楚词临风怀兮浩歌刘良注浩大也初学记嵩高山者五岳之中岳也南有许由山高大四絕其北有颍水尧聘许由其处犹有坛墀鲍照诗握君手执杯酒意气相倾死何有萧士贇曰太白盖为明皇欲废太子瑛有感而作是诗时卢鸿王希夷隐居嵩山李元

恺吴筠之徒皆以隐逸称或召至阙庭或遣问政事徒尔高谈未有能如四皓之一言而太子得不易也末句曰浩歌望嵩岳意气还相倾深不满於当时嵩岳之隐者欤琦按此诗大意美四皓当暴秦之际能避世隐居及汉有天下虽一出而辅佐太子乃功成身退曾不系情爵位真可以希风巢许者矣箕山颍水是二子洗耳盘桓之地俱在嵩山故望之而慨焉生慕巢由如在意气可以相倾此正尚友古人之意初无讥评独清之说明皇一证其见左矣
?许勿切音近旭或音忽酌音类】

于阗采花【胡震亨曰于阗采花陈隋时曲名本辞云山川虽异所草木尚同春亦如溱洧地自有采花人太白则借明妃陷虏伤君子不逢明时为谗妬所蔽贤不肖易置无可辨盖亦以自寓意焉汉书西域传于阗国王治西城去长安九千六百七十里周书于阗国在葱岭之北二百余里东去长安七千七百里 阗音田】

于阗采花人自言花相似明妃一朝西入胡胡中美女多羞死乃知汉地多明姝胡中无花可方比丹青能令丑者妍无盐翻在深宫里自古妒蛾眉胡沙埋皓齿【西京杂记元帝後宫既多不得常见乃使画工图其形按图召幸之诸宫人皆赂画工多者十万少者亦不减五万独昭君不肯遂不得见後匈奴入朝求美人为阏氏於是上按图以昭君行及去召见貌为後宫第一善应对举止闲雅帝悔之而名籍已定重失信於外国故不复更人乃穷案其事画工皆弃市籍其家资皆巨万野客丛书晋文帝诤昭以昭君为明妃新序齐有妇人极丑无双号曰无盐女其为人也臼头深目长指大节昂鼻结喉肥项少髮折腰出胸皮肤若漆行年三十无所容人街嫁不售流弃莫执於是乃拂拭短褐自诣宣王谓谒者曰妾齐之不售女也闻君王之圣德愿备後宫之扫除顿首司马门外唯王幸许之谒者以闻宣王方置酒於渐台召而见之无盐女扬目衔齿举手拊肘曰殆哉殆哉如此者四宣王曰愿遂闻命无盐女对曰今大王之君国也西有衡秦之患南有强楚之讐外有三国之难内聚奸臣衆人不附春秋四十壮男不立一旦山陵崩弛社稷不定此一殆也渐台五重黄金白玉琅玕龙疏翡翠珠玑莫落连饰万民疲极此二殆也贤者伏匿於山林谄谀强於左右邪伪立於本朝諫者不得通入此三殆也酒浆流湎以夜续朝女乐俳优纵横大笑外不修诸侯之礼内不秉国家之治此四殆也故曰殆哉殆哉宣王喟然而叹曰痛乎无盐君之言吾今乃一闻寡人之殆几不全於是立停渐台罢女乐退谄谀去雕琢选兵马实府库四辟公门招进直言延及侧陋择吉日立太子进慈母拜无盐君为王后而国大安者丑女之力也吕覽靡曼皓齿高诱注皓齿诗所谓齿如瓠?者也琦按昭君事本是画工丑图其形以致不得召见太白则谓丹青能令丑者妍无盐翻在深宫里熟事化新精采一变真所谓圣於诗者也 姝音枢】

鞠歌行【陆机鞠歌行序按汉宫阁有含章鞠室灵芝鞠室後汉马防第宅下临道连阁通池鞠城弥於街路鞠歌将谓此也又东阿王诗连骑擊壤或谓蹙鞠乎三言七言虽奇宝名器不遇知己终不见重愿逢知己以托意焉按乐府诗集王僧?伎录平调有七曲其七曰鞠歌行】

玉不自言如桃李鱼目笑之卞和耻楚国青蝇何太多连城白璧遭谗毁荆山长号泣血人忠臣死为刖足鬼听曲知甯戚夷吾因小妻秦穆五羊皮买死百里奚洗拂青云上当时贱如泥朝歌鼓刀叟虎变磻溪中一举钓六合遂荒营丘东平生渭水曲谁识【一作数】此老翁奈

何今之人双目送飞鸿【史记桃李不言下自成蹊张协诗鱼目笑明月新序荆人卞和得玉璞而献之荆厉王使玉尹相之曰石也王以和为谩而断其左足厉王薨武王即位和复奉玉璞而献之武王使玉尹相之曰石也又以为谩而断其右足武王薨共王即位和乃奉玉璞而哭於荆山中三日三夜泣尽而继之以血共王闻之使人问之曰天下之刑者衆矣子刑何哭之怨也对曰宝玉而名之曰石贞士而戮之以谩此臣之所以悲也共王乃使人理其璞而得宝焉故名之曰和氏之璧诗小雅营营青蝇止於樊岂弟君子无信谗言郑笺曰蝇之为虫污白使黑污黑使白喻佞人双乱善恶也史记赵惠文王得楚和氏璧秦昭王闻之使人遗赵王书愿以十五城易璧後人所谓连城之价正指此事列女传甯戚欲见桓公道无从乃为人仆将车宿齐东门之外桓公因出甯戚擊牛角而商歌甚悲桓公异之使管仲迎之甯戚称曰浩浩乎白水管仲不知所谓不朝五日而有忧色其妾倩进曰君不朝五日而有忧色敢问国家之事耶君之谋也管仲曰昔日公使我迎甯戚甯戚曰浩浩乎白水吾不知其所谓是故忧之其妾笑曰人已语君矣君不知知识耶古有白水之诗诗不云乎浩浩白水儵儵之鱼君来召我我将安居国家未定从我焉如此甯戚之欲得仕国家也管仲大悦以报桓公桓公乃修官府斋戒五日见甯子因以为相齐国以治吕氏春秋百里奚之未遇时也亡虢而虏虞饭牛於秦传鬻以五羊之皮公孙枝得而悦之献诸穆公三日请属事焉穆公曰买之五羊之皮而属事焉无乃天下笑乎公孙枝对曰信贤而任之君之明也让贤而任之臣之忠也君为明君臣为忠臣彼信贤境内将服敌国且畏夫谁暇笑乎穆公遂用之谋无不当举必有功史记范睢传不意君能自致於青云之上楚词吕望之鼓刀兮遭周文而得举王逸注鼓鸣也言太公避纣居东海之滨闻文王作兴盍往归之至朝歌道穷困自鼓刀而屠遂西钓於渭滨文王梦得圣人於是出猎而见之遂载以归用以为师宋书文王将田史编卜之曰将大获非熊非罴天遗汝师以佐昌臣太祖史畴为禹卜畋得臯陶其兆如此王至磻溪之水吕尚钓於涯王下趋拜曰望公七年乃今见光景於斯尚立变名荅曰望钓得玉璜其文要曰姬受命昌来提撰尔雒钤报在齐诗鲁颂遂荒大东毛萁传荒有也史记武王已平商而王天下封师尚父於齐营丘正义曰括地志云管丘在青州临淄北百步外城中史记卫灵公与孔子语见蜚雁仰视之色不在孔子孔子遂行双目送飞鸿正用其事以喻不好贤之意萧士贇曰太白此词始伤士之遭谗废弃中羨昔贤之遇合有时末则叹今人不能如古人之识士亦聊以自况云尔】

幽涧泉【乐府诗集以此首入琴曲歌辞中】

拂彼白石弹吾素琴幽涧愀兮流泉深善手明徽高张清心寂历似千古松飕飕兮万寻中见愁猿吊影而危处兮叫秋木而长吟客有哀时失职【一作志】而听者泪淋浪以沾襟乃缉商缀羽潺湲成音吾但写声发情【缪本作愤】於妙指殊不知此曲之古今幽涧泉鸣深林【韵会琴节日徽乐书作暉云琴之为乐弦合声以作主徽分律以配臣古徽十有三象十二月其一象閏用螺蚌为之近代用金玉瑟瑟水精等宝以示明莹顔延年诗高张生絶弦声急由调起李善注物理论曰琴欲高张瑟欲下声江淹诗寂历百草晦李善注寂历凋疎貌飕飕风声也江淹山中楚辞风飕飕兮木道寒嵇康琴赋纷淋浪以流离东方朔七谏泣歔歔而沾襟说文潺湲水声张衡归田赋弹五弦之妙指 飕音搜】

王昭君【一作昭君怨】二首【乐府古题要解王昭君旧史王嬙字昭君汉元帝时匈奴入

朝诏以王嫱配之号宁胡阏氏一说汉元帝後宫既多不得常见乃使画工图其形按图召幸宫人皆赂画工多者十万少者亦不减五万昭君自恃容貌独不肯与工人乃丑图之遂不得见及後匈奴入朝选美人配之昭君之图当行及入辞光彩射人悚动左右天子方重失信外国悔恨不及穷究其事画工有杜陵毛延寿安陵陈敞新丰刘白龚寛下杜阳望樊青皆同日弃市籍其资财汉人怜昭君远嫁为作歌诗晋文王诘昭故晋人改为明君石崇有妓曰緑珠善歌舞以此曲教之而自制王明君歌其文悲雅我本汉家子是也按乐府诗集张永元嘉伎録相和歌吟汉四曲其二曰王明君】

汉家秦地月流影照【一作送】明妃一上玉关道天涯去不归汉月还从东海【一作方】出明妃西嫁无来日燕支长寒雪作花蛾眉憔悴没胡沙生乏黄金枉图画死留青塚使人嗟【元和郡县志燕支山一名删丹山在甘州删丹县南五十里东西百余里南北二十里水草茂美与祁连山同杨炎燕支山神寧济公祠堂碑西北之巨镇曰燕支本匈奴王庭汉武纳浑邪开右地置武威张掖而山界二郡间连峰委会云蔚黛起积高之势四面千里太平寰宇记青塚在振武军金河县西北汉王昭君墓在古丰州上草色常青故曰青塚一统志王昭君墓在古丰州西六十里地多白草此塚独青故曰青塚顾寧人曰按史记言匈奴左方主将直上谷以东右方主将直上郡以西而单于之庭直代云中汉书言呼】

【韩邪单于自请留居光禄塞下又言天子遣使送单于出朔方鸡鹿塞後单于竟北归庭乃知汉与匈奴往来之道大抵从云中五原朔方明妃之行亦必出此故江淹之赋李陵但云情往上郡心留雁门而玉关与西域相通自是公主嫁乌孙所经太白诗汉家秦地月流影照明妃一上玉关道天涯去不归误矣顔氏家训谓文章地理必须惬当其论梁简文雁门太守行而言日逐康居大宛月支萧子暉陇头水而云北注黄龙东流白马沈存中论白乐天长恨歌峨眉山下少人行谓峨眉在嘉州非幸蜀路文人之病盖有同者】

其二

昭君拂玉鞍上马啼红颊今日汉宫人明朝胡地妾中山孺子妾歌【乐府诗集汉书曰诏赐中山靖王吟及孺子妾冰未央才人歌诗四篇如淳曰孺子幼少称孺子妾宫人也顔师古曰孺子王妾之有品号者妾王之衆妾也冰其名才人天子内官按此谓以歌诗赐中山王及孺子妾未央才人等耳略言之故云及也而陆厥作歌乃谓之中山孺子妾失之远矣太白是题盖仍陆氏之误也】

中山孺子妾特以色见珍虽【一本下多一然字】不如延年妹亦是当时绝世人桃李出深井花艷惊上春一贵复一贱关天岂由身芙蓉老秋霜团扇羞网尘戚姬髡髮【繆本作翦】入春市万古共悲辛【李延年妹事已见本卷阳春歌注深井即今庭中天井是周礼太府职云上春衅宝龟及宝器郑玄注上春孟春也汉书一贵一贱北史事乃关天汉书高祖得定陶戚姬爱幸生赵王如意高祖崩惠帝立吕后为皇太后乃令永巷囚戚夫人髡钳衣赭衣令春戚夫人春且歌曰子为王母为虏终日春薄暮常与死为伍相离三千里当谁使告汝】

荆州歌【唐时荆州隶山南东道领江陵枝江当阳长林石首松滋公安荆门八县天宝元年改为江陵郡】

白帝城边足风波瞿塘五月谁敢过荆州麦熟茧成蛾缲丝忆君头绪多拨谷飞鸣奈妾何【通典夔州奉节县有白帝城按唐之奉节县即汉之鱼复县也王莽时公孙述据蜀有白龙出殿前井中述以为瑞自称白帝更号鱼复曰白帝城刘先主改曰永安官即其地在夔州府城东山上初学记荆州图记曰白帝城西临大江东南高二百丈西北高一千丈水经注广溪峡中有瞿塘黄龙二滩夏水洄复沿泝所忌太平寰宇记瞿塘峡在夔州东一里古西陵峡也连崖千丈奔流电激舟人为之恐惧本草陈藏器曰布谷鵲也江东呼为获谷亦曰郭公北人名拨谷似鵲长尾牡牝飞鸣以翼相摩挲】

设辟邪伎鼓吹雉子班曲辞【雉子班乐府解题曰古词云雉子高飞止黄鹄飞之以千里雄来飞从雌视盖取首二字以命名也若梁简文帝妒场时向陇则竟全篇咏雉矣宋何承天有雉子游原泽篇则言避世之士抗志云霄视卿相功名犹冰炭之不相入太白此诗盖拟何氏而作又乐府诗集古今乐录曰梁三朝乐第四十一设辟邪伎鼓吹作雉子班曲引去来辟邪兽名孟康汉书注桃拔一名符拔似鹿长尾一角者或为天鹿两角者或为辟邪辟邪伎者盖假为辟邪兽之形而舞者也】

辟邪伎作鼓吹惊雉子班之奏曲成喔咿振迅欲飞鸣扇锦翼雄风生双雌同饮啄馐悍谁能争乍向草中耿介死不求黄金笼下生天地至广大何惜遂物情善卷让天子务光亦逃名所贵旷士怀朗然合太清【韩诗外传翾翾十步之雀喔咿而笑之鲍照舞鹤赋振迅腾摧西京赋馐悍馐豁李善文选注薛君韩诗章句曰雉耿介之鸟也礼记正义或谓雉鸟耿介被人所获必自屈折其头而死庄子舜以天下让善卷善卷曰予立于宇宙之中冬日衣皮毛夏日衣葛絺春耕种形足以劳动秋收敛身足以休食日出而作日入而息逍遥於天地之间而心意自得吾何以天下为哉悲夫子之不知予也遂不受於是去而入深山莫知其处汤伐桀剋之让务光曰智者谋之武者遂之仁者居之古之道也吾子胡不立乎务光曰废上非义也杀民非仁也人犯其难我享其利非廉也吾闻之曰非其义者不受其禄无道之世不践其土况尊我乎吾不忍久见也乃负石而自沉於庐水鲍照诗安知旷士怀 馐音跷】

相逢行【乐府诗集相逢行一曰相逢狭路间行亦曰长安有狭邪行乐府解题曰古词文意与鸡鸣曲同】

相逢红尘内高揖黄金鞭万户垂杨里君家阿那边【西都赋红尘四合烟云相连傅縡诗本珍白玉鐙因饰黄金鞭陆机诗皎皎彼姝女阿那当轩织吕向注阿那柔顺貌】

古有所思【萧本作古有所思行 宋书汉鼓吹铙歌十八曲有有所思曲乐府古题要解有所思其词大略言有所思乃在大海南何用问遗君双珠璚瑁簪闻君有他心烧之当风扬其灰从今已往勿复相思而与君绝也若齐王融如何有所思梁刘绘别离安可再但言离思而已】

我思仙【一作佳】人乃在碧【许本作北】海之东隅海寒多天风白波连山【一作天】倒蓬壶长鲸喷涌不可涉抚心茫茫泪如珠西来青鸟东飞去愿寄一书谢麻姑【十洲记东海之东登岸一万里东复有碧海广狭浩汗与东海等水既不咸苦正作碧色甘香味美木华海赋波如连山拾遗记蓬壶蓬莱也陆厥李夫人及贵人歌洞房明月夜对此泪如珠汉武帝故事七月七日上於承华殿斋正中忽有一青鸟从西方来集殿前上问东方朔朔曰此西王母欲来也有顷王母至有二青鸟如乌夹侍王母旁神仙传王远遣人召麻姑麻姑至是好女子年可十八九许於顶上作髻余髮散垂至腰衣有文采而非锦绮光彩耀目不可名状】

久别离【胡震亨曰江淹拟古始有古别离後乃有长别离生别离等名此久别离及远别离皆自为之名其源则出於古别离也】

别来几春未还家玉窗五见樱桃花况有锦字书开缄使【一作令】人嗟至【缪本无至字】此肠断彼心绝云鬢緑鬢罢梳【缪本作揽】结愁如回飈乱白雪去年寄书报阳台今年寄书重相催东风兮东风【缪本作胡为乎东风】为我吹行云使西来待来竟不来落花寂寂委青苔【本草樱桃树不甚高春初开白花繁英如雪说文鬢总髮也亦谓之髻谢灵运诗回飈流轻雪回飈回旋之风也阳台行云俱见二卷注 缄音兼飈音标】白头吟【西京杂记司马相如将茂陵人女为妾卓文君作白头吟以自绝相如乃止词曰皤如山上雪皎若云中月闻君有两意故来相诀绝今日斗酒会明日沟水头蹀躞御沟上沟水东西流凄凄重凄凄嫁娶不须啼愿得一心人白头不相离】

锦水东北流波荡双鸳鸯雄巢汉宫树雌弄秦草芳寧同万死碎绮翼不忍云间两分张【华阳国志锦江织锦濯其中则鲜明濯他江则不好一统志二江一名汶江一名流江经成都府城南七里蜀守李冰既凿离堆又开二渠一渠由永康过新繁入成都谓之外江一渠由永康过郫入成都谓之内江蜀人以此水濯锦鲜明故又名锦江古今注鸳鸯水鸟鳬类也雌雄未尝相离人得其一则一思而至死故曰匹鸟魏书彭城王传在南百口生死分张分张犹分离也】此时阿娇正娇妒独坐长门愁日暮但愿君恩顾妾深岂惜黄金买词赋相如作赋得黄金丈夫好新多异心一朝将聘茂陵女文君因赠【一作赋】白头吟东流不作西归水落花辞条羞故林【阿娇汉武帝陈皇后之小字见本卷後注司马相如长门赋序孝武皇帝陈皇后时得幸颇妒别在长门宫愁闷悲思闻蜀郡成都司马相如天下工为文奉黄金百斤为相如文君取酒因於解悲愁之词而相如为文以悟主上皇后复得亲幸傅玄苦相篇玉颜随年变丈夫多好新子夜歌不见东流水何时复西归】兔丝故【萧本作固】无情随风任倾倒谁使女萝枝而来强萦抱两草犹一心人心不如草莫卷龙须席从他生网丝且留琥珀枕或有梦来时覆水再收岂满杯弃妾已去难重回去来【缪本作时】得意不相负祇今惟见青陵台【尔雅翼女萝兔丝其实二物也然皆附木上释草云唐蒙女萝女萝兔丝郭曰别四名则是谓一物矣广雅云女萝松萝也菟丘菟丝也则是两物陆玕亦云今兔丝蔓连草上生黄赤如金药中兔丝子是也非松萝松萝自蔓松上生枝正青与兔丝迥异以予考之诚然今女萝正青而细长无杂蔓故山鬼章云被薜荔兮带女萝萝青而长如带也何与兔丝事然两者皆附木或当有时相蔓古乐府云南山冪冪兔丝花北陵青青女萝树由来花叶同一心今日枝条分两处唐乐府亦云兔丝故无情随风任倾倒谁使女萝枝而来强萦抱两草犹一心人

心不如草则古今多疑其为二物者博物志魏文帝所记诸物相似乱者女萝寄生兔丝兔丝寄生木上根不着地然则女萝有寄生兔丝上者释草女萝兔丝或亦此义耳长乐佳古词玉枕龙须席郎眠何处牀胡三省通监注龙须席以龙须草织成今淮上安庆府居人多能织龙须席西京杂记赵飞燕女弟遗飞燕琥珀枕太平御覽广雅曰琥珀珠也生地中其上及旁不生草浅者四五尺深者八九尺大如斛削去皮成琥珀初时如桃胶凝坚乃成其方人以为枕出博南县後汉书覆水不收宜深思之独异志搜神记曰宋康王以韩朋妻美而夺之使朋筑青陵台然後杀之其妻请临丧遂投身而死王命分埋台左右期年各生一梓树及大树枝条相交有二鸟哀鸣其上因号之曰相思树太平寰宇记河南道济州郛城县有青陵台郡国志云宋王纳韩凭之妻使凭运土筑青陵台至今台迹依约一统志青陵台在开封府封丘县界宋康王欲夺其舍人韩凭之妻乃筑台望之凭妻作诗曰南山有鸟北山张罗鸟自高飞罗当奈何遂自缢死】

其二【萧士贇曰按此篇出入前篇语意多同或谓初本云】

锦水东流碧波荡双鸳鸯雄巢汉宫树雌弄秦草芳相如去蜀谒武帝赤车驷马生辉光一朝再览大人作万乘忽欲凌云翔闻道阿娇失恩宠千金买赋要君王【华阳国志司马相如初入长安题市门曰不乘赤车驷马不过汝下也史记司马相如见上好仙道因曰上林之事未足美也尚有靡者臣尝为大人赋未就请具而奏之相如以为列仙之传居山泽间形容甚此非帝王之仙意也乃遂就大人赋相如既奏大人之颂天子大悦飘飘有凌云之气似游天地之间意】相如不忆贫贱日位【繆本作官】高金多聘私室茂陵姝子皆见求文君欢爱从此毕泪如双泉水行堕紫罗襟五起鸡三唱清晨白头吟长吁不整绿云鬟仰诉青天哀怨深城崩杞梁妻谁道土无心东流不作西归水落花辞枝羞故林【史记苏秦笑谓其嫂曰何前倨而後恭也嫂曰见季子位高金多也太平御覽尸子曰孝已一夕五起视亲衣之厚薄枕之高下此用其字以言寝不安席之意旧注解作五更而起者恐非是古今注杞梁妻杞植妻妹明月所作也杞植战死妻叹曰上则无父中则无夫下则无子生人之苦至矣乃抗声长哭杞都城感之而颓遂投水而死其妹悲其姐之贞操乃为作歌名曰杞梁妻焉梁植字也论衡传书言杞梁之妻向城而哭城为之崩言杞梁从军不还其妻痛之向城而哭至诚悲痛精气动城故城为之崩也夫言向城而哭者实也城为之崩者虚也城土也无心腹之藏安能为悲哭感动而崩太白土无心句似借其言而反之用古若此左右逢源非圣於诗者不能 姝音枢】头上玉燕钗是妾嫁时物赠君表相思罗袖幸时拂莫卷龙须席从他生网丝且留琥珀枕还有梦来时鸂鶒裘在锦屏上自君一挂无由【一作人】披妾有秦楼镜照心胜照井愿持照新人双对可怜影【述异记汉武帝元鼎元年起招灵阁有神女留一玉钗与帝帝以赐赵婕妤至昭帝元凤中宫人见此钗光莹甚异共谋欲碎之明视钗匣惟见白燕直升天去後宫人作玉钗因名玉燕钗西京杂记司马相如初与卓文君还成都居贫愁懣以所着鸂鶒裘就市人杨昌贳酒与文君为欢西京杂记咸阳宫有方镜广四尺高五尺九寸表里有明人直来照之影则倒见以手扪心而来则见肠胃五臟历然无碍人有疾病在内掩心而照之则知病之所在又女子有邪心则胆张心动始皇常以照宫人胆张心动者杀之汤僧济诗昔日媚家女摘花露井边摘花还自插照井还自怜】覆水却收不满杯相如还谢文君回古来得意不相负祇今惟有青陵台

采莲曲【采莲曲起梁武帝父子後人多拟之】

若耶溪旁采莲女笑隔荷花共人语日照新粧水底明风飘香袂【缪本作袖】空中举岸上谁家游冶郎三三五五暎垂杨紫骝嘶入落花去见此踟蹰空断肠【太平寰宇记若耶溪在越州会稽县东南二十八里一统志若耶溪在绍兴府城南二十五里西施采莲於此古孟珠曲道逢游冶郎恨不早相识郑玄毛诗笺赤身黑鬣曰骝南史帝赐羊侃河南国紫骝嘶音西】

临江王节士歌【汉书艺文志有临江王及愁思节士歌诗四篇宋陆厥作临江王节士歌盖误合而为一也太白此题殆仍其失者欤】

洞庭白波木叶稀燕鸿【缪本作鴈】始入吴云飞吴云寒燕鸿【缪本作鴈】苦风号沙宿潇湘浦节士悲【缪本作感】秋泪如雨白日当天心照之可以事明主壮士【一作气】愤雄【一作寒】风生安得倚天劒跨海斩长鲸【楚辞洞庭波兮木叶下宋玉大言赋长劒耿耿倚天外梁元帝玄览赋戮滔天之封豕斩横海之长鲸】

司马将军歌【原注代陇上健儿陈安健十六国春秋陈安善於抚绥吉凶夷险与衆共之及其死陇上人思之为作壮士之歌曰陇上建士有陈安躯干虽小腹中寛爱养将士同心肝騄骧骏马铁锻鞍七尺宝刀配齐环丈八蛇矛左右盘十荡十决无当前百骑俱出如云浮追者千万骑悠悠战始三交失蛇矛十骑俱荡九骑留弃我騄骧窜岩幽大雨降後追者休为我外援而悬头西河之水东河流阿呵呜呼奈子何阿呵呜呼奈子何刘曜闻而嘉伤於是命乐府歌之】

狂风吹古月窃弄章华台北落明星动光彩南征猛将如云雷【一作南方有事将军来】手中电曳【一作曳电萧本作电撃】倚天劒直斩长鲸海水开我见楼船壮心目颇似龙骧下三蜀扬兵习战张虎旗江中白浪如银屋身居玉帐临河魁紫髯若戟冠崔嵬细柳开营揖天子始知灞上为婴孩羌笛横吹阿鞞回向月楼中吹落梅将军自起舞长劒壮士呼声动九垓功成献凯见明主丹青画像麒麟台【十六国春秋新平王雕为太史令言於苻坚曰谨按讖云古月之末乱中州洪水大起健西流惟有雄子定九州九域志江陵府有章华台图经云楚灵王与伍举登章华之台是也梦溪笔谈楚章华台亳州城父县陈州商水县荊州江陵县长林县复州监利县皆有之据左传楚灵王七年成章华之台与诸侯落之杜预注章华台在华容城中华容即今之监利县非岳州之华容也至今有章华故台在县郭中与杜预之说相符亳州城父县有乾谿其侧亦有章华台故基台下往往得人骨云楚灵王战死於此商水县章华之侧亦有乾谿薛综注张衡东京赋引左氏传乃云楚子成章华之台於乾谿皆误说也左传实无此文甘氏星经北落师门一星在羽林军西主候兵星明大而角军兵安小暗天下兵晋书天文志北落师门一星在羽林西南北者宿在北方也落天之藩落也师衆也师门犹军门也长安城北门曰北落门以象此也主非常以候兵有星守之虜入塞中兵起李陵报苏武书猛将如云倚天劒斩长鲸俱见前首注通典楼船船上建楼三重列女墙战格树旛帜开弩宪矛穴置抛车垒石铁汁状如城垒忽遇暴风人力不能制此亦非便於事然为水军不可不

设以成形势晋书王濬为益州刺史武帝谋伐吴诏濬修舟舰濬乃大作船连舫方百二十步受二千余人以水为城起楼橹开四出门其上皆得驰马往来又画鷁首怪兽於船首以惧江神舟楫之盛自古未有寻以謠言拜濬为龙骧将军监益梁诸军事太康元年濬自发蜀兵不血刃攻无坚城夏口武昌无相支抗於是顺流鼓棹径造三山左思蜀都赋三蜀之豪刘逵注三蜀蜀郡广汉犍为也本一蜀国汉高祖分置广汉汉武帝分置犍为周礼熊虎为旗抱朴子兵在太乙玉帐之中不可攻也云谷杂记艺文志有玉帐经一卷乃兵家压胜之方位谓主将於其方置军帐则坚不可犯犹玉帐然其法出於黄帝遁甲以月建前三位取之如正月建寅则巳为玉帐主将宜居之李太白司马将军歌云身居玉帐临河魁戎为河魁谓主将之帐宜在戌也非深识其法者不能为此语三国志注献帝春秋曰张辽问吴降人向有紫髯将军长上短下便马善射是谁降人曰是孙会稽南史褚彦回传君须髯如戟楚辞冠切云之崔嵬王逸注崔嵬高貌史记文帝後六年匈奴大入边乃以刘礼为将军军灊上徐厉为将军军棘门周亚夫为将军军细柳以备胡上自劳军至灊上及棘门军直驰入将以下骑送迎已而之细柳军军吏士被甲锐兵刃彀弓矢持满天子先驱至不得入先驱曰天子且至军门都尉曰曰将军令曰军中闻将军令不闻天子之诏居无何上至又不得入乃使使持节诏将军吾欲入劳军亚夫乃传言开壁门壁门士吏谓从属车骑曰将军约军中不得驱驰天子乃按辔徐行至营亚夫持兵揖曰介冑之士不拜请以军礼见天子为动改容式车使人称谢皇帝敬劳将军成礼而去既出军门羣臣皆惊文帝曰此真将军矣曩者灊上及棘门军若儿戏耳其将固可袭而虏也至於亚夫可得而犯耶文献通考羌笛五孔陈乐书曰马融赋笛以为出於羌中旧制四孔而已京房因加一孔以备五音风俗通汉武时丘仲作尺四寸笛後更名羌笛焉杨升庵外集阿鞞回番曲名即阿滥堆也番曲本无字祇以声传故随中国所书人各不同难以意求琦按唐诗纪事骊宫小禽名阿滥堆明皇御玉笛采其声翻为曲且名焉远近以笛争效之张佑华清宫诗红树萧萧阁半开玉皇曾幸此宫来至今风俗骊山下村笛犹吹阿滥堆据此则阿滥堆非番曲也又鞞字丁可切读作多上声据杨说当作旦声读字书皆无之俱未详是否乐府杂录笛羌乐也古有落梅花曲汉书楚战士无不一当十呼声动天地封禅书上畅九垓服?注垓重也天有九重旧唐书凯乐鼓吹之歌曲也周官大司乐王师大献则奏凯乐注云献功之乐也又大司马之职师有功则凯献於社注云兵乐曰凯司马法曰得意则凯乐所以示喜也汉书甘露三年单于始入朝上思股肱之美乃图画其人於麒麟阁署其官爵姓名唯霍光不名曰大司马大将军博陆侯姓霍氏次曰卫将军富平侯张安世次曰车骑将军龙额侯韩增次曰後将军营平侯赵充国次曰丞相高平侯魏相次曰丞相博阳侯丙吉次曰御史大夫建平侯杜延年次曰宗正阳城侯刘德次曰少府梁丘贺次曰太子太傅萧望之次曰典属国苏武皆有功德知名当世是以表而扬之明着中兴辅佐列於方叔召虎仲山甫焉张晏注武帝获麒麟时作此阁图画其象於阁故以为名琦按通监乾元二年九月襄州乱将张延嘉袭破荊州据之此诗当是是时所作故有狂风吹古月窃弄章华台之句延嘉疑亦蕃将否则故安史部下之降兵也其时邻郡多发兵为备故太白又有九日登巴陵置酒望洞庭水军诗此诗所谓江中楼船其即洞庭之水军欤 垓音该】

君道曲【太白自注梁之雅歌有五章今作一章按乐府诗集古今乐录曰梁有雅歌五曲一曰应王受图曲二曰臣道曲三曰积恶篇四曰积善篇五曰宴酒篇无君道曲疑太白拟作者即应王受图曲琦谓非也盖後人讹臣字为君字耳】

大君若天覆广运无不至轩后爪牙常先太山稽如心之使臂小白鸿翼於夷吾刘葛鱼水本无二土扶【萧本作校】可成墙积德为厚地【汉书陛下圣德天覆子爱海内国语广运百里韦昭注东西为广南北为运移书备位方伯为国爪牙章怀太子注爪牙以猛兽为喻言为国之扞卫也诗曰祈父予王之爪牙也史记黄帝举风后力牧常先大鸿以治民淮南子黄帝治天下而力牧太山稽辅之高诱注力牧太山稽黄帝师汉书如身之使臂臂之使指莫不制从管子桓公在位管仲隰朋见立有间有二鸿飞而过之桓公叹曰仲父今彼鸿鹄有时而南有时而北有时而往有时而来四方无远所欲至而至焉非唯有羽翼之故是以能通其意於天下乎管仲隰朋不对桓公曰二子何故不对管子曰君有霸王之心而夷吾非霸王之臣也是以不敢对桓公曰寡人之有仲父也犹飞鸿之有羽翼也仲父不一言教寡人寡人之有耳将安闻道而得度哉华阳国志先主与诸葛亮情好日密自以为犹鱼得水也北齐书尉景曰土相扶为墙人相扶为王淮南子山为积德高诱注仁山万物生焉故为积德】

结鞶子【北魏温子昇有结鞶子诗疑是当时曲名乐府诗集引文王张释之结鞶事为解非也然太白之作与子昇原作辞旨又复不同】

燕南壮士吴门豪筑中置铅鱼隐刀感君恩重许君命太山一掷轻鸿毛【史记秦灭燕太子丹荆轲之客皆亡高渐离变姓名为人佣保匿作於宋子使擊筑而歌客无不流涕而去者闻於秦始皇秦始皇召见人有识者乃曰高渐离也秦皇帝惜其善擊筑重赦之乃矐其目使擊筑未尝不称善稍益近之高渐离乃以铅置筑中复进得近举筑扑秦皇帝不中於是遂诛高渐离又史记伍子胥知公子光之欲杀吴王僚乃进专诸於公子光光伏甲士於窟室中而具酒请王僚王僚使兵陈自宫至光之家门户阶陛左右皆王僚之亲戚也夹立侍皆持长铍酒既酣公子光佯为足疾入窟室中使专诸置匕首鱼炙之腹中而进之既至王前专诸擘鱼因以匕首刺王僚王僚乃死左右亦杀专诸燕丹子烈士之节死有重於太山有轻於鸿毛者但问用之所在耳筑音竹】

结客少年场行【乐府古题要解结客少年场行言轻生重义慷慨以立功名也萧士贇曰结客少年场取曹植诗结客少年场报怨洛北邙为题始自鲍照】

紫燕黄金瞳啾啾【一作棱棱】摇緑平明相驰逐结客洛门东少年学劒术凌轹白猿公珠袍曳锦带匕首插吴鸿由来万夫勇挟此生【缪本作英】雄风托交从剧孟买醉入新丰笑尽一杯酒杀人都市中羞道易水寒从【一作徒】今日贯虹燕丹事不立虚没秦帝宫武阳死灰人安可与成功【刘劭赵郡赋其良马则飞兔奚斯常骊紫燕丰鬣确颅龙身鹄颈目如黄金兰筋参精山海经有文马縞身朱鬣目若黄金楚辞鸣玉鸾之啾啾王逸注啾啾鸣声汉书先平明鲍照诗车马相驰逐宾朋好容华汉书灌夫传轹轹宗室侵犯骨肉顔师古注轹轹谓蹈践之也後汉书帝以朱浮陵轹同列章怀太子注陵轹犹欺蔑也吴越春秋越有处女出於南林越王使使聘之问以劒戟之术处女北行见於王道逢一翁自称曰袁公问处女吾闻子善劒愿一见之女曰妾不敢有所隐唯公试之於是袁公即杖箴箬竹竹枝上颡桥末堕地女即接末袁公则飞上树变为白猿搜神记以一珠袍与之艺文类聚通俗文曰匕首属其头类匕故曰匕首短而使用吴越春秋阖闾命於国中作金钩令曰能善为钩者赏之百金吴

作钩者甚衆有人贪王之重赏也杀其二子以血衅金遂成二钩献於闾阖诣宫门而求赏王曰为钩者衆而子独求赏何以异於衆夫子之钩乎作钩者曰吾之作钩也贪而杀二子衅成二钩王乃举衆钩以视之何者是也王钩甚多形体相类不知其所在於是钩师向钩而呼二子之名吴鸿扈稽我在於此王不知汝之神也声绝於口两钩俱飞着父之胸吴王大惊曰寡人诚负於子乃赏百金遂服而不离身史记剧孟以任侠显行大类朱家而好博多年少之戏李善文选注三辅旧事曰太上皇不乐关中思慕乡里高祖徙丰沛屠儿酤酒煮饼商人立为新丰左延年诗杀人都市中邀我都巷西燕丹子荆轲与武阳入秦秦王陛戟而见燕使既鼓钟并发武阳大恐面如死灰色余详恨赋注
啾即油切酒平声 音宗辄音历匕音彼剧音极】

长干行二首【刘逵吴都赋注建邺南五里有山冈其间平地吏民杂居号长干中有大长干小长干皆相连大长干在越城东小长干在越城西地有长短故号大小长干韩诗曰考盘在干地下而广曰干方輿胜览建康府有长干里去上元县五里李白长干行所谓同居长干里乃秣陵县东里巷江东谓山壠之间曰干景定建康志长干里在秦淮南】

妾髮初覆额折花门前剧郎骑竹马来遶牀弄青梅同居长干里两小无嫌猜十四为君妇羞顔未尝开低头向暗壁千唤不一回十五始展眉愿同尘与灰常存抱柱信岂【一作耻】上望夫台十六君远行瞿塘滪堆五月不可触猿声天上哀门前迟【一作旧】行迹一一生緑【一作苍】苔苔深不能扫落叶秋风早八月胡蝶来【一作黄】双飞西园草感此伤妾心坐愁红颜老早晚上三巴预将书报家相迎不道远直至长风沙【剧戏也尘与灰言其合同而无分也史记尾生与女子期於梁下女子不至水至不去抱柱而死苏栾城集望夫台在忠州南数十里南史巴东有淫预石高出水二十余丈及秋水至才如见焉次有瞿塘大滩行旅忌之淫预石即滪堆也一统志瞿塘在夔州府城东旧名西陵峡乃三峡之门两崖对峙中贯一江滪堆当其口太平寰宇记滪堆周回二十丈在夔州西南二百步蜀江中心瞿塘峡口冬水浅屹然露百余尺夏水涨没数十丈其状如马舟人不敢进谚曰滪堆大如马瞿塘不可下滪堆大如鳖瞿塘行舟絶滪堆大如龟瞿塘不可窥滪堆大如襍瞿塘不可触又曰犹与言舟子取途不决水脉故犹与也蜀外纪瞿塘即峡内江水深浚处滪堆乃一石笋树两峡之中若青螺盘於波中宝剑插於镜面江总诗自悲行处緑苔生何悟啼多红粉落杨升庵谓胡蝶或黑或白或五彩皆具惟黄色一种至秋乃多盖感金气也引太白八月胡蝶黄之句以为深中物理而评今本来字为浅琦谓以文义论之终以来字为长鲍照诗安能行叹复坐愁华阳国志献帝初平元年征东中郎将安汉赵颖建议分巴为三郡颖欲得巴旧名故白益州牧刘璋以垫江以上为巴郡江南龐羲为太守治安汉以江州至临江为永寧郡胸忍至鱼复为固陵郡巴遂分矣建安六年鱼复蹇胤白璋争巴名璋乃改永寧为巴郡以固陵为巴东徙龐羲为巴西太守是为三巴小学紺珠三巴巴郡今重庆府巴东今夔州巴西今合州太平寰宇记长风沙在舒州怀寧县东一百九十里置在江界以防寇盗李白长干行云相迎不道远直至长风沙即其处也陆游入蜀记太白长干行云早晚上三巴预将书报家相迎不道远直至长风沙盖自金陵至长风沙七百里而室家来迎其夫甚言其远也地属舒州旧最湍险唐诗纪长风沙地名在池州之雁汊下八十里 剧音极】

其二

忆妾【一作昔】深闺里烟尘不曾识嫁与长干人沙头候风色五月南风兴思君下巴陵八月西风起想君发扬子去来悲如何见少别离【萧本作离别】多湘潭几日到妾梦越风波昨夜狂风度吹折江头树森森暗无边行人在何处好乘浮云骢佳期兰渚东鸳鸯绿蒲上翡翠锦屏中【缪本作北客至王公朱衣满汀中日暮来投宿数朝不肯东又至一作真汀一作江又好乘浮云骢佳期兰渚东一作北客浮云骢经过新市中】自怜十五余颜色桃花【一作李】红那作商人妇愁水复愁风【唐时巴陵郡本巴州也武德六年更名岳州属江南西道图经扬子江在真州扬子县左与镇江分界江南志扬子江发源岷山合湘漠豫章诸水绕江宁府城之西南经西北至镇江始名为扬子江东流入海元和郡县志潭州有湘潭县东北至州一百四里西京杂记文帝有良马九匹皆天下之骏马也一名浮云庾抱诗枿上浮云骢本出吴门中楚辞与佳期兮夕张曹植诗朝发鸾台夕宿兰渚说文翡赤羽雀也翠青羽雀也出郁林禽经注翡翠状如鸕鶿而色正碧鲜缛可爱饮喙於澄澜回渊之侧尤惜其羽日濯於水中异物志翠鸟形如燕赤而雄曰翡青而雌曰翠其羽可以饰帷帐此篇唐诗纪事以为张朝作而自昨夜狂风度以下断为二首黄山谷则以为李益作未知孰是山谷之言曰太白集中长干行二篇妾髮初覆额真太白作也忆妾深闺里李益尚书作所谓痴妒尚书李十郎者也辞意亦清丽可喜乱之太白诗中亦不甚远大儒曾子固判定亦不能别也太白豪放人中凤凰麒麟譬如生富贵人虽醉饱瞑暗呻吟中作无义语终不作寒乞声耳今太白诗中谬入他人作者略有十之二三欲删正者当以吾言考之 森音藐渚音主翡音费】

古朗月行【鲍照有朗月行疑始於照】

小时不识月呼作白玉盘又疑瑶台镜飞在【一作上】青【萧本作白】云端仙人垂两足桂树何【一作作】团团【缪本作团圆】白兔捣药成问言与谁【萧本作谁与】餐蟾蜍蚀圆影大【一作天】明夜已残羿昔落九乌天人清且安陰精此沦惑去去不足观忧来其如何凄【缪本作恻】怆摧心肝【应劭汉官仪封禅坛有白玉盘初学记虞喜安天论曰俗传月中仙人桂树今视其初生见仙人之足渐已成形桂树後生傅玄拟天问月中何有白兔捣药蟾蜍蚀月详见二卷注曹植诗圆影光未满木华海赋大明总轡於金枢之穴李善注大明月也楚辞章句淮南言尧时十日并出草木焦枯尧令羿仰射十日中其九日日中九乌皆死堕其羽翼张衡灵宪月者陰精之宗春秋元命苞陰精为月欧阳建诗痛酷摧心肝】

上之回【按宋书汉鼓吹铙歌十八曲中有上之回乐府古题要解上之回汉武帝元封初因至雍遂通回中道後数游幸焉其歌称帝游石关望诸国月支臣匈奴服皆美当时事也】

三十六离宫楼台与天通阁道步行月美人愁烟空恩疎宠不及桃李伤春风淫乐意何极金舆向回中万乘出黄道千骑扬彩虹前军细柳北後骑甘泉东岂问渭川老寧邀襄野童但慕【一作秋暮】瑶池宴归来乐未穷【西都赋离宫别馆三十六所章怀太子注三辅黄图曰上林有建章承光等一十一宫平乐蜚观等二十五馆凡三十六所与天通极言其高与天相近也西京赋阁道穹窿吕向注阁道飞陛也沈约诗腾盖隐奔星低銮避行月史记人体安驾

乘为之金輿错衡以繁其饰汉书元封四年冬十月行幸雍祠五畤通回中道应劭曰回中在安定高平有险阻萧关在其北又史记正义括地志云秦回中宫在岐州雍县西四十里太平寰宇记回中宫在凤翔府天兴县西宋之问诗器声引扬闻黄道王气周回入紫宸萧士贇曰前汉天文志曰有中道中道者黄道也日君象故天子所行之道亦曰黄道魏文帝诗丹霞蔽日彩霞垂天汉书注细柳服?曰在长安西北如淳曰长安图细柳仓在渭北近石徼张揖曰在昆明池南今有柳市是也三辅黄图关辅记林光宫一曰甘泉宫秦所造在今池阳县西故甘泉山宫以山为名宫周匝十余里汉武帝建元中增广之周十九里去长安三百里望见长安城黄帝以来圜丘祭天处遁甲开山图云云阳先生之墟也梁简文帝上之回云前旆拂回中後车隅桂宫太白盖用其句法史记吕尚盖尝穷困年老矣以鱼钓干周西伯西伯将出猎卜之曰所获非龙非虬非虎非罴所获霸王之辅於是周西伯猎果遇太公於渭之阳与语大悦曰自吾先君太公曰当有圣人适周周以兴子真是耶吾太公望子久矣故号之曰太公望载与俱归立为师庄子黄帝将见大隗乎具茨之山至於襄城之野七圣皆迷无所问途适遇牧马童子问途焉曰若知具茨之山乎曰然若知大隗之所存乎曰然黄帝曰异哉小童非徒知具茨之山又知大隗之所存请问为天下小童曰予少而自游於六合之内予适有瞽病有长者教予曰若乘日之车而游於襄城之野今予病稍痊予又且复游於六合之外夫为天下亦若此而已矣又奚事哉黄帝再拜稽首称天师而退梁简文帝诗聊驱式道侯无劳襄野童列子周穆王升崑仑之丘遂宾於西王母觴於瑶池之上萧士贇曰诗言汉武巡幸回中不过溺志於神仙之事岂为求贤哉明皇亦好神仙此其讽谏之作欤】

独不见【乐府古题要解独不见言思而不得见也胡震亨曰梁柳惔本辞奉帚长信宫谁知独不见唐人拟者多用独不见三字】

白马谁家子黄龙边塞儿天山三丈雪岂是远行时春蕙忽秋草莎鸡鸣曲【萧本作西】池风催【萧本作摧】寒梭【一作?许本作稷】响月入霜闺悲忆与君别年种桃齐蛾眉桃今百余尺花落成枯枝终然独不见流泪空自知【曹植诗白马饰金羁连翩西北驰借问谁家子幽并游侠儿水经注白狼水又北径黄龙城东十三州志曰辽东属国都尉治昌黎道有黄龙亭者也魏营州刺史治魏氏土地记曰黄龙城西南有白狼河东北流附城东北下即是也新唐书北狄列传契丹逃潢水之南黄龙之北又云室韦契丹别种地据黄龙北傍猺越河直京师东北七千里太平寰宇记天山一名白山今名折罗漫山在伊州伊吾县北一百二十里西河旧事云天山最高冬夏有雪故曰雪山山中有好木铁匈奴谓之天山过之皆下马拜在蒲类海东百里即汉贰师击右贤王处尔雅翼蕙大抵似兰花亦春开兰先而蕙继之皆柔荑其端作花兰一蕙一花蕙一蕙五六花香次於兰陆玕草木疏莎鸡如蝗而斑色毛翅数重其翅正赤或谓之天鸡六月中飞而振羽索索作声幽州谓之蒲错尔雅翼莎鸡其状头小而羽大有青褐两种率以六月振羽作声连夜札札不止其声如纺丝之声故一名梭鸡一名络纬一名蟋蟀促织谓其鸣声如急织也络纬谓其鸣声如纺纬也又曰促织一名促机络纬一名纺纬其言促织如急织络纬如纺纬是矣但蟋蟀与促织是一物莎鸡与络纬是一物不当合而言之耳 塞音赛莎音梭】

白紵辞三首【乐府古题要解白紵歌古辞盛称舞者之美宜及芳时行乐其誉白紵曰质如

轻云色如银制以为袍余作巾袍以光躯巾拂尘按旧史称白紵吴地所出白紵舞本吴舞也梁武帝令沈约改其辞为四时之歌若兰叶参差桃半红即其春歌也】

扬清歌【一作音】发皓齿北方佳人东邻子且吟白紵停绿水长袖拂面为君起寒云夜卷【缪本作卷】霜海空胡风吹天飘塞鸿玉颜满堂乐未终【嵇康诗微歌发皓齿李延年诗北方有佳人绝世而独立司马相如美人赋臣之东邻有一女子云髮丰艶蛾眉皓齿顔盛色茂景曜光起恒翘翘而相顾欲留臣而共止淮南子手会绿水之趋高诱注绿水舞曲也一曰绿水古诗也沈约白紵辞长袖拂面为君施鲍照诗霜高落塞鸿按鲍照白紵辞朱唇动素袖举洛阳少年邯郸女古称绿水今白紵催弦急管为君舞穷秋九月荷叶黄北风驱雁天雨霜夜长酒多乐未央太白此篇句法盖全拟之萧本以馆娃日落歌吹蒙一句续作末句便不相类今从古本】

其二

馆娃日落歌吹深月寒江【胡本作天】清夜沉沉美人一笑千黄金垂罗舞縠扬哀音郢中白雪且莫吟子夜吴歌动君心动君心冀君赏愿作天池双鸳鸯一朝飞去青云上【太平寰宇记越绝书云吴人於砚石山置馆娃宫刘逵注吴都赋引扬雄方言云吴有馆娃宫吴人呼美女为娃故三都赋云幸乎馆娃之宫中张女乐而宴羣臣今吴县有馆娃乡崔駰七依回眸百万一笑千金广韵縠绢也新序客有歌於郢中为阳春白雪國中属而和者数十人唐书子夜晋曲也娃音哇縠音斛】

其三

吴刀剪彩【一作绮】缝舞衣明粧丽服夺春晖扬眉转袖若雪飞倾城独立世所稀激楚结风醉忘归高堂月落烛已微玉钗挂纓君莫违【鲍照诗吴刀楚制为佩褱长安有狭邪曲丽帐鲜芳春李延年歌北方有佳人绝世而独立一顾倾人城再顾倾人国上林赋鄢郢缤纷激楚结风郭璞注激楚歌曲也列女传曰听激楚之遗风也顔师古注结风亦曲名也史记索隐曰激楚急风也结风回风亦急风也楚地风既自漂疾然歌乐者犹复依激结之急风以为节其乐促迅哀切也司马相如美人赋玉钗挂臣冠罗袖拂臣衣江总诗挂纓银烛下莫笑玉钗长】

鸣鴈行【胡震亨曰鲍照本辞叹鴈之辛苦霜雪太白更叹其遭弹射似为已之逢难寓感观湘吴一语可见】

胡鴈鸣辞燕山昨发委羽朝度关一一衔芦枝南飞散落天地间连行接翼往复还客居烟波寄湘吴凌霜触雪毛体枯畏逢矰缴惊相呼闻弦虚坠良可吁君更弹射何为乎【淮南子北方曰委羽高诱注委羽山名也在北极之陰不见日也谢灵运诗嗷嗷云中鴈举翮自委羽淮南子夫鴈顺风以爱气力衔芦而翔以备矰弋高诱注未秀曰芦已秀曰苇矰矢弋缴衔芦所以令缴不得截其翼也古今注鴈自河北渡江南瘦瘠能高飞不畏缴矰江南沃饶每至还河

北体肥不能高飞恐为虞人所获常衔芦数寸以防矰缴焉一说代山峻鸟飞不越惟有一缺门鴈往来向此缺中过人号曰鴈门山出鴈鴈过鴈多捉而食之鴈欲过皆相待两两相随口中衔芦一枝然後过缺中鴈见芦惧之不敢捉谢惠连雪赋酌湘吴之醇酎郑玄周礼注结缴於矢谓之矰贾公彦疏缴绳也谓结绳於矢以弋射鸟兽史记集解韦昭曰缴弋射也其矢曰矰西都赋矰缴相纒张铄注矰缴箭上加缕而射更羸引弓虚发而下鴈见大猎赋注缴音灼】

妾薄命【乐府古题要解妾薄命曹植日月既逝西藏盖恨宴私之欢不久如梁简文名都多丽质伤良人不返王嫱远聘卢姬嫁迟】

汉帝重【一作宠】阿娇贮之黄金屋咳唾落九天随风生珠玉宠极爱还歇妒深情却疎长门一步地不肯暂回车雨落不上天水覆难再【一作难重一作重难】收君情【一作恩】与妾意各自东西流昔日芙蓉花今成断根【一作素秋】草以色事他人能得几时好【汉武故事武帝数岁长公主抱置膝上问曰儿欲得妇否指左右长御百余人皆曰不用指其女阿娇好否笑对曰好若得阿娇作妇当作金屋贮之长主大悦乃苦要上遂成婚焉立为太子年十四即位长主求欲无厌上患之皇后宠遂衰骄妒滋甚女巫楚服自言有术能令上意回昼夜祭祀合药服之巫着男子衣冠帻带素与皇后寝居相爱若夫妇上闻穷治侍御巫与后诸妖蛊呪诅女而男淫皆伏辜废皇后处长门宫夏侯湛抵疑咳吐成珠玉挥袂出风云裴松之三国志注覆水不可收也鲍照注写水出平地各自东西南北流邵氏见闻後録李太白诗云昔作芙蓉花今为断肠草以色事他人能得几时好按陶弘景仙方注云断肠草不可食其花美好名芙蓉琦按陶弘景仙方注而揆之取义断肠不若断根之当也史记以色事人者色衰而爱弛】

幽州胡马客歌【乐府诗集梁鼓角横吹曲有幽州马客吟即此也胡震亨曰梁鼓角横吹本词言剿儿苦贫又言男女燕游太白则依题立义叙边塞逐虏之事】

幽州胡马客绿眼虎皮冠笑拂两只箭万人不可干弯弓若转月白雁落云端双双掉鞭行游猎向楼兰出门不顾後报国死何难天骄五单于狼戾好凶残牛马散北海割鲜若虎餐虽居燕支山不道朔雪寒妇女马上笑颜如赭玉盘翻飞射鸟兽花月醉雕鞍旄头四光芒争战若【缪本作如】蜂攒白刃洒赤血流沙为之丹名将古谁是疲兵良可叹何时天狼灭父子得安闲【尔雅翼今北方有白鴈似鸿而小色白秋深乃来来则霜降河北谓之霜信本草纲目鴈状似鹅有苍白二色今以白而小者为鴈大者为鸿苍者为野鹅说文掉摇也汉书西域传楼兰王治扞泥城去阳关千六百里去长安六千一百里楼兰国最在东垂近汉当白龙堆乏水草常主发导负水儋粮迎接汉使汉书宣帝纪匈奴虚闾权渠单于子为呼韩邪单于击杀屠耆堂诸王并自立分为五单于更相攻击死者以万数又严助传今闽越王狼戾不仁杀其骨肉离其亲戚顔师古注狼性贪戾凡言狼戾者谓贪而戾也北海匈奴中地名汉书苏武传徙武北海无人处使牧羝又匈奴传单于留郭吉不归迁辱之北海上盖与中国绝远处西都赋割鲜野食孔安国尚书传鸟兽新杀曰鲜燕支山已见本卷王昭君诗下史记?白髦头胡星也正义曰昴一星为髦头胡星六星明与大星等大水且至其兵大起动摇若跳跃者胡兵

大起杨齐贤曰蜂攒犹蜂之聚丛也水经流沙地在张掖居延县东北唐六典注流沙在沙州以北连延数千里裴松之三国志注每一交战血流丹野史记参东有大星曰狼狼角变色多盗贼晋书狼一星在井东南狼为野将主侵掠其色有常不欲动也】

李太白集注卷四

卷五

钦定四库全书

李太白集注卷五

钱塘 王琦 撰

乐府四十四首

门有车马客行【乐府古题要解门有车马客行曹植等皆言问讯其客或得故旧乡里或驾自京师备述市朝迁谢亲戚雕丧之意也乐府诗集王僧?技録相和歌瑟调三十八曲中有门有车马客行】

门有车马宾【一作客】金鞍耀朱轮谓从丹【一作云】霄落乃是故乡亲呼儿扫中堂坐客论悲辛对酒两不饮停觞泪盈巾叹我万里游飘飏【萧本作飘飘】三十春空谈帝【缪本作霸】王略紫绶不挂身雄劒藏玉匣陰符生素尘廓落无所合流离湘水滨借问宗党间多为泉下人生苦百战死托万鬼隣北风扬胡沙埋翳周与秦大运且如此苍穹宁匪仁惻怆竟何道存亡任大钧【汉书杨恽家方隆盛时乘朱轮者十人抱朴子出则朱轮耀路李善文选注东观汉纪曰汉制公侯紫绶九卿青绶後汉书古者君臣佩玉尊卑有度上有韞贵贱有殊佩所以章德服之衷也韞所以执事礼之共也故礼有其度威仪之制三代同之五霸迭兴战兵不息佩非战器韞非兵旗於是解去韞佩留其系璲以为章表韞佩既废秦乃以采组连结於璲光明章表转相结受故谓之绶汉承秦制用而勿改旧唐书二品三品紫绶三彩紫云赤红紫质长一丈六尺一百八十首广八寸战国策苏秦夜发书陈篋数十得太公陰符之谋宋玉九辯廓落兮羈旅而无友生吕延济注廓落空寂也唐六典注湘水出桂州湘源县北流历永衡潭岳四州界入洞庭陆机诗昔居四民宅今托万鬼邻何晏景福殿赋乃大运之伏戾贾谊鵬赋太钧播物如淳注陶者作器於钧上此以造化为大钧也顔师古注今造瓦者谓所转者为钧言造化为人亦犹陶之造瓦耳史记索隐虞喜志林云大钧造化之神钧陶万物品授羣形者也此诗有北风扬胡沙埋翳周与秦之句当是天宝末年两京覆陷之後所作】

君子有所思行【乐府古题要解君子有所思行陆机命驾登北山鲍照西上登雀台沈约晨策终南首其旨言雕室丽色不足为久娱晏安鸩毒满盈所宜敬忌与君子行异】

紫阁连终南青冥天倪色凭崖望咸阳宫阙罗北极万井惊画出九衢如弦直渭水银河清【缪本作清银河】横天流不息朝野盛文物衣冠何翕輳厩马散连山军容威绝域伊臯运元化卫霍输筋力歌钟乐未休荣去老还逼圆光过满缺太阳移中昃不散东海金何争西辉【萧本作何曾西飞】匿无作牛山悲惻怆泪沾臆【太平广记终南山紫阁峯去长安城七十里陕西志紫阁峯在西安府鄠县东南三十里旭日射之烂然而紫其形上耸若楼阁然杜甫诗云紫阁峰陰入渼陂即此是也初学记五经要义云终南山长安南山也一名太一汉书云

太一山古文以为终南山潘岳关中记云其山一名中南言在天之中居都之南故曰中南福地记云其山东接骊山太华西连太白至於陇山北去长安城八十里南入楚塞连属东西诸山周回数百里名曰福地王逸九思增逝兮青冥注云青冥太清也天霓天之边际也详见明堂赋注尔雅北极谓之北辰此以喻天子之居而言宫阙罗列於其中也郑玄周礼注方百里为一同积万井九万夫此借用其字作里巷解鲍照诗九衢平若水杨炯诗官路直如弦雍録唐都本隋都也在汉长安故城东南南直终南山子午谷北据渭水东临滻灞西次泂水三辅黄图引渭水贯都以象天汉横桥南渡以法牵牛初学记天河亦曰银河嵇康琴赋瑶瑾翕桺李善注翕桺盛貌历代名画记玄宗好大马御厰至四十万遂有沛艾大马命王毛仲为监牧使燕公张说作駟牧颂新唐书开元初马二十四万至十三年乃四十三万其後突厥款塞玄宗厚抚之岁许朔方军西受降城为互市以金帛市马於河东朔方左右牧之既杂胡种马益壮天宝後诸军战马动以万计王侯将相外戚牛驼羊马之牧布诸道百倍於县官皆以封邑号名为印自别将校亦备私马议者谓秦汉以来唐马最盛十一载诏二京旁五百里勿置私牧十三载陇右羣牧都使奏马牛驼羊总六十万五千五百而马三十二万五千七百通监唐自武德以来开拓边境地连西域皆置都督府州县开元中置朔方陇右河西安西北庭诸节度使以统之岁发山东丁壮为戍卒繒帛为军资开屯田供糗粮设监牧畜马牛军城戍逻万里相望汉书讨绝域不羁之君系万里难制之虏伊尹臯陶以喻美宰臣卫青霍去病以喻美将帅歌钟歌时所奏之钟见拟恨赋注圆光谓望日之月後汉书日者太阳之精周易日中则昃月盈则食汉书疏广东海兰陵人也为太傅五岁上疏乞骸骨上以其年笃老许之加赐黄金二十斤皇太子赠以五十斤广既归乡里日令家共具设酒食请族人故旧宾客与相娱乐数问其家金余尚有几所趣卖以共具曰此金者圣主所以惠养老臣也故乐与乡党宗族共飧其赐以尽吾余日不亦可乎吴均诗王孙犹未归且听西光匿齐景公游牛山北临其国城而流涕详见二卷注沈约诗那知神伤者潺湲泪沾臆说文臆胸骨也桺音释又音赫怱音昌臆音益】

东海有勇妇【原注代关中有贞女】

按晋书关东有贤女乃鼙舞旧曲五篇之一其辞已亡关中有贞女当是关东有贤女之讹】

梁山感杞妻恻【萧本作痛】哭为之倾金石忽暂开都由激深情东海有勇妇何慙苏子卿学劒越处子超腾【萧本作然】若流星捐躯报夫讎万死不顧生白刃耀素雪苍天感精诚十步两躩【缪本作跳】跃三呼一交兵斩首掉国门蹴踏五藏行豁此伉俪愤粲然大义明北海李使【缪本作史】君飞章奏天庭舍罪警风俗流芳播沧瀛名【缪本作志】在列女籍竹帛已光荣淳于免诏狱漠主为缙索津妾一棹歌脱父於严刑十子若不肖不如一女英豫让斩空衣有心竟无成要离杀庆忌壮夫所素【缪本作素所】轻妻子亦何辜焚之买虚声岂如东海妇事立独扬名【列女传齐杞梁殖之妻庄公袭莒殖战而死无子内外皆无五属之亲既无所归乃枕其夫之尸於城下而哭内诚动人道路过者莫不为之挥涕十日而城为之崩曹植诗乃云杞妻哭死夫梁山为之倾与列女传诸书所载殊异太白用梁山事盖本曹诗也後汉书精诚所加金石为开苏子卿无报讎杀人事以此相拟殊非伦类按曹植精微篇关东有贤女自字苏来卿壮年报父仇身没垂功名是知苏子卿乃苏来卿之误也越有处女出於南林善劒术详见四卷结客少年场注史记瞋目张胆出万死不顧一生之计左传已

不能庇其伉俪而亡之杜预注伉敌也伉耦也孔颖达曰伉俪而亡之相敌之匹耦李邕为北海太守世称李北海所谓北海李使君疑即其人也後汉书遂作飞章以被於臣沧瀛谓东方海隅之地又沧州景城郡瀛州河间郡与青州北海郡相邻近似谓其声名播於旁郡也曹植诗名在壮士籍求自试表名称垂於竹帛吕延济注古无纸史书皆书竹帛陆机诗竹帛无所宣李周翰注竹帛谓史籍也古人书於竹简及素帛汉书齐太仓令淳于公有罪当刑诏狱逮系长安淳于公无男有五女当行会逮骂其女曰生子不生男缓急非有益也其少女缙紫自伤悲泣乃随其父至长安上书曰妾父为吏齐中皆称其廉平今坐法当刑妾伤夫死者不可复生刑者不可复属虽後欲改过自新其道无由也妾愿歿入为官婢以赎父刑罪使得自新书奏天子悲怜其意遂下令除肉刑列女传赵津女涓者赵河津吏之女也赵简子南击楚与津吏期简子至津吏醉卧不能渡简子欲杀之涓曰妾父闻主君来渡不测之水恐风波之起水神动骇故祷九江三淮之神供具备礼御厘受福不胜巫祝杯酌余沥醉至於此君欲杀之妾愿以鄙躯易父之死简子曰非女子之罪也涓曰主君欲因其醉而杀之妾恐其身之不知痛而心不知罪也若不知醉而杀之是杀不辜也愿醒而杀之使知其罪简子曰善遂释不诛简子将渡用楫者少一人涓攘袂操楫而请中流为简子发河激之歌其词曰升彼阿兮而观清水扬波兮杳冥冥祷求福兮醉不醒诛将发兮妾心惊罰既释兮渎乃清妾持楫兮操其维蛟龙助兮主将归呼来渡兮行勿疑简子大悦以为夫人战国策豫让始事范中行氏而不悦去而就智伯智伯宠之及三晋分智氏赵襄子最怨智伯而将其头以为饮器豫让曰士为知己者死女为悦己者容吾知报智氏之讐矣乃为变姓名为刑人入宫涂厕欲以刺襄子襄子如厕心动执问涂者则豫让也刃其扞曰欲为智伯报讐赵襄子曰义士也卒释之豫让又漆身为厉灭须去眉自刑以变其容又吞炭为哑变其音居顷之襄子当出豫让伏所当过桥下襄子至桥而马惊襄子曰此必豫让也使人问之果豫让襄子曰豫子之为智伯名既成矣寡人舍子亦已足矣子自为计使兵环之豫让曰臣闻明主不掩人之义忠臣不爱死以成名今日之事臣故伏诛然愿请君之衣而擊之虽死不恨襄子义之使使者持衣与豫让豫让拔劍三跃呼天击之曰可以报智伯矣遂伏劍而死吴越春秋吴王既杀王僚又虞庆忌之在邻国要离乃与子胥见吴王曰臣国东千里之人细小无力迎风则僵负风则伏大王有命臣敢不尽力大王患庆忌乎臣能杀之王曰庆忌之勇世所闻也今子之力不如也要离曰臣能杀之臣诈以负罪出奔愿王戮臣妻子断臣右手庆忌必信臣矣要离乃诈得罪出奔吴王取其妻子焚弃於市要离奔诸侯而行怨言以无罪闻於天下遂如卫求见庆忌庆忌信其谋拣练士卒遂之吴将渡江於中流要离力微坐於上风因风势以矛鉤其头顺风而刺庆忌庆忌顾而挥之三摔其头於水中乃加於膝上嘻嘻哉天下之勇士也乃敢加兵刃於我左右欲杀之庆忌止之曰此是天下勇士可令还吴以旌其忠於是庆忌死要离渡至江陵愍然不行曰杀吾妻子以事君非仁也为新君而杀故君之子非义也贪生弃行非勇也夫人有三恶以立於世何面目以视天下之士遂投身於江从者出之要离曰吾寧能不死乎乃自断手足伏劍而死掉音窕缙音题紫音茱】

黄葛篇

黄葛生洛溪黄花自绵幂青烟蔓长条缭绕几百尺闺人费素手采缙作絺綌缝为绝国衣远寄日南客苍梧大火落暑服莫轻掷此物虽过时是妾手中迹【葛草延蔓而生引长二三丈

其叶有三尖如枫叶而长面青背淡茎亦青色取其皮沤练作丝以为絺綌谓之黄葛者是取既成絺綌之色而名之以别於蔓草中之白葛紫葛赤葛诸名不致相混耳七八月开花成穗累累相承红紫色古前溪歌黄葛结蒙笼生在洛溪边葛花红紫而此云黄花恐误绵羃密而相覆之意小尔雅葛之精者曰絺粗者曰綌谢惠连诗裁用笥中刀缝为万里衣汉书及使绝国者顔师古注远绝之国谓声教之外汉书地理志苍梧郡武帝元鼎六年开日南郡故秦象郡武帝元鼎六年开更名俱属交州顔师古注日南言其在日之南所谓开北户以向日者旧唐书汉武帝开百越於交趾郡南三千里置日南郡唐时所谓日南郡即驩州也去西京一万二千四百余里去东京一万一千五百余里所谓苍梧郡即梧州也去西京五千五百里去东京五千一百里俱属岭南道诗国风七月流火毛传曰火大火也郑笺曰大火者寒暑之候也火星中而寒暑退朱传曰火大火心星也以六月之昏加於地之南方至七月之昏则下而西流矣末四句即周南葛覃服之无斲意也羃音覓】

白马篇【乐府古题要解白马篇曹植白马饰金羁鲍照白马骅角弓沈约白马紫金鞍皆言边塞征战之状按乐府诗集白马篇是杂曲歌之齐瑟行】

龙马花雪毛【萧本作白】金鞍五陵豪秋霜切玉劒落日明珠袍鬪鸡事万乘轩盖一何高弓摧南【繆本作宜】山虎手接太行【繆本作山】猱酒後竞风采三杯弄宝刀杀人如剪草剧孟同游邀发愤去函谷从军向临洮叱咤经百战【一作万战场】匈奴尽奔逃【一作波涛】归来使酒气未肯拜【一作下】萧曹羞入原宪室荒径【萧本作淫误】隐蓬蒿【周礼马八尺以上为龙梁简文帝诗金鞍照龙马罗袖拂春桑汉书原涉传郡国诸豪及长安五陵诸为节气者皆归慕之顔师古注五陵谓长陵安陵阳陵茂陵平陵也班固西都赋曰南望杜霸北眺五陵是知霸陵杜陵非此五陵之数也而说者以为高祖以下至茂陵为五陵失其本意北堂书钞魏文帝歌辞云欧氏宝劒何为低昂白如积雪利若秋霜淮南子云宝剑之色如秋霜列子周穆王大征西戎西戎献鍔鍔之剑其剑长尺有咫链钢赤刃用之切玉如切泥焉王僧孺诗朔风吹锦带落日映珠袍鬪鸡事详见二卷注中晋书南山白额猛兽为患周处入山射杀猛兽西京杂记李广与兄弟共猎於冥山之北见卧虎焉射之一矢即毙断其髑髅以为枕示服猛也冥山或作宜山所谓宜山虎也曹植诗仰手接飞猱李善注凡物飞迎前射之曰接尸子中黄伯曰予左执太行之猱而右搏雕虎谷梁传孟劳者鲁之宝刀也後汉书杀人如刈草然汉书布衣游侠剧孟郭解之徒驰骛於闾阎权行州域力折公卿衆庶荣其名节觊而慕之史记正义括地志云函谷关在陕州桃林县西南十二里秦函谷关也图记云西去长安四百余里路在谷中故以为名雍録秦函谷关在唐陕州灵宝县南十里灵宝县者汉弘农县也汉函谷关在唐河南府新安县之东一里盖汉世杨仆移秦函谷关而立之於此也以比秦旧则移东三百七十八里自此关移在新安县而秦关之在灵宝者废矣又云自潼关东二百里至陕州灵宝县则秦函谷关也自灵宝县东三百余里至河南新安县则汉函谷关也旧唐书临洮军在鄯州城内管兵万五千人南史檀道济左右腹心并经百战汉书灌夫为人刚直使酒顔师古注使酒因酒而使气也韩诗外传原宪居鲁环堵之室茨以蒿莱蓬户瓮牖桷桑而为枢上漏下湿匡坐而弦歌谢朓诗清淮左长薄荒径隐蒿蓬猱音饶剧音极洮音桃又音叨】

凤笙篇

仙人十五爱吹笙学得崑丘彩凤鸣始闻链气飡金液复道朝天赴玉京玉京迢迢几千里凤笙去去无穷已欲叹离声发绛唇更嗟别调流纤指此时惜别讵堪闻此地相看未忍分重吟真曲和清吹却奏仙歌响绿云绿云紫气向函关访道应寻缙氏山莫学吹笙王子晋一遇浮丘断不还【邢昺尔雅疏崑仑山记云崑仑山一名崑丘鲍照诗淮南王学长生服食链气读仙经神仙传药之上者有九转还丹太乙金液服之皆立登天灵枢金景内经下离尘世上界玉京注云玉京无为之天也三十二帝之都步虚经玉京山在无上天中玉京之上七宝玄台居五亿五万五千五百重天最上顶也枕中书玄都玉京七宝山周围九万里在大罗天之上城上七宝宫宫内七宝台有上中下三宫如一宫城一面二百四十门方生八行宝树绿叶朱实五色芝英上有万二千种芝沼中莲花径度十丈上宫是盘古真人元始天皇太元圣母所治中宫是太上真人金阙老君所治下宫是九天真王三天真王所治玉京有八十一万天路通八十一万山岳洞室夫以得道大圣众并赐其宫第居宅皆七宝宫阙或在名山山岳羣真所居都有八十一万处古今有言九九八十一万终天路玉京山也王勃春思赋狂夫去去无穷已贱妾春眠春未起梁简文帝诗清讴出绛唇陆机诗泠泠纤指弹艺文类聚关令尹内传曰关令尹喜登楼四望见东极有紫气西迈喜曰夫阳气尽九星宿值合岁月并王九日之外应有圣人经过京邑至期乃斋戒其日果见老子元和郡县志缙氏山在河南府缙氏县东南二十九里王子晋得仙处列仙传王子乔者周灵王太子晋也好吹笙作凤凰鸣游伊洛之间遇道士浮丘公接以上嵩高山三十余年後於山上见桓良曰告我家七月七日待我於缙氏山巅至时果乘白鹤至山头望不得举手谢时人数日而去琦按此诗是送一道流应诏入京之作所谓仙人十五爱吹笙正实指其人非泛用古事所谓朝天赴玉京者言其入京朝见非谓其超昇轻举旧注以游仙诗拟之失其旨矣飡与餐同液音亦缙音钩】

怨歌行【自注长安见内人出嫁友人令予代为怨歌行 文选有班婕妤怨歌行即新裂齐素一首也李善注歌录曰怨歌行古辞言古有此曲而班婕妤拟之】

十五入汉宫花颜笑【一作如】春红君王选玉色侍寝金【一作锦】屏中荐枕娇夕月卷衣恋春【一作香】风宁知赵飞燕夺宠恨无穷沉忧能伤人绿鬓成霜蓬一朝不得意世事徒【一作信】为空鸛鸛换美酒舞衣罢雕龙【一作笼】寒苦不忍言为君奏丝桐肠断弦亦绝悲心夜忡忡【傅玄怨歌行十五入君门一别终华髮楚辞玉色頽以晚颜繁钦定情篇侍寝执衣巾何逊诗掩泣闭金屏宋玉高唐赋愿荐枕席李善注荐进也欲亲进於枕席求亲昵之意也古乐府有秦王卷衣曲庾信灯赋卷衣秦后之牀送枕荆台之上汉书赵飞燕姊娣从自微贱兴踰越礼制寢盛於前班婕妤及许皇后皆失宠稀复进见陆机诗沉忧萃我心张铣注况深也孔融论盛孝章若使忧能伤人此子不得复永年矣吴均诗绿鬓愁中改司马相如以鸛鸛裘就市人杨昌贯酒详见四卷注萧士贇曰雕龙谓舞衣上之雕画龙文也诗国风忧心忡忡忡音冲】塞下曲六首【乐府诗集晋书乐志曰出塞入塞曲李延年造唐人有塞上塞下曲盖出於此】

五月天山雪无花祇有寒笛中闻折柳春色未曾看晓战随金鼓宵眠抱玉鞍愿将腰下剑直

为斩楼兰【天山冬夏有雪见四卷注按白帖笛有折杨柳之曲释名金鼓金禁也为进退之禁也太白以玉鞍对金鼓则金鼓自是一物有引鼓以进军金以退军解者恐未是汉书楼兰王为匈奴反间数遮杀汉使大将军霍光遣平乐监傅介子往刺其王介子轻将勇敢士齎金帛扬言以赐外国为名至楼兰诈其王欲赐之王喜与介子饮醉将其王屏语壮士三人从後刺杀之贵人左右皆散走介子告谕以王负汉罪天子遣我诛王当立王弟尉屠耆在汉者汉兵方至毋敢动自令灭国矣介子遂斩王当归首驰传诣阙悬首北阙下封介子为义阳侯】

其二

天兵下北荒胡马欲南饮横戈从百战直为衔恩甚握雪海上飡拂沙陇头枕何时破月氏然後方高枕【宋书李孝伯曰我今当南饮江湖以疗渴耳吕氏春秋行人烛过胄横戈而进後汉书余羌复与烧何大豪寇张掖攻没钜鹿坞杀属国吏民段熲追之且鬪且行昼夜相攻割肉食雪四十余日遂至河首积石山出塞二千余里汉书大月氏国本居敦煌祁连间至冒顿单于攻破月氏月氏乃远去过大宛西擊大夏而臣之都犂北为王庭其余小衆不能去者保南山羌人号月氏又匈奴传北狄不服中国未得高枕安寝也飡与餐同氏与支同】

其三

骏马似【缪本作如】风飏鸣鞭出渭桥弯弓辞汉月插羽破天骄阵解星芒尽营空海雾消功成画麟阁独有霍嫖姚【谢灵运诗鸣鞭适大河史记正义括地志云渭桥本名横桥架渭水上在雍州咸阳县东南二十二里雍録中渭桥旧止单名渭桥水经叙渭曰水上有桥谓之渭桥者是也後世加中以冠桥上者为长安之西别有便民桥万年县之东更有东渭桥故不得不以中别也陕西通志西渭桥在咸阳县西南百步汉武帝造名便桥唐名咸阳桥中渭桥在咸阳县东二十五里秦时造所谓渭水贯都以象天汉横桥南渡以法牵牛者也东渭桥在高陵县南十里不知始於何时或云汉高祖造以通栌阳之道者也古来单称渭桥者大槩专指中渭桥也庾信诗关山连汉月陇水向秦城薛道衡诗边庭烽火惊插羽夜徵兵魏武奏事曰今边有小警辄露檄插羽详见二卷羽檄注下汉书胡者天之骄子也後汉书客星芒气白为兵初学记星光曰芒杨素诗兵寝星芒落战解月轮空三辅黄图麒麟阁庙记云麒麟阁萧何造汉书宣帝思股肱之美乃图画霍光等十一人於麒麟阁按弯弓以上三句状出师之景插羽以下三句状战胜之景末言功成奏凯图形麟阁者止上将一人不能徧及血战之士太白用一独字盖有感乎其中欤然其言又何婉而多风也飏音标】

其四

白马黄金塞云砂绕梦思那堪愁苦节远忆边城儿萤飞秋窻满月度霜闺迟摧残梧桐叶萧飒沙棠枝无时独不见泪流空自知【黄金塞边上地名未详所在鲍照诗实是愁苦节吕氏春秋果之美者沙棠之实上林赋沙棠栳楮华枫枰栌张揖注沙棠状如棠黄华赤实其味似李无核】

其五

塞虏乘秋下天兵出汉家将军分虎竹战士卧龙沙边月随弓影胡霜拂劒花玉关殊未入少妇莫长嗟【长杨赋天兵四临汉书文帝纪初与郡守为铜虎符竹使符应劭曰铜虎符第一至第五国家当发兵遣使者至郡合符符合乃听受之竹使符者以竹箭五枚长五寸镌刻篆书第一至第五顔师古注与郡守为符者谓各分其半右留京师左以与之鲍照诗留我一白羽将以分虎竹後汉书坦步葱雪咫尺龙沙章怀太子注葱岭雪山白龙堆沙漠也鲍照诗旌甲被胡霜明余庆诗剑花寒不落汉书太初元年以李广利为贰师将军发属国六千骑及郡国恶少年数万人以往期至贰师城取善马比至郁城郁城令之引而还往来二岁至敦煌士不过什一二使使上书言罢兵天子大怒使使遮玉门关曰军有敢入斩之贰师恐因留屯敦煌天子赦囚徒扞寇盗发恶少年及边骑出敦煌六万人负私从者不与行至宛城宛贵人共杀王贰师取其善马数十匹中马以下牝牡三千匹军还入玉门关者万余人】

其六

烽火动沙漠连照甘泉云汉皇按剑起还召李将军兵【一作杀】气天上合鼓声陇底闻横行负勇气一战静妖氛【史记胡骑入代句注边烽火通於甘泉长安李陵歌径万里兮度沙漠按沙漠亦作沙幕一曰大磧汉时谓之幕唐时谓之磧在古敦煌郡之外东西数千里南北远者千里絶无水草不可驻牧虽鸟兽亦不能居之鲍照诗天子按劒怒史记匈奴入杀辽西太守败韩将军於是天子乃召拜李广为右北平太守匈奴闻之号曰汉之飞将军避之数岁不敢入右北平说文陇大坂也陇底谓山陇之下天水郡之大坂名曰陇坂亦曰陇底与此不同汉书高皇后尝忿匈奴羣臣庭议樊哙请以十万衆横行匈奴中北史何以报天子沙漠静妖氛】来日大难【来日大难即古善哉行也盖摘首句以命题耳乐府古题要解善哉行古词来日大难口噪唇乾言人命不可保当乐见亲友且求长生术王乔八公游焉按乐府诗集王僧?技録善哉行乃相和歌瑟调三十八曲之一】

来日一身携粮负薪道长【萧本作长鸣】食尽苦口焦唇今日醉饱乐过千春仙人相存诱我远学海凌【缪本作陵】三山陆憩五岳乘龙天飞目瞻两角【缪本作乘龙上三天飞目瞻两角】授以神【萧本作仙】药金丹满握螭蛄蒙恩深媿短促思填东海强衔一木道重天地轩师广成蝉翼九五以求长生下士大笑如苍蝇声【来日谓已来之日犹往日也韩诗外传乾喉焦唇仰天而叹梁宣帝赋餐霞永日静坐千春魏武帝诗越陌度阡枉用相存说文存恤问也谢灵运诗越海凌三山李周翰注三山蓬莱方丈瀛洲也郑康成周礼注五岳东曰岱宗南曰衡山西曰华山北曰恒山中曰嵩高山庄子螭蛄不知春秋陆德明注司马云螭蛄寒蝉也一名蜺蛄春生夏死夏生秋死崔云蛸蛄也或曰山螭秋鸣者不及春春鸣者不及秋广雅云螭蛄蛸蛄也即楚辞所谓寒蜚也述异记昔炎帝女溺死东海中化为精卫其名自呼常衔西山木石填东海偶海燕而生子生雌状如精卫生雄如海燕今东海精卫誓水处曾溺於此川誓不饮其水诗意言人命短促有如螭蛄今蒙恩而授之神药得使长生其德深矣思欲报之却如精卫衔一木以填东海耳甚言其德之深而无以为报也抱朴子黄帝过崆峒从广成子受自然之经蝉翼九五视九五天子之位如蝉翼之轻也老子下士闻道大笑之诗国

风苍蝇之声】

塞上曲

大汉无中策匈奴犯渭桥五原秋草绿胡马一何骄命将征西极横行阴山侧燕支落汉家妇女无华色转战渡黄河休兵乐事多萧条清万里瀚海寂无波【汉书匈奴为害所从来久矣周秦汉征之未有得上策者也周得中策汉得下策秦无策焉当周宣王时猱狁内侵至於泾阳命将征之尽境而还其视戎翟之侵譬犹蚊虻之螫殴之而已故天下称明是为中策汉武帝选将练兵约齎轻粮深入远戍虽有克获之功胡辄报之兵连祸结三十余年中国疲耗匈奴亦创艾而天下称武是为下策秦始皇不忍小耻而轻民力筑长城之固延袤万里转输之行起於负海疆境既完中国内竭以丧社稷是为无策雍录秦汉唐驾渭者凡三桥在咸阳西十里者名便桥汉武帝造在咸阳东南二十二里者为中渭桥秦始皇造在万年县东四十里者为东渭桥不知始於何世唐时颉利所犯者在便桥之北谓之西渭桥者是也五原郡汉武帝所置其後更变不一至西魏改大兴郡为五原郡後又改盐州隋末为梁师都所据唐贞观二年平师都复置盐州及五原县天宝元年改盐州为五原郡在太宗时但称盐州不称五原史言突厥颉利建牙直五原之北正指五原县也其地即汉北地郡之马岭县地西接灵州灵武郡东抵夏州朔方郡南界庆州安化郡北与突厥相距今约其处当在宁夏卫界中若汉之五原郡领县十六延袤甚广在唐时丰州九原郡胜州榆林郡皆其地矣汉书北边塞至辽东外有阴山东西千余里草木茂盛多禽兽本冒顿单于依阻其中治作弓矢来出为寇是其苑囿也至孝武世出师征伐斥夺此地攘之於汉北括地志阴山在北塞外突厥界史记正义括地志云焉支山一名荊丹山在甘州荊丹县东南五十里西河旧事析连燕支二山在张掖酒泉二界上东西二百余里南北百里有松柏五木美水草冬温夏凉宜畜牧匈奴失二山乃歌曰失我析连山使我六畜不蕃息失我燕支山使我妇女无颜色北边备对通典甘州荊丹县有焉支山匈奴失之乃歌曰失我焉支山使我妇女无颜色说者曰焉支阨氏也今之燕脂也此山产红蓝可为燕脂而阨氏资以为饰故失之则妇女无颜色其说或然也班固燕然山铭萧条万里野无遗寇汉书车骑将军封狼居胥山禪於姑衍登临瀚海如淳注瀚海北海名也正义曰按瀚海自一大海羣鸟解羽伏乳於此因名也耶律楚材曰伊州之西北有瀚海此篇盖追美太宗武功之盛而作也按唐书突厥传言颉利可汗嗣立高祖以中原初定不遑外略每优容之赐与不可胜计颉利言辞悖傲求请无厌所谓大汉无中策也传言武德九年七月颉利自率十余万骑进寇武功京师戒严癸未颉利至於渭水便桥之北太宗与侍中高士廉中书令房玄龄骑六骑幸渭水之上与颉利隔津而语责以负约其酋帅大惊皆下马罗拜俄而衆军继至军容大盛太宗独与颉利临水交言麾诸军却而阵焉颉利请和乙酉幸城西荊白马与颉利同盟於便桥之上颉利引兵而退所谓匈奴犯渭桥之事也传言颉利设牙直五原之北承父兄之资兵马强盛有凭陵中国之志所谓五原秋草绿胡马一何骄之事也又李靖传言贞观三年突厥诸部离叛朝廷将图进取以靖为代州道行军总管率骁骑三千自马邑出其不意直趋恶阳岭以逼之四年进撃定襄破之可汗仅以身遁太宗谓曰卿以三千轻骑深入虏庭克复定襄威振北狄古今所未有足报往来渭水之役自破定襄後颉利大惧退保铁山遣使入朝谢罪请举国内附以靖为定襄道行军总管往迎颉利颉利虽外请朝谒而潜怀犹豫靖精选骑一万齎二十日粮引兵自白道袭之师至阴山遇其斥堠千余帐皆俘以

随军将逼其牙帐十五里虜始觉颉利畏威先走部衆因而溃散靖斩万余级俘男女十余万颉利乘千里马走投吐谷浑西道行军总管张宝相禽之以献俄而突利可汗来奔遂复定襄长安之地斥土界自陰山至於大汉此诗所谓命将征西极横行陰山側以下之事是也或曰此诗亦可定为泛咏边事何以决其为专美太宗武功欤曰两汉而下匈奴犯边未有至於渭桥者至唐武德年间始有此事以此知之或曰既美本朝矣又何以用大汉汉家字耶曰太白本以唐之初年与颉利和好为非是而不可直言故借汉以喻而叹其失御戎之策也至汉家二字唐人用入诗章以为中国二字之代称历宋元明皆然何必滞此为疑耶洪迈选万首唐人絶句分此诗为三章顿觉无味不若合作一首之善】

玉阶怨【题始自谢朓太白盖拟之】

玉阶生白露夜久侵罗袜却下水精帘玲珑【繆本作玲珑】望秋月【西京赋金虀玉阶宋之问诗云母帐前初泛滥水精帘外转逶迤沈佺期诗水精帘外金波下云母窗前银汉回萧士贇曰水精帘以水精为之如今之琉璃帘也无一字言怨而隐然幽怨之意见於言外晦庵所谓圣於诗者此欤韵会玲珑明貌陰氏韵增云玲珑月光也然用玲珑不如玲珑为胜】

襄阳曲四首【襄阳曲即襄阳乐也旧唐书襄阳乐宋随王诞所作也诞治襄阳郡元嘉二十六年仍为雍州夜闻诸女歌謡因作之其歌曰朝发襄阳来暮至大堤宿大堤诸女儿花艷惊郎目裴子野宋略称晋安侯刘道产为雍州刺史有惠化百姓歌之号襄阳乐其辞非也】

襄阳行乐处歌舞白铜鞮江南回渌水花月使人迷【隋书梁武帝之在雍州有童謡曰襄阳白铜蹄反缚扬州儿识者言铜蹄谓马也白金色也及义师之兴实以铁骑扬州之士皆面缚如謡言故即位之後更造新声帝自为之词三曲又令沈约为三曲以被弦管後人改蹄为鞮未详其义鞮音题】

其二

山公醉酒时酩酊高【一作襄】阳下头上白接?倒着还骑马【世说山季伦为荊州时出酣畅人为之歌曰山公时一醉径造高阳池日暮倒载归酩酊无所知复能乘骏马倒着白接?举手问葛强何如并州儿高阳池在襄阳强是其爱将并州人也说文酩酊醉也广韵接?白帽也酩音茗酊音顶】

其三

岷山临汉江水緑沙如雪【一作水色如霜雪】上有堕泪碑青苔久磨灭【无和郡县志岷山在襄州襄阳县东南九里东临汉水古今大路水经注岷山羊祜之镇襄阳也与邹润甫尝登之及祜薨後後人立碑於故处望者悲感杜元凯谓之堕泪碑湘中记白沙如霜雪】

其四

且醉习家池莫看堕泪碑山公欲上马笑杀襄阳儿【世说注襄阳记曰漠侍中习郁於岷山南依范蠡养鱼法作鱼池池边有高堤种竹及长楸芙蓉菱芡覆水是游宴名处也山简每临此池未尝不大醉而还曰此是我高阳池也襄阳小儿歌之】

大堤曲【按梁简文帝作雍州十曲内有大堤南湖北渚等曲其源盖本於此】

汉水临【一作横】襄阳花开大堤暖佳期大堤下泪向南云满春风复无情吹我梦魂散不见眼中人天长音信断【一统志大堤在襄阳府城外湖广志大堤东临汉江西自万山经澧溪土门白龙池东津渡绕城北老龙堤复至万山之麓周围四十余里陆机赋指南云以寄歎江总诗心逐南云逝形随北鴈来何逊诗不见眼中人空想南山寺】

宫中行乐词八首【原注奉诏作五言 本事诗玄宗尝因宫中行乐谓高力士曰对此良辰美景岂可独以声伎为娱倘时得逸才词人咏出之可以夸耀於後遂命召李白时宁王邀白饮酒已醉既至拜舞颓然上知其薄声律谓非所长命为宫中行乐五言律诗十首白顿首曰宁王赐臣酒今已醉倘陛下赐臣无畏始可尽臣薄技上曰可即遣二内臣掖扶之命研墨濡笔以授之又令二人张朱丝栏於其前白取笔抒思晷不停辍十篇立就更无加点笔迹迺利凤趺龙拏律度对偶无不精绝据此则当时本作十篇今存八首想已逸其二矣】

小小生金屋盈盈在紫微山花插宝髻石竹绣罗衣每出深宫里常随步辇归只愁歌舞散【一作罢】化作彩云飞【古诗盈盈楼上女李善注广雅曰羸容也盈与羸同古字通陆机诗来步紫微吕向注紫微天子宫也通志略石竹其叶细嫩花如钱可爱唐人多像此为衣服之饰所谓石竹绣罗衣也按石竹乃草花中之纖细者枝叶青翠花色红紫状同剪刻人多植作盆盎之玩或以为即药品中之瞿麦未详是否唐陆龟蒙咏石竹花云曾看南朝书国娃古罗衣上醉明霞据此则衣上绣画石竹花者六朝时已有此制矣西都赋乘茵步辇唯所息晏胡三省通监注步辇不驾马使人挽之】

其二

柳色黄金嫩梨花白雪香玉楼巢【一作关】翡翠珠【一作金】殿鎖鸳鸯选妓随雕【一作朝】辇徵歌出洞房宫中谁第一飞燕在昭阳【柳色黄金嫩梨花白雪香二句本陰铿诗太白全用之东京赋下雕辇於东厢薛综注辇人辇车雕谓有雕饰也楚辞姱容修态絙洞房西京杂记赵后体轻腰细善行步进退女弟昭仪不能及也但昭仪弱骨丰肌尤工语笑二人并色如红玉为当时第一皆擅宠後宫汉书孝成赵皇后本长安宫人及壮属阳阿主作乐歌舞号曰飞燕成帝常微行出过阳阿主作乐上见飞燕而悦之召入宫大幸有女弟复召入为婕妤贵倾後宫许后之废也乃立婕妤为皇后皇后既立後宠少衰而弟绝幸为昭仪居昭阳舍其中庭彤朱而殿上髹漆砌皆铜沓冒黄金涂白玉阶壁带往往为黄金釭函蓝田璧明珠翠羽饰之自後宫未尝有焉是在昭阳舍者乃其女弟合德非飞燕也然三辅黄图成帝赵皇后居昭阳殿沈佺期诗飞燕恃宠昭阳殿班姬饮恨长信宫古人亦有此误飞燕在昭阳之句盖有所自矣】

其三

卢橘为秦树蒲桃出【一作是】汉宫烟花宜落日丝管醉春风笛奏龙鸣【一作吟】水箫吟【一作鸣】凤下空君王多乐事还与万方同【一作何必向回中一作何必在回中上林赋卢橘夏熟郭璞注今蜀中有给客橙似橘而非若柚而芬香冬夏华实相继或如弹丸或如拳通岁食之即卢橘也史记索隐应劭云伊尹书云果之美者箕山之东青马之所有卢橘夏熟晋灼曰此虽赋上林博引异方珍奇不系於一也按广州记云卢橘皮厚大小如甘酢多九月结实正赤明年二月更青黑夏熟吴录云建安有橘冬月树上覆裹明年夏色变青黑其味甚甘美卢即黑色是也史记大宛左右以蒲萄为酒俗嗜酒马嗜苜蓿漠使取其实来於是天子始种苜蓿蒲萄肥饶地及天马多外国使来衆则离宫别观旁尽种蒲萄苜蓿极望沈约诗烟花绕层曲马融笛赋近世双笛从羌起羌人伐竹未及已龙鸣水中不见已截竹吹之声相似张铄注羌西戎也其人伐竹未毕之间有龙鸣水中不见其身羌人旋即截竹吹之声与龙相似也水中道诗笙随山上鹤笛奏水中龙荀子凤凰秋秋其翼若干其声若箫又列仙传箫史善吹箫凤凰来止其屋事见後六卷注唐仲言曰此章句法以蒲橘发端而以烟花承之开而合也以丝管起下而以箫管分对合而开也说者以起伏开合为独推工部岂其然乎】

其四

玉树【一作殿】春归日【一作好】金宫乐事多後庭朝未入轻辇夜相过笑出花间语娇来烛【萧本作竹】下歌莫教明月去留着醉姮【萧本作嫦】娥【艺文类聚汉武故事曰上起神屋前庭植玉树以珊瑚为枝碧玉为叶华子赤青以珠玉为之空其中如小铃枪枪有声然诗人用玉树多是言树美好如琪树珍树之类不关汉武帝事也张衡灵宪羿请无死之药於西王母姮娥窃之以奔月将往枚筮之於有黄有黄筮之曰吉翩翩归妹独将西行逢天晦茫母惊母恐後且大昌姮娥遂托身於月是之谓蟾蜍 姮音桓】

其五

绣户香风暖纱窗曙色新宫花争笑日池草暗生春緑树闻歌鸟青楼见舞人昭阳桃李月罗绮自【一作坐】相亲【说文曙晓也刘勰新论春葩含日似笑秋叶泫露如泣南史齐武帝於兴光楼上施青漆故世人谓之青楼】

其六

今日明光里还须结伴游春风开紫殿天乐下珠楼艶舞全知巧娇歌半欲羞更怜花月夜宫女笑藏钩【三辅黄图武帝求仙起明光宫发燕赵美女二千人充之又三辅黄图汉武帝起紫殿雕文刻镂黼黻以玉饰之度人经珠楼竦琳庭艺文类聚风土记曰义阳腊日饮祭之後叟妪儿童为藏钩之戏分为二曹以较负胜若人偶即敌对人奇即使一人为游附或属上曹或属下曹名为飞鸟以齐二曹人数一钩藏在数手中曹人当射知所在一藏为一筹三筹为一都辛氏三秦记曰昭帝母钩弋夫人手拳而有国色先帝宠之世人藏钩法是也酉阳杂俎

旧言藏钩起於钩弋盖仿辛氏三秦记云汉武钩弋夫人手拳时人效之因为藏钩也列子云瓦抠巧钩者憚黄金抠者昏殷敬顺训注曰疆与抠同衆人分曹各藏物探取之又令藏钩剩一人则往来於两朋谓之饿鸱又今为此戯必于正月据风土记在腊祭後也庾阐藏钩赋序云予以腊後命中外以行钩为戏矣】

其七

寒雪梅中尽春风柳上归宫莺娇欲醉檐燕语还飞迟日明歌席新花艷舞衣晚来移彩仗行乐好【萧本作泥】光辉【诗国风春日迟迟毛传曰迟迟舒缓也正义曰迟迟者日长而暄之意故为舒缓计春秋漏刻多少正等而秋言凄凄春言迟迟者陰阳之气感人不同张衡西京赋云人在阳则舒在陰则惨然则人遇春暄则四体舒泰春觉昼景之稍长谓日行迟缓故以迟迟言之及遇秋景四体褊燥不见日行急促惟见寒气袭人故以凄凄言之凄凄是凉迟迟是暄二者观文似同本意实异也卢照邻诗落日明歌席行云逐舞人韵会仗兵器五刃总名兵人所执曰仗又唐制殿下兵卫曰仗宋之问诗彩仗红旌遶香阁沈佺期诗北阙晴空彩仗来皆此意】

其八

水緑【繆本作淥】南薰殿花红北阙楼莺歌闻太液凤吹遶瀛洲素女鸣珠佩天人弄彩球今朝风日好宜入未央游【长安志兴庆殿前有瀛洲门内有南薰殿北有龙池史记萧丞相营未央宫立东阙北阙集解云关中记曰东有苍龙阙北有玄武阙玄武所谓北阙也三辅黄图太液池在长安故城西建章宫北未央宫西南太液者言其津润所及广也关辅记云建章宫北有池以象北海刻石为鲸鱼长三丈汉书曰建章宫北治大池名曰太液池中起三山以象瀛洲蓬莱方丈刻金石为鱼龙奇禽异兽之属雍録阁本大明宫图蓬莱殿北有太液池池中有蓬莱山丘迟诗驰道闻凤吹吕延济凤吹笙也笙体凤故也风俗通秦帝使素女鼓瑟而悲魏略太祖遣邯鄲淳诣临淄侯植淳归对其所知叹植之才谓之天人开天传信记上与诸王靡日不会聚或讲经义论道理间以球猎搏博赋诗饮食欢笑戏谑未尝怠惰近古帝王友爱之道无与比也文献通考蹴球盖始於唐植两修竹高数丈络丝於上为门以度球球工分左右以角胜负岂非蹴鞠之变欤庾信诗今朝好风日园苑足芳菲三辅黄图未央宫周回二十八里前殿东西五十丈深十五丈高三十五丈营未央宫因龙首山以制前殿至孝武以木兰为桷椽文杏为梁柱金铺玉户华榱璧珰雕楹玉碣重轩镂槛青琐丹墀左碱右平黄金为壁带间以珍玉风至其声玲珑然也萧士贇曰太白诗用意深远非洞悟三百篇之旨趣未易窥其藩篱晦庵所谓圣於诗者也清平调词宫中行乐词其中数首全得国风讽谏之体如曰玉楼巢翡翠金殿鎖鸳鸯是讽其玉楼金殿不为延贤之地徒使女子小人居之也选妓随雕辇徵歌出洞房是讽其不好德而好色不听雅乐而听郑声也宫中谁第一飞燕在昭阳是以飞燕比贵妃妃与飞燕事迹相类欲使明皇以之为鑒知飞燕之为汉祸水而不惑溺於贵妃也君王多乐事还与万方同是讽其与民同乐也今朝风日好宜向未央游是讽其辍游宴之乐而临政视事於未央也是时明皇有声色之惑多不视朝故因及之也言在於此意在於彼正得谏讽之体太白才得近君当时人所难言者即寓讽谏之意於诗内使明皇因诗有悟其

社稷苍生庶有瘳乎岂曰小补之哉琦按萧氏此说甚凿使解诗者必执此见於胸中而句度字权之则古今之诗无一而非讥时諲政之作而忠厚和平之旨盖於是失矣尤而效之几何不为谗邪之嚆矢哉】

清平调词三首【太真外传开元中禁中重木芍药即今牡丹也得数本红紫浅红通白者上因移植於兴庆池东沉香亭前会花方繁开上乘照夜白妃以步辇从诏选梨园弟子中尤者得乐一十六色李龟年以歌擅一时之名手捧檀板押衆乐前将欲歌之上曰赏名花对妃子焉用旧乐为哉遽命龟年持金花笺宣赐翰林学士李白立进清平乐词三章承旨犹苦宿醒因援笔赋之龟年捧词进上命梨园弟子略约词调抚丝竹遂促龟年以歌之太真妃持颇梨七宝杯酌西凉州蒲桃酒笑领歌辞意甚厚上因调玉笛以倚曲每曲徧将换则迟其声以媚之妃饮罢敛绣巾再拜上自是顾李翰林尤异於诸学士通典平调清调瑟调皆周房中之遗声也汉代谓之三调琦按唐书礼乐志俗乐二十八调中有正平调高平调则知所谓清平调者亦其类也盖天宝中所制供奉新曲如荔枝香伊州曲凉州曲甘州曲霓裳羽衣曲之俦欤】

云想衣裳花想容春风拂槛露华浓若非羣玉山头见会向瑶台月下逢【山海经玉山是西王母所居也郭璞注此山多玉石因以名云穆天子传谓之羣玉之山见其山阿无险四辙中绳先王之所谓策府寡草木无鸟兽楚辞望瑶台之偃蹇兮见有娥之佚女王逸注有娥国名佚美也谓帝尝之妃契母简狄也太平御览登真隐诀曰崑仑瑶台是西王母之宫所谓西瑶上台上真秘文尽在其中矣沈约诗含吐瑶台月琦按蔡君謨书此诗以云想作叶想近世吴舒鳧遵之且云叶想衣裳花想容与王昌龄荷叶罗裙一色裁芙蓉向脸两边开俱从梁简文莲花乱脸色荷叶杂衣香脱出而李用二想字化实为虚尤见新颖不知何人误作云字而解者附会楚辞青云衣兮白霓裳甚觉无谓云云不知改云作叶便同嚼蜡索然无味矣此必君謨一时落笔之误非有意点金成铁若谓太白原本是叶字则更大谬不然】

其二

一枝红【许本作浓】艷露凝香云雨巫山枉断肠借问汉宫谁得似可怜飞燕倚新粧【水经注丹山西即巫山者也帝女居焉宋玉所谓天帝之季女名曰瑶姬未行而亡封於巫山之台精魂为草实为灵芝所谓巫山之女高唐之姬旦为行云暮为行雨朝朝暮暮阳台之下旦早视之果如其言故为立庙号朝云焉飞燕已见本卷注萧士贇曰传者谓高力士指摘飞燕之事以激怒贵妃予谓使力士知书则云雨巫山不尤甚乎高唐赋序谓神女尝荐先王之枕席矣後序又曰襄王复梦遇焉此云枉断肠者亦讥贵妃曾为寿王妃使寿王而未能忘情是枉断肠矣诗人比事引兴深切着明特读者以为常事而忽之耳琦按太白之潜恶矣萧氏所解则尤甚而揆之太白起草之时则安有是哉巫山云雨汉宫飞燕唐人用之已为数见不鲜之典实若如二子之说巫山一事只可以喻聚淫之艷冶飞燕一事只可喻微贱之宫娃外此皆非所宜言何三唐诸子初不以此为忌耶古来新台艾豕诸作言而无忌者大抵出自野人之口若清平调是奉诏而作非其比也乃敢以宫闈暗昧之事君上所讳言者而微辞隐喻之将蕲君知之耶亦不蕲君知之耶如其不知言亦何益如其知之是批龙之逆鳞而履虎尾也

非至愚极妄之人当不为此又太真入宫至此时几将十载斯时即有忠君爱主之亲臣亦祇以成事不说既往不咎付之无可奈何而谓新进如太白者顾托之无益之空言而期君之一悟何其不智之甚哉古来文字之累大抵出於不自知而成於莫须有若苏轼双桧之诗而潜其求知於地下之蛰龙蔡确车盖亭十絶而笺注其五篇悉涉讥讽小人机穽深是可畏然小人以陷人为事其言无足怪而词人学士品隲诗文於数百载之下亦效为巧词曲解以拟议前人辞外之旨不亦异乎】

其三

名花倾国两相欢长得君王带笑看解释春风无限恨沉香亭北倚阑干【杨齐贤曰名花指牡丹倾国指妃子沉香亭以沉香为之如柏梁台以香柏为之也按雍録阁本兴庆宫图龙池东有沉香亭】

鼓吹入朝曲【按乐府诗集齐永明八年谢朓奉镇西随王教於荆州道中作鼓吹曲一曰元会曲二曰郊祀曲三曰钧天曲四曰入朝曲五曰出藩曲六曰校猎曲七曰从戎曲八曰送远曲九曰登山曲十曰泛水曲钧天以上三曲颂帝功校猎以上三曲颂藩德太白鼓吹入朝曲之作盖本於此】

金陵控海浦淥水带吴京铙歌列骑吹飒沓引公卿槌钟速严糒伐鼓启重城天子凭玉几【繆本作案】劒履若云行日出照万户簪裾烂明星朝罢沐浴闲遨游阊风亭济济双阙下欢娱乐恩荣【景定建康志金陵古扬州之域在周为吴春秋末属越楚灭越并有其地以其地有王气埋金以镇之号曰金陵宋书金甲烛天庭雷声震海浦谢朓鼓吹入朝曲逶迤带淥水迢迢起朱楼顔延年诗岩险去汉字襟卫徙吴京李善注宋都吴地故曰吴京也宋书汉鼓吹曲曰铙歌乐府诗集汉有朱鹭等二十二曲列於鼓吹谓之铙歌宋书建初録云务成黄爵玄云远期皆骑吹曲非鼓吹曲此则列於殿庭者为鼓吹今之从行鼓吹为骑吹鲍照诗宾御纷飒沓刘良注飒沓衆盛貌後汉书清河孝王庆每朝谒陵庙常夜分严糒衣冠待明诗小雅钲人伐鼓毛传曰伐擊也汉书天子负黼依裘翠被凭玉几隋书大臣优礼皆劒履上殿非侍臣解之盖防刃也卢思道诗台苑盛簪裾太平御览郡国志曰润州覆舟山有阊风亭李善文选注刘璠梁典曰天监七年正月戊戌诏曰昔晋氏青盖南移日不暇给两观莫策悬法无所今礼盛化光役务简便可营建象阙以表旧章于是遣匠量功镌石为阙穷极壮丽冠绝古今奇禽异羽莫不毕备六朝事迹建康县北五里有二石阙在台城之门南高五丈广三丈六寸梁武帝所造及成朝士铭之时陆倕字佐公其文甚佳士流推服景定建康志南朝宫苑记曰晋元帝於宫前立阙衆议未定王导指牛头山为天阙不别立阙宋孝武大明七年於博望梁山立双阙梁置石阙在端门外陆倕为铭琦按此篇盖拟六朝之作故以金陵吴京为辞萧氏以为讽永王入朝而作则天子当在长安与金陵吴京何预而朝罢遨游之地亦不当在阊风亭矣其说非是 浦音普铙音挠槌音椎】

秦女休行【原注古词魏朝協律都尉左延年所作今拟之 左诗曰步出上西门遥望秦女庐秦氏有好女自名为女休休年十四五为宗行报仇左执白杨刃右据鲁宛矛仇家便东南仆

僵秦女休女休西上山上山四五里关吏呵问女休女休前置词平生为燕王妇於今为诏狱囚平生衣参差当今无领襦明知杀人当死兄言怏怏弟言无道忧女休坚词为宗报仇死不疑杀人都市中徼我都巷西丞卿罗东向坐女休凄凄曳□前两徒夹我持刀刀五尺余刀未下臃肿鼓鼓赦书下】

西门秦氏女秀色如琼花手挥白杨刃清昼杀讎家罗袖洒赤血英声【许本作气】凌紫霞直上西山去关吏相邀遮堦为燕国王身被诏狱加犯刑若履虎不畏落爪牙素颈未及断摧眉伏泥沙金鸡忽放赦大辟得寛賒何慙聂政姐万古共惊嗟【羽猎赋前後邀遮汉书淳于公有罪当刑诏狱逮系长安周易履虎尾隋书赦日则武库令设金鸡及鼓於闾阖门外之右勒集囚徒於阙前挝鼓千声释枷锁焉谈苑宋孝王问司马膺之後魏北齐赦日树金鸡事膺之曰按海中星占云天鸡星动为有赦北齐赦日令武库设金鸡於阙门右挝鼓千声宣赦建金鸡或云起於西凉吕光究其旨盖西方主兑为泽金西方也鸡者巽之神巽为号令故合二物制其形揭长竿使衆人覩之尚书大辟疑赦孔传曰大辟死刑也战国策聂政刺杀韩傀因自皮面抉眼屠肠以死韩取聂政屍暴於市悬购之千金久之莫知谁政姊嫪闻之曰吾弟至贤不可爱妾之軀灭吾弟之名乃之韩视之曰勇哉气矜之隆是其軼责育高成荆矣今死而无名父母已没矣兄弟无有此为我故也夫爱身不扬弟之名吾不忍也乃抱屍而哭之曰此吾弟軹深井里聂政也亦自杀於屍下晋楚齐卫闻之曰非独聂政之能乃其姊者烈女也聂政之所以名施於後世者其姊不避菹醢之诛以扬其名也胡震亨曰按女休事奇烈第重述一过便堪擊节太白拟乐府有不与本辞为异正复难及者此类是也】

秦女卷衣【乐府古题要解有秦王卷衣曲言咸阳春景及宫阙之美秦王卷衣以赠所欢也太白作秦女卷衣辞旨各殊未详所本】

天子居未央妾侍【繆本作来】卷衣裳顾无紫宫宠敢拂黄金牀水至亦不去熊来尚可当微身奉【繆本作捧】日月飘若萤之【繆本作火】光愿君采葑菲无以下体妨【未央紫宫俱见前注法苑珠林贤愚经云坐黄金牀纺黄金缕列女传楚昭王出游留夫人渐台之上而去王闻江水大至使使者迎夫人忘持其符妾不敢行与宫人约令召宫人必以符今使者不持符妾不敢行於是使返取符则水大至台崩夫人流血死汉书上幸虎圈闘兽後宫皆坐熊逸出圈攀檻欲上殿贵人皆惊走冯婕妤直前当熊而立左右格杀熊上问人情惊惧何故前当熊婕妤对曰猛兽得人而止妾恐恣至御座故以身当之元帝嗟叹以此倍敬重焉沈约为六宫拜章奉日月之华侍巾履之末魏书萤火之光犹增日月之曜诗国风采葑采菲无以下体毛传曰葑须也菲芴也下体根茎也郑笺曰此二菜者蔓菁与菹之类也皆上下可食然而其根有美时有恶时采之者不可以根恶时并弃其叶喻夫妇以礼义合顔色相亲亦不可以顔色衰弃其相与之礼正义曰言采葑菲之菜者无以下体根茎之恶并弃其叶以兴为室家之法无以其妻顔色之衰并弃其德

菲音斐】东武吟【一作出金门後书怀留别翰林诸公乐府诗集古今乐録曰王僧?技録有东武吟行今不歌乐府解题曰鲍照云主人且勿諠沈约云天德深且广伤时移事异荣华徂谢也左思齐都赋注云东武太山皆齐之土风弦歌讴吟之曲名也通典曰汉有东武郡今高密诸城县是也元和郡县志密州诸城县即汉东武县也属琅邪郡乐府章所谓东武吟者

也海錄碎事东武吟乐府诗人有少壮从征伐年老被弃游於东武者不敢论功但恋君耳】

好古笑流俗素闻贤达风方希佐明主长揖辞成功白日在高天回光烛微躬恭承凤凰诏起云萝中清切紫霄迴优游丹禁通君王赐颜色声价凌烟虹乘舆拥翠盖扈从金城东宝马丽绝景锦衣入新丰依【繆本作倚】岩望松雪对酒鸣丝桐因学扬子云献赋甘泉宫天书美片善清芬播无穷归来入咸阳谈笑皆王公【许本误失去此二句】一朝去金马飘落成飞蓬宾客【繆本作友】日疎散玉樽亦已空才力犹可倚【一作恃】不慙世上雄闲作东武吟曲尽情未终书此谢知己吾寻黄绮翁【一作扁舟寻钓翁 刘峻广絶交论斯贤达之素交沈约诗便欲息微躬汉书恭承嘉惠兮顔师古注恭敬也十六国春秋石虎在上有诏书以五色纸着凤凰口中凤既衔诏侍人放数百丈绋轳回转状若飞翔飞下端门凤以木作之五色文身脚皆用金宋书殷淳居黄门为清切魏书对九重之清切望八袭之峥嵘梁简文帝围城赋升紫霄之丹地排玉殿之金扉隋书分司丹禁侍卫左右上官仪诗清切丹禁静顔之推诗楚王赐颜色出入章华里鲍照诗辉石乱烟虹贾谊新书天子车曰乘舆淮南子建翠盖高诱注翠盖以翠鸟羽饰盖也上林赋扈从横行出乎四校之中晋灼注扈大也封氏闻见记百官从驾谓之扈从盖臣下侍从至尊各供所职犹仆御扈养以从上故谓之扈从耳上林赋云扈从横行顔监释云谓扈从纵恣而行也据顔此解乃读从为放纵不取行从之义所未详也石林燕语从驾谓之扈从始司马相如上林赋晋灼以扈为大张揖谓跋扈纵横不安鹵簿故顔师古因之亦以为跋扈恣纵而行果尔从盖作去声侍天子而言跋扈可乎唐封演以为扈从以从犹之仆御此或近之张协诗朱轩耀金城刘良注金城长安城也史记中廐之宝马臣得赐之水经注魏武与张绣战於宛马名絶景为流矢所中旧唐书京兆府有昭应县本隋之新丰县治古新丰城北天宝三载分新丰万年置会昌县七载省新丰县改会昌为昭应治温泉宫之西北琦按自乘舆拥翠盖而下是指其侍从温泉宫而言宫在新丰县之骊山下正直唐京师之东太白入朝在天宝二三载是时新丰尚未省也顔延年诗倚岩听绪风又曰庭昏见野陰山明望松雪汉书扬雄待诏承明之庭正月从上天甘泉还奏甘泉赋以风桓谭新论扬子云从成帝祠甘泉诏雄作赋思精苦困倦小卧梦五脏出外以手收而纳之及觉病喘悸少气王筠诗自知心所爱献赋甘泉宫鲍照诗片善辞革莱汉书公孙弘拜为博士待诏金马门曹植诗玉樽盈桂酒夏黄公绮里季事见四卷注歙音旭又音忽】

邯鄲才人嫁为厮养卒妇【胡震亨曰谢朓有此诗薪仆曰厮炊仆曰养朓盖设言其事寓臣妾沦擲之感杨升庵以为此卒即御赵王武臣归者恐未必然 邯音寒】

妾本丛【萧本作崇】台女扬蛾【繆本作娥】入丹阙自倚顔如花寧知有雕歇一辞玉阶下去若朝云没每忆邯鄲城深宫梦秋月君王不可见惆怅至明发【汉书赵王宫丛台灾顔师古注连聚非一故曰丛台盖本六国时赵王故台也在邯鄲城中元和郡县志丛台在磁州邯鄲县城内东北隅沈约诗扬蛾一含睇娟好且修明发天光初发谓明旦时也详见二卷注】

出自蓟北门行【乐府古题要解出自蓟北门行其词与从军行同而兼言燕蓟风物及突骑悍勇之状与吴趋行同也】

虏阵横北荒胡星耀精芒羽书速惊电烽火昼连光虎竹救边急戎车森已行明主不安席按劒心飞扬推轂出猛将连旗登战场兵威冲绝幕【缪本作汉】杀气凌穹苍列卒【一作阵】赤山下开营紫塞旁孟冬风沙紧旌旗【一作旆】飒凋伤画角悲海月征衣卷天霜挥刃斩楼兰弯弓射贤王单于一平荡种落自奔亡收功报天子行歌【一作歌舞】归咸阳【汉书昂曰旄头胡星也後汉书伤败踵系羽书日闻章怀太子注羽书即檄书也魏武奏事曰边有警急即插羽以示急也虎竹见五卷注诗小雅戎车既安宋书戎车立乘夏曰钩车殷曰寅车周曰元戎建牙麾邪注之载金鼓羽幢置甲弩於轼上史记项羽曰国兵新破王坐不安席鲍照诗天子按劒怒楚辞心飞扬兮浩荡汉书上古王者遣将也踞而推轂曰闐以内寡人制之闐以外将军制之晋书温峤传西阳太守邓岳寻阳太守褚诞等连旗相继汉书卫青复将六将军绝幕大克获应劭注幕沙幕匈奴之南界也臣瓚注沙土曰幕直度曰绝顔师古注应瓚二说皆是也而说者或云是塞外地名非矣幕者即今之突厥中磧耳李陵歌曰径万里兮度沙幕尔雅穹苍苍天也邢昺疏李巡云仰视天形穹窿而高其色苍苍故曰穹苍後汉书辽东太守祭彤使鲜卑擊赤山乌桓大破之斩其渠帅乌桓传赤山在辽东西北数千里紫塞详见三卷注广雅紧急也说文飒翔风也广韵大角军器徐广车服仪制曰角前世书记所不载或曰本出羌胡以惊中国之马太平御览宋乐志曰角长五尺形如竹筒本细末稍大未详所起今□簿及军中用之或以竹木或以皮为之无定制按古军法有吹角此器俗名拔逻回盖胡虏警军之音所以书传无之海内离乱至侯景围台城方用之也梁简文帝诗城高短箫发林空画角悲傅介子斩楼兰王事见本卷注汉书匈奴传单于姓挛鞮氏其国称之曰撑犁孤涂单于匈奴谓天为撑犁谓子为孤涂单于者广大之貌也言其象天单于然也置左右贤王自左右贤王以下至当户大者万余骑小者数千凡二十四长立号曰万骑种落谓其种类及部落也魏志正始七年韩那奚等数十国各率种落降单音蝉】

洛阳陌【胡震亨曰即横吹曲之洛阳道也】

白玉谁家郎回车渡天津看花东陌上惊动洛阳人【天津洛阳桥名见二卷注】

北上行【乐府古题要解苦寒行晋乐奏魏武帝北上太行山备言永雪谿谷之苦或谓北上行盖因魏武帝作此词今人效之】

北上何所苦北上缘太行磴道盘且峻巉岩凌穹苍马足蹶侧石车轮摧高冈沙尘接幽州烽火连朔方杀气毒劒戟严风裂衣裳奔鲸夹黄河凿齿屯洛阳前行无归日返顾思旧乡惨慄【缪本作戚】冰雪里悲号絶中肠尺布不掩体皮肤剧枯桑汲水涧谷阻采薪陇坂长猛虎又掉尾磨牙皓秋霜草木不可食饥饮零露浆叹此北上苦停骖为之伤何日王道平开顔覩天光【北边备对太行山南自河阳怀县迤邐北出直至燕北无有间断此其为山不同他地盖数百千里自麓至脊皆陡峻不可登越独有八处粗通微径名之曰陁西京赋磴道迤倚而正东李善注磴道阁道也广韵磴小坂也韵会磴登陟之道也广雅巉岩高也魏武帝苦寒行北上太行山艰哉何巍巍羊肠坂诘屈车轮为之摧初学记冬风曰严风十六国春秋志馘奔鲸截彼丑类淮南子尧之时凿齿为民害尧乃使羿诛凿齿於畴华之野高诱注凿齿兽名齿长三尺其状如凿下彻颌下而持戈盾羿善射尧使羿射杀之按天宝十四载安禄山反於范

阳引兵南向河北州县望风瓦解遂克太原连破灵昌陈留荥阳诸郡遂陷东京范阳本唐幽州之地诗所谓沙尘接幽州者盖指此事而言其曰烽火连朔方者禄山遣其党高秀岩寇振武军朔方节度使郭子仪擊敗之振武军去朔方治所甚远其烽火相望告急可知其曰奔鲸夹黄河者指从逆诸将如崔乾佑之徒纵横於汲邺诸郡也其曰凿齿屯洛阳者谓禄山据东京僭号也魏文帝诗向风长叹息断绝我中肠说文剧尤甚也陇坂谓山之冈壠阪坂後汉书上壠阪陟高冈是也或引三秦记天水之壠坂为注者非是陆机诗渴饮坚冰浆饥待零露飡郑康成毛诗笺驂两駟也左传正义初驾马者以二马夹辕而已又驾一马与两服为参谓之驂又驾一马乃谓之駟说文云驂驾三马也駟一乘也两服为主以渐参之两旁二马遂名为驂故总举一乘则谓之駟指其驂马则谓之驂诗称两驂如舞二马皆称驂礼记说驂而正义车有一辕而駟马驾之中央两马夹辕者名服马两边名驂马亦曰驂马故诗云两服上襄两驂雁行通监辨误史炤释文曰三马为驂余按王肃云古者一辕之车夏后驾两马谓之丽殷益以一駟谓之驂周又益之以一駟谓之駟自时厥後夹辕曰服两旁曰驂诗所谓两服上襄两驂雁行者也书洪范王道平平谢灵运诗开顔披心胷
磴音凳剧音极壠音笼掉徒了切条上声又徒吊切条去声飡同餐】

短歌行【按乐府诗集短歌行乃相和歌平调七曲之一乐府解题曰短歌行魏武帝对酒当歌人生几何晋陆机置酒高堂悲歌临觴皆言当及时为乐也又按古今注谓长歌短歌言人生寿命长短有定分不可妄求也考之魏武帝陆士衡及唐人诸篇皆言人运短促当及时自勉然二曲一致初无寿夭之分李善曰古诗云长歌正激烈魏文帝燕歌行曰短歌微吟不能长傅玄曰歌行曰咄来长歌续短歌皆指歌声之长短耳而非言寿命也斯盖命题之意欤】

白日何短短百年苦易满苍穹浩茫茫万劫太极长麻姑垂两鬓一半已成霜天公见玉女大笑亿千场吾欲揽六龙回车挂扶桑北斗酌美酒劝龙各一觴富贵非所愿为【一作与】人驻颜【一作顔一作流】光【拾遗记天清地旷浩茫茫法苑珠林夫劫者盖是纪时之名犹年号耳高诱淮南子注太极天地始形之时也萧士贇注麻姑鬓成霜事未详所祖恐只大人赋西王母曜然白首之意天公与玉女投壶大笑事见三卷注刘向九叹维六龙於扶桑楚辞少司命援北斗兮酌桂浆归去来词富贵非吾愿】

空城雀【乐府诗集乐府解题曰鲍照空城雀云雀乳四穀空城之阿言轻飞近集茹腹辛伤免网罗而已】

嗷嗷空城雀身计何戚促本与鷦鷯羣不随凤凰族提携四黄口饮乳未尝足食君糠粃余尝恐乌鸢逐耻涉太行险羞营覆车粟天命有定端守分绝所欲【说文嗷衆口愁也高唐赋衆雀嗷嗷埤雅释鸟云桃虫鷽其雌鷽陆机曰今鷽鷽是也似黄雀而小说苑曰鷽鷽巢於苇□系之以髮鷽性拙鷽性巧故鷽俗呼巧妇一名工雀一名女匠其喙尖如锥取茅秀为巢巢至精密以麻紩之如刺鞞然故一名鞞雀家语孔子见罗雀者所得皆黄口小雀说文糠谷皮也粃不成粟也韵会鸢鸢鸟也似鸱而小欧阳建诗不涉太行险谁知斯路难艺文类聚益部耆旧传曰杨宣为河内太守行县有羣雀鸣桑树上宣谓吏曰前有覆车粟此雀相随欲往食之行数里果如其言 鷽音僚鸢音缘】

菩萨蛮

平林漠漠烟如织寒山一带伤心碧暝色入高楼有人楼上愁玉阶空伫立宿鸟归飞急何处是归程长亭连【一作更】短亭【谢朓诗生烟纷漠漠吕向注漠漠分散也谢灵运诗林壑敛暝色诗国风伫立以泣毛传曰伫立久立也王褒燕歌行长望闺中空伫立庾信哀江南赋十里五里长亭短亭海録碎事十里一长亭五里一短亭诗人玉屑鼎州沧水驿有菩萨蛮云平林漠漠烟如织云云曾子宣家有古风集此词乃太白作也见古今诗话湘山野録平林漠漠烟如织云云此词不知何人写在鼎州沧水驿楼复不知何人所撰魏道辅泰见而爱之至长沙得古集於曾子宣内翰家乃知李白所作寄园寄所寄笔谈小曲有咸阳沽酒宝钗空之句云李白作花间集乃云张泌所为未知孰是杨绘本事曲子云近传一阙云李白制即今菩萨蛮其词非白不能及此皆定其为太白之作者也胡应麟笔丛菩萨蛮之名当起於晚唐世按杜阳杂编云大中初女蛮国贡双龙犀明霞锦其国人危髻金冠璎珞被体故谓之菩萨蛮当时倡优遂制菩萨蛮曲文士亦往往声其词南部新书亦载此事则太白之世尚未有斯题何得预制其曲耶此则辨其非太白之作者也余见下首注】

忆秦娥

箫声咽秦娥梦断秦楼月秦楼月年年柳色灞陵伤别乐游原上清秋节咸阳古道音尘絶音尘絶西风残照汉家陵【一作宫】阙【三辅黄图灞桥在长安东跨水作桥汉人送客至此桥折柳赠别天宝遗事长安东灞陵有桥来迎去送皆至此为离别之地故人呼之为销魂桥雍録汉世凡东出函潼必自灞陵始故赠行者於此折柳为别也长安志乐游原在万年县南八里汉书宣帝起乐游庙在曲江北亦曰乐游原雍録唐曲江本秦隍州至汉为宣帝乐游庙亦名乐游苑亦名乐游原基地最高四望寛敞隋营京城宇文恺以其地在京城东南隅地高不便故阙此地不为居人坊巷而凿之为池以厌胜之又会黄渠水自城外南来可以穿城而入故隋世遂从城外包之入城为芙蓉池且为芙蓉园也长安中太平公主於原上置亭游赏後赐寧申岐薛四王正月晦日三月三日九月九日京城士女咸即此祓禊帘幕云布车马填塞词人乐饮赋诗蔡琰胡笳故乡隔兮音尘絶笔丛云今诗余名望江南外菩萨蛮忆秦娥称最古以草堂二词出太白也近世文人学士咸以为然予谓太白在当时直以风雅自任即近体盛行七言律鄙不肯为寧屑事此且二词虽工丽而气体衰飒于太白超然之致不啻穹壤藉令真出青莲必不作如是语详其意调絶类温方城辈盖晚唐人词嫁名太白若怀素草书李赤姑熟耳原二词嫁名太白亦有故草堂词宋人编青莲诗亦称草堂集後世以二词出唐人而无名氏故伪题太白以冠斯编耶琦按宋黄玉林絶妙词选以太白菩萨蛮忆秦娥二词为百代词曲之祖然考古本太白集中缺此二首萧本乃有之其真贋诚未易定决笔丛所辨未为未见至谓其出自草堂诗余之伪题则非也盖菩萨蛮一词自北宋时已传为太白之作矣】

李太白集注卷五

卷六

钦定四库全书

李太白集注卷六

钱塘 王琦 撰

乐府三十八首

发白马【题始於梁费?其辞曰白马今虽发黄河未结澌云云太白盖拟之乐府诗集通典曰白马春秋时卫国曹邑有黎阳津一曰白马津酈生云守白马之津是也发白马言征戍而发兵於此也】

将军发白马旌节渡黄河箫鼓聒川岳沧溟涌涛【一作洪】波武安有震瓦易水无寒歌铁骑若雪山饮流涸滹沱扬兵猎月窟转战略朝那倚劒登燕然边烽列嵯峨萧条万里外耕作五原多一扫清大漠包虎戢金戈【史记正义括地志云黎阳一名白马津在滑州白马县北三十里唐六典旌节之制命大将帅及遣使於四方则请而假之旌以专赏节以专杀唐书百官志旌以绛帛五丈粉画虎有铜龙一首纏绯幡紫缣为袋油囊为表节垂画木盘三相去数寸隅垂尺麻余与旌同箫鼓军中鼓吹之乐也史记秦伐韩赵王令赵奢救之秦军军武安西鼓噪勒兵武安屋瓦尽震荆轲歌风萧萧兮易水寒壮士一去兮不复还晋书精甲耀日铁骑前驱萧士贇曰铁骑马之带甲者郭璞山海经注今滹沱水出鴈门鹵成县南武夫山史记索隐滹沱水名并州之川也地理志云鹵城县名属代郡滹沱河自县东至参合又东至文安入海史记正义滹沱出代州繁峙县东南流经五台山北东南流过定州入海扬雄长杨赋西压月窟韵会略取也汉书张良略地唐蒙略通夜郎顔师古曰凡言略地谓行而取之史记匈奴单于十四万骑入朝那萧关正义曰汉朝那故城在原州百泉县西七十里属安定郡後汉书车骑将军窦宪出鸡鹿塞度辽将军邓鸿出□阳塞南单于出满夷谷与北匈奴战于稽落山大破之追至和渠北鞬海窦宪遂登燕然山刻石勒功而还太平寰宇记郎君戍又直北三千里至燕然山又北行千里至瀚海班固封燕然山铭序萧条万里野无遗寇汉书元鼎五年匈奴入五原杀太守元和郡县志盐州禹贡雍州之域春秋为戎翟所居地及始皇并天下属梁州汉武元朔二年置五原郡地有原五所故号五原五原谓龙游原乞地千原青岭原崱崫原横槽原也後汉书丑虏破碎遂扫厥庭北边备对汉赵信既降匈奴与之画谋令远度幕北以要疲汉军故武帝必欲越漠征之而大漠之名始通中国幕者漠也言沙积广莫望之漠漠然也汉以後史家变称为磧磧者沙积也其义一也礼记武王克殷反商倒载干戈包之以虎皮郑玄注包干戈以虎皮明能以武服兵也正义曰虎武猛之物也用此虎皮包裹兵器示武武威猛能包制服天下兵戈也或以虎皮有文欲以现文止武也诗周颂载戢干戈说文戢藏兵也 滹音呼沱音驼】陌上桑【乐府古题要解陌上桑古词曰日出东南隅照我秦氏楼旧说邯鄲女子姓秦名罗敷为邑人千乘王仁妻仁後为赵王家令罗敷出采桑陌上赵王登台见而悦之置酒欲夺焉罗敷善弹箏作陌上桑以自明不从按其歌辞称罗敷采桑陌上为使君

所邀罗敷盛夸其夫为侍中郎以拒之与旧说不同按乐府诗集张永元嘉伎録相和歌有十五曲其第十五曲曰陌上桑】

美【一作游】女渭桥东【一作湘绮衣】春还【一作还来】事蚕作五马如飞龙【一作如花飞一作飞如花】青丝结金络不知谁家子调笑来相谑妾本秦罗敷玉顔艷名都緑条映素手采桑向城隅使君且不顧况复论秋胡寒蜚爱碧草鸣凤栖青梧托心自有处但怪旁人愚徒令【文苑英华作劳】白日暮高驾空踟躕【渭桥已见五卷注鲍照诗季春梅始落工女事蚕作五马事古今说者不一据墨客挥犀云世称太守五马罕知其故事或言诗云子子干旃在浚之都素丝组之良马五之郑注谓周礼州长建旃汉太守比州长法御五马故云後见龐几先朝奉云古乘驷马车至汉时太守出则增一马事见汉官仪演繁露云太守五马莫知的据或言诗有良马五之侯国事也然上言良马四之下言良马六之则或四或六原非定制也汉有驷马车正用四马而郑玄注诗曰周礼州长建旃汉太守比州长法御五马玄以州长比方汉州大小相绝远矣周之州乃反统隶於县比汉太守品秩殊不侔不足为据然郑後汉时人则太守之用五马後汉已然矣至唐白乐天和春深二十首诗曰五匹鸣珂马双轮画轡车至其自杭分司有诗曰钱塘五马留三匹还拟骑游揽扰春杜诗亦曰使君五马一马骢则似真有五马矣若其制之所始则未有知者琦按今本毛诗郑注但云周礼州长建旃谓州长之属无汉太守比州长法御五马之文是康成未尝以太守比州长也师古杜诗注云王羲之出守永嘉庭列五马後人遂据为太守事今按晋书及古今传记羲之并未尝为永嘉太守则其说亦讹也宋人五色线集北齐柳元伯五子同时领郡时五马参差於庭故时人呼太守为五马今按罗敷行古词已有使君从南来五马立踟躕之句则非自北齐始矣潘子真诗话天子六马左右骖三公九卿驷马右骖汉制九卿则中二千石亦右骖太守相驷马而已其有功德加秩中二千石乃右骖故以五马为太守美称遯斋闲览及学林新编云汉官仪朝臣出使以驷马太守加一马故为五马与龐说相符然亦无他证确然可据唯沈约宋书引逸礼王度记曰天子驾六诸侯驾五卿驾四大夫三士二庶人一後之太守即古之诸侯故以五马为太守故实庶几近之前之数说似皆未的王融诗车马若飞龙长衢无极已古罗敷行青丝系马尾黄金络马头江淹诗不知谁家子看花桃李津曹植诗名都多妖女古罗敷行罗敷善采桑采桑城南隅汉书使君颞生杀之柄顔师古注为使者故谓之使君西京杂记鲁人秋胡娶妻三月而游宦三年休还家其妇采桑於郊胡至郊而不识其妻也见而悦之乃遗黄金一鎰妻曰妾有夫游宦不返幽闺独处三年於兹未有被辱於今日也采不顧胡慚而退至家问家人妻何在曰行采桑於郊未返既还乃向所挑之妇也郭璞尔雅注寒蜚似蝉而小青色谢朓诗余曲詎几许高驾且踟躕踟躕欲行不进之貌琦按使君且不顧况复论秋胡二句或有非之者谓不应以秋胡与使君较量盖误解此诗专咏罗敷事耳殊不知妾本秦罗敷一句是自矜身分如罗敷之贞洁耳观首句云美女渭桥东并不实指罗敷又云不知谁家子亦未切指使君通首辞句不可因此而悟乎胡孝辕谓此当善领其意政复何碍旨哉斯言可为读太白集者发凡起例之一端矣 踟音池蹰音除】枯鱼过河泣【按乐府诗集枯鱼过河泣乃杂曲歌辞古词曰枯鱼过河泣何时悔复及作书与鲂鲤相教慎出入太白拟作与古意同而以万乘徵行为戒更为深切】

白龙改常服偶被豫且制谁使尔为鱼徒劳【缪本作为】诉天帝作书报鲸鲵勿恃风涛势

涛落归泥沙翻遭蝼蚁噬万乘慎出入柏人以为诫【一作识 说苑吴王欲从民饮酒伍子胥谏曰不可昔白龙下清泠之渊化为鱼渔者豫且射中其目白龙上诉天帝天帝曰当是之时若安置而形白龙对曰我下清泠之渊化为鱼天帝曰鱼固人所射也豫且何罪夫白龙天帝贵畜也豫且宋国贱臣也白龙不化豫且不射今弃万乘之位而从布衣之士饮酒臣恐其有豫且之患矣王乃止广韵鲸大鱼也雄曰鲸雌曰鲛太平御览魏武四时食制曰东海有大鱼如山长五六丈谓之鲸鲛次有如屋者时死岸上膏流九顷其须长一丈二三尺厚六寸眸子如三升椀大骨可为方臼淮南子吞舟之鱼荡而失水则制於蝼蚁离其居也史记高祖从平城过赵赵王朝夕袒裼蔽自上食礼甚卑有子壻礼高祖箕踞詈甚慢易之赵相贯高怒八年上从东垣还过赵贯高等乃壁人柏人要之置上欲过宿心动问曰县名为何曰柏人柏人者迫於人也不宿而去 且於余切音苴鲸音擎鲛音倪胡震亨曰诫居吏切作识者误】

丁都【一作督】护歌【宋书督护歌者彭城内史徐逵之为鲁轨所杀宋高祖使府督护丁旼收敛殡埋之逵之妻高祖长女也呼旼至阁下自问敛送之事每问辄叹息曰丁督护其声哀切後人因其声广其曲焉太白拟其歌调而其意则另出】

云阳上征去两岸饶商贾吴牛喘月时拖船一何苦水浊不可饮壶浆半成土一唱都护歌心摧泪如雨万人凿【繆本作系】盘石无由达江浒君看石芒砀掩泪悲千古【元和郡县志江南道润州丹阳县本旧云阳县秦时望气者云有王气故凿之以败其势截其直道使之阿曲故曰曲阿天宝元年改为丹阳县冯衍显志赋泝淮济而上征世说满奋曰臣犹吴牛见月而喘刘孝标注今之水牛惟生江淮间故谓之吴牛也南土多暑而此牛畏热见月疑是日所以见月则喘汉书挖舟而入水顔师古注挖曳也音它拖与挖同成公绥啸赋坐盘石漱清泉李善注声类曰盘大石也毛萇诗传水涯曰浒汉书高祖隠於芒砀山泽间应劭注芒属沛国砀属梁国二县之界有山泽之固 此篇萧注谓是咏秦皇凿北坑以压天子气一事或曰为韦坚开广运潭而作借秦为喻又引吴孙权尝遣校尉陈勲将屯田及作士三万人凿句容中道自小坻至云阳西城通会市作邸阁云云胡注谓是咏润州埭牐牵挽之苦也先是润州不通江开元中刺史齐澣始移漕路京口塘下直达于江立埭收课事详澣本传澣开新河在江北瓜步者太白尝作诗颂美此则独言其苦瓜步岸卑易开润州岸高难开地势至今犹然白诗并纪实也当时汴淮运路澣并用牛曳即润州可推矣芒石棱砀石文指所凿盘石云云琦以全篇诗意参绎旧注三说皆不类即胡说亦未是考之地志芒砀诸山实产文石意者是时官司取石於此山僦舟搬运适当天旱水涸牵挽而行期令峻急役者劳苦太白悯之而作此诗督护是指当时监督之有司凿字旧本或作系字万人系盘石无由逵江浒诗旨益觉显然即作凿字谓此万夫所凿之盘石为数甚多无由即达江浒如此诠释自无碍君看石芒砀掩泪悲千古者谓芒砀产此文石千古不绝则千古尝为民累有心者能不覩之而生悲哉虽用汉书芒砀字然与汉高避匿事全然无涉也 喘音舛芒音忙砀音唐又音荡】

相逢行【一作有赠】

乐府诗相逢行乃相和歌清调六曲之一一曰相逢狭路间行亦曰长安有狭邪行】

朝【世本作胡误】骑五花马谒帝出银台秀色谁家子云车【一作中】珠箔开金鞭遥指

点玉勒近迟回夹毂相借问疑【一作知】从天上来【一本下多怜肠愁欲断斜日复相催下车何轻盈飘然似落梅四句】蹙【缪本胡本作邀】入青绮门当歌共衔杯【一作娇羞初解佩语笑共衔杯】衔杯映歌扇似月云中见相见不得【一作相】亲不如不相见相见情已深未语可知心胡为守空闺孤眠愁锦衾锦衾与罗帏纏绵会有时春风正澹荡暮雨来何迟【一作春风正纠结青鸟来何迟】愿因三青鸟更报长相思光景不待人须臾髮成丝当年失行乐老去徒伤悲持此道密意无令旷佳期【五花马详见三卷注曹植诗谒帝承明庐按雍録所载六典大明宫图紫宸殿侧有右银台门左银台门李肇记曰学士下直出门相谗谓之小三昧出银台乘马谓之大三昧三昧者释氏语言其去纏缚而得自在也用此言之则学士自出院门而至右银台门皆步行直至已出宫城银台门外乃得乘马也三辅黄图金玉珠玑为帘箔薛道衡诗卧驰飞玉勒立骑转银鞍说文勒马头络衔也古相逢行夹毂问君家水经注长安东出第三门本名霸城门民见门色青又名青城门或曰青绮门亦曰青门刘伶酒德颂捧罍承槽衔杯漱醪曹植诗妾身守空闺诗国风锦衾烂兮鲍照诗春风澹荡侠思多陈子昂诗春风正澹荡白露已清冷山海经西山经三危之山三青鸟居之郭璞注三青鸟主为西王母取食者别自栖息於此山也又大荒西经沃之野有三青鸟赤首黑目一名曰大一名曰少一名曰青鸟郭璞注皆西王母所使也古长歌行老大徒伤悲杨升庵外集载太白相逢行云此诗予家藏乐史本最善今本无怜肠愁欲断斜日复相催下车何轻盈飘然似落梅四句他句亦不同数字故备録之太白号斗酒百篇而其诗精链若此所以不可及也琦尝细校其文所谓不同数字者云车作云中疑从作知从蹙入青绮门当歌共衔杯作娇羞初解佩语笑共衔杯不得亲作不相亲他本亦有同者若近迟回作乍迟回愿因作愿言更报作却寄当年失行乐作壮年不行乐老去作老大而中间又无春风正澹荡二句则诸本皆无同者据此乐史原本明中叶时尚有存者今则断帙残编无由得覩不深可惜乎胡震亨曰相和歌本辞言相逢年少问知其家之豪盛太白则言相逢之後仍不得相亲恐失佳期回环致】

【望不已较古词用意尤为婉转离骚咏不得于君必托男女致词如云初既与余有成言兮後悔遁而有他又云日月忽其不淹兮恐美人之迟暮太白此篇诗题虽取之乐府诗意实本自离骚盖有已近君而有不得终近之意焉臣子睽隔之伤思慕之诚具见于是不可仅作艶词读也 箔音薄】

千里思【一作千里曲北魏祖叔辨作千里思其辞曰细君辞汉字王嫱即虏衢无因上林鴈但见边城芜盖为女子之远适异国者而言太白拟之另以苏李别後相思为辞】

李陵没胡沙苏武还汉家迢迢五原关朔雪乱边花【一作愁见雪如花】一去隔绝国思归但长嗟鸿雁向西北因【一作飞】书报天涯【史记李陵将步兵五千人出居延北千余里单于以兵八万围撃陵军陵军兵矢既尽士死者过半而所杀伤匈奴亦万余人且引且战连鬪八日还未到居延百余里匈奴遮狭绝道陵食乏而救兵不到遂降匈奴汉书地理志代郡有五原关太平寰宇记盐州五原郡今理五原县唐贞观二年县与州同立以其地势有五原旧有五原关因为郡邑之称江淹别赋一去絶国诘相见期李善注絶国绝远之国也琦按文选有李少卿荅苏武书李周翰注汉书曰李陵字少卿以天汉二年率步卒五千人出塞与单

于战力屈乃降在匈奴中与苏武相见武得归为书与陵令归汉陵作书荅之此诗末联正用其事又按文苑英华载唐人省试诗题有李都尉重阳日得苏属国书其事他书所不见更属异闻因附录之】

树中草【梁简文帝有树中草诗太白盖拟之也】

鸟衔野田草误入枯桑里客土植危根逢春犹不死草木虽无情因依尚可生如何同枝叶各自有枯荣【谢灵运诗青青野田草汉书客土疏恶潘岳杨仲武诔如彼危根当此冲飈胡震亨曰梁简文帝本辞幸有青袍色聊因翠幄凋虽问珊瑚蒂非是合欢条此诗虽拟旧题而借讽同根辞意尤微非复宫体物色初裁矣】

君马黄【按宋书汉鼓吹铙歌十八曲有君马黄歌】

君马黄我马白马色虽不同人心本无隔共作游冶盘双行洛阳陌长剑既照曜高冠何赭赫各有千金裘俱为五侯客猛虎落陷穽壮士【缪本作夫】时屈厄相知在急难独好亦【一作知】何益【车 骢马诗意欲骖驔走先作野游盘後汉书高冠长剑紆金怀紫潘岳射雉赋摘朱冠之赭赫徐爰注赭赫赤色貌汉纪五侯羣弟皆通敏人事好士养贤倾财施与以相高尚时谷永与齐人楼护俱为五侯上客汉书司马迁传猛虎处深山百兽震恐及其在穽檻之中摇尾而求食诗小雅兄弟急难胡震亨曰汉铙歌君马黄曲辞旧无其解後之拟者但咏马而已惟太白相知急难二语似独得其解者按本辞云君马黄臣马苍二马同逐臣马良借言我马之良喻我所效于友者较胜古者君臣之称通乎上下故也其曰美人归以南驾车驰马美人伤我心佳人归以北驾车驰马佳人安终极者美人佳人亦称其友驾车驰马南北就上马之同逐言其分驰而去以喻交之不终而一则曰伤我心一则曰安终极虽怨之不忍明言之则尤有不出恶声之意焉盖古交友相责望之词采诗者以其言之含蓄近厚故入之于乐非太白几无能发明之矣 赭音释】

拟古

融融白玉辉映我青蛾眉宝镜似空水落花如风吹出门望帝【缪本作同】子落花如风吹安得黄鹤羽一报佳人知【庾信咏镜诗光如一片水江淹诗北渚有帝子荡漾不可期吕延济注帝子娥皇女英荡漾言随波上下不可与之结期江淹去故乡赋愿使黄鹤兮报佳人】

折杨柳【文献通考鼓角横吹十五曲中有折杨柳胡震亨曰本古横吹曲辞亡梁陈後拟者皆作闺人思远戍之辞太白诗亦同此意】

垂杨【一作杨柳】拂渌水摇艷【一作艷裔】东风年花明玉关雪叶暖金窗烟美人结长想对此心凄然攀条折春色远寄龙庭前【一作沙边汉纪匈奴五月大会龙庭而祭其先祖天地鬼神】

少年子【齐王融梁吴均皆有少年子】

青云少年子挟弹章台左鞍马四边开突如流星过金丸落飞鸟【文苑英华作肉】夜入【文苑英华作深】琼楼卧夷齐是何人独守西山饿【玉海秦有章台宫苏秦传云朝於章台之下扬雄云藟生收功於章台西京杂记韩嫣好弹常以金为丸所失者日有十余长安为之语曰苦饥寒逐金丸京师儿童每闻嫣出弹辄随之望丸所落辄拾焉沈佺期诗今春芳苑游接武上琼楼史记伯夷叔齐隐於首阳山采薇而食之作歌曰登彼西山兮采其薇矣以暴易暴兮不知其非矣神农虞夏忽焉没兮我安适归矣吁嗟徂兮命之哀矣遂饿死於首阳山索隐曰西山即首阳山此篇是刺当时贵家子弟骄纵侈肆者之作末引夷齐大节以相?而叹其有天渊之隔也是何人谓彼二人亦是孤竹之贵公子乃能弃富贵如浮云甘心穷饿而无悔民到于今称之视彼狂童寧免下流之诮也耶】

紫骝马【按乐府诗集横吹十八曲中有紫骝马】

紫骝行【一作骄】且嘶双翻碧玉蹄临流不肯渡似惜锦障泥白雪关山【一作城】远黄云海戍迷挥鞭万里去安【一作何】得念【一作恋】春闺【紫骝赤色马也唐人谓之紫骝今人谓之枣骝沈佺期骢马诗四蹄碧玉片双眼黄金瞳晋书王济善解马性尝乘一马着连乾障泥前有水终不肯渡济云此必是惜障泥使人解去便渡按障泥是披马鞍旁者胡三省通监注类篇马障泥曰鞢蜀注云拥护泥泞也白雪黄云皆唐时戍名白雪戍在蜀地与吐蕃接壤杜诗屡用之黄云戍未详所在戎昱诗擒生黑山北杀敌黄云西薛逢诗岂知万里黄云戍血迸金疮卧铁衣按古今乐録紫骝马古辞曰十五从军征八十始得归道逢乡里人家中有阿谁又梁曲曰独柯不成树独树不成林念郎锦襦裆恒长不忘心盖从军久戍怀归之作也若梁简文帝梁元帝陈後主徐陵诸作但祇咏马而已太白则咏马而兼及从军远戍不恋室家之乐仍不失古辞之意障音帐亦音章】

少年行二首【乐府诗集以少年行少年子皆入杂曲歌辞中】

擊筑饮美酒剑歌易水湄经过燕太子结托并州儿少年负壮气奋烈自有时因声鲁句践争博勿相欺【一本因声作因擊争博作争情者非汉书音义筑应劭曰状似琴而大头安弦以竹擊之故名曰筑顔师古曰今筑形似瑟而细颈太平御览乐书曰筑者形如颂琴施十三弦项细肩圆品声按柱鼓法以左手扼之右手以竹尺擊之随调应律唐代编入雅乐释名曰筑以竹鼓之也如箏细项古襄阳歌举鞭问葛强何如并州儿徐悱诗少年负壮气耿介立冲冠史记荆轲游於邯鄲鲁勾践与荆轲博争道鲁勾践怒而叱之荆轲嘿而逃去至燕爱燕之狗屠及善擊筑者高渐离日与狗屠及高渐离饮於燕市酒酣以往高渐离擊筑荆轲和而歌於市中相乐也已而相泣旁若无人鲁勾践已闻荆轲之刺秦王私曰甚矣吾不知人也曩者吾叱之彼乃以我为非人也余见拟恨赋注】

其二【此首一作小放歌行】

五陵年少金市东银鞍白马度春风落花踏尽游何处笑入胡姬酒肆中【水经注凌云台西有金市北对洛阳垒艺文类聚西征记曰洛阳旧有三市一曰金市在宫西大城内太平寰宇记三市洛阳记云大市名金市在大城西南市在大城南马市在大城东按金市在临商观西兑为金故曰金市】

白鼻騊【按乐府诗集高阳乐人歌古今乐录曰魏高阳王乐人所作也又有白鼻騊盖出於此其词曰可怜白鼻騊相将入酒家无钱但共饮画地作交赊】

银【一作金】鞍白鼻騊绿池【一作池】障泥锦细雨春风花落时【一作春风细雨落花时】挥鞭直就胡姬饮【毛苌诗传黄马黑喙曰騊西京杂记武帝得贰师天马以玫石为鞍镂以金银鍮石以绿池五色锦为蔽泥绿池字本此杨升庵外集引此诗作绿池又曲为池字作解甚谬蔽泥即障泥也详见前紫骝马注中騊音瓜又音戈】

豫章行【萧士贇曰王僧虔技录相和歌清调六曲有豫章行】

胡风吹代马【一作燕人攢赤羽】北拥鲁阳关吴兵照海雪西讨何时还半渡上辽津黄云惨无颜老母与子别呼天野草间白马【一作百鸟】绕旌旗悲鸣相追攀白杨秋月苦早落豫章山本为休明人斩虏素不闲岂惜战鬪死为君扫凶顽精感石没羽岂云惮险艰楼船若鲸飞波荡落星湾此曲不可奏三军发【缪本作鬢】成斑【鲍照诗胡风吹朔雪元和郡县志鲁阳关在邓州向城县北八十里今邓汝二州於此分境荆豫径途斯为险要张景阳诗云朝登鲁阳关峡路峭且深太平寰宇记汝州鲁山县有鲁阳关淮南子云鲁阳公与韩战酣日暮援戈而挥之日为之返三舍即此地也水经注僚水又径海昏县谓之上僚水又谓之海昏江分为二水县东津上有亭为济渡之要其水东北径昌邑而东出豫章大江豫章古今记上辽津在海昏县东二十里通典豫章郡建昌县有上辽津江西志上僚水在南昌府城西北一百二十里源出建昌县经奉新县流入僚辽僚三字虽异其实一也古豫章行白杨初生时乃在豫章山鲍照芜城赋白杨早落白马绕旌旗悲鸣相追攀谓子母离别之时乘马亦为之感动而哀嘶也白杨秋月苦早吹豫章山谓见草木之凋残亦若为母子悲恻者之所感召也总以写从军者离别时情景耳尔雅闲习也汉纪李广尝猎见草中石以为伏虎射之入石没羽视之石也他日射之终不能入太平寰宇记落星山在庐山东周围一百五十步高丈许图经云昔有星坠水化为石当彭蠡湾中俗呼为落星湾一统志落星湖在江西彭蠡湖西北湖有小山相传星坠水所化陈王僧辩破侯景於落星湾即此处萧士贇曰落星湾在今南康军城之右唐时属江州及洪州輿地广记曰昔有星坠水化为石夏秋之交湖水方涨则星石浮於波澜之上隆冬水涸可以步涉寺居其上曰法安院胡震亨曰太白豫章行盖咏永王璘事而自悼也古辞云白杨初生时乃在豫章山凉秋八九月山客持斧斤根株已断绝颠倒岩石间盖白卧庐山为璘胁行及事败又于寻阳系狱其地皆属豫章故巧借此题为辞而以白杨之生落于豫章者自况写身名堕坏之痛而终不言璘之累已则犹近于厚得风人之意焉琦谓此诗盖为征戍之将士而言也按唐书来瑱传上元二年破史思明余党于鲁山俘其贼渠又战汝州获其牛马橐驼知是时汝邓之间为贼兵往来之地所谓吴风吹代马北拥鲁阳关乃安史之兵而非永王之兵也集中有中丞宋公以吴兵三千赴河南军次寻阳之文又为宋中

丞祭九江文中有遵奉王命大举天兵楼船先济士马无虞之辞是知所谓吴兵者即宋中丞所统三千之兵所谓上辽津者即楼船所济之津诗之作也当在是时无疑与永王璘事全无干涉而吴氏更于每段中必引璘事以强合之牵扯支离尽失本诗辞意矣 鲸音擎】

沐浴子【胡震亨曰沐浴子梁陈间曲也古辞澡身经兰泛濯发傖芳洲太白拟作专用楚词渔父事】

沐芳莫弹冠浴兰莫振衣处世忌太洁至【一作志】人贵藏晖沧浪有钓叟吾与尔同归【楚词渔父篇屈原既放游於江潭行吟泽畔颜色憔悴形容枯槁渔父见而问之曰子非三闾大夫欤何故至於斯屈原曰举世皆浊而我独清衆人皆醉而我独醒是以见放渔父曰夫圣人者不凝滞於物而能与世推移举世皆浊何不濯其泥而扬其波衆人皆醉何不餽其糟而歠其醪何故怀瑾握瑜而自令见放为屈原曰吾闻之新沐者必弹冠新浴者必振衣安能以身之察察受物之汶汶者乎寧赴湘流葬於江鱼之腹中又安能以皎皎之白而蒙世俗之尘埃乎渔父莞尔而笑鼓枻而去歌曰沧浪之水清兮可以濯吾缨沧浪之水浊兮可以濯吾足遂去不复与言又云中君篇浴兰汤兮沐芳】

高句骊【後汉书东夷传高句骊在辽东之东千里南与朝鲜秽貊东与沃沮北与夫余接地方二千里唐书高丽本扶余别种也地东跨海距新罗南亦跨海距百济西北度辽水与营州接北靺鞨其君居平壤城汉东乐浪郡也去京师五千里而羸石林燕语高丽自三国以来见於史者句骊其国号高其姓也隋去句字故自唐以来止称高丽】

金花折风帽白马小迟回翩翩舞广袖似鸟海东来【北史高句骊传人皆头脚折风形如弁士人加插二鸟羽贵者其冠曰苏骨多用紫罗为之饰以金银服大袖衫大口袴素皮带黄革履】

静夜思【吴震亨曰思归之辞也太白自制名】

牀前看月光疑是地上霜举头望山月低头思故乡【梁简文帝诗夜月似秋霜】

渌水曲【渌水本琴曲名太白袭用其题以写所见其实则采菱采莲之遗意也】

渌水明秋日【萧本作月】南湖采白苹荷花娇欲语愁杀荡舟人【楚辞登白苹兮骋望王逸注苹草秋生今南方湖泽皆有之尔雅翼苹叶四方中拆如十字根生水底叶敷水上五月有花白色故谓之白苹韩非子蔡女为齐桓公妻桓公与之乘舟夫人荡舟桓公大惧并载左传】

凤凰曲【与下凤台曲同意但名不同耳】

羸女吹玉箫吟弄天上春青鸾不独去更有携手人影灭彩云断遗声落西秦【列仙传箫史

者秦穆公时人也善吹箫能致孔雀白鹤於庭穆公有女字弄玉好之公遂以女妻焉日教弄玉作风鸣居数年吹似凤声凤凰来止其屋公为作风台夫妇止其上不下数年一旦皆随凤凰飞去故秦人为作风女祠於雍宫中时有箫声而已秦嬴姓也故称秦女曰嬴女陈子昂诗结交嬴台女吟弄昇天行艺文类聚决疑注曰凡象凤者有五多赤色者凤多青色者鸾多黄色者鸕雏多紫色者鸞多白色者鹄鲍照诗凤台无还驾箫管有遗声 嬴音盈】

凤台曲【按乐府诗集梁武帝制上云乐七曲其一曰凤台曲】

尝闻秦帝女传得凤凰声是日逢仙子当时别有情人吹彩箫去天借绿云迎曲【一作心】在身不返空余弄玉名从军行【乐府古题要解从军行皆述军旅辛苦之词也按乐府诗集从军行乃相和歌平调七曲之一】

从军玉门道逐虏金微山笛奏梅花曲刀开明月环鼓声鸣海上兵气拥云间愿斩单于首长驱静铁关【北史史祥出玉门道击虏破之後汉书窦宪遣左校尉耿种出居延塞围北单于於金微山破之按白帖笛有落梅花之曲顔师古汉书注单于匈奴天子之号也战国策轻卒锐兵长驱至国唐书地理志自焉耆西五十里过铁门关法苑珠林自高昌至於铁门凡经一十六国其铁门者即是汉之西屏铁门之关见汉门扇一?一卧外铁裹木加悬诸铃必掩此关实惟天固释迦方志铁门关左右石壁其色如铁铁固门屏悬铃尚在即汉塞之西门也出铁门关便至覩货逻国 单音蝉】

秋思

春阳如昨日碧树鸣黄鹂芜然蕙草暮飒尔凉风吹天秋木叶下月冷莎鸡悲坐愁羣芳歇白露凋华滋【江淹诗碧树先秋落张华禽经注仓庚今谓之黄莺黄鹂是也野民曰黄栗留语声转耳其色黧黑而黄故名黧黄诗云黄鸟以色呼也北人呼为楚雀云此鸟鸣之时蚕事方兴蚕妇以为候岁华纪丽秋风曰凉风楚辞洞庭波兮木叶下莎鸡即今之纺织娘详见四卷注楚辞苹衡槁而节离兮芳以歇而不止诗人用芳歇字本此古诗绿叶发华滋 鹂音离莎音梭】

春思

燕草如碧丝秦桑低绿枝当君怀归日是妾断肠时春风不相识何事入罗帷【萧士贇曰燕北地寒生草迟当秦地桑桑低绿之时燕草方生兴其夫方萌怀归之志犹燕草之方生妾则思君之久犹秦桑之已低绿也末句喻此心贞洁非外物所能动此诗可谓得国风不淫不诽之体矣】

秋思

燕支【缪本作阏氏】黄叶落妾望白【萧本作自】登台海上【一作月出】碧云断单于

【一作蟬聲】秋色來胡兵沙塞合漢使玉關回征客無歸日空悲蕙草摧【慎蒙名山記焉支山在陝西山丹東南五十里一名山丹山漢霍去病將萬騎涉狐奴水過焉支山即此燕支即焉支也史記正義括地志云朔州定襄縣本漢平城縣縣東北三十里有白登山山上有台名曰白登台漢書匈奴傳曰冒頓圍高帝於白登七日即此也服虔曰白登台名去平城七里如淳曰平城旁之高地若邱陵也李穆叔趙記云平城東七里有土山高百余尺方十余里亦謂此也水經注今平城東十七里有台即白登台也台南對岡阜即白登山也故漢書稱上遂至平城上白登者也為匈奴所圍處太平寰宇記白登台在雲州雲中縣東北三十里山西通志白登山在大同府大同縣城東一百四十里上有白登台即冒頓圍漢高帝處梁元帝橫吹曲云朝跋青阪道暮上白登台謂此胡注以自登台為是而訾白登台為誤恐未是單于本是匈奴位號猶中國天子稱也然在此處又作地名鮮劉昫唐書單于都護府秦漢時雲中郡地也唐龍朔三年置雲中都護府麟德元年改為單于大都護府東北至朔州五百五十七里在京師東北二千三百五十里去東都三千里之遙 單音蟬】

子夜吳歌四首【宋書子夜歌者有女子名子夜造此聲晉孝武太元中琅琊王軻之家有鬼歌子夜殷允為豫章時豫章僑人庾僧度家亦有鬼歌子夜殷允為豫章亦是太元中則子夜是此時以前人也樂府古題要解子夜舊史云晉有女子曰子夜所作聲至哀後人因為四時行樂之詞謂之子夜四時歌吳聲也】

秦地羅敷女采桑綠水邊素手青條上紅粧白日鮮蚕飢妾欲去五馬莫留連【陌上桑古辭日出東南隅照我秦氏樓秦氏有好女自名為羅敷羅敷善采桑采桑城南隅青絲為籠系桂枝為籠鉤頭上倭墮髻耳中明月珠綰綺為下裙紫綺為上襦使君從南來五馬立踟躕使君遣吏往問是誰家姝秦氏有好女自名為羅敷羅敷年幾何二十尚不足十五頗有余使君謝羅敷寧可共載不羅敷前致辭使君一何愚使君自有婦羅敷自有夫梁武帝子夜四時歌君住馬已疲妾去蚕欲飢 胡震亨曰清商吳曲子夜歌後人更為子夜四時等歌其歌本四句太白擬之六句為異然當時歌此者亦自有送聲有變頭則古辭故未可拘矣】

其二

鏡湖三百里菡萏發荷花五月西施采人看隘若耶回舟不待月歸去越王家【通典漢順帝永和五年馬臻為會稽太守創立鏡湖在會稽山陰兩縣界筑塘蓄水水高田丈余田又高海丈余若水少則泄湖灌田如水多則閉湖泄田中水入海所以無凶年其堤塘周圍三百一十里都溉田九千余頃毛萇詩傳菡萏荷花也說文芙蓉未發為菡萏已發為芙蓉方輿勝覽若耶溪在會稽縣東南二十五里北流與鏡湖合西施采蓮歐冶鑄劍之所 菡戶感切音憾萏徒感切談上聲】

其三

長安一片月萬戶搗衣聲秋風吹不盡總是玉關情何日平胡虜良人罷遠征【詩國風見此良人正義曰妻謂夫曰良人】

其四

明朝驿使发一夜絮征袍素手抽针冷那堪把剪刀裁缝寄远道几日到临洮【曹植诗发篋造裳衣裁缝纨与素唐时临洮郡即洮州也属陇右道与吐番相近有莫门军神策军在古为西羌之地 洮音桃又音叨】

对酒行【缪本少行字 乐府诗集张永元嘉伎録相和歌十五曲其十曰对酒行乐府古题要解对酒行阙古辞曹魏乐奏武帝所赋对酒歌太平其旨言王者德泽广被政理人和万物咸遂若范云对酒心自足则言但当为乐勿徇名自欺也太白此诗以浮生若电对酒正当乐饮为辞似拟短歌行对酒当歌之一篇也】

松子栖金华安期入蓬海此人古之仙羽化竟何在浮生速流电倏忽变光彩天地无雕换容颜有迁改对酒不肯饮含情欲谁待【元和郡县志金华山在婺州金华县北二十里赤松子得道处路史酈氏水经注谓赤松子游金华山自烧而化故今山上有赤松坛曹植诗虚无求列仙松子久吾欺阮籍诗安期步天路松子与世违称赤松子曰松子本此抱朴子安期先生者卖药於海边琅琊人传世见之计已千年秦始皇请与语三日三夜其言高其旨远博而有证始皇异之乃赐之金璧可值数千万安期受而置之於阜乡亭以赤玉舄一两为报留书曰复数千岁求我於蓬莱山道家谓仙去曰羽化陶潜诗一生复能几倏如流电惊费?诗人生百年如流电陶潜诗有酒不肯饮王仲宣诗今日不极欢含情欲待谁李善注含情谓含其欢情而不畅也】

估客行【缪本作估客乐 通典估客乐者齐武帝之所制也武帝布衣时常游樊邓登阡以後追忆往事而作歌曰昔经樊邓役阻潮梅根渚感忆追往事意满情不叙梁改其名为商旅行】

海客乘天风将船远行役譬如云中鸟一去无踪迹【胡震亨曰估客行即西曲之估客乐西曲中有长檣铁鹿子布帆阿那起谿依安在间一去数千里此云一去无踪迹更难为情】

捣衣篇

闺里佳人年十余嚙蛾对影恨离居忽逢江上春归日衔得云中尺素书玉手开缄长叹息狂【胡本作征】夫犹戍交河北万里交河水北流愿为双鸟【萧本作燕】泛中洲君边云拥青丝骑妾处苔生红粉粧楼上春风日将歇谁能揽镜看愁髮晓吹员【胡本作簫】管随落花夜捣戎衣向明月明月高高刻漏长真珠帘箔掩兰室横垂宝幄同心结半拂琼筵苏合香琼筵宝幄连枝锦灯烛荧荧照孤寝有使【萧本作便】凭将金剪刀为君留下相思枕摘尽庭兰不见君红巾拭泪生【胡本缪本作坐】氤氲明年若更【缪本作更若】征边塞愿作阳台一段云【嚙蛾蹙眉也古诗同心而离居忧伤以终老江淹诗袖中有短书愿寄双飞燕古诗中有尺素书吕向注尺素绢也古人为书多书於绢汉书车师前国王治交河城河水分流绕城下故号交河去长安八千一百五十里元和郡县志交河县本汉车师前王庭也贞观

十四年於此置交河县交河出县北天山水分流於城下因以为名按新唐书陇右道有西州交河郡都督府贞观十四年平高昌以其地置开元中改曰金山都督府天宝元年改为郡有县五一日交河县自县北出四百余里至北庭都护府府有瀚海军清海军神山镇沙鉢城即勒城等处十守捉其地水皆北流入碛及入夷播海楚词蹇谁留兮中洲王逸注中洲洲中也水中可居者为洲刘孝绰诗未见青丝骑徒劳红粉粧杜审言诗红粉楼中应计日燕支山下莫经年毛诗正义漏刻谓置箭壶内刻以为节而浮之水上令水漏而刻下以记昼夜昏明之度数也十六国春秋胡据盗发张骏墓得真珠帘箔南都赋宴於兰堂吕延济注兰者取其芬芳也沈约为竟陵王发讲疏星罗宝幄云开梵篷飞燕外传赵婕妤奏书於后奉五色同心大结一盘谢朓诗琼筵妙舞絶法苑珠林苏合香续汉书曰大秦国合诸香煎其汁谓之苏合广志曰苏合香出大秦国或云苏合国国人采之笮其汁以为香膏乃卖其滓与贾客或云合诸香草煎为苏合非自然一种物也傅子曰西国胡言苏合香者兽所作也中国皆以为怪鲍令暉诗临当欲去时复留相思枕刘孝威诗红巾向後结金簪临鬟斜胡三省通监注富贵之家帨巾率以胭脂染之为真红色唐之遗俗也阳台云用巫山神女语见二卷注
嘖音贫緘音兼戍音怨塞音赛】

少年行

君不见淮南少年游侠客白日球猎夜拥掷呼卢百万终不惜报讎千里如咫尺少年游侠好经过浑身【萧本作成】装束皆绮罗兰蕙相随喧妓女风光去处满笙歌骄矜自言不可有侠士堂中养来久好鞍好马乞与人十千五千旋沽酒赤心用尽为知己黄金不惜栽桃李桃李栽来几度春一回花落一回新府县尽为门下客王侯皆是平交人男儿百年且乐命何须徇【胡本作读】书受贫病男儿百年且荣身何须徇节甘风尘衣冠半是征战【文苑英华作战征】士穷儒浪作林泉民遮莫枝根长百丈不如当代多还往遮莫姻亲【缪本作亲姻】连帝城不如当身自簪缨看取富贵眼前者何用悠悠身後名【珊瑚钩诗话擣菹今谓之呼卢取纯色而胜之之义以名之耳说文八尺谓之咫徐陵与裴之横书文辞简略礼等平交三国志先轸丧元王蠋絶脰殒身徇节前代美之徇谓以身从物也鹤林玉露诗家用遮莫字盖今俗语所谓尽教是也渔隐丛话艺苑雌黄云遮莫俚语犹言尽教也自唐以来有之故当时有遮莫你古时五帝何如我今日三郎之说然词人亦稍有用之者杜诗云久野鹤如霜鬓遮莫隣鸡下五更李太白诗云遮莫枝根长百丈不如当代多还往遮莫亲姻连帝城不如当身自簪缨汉书陈万年传即蒙子公力得入帝城严沧浪曰此诗只数句类太白余皆浅近浮俗决非太白所作萧士贇曰末章十二句辞意迫切似非太白之作巨眼者必能辨之】长歌行【按乐府诗集长歌行乃相和歌平调七曲之一乐府古题要解长歌行古辞青青园中葵朝露待日曦言荣华不久当努力为乐无至老大乃伤悲也曹魏文帝西山一何高言仙道洪蒙不可识如王乔赤松皆空言虚词迂怪难信当观圣道而已晋陆士衡逝矣经天日复言人运短促当乘闲长歌不与古文合太白此篇乃与古意相符】

桃李得【萧本作待】日开荣华照当年东风动百物草木尽欲言枯枝无丑叶涸水吐清泉大力运天地羲和无停鞭功名不早着竹帛将何宣桃李务青春谁能贵【萧本作□】白日富贵与神仙蹉跎成两失金石犹销铄风霜无久质畏落日月後强欢【萧本作饮非】歌与

酒秋霜不惜人倏忽侵蒲柳【说文涸竭也广雅日御谓之羲和竹帛已见五卷注说文贯贷也世说顾悦与简文同年而发早白简文曰卿何以先白对曰蒲柳之姿望秋而落松柏之姿经霜愈茂涸音鹤贯音世或音赦】

长相思

日色欲【一作已】尽花含烟月明如【一作欲非】素愁不眠赵瑟初停凤凰柱蜀琴欲奏鸳鸯弦此曲有意无人传愿随春风寄燕然忆君迢迢隔青天昔时横波目今作【缪本作为】流泪泉不信妾肠断归来看取明镜前【王勃诗狭路尘间黯将暮云开月色明如素吴均诗赵瑟凤凰柱吴酈金罍尊杨齐贤曰凤凰柱刻瑟柱为凤凰形也鲍照诗蜀琴抽白雪汉书匈奴传贰师引兵还至速邪乌燕然山颜师古注速邪乌地名也燕然山在其中燕音一千反後汉书窦宪传遂登燕然山去塞三千余里刻石勒功纪汉威德是知燕然山为汉北极远之地又唐时有燕然州寄在灵州回乐县界是突厥九姓部落所处见刘昫唐书地理志傅毅舞赋目流睇而横波李善注横波言目邪视如水之横流也王筠诗泪满横波目】

猛虎行【一作猛虎吟按乐府诗集王僧?技録相和歌平调七曲内有猛虎行古辞云饥不从猛虎食暮不从野雀栖野雀安无巢游子为谁骄盖取首句二字以命题也】

朝作猛虎行暮作猛虎吟【一作行亦猛虎吟坐亦猛虎吟】肠断非关陇头水泪下不为雍门琴旌旗【缪本作旌旌误旌字即旌字也】缤纷两河道战鼓惊山欲倾【萧本作颠】倒秦人半作燕地囚胡马翻衔洛阳草一输一失关下兵朝降夕叛幽蓟城巨鳌未斩海水动鱼龙奔走安得宁【陇头歌陇头流水鸣声幽咽遥望秦川肝肠断绝详见二卷注说苑雍门子周以琴见孟尝君孟尝君曰先生鼓琴亦能令文悲乎雍门子周曰臣之所能令悲者穷穷焉固无乐已臣一为之徽胶援琴而长太息则流涕沾襟矣今若足下千乘之君也虽有善鼓琴者固未能令足下悲也然臣之所为足下悲者事也夫声敌帝而困秦者君也连南面之约南面而伐楚者又君也天下未尝无事不从则横从成则楚王横成则秦帝楚王秦帝而报讐於弱薛譬之摩萧刀而伐朝菌也必不留行矣天下有识之士无不为之寒心者千秋万岁之後庙堂必不血食矣高台既以坏曲池既以渐坟墓既以下而青廷矣婴儿?子樵采薪尧者蹢躅其足而歌其上衆人见之无不愀焉为足下悲之曰夫以孟尝君尊贵乃可使若此乎於是孟尝君泫然泣涕承睫而未陨雍门子周引琴而鼓之徐动宫徵微挥羽角切终而成曲孟尝君涕浪污增欷而就之曰先生之鼓琴令文若破国亡邑之人也家语旌旗缤纷下蟠於地韵会缤纷杂乱之貌一曰盛也两河道谓河南河北两道也太平御览三秦记曰荆轲入秦为燕太子报仇把秦王衣袖曰寧为秦地鬼不为燕地囚通监天宝十四载十一月安禄山发所部兵及同罗奚契丹室韦凡十五万衆反於范阳引兵而南步骑精锐烟尘千里鼓噪震地时海内久承平百姓累世不识兵革猝闻范阳兵起远近震骇所过州县望风瓦解十二月陷东京丙戌高仙芝将五万人发长安上遣宦者边令诚监其军屯于陕会封常清战败帅余衆至陕谓仙芝曰潼关无兵若贼豕突入关则长安危矣陕不可守不如引兵先据潼关以拒之仙芝乃帅见兵西趣潼关贼寻至官军狼狈走无复部伍士马相腾践死者甚衆至潼关修完守备贼至不得入而去临汝弘农济陰濮阳云中诸郡皆降於禄山边令诚入奏事具言仙芝常清

挠败之状且云常清以贼摇衆而仙芝弃陕地数百里上大怒遣令诚齎勅即军中斩仙芝常清太白意以仙芝不战而走损伤士马既一输矣明皇不责以桑榆之效而按以失律之诛非又一失着乎盖高将本非孱帅弃灵宝而守潼关旧史谓贼骑至关已有备不能攻而去仙芝之力也是其策亦非谬计自出军至被戮仅仅十八日驱乌合之兵当鸱张之虏为日无多徒以宦者一言而遽弃干城之将太白盖深以为非矣又按通监十二月常山太守颜杲卿起兵命崔安石等徇诸郡云大军已下井陘朝夕当至先平河北诸郡先下者赏後至者诛於是河北诸郡响应凡十七郡皆归朝廷其附禄山者唯范阳卢龙密云渔阳汲邺六郡而已杲卿起兵裁八日守备未完史思明蔡希德引兵擊诸郡之不从者所过残灭於是广平钜鹿赵上谷博陵文安魏信都等郡复为贼守朝降夕叛幽蓟城皆指此事旧注引史思明归降复叛事非是】颇似楚汉时翻覆无定止朝过博浪沙暮入【文苑英华作宿】淮陰市张良未遇韩信贫刘项存亡在两臣暂到下邳受兵略来投漂母作主人贤哲【文苑英华作达】栖栖古如此今时亦弃【文苑英华作今将弃擲】青云士有策不敢犯【文苑英华作干】龙鳞窜身南国避胡尘宝书玉【文苑英华作长】剑挂【文苑英华作束】高阁金鞍骏马散故人昨日方为宣城客掣铃交通二千石有时六博快壮【一作寸】心遶牀三匝呼一擲【潜夫论留侯张良韩公族姬姓也秦始皇灭韩良散家货千万为韩报仇击始皇於博浪沙中误椎副车秦索贼急良乃变姓为张匿於下邳遇神仙黄石公遗之兵法及沛公之起也良往属焉史记韩信淮陰人也钓於城下诸母漂有一母见信饥饭信竟漂数十日信谓漂母曰吾必有以重报母母曰吾哀王孙而进食岂望报乎汉五年信为楚王至国召所从食漂母赐千金韦昭曰以水击絮为漂晋书熊远传刘项存亡在此一举韩非子夫龙之为虫也可扰狎而骑也然其喉下有逆鳞径尺人有婴之则必杀人人主亦有逆鳞说之者能无婴人主之逆鳞则几矣春秋考异邈孔子使子夏等十四人求周史记得百二十国宝书说苑襄成君衣翠衣带玉剑唐时官署多悬铃於外有事报闻则引铃以代传呼掣曳也掣铃即引铃也汉书郡守掌治其郡秩二千石景帝中二年更名太守册府元龟二千石者今之刺史也史记鬪鸡走狗六博蹋鞠索隐曰王逸云博着也行六棋故云六博说文簿局戏也六箸十二棋也古者乌冑作簿晋书刘毅於东府聚博太擲一判应至数百万余人并黑犊以还惟刘毅次擲得雉大喜褰衣遶牀叫谓同坐曰非不能卢不事此耳 邳音批掣音彻】楚人每道张旭奇心藏风云世莫知三吴邦伯皆【一作多】顾盼【许本作盼胡本繆本作眄】四海雄【文苑英华作豪】侠两追随【一作皆相推胡本作相追随】萧曹曾【文苑英华作亦】作沛中吏攀龙附凤当【文苑英华作皆】有时溧阳酒楼三月春杨花茫茫【一作漠漠】愁杀人胡雏緑眼吹玉笛吴歌白紵飞梁尘丈夫相见【一作到处】且为乐槌牛挝鼓会衆宾我从此去钓东海得鱼笑寄情相亲【宣和书谱张旭苏州人官至长史初为尝熟尉时有老人持牒求判信宿又来旭怒而责之老人曰爱公墨妙欲家藏无他也老人因复出其父书旭视之天下奇笔也自是尽其法旭喜酒叫呼狂走方落笔一日酒酣以发濡墨作大字既醒视之自以为神不可复得尝言初见担夫争道又闻鼓吹而知笔意及观公孙大娘舞剑然後得其神其名本以颠草至於小楷行书又复不减草字之妙其草字虽奇怪百出而求其源流无一点画不该矩者或谓张颠不颠者是也後之论书凡欧虞褚薛皆有异论至旭无非短者水经注吴後分为三世号三吴吴兴吴郡会稽也书召诰命庶殷侯甸男邦伯孔传曰邦伯方伯即州牧也史记曹参者沛人也秦时为沛狱掾而萧何为主吏居县为豪吏矣汉书攀龙附凤并乘天衢溧阳县以在溧水之阳而名本汉旧县属丹阳郡唐时属江南道之宣州晋书白紵舞按舞辞有巾袍

之言紵本吳地所出宜是吳舞也晉俳歌又云皎皎白緒节节为双吳音呼緒为紵疑白紵即白緒也七略漢興魯人虞公善雅歌发声尽动梁上尘史记魏尚为云中守五日一椎牛飧宾客军吏舍人说文椎擊也韵会挝擊也庄子任公子投竿东海旦旦而钓琦按是诗当是天宝十五载之春太白与张旭相遇於溧阳而太白又将遨游东越与旭宴别而作也於时禄山叛逆河北河南州郡相继陷没故有旌旗缤纷两河道战鼓惊山欲倾倒之句高仙芝所率之兵多关中子弟今既败走半为贼所擒虏故有秦人半作燕地囚之句又唐书李泌传言贼掠子女玉帛悉送范阳是又燕地囚之一证也东京既陷则胡骑充斥徧於郊圻故有胡马翻街洛阳草之句明皇听宦者之讒不责仙芝以孟明之效而即加以子玉之诛是贼再胜而官军再败也故有一输一失关下兵之句常山太守顏杲卿起兵讨贼河北十七郡皆归朝廷及常山破败河北诸郡复为贼守故有朝降夕叛幽蓟城之句禄山方炽未能授首天下将帅疲於奔命故有巨鳌未斩海水动鱼龙奔走安得寧之句以下泛引张韩未遇之事以起已之怀长策而见弃当时窜身南国流寓宣城书剑萧条仅寄壮心於六博宜其有肠断泪下之悲矣张旭以下六句皆是美旭之词旭尝为常熟尉故以沛中豪吏比之而赏其胷藏风云知其必有遇合之时也溧阳酒楼指其相会之地三月杨花记其相遇之时丈夫相见且为乐槌牛挝鼓会衆宾想见一时在会诸人多有四海雄侠非握胝俦伍倾心倒意其乐宜矣而太白如此又将东越之游故曰我从此去钓东海得鱼笑寄情相亲以示眷念不忘之意诗之大旨最为明晰杨萧二氏以秦人半作燕地囚为西京破後之事一输一失关下兵为哥舒翰灵宝败绩潼关失守朝降夕叛幽蓟城为史思明奉表归降已复背叛此皆十五载春三月以後事引证殊欠甄确或谓天宝十五载以前长安未破则与秦人半作燕地囚之句不合河北十七郡虽归朝廷而幽州乃范阳郡蓟州乃渔阳郡二州实为贼守则与朝降夕叛幽蓟城之句不合似未可以旧说为非也琦按刘昫唐书高仙芝领飞骑彊骑及朔方河西陇西应赴京兵马并召募关辅五万人继封常清出潼关进讨是其兵多秦人也既败之後半为燕人囚执据此引证有何不合至於河北一道俱为禄山所管辖之地故举其大势而言曰幽蓟又按唐书地理志河北道盖古幽冀二州之境蓟字或是冀字之讹亦未可定若必据文责实则思明之以幽蓟降也在至德二载之十二月其叛也在乾元元年之十月相去一年朝降夕叛之句与此亦不相合而与杲卿起兵八日之间而诸郡降叛相寻则甚当矣况思明背逆之时在太白流夜郎之後诗中并无一语言及而窜身南国作客宣城正天宝十五载时事乃历历言之故予断以为是年所作而无疑耳或曰张旭生卒诸书皆无考何以知是时尚在而与白相遇耶琦按长史有乾元二年帖见山谷集中据此诗推之则其时尚在可知矣至萧氏訾此诗非太白之作以为用事无伦理徒尔肆为狂诞之词首尾不相照脉络不相贯语意斐率悲欢失据必是他人诗窜入集中者苏东坡黄山谷於怀素草书悲来乎笑矣乎等作尝致辨矣愚於此篇亦有疑焉今细閱之其所谓无伦理肆狂诞者必是楚汉翻覆刘项存亡等字疑其有高视禄山之意而不知正是伤时之不能收揽英雄遂使逆?得以苍狂耳何为以数字之辞而害一章之意耶至其悲也以时遇之艰其欢也以得朋之庆两意本不相碍首尾一贯脉络分明浩气神行浑然无迹有识之士自能别之盼普患切攀去声盼音系眇音免三字音既不同义亦各别世多混书非也槌与追同传追切音鎚挝职瓜切音髻】

去妇词

古来有弃妇弃妇有归处今日妾辞君辞君遣何去本家零落尽痛哭来时路忆昔未嫁君闻君却周旋绮罗锦绣段有赠黄金千十五许嫁君二十移所天自从【二字衍文】结髮日未几离君缅山川家家尽欢喜孤妾长自怜幽闺多怨思盛色无十年相思若循环枕席生流泉【张衡四愁诗美人赠我锦绣段李善文选注蔡伯喈女赋曰当三春之嘉月将言归於所天列女传妇人未嫁则以父母为天既嫁则以夫为天方宏静曰去妇词本五言诗自从二字必衍文也後又云自从离别久岂得重用苏武诗结髮为夫妇李善注结发始成人也谓男年二十女年十五时笄冠为义也琦按古人结发事君结发与匈奴战之类皆谓髮初起胜冠笄时後人专指夫妇之少年偕婚者曰结髮盖祖用苏诗耳广韵缅远也王筠诗幽闺多怨思停织坐娇春傅玄怨歌行情思如循环忧来不能遏刘琨扶风歌据鞍长叹息泪下如流泉缅音勉】流泉咽不扫独梦关山道及此见君归君归妾已

老物情【繆本作华】恶衰贱新宠方妍好掩泪出故房伤心剧秋草自妾为君妻君东妾在西罗帏到晓恨玉貌一生啼自从离别久不觉尘埃厚常嫌玳瑁孤犹羨鸳鸯偶岁华逐霜霰贱妾何能久寒沼落芙蓉秋风散杨柳以【许本作似】此顛顛顔空持旧物还余生欲何寄谁肯相牵攀【酉阳杂俎不再交者虎鸳与玳瑁也桂海虞衡志玳瑁形如龟鼃背甲十三片黑白斑文相错鳞差以成一背其边裙阙啮如锯齿无足而有四鬣前两鬣长状如楫後两鬣极短其上皆有鳞甲以四鬣櫂水而行尔雅翼鸳鸯鳬属也雄名为鸳?名为鸯?雄未尝相舍飞止相匹人得其一则其一思而死其大如鸞其质杏黄色头戴长白毛垂之至尾尾与翅俱黑谢朓诗岁华春有酒说文霰稷雪也初学记雨与雪杂下曰霰 剧音极瑁音妹霰音线】君恩既断绝相见何年月悔倾连理杯虚作同心结女萝附青松贵欲相依投浮萍失绿水教作若为流不叹君弃妾自叹妾缘业忆昔初嫁君小姑才倚牀今日妾辞君小姑如妾长回头语小姑莫嫁如兄夫【江总诗未眠解着同心结欲醉那堪连理杯焦仲卿诗新妇初来时小姑始扶林今日被驱遣小姑如我长萧士贇曰此篇是顾况弃妇辞也後人添增数句窜入太白集中语俗意重斧凿之痕班班可见】

李太白集注卷六

卷七

钦定四库全书

李太白集注卷七

钱塘 王琦 撰

古近体诗共二十八首

襄阳歌

落日欲没岷山西倒着接?【一作行客辞归】花下迷襄阳小儿齐拍手拦街争唱白铜鞮旁人借问笑何事笑杀山公【萧本作翁】醉似泥【岷山接?白铜鞮山公醉俱见五卷襄阳曲注汉官仪一日不斋醉如泥 岷胡典切贤上声鞮音题】鸛鵒杓鸛鵒杯百年三万六千日一日须倾三百杯遥看汉水鸭头绿【缪本作淥】恰似葡萄初醖醕此江若变作春酒垒麴便筑糟丘台千金骏马换小【缪本作少】妾笑【缪本作醉】坐雕鞍歌落梅车旁侧挂一壶酒凤笙龙管行相催咸阳市中叹黄犬何如月下倾金罍【杨齐贤曰鸛鵒水鸟其颈长刻杓爲之形太平广记鸛鵒螺旋尖处屈而朱如鸛鵒觜故以爲名殼上青绿斑大者可受二升殼内光莹如云母装爲酒盃奇而可玩薛道衡诗同倾鸛鵒杯琅嬛记金母召羣仙宴於赤水坐有碧玉鸛鵒杯白玉鸛鵒杓杯乾则杓自挹欲饮则杯自举故太白诗云鸛鵒杓鸛鵒杯非指广南海螺杯也谢氏诗源亦载此事说颇新僻然他书未有言及者恐是因太白诗语而伪造此事未可知也郑康成一饮三百杯见三卷注顔师古急就篇注春草鸡翘鳧翁皆谓染采而色似之若今染家言鸭头绿翠毛碧云博物志西域有蒲萄酒积年不败彼俗云可十年饮之醉弥日乃解演繁露钱希白南部新书曰太宗破高昌收马乳蒲萄种於苑中并得酒法仍自损益之造酒绿色长安始识其味太白命蒲萄之酒以爲绿者盖本此也庾信春赋石榴聊泛卜萄醖醕广韵醖醕醕酒也醕酒未漉也韵会醕谓之醖又云醕重酿酒也然则醖醕者其重酿之酒而未漉者欤诗国风爲此春酒论衡紂沉湎於酒以糟爲丘以酒爲池韩诗外传桀爲酒池可以运舟糟丘足以望十里独异志後魏曹彰性倜傥偶逢骏马爱之其主所惜也彰曰予有美妾可换惟君所选马主因指一妓彰遂换之风俗通谨案世本随作笙长四寸十三簧像凤之身正月之音也咸阳市中叹黄犬李斯事详拟恨赋注诗国风我姑酌彼金罍孔穎达正义罍制韩诗说金罍大夫器也天子以玉诸侯大夫皆以金士以梓毛诗说金罍酒器也诸臣之所酬人君以黄金饰尊大一硕金饰龟目盖刻爲云雷之象 鸛音慈醖音拔醕音坏罍音雷】君不见晋朝羊公一片石【缪本作一片古碑材】gui头剥落生莓苔泪亦不能爲之堕心亦不能爲之哀【缪本於哀字下多谁能忧彼身後事金鳧银鸭葬死灰二句】清风朗月不用一钱买玉山自倒非人推舒州杓力士铛【一作黄金爵白玉瓶】李白【一作酒仙】与尔同死生襄王云雨今安在江水东流猿夜声【世说注晋诸公赞曰羊祜在南夏吴人悦服称曰羊公莫敢名者晋书羊祜乐山水每风景必造岷山置酒言咏终日不倦卒时年五十八襄阳百姓於岷山祜平生游憩之所建碑立庙岁时享祭焉望其碑者莫不流涕杜预因名

爲墮泪碑朝野金載温子昇作韩陵山寺碑庾信见而写其本南人问信曰北方文字何如信曰惟有韩陵山一片石堪共语韵会莓苔也世说嵇叔夜之爲人也岩岩若孤松之独立其醉也傀俄若玉山之将崩新唐书地理志舒州同安郡隶淮南道土贡酒器铁器又韦坚传有豫章力士甃饮器茗铛釜楚襄王与宋玉游於云梦之台望高唐之观其上独有云气王以问玉玉对以巫山神女旦爲朝云暮爲行雨事详见一二卷注 莓音梅铛音撑】

南都行【文选有张衡南都赋李善注摯虞曰南阳郡治宛在京之南故曰南都按南阳是光武旧里卽位之後建都洛阳以南阳爲别都谓之南都】

南都信佳丽武阙横西关白水真人居万商罗酆闌高楼对紫陌甲第连青山此地多英豪邈然不可攀陶朱与五羖名播天壤间丽华秀玉色汉女娇朱顏清歌遏流云艷舞有余闲遨游盛宛洛冠盖随风还走马红阳城呼鷹白河湾谁识卧龙客长吟愁鬢斑【张衡南都赋尔其地势则武阙关其西桐栢揭其东李善注武阙山为关而在西弘农界也後汉书王莽篡位忌恶刘氏以钱文有金刀故改爲货泉或以货泉字为白水真人宋书王莽忌恶汉而钱文有金乃改铸货泉以易之既而光武起於舂陵之白水乡货泉之文为白水真人也元和郡县志後汉世祖宅在随州枣阳县东南三十里宅南三里有白水东京赋所谓龙飞白水也汉书南阳其俗夸奢上气力好商贾蜀都赋市酆所会万商之渊赵岐孟子注?市宅也说文闌市垣也刘孝绰诗紆余出紫陌迢迢度青楼汉书霍光传赏赐甲第一区释常谈好宅谓之甲第甲者首也史记越世家范蠡怀其重宝间行以去止於陶以爲此天下之中交易有无之路通爲生可以致富矣於是自谓陶朱公秦本纪晋献公灭虞虢百里奚以爲秦穆公夫人媵於秦百里奚亡秦走宛楚鄙人执之繆公闻百里奚贤欲重赎之恐楚人不与乃使人谓楚曰吾媵臣百里奚在焉请以五羖羊皮赎之楚人遂许与之当是时百里奚年已七十余繆公释其囚与语国事三日繆公大悦授之国政号曰五羖大夫史记集解素王妙论曰范蠡南阳人史记正义百里奚南阳宛人水经注百里奚宛人也於秦爲贤大夫所谓迷虞智秦者也又曰宛城南三十里有一城名三公城城侧有范蠡祠蠡宛人祠卽故宅也後汉书光烈阴皇后讳丽华南阳新野人初光武适新野闻后美心悅之後至长安见执金吾车骑甚盛因叹曰仕宦当作执金吾娶妻当得阴丽华更始元年遂纳后於宛当成里列子薛谭学讴於秦青未穷青之技自谓尽之遂辞归秦青勿止饒於郊衢抚节悲歌声振林木响遏行云谢朓诗宛洛佳遨游春色满皇州古诗驱车策弩马游戏宛与洛李周翰注宛南阳也洛洛阳也曹植诗轻裾随风还汉书地理志南阳郡有红阳侯国张景阳七命驾红阳之飞燕骖唐公之驪驪一统志清水在南阳府城东三里俗名白河其源出自嵩县双鸡岭东南流经南阳新野会梅溪洱灌湍水留山黄渠栗鸭泗潦刁等河与泌水合流南至襄阳入汉江三国志诸葛亮字孔明躬耕陇亩好为梁父吟先主屯新野徐庶谓先主曰诸葛孔明者卧龙也将军岂愿见之乎汉晋春秋亮家於南阳之邓县在襄阳城西二十里号曰隆中出师表所谓臣本布衣躬耕南阳是也酆音纏酆音环陌音麦】

江上吟【一作江上游】

木兰之枻沙棠舟玉箫金管坐两头美酒樽【一作当】中置千斛载妓随波任去留【繆本

作流非】仙人有待乘黄鹤海客无心随【一作狎】白鸥屈平词赋悬日月楚王台榭空山丘兴酣落笔摇五岳诗成笑【缪本作啸】傲凌沧洲功名富贵若长在汉水亦应西北流【楚辞桂櫂兮兰枻王逸注枻船旁板也韵会枻楫也一曰桡刘逵蜀都赋注木兰大树也叶似长生冬夏荣常以冬花其实如小柿甘美南人以爲梅其皮可食述异记汉成帝与赵飞燕游太液池以沙棠木爲舟其木出崑仑山食其实入水不溺沈约诗金管玉柱响洞房穆天子传献酒千斛郭璞山海经赞安得沙棠制爲龙舟聊以逍遥任波去留吴书郑泉博学有奇志而性嗜酒其闲居每曰愿得美酒满五百斛船以四时甘脆置两头反覆没饮之惫即住而啖肴膳酒有斗升减随即益之不亦快乎太白诗意盖出於此萧士贇曰黄鹤楼在鄂州西南隅黄鹤山上南齐志云仙人子安乘黄鹤过此一统志黄鹤楼在武昌府城西黄鹤矶上世传仙人子安乘黄鹤过此又云费文祿登仙驾黄鹤返憩於此唐阎伯理作记以文祿爲信或者又引述异记谓驾鹤之宾是荀叔伟後人误作费文祿今按述异记荀瓌字叔伟尝东游憩江夏黄鹤楼上望西南有物飘然降自霄汉俄顷已至乃驾鹤之宾也鹤止户侧仙者就席羽衣虹裳宾主欢对已而辞去跨鹤腾空而灭是言叔伟於此遇驾鹤之仙非谓驾鹤之仙即叔伟也又或以与蜀汉之大将军费祿字文伟者其姓字相同遂驳其既爲降人郭循所害何以又能登仙驾黄鹤返憩此楼夫古今同姓名者甚多安得谓此二人即是一人以此相难更属孟浪列子海上之人有好鸥鸟者每旦之海上从鸥鸟游鸥鸟之至者百住而不止班孟坚离骚经序屈原之文弘博丽雅爲辞赋宗後世莫不斟酌其英华则象其从容自宋玉唐勒景差之徒汉兴枚乘司马相如刘向扬雄骋极文辞好而悲之自谓不能及也刘歆荅扬雄书是悬诸日月不刊之书也楚王台榭若章华台阳云台之类皆楚君所尝游憩者郑康成礼记注闔者谓之台有木者谓之榭是榭乃台上有屋者也琦按仙人一联谓笃志求仙未必即能冲举而忘机狎物自可纵适一时屈平一联谓留心着作可以传千秋不刊之文而溺志豪华不过取一时盘游之乐有孰得孰失之意然上联实承上文泛舟行乐而言下联又照下文兴酣落笔而言也特以四古人事排列於中顿觉五色迷目令人骤然不得其解似此章法虽出自逸才未必不少加惨淡经营恐非斗酒百篇时所能构耳 榭以制切音曳榭音谢】

侍从宜春苑奉诏赋龙池柳色初青听新莺百啭歌【雍录天宝中即东宫置宜春北苑唐诗纪事龙池兴庆宫池也明皇潜龙之地长安志龙池在跃龙门南本是平地自垂拱载初後因雨水流潦成小池後又引龙首渠支分溉之以滋广至神龙景云中弥亘数顷澄澹皎洁深至数丈尝有云气或见黄龙出其中本以坊名池俗呼五王子池置宫後谓之龙池】

东风已绿瀛洲草紫殿红楼觉春好池南柳色半青青紫烟袅娜拂绮城垂丝百尺挂雕楹上有好鸟相和鸣间关早得春风情春风卷入碧云去千门万户皆春声是时君王在镐京五云垂晖耀紫清仗出金宫随日转天回玉辇绕花行始向蓬莱看舞鹤还过萑若【萧本作石】听新莺新莺飞绕上林苑愿入箫韶杂凤笙【谢朓诗紫殿肃阴阴江总诗红楼千愁色西京赋雕楹玉碣吕延济注雕刻也楹柱也张骏东门行鸛鹄与鷺黄间关相和鸣史记作建章宫度爲千门万户镐京紫清俱见三卷注又紫清似谓紫微清都之所天帝之所居也五云五色云也宋书云有五色太平之应也又曰若云非云若烟非烟五色纷緼谓之庆云潘岳籍田赋天子乃御玉辇李善注玉辇大辇也通典辇秦爲人君之乘汉因之以雕玉爲之方径六尺或使人挽或驾果下马雍录唐东内大明宫宫南端门名丹凤门北三殿相沓皆在山上至紫宸

又北则爲蓬萊殿殿北有池亦名蓬萊池三輔黃圖未央宮有芷若殿西都賦作菰若芷菰古字通用又三輔黃圖漢武帝建元三年開上林苑東南至藍田宜春鼎湖御宿昆吾旁南山而西至長楊五柞北繞黃山灊渭水而東周袤三百里離宮七十所皆容千乘萬騎尚書簫韶九成鳳凰來儀孔傳曰韶舜樂名言簫見細器之備公羊傳疏鄭注云簫韶舜所制樂宋均注樂說云簫之言肅舜時民樂其肅敬而紹堯道故謂之簫韶或云韶舜樂名舜樂者其秉簫乎說文笙十三簧象鳳之身也梁簡文帝詩行潦承椒奠按歌雜鳳笙 鎬音浩菰音止】

玉壺吟

烈士擊玉壺壯心惜暮年三盃拂劍舞秋月忽然高咏涕泗漣【二句一作三盃拂劍舞秋月忽高悬】鳳凰初下紫泥詔謁帝稱觴登御筵揄揚九重萬乘主謔浪赤墀青瑣賢朝天數換飛龍馬勅賜珊瑚白玉鞭世人不識東方朔大隱金門是謫仙西施宜笑復宜嚬丑女效之徒累【繆本作集】身君王雖愛蛾眉好無奈宮中妒殺人【世說王處仲每酒後輒咏老驥伏枥志在千里烈士暮年壯心不已以如意擊吐壺壺口盡缺詩國風涕泗滂沱毛傳曰自目曰涕自鼻曰泗鳳凰詔見五卷注太平寰宇記龍右記云武都紫水有泥其色亦紫而粘貢之用封璽書故詔誥有紫泥之美東漢會要漢舊儀曰璽皆玉螭虎紐凡六璽皆以武都紫泥封之班固兩都賦序雍容揄揚着於後嗣李善注揄引也揚舉也爾雅謔浪笑傲戲謔也漢書元后傳曲陽侯根驕奢僭上赤墀青瑣孟康注青瑣以青畫戶邊鏤中天子制也如淳注門楣格再重如人衣領再重里者青名白青瑣天子門制也顏師古注孟說是青瑣者刻爲連鎖文而以青塗之也又梅福傳涉赤墀之塗應劭注以丹掩泥塗殿上也李善文選注說文曰墀塗地也禮天子赤墀也胡三省通鑑注仗內六廐飛龍廐最爲上乘馬元微之詩自注學士初入例借飛龍馬錦綉萬花谷學士新入院飛龍廐賜馬一匹銀鬃鞍裝轡何遜詩玉羈瑪瑙勒金絡珊瑚鞭史記東方朔行殿中郎謂之曰人皆以先生爲狂朔曰如朔者所謂避世於朝廷間者也古之人乃避世於深山中時坐席中酒酣據地歌曰陸沉於俗避世金門宮殿中可以避世全身何必深山之中蒿芦之下金門者宦署門也門旁有銅馬故謂之金門王康琚詩小隱隱林薮大隱隱朝市梁簡文帝鴛鴦賦亦有佳麗自如神宜羞宜笑復宜嚬莊子西施病心而嚬其里之丑人美之亦捧心而嚬詳見二卷注】

幽歌行上新平長史兄粲【輿地廣記邠州古豳國西魏置豳州後周及隋皆因之煬帝初州廢義寧二年復置豳州唐開元十三年以字類幽改作邠焉天寶三載以爲新平郡唐制州之佐職有長史一人上州者從五品上中州者正六品下下州則不設其位在別駕之下司馬之上如今之通判是也】

幽谷稍稍振庭柯涇水浩浩揚湍波哀鴻酸嘶暮聲急愁云蒼慘寒氣多憶昨去家此【許本作早】爲客荷花初紅柳條碧中宵出【許本作長】飲三百杯明朝歸揖二千石寧知流寓變光輝胡霜蕭飒繞客衣寒灰寂寞凭【繆本作竟】誰暖落葉飄揚何處歸吾兄行樂窮曠旭滿堂有美顏如玉趙女長歌入彩雲燕姬醉舞嬌紅燭狐裘毳炭酌流霞壯士悲吟寧見嗟前榮後枯相翻覆何惜余光及棣華【太平寰宇記古豳地在邠州三水县西南三十里有古豳城在龐川水西蓋古公劉之邑卽此城也國都城記豳國者后稷之曾孫曰公劉始都焉豳

谷名也与故枸邑城相去约五十余里汉志注云豳乡是也何大复雍大记豳谷在邠州东北三十里故三水县公刘立国处陕西通志三水废城在邠州三水县东五里故豳谷谢朓诗稍稍枝早劲吕向注稍稍树枝劲强无叶之貌陶潜归去来辞眄庭柯以怡颜郭璞山海经注泾水出安定朝那县西笄头山东南经新平扶风至京兆高陵县入渭诗地理考泾水出原州百泉县泾谷东南流至泾州临泾保定二县又东南流至邠州之宜禄新平永壽三县又东北流至京兆之醴泉高陵云阳三县以入渭僧宝月诗君不见孤雁关外发酸嘶度越扬空城郑康成一饮三百杯见三卷注後汉书每郡置太守一人二千石三国志起烟於寒灰之上生华於已枯之木广韵曛日入也又黄昏时旭日旦出貌初学记日初出日旭古诗燕赵多佳人美者顔如玉吴均诗燕姬及赵女挟瑟夜经过晋书羊琇性豪侈屑炭和作兽形以温酒洛下豪贵咸竞效之江总玛瑙盃赋翠羽流霞之杯史记甘茂之亡秦奔齐逢苏代代爲齐使於秦甘茂曰臣得罪於秦惧而逃遁无所容迹臣闻贫人女与富人女会绩贫人女曰我无以买烛而子之烛光幸有余子可分我余光无损子明而得一斯便焉今臣困而君方使秦而当路矣茂之妻子在焉愿君以余光振之诗小雅常棣之华鄂不韡韡郑笺曰承花者鄂不当作拊拊鄂足也鄂足得华之光明则韡韡然盛兴者喻弟以礼敬兄兄亦以荣覆弟恩义之显亦韡韡然泾音京嘶音西棣音弟】

西岳云台歌送丹丘子【尔雅华山爲西岳在今陕西西安府华阴县南十里高数千仞石壁层叠有如削成上有芙蓉落雁玉女三峰又有八卦池太乙池白莲池菖蒲池二十八宿池细辛坪玉女洗头盆老君洞仙棊台苍龙岭日月崖仙掌岩诸胜所谓云台者乃其东北之峰也两巘竞高四面悬絶崔嵬独秀有若台形下有穴昔有人入此穴出东方山而行云经黄河底闻上有流水之声】

西岳峥嵘何壮哉黄河如丝天际来黄河万里触山动盘涡毂【一作谷】转秦地雷荣光休气纷五彩千年一清圣人在巨灵咆哮擘两山洪波喷流射东海【一作箭流射东海萧本作喷箭射东海】三峯却立如欲【许本作玉】摧翠崖丹谷高掌开白帝金精运元气石作莲花云作台云台阁道连窈冥【一作人不到】中有不死丹丘生明星玉女备洒扫麻姑搔背指爪轻我皇手把天地户丹丘谈天与天语九重出入生光辉东求【萧本作来】蓬莱复西归玉浆饒惠【萧本作或】故人饮骑二茅龙上天飞【癸辛杂识五岳惟华岳极峻直上四十五里遇无路处皆挽铁絙以上有西岳庙在山顶望黄河一衣带水耳郭璞江赋盘涡毂转凌涛山颓李善注涡水旋流也张铣注盘涡言水深风壮流急相冲盘旋作深涡如毂之转尚书中候尧卽政七十载修坛河洛仲月辛日昧明礼备至於日稷荣光出河休气四塞郑玄注荣光五色从河水中出休美也四塞炫燿四方也拾遗记黄河千年一清至圣之君以爲天瑞西京赋缀以二华巨灵鼉屨高掌远跼以流河曲厥迹犹存薛综注巨灵河神也华山对河东首阳山黄河流於二山之间古语云此本一山当河河水过之而曲行河之神以手擘开其上以足踏离其下中分爲二以通河流手足之迹於今尚在遁甲开山图曰有巨灵胡者徧得坤元之道能造山川出江河太平寰宇记名山记云华岳有三峯直上数千仞基广而峰峻自下小岑叠秀迄於岭表有如削成今博山香炉形实象之华山记太华山削成而四方直上至顶列爲三峯其西爲莲花峯峯之石竄隆不一皆如莲叶倒垂故名是峯曰莲花其南曰落雁峯上多松桧故亦曰松桧峯白帝宫在其间俯眺三秦旷莽无际黄河如一缕水缭绕岳下其东

峯曰朝阳峯峯之左脇中有一峯状甚秀异如爲东峯所抱者曰玉女峯乃东峯之支峯也世之谈三峯者数玉女而不数朝阳非矣山之东北则爲仙人掌即所谓巨灵掌也岩壁黑色石膏自豐中流出凝结成痕黄白相间远望之见其大者五岐如指好奇者遂传爲巨灵劈山之掌迹掌长三十丈许五指参差中指直冠峯顶长二十丈唐王涯作太华仙掌辩谓太华之首峯有五崖比壑破岩而列自下远望之偶爲掌形俗传则曰巨灵劈剖掌迹犹存贾氏谈录华岳掌其色丹紫正如肉色每太阳对照则尽见之及日暮则渐隐而不见樵者曰仙掌者盖絶地之上羣壑聚会之所石色頽然望之适类於掌耳其说皆辟巨灵掌迹之讹似矣而犹不得其体状明王履游华山坐玉女峯东北岩上细察而後得之乃曰王涯所辨似得於传闻未尝如吾之近观也盖山石本黑膏出於豐从上溜下作淡黄微白色间之黑壁中上则五岐下则片属岐者如指属者如掌复有细溜无数杂五岐间自远望之细者不见惟见其大者故五岐如指耳宁有五崖比壑破岩而列哉且膏所溜处比比皆有岂惟此掌爲然此掌之外日月岩最多其次则东峰西壁近於杨氏石室者其色状与此掌漏痕不殊但彼不类物形故不以爲异而见称耳枕中书金天氏爲白帝治华阴山真蒙名山记李白诗石作莲花云作台今观山形外罗诸山如莲瓣中间三峯特出如莲心其下爲云台峯自远望之宛如青色莲花开於云台之上也郭璞山海经注太华山有明星玉女持玉浆得上服之即成仙道险僻不通诗含神雾云神仙传麻姑手爪似鸟蔡经见之心中念曰背大痒时得此爪以爬背当佳也王远已知经心中所言即使人牵经鞭之曰麻姑神人也汝何忽谓其爪可爬背耶汉武帝内传王母命侍女法安婴歌元灵之曲曰天地虽廓寥我把天地户李善文选注史记齐人爲谚曰谈天衍刘向别录曰邹衍之所言五德终始天地广大书言天事故曰谈天列仙传呼子先者汉中关下卜师也老寿百余岁临去呼酒家老姬曰急装当与姬共应中陵王夜有仙人持二茅狗来至呼子先子先持一与酒家姬得而骑之乃龙也上华阴山常於山上太呼言子先酒家母在此云 涡音窩擘音劈】

元丹丘歌

元丹丘爱【一作好】神仙朝饮颍川【一作水】之清流暮还嵩岑之紫烟三十六峰常周旋长周旋躡星虹身骑飞龙耳生风横河跨海与天通我知尔游心无穷【水经颍水出颍川阳城县西北少室山酈道元注山海经曰颍水出少室山地理志曰出阳城县阳乾山今颍水有三源岐发右水出阳乾山之颍谷其水东北流中水导源少室通阜东南流径负黍亭东与右水合左水出少室南溪东合颍水河南通志嵩山居四岳之中故谓之中岳其山二峯东曰太室西曰少室南跨登封北跨巩邑西跨洛阳东跨密县縣亘一百五十余里少室山颍水之源出焉其山有三十六峰曰朝岳曰望洛曰太阳曰少阳曰石城曰石笋曰檀香曰丹砂曰鉢盂曰香炉曰连天曰紫霄曰罗汉曰七佛曰来仙曰清凉曰宝胜曰瑞应曰璚璧曰紫盖曰翠华曰药室曰紫微曰白道曰帝宇曰卓剑曰白云曰金牛曰明月曰凝璧曰迎霞曰玉华曰宝柱曰繫马曰白鹿曰灵隐星虹字出刘孝标辨命论星虹枢电昭圣德之符然彼是用春秋元命苞大星如虹下流华渚女节梦意感生朱宣事太白则指星宿虹霓而言文同而义殊矣 颍音穎岑音近层】

扶风豪士歌【按唐书地理志关内道扶风郡本岐州也至德元载更郡名曰凤翔二载复名

扶风郡萧士贇曰此太白避乱东土时诗扶风乃三辅郡意豪士亦必同时避乱於东吴而与太白衔杯酒接殷勤之欢者】

洛阳三月飞胡沙洛阳城中人怨嗟天津流水波赤血白骨相撑如乱麻我亦东奔向吴国【一作来奔溧溪上】浮云四塞道路赊东方日出啼早鸦城门人开扫落花梧桐杨柳拂金井来醉扶风豪士家扶风豪士天下奇意气相倾山可移人不倚将军势饮酒岂顾尚书期雕盘绮食会衆客吴歌赵舞香风吹原尝春陵六国时开心写意君所知堂中各有三千士明日报恩知是谁抚长剑一扬眉清水白石何离离脱吾帽向君笑饮君酒爲君吟张良未逐赤松去桥边黄石知我心【天津桥名驾洛水上详见二卷注陈琳诗君独不见长城下死人骸骨相撑拄说文撑邪柱也史记死人如乱麻司马相如长门赋浮云郁而四塞韵会赊远也诗辩坻扶风豪士歌方叙东奔忽着东方日出二语奇宕入妙此等乃真太白独长萧士贇曰言道路艰阻京国乱离而东土之太平自若也鲍照诗握君手执杯酒意气相倾死何有江总诗太山言应可转移辛延年诗昔有霍家奴姓冯名子都依倚将军势调笑酒家胡汉书陈遵嗜酒每大饮宾客满堂辄关门取客车辖投井中虽有急终不得去尝有部刺史奏事过遵值其方饮刺史大穷候遵沾醉时突入见遵母叩头自白当对尚书有期会状母乃令从後阁出去刘桢瓜赋承之以雕盘幕之以纁絺何逊诗玉盘传绮食论衡齐之孟尝魏之信陵赵之平原楚之春申待客下士招会四方各三千人江晖诗恐君不见信抚剑一扬眉古艳歌行语卿且勿眄水清石自见清水白石何离离即水清石见之意萧氏注以清水喻目白石喻齿恐未是高士传黄石公者下邳人也遭秦乱自隐姓名时人莫知者张良易姓为长自匿下邳步游沂水圯上与黄石公相遇黄石公故坠履圯下顾谓良曰孺子取履良素不知谁愕然欲欧之爲其老人也强忍下取履因跪进焉公以足受笑而去良殊惊公行里所还谓良曰孺子可教也後五日平明与我期此良愈怪之复跪曰诺五日平明良往公已先在怒曰与老人期何後也後五日早会良鸡鸣往公又先在复怒曰何後也後五日早会良夜半往有顷公亦至喜曰当如是乃出一编书与良曰读是则爲王者师矣後十三年孺子见我济北谷城山下黄石即我矣遂去不见良旦视其书乃太公兵法良异之因讲习以说他人皆不能用後与沛公遇於陈留沛公用其言辄有功後十三年从高祖过济北谷城下得黄石良乃宝祠之及良死与石并葬焉史记汉六年正月封功臣封张良爲留侯留侯乃称曰家世相韩及韩灭不爱万金之资爲韩报仇强秦天下振动今以三寸舌爲帝者师封万户位列侯此布衣之极於良足矣愿弃人间事欲从赤松子游耳乃学辟谷导引轻身 撑抽庚切音瞠赊音奢】

同族弟金城尉叔【一作升】卿烛照山水壁画歌【按唐书地理志京兆兴平县本名始平景龙二年中宗送金城公主降吐蕃至此改曰金城至德二载更名兴平延州敷政县本名固城武德二年徙治金城镇更名金城天宝元年更名敷政兰州五泉县咸亨二年更名金城天宝元年复名五泉兰州广武县乾元二年更名金城凡金城更名者有四处未知孰是李季卿三坟记先侍郎之子曰叔卿字万天质琅琅德光文蔚识度标迈弱冠以明经擢国授荐邑虞乐二尉魏守崔公沔泊相国晋公甲科第之进等举之转金城尉吏不敢欺】

高堂粉壁图蓬瀛烛前一见沧洲清洪波汹涌山峥嵘皎若丹丘隔海望赤城光中乍喜岚气灭谓逢山阴晴後雪回谿碧流寂无喧又如秦人月下窥桃源了然不觉清心魂祇将叠嶂鸣

秋猿与君对此欢未歇放歌行吟达明发却顾海客扬云帆便欲因之向溟渤【楚辞仍羽人於丹丘王逸注丹丘昼夜常明也太平御覽孔灵符会稽记曰赤城山土色皆赤岩岫连沓状似云霞悬溜十仞谓之瀑布飞流洒散冬夏不竭山谷絶涧崢嶸无底长松葛藟幽葛其上方輿胜覽赤城山在台州天台县北六里一名烧山其上石壁皆如霞色望之如雉堞然故人以此名山天台山志赤城山天台山之一小山也石皆赤色壁立如城韵会岚山气也新唐书地理志会稽郡有山阴县以其在会稽山之北故名水经注山阴县川明土秀亦爲胜地故王逸少云从山阴道上犹如镜中行也谢朓诗下属带回溪吕延济注回曲也桃花源谓武陵之桃花源见二卷注任昉诗叠嶂易成响重以夜猿悲刘良注叠嶂重山也明发见二卷注马融广成颂张云帆鲍照诗穿池类溟渤李善注溟渤二海名郭璞山海经注渤海海岸曲崎头也岚卢含切音婪嶂音帐】

白毫子歌

淮南小山白毫子乃在淮南小山里夜卧松下云【缪本作雪】朝飡石中髓小山连【一作聯】绵向江开碧峰巉岩渌水回余配白毫子独酌流霞杯拂花弄琴坐青苔绿萝树下春风来南窗萧飒松声起凭崖一听清心耳可得见未【一作不】得亲八公携手五云去空余桂树愁杀人【王逸楚辞序招隐士者淮南小山之所作也昔淮南王安好古招怀天下俊伟之士自八公之徒咸慕其德而归其仁各竭才智着作篇章分造辞赋以类相从故或称大山或称小山其意犹诗有大雅小雅也古今注淮南王淮南小山之所作也淮南服食求仙徧礼方士遂与八公相携俱去莫知所往小山之徒思恋不已乃作淮南王之曲焉琦按上句之淮南小山本楚辞序以赞美白毫子之才下句之淮南小山则指白毫子隐居之地而言白毫子盖当时逸人严沧浪以为太白呼八公爲白毫子非矣列仙传叩疏者周封史也能行气链形煮石髓而服之谓之石髓乳神仙传王烈独之太行山中忽闻山东崩地殷殷如雷声烈往视之乃见山破石裂数百丈两岸皆是青石石中一穴口径濶尺许中有青泥流出如髓烈取泥试丸之须臾成石如投热蜡之状随手坚凝气如粳米饭嚼之亦然烈合数丸如桃大用携少许归与嵇叔夜曰吾得异物叔夜甚喜取而视之已成青石擊之如铜声叔夜即与烈往视之断山已复如故烈曰叔夜未合得道故也按神仙经曰神山五百年辄开其中石髓出得而食之寿与天相毕烈前得者必是也谢灵运诗洲紫渚连縣刘良注连縣不絶貌论衡项曼都曰有数仙人将我上天口饥欲食仙人辄饮我以流霞一杯每饮一杯数月不饥水经注淮南王刘安折节下士笃好儒学养方术之徒数十人皆爲俊异焉多神仙秘法鸿宝之道忽有八公皆须眉皓素诣门希见门者曰吾王好长生今先生无住衰之术未敢相闻八公咸变成童王甚敬之八士并能链金化丹出入无间乃与安登山埋金於地白日升天余乐在器鸡犬舐之者俱得上昇淮南王招隐士桂树丛生兮山之幽】梁园吟【一作梁苑醉酒歌一统志梁园在河南开封府城东南一名梁苑汉梁孝王游赏之所】

我浮【一作乘】黄河【一作云】去京阙【缪本作关】挂席欲进【一作往】波连山天长水阔厌远涉访古始及平台间平台爲客忧思多对酒【一作醉来】遂作梁园歌却忆蓬池阮公咏因吟渌水扬洪波【谢灵运诗挂席拾海月木华海赋波如连山汉书梁孝王大治宫室爲复道自宫连属於平台如淳注平台在大梁东北离宫所在也顔师古注今其城东二

十里所有故台基其处寛博土俗云平台也水经注晋灼曰平台在城中东北角亦或言兔园在平台侧如淳曰平台离宫所在今城东二十里有台寛广而不甚极高俗谓之平台予按汉书梁孝王传称王以功亲爲大国筑东苑方三百里广睢阳城七十里大治宫室爲复道自宫连属於平台三十余里复道自宫东出扬州之门左阳门即睢阳东门也连属於平台则近矣属之城隅则不能是知平台不在城中也梁王与邹枚司马相如之徒极游於其上故齐随郡王山居序所谓西园多士平台盛宾邹马之客咸在伐木之歌屡陈是用追芳昔娱神游千古故亦一时之盛事谢氏雪赋亦云梁王不悦游於兔园今也歌堂沦宇律管埋音孤基块立无复曩日之望矣元和郡县志平台在宋州虞城县西四十里左传宋皇国父爲宋平公所筑汉梁孝王大治宫室爲复道自宫连属於平台三十余里与邹枚相如之徒并游其上即此也阮籍咏怀诗徘徊蓬池上还顾望大梁渌水扬洪波旷野莽茫茫走兽交横驰飞鸟相随翔是时鹑火中日月正相望朔风厉严寒阴气下微霜羈旅无俦匹俛仰怀哀伤】洪波浩荡迷旧国路远西归安可得人生达命岂暇【繆本作假】愁且饮美酒登高楼平头奴子摇大扇五月不热疑【一作如】清秋玉【一作素】盘杨【一作青】梅爲君设吴盐如花皎白【一作如】雪持盐把酒但饮之莫学夷齐事高洁【一作何用孤高比云月一作咄咄书空字还灭梁武帝诗平头奴子擎履箱】昔人豪贵信陵君今人耕种信陵坟荒城虚【一作远】照碧山月古木尽入苍梧云梁王宫阙【一作宾客】今安在枚马先归不相待舞影歌声散渌池空余汴水东流海【按史记魏公子无忌封信陵君仁而下士士无贤不肖皆谦而礼交之不敢以其富贵骄士士以此方数千里争往归之致食客三千人诸侯以公子贤多客不敢加兵谋魏後夺晋鄙兵进擊秦军秦军解去遂救邯鄲存赵又率五国之兵破秦军於河外乘胜逐秦军至函谷关抑秦兵秦兵不敢出当是时公子威震天下太平寰宇记信陵君墓在开封府浚仪县南十二里艺文类聚归藏曰有白云出自苍梧入於大梁汉书枚乘淮阴人游梁梁客皆善属词赋乘尤高司马相如成都人爲武骑常侍非其好也是时梁孝王来朝从游说之士邹阳枚乘之徒相如见而说之因病免客游梁得与诸侯游士居一统志汴河旧自荥阳县东经开封府城南又东合蔡河名蒗菰渠又名通济渠东注泗州下入於淮作梁园歌而忽间以信陵数语意谓以信陵之贤名震一世至今日而墓域且不克保况梁孝王之贤不及信陵其歌台舞榭又焉能保其常在乎此文章衬托法不是爲信陵致慨乃是爲梁王释恨并自己解愁以见不如及时行乐之爲得也故下遂接以沉吟此事泪满衣云云】沉吟此事泪满衣黄金买醉未能【一作莫言】归连呼五白行【一作投】六博分曹赌酒酣【一作看】驰晖歌且谣意方远东山高卧时【一作还一作忽】起来欲济苍生未应晚【招魂崑蔽象棊有六博些分曹并进適相迫些成梟而牟呼五白些王逸注投六箸行六棊故爲六博也倍胜爲牟五白博齿也言已棊已梟当成牟胜射张食棊下兆於屈故呼五白以助投也吴曾漫録五木之戏其四爲玉采贵也其八爲珉采贱也五木之中有采曰白盖五木俱白也楚词成梟而牟呼五白梟二为珉采牟者胜也欲胜其梟必呼五白也海录碎事六博用十二棊分黑白各半擲之分曹赌酒分爲二曹以赌酒之胜负也谢朓诗驰晖不可接李善注驰晖日也诗国风我歌且谣毛传曰曲合乐曰歌徒歌曰謡世说谢公在东山朝命屡降而不动後出爲桓宣武司马将发新亭朝士咸出饯送高灵时爲中丞亦往相祖先时多少饮酒因倚如醉戏曰卿屡违朝旨高卧东山诸人每相与言安石不肯出将如苍生何今亦苍生将如君何谢笑而不答】鸣臯歌送岑徵君【原注时梁园三尺雪在清冷池作元和郡县志鸣臯山在河南府陆浑县东北十五里河南通志鸣臯山在河南府嵩县东北五十里一名九臯山昔有白鹤鸣其上

故名太平寰宇记清冷池在宋州宋城县东北二里梁孝王故宫有钓台谓之清冷台今号清冷池神州古史考清冷池在归德府城东梁园内】

若有人兮思鸣皋阻积雪兮心烦劳洪河凌兢不可以径度冰龙鳞兮难容舸邈仙山【一作神仙】之峻极兮闻天籁之嘈嘈霜崖缟皓以合沓兮若长风【一作虹】扇海涌沧溟之波涛玄猿绿黑舐谿岈岈【繆本作岈危一作岑危】危【繆本作咆】柯振石骇胆栗魄羣呼而相号峰崢嶸以路絶挂星辰於岩?【楚辞若有人兮山之阿四愁诗何爲怀忧心烦劳西都赋带以洪河泾渭之川吕向注洪河大河也甘泉赋驰闾阖而入凌兢服?注凌兢恐惧也顔师古注凌兢者言寒凉战栗之处也冰龙鳞者冰有锯齿参差如鳞也韵会舸小船也形如刀集韵或作?通作刀诗曾不容刀释名云二百斛以上曰艇三百斛曰刀庄子子游曰地籁则衆窍是已人籁则比竹是已敢问天籁子綦曰夫吹万不同而使其自己也天籁谓空中因风气作声不假物而成者也埤苍嘈嘈声衆也鲍照诗霜崖土膏谢朓诗合沓与云齐吕向注合沓高貌袁宏三国名臣赞洪飈扇海二溟扬波上林赋玄猿素雌李善注玄猿猿之雄者玄色也西京杂记熊黑毛有绿光皆长二尺者直百金舐谿吐舌貌木华海赋戛岩?释名山多小石曰??尧也每石尧尧独处而出见也 缟音稿岈音吟舐音舐谿音演】送君之归兮动鸣皋之新作交鼓吹兮弹丝觴清冷之池阁君不行兮何待若返顾之黄鹄扫梁园之羣英振大雅於东洛巾征轩兮历阻折寻幽居兮越巘?盘白石兮坐素月琴松风兮寂【一作昇】万壑【苏武诗黄鹄一远别千里顾徘徊庾信诗黄鹄一反顾徘徊应凄然史记梁孝王筑东苑方三百余里招延四方豪杰自山以东游说之士莫不毕至江淹别赋金闺之诸彦兰台之羣英孔丛子巾车命驾郑玄周礼巾车注巾犹衣也李善文选注轩车通称也巾征轩者以帷蒙征车之上也谢灵运诗连嶂叠巘?李善注巘?崖之别名谢庄月赋素月流天白帖琴曲有风入松乐府诗集琴集曰风入松晋嵇康所作也 巘语蹇切年上声愕音愕】望不见兮心氛氲萝冥冥兮霰纷纷水横洞以下淥波小声而上闻虎啸谷而生风龙藏溪而吐云冥【一作寡】鹤清唳饥鼯呻块【萧本作魂】独处此幽默兮愀【一作啼】空山而【一作兮】愁人【谢惠连雪赋氛氲萧索李善注氛氲盛貌毛苌诗传霰暴雪也郑笺曰将大雨雪始必微温雪自上下遇温气而?谓之霰久而寒胜则大雪矣淮南子虎啸而谷风至龙举而景云属管辂别传龙者阳精以潜爲阴幽灵上通和气感神二物相扶故能兴云虎者阴精而居於阳依木长啸动於巽林二气相感故能运风谢朓诗独鹤方朝唳饥鼯此夜啼韵会唳鹤鸣也按本草鼯鼠鸟名一名?鼠一名夷由一名飞生鸟状如蝙蝠肉翅连尾大如?鸢毛紫色好夜飞但能向下不能向上恒夜鸣声如人呼湖岭山中多有之氛音分又音焚氲於云切醞平声唳音丽愀音悄又音秋】鸡聚族以争食凤孤飞

而无邻螭蜒嘲龙鱼目混珍嫫母衣锦西施负薪若使巢由桎梏於轩冕兮亦奚异於夔龙蹇蹇於风尘哭何苦而救楚笑何夸而却秦吾诚不能学二子沽名矫节以耀世兮固将弃天地而遗身白鸥兮飞来长与君兮相亲【尔雅翼螭蜒似蜥蜴灰褐色在人家屋壁间状虽似龙人所玩习故淮南云禹南济於江黄龙负舟禹视龙犹螭蜒龙亡而去比之螭蜒言不足畏扬子云执螭蜒而嘲龟龙盖陋之也一名守宫又名壁宫特善捕蝎俗号蝎虎李善文选注雒书曰秦失金镜鱼目入珠郑玄曰鱼目乱珍珠尚书大传黄帝妃嫫母於四妃之班最下貌甚丑而最贤心每自退高诱淮南子注嫫母古之丑女吴越春秋越王使相者於国中得苕萝山鬻

薪之女曰西施郑旦郑玄礼记注桎梏今械也在足曰桎在手曰梏庄子斃斃爲仁蹠蹠爲义广韵斃斃旋行貌一曰蹠也巢由以隐居自乐爲志夔龙以行道济时爲志若使巢由羈身於轩冕之中与夔龙废弃於风尘之内无异是皆不适其志愿也战国策吴与楚战於柘举三战入郢焚冒勃苏曰吾披坚执锐赴强敌而死此犹一卒也不若奔诸侯於是赢粮潜行上崢山踰深溪跼穿膝暴七日而薄秦王之朝鹤立不转画吟宵哭七日不得告水浆无入口瘡而殫闷旄不知人秦王闻而走冠带不相及左捧其首右濡其口勃苏乃苏秦王身问之子孰谁也焚冒勃苏对曰臣非异楚使新造执丘焚冒勃苏吴与楚战於柘举三战入郢寡君身出大夫悉属百姓离散使下臣来告亡且求救秦王遂出革车千乘卒万人属之子蒲子虎下塞以东与吴人战於淝水而大败之左太冲诗吾慕鲁仲连谈笑却秦军详见二卷注晁补之曰李白天才俊丽不可矩矱然要长於诗而文非其所能也赋近於文故白大鹏赋辞非不壮不若其诗盛行於世至鸣皋歌一篇本末楚辞也而世误以爲诗因爲出之其略曰螭涎嘲龙鱼目混珍珠母衣锦西施负薪此淳淳放屈原卜居及贾谊吊屈原语而白才自逸荡故或离而去之云楚辞後语曰白天才絶出尤长於诗而赋不能及晋魏独此篇近楚辞然归来子犹以爲白才自逸荡故或离而去之亦爲知言云

螭音偃蜒音殄嫫音模斃匹減切篇入声又音别斃音萨又音屑】

鸣皋歌奉饯从翁清归五崖山居

忆昨【繆本作昨忆】鸣皋梦里还手弄素月清潭间觉时枕席非碧山侧身西望阻秦关麒麟阁上春还早着书却忆伊阳好青松来风吹古【繆本作石】道绿萝飞花覆烟草我家仙翁【繆本作公】爱清真才雄草圣凌古人欲卧鸣皋絶世尘鸣皋微茫在何处五崖峡【一作溪萧本作狭】水横樵路身披翠云裘袖拂紫烟【一作云】去去时应过嵩少间相思爲折三花树【太平寰宇记鸣皋山在河南府伊阳县东三十五里伊阳县本陆浑地唐先天元年十二月割陆浑县置伊阳县在伊水之阳去伊水一里张衡诗侧身西望涕沾裳太平御览汉宫殿疏曰麒麟阁萧何造以藏秘书画贤臣宋书沈仪笃学有雄才以儒素自业北齐书才雄气猛英略盖世法书要录弘农张芝高尚不仕善草书精劲絶伦家之衣帛必先书而後练临池学书池水尽黑每书云匆匆不暇草书人谓之草圣宋玉讽赋主人之女翳承日之华披翠云之裘水经嵩高爲中岳在颍川阳城县西北酈道元注尔雅曰山大而高曰嵩合而言之爲嵩高分而名之爲二室西南爲少室东北爲太室三花树即贝多树也齐民要术嵩山记曰嵩寺中忽有思惟树即贝多也昔有人坐贝多树下思惟因以名焉汉道士从外国来将子於西山脚下种极高大今有四树一年三花】

劳劳亭歌【原注在江宁县南十五里古送别之所一名临沧观太平御览輿地志曰丹阳郡秣陵县新亭陇上有望远楼又名劳劳亭宋改爲临沧观行人分别之所一统志劳劳亭在应天府治西南吴时置】

金陵劳劳送客堂蔓草离离生道旁古情不尽东流水此地悲风愁白杨我乘素舸同康乐朗咏清川飞夜霜昔闻牛渚吟五章今来何谢袁家郎苦竹寒声动秋月独宿空帘归梦长【古诗白杨多悲风萧萧愁杀人韵会舸大船也谢灵运诗可怜谁家郎绿流乘素舸康乐即灵运

以其袭封康乐公故世称之曰谢康乐孙绰天台山赋朗咏长川胡震亨曰清川飞夜霜疑引谢诗今谢集无此句或亡之耳世说注续晋阳秋曰袁虎少有逸才文章絶丽曾有咏史诗是其风情所寄少孤而贫以运租爲业镇西谢尚时镇牛渚乘秋佳风月率尔与左右微服泛江会虎在运租船中讽咏声既清会辞又藻拔非尚所曾闻遂往聽之乃遣问讯荅曰是袁临汝郎诵诗即其咏史之作也尚佳其率有兴致即遣要迎谈话申旦自此名誉日茂竹有淡竹苦竹二种茎叶不异以其笋味之苦淡而名此诗大意太白自夸山水之趣既同康乐而吟咏之妙又不减袁宏惜无相赏之人与之谈话申旦空帘独宿殊觉寂寥两事并用各不相妨杨注谓康乐乃谢灵运邀袁虎者乃谢尚疑太白误作一事用者非也 舸音歌又音哥】横江词六首【太平寰宇记横江浦在和州历阳县东南二十六里孙策自寿春欲经略江东扬州刺史刘繇遣将樊能于麋屯横江孙策破之於此对江南岸之采石往来济渡处隋将韩擒虎平陈自采石济亦此处也】

人道【缪本作言】横江好依道横江恶一风三日吹倒山【一作猛风吹倒天门山】白浪高於瓦官阁【胡三省通监注吴人率自称曰依幽怪录上元县有瓦棺寺寺上有阁倚山瞰江万里在目亦江湖之极境游人弭棹莫不登眺江南通志昇元阁在江宁城外一名瓦官阁即瓦官寺也阁乃梁朝所建高二百四十尺南唐时犹存今在城之西南角扬吴未城时正与越台相近长干之西北也唐以前江水逼石头李白诗白浪高于瓦官阁以此】

其二

海潮南去过寻阳牛渚由来险马当横江欲渡风波恶一水牵愁万里长【唐时江南西道有九江郡即江州也治浔阳县天宝元年改名浔阳郡乾元初复爲江州今爲江西之九江府江水经其中下至扬州入海方輿胜覽牛渚山在太平州当涂县北三十里山下有矶古津渡也与和州横江渡相对隋师伐陈贺若弼从此北渡六朝以来爲屯戍之地陆放翁入蜀记采石一名牛渚与和州对岸江面比瓜州爲狭故隋韩擒虎平陈及本朝曹彬下江南皆自此渡然微风辄浪作不可行刘宾客云芦苇晚风起秋江鳞甲生王文公云一风微吹万舟阻皆谓此矶也太平府志牛渚矶屹然立江流之冲水势湍急大爲舟楫之害元和郡县志马当山在江州彭泽县东北一百里横入大江甚爲险絶往来多覆溺之惧太平御覽九江记曰马当山高八十丈周回四里在古彭泽县北一百二十里其山横枕大江山象马形回风急击波浪涌沸舟船上下多怀忧恐山际立马当山庙以祀之】

其三

横江西望阻西秦汉水东连【一作楚水东流】扬子津白浪如山那可渡狂风愁杀峭帆人【汉水出汉中之嶓冢山至汉口与岷江合流东至扬州爲扬子江入海胡三省通监注扬子津在今真州扬子县南是往来横渡处】

其四

海神来【文苑英华作东】过恶风回浪打天门石壁开浙江八月何如此涛似连山喷雪来
【方輿胜覽天门山在太平州当涂县西南三十里又名蛾眉山夹大江对峙东曰博望西曰梁山水经注钱塘县东有定已诸山皆西临浙江水流於两山之间江川急濬兼涛水昼夜再来来应时刻常以月晦及望尤大至二月八月最高峨峨二丈有余木华海赋波如连山】

其五

横江馆前津吏迎向余东指海云生郎今欲渡缘何事如此风波不可行【太平府志采石驿在采石鎮滨江即唐时之横江馆也在明爲皇华驿按唐书百官志津尉掌舟梁之事永徽後废津尉置津吏上关八人中关六人下关四人无津者不置梁简文帝诗采菱渡头拟黄河郎今欲渡畏风波 范德机云絶句一句一絶乃其大本其次句少意多极四咏而反覆议论此篇气格合歌行之风使人咏叹而有无穷之思乃唐人所长也诸家诗非不佳然视李杜气格音调特异熟读自见】

其六

月【文苑英华作日】晕天风雾不开海鲸东蹙百【一作衆】川回惊波一起三山动公无【一作莫】渡河归去来【日晕主雨月晕主风木华海赋鱼则横海之鲸突抗孤游噏波则洪涟蹴踏吹滂则百川倒流山谦之丹阳记江宁县北十二里滨江有三山相接即名爲三山旧时津济道也永乐一统志三山在应天府西南五十七里下临大江三峰排列故名古乐府公无渡河公竟渡河】

金陵城西楼月下吟

金陵夜寂【一作静】凉风发独上高【一作西】楼望吴越白云映水摇空城【一作秋城文苑英华作秋光】白露垂珠滴秋月【文苑英华作如珠滴秋月一作沾衣湿秋月】月下沉【一作长】吟久不归古来【一作今】相接眼中稀解道澄江净如练令人长【一作还文苑英华作却】忆谢玄晖【江淹别赋秋露如珠谢玄晖晚登三山还望京邑诗余霞散成绮澄江净如练】

东山吟【一作醉过谢安东山 原注土山去江宁城三十五里晋谢安携妓之所太平寰宇记土山在昇州上元县南三十里按丹阳记晋太傅谢安旧隐会稽东山因筑土像之无岩石故谓土山也有林木台观娛游之所安常请朝中贤士子姓亲属会宴於此江南通志东山在江宁府城东南三十里一名土山晋谢安先隐居会稽东山既出心尝思忆因筑土爲山拟之寄怀欣赏晋书云谢安於土山营墅楼馆林竹甚盛每携中外子侄往来游集即此地也】

携妓东土山【胡本作东山去】怅然悲谢安我妓今朝如花月他妓古坟荒草寒白鸡梦後三【一作五】百岁洒洒浇君同所懽酣来自作青海舞秋风吹落紫绮冠彼亦一时此亦一时浩浩洪流之【一作高】咏何必奇【晋书谢安虽受朝寄然东山之志始末不渝每形於

言色及鎮新城尽室而行造泛海之装欲须经略粗定自江道还东雅志未就遂遇疾笃怅然谓所亲曰昔桓温在时吾惧不全忽梦乘温輿行十六里见一白鸡而止乘温輿者代其位也十六里止今十六年矣白鸡主酉今太岁在酉吾病殆不起乎乃上疏逊位寻薨杨齐贤曰自安至太白时三百余岁耳一本作五百非是世说桓公伏甲设饌广延朝士因此欲诛谢安王坦之王甚遽问谢曰当作何计谢神意不变谓文度曰晋祚存亡在此一行相与俱前王之恐状转见於色谢之寛容愈表於貌望阶趋席方作洛生咏讽浩浩洪流桓惮其旷远乃趣解兵】

僧伽歌【太平广记僧伽大师西域人姓何氏唐龙朔初来游北土隶名於楚州龙兴寺後於泗州临淮县信义坊乞地施标将建伽蓝於标下掘得古香积寺铭记并金像一躯上有普照王佛字遂建寺焉景龙二年中宗皇帝遣使迎师入内道場尊爲国师寻出居荐福寺尝独处一室其顶上有一穴恒以絮塞之夜则去絮香从顶穴中出烟气满房非常芳馥及晓香还入顶穴中又以絮塞之师尝濯足人取其水饮之痼疾皆愈一日中宗於内殿语师曰京师无雨已是数月愿师慈悲解朕忧迫师乃将瓶水泛洒俄顷阴云骤起甘雨大降中宗大悦诏赐所修寺额以临淮寺爲名师请以普照王字爲名盖欲依金像上字也中宗以照字是天后庙讳乃改爲普光王寺御笔亲书以赐焉至景龙四年三月二日端坐而终中宗即令於荐福寺起塔供养俄而大风飆起臭气满长安中宗问曰是何祥也近臣奏曰僧伽大师化缘在临淮恐是欲归彼处故现此变中宗心许其臭顿息顷刻之间奇香馥烈即以其年五月送至临淮起塔供养中宗问万回师曰僧伽大师何人万回曰是观音化身也如法华经普门品云应以比丘身得度者即见比丘身而爲说法此即是也传灯録泗州僧伽大师世谓观音大士应化也但此土有缘之衆乃谓大师自西国来唐高宗时至长安洛阳行化历吴楚间身执杨枝混於緇流或问师何姓答曰我姓何又问师是何国人师曰我何国人寻於泗上欲构伽蓝因宿州民贺跋氏舍所居师曰此本爲佛宇令掘地果得古碑云香积寺即齐李龙建所剏又获金像衆谓然灯如来师曰普光王佛也因以爲寺额景龙二年中宗遣使迎大师至辇毂深加礼异命住大荐福寺三年三月三日大师示灭 伽具牙切音茄】

真僧法号号僧伽有时与我论三车问言诵咒几千徧口道恒河沙复沙此僧本住南天竺爲法头陀来此国戒得长天秋月明心如世上青莲色意清静貌棱棱亦不减亦不增瓶里千年舍利【萧本作铁柱】骨手中万岁胡孙藤嗟予落泊【萧本作魄】江淮久罕遇真僧说空有一言忤【许本作散】尽波罗夷再礼浑除犯轻垢【三车谓羊车鹿车牛车也法华经长者告诸子言羊车鹿车牛车今在门外可以游戏汝等於此火宅宜速出来注云羊车喻声闻乘鹿车喻缘觉乘牛车喻菩萨乘俱以运载爲义方便设施旧说声闻不能化他如羊不顾後羣故以羊车譬声闻乘缘觉是法行人从他如法少自推义多故以鹿车譬缘觉乘鹿不依人故也或云譬鹿犹有回顾之慈菩萨慈悲化物如牛之安忍运载故以牛车譬菩萨乘琦谓当是以三兽之力有大小三车之所载有多寡喻三乘诸贤圣道力之浅深耳恒河西域中水名释典谓西域香山顶上有无热恼池四方流出四水其东方之水谓之殑伽河即恒河也广四十里水中之沙微细如麴佛说法之处皆与此河相近故常取以爲喻云如恒河中所有沙数盖言其数之极多非算数所能知者耳刘昫唐书天竺国即汉之身毒国或云婆罗门地也在葱岭西北周三万余里其中分爲五天竺一曰中天竺二曰东天竺三曰南天竺四曰西天竺

五曰北天竺地各数千里城邑数百南天竺际大海北天竺拒雪山四周有山爲壁南面一谷通爲国门东天竺东际大海与扶南林邑邻接西天竺与罽宾波斯相接中天竺据四天竺之会其都城周围七十余里北临禅连河云法苑珠林西云头陀此云抖擞能行此法即能抖擞烦恼去离贪着如衣抖擞能去尘垢是故从喻爲名锦绣万花谷头陀梵语云杜多汉言抖擞谓三毒如尘坌真心此人能振掉除去故今讹称头陀陈永阳王解讲疏戒与秋月共明禅与春池共洁华严经菩提心者犹如莲花不染一切诸罪垢故僧肇维摩诘经注天竺有青莲花其叶修广青白分明世说孙兴公见林公棱棱露其爽心经是诸法空相不生不灭不垢不净不减不增魏书佛既谢世香木焚尸灵骨分碎大小如粒击之不坏焚亦不焦或有光明神验胡言谓之舍利弟子收奉置之宝瓶竭香花致敬慕法苑珠林舍利者西域梵语此云骨身恐滥凡夫死人之骨故存梵本之名舍利有三种一是骨舍利其色白二是髮舍利其色黑三是肉舍利其色赤是佛舍利椎打不碎是弟子舍利椎击便破矣杨齐贤曰胡孙藤乃藤杖手所执者後汉书西域传清心释累之训空有兼遣之宗章怀太子注不执着爲空执着爲有兼遣谓不空不有虚实两忘也鸠摩罗什维摩诘经注佛法有二种一者有二者空若常在有则累於想着若常在空则舍於善本若空有迭用则不设二过犹日月代明万物以成胡三省通监注释氏以面陈悔过爲忏波罗夷者华言弃谓犯此罪者永弃佛法边外法苑珠林云波罗夷者此云极重罪是也轻垢罪者比重减轻一等凡玷污净行之类皆是据梵网轻重戒有十犯者得波罗夷罪轻戒有四十八犯者爲轻垢罪广川书跋僧伽传蒋颖叔作其谓李太白尝以诗与师论三车者误也诗鄙近知非太白所作世以昔人类在集中信而不疑且未尝深求其言而知其不类予爲之校其年始知之太白死在代宗元年上距大足二年壬寅爲六十年而白生当景龙四年白生九岁固不与僧伽接然则其诗爲出於世俗而复不考岁月殆湮其服者托白以爲重而儒者信之又增异也 忏义监切換去声】

白云歌送刘十六归山

楚山秦山皆白云白云处处长随君长随君君入楚山里云亦随君渡湘水湘水上女萝衣白云堪卧君早归【通监地理通释湘水出全州清湘县阳朔山东入洞庭北至衡州衡阳县入江楚辞被薜荔兮带女萝方弘静曰太白赋新莺百啭与白云歌无咏物句自是天仙语他人稍有拟象即属凡辞】

金陵歌送别范宣

石头巉岩如虎踞凌波欲过沧江去锺山龙盘走势来秀色横分历阳树四十余帝三百秋功名事迹随东流白马小儿谁家子泰清之岁来关囚【一作白马金鞍谁家子吹唇虎啸凤凰楼】金陵昔时何壮哉席卷英豪天下来冠盖散爲烟雾尽金舆玉座成寒灰扣剑悲吟空咄嗟梁陈白骨乱如麻天子龙沉景阳井谁歌玉树後庭花此地伤心不能道目【一作日】下离离长春草送尔长江万里心他年来访南山皓【萧本作老 张勃吴录刘备曾使诸葛亮至京因观秣陵山阜乃叹曰锺山龙蟠石头虎踞帝王之宅也景定建康志石头山在城西二里按輿地志环七里一百步缘大江南抵秦淮口去台城九里自六朝以来皆守石头以爲固以王公大臣领戍军爲鎮其形胜盖必争之地也一统志石头山在应天府西二里蜀汉诸葛亮

云石头虎踞是也陆放翁入蜀记望石头山不甚高然峭立江中缭绕如垣墙凡舟皆由此下至建康故江左有变必先固守石头真控扼要地也元和郡县志锺山在润州上元县西北十八里按輿地志古金陵山也邑县之名由此而立吴大帝时蒋子文发神异於此封爲蒋侯改山曰蒋山宋复名锺山江表上已常游於此爲衆山之杰六朝事迹锺阜图经云在县东北周回六十里高一百五十八丈东连青龙山西临青溪南自锺浦下入秦淮北接雒亭山汉末秣陵尉蒋子文逐盗死於锺山吴大帝爲立庙封曰蒋侯大帝祖讳锺因改名曰蒋山按丹阳记云京师南北并连山岭而蒋山迢嶢嶷异其形象龙实作扬都之镇诸葛亮尝至京观秣陵山阜云锺山龙蟠盖谓此也杨齐贤曰和州历阳郡治历阳县建康图经西至本府界十里自界首至和州八十三里从采石而济盖南北往来要津又曰按纪年自孙权定都建邺传四主五十九年而晋并之元帝渡江传十一主一百三年而宋代之宋传八主六十年而齐代之齐传七主二十四年而梁代之梁传四主五十六年而陈代之陈传五主三十三年而隋并之凡三十九主三百三十五年萧士贇曰按史书自吴大帝建都金陵後历晋宋齐梁陈凡六代共三十九主此言四十余帝者并其推尊者而混言之也自吴大帝黄武元年壬寅岁至陈祯明三年己酉共三百六十八年吴亡後歇三十六年只三百三十二年此言三百秋者举成数而言耳按六代建都之岁只三百三十二年杨氏於宋齐梁交代之岁各重数一年故误爲三百三十五也白马小儿谓侯景隋书大同中童谣曰青丝白马壽阳来其後侯景破丹阳乘白马以青丝爲羈勒梁书太清二年八月侯景举兵反十月己亥景自横江济於采石辛亥景师至京三年三月攻陷宫城南齐书元嘉七年太一在八宫关囚恶岁南史侯景矫诏禅位将登太极殿丑徒数万同共吹唇唱吼而上後汉书雷震四海席卷天下章怀太子注席卷言无余也江淹恨赋丧金輿及玉乘谢庄孝武宣贵妃诔金缸暖兮玉座寒曹植酒赋或扬袂屡舞或扣剑清歌陈书後主闻兵至从宫人十余出後堂景阳殿将自投於井袁宪侍侧苦谏不从後阁舍人夏侯公韵又以身蔽井後主与争久之方得入焉及夜爲隋军所执六朝事迹景阳井台城中景阳宫井也按南史隋克台城陈後主与张丽华孔贵嫔俱入井隋军出之故杜牧之诗云三人出晋井谓此也其井有石栏上多题字旧传云栏有石脉以帛拭之作臙脂痕或云石脉之色类臙脂故云陈书後主每引宾客对贵妃等游宴使诸贵人及女学士与狎客共赋新诗互相赠答采其尤艷丽者以爲曲词被以新声选宫女有容色者以千百数令习而歌之分部迭进持以相乐其曲有玉树後庭花临春乐等大指所归皆美张贵妃孔贵嫔之容色也其略曰璧月夜夜满琼树朝朝新通典玉树後庭花堂堂黄鹂留金钗两臂垂并陈後主所造恒与宫中女学士及朝臣相唱和爲诗太乐令何胥采其尤轻艷者以爲此曲南山皓谓汉之四皓四皓在秦时始入蓝田山後又入地肺山汉时匿终南山终南山广八百余里横亘关中南面故亦谓之南山凡蓝田地肺诸山亦南山之支脉矣四皓事详後廿二卷注】

笑歌行

笑矣乎笑矣乎君不见曲如鉤古人知尔封公侯君不见直如弦古人知尔死道边张仪所以只掉三寸舌苏秦所以不垦二顷田【後汉书顺帝之末京师童謡曰直如弦死道边曲如钩反封侯後汉纪载此謡作曲如钩封公侯汉书酈生一士伏轼掉三寸舌下齐七十余城顔师古注掉揺也太白借用其语作张仪游说事用史记苏秦曰使我有洛阳负郭田二顷吾岂能佩六国相印乎掉条上声又去声二音】笑矣乎笑矣乎君不见沧浪老人歌一曲还道沧浪

濯吾足平生不解谋此身虚作离骚遣人读笑矣乎笑矣乎赵有豫让楚屈平卖身买得千年名巢由洗耳有何益夷齐饿死终无成君爱身後名我爱眼前酒饮酒眼前乐虚名何处有男儿穷通当有时曲腰向君君不知猛虎不看几上肉洪炉不铸囊中锥【屈平渔父豫让巢由俱见前注晋书张翰曰使我有身後名不如即时一杯酒後汉书鼓洪炉燎毛发史记譬若锥之处囊中】笑矣乎笑矣乎甯武子朱买臣叩角行歌背负薪今日逢君君不识岂得不如佯狂人【吕氏春秋甯戚欲干齐桓公穷困无以自进于是为商旅将任车以至齐暮宿于郭门之外桓公郊迎客夜开门辟任车爝火甚盛从者甚衆甯戚饭牛车下望桓公而悲击牛角疾歌桓公闻之抚其仆之手曰异哉之歌者非常人也命後车载之桓公反至从者以请桓公赐之衣冠见之甯戚说桓公以治境内明日复见说桓公以治天下桓公大悦此诗以甯戚为甯武子恐误然太平御覽尸子曰鲍叔为桓公祝曰使臣无忘在莒时管子无忘在鲁时甯武子无忘车下时则前此已有称甯戚为甯武子者矣岂武子是戚之字耶晋书或叩角以干齐汉书朱买臣家贫好读书不治产业常艾薪樵卖以给食担束薪行且读书其妻亦负戴相随数止买臣无歌讴道中买臣愈益疾歌妻羞之求去买臣曰我年五十当富贵今已四十余矣汝苦日久待我富贵报汝功妻恚怒曰如公等终饿死沟中耳何能富贵买臣不能留即听去其後买臣独行歌道中负薪墓间】

悲歌行

悲来乎悲来乎主人有酒且莫斟听我一曲悲来吟悲来不吟还不笑天下无人知我心君有数斗酒我有三尺琴琴鸣酒乐两相得一盃不啻千钧金【博雅神农氏琴长六尺六寸六分说文钧三十斤也】悲来乎悲来乎天虽长地虽久金玉满堂应不守富贵百年能几何死生一度人皆有孤猿坐啼坟上月且须一尽杯中酒【老子天长地久天地所以能长且久者以其不自生故能长生又老子金玉满堂莫之能守】悲来乎悲来乎凤鸟【萧本作凰】不至河无图微子去之箕子奴汉帝不忆李将军楚王放却屈大夫悲来乎悲来乎秦家李斯早追悔虚名拨向身之外范子何曾爱五湖功成名遂身自退剑是一夫用书能知姓名惠施不肯千万乘卜式未必穷一经还须黑头取方伯莫漫白首为儒生【李广屈原李斯范蠡事俱见前注老子功成名遂身退天之道也史记项籍少时学书不成去学剑又不成项梁怒之籍曰书足以记名姓而已剑一人敌不足学吕氏春秋魏惠王谓惠子曰上世之有国必贤者也今寡人实不若先生愿得传国惠子辞王又固请曰寡人莫有之国于此者也而传之贤者民之贪争之心止矣欲先生之以此听寡人也惠子曰若王之言则施不可而听矣王固万乘之主也以国与人犹尚可今施布衣也可以有万乘之国而辞之此其正贪之心愈甚也汉书卜式河南人以田畜为事会浑邪等降县官费重仓府空贫民大徙皆仰给县官无以尽贍式持钱二十万与河南太守以给徙民上乃赐式外繇四百人式又尽复与官上乃召拜式为郎中赐爵左庶长田十顷布告天下尊显以风百姓试使治民拜缙氏令缙氏便之迁成臯令将漕最拜为齐王太傅转为相会吕嘉反式上书愿与子男及临菑习弩博昌习船者请行死之以尽臣节上贤之赐式爵关内侯黄金四十斤田十顷元鼎中代石庆为御史大夫明年当封禅式不习文章贬秩为太子太傅以寿终汉书何武传刺史古之方伯上所委任一州表率也苏东坡曰今太白集中有悲来乎笑矣乎及赠怀素草书数诗决非太白作盖唐末五代间贯休齐己辈诗也予旧在富阳见国清院太白诗絶凡近过彭泽唐兴院又见太白诗亦非是良由太

白豪俊语不甚择集中往往有临时率然之句故使妄庸敢尔若杜子美世岂复有伪撰者耶
】

李太白集注卷七

卷八

钦定四库全书

李太白集注卷八

钱塘 王琦 撰

古近体诗共五十三首

秋浦歌十七首【唐池州有秋浦县其地有秋浦水故取以立名隶江南西道】

秋浦长似秋萧条使人愁客愁不可度【缪本作渡】行上东大楼正西望长安下见江水流
寄言向江水汝意忆侬不遥传一掬泪爲我达扬州【江南通志大楼山在池州府城南六十
里自称我爲侬吴语也小尔雅两手谓之掬不方鳩切音近浮掬音菊】

其二

秋浦猿夜愁黄山堪白头青溪非陇水翻作断肠流欲去不得去薄游成久游何年是归日两
泪下孤舟【江南通志黄山在池州府城南九十里高百余丈清溪在池州府城北五里源出
考溪与上路岭水合流经郡城至大江陇头歌陇头流水鸣声幽咽遥望秦川肝肠断絶谢灵
运诗薄游似邠生】

其三

秋浦锦䟽鸟人间天上稀山鸡羞渌水不敢照毛衣【太平寰宇记歙州土产䟽鸟郡国志云
翎下青黄相映若垂绶其状如蜀鸡背如朱祥符新安图经䟽鸟一名楚雀尤爱其羽中矰弋
则守死不动海录碎事䟽鸟出秋浦如吐绶鸡博物志山鸡有美毛自爱其色终日映水目眩
则溺死】

其四

两鬓入秋浦一朝颯已衰猿声催白发长短尽成丝【陆放翁曰李太白往来江东池州所赋
尤多如秋浦歌十七首及九华山清溪白筍陂玉镜潭诸诗是也秋浦歌云秋浦长似秋萧条
使人愁又云两鬓入秋浦一朝颯已衰猿声催白发长短尽成丝则池州之风物可见矣然观
太白此歌高妙乃尔则知姑熟十咏决爲贗作也杜牧之池州诸诗正尔观之亦清婉可爱若
与太白诗并读醇醪异味矣】

其五

秋浦多白猿超腾若飞【萧本作冰】雪牵引条上儿饮弄水中月【新序子独不见夫玄猿乎从容游戏超腾往来】

其六

愁作秋浦客【一作曲】强看秋浦花山川如剡县风日似长沙【一统志秋浦在池州府城西南八十余里阔三十里四时景物宛如潇湘洞庭九域志剡县在越州会稽郡东南一百八十里唐时潭州治长沙县亦谓之长沙郡隶江南西道潇湘洞庭皆在其境内 剡音闪】

其七

醉上山公马寒歌甯戚牛空吟白石烂泪满黑貂裘【山公骑马事见五卷襄阳曲注艺文类聚琴操曰甯戚饭牛车下叩角而商歌曰南山矸白石烂生不逢尧与舜禅短布单衣裁至骭长夜冥冥何时旦齐桓公闻之举以爲相战国策苏秦说秦王书十上而说不行黑貂之裘敝】

其八

秋浦千重岭水车岭【一作人行路】最奇天倾欲堕石水拂寄生枝【一统志水车岭在池州府齐山胡震亨曰贵池志县西南七十里有姥山又五里爲水车岭陡峻临渊奔流冲激恒若桔槔之声旧注以爲在齐山者误名医别录寄生松上杨上枫上皆有形类一般但根津所因处爲异则各随其树名之生树枝间根在枝节之内叶圆青赤厚泽易折旁自生枝节冬夏生四月花白五月实赤大如小豆处处皆有蜀本草诸树多有寄生茎叶并相似云是乌鸟食一物子粪落树上感气而生叶如橘而厚软茎如槐而肥脆】

其九

江祖一片石青天扫画屏题诗留万古绿字锦苔生【一统志江祖山在池州府城西南二十五里有一石突然出水际其高数丈上有仙人蹟名曰江祖石】

其十

千千石楠树万万女贞林山山白鹭【一作鸂】满涧涧白猿吟君莫向秋浦猿声碎客心【首四句皆叠二字盖仿古诗中青青河畔草一体唐本草石楠叶似?草凌冬不凋关中者叶细江以南者叶长大如枇杷顔师古汉书注女贞树冬夏常青未尝凋落若有节操故以名焉】

其十一

逻人【胡本作叉】横鸟道江祖出鱼梁水急客舟【胡本作行】疾山花拂面香【胡震亨

曰贵池志城西六十里李阳河出李阳大江中流有石槎牙横突爲拦江罗叉二矾罗叉今本作逻人误琦按鸟道是高山峭岭人迹稀到之处而逻叉横其间今以水中矾石当之亦恐未是又鱼梁论其迹亦当在池州注者或以徽州之鱼梁当之不知徽州之水南流入於浙江池州之水北流入於安庆大江源流各异未可混也逻郎佐切罗去声又音罗】

其十二

水如一疋练此地即平天耐可乘明月看花上酒船【论衡见其上若一匹练状练熟素缁也田汝成曰杭人言寧可曰耐可音如能汉书扬越之人耐暑注与能同李太白诗耐可乘明月又耐可乘流直上天皆读如能郑康成礼记注耐古书能字也】

其十三

渌水净素月月明白鹭飞郎听采菱女一道夜歌归【尔雅翼吴楚风俗当菱熟时士女相与采之故有采菱之歌以相和爲繁华流荡之音】

其十四

炉火照天地红星乱紫烟 郎明月夜歌曲动寒川【炉火杨注以爲炼丹之火萧注以爲渔人之火二火俱不能照及天地其说固非胡注谓山川藏丹处每夜必发火光所在有之輿地纪胜宣州有朱砂山石窍中每发红色其大如月又赤溪神龙初有赤气冲天诏凿之溪水尽赤第难定其所咏何处此解亦未是琦考唐书地理志秋浦固产银产铜之区所谓炉火照天地红星乱紫烟者正是开矿处冶铸之火乃足当之郎亦即指冶夫而言于用力作劳之时歌声远播响动寒川令我闻之不觉愧赧盖其所歌之曲适有与心相感者故耳 字当属已而言旧注谓 郎爲吴音歌者助语之词或谓是土语呼其所欢之词俱属强解 乃版切难上声面慚而赤也亦作赧义同】

其十五

白发三千丈缘愁似个长不知明镜里何处得秋霜【起句奇甚得下文一解字字皆成妙义洵非仙才那能作此】

其十六

秋浦田舍翁采鱼水中宿妻子张白鸂结罟映深竹【图经本草白鸂出江南雉类也白色而背有细黑文可畜西京赋结罟百里薛综注罟网也 罟咨邪切音嗟】

其十七

桃波一步地了了语声闻閤与山僧别低头礼白云【本集二十卷内有清溪玉镜潭宴别诗注云潭在秋浦桃胡陂下是桃波乃桃陂之讹无疑矣閤默也 閤音阴又音庵】

当涂赵炎少府粉图山水歌【唐时宣城郡有当涂县隶江南西道少府县尉之称清波杂志古治百里之邑令附其俗尉督其奸故令曰明府尉曰少府嬾真子令呼明府故尉呼少府以亚於县令】

峨眉高出西极天【文苑英华作西出高极天】罗浮直与南溟连名工【萧本作公】绎【英华作逸】思挥彩笔驱【英华作驰】山走海置眼前满堂空翠如可扫赤城霞【英华作日】气苍梧烟洞庭潇湘意渺绵三江七泽情洄沿惊涛汹涌向何处孤舟一去迷归年征帆不动亦不旋飘如随风落天边心摇目断兴难尽【英华作穷】几时可到三山巅西峰峥嵘喷流泉横石蹙水波潺湲东崖合沓蔽【英华作开】轻雾深林杂树空芊绵【英华作眼】此中冥昧失昼夜隐几寂听无鸣蝉长松之下列羽客对座不语南昌仙南昌仙人赵夫子妙年历落青云士讼庭无事罗衆宾杳然如在丹青【一作霄】里五色粉图安足珍真山【萧本作仙误】可以全吾身若待功成拂衣去武陵桃花笑杀人【四川通志峨眉山在嘉定州峨眉县南一百里两山相对状如峨眉故名周围千里高八十里石龕一百十二大小洞四十南北有台重岩复涧莫测远近爲蜀山第一佛刹以千百计昔西竺僧谓其高出五岳秀甲九州爲震旦国第一山元和郡县志罗浮山在循州博罗县西北二十八里罗山之西有浮山盖蓬莱之一阜浮海而至与罗山并体故曰罗浮高三百六十丈周回三百二十七里峻天之峰四百三十有二庄子南溟者天池也李洪范曰广大窈冥故以溟爲名谢灵运诗空翠难强名薛应旗浙江通志赤城山在台州天台县北六里土皆赤色状似云霞望之如雉堞然右有玉京洞道书第六洞天也苍梧烟用苍梧白云事见七卷注洞庭潇湘俱见一卷惜余春赋注三江之名不一以岷山之江爲中江嶓冢之江爲北江豫章之江爲南江此说禹贡之三江也或以松江钱塘江浦阳江爲三江或以松江东江娄江爲三江此说吴越之三江也或以岷江爲西江澧江爲中江湘江爲南江此说岳阳之三江也此诗从画意泛说不必定指一处子虚赋楚有七泽後只称云梦一泽其六皆未详所在谢灵运诗水涉尽洄沿逆流而上曰洄顺流而下曰沿三山蓬莱方丈瀛洲三仙山也谢灵运诗石浅水潺湲李善注潺湲水流貌吕延济注潺湲水声谢朓诗兹山亘百里合沓与云齐吕向注合沓高貌谢朓诗阡眠起杂树吕延济注阡眠远望貌芊绵即阡眠也王弼易注造物之始始於冥昧鲍照芜城赋凝思寂听水经注汉成帝时九江梅福爲南昌尉後一旦舍妻子去九江传云得仙武陵桃花见二卷注沿音延】

永王东巡歌十一首【刘昫唐书永王璘玄宗第十六子也天宝十四载十一月安禄山反范阳十五载六月玄宗幸蜀至汉中郡下诏以璘爲山南东路及岭南黔中江南西路四道节度采访等使江陵郡大都督七月璘至襄阳九月至江陵招募士将数万人恣情补署江淮租赋山积於江陵破用钜亿因有异志肃宗闻之诏令归覲於蜀璘不从十二月擅引舟师东下甲仗五千人趋广陵璘生於宫中不更人事其子襄城王?勇而有力握兵权爲左右眩惑遂谋狂悖】

永王正月东出师天子遥分龙虎旗楼船一举风波静江汉翻爲鴈鰲池【骆宾王荡子从军赋楼船一举争沸腾汉书严助传陛下以四海爲境九州爲家八薮爲圃江汉爲池太平御覽图经曰梁孝王有雁鰲池周围四里梁王所凿王筠诗日照鸳鸯殿萍生雁鰲池 萧士贇曰咏永王出师而表之以天子遥分龙虎旗夫子作春秋书王之意也百世而下未有发明之者鰲有木务二音】

其二

三川北虜乱如麻四海南奔似永嘉但用东山谢安石爲君谈笑静胡沙【汉书音义应劭曰三川今河南郡也韦昭曰有河洛伊故曰三川也晋怀帝永嘉五年刘曜陷洛阳百官士庶死者三万余人中原衣冠之族相率南奔避乱江左天宝十四年安禄山起兵北地遂破两京士君子多以家渡江东与永嘉时事极相似】

其三

雷鼓嘈嘈喧武昌云旗猎猎过寻阳秋毫不犯三吴悦春日遥看五色光【荀子雷鼓在侧而耳不闻杨倞注雷鼓大鼓声如雷者鲍照诗嘈嘈晨鼓鸣李善注埤苍曰嘈嘈声衆也上林赋靡云旗张揖注画熊虎於旒爲旗似云气鲍照诗猎猎晓风迺吕延济注猎猎风声武昌县名唐时属鄂州江夏郡东至寻阳郡六百里寻阳亦县名唐属江州寻阳郡以在寻水之阳故名後汉纪邓禹佐命位冠诸臣尝言曰我尝将百万衆秋毫不犯未尝妄杀一人子孙必当大兴范成大吴郡志三吴之说世未有定论十道四番志以吴郡及丹阳吴兴爲三吴又以义兴吴兴及吴郡爲三吴郡国志谓吴兴义兴吴郡爲三吴又云丹阳亦曰三吴元和郡国图志亦曰吴郡与吴兴丹阳爲三吴酈道元注水经云建中阳羨周嘉上书以县远赴会至难求得分置遂以浙江西爲吴东爲会稽後分爲三号三吴吴兴吴郡会稽其一焉越絶书军上有气五色相连与天相抵此军应不可攻攻之无後南史王僧辩传贼望官军上有五色云】

其四

龙盘虎踞帝王州帝子金陵访古丘春风试暖昭阳殿明月还过鵁鶒楼【一统志南京古金陵之地自周末时已有王气秦始皇谓东南有天子气诸葛亮谓龙蟠虎踞真帝王之都卽此地也谢朓诗金陵帝王州南齐书羊贵嫔居昭阳殿西范贵妃居昭阳殿东隋书侯景作乱遂居昭阳殿一统志昭阳殿乃太后所居在台城内吴均诗春生鵁鶒楼是皆谓金陵之昭阳殿鵁鶒楼也旧注以爲在长安者非是】

其五

二帝巡游俱未回五陵松柏使人哀诸侯不救河南地更喜贤王远道来【时玄宗在蜀肃宗卽位灵武故云二帝巡游俱未回五陵高祖太宗高宗中宗睿宗之陵也唐会要高祖葬献陵在京兆府三原县界太宗葬昭陵在京兆府醴泉县界高宗葬乾陵在京兆府奉天县界中宗

葬定陵在京兆府富平县界睿宗葬桥陵在京兆府奉先县界杨齐贤曰河南洛阳也时禄山据洛阳】

其六

丹阳北固是吴关画出楼台云水间千岩烽火连沧海两岸旌旗绕碧山【唐时江南东道有丹阳即润州也领丹徒丹阳金坛延陵四县今爲镇江府太平寰宇记北固山在润州丹徒县北一里南徐州记云城西北有别岭斜入江三面临水高数十丈号曰北固刘禎京口记云回岭入江悬水峻壁旧北顾作固字梁高祖云作镇作固诚有其语然北望海口实爲壮观以理而推宜改爲顾望之顾輿地志云天清景明登之望见广陵城如在青霄中相去鸟道五十里方輿胜覽北固山在镇江府州北一里回岭下临长江其势险固即府治所据及甘露寺基建康实录梁武帝幸京口登北固楼改名北顾】

其七

王出三江【萧本作山】按五湖楼船跨海次扬【萧本胡本作陪非】都战舰森森罗虎士征帆一一引龙驹【周礼东南曰扬州其川三江其浸五湖贾公彦疏按禹贡云九江今在庐江寻阳南皆东合爲大江扬州所以得有三江者江至寻阳南合爲一东行至扬州入彭蠡复分爲三道而入海故得有三江也韵会徐按江出岷山至楚都名南江至浔阳爲九道名中江至南徐州名北江入海琦按禹贡以岷江之委爲中江汉水之委爲北江三江仅有其二郑康成以彭蠡之水爲南江以备三江之数其说近是而驳者纷纷然详其水道辨其大小则诸说未免近讹不可爲据若他书所称三江之名亦多各随地而分与禹贡周礼所记之三江不必相同学者或据其一说而争以相难其何以异於扣盘扞烛之见也欤玉海五湖在苏州西四十里太平寰宇记太湖者以其广大名之又名五湖韦昭三吴郡国志云太湖边有游湖莫湖胥湖贡湖就太湖爲五湖又云胥湖蠡湖洮湖滬湖就太湖爲五也又云天下如此者五虞仲翔川渚记云太湖东通长洲松江水南通乌程霅溪水西通义兴荆溪水北通晋陵滬湖水西南通嘉兴韭溪水凡五道谓之五湖徐陵陈王九锡文驰御楼船直跨沧海左传凡师一宿爲舍再宿爲信过信爲次释名释船篇上下重牀曰舰四方施板以御矢石其内如牢檻也周礼虎士八百人郑玄注虎士徒之选有勇力者徐陵诗白马号龙驹雕鞍名镂衢 舰音檻】

其八

长风挂席势难回海动山倾古月摧君看帝子浮江日何似龙骧出峡来【谢灵运诗挂席拾海月古月胡字隐语也出十六国春秋见四卷注晋书武帝纪咸寧五年十一月大举伐吴遣龙骧将军王濬广武将军唐彬率巴蜀之卒浮江而下】

其九

祖龙浮海不成桥汉武寻阳空射蛟我王楼舰轻秦汉却似文【萧杨本作天非】皇欲渡辽

【祖龙秦始皇也事见二卷注水经注三齐略记曰始皇于海中作石桥海神爲之竖柱始皇求与相见神曰我形丑莫图我形当与帝相见乃入海四十里见海神左右莫动手工人潜以脚画其状神怒曰帝负约速去始皇转马还前脚犹立後脚随奔仅得登岸画者溺死於海汉书武帝纪元封五年冬行南巡狩自寻阳浮江亲射蛟江中获之陈书楼舰马步直指临川胡三省通监注楼舰即楼船两面施重板列战格故谓之楼舰文皇帝即太宗也刘昫唐书太宗本纪贞观十九年二月庚戌上亲统六军发洛阳四月癸卯誓师於幽州城南因大享六军以遣之五月丁丑车驾渡辽
萧士贇曰合十一篇观之此篇用事非伦句调鄙俗伪贗无疑识者必能辨之】

其十

帝宠贤王入楚关扫清江汉始应还初从云梦开朱邸更【胡本作直】取金陵作小山【尔雅楚有云梦郭璞注今南郡华容县东南巴丘湖是也邢昺疏周礼荆州其泽薮曰云薮郑注云云薮在华容禹贡云云土梦作父又昭二年左传楚子与郑伯田於江南之梦又定四年楚子涉睢济江入於云中杜预云南郡枝江县西有云梦城江夏安陆县东南亦有梦城或曰南郡华容县东南有巴丘湖江南之梦也云梦一泽而每处有名者司马相如子虚赋云云梦者方九百里则此泽跨江南北亦得单称云单称梦薮即梦也郑樵注江北爲云江南为梦云今之玉沙监利景陵等县是梦今之公安石首建寧等县是太平寰宇记云梦泽在安州安陆县东南阔数里南接荆襄谢朓诗黄旗映朱邸李善注史记曰诸侯朝天子於天子之所立宅舍曰邸诸侯王朱户故曰朱邸方輿胜览鍾山在今上元县东北十八里輿地志古曰金陵山小山用淮南王小山事然借作山岭用与古说不同 邸音底】

其十一

试借君王玉马鞭指挥【胡本作麾】戎虏坐琼筵南风一扫胡尘静西入长安到日边【太平御览语林曰诸葛武侯与司马宣王在渭滨将战宣王戎服莅事使人视武侯素輿葛巾持白羽扇指麾三军皆随其进止宣王闻而叹曰可谓名士谢朓诗端仪穆金殿敷教藻琼筵日边杨萧二注皆引晋明帝不闻人从日边来之语以爲後人称帝都爲日边因此琦按晋书陆云传已有云间陆士龙日下荀鸣鹤之对似不始於东晋盖日爲君象故邦畿之地有日边日下之名耳渔隐丛话蔡寬夫诗话云太白之从永王璘世颇疑之唐书载其事甚略亦不明辨其是否独其诗自序云半夜水军来寻阳满旌旄空名适自误迫胁上楼船徒赐五百金弃之若浮烟辞官不受赏翻谪夜郎天太白岂从人为乱者哉盖其学本出纵横以气侠自任当中原扰攘时欲藉之以立奇功故其东巡歌有但用东山谢安石为君谈笑静胡沙之句其卒章云南风一扫胡尘静西入长安到日边亦可见其志矣大抵才高意广如孔北海之徒固未必有成功而知人料事尤其所难议者或责以璘之猖獗而欲仰以立事不能如孔巢父萧颖士察於未萌是矣若其志亦可哀矣】

上皇西巡南京歌十首【天宝十五载六月安祿山兵破潼关帝出幸蜀七月庚辰帝次蜀郡八月癸巳皇太子即皇帝位於灵武尊帝曰上皇天帝至德二载十月丁巳皇帝复京师癸亥

遣太子太师韦见素迎上皇天帝於蜀郡十二月丙午上皇天帝至自蜀郡戊午大赦以蜀郡为南京蜀地於天下近西而谓之南京者以其在长安之南故也】

胡尘轻拂建章台圣主西巡蜀道来剑壁门高五千尺石爲楼阁九天开【三辅黄图建章宫有神明台应德珽有侍五官中郎将建章台集诗庾肩吾有过建章故台诗张载剑阁铭惟蜀之门作镇作固是曰剑阁壁立千仞吕延济注剑阁言其峰如剑其势如阁元和郡县志大剑鎮在剑州普安县东四十八里本姜维拒鍾会垒也去开远戍东十一里其山峭壁千丈下瞰絶涧飞阁以通行旅老学庵笔记剑门关皆石无寸土】

其二

九天开出一成都万户千门入画图草树云山如锦绣秦川得及此间无【汉书地理志蜀郡有成都县然唐时统谓蜀郡为成都鲁灵光殿赋千门相似万户如一胡三省通鉴注秦地四塞以爲固渭水贯其中渭川左右沃壤千里世谓之秦川】

其三

华【繆本作德】阳春树似【萧本作号】新丰行入新都若旧宫柳色未饶秦地绿花光不减上阳【繆本作林】红【华阳国志蜀志云地称天府原曰华阳是称蜀地为华阳其来旧矣或以唐书地理志蜀郡有华阳县有新都县为实指二县而云不知华阳县旧名蜀县至乾元二年始更名至德中尚无此称而新都以旧宫相比则非实指二县可知若夫德阳乃汉州之郡名南至蜀郡百里玄宗未尝驻蹕於此何得以新丰相拟耶西京杂记太上皇徙长安居深宫凄怆不乐高祖因左右问其故以平生所好皆屠贩少年酤酒卖饼鬪鸡蹴鞠以此为欢今皆无此故以不乐高祖乃作新丰移诸故人实之太上皇乃悦高祖既作新丰并移旧社衢巷栋宇物色惟旧士女老幼相携路首各知其室放牛马鸡鸭於通途亦竞识其家匠人吴寛所营也移者皆悦其似而德之故竞加赏赠月余致累百金萧士贇曰肃宗即位灵武尊明皇为太上皇故用此事上阳宫名见二卷注】

其四

谁道君王行路难六龙西幸万人欢地转锦江成渭水天回玉垒作长安【天子驾六书称若朽索之驭六马汉书袁盎传今陛下骋六飞是也何休公羊传注天子马曰龙高七尺以上称车驾为六龙其义疑出於出或谓取时乘六龙以御天之义又或谓韩非子黄帝驾象车而六蛟龙春秋命历序有神人右耳苍色大肩驾六龙出辅号曰神农六龙字义本此者非也锦江卽岷江也刘逵蜀都赋注谯周益州志曰成都织锦既成濯於江水其文分明胜於初成他水濯之不如江水也太平寰宇记濯锦江卽蜀江水至此濯锦锦彩鲜润於他水故曰濯锦江九域志笮桥江水亦名濯锦江俗云以此水濯锦鲜明渭水出今临洮府渭源县之鸟鼠山东流遶西安府城之北西安府卽唐之西京也又东流至华阴县入於河凡秦地诸水若灞若滻若泾若沔若镐若漓若滂若彪莫不入之而後同归於河故秦中诸水惟渭爲大元和郡县志玉

垒山在彭州导江县西北二十九里蜀都赋曰包玉垒而为宇方輿胜览玉垒山在茂州汶川县东四里出璧玉名山志玉垒山在成都府灌县衆峰丛拥远望无形惟云表崔嵬稍露山石莹洁可为器亦砮砮之类】

其五

万国同风共一时锦江何谢曲江池石镜更明【萧本作名】天上月後宫亲【一作新】得照蛾眉【汉书终军传今天下为一万里同风剧谈录曲江池本秦世隍洲开元中疏凿遂为胜景其南有紫云楼芙蓉苑其西有杏园慈恩寺花卉环周烟水明媚都人游翫盛於中和上巳之节彩幄翠帟匝於堤岸鲜车健马比肩擊轂上巳即赐宴臣僚京兆府大陈筵席长安万年两县以雄盛相较锦绣珍玩无所不施百辟会於山亭恩赐太常及教坊声乐池中备彩舟数只唯宰相三使北省官与翰林学士登焉每岁倾动皇州以为盛观入夏则菰蒲葱翠柳阴四合碧波红蕖湛然可爱好事者赏芳晨翫清景联骑携觴疊疊不絕长安志昇道坊龙华尼寺南有流水屈曲谓之曲江其深处下不见底司马相如赋云临曲江之隍州盖其所也华阳国志武都有一丈夫化为女子美而艷蜀王纳为妃不习水土欲去王必留之乃为东平之歌以乐之无几物故蜀王哀念之乃遣五丁之武都担土为妃作冢盖地数亩高七丈上有石镜太平寰宇记蜀王妃冢上有一石厚五寸径五尺莹彻号曰石镜】

其六

濯锦清江万里流云帆龙舸下扬州北地虽夸上林苑南京还有散花楼【岷江过成都为锦江至三峡为峡江至汉口为汉江至扬州为扬子江东流入海汉书地理志禹贡岷山在西徼外江水所出东南至江都入海过郡七行二千六百六十里此云万里者盖侈言其流之远耳左思诗振衣千仞冈濯足万里流马融广成颂张云帆施蜺帟方言南楚江湘凡船大者谓之舸龙舸画龙於大舟之首及两旁者也上林苑见七卷注一统志散花楼在成都府城东北隅杨齐贤曰成都志宣华苑城上有散花楼隋蜀王秀所立】

其七

锦水东流绕锦城星桥北挂象天星四海此中朝圣主峨眉山上【一作下】列仙庭【太平御览成都记曰府城本呼爲锦城秦灭蜀张仪所筑也每面各三里周回十二里高七丈华阳国志蜀郡有七桥直西门郫江中冲圻桥西南石牛门曰市桥城南曰江桥南渡流曰万里桥西上曰夷里桥亦曰笮桥从冲圻桥西出折曰长昇桥郫江上西有永平桥长老传言李冰造七桥上应七星太平寰宇记汉州雒县七星桥昔秦李冰开江置七星桥桥各一铁锁上应七星故世祖谓吴汉曰安军宜在七星间谓五星日月云李膺记一长星桥今名万里二圆星桥今名安乐三玑星桥今名建昌四夷星桥今名笮桥五尾星桥今名禅尼六冲星桥今名永平七曲星桥今名昇仙华阳国志犍为郡南安县有峨眉山山去县八十里孔子地图言有仙药名山洞天福地记峨眉山周围三百里名灵陵太妙之天在蜀嘉州】

其八

秦开蜀道置金牛汉水元通星汉流天子一行遗圣迹锦城长作帝王州【水经注秦惠王欲伐蜀而不知道作五石牛以金置尾下言能屎金蜀王负力令五丁引之成道秦使张仪司马错寻路灭蜀因曰石牛道韵会汉水出兴元府嶓冢山至汉阳爲漾水至武都爲汉水一名沔水地理今释漾水出今陕西汉中府寧羌州北嶓冢山东至汉中府南郑县南为汉水汉水元通星汉流者言其所出高远如从星汉而来卽水从银汉落及黄河之水天上来意也琦按兴元府卽今汉中府爲自秦入蜀咽喉要道金牛峡在沔县西一百七十里是五丁开道引石牛之处嶓冢山在沔县西一百二十里为汉水发源之所皆属汉中地首二句用此见蜀地自昔与中国隔远未尝爲帝王巡幸以反起下文今得天子一行遂成都邑之美也一行犹一游一豫之意旧注以僧一行奏?语当行万里事解之非是】

其九

水绿【萧本作绿】天青不起尘风光和暖胜三秦万国烟花随玉辇西来添作锦江春【三辅黄图项籍灭秦分其地爲三以章邯爲雍王都废丘司马忻为塞王都栎阳董翳爲翟王都高奴谓之三秦通典三秦今关中秦川也玉辇见七卷注】

其十

剑阁重关蜀北门上皇归马若云屯少帝长安开紫极双悬日月照乾坤【陆机诗胡马如云屯越骑亦星罗潘岳西征赋厌紫极之闲敞李善注紫极星名王者爲宫以象之曹植上表曰情注於皇居心存乎紫极严沧浪曰以中一句对上二句以下一句收上三句是一法十首皆於萧条奔寄中作壮丽语是爲得体举秦蜀形势不忘故都是爲用意 屯音豚】

峨眉山月歌

峨眉山月半轮秋影入平羌江水流夜发清溪向三峡思君不见下渝州【杨齐贤曰峨眉山在嘉州峨眉县罗目鎮平羌江在嘉州龙游县县中有平羌山资州清溪县乾德五年省入内江内江在州东九十八里资州东至昌州二百二十八里昌州南至渝州三百里自渝州明月峡至夔州西陵峡四千里巴峡明月峡巫峡是爲三峡萧士贇曰图经平羌江在雅州严道县东北城下至嘉州亦号平羌江一统志平羌江在雅州城北旧传羌夷入寇诸葛亮於此平之故名琦按後周保定间置平羌郡及平羌县以其境内有平羌山郡县皆依之以立名其地在今嘉定州之南十八里隋初郡废改县曰峨眉别置一平羌县在今嘉定州之东六十里唐属嘉州宋熙寧间省入龙游县唐之嘉州卽今之嘉定州龙游县卽今之夹江县平羌山今在夹江县地可考平羌江者卽经流平羌县中之水也因流而及其源故自雅州至嘉州一水通流皆谓之平羌江太白所指乃嘉州之江非雅州之江盖峨眉山在嘉州之南而清溪又与嘉州相近若雅州则在峨眉山之上流去清溪又远故知其非也輿地纪胜清溪驿在嘉州犍爲县王阮亭曰清溪在纳溪县西五里太白诗夜发清溪向三峡卽此或谓李诗本三溪三溪在嘉

州平羌峡非是杨注以清溪爲资州县名按新唐书地理志剑南道资州有清溪县本名牛鞞天宝元年始更名清溪此诗约是开元中太白未出蜀以前之作则指清溪爲县名者亦恐未是左思蜀都赋经三峡之峥嵘刘渊林注巴东永安县有高山相对相去可二十丈左右崖甚高人谓之峡江水过其中太平御覽庾仲雍荆州记曰巴陵楚之世有三峡明月峡兹不峡东突峡即今之巫峡秭归峡归乡峡峡程记曰三峡者明月峡巫山峡广溪峡其他瞿塘灩澦燕子屏风之类皆不预三峡之数琦按书记或以西峡巫峡归峡爲三峡或以广溪峡巫峡西陵峡爲三峡或以巫峡巴峡明月峡爲三峡或以瞿塘灩澦巫山爲三峡或以明月黄牛西陵爲三峡盖川河之中峡名甚多然据古歌巴东三峡巫峡长一语推之知古之所称三峡者皆在巴东大抵起自夔州府奉节巫山二县之东达於归州夷陵州之西连山叠嶂隐天蔽日凡六七百里水极险迅在巫山下者爲巫峡巫峡之上爲广溪峡巫峡之下爲西陵峡西陵峡则水漫爲平流而险始平矣或以瞿塘为三峡之门或以瞿塘即西陵峡或以明月峡即广溪峡纷纭传指难可凭依矣渝州周时爲巴子国秦汉为巴郡之地至唐为渝州以渝水得名後改南平郡今为重庆府巴县地王凤洲曰此是太白佳境二十八字中有峨眉山平羌江清溪三峡渝州使後人为之不胜痕迹矣可见此老鑪锤之妙王麟洲曰谈艺者有谓七言律一句中不可入两故事一篇中不可重犯故事此病犯者固多拈出亦见精严吾以爲皆非妙悟也作诗到精神传处随分自佳下得不觉痕迹使一句两入两句重犯亦自无伤如太白峨眉山月歌四句入地名者五古今目为絶唱殊不厌重蜂腰鹤膝双声叠韵沈休文三尺法也古今犯者不少寧尽汰之耶】

峨眉山月歌送蜀僧晏入中京【唐书肃宗本纪至德二载十二月以蜀郡为南京凤翔郡为西京西京为中京胡三省曰以长安在洛阳凤翔蜀郡太原之中故为中京】

我在巴东三峡时西看明月忆峨眉月出峨眉【一作峨眉山月】照沧海与人万里长相随黄鹤楼前月华白此中忽见峨眉客峨眉山月还送君风吹西到长安陌长安大道横九天峨眉山月照秦川黄金师【萧本作狮】子乘【繆本作承】高座白玉麈尾谈重玄我似浮云滞【萧本作殢】吴越君逢圣主游丹阙一振高名满帝都归时【一作来】还弄峨眉月【通典唐武德二年分夔州秭归巴东二县置归州後为巴东郡三峡峨眉俱见上首注元和郡县志江夏城西临大江西南角因矶为楼名黄鹤楼太平寰宇记黄鹤楼在鄂州江夏县西二百八十步昔费禕登仙每乘黄鹤於此楼憩驾故号为黄鹤楼陆放翁入蜀记黄鹤楼旧传费禕飞昇於此後忽乘黄鹤来归故以为楼号为天下絶景崔颢诗最传而太白奇句得於此者尤多今楼已废故址亦不复存问老吏云在石镜亭南楼之间正对鹦鹉洲犹可想见其地据此则南宋之初基址已不可考今之所立後人想像其处而为之者也胡三省通监注自大散关以北达於岐雍夹渭川南北岸沃野千里谓之秦川法苑珠林龟兹王造金师子座以大秦锦褥铺之令鸠摩罗什升而说法释氏要覽智度论问云何名师子座为佛化作为实师子为金银木石作耶荅云是号师子座非实也佛为人中师子凡佛所坐若牀若地皆名师子座夫师子兽中独步无畏能伏一切佛亦如是於九十六种外道一切人天中一切降伏得无所畏故称人中师子世说王夷甫容貌整丽妙於谈玄恒捉白玉柄麈尾与手都无分别重玄即老子玄之又玄之义晋书索袭传味无味於恍惚之间兼重玄於衆妙之内严沧浪曰是歌当识其主伴变幻之法题立峨眉作主而以巴东三峡沧海黄鹤楼长安陌秦川吴越伴之帝都又

是主中主题用月作主而以风云作伴我与君又是主中主回环散见映带生辉真有月映千江之妙巧转如蚕活变如龙回身作蜃嘘气成云不由思议造作 殢音膩】

赤壁歌送别【元和郡县志赤壁山在鄂州蒲圻县西一百二十里北临大江其北岸即乌林与赤壁相对是周瑜用黄盖策焚曹公舟船败走处故诸葛亮论曹操危於乌林是也杨齐贤曰盛宏之荆州记蒲圻县沿江一百里南岸赤壁周瑜黄盖乘大舰破魏武兵於乌林乌林赤壁东西一百六十里也予尝往来江汉间研求赤壁所在正在今鄂州上流八十里与百人山相对江边石皆赤色故号为赤壁矶东坡赋所谓东望夏口西望武昌非曹公之赤壁也一统志赤壁山在武昌府城东南九十里唐元和志在蒲圻县西一百二十里图经云在嘉鱼县西七十里其地今属嘉鱼宋苏轼指黄州赤鼻山为赤壁按刘备居樊口进兵逆操遇於赤壁则赤壁当在樊口之上又赤壁初战操兵不利引次江北则赤壁当在江南亦不应在江北今江汉间言赤壁者五汉阳汉川黄州嘉鱼江夏惟江夏之说合於史】

二龙争战决雌雄赤壁楼船扫地空烈火张天照云海周瑜於此破曹公君去沧江望【一作弄】澄碧鲸鲵唐突留余迹一一书来报故人我欲因【一作观】之壮心魄【通鉴孙权以周瑜程普为左右督将兵与刘备并力逆曹操进与操遇於赤壁时操军衆已有疾疫初一交战操兵不利引次江北瑜等在南岸部将黄盖曰操军方连船舰首尾相接可烧而走也乃取蒙冲鬪舰数十艘载燥荻枯柴濯油其中裹以帷幕上建旌旗豫备走舸繫於其尾先以书遗操诈云欲降时东南风急盖以舰最着前中江举帆余船以次俱进去北军二里余同时发火火烈风猛船往如箭烧尽北船延及岸上营落烟炎张天人马烧溺死者甚衆瑜等率轻锐继其後雷鼓大震北军大坏操引军从华容道步走汉书彭越传两龙方鬪且待之项羽传羽使人谓汉王曰天下匈匈徒以吾两人愿与王挑战决雌雄母徒罢天下父子爲也宋书高祖本纪因命纵火烟焰张天左传古者明王伐不敬取其鲸鲵而封之以为大戮杜预注鲸鲵大鱼名以喻不义之人吞食小国後汉书转相招结唐突诸郡唐突犯触也楞严经摧碎心魄】

江夏行【唐时鄂州亦谓之江夏郡有江夏县属江南西道今之武昌府江夏县是】

忆昔娇小姿春心亦自持爲言嫁夫婿得免长相思谁知嫁商贾令人却愁苦自从爲夫妻何曾在乡土去年下扬州相送黄鹤楼眼看帆去远心逐江水流只言期一载谁谓历三秋使妾肠欲断恨君情悠悠东家西舍同时发北去南来不逾月未知行李游何方作个音书能断絶适来往南浦欲问西江船正见当垆女红粧二八年一种爲人妻独自多悲恹对镜便垂泪逢人只欲啼不如轻薄儿旦暮长追【一作相】随悔作商人妇青春长别离如今正好同欢乐君去容华谁得知【黄鹤楼见峨眉山月歌注莫愁乐古辞闻欢下扬州相送楚山头探手抱腰看江水断不流演繁露今人谓出行资装为行李琦按杜氏左传注行李行人也後人多据之而訾以行装爲行李者为非是方密之云使人行必有装郑当时之治行孟子之治任是已则以行李为随行之物何不可耶胡震亨注能善也吴音有此太平寰宇记南浦在鄂州江夏县南三里离骚云送美人兮南浦其源出京首山西入大江秋冬涸竭春夏泛涨商旅往来皆於浦停泊以其在郭之南故曰南浦古乐府胡姬年十五春日独当垆详见三卷注沈约诗洛阳繁华子长安轻薄儿江淹诗君行在天涯妾身长别离 胡震亨曰太白江夏行及长干行并

爲商人妇咏而其源似出西曲盖古者吴俗好贾荆郢樊邓间尤盛男女怨旷哀吟清商诸西曲所由作也第其辞五言二韵节短而情有未尽太白往来襄汉金陵悉其人情土俗因采而演之为长什一从长干上巴峡一从江夏下扬州以尽乎行贾者之程而言其家人失身误嫁之恨盼归远望之伤使夫讴吟之者足动其逐末轻离之悔虽其才思足以发之而踵事以增华自从西曲本辞得来取材固有在也凡太白乐府皆非泛然独造必参观本曲之辞与所借用之曲之词始知其源流之自点化夺换之妙不独此二篇为然聊发凡资读者触解云】

怀【胡本作忆】仙歌

一鹤东飞过沧海放心散漫知何在仙人浩歌望我来应攀玉树长相待尧舜之事不足惊自余噉噉直【缪本作噉噉真】可轻巨鳌莫载【许本作戴】三山去我【一作吾】欲蓬莱顶上行【十洲记沧海岛在北海中地方三千里去岸二十万里海四面绕岛各广五千里水皆苍色仙人谓之沧海也楚辞望美人兮未来临风怀兮浩歌巨鳌事见四卷注】

玉真仙人词【胡震亨曰玉真公主睿宗女也太极元年出家爲道士筑观京师以居魏颢言太白爲公主所荐达而太白亦有客公主别馆诗此词岂其所献於公主者欤】

玉真之仙【一作真】人时往【一作西上】太华峰清晨鸣天鼓飈歙腾双龙弄电不辍手行云本无踪几时入少室王母应相逢【元和郡县志太华山在华州华阴县南八里云笈七籤九真高上宝书神明经曰扣齿之法左相扣名曰打天钟右相扣名曰槌天磬中央上下相扣名曰鸣天鼓若卒遇凶恶不祥当打天钟三十六遍若经凶恶辟邪威神大咒当槌天磬三十六遍若存思念道致真招灵当鸣天鼓以正中四齿相扣闭口缓颊使声虚而深响也汉武帝内传东方朔昔为太上使令到方丈助三天司命收录仙家朔到方丈但务游戏了不共营和气擅弄雷电激波扬风风雨失时阴阳错迕谢灵运诗弄波不辍手玩景岂停目元和郡县志少室山在河南府告成县西北五十里登封县西十里高十六里周回三十里颍水源出焉太平广记西王母者九灵太妙龟山金母也位配西方母养羣品天上天下三界十方女子之登仙者得道者咸所隶焉 飈音标歙音忽】

清溪行【一作宣州清溪 清溪在池州已见本卷首页注中】

清溪清我心水色异诸水借问新安江见底何如此人行明镜中鸟度屏风里向晚猩猩啼空悲远游子【元和郡县志新安江自歙州黟县界流入桐庐县东流入浙江萧士贇曰图经清溪属宣城新安即今徽州在唐为歙州在隋为新安郡凡水发源於徽者皆曰新安江自歙者出黟山自休宁者出率山自绩溪者出大嶂山自婺源者出浙山自浙江泝休宁为滩三百六十沈约有新安江水至清浅见底诗陈释惠标咏水诗舟如空里泛人似镜中行江淹诗夜闻猩猩啼详见三卷注】

酬殷明佐【缪本作佐明】见赠五云裘歌【杨齐贤注五云裘者五色绚烂如云故以五云名之】

我吟谢朓诗上语朔风飒飒吹飞雨谢朓已没青山空後來继之有殷公粉图珍裘五云色煜如晴天散彩虹文章彪炳光陆离应是素娥玉女之所爲轻如松花落金粉浓似锦苔含碧滋远山积翠横海岛残霞飞【一作霏】丹映江草凝毫采掇花露【一本作雾】容几年功成夺天造【谢朓观朝雨诗朔风吹飞雨萧条江上来原注谢朓宅在当涂青山下江南通志青山在太平府城东南三十里齐宣城太守谢朓尝筑室山南又名谢公山有谢公井白云泉帝王世纪西戎渠搜国服禹之德献其珍裘卢谿诗崇台非一干珍裘非一腋魏文帝诗丹霞蔽日彩虹垂天锤嵘诗品文体相辉彪炳可翫淮南子五彩争胜流漫陆离高诱注陆离美好貌谢庄月赋集素娥於後庭李周翰注嫦娥窃药奔月月色白故云素娥太上飞行九神玉经凡行玉清之道出则诸天侍轩给玉童玉女各三千人行上清之道出则五宿侍卫给玉童玉女各一千五百人行太清之道则五帝侍卫给玉童玉女各八百人江淹诗闺草含碧滋张铄注碧滋谓草色翠而滋繁顔延年诗积翠亦葱芊 朓音眺煜音叶掇都活切端入声】故人赠我我不违着令山水含清【繆本作晴】晖顿惊谢康乐诗兴生我衣襟前林壑敛暝色袖上云【繆本作烟】霞收夕霏【谢灵运石壁精舍还湖中诗昏旦变气候山水含清辉林壑敛暝色云霞收夕霏李善注霏云飞貌言裘上所画具此诗意】羣仙长叹惊此物千崖万岭相萦郁身骑白鹿行飘颻手翳紫芝笑披拂相如不足夸鸛鸛王恭鹤氅安可方瑶台雪花数千点片片吹落春风香爲君持此凌苍苍上朝三十六玉皇下窥夫子不可及矫手【萧本作首】相思空断肠【曹植诗忽逢二童顔色鲜好乘彼白鹿手翳芝草广韵翳隐也奄也鄣也西京杂记司马相如以所着鸛鸛裘就市人杨昌贲酒张华禽经注鸛鸛鸟名其羽可爲裘以辟寒世说孟昶未达时家在京口尝见王恭乘高輿披鹤氅裘於时微雪昶於篱间窥之叹曰此真神仙中人鹤氅析鹤羽而爲衣也鲍照诗胡风吹朔雪千里度龙山集君瑶台里飞舞两楹间张铄注瑶玉也以玉饰台也萧士贇曰曰三十六玉皇即所谓三十六天帝也详见三卷注矫手举手也陆机诗矫手顿世罗 氅昌两切昌上声】

临路歌【按李华墓志谓太白赋临终歌而卒恐此诗即是路字盖终字之譌胡震亨以爲拟琴操之临河歌非是】

大鹏飞兮振八裔中天摧兮力不济余风激兮万世游扶桑【胡本作搏桑】兮挂石【当作左】袂後人得之传此仲尼亡兮【繆本作乎】谁爲出涕【木华海赋迤延八裔李善注八裔犹八方也严忌哀时命衣掇叶以储与兮左袂挂於搏桑王逸注袂袖也言已衣服长大掇业储与不得舒展德能宏广不能施用东行则左袖挂於搏桑无所不覆也琦按诗意谓西狩获麟孔子见之而出涕今大鹏摧於中天时无孔子遂无有人爲出涕者喻已之不遇於时而无人爲之隐惜太白尝作大鹏赋实以自喻兹于临终作歌复借大鹏以寓言耳】

古意

君爲女萝草妾作兔丝花轻条不自引爲逐春风斜百丈托远松纏绵成一家谁言会面【一作合】易各在青山崖女萝发馨香兔丝断人肠枝枝相纠结叶叶竟【一作竞】飘扬生子不知根因谁共芬芳中巢双翡翠上宿紫鸳鸯若【繆本作君】识二草心海潮亦可量【兔丝女萝见四卷注】

山鷓鴣词【按教坊记山鷓鴣是曲名郑谷诗座中亦有江南客莫向清风唱鷓鴣知山鷓鴣者乃当时南地之新声 鷓音蔗鴣音姑】

苦竹岭头秋月辉苦竹南枝鷓鴣飞嫁得燕山胡鴈婿欲衔我向鴈门归山鸡翟雉来相劝南禽多被北禽欺紫塞严霜如剑戟苍梧欲巢难背违我心【萧本作今】誓死不能去哀鸣惊叫泪沾【缪本作沾】衣【江南通志苦竹岭在池州原三保李白尝读书於此太平广记鷓鴣吴楚之野悉有岭南偏多臆前有白圆点背上间紫赤毛其大如野鸡多对啼南越志云鷓鴣虽东西回翔然开翅之始必先南翥水经注山海经曰鴈门之水出於鴈门之山鴈出其间在高柳北高柳在代中其山重峦叠嶂霞举云高连山隐隐东出辽塞禽经首有彩毛曰山鸡张华注山雉长尾尤珍护之林木之森郁者不入恐触其尾也雨则避於岩石之下恐滞湿也久雨亦不出而求食死者甚衆水经注鷓鴣山鸡也光采鲜明五色眩耀利距善鬪博物志翟雉长尾雨雪降惜其尾栖高树杪不敢下食往往饿死紫塞苍梧俱见三卷注 胡震亨曰意当时有劝白北依谁氏者而白安于南不欲去托为鷓鴣之言以谢之其作于客云梦及岳阳之日乎琦按此诗当是南姬有嫁为北人妇者悲啼誓死而不肯去太白见而悲之故作此诗】

历阳壮士勤将军名思齐歌【并序】

历阳壮士勤将军神力出於百夫则天太后召见奇之授游击将军赐锦袍玉带朝野荣之後【萧本少後字】拜横南将军大臣慕义结十友即燕公张说馆陶公郭元振爲首余壮之遂作诗【唐时历阳郡即和州也隶淮南道盖古扬州之域勤将军之名不载史册然考许浑集有题勤尊师历阳山居诗序云师即思齐之孙然则其名亦震耀一时者矣杨升庵述希姓引之作勒思齐者误也通典游击将军爲五品以上武散官张说字道济洛阳人武后时爲相玄宗时再爲相封燕国公郭元振名振魏州人以字显睿宗时爲相封馆陶县男後又封代国公】

太古历阳郡化爲洪川在江山犹郁盘龙虎秘光彩蓄泄数千载风云何霑?特生勤将军神力百夫倍【搜神记历阳之郡一夕沦入地中而爲水泽今麻湖是也述异记和州历阳沦爲湖昔有书生遇一老姥姥待之厚生谓姥曰此县门石龟眼血出此地当陷爲湖姥後数往视之门吏问姥姥具荅之吏以朱点龟眼姥见遂走上北山顾城遂陷焉鲁灵光殿赋云覆霑?吕延济注霑?繁云貌 霑徒感切潭上声?音兑】

草书歌行

少年上人号怀素草书天下称独步墨池飞出北溟鱼笔锋杀尽中山兔八月九月天气凉酒徒词客满高堂牋麻素绢排数箱宣州石砚墨色光吾师醉後倚绳牀须臾扫尽数千张飘风骤雨惊飒飒落花飞雪何茫茫起来向壁【缪本作笔】不停手一行数字大如斗怳怳如闻神鬼惊时时只见龙蛇走左盘右蹙如惊电状同楚汉相攻战湖南七郡凡几家家家屏障书题徧王逸少张伯英古来几许浪得名张颠老死不足数我师此义【胡本作艺】不师古古来万事贵天生何必要公孙大娘浑脱舞【国史补长沙僧怀素好草书自言得草圣三昧弃

笔堆积埋於山下号曰笔塚宣和书谱释怀素字藏真俗姓钱长沙人徙家京兆初励律法晚精意於翰墨追仿不辍秃笔成冢一夕观夏云随风顿悟笔意自谓得草书三昧斯亦见其用志不分乃凝於神也当时名流如李白戴叔伦窦衆钱起之徒举皆有诗美之状其势以爲若惊蛇走虺骤雨狂风人不以爲过论又评者谓张长史爲颠怀素爲狂及其晚年益进则复评其与张芝逐鹿兹亦有加无已故其誉之者亦若是耶考其平日得酒发兴要欲字字飞动圆转之妙宛若有神一统志怀素零陵人覩二王真迹及二张草书而学之书漆盘三面俱穴赠之歌者三十七人皆当世名流顔真卿作序北齐书雕虫之美独步当时太平寰宇记墨池王右军洗砚池也并书宅在戴山下去会稽县二里余方輿胜覧绍兴府戒珠寺本王羲之故宅门外有二池曰墨池鹅池元和郡县志中山在宣州溧水县东南十五里出兔毫爲笔精妙太平寰宇记溧水县中山又名独山在县东南十里不与羣山连接古老相传中山有白兔世称爲笔最精笺麻皆纸也以五色染成或研光或金银泥画花式者爲笺纸其以麻爲之爲麻纸唐时诏书用黄麻白麻是也绢素皆繒名繒中至下者谓之绢绢之精白者谓之素十六国春秋佛图澄坐绳牀烧安息香胡三省通鉴注程大昌演繁露曰今之交牀制本自虏来始名胡牀隋改名交牀唐穆宗於紫宸殿御大绳牀见羣臣则又名绳牀矣余按交牀绳牀今人家有之然二物也交牀以木交午爲足足前後皆施横木平其底使措之地而安足之上端其前後亦施横木而平其上横木列窍以穿绳绦使之可坐足交午处复爲圆穿贯之以铁斂之可挟放之可坐以其足交故曰交牀绳牀以板爲之人坐其上其广前可容膝後有靠背左右有托手可以搁臂其下四足着地锦绣万花谷绳牀以绳穿爲坐器即俗之交椅也湖南七郡谓长沙郡衡阳郡桂阳郡零陵郡连山郡江华郡邵阳郡此七郡皆在洞庭湖之南故曰湖南世说注文字志曰王羲之字逸少琅邪临沂人善草隶累迁江州刺史右军将军会稽内史後汉书张芝字伯英善草书卫恒四体书势汉兴而有草书不知作者姓名至章帝时齐相杜度号称善作篇後有崔瑗崔实亦皆称工杜氏结字甚安而书体微瘦崔氏甚得笔势而结字小疎弘农张伯英者因而转精其巧凡家之衣帛必书而後练之临池学书池水尽黑下笔必爲楷则常曰匆匆不暇草书寸纸不见遗至今世尤宝其书韦仲将谓之草圣国史补张旭草书得笔法後传崔邈顔真卿旭言始吾见公主担夫争路而得笔法之意後见公孙氏舞剑器而得其神旭饮醉辄草书挥笔大叫以头搥水墨中而书之天下呼爲张颠醒後自视以为神异不可复得後辈言笔札者欧虞褚薛或有异论至张长史则无间言矣旧唐书吴郡张旭善草书而好酒每醉後号呼狂走索笔挥洒变化无穷若有神助时人号爲张颠杜甫观公孙大娘弟子舞器行序开元三载予尚童穉记於郾城观公孙氏舞剑器浑脱浏漓顿挫独出冠时自高头宜春梨园二教坊内人洎外供奉晓是舞者圣文神武皇帝初公孙一人而已往时吴人张旭善草书帖数尝於邺县见公孙大娘舞西河剑器自此草书长进豪荡感激乐府杂录开元中有公孙大娘善舞剑器僧怀素见之草书遂长盖准其顿挫之势也浑脱唐时舞名唐书山恽传将作大匠宗晋卿爲浑脱舞是也 苏东坡谓草书歌诀非太白所作乃唐末五代效禅月而不及者且訾其賤麻绢素排数箱之句村气可掬墨池编云此诗本藏真自作驾名太白者琦按以一少年上人而故贬王逸少张伯英以推獎之大失毁誉之实至张旭与太白既同酒中八仙之游而作诗称诩有胸藏风云世莫知之句忽一旦而訾其老死不足数太白决不没分别至此断爲伪作信不疑矣】

和卢侍御通塘曲

君夸通塘好通塘胜耶溪通塘在何处远【繆本作宛】在寻阳西青萝嫋嫋挂【胡本繆本作拂】烟树白鸕处处聚沙堤石门中断平湖出百丈金潭照云日何处沧浪垂钓翁鼓棹渔歌趣非一相逢不相识出没绕通塘浦边清水明素足别有浣纱吴女郎行尽绿【繆本作渌】潭潭转幽疑是武陵春碧流秦人鸡犬桃花里将比通塘渠见羞通塘不忍别十去九迟回偶逢佳境心已醉忽有一鸟从天来月出青山送行子四边苦竹秋声起长吟白雪望星河双垂两足扬素波梁鸿德耀会稽日宁知此中乐事多【施宿会稽志若耶溪在会稽县南二十五里北流与镜湖合郑樵尔雅注白鸕似鸕而大白色红脸可爱江淹诗碧鄣常周流金潭恒澄澈吕延济注潭水澄澈下有金沙故曰金潭陶潜诗鼓棹路崎曲棹楫也在舟之旁拨水以进舟者也一说短者曰楫长者曰棹梁简文帝诗绿潭倒云气青山衔月规武陵桃花见二卷注庄子郑有神巫曰季咸列子见之而心醉鲍照诗居人掩闺卧行子夜中饭王褒洞箫赋扬素波而挥连珠吕向注素白也後汉书梁鸿东出关与妻子居齐鲁之间有顷又去适吴依大家臯伯通居庑下爲人赁舂每归妻为具食不敢於鸿前仰视举案齐眉伯通察而异之曰彼庸能使其妻敬之如是非凡人也琦按梁鸿所适之地在今苏州而云会稽者盖其地古属吴国秦属会稽郡汉仍其旧不改至後汉顺帝永建四年始分置吴郡鸿在肃宗朝尚未有吴郡之名史臣本古国名而言故曰吴与上齐鲁一例通称太白则指其本时之郡而言故曰会稽似乎乖异而实不相妨也棹直教切巢去声浣音换】

李太白集注卷八

卷九

钦定四库全书

李太白集注卷九

钱塘 王琦 撰

古近体诗共四十三首

赠孟浩然

吾爱孟夫子风流天下闻红颜弃轩冕白首卧松云醉月频中圣迷花不事君高山安可仰徒
【繆本作从】此揖清芬【唐书孟浩然襄州襄阳人少好节义喜拯人患难隐鹿门山年四十乃游京师尝於太学赋诗一座叹服无敢抗张九龄王维雅称道之维私邀入内署俄而玄宗至浩然匿牀下维以实对帝喜曰朕闻其人而未见也何惧而匿诏浩然出帝问其诗浩然再拜自诵所为至不才明主弃之句帝曰卿不求仕而朕未尝弃卿奈何诬我因放还采访使韩朝宗约浩然偕至京师欲荐诸朝会故人至剧饮欢甚或曰君与韩公有期浩然曰业已饮遑恤他卒不赴朝宗怒辞行浩然不悔也张九龄为荆州辟置於府府罢开元末病疽背卒南史眷恋松云轻迷人路三国志徐邈为尚书郎时科酒禁而邈私饮至於沉醉校事赵达问以曹事邈曰中圣人达白之太祖太祖甚怒鲜于辅进曰平日醉客谓酒清者为圣人浊者为贤人邈性修慎偶醉言耳诗小雅高山仰止景行行止 中圣之中本作去声读協音当读平声】

赠从兄襄阳少府皓【一作晤 唐书地理志山南东道襄州有襄阳县】

结发未识事所交尽豪雄郤秦不受赏击晋【一作救赵】宁为功【繆本此下多托身白刃里杀人红尘中当朝揖高义举世钦英风四句】小节岂足言退耕春陵东归来无产业生事如转蓬一朝乌【一作狐】裘敝百镒黄金空弹剑徒激昂出门悲路穷吾兄青云士然诺闻诸公所以陈片言片言贵情通棣华傥不接甘与秋草同【汉书李广传结髮与匈奴战顔师古注言始升冠即在战阵也鲁仲连不肯令赵尊秦为帝秦将闻之为却军五十里平原君欲封之鲁仲连不肯受详二卷注朱亥从魏公子无忌袖铁锥杀晋鄙夺其军以救邯郸存赵详见三卷注晋书阮浑少慕通达不修小节元和郡县志春陵故城在随州枣阳县东南三十五里曹植诗吁嗟此转蓬居世何独然杨齐贤曰蓬花北土有之团栾如球风起则随地而转不能自止战国策苏秦说秦王书十上而说不行黑貂之裘敝黄金百斤尽韵会国语二十四两为镒赵岐孟康皆曰二十两郑玄曰三十两汉书不自激昂乃反涕泣左传召穆公思周德之不类故纠合宗族於成周而作诗曰常棣之华鄂不??凡今之人莫如兄弟杜预注常棣棣也鄂鄂然花外发不??言??以喻兄弟和睦则强盛而有光辉??然】

淮海对雪赠傅霭【一作淮南对雪赠孟浩然】

禹贡淮海惟扬州谓扬州之域北至淮东南至海也後人称扬州曰淮海本此】

朔雪落吴【一作潮】天从风渡溟渤海【萧本作梅】树【一作木】成阳春江沙皓明月
【繆本下多飘飏四荒外想象千花发瑶草生阶墀玉尘散庭阙四句】兴从剡溪起思绕梁园【繆本作山】发寄君郢中歌曲罢心断絶【後四句一作剡溪兴空在郢路歌未歇寄君梁父吟曲尽心断絶鲍照诗胡风吹朔雪又穿池类溟渤江总诗海树一边出云山四面通世说王子猷居山陰夜大雪眠觉开室命酌酒四望皎然因起彷徨咏左思招隐诗忽忆戴安道时戴在剡即便夜乘小船就之经宿方至造门不前而返人问其故王曰吾本乘兴而行兴尽而返何必见戴一统志剡溪在绍兴府嵊县治南一名戴溪即晋王徽之雪夜访戴逵处谢惠连雪赋岁将暮时既昏寒风积愁云繁梁王不悦游於兔园乃置旨酒命宾友召邹生延枚叟相如未至居客之右俄而微霰零密雪下王乃歌北风於卫诗咏南山於周雅授简於司马大夫曰抽子秘思骋子妍词侔色揣称为寡人赋之新序客有歌於郢中者其为阳春白雪国中属而和者数十人鲍照诗涕零心断絶 剡音闪】

赠徐安宜【唐时淮南道楚州有安宜县上元三年以其地得定国宝十三枚因改元宝应仍改安宜县为宝应县徐盖为安宜令者也】

白田见楚老歌咏徐安宜制锦不择地操刀良在兹清风动百里惠化闻京师浮人若云归耕种满郊岐川光净麦陇日色明桑枝讼息但长啸宾来或解颐青橙【繆本作槐】拂户牖白【一作碧】水流园池游子滞安邑怀恩未忍辞翳【繆本作繄】君树【萧本作独】桃李岁晚托深期【白田安宜地名楚老楚地父老也江南通志白田渡在宝应县南门外左传子皮欲使尹何为邑子产曰少未知可否子皮曰愿吾爱之使夫往而学焉夫亦愈知治矣子产曰人之爱人求利之也今吾子爱人则以政犹未能操刀而使割也其伤实多子有美锦不使人学制焉大官大邑身之所庇也而使学者制焉其为美锦不亦多乎杜预注制裁也宋书刘道产之在汉南历年踰十惠化流於樊沔公羊传京师者何天子之居也京者何大也师者何衆也天子之居必以衆大之词言之杨齐贤注浮人流人也王僧达诗麦陇多秀色郑康成毛诗笺嘯蹙口而出声也汉书诸儒为之语曰无说诗匡鼎来匡说诗解人颐如淳注使人笑不能止也李陵诗游子暮何之安邑即安宜也吴均诗怀恩未忍去非无江海心繄惟也又发语声左传繄我独无说苑阳虎得罪於鲁北见简子曰自今以後不复树人矣简子曰夫树桃李者夏得休息秋得其实焉树蒺藜者夏不得休息秋得其刺焉今子之所树蒺藜也自今以来择人而树之母已树而择之 繄音伊】

赠任城卢主簿潜【萧本少潜字 唐书地理志河南道兖州有任城县唐官制县令之佐有主簿其位在丞之下尉之上京县二人从八品畿县上县者正九品中县下县者从八品各一人】

海鸟知天风窜身鲁门东临觴不能饮矫翼思凌空钟鼓不为乐烟霜谁与同归飞未忍去流泪谢鸳鸿【庄子昔者海鸟止於鲁郊鲁侯御而觴之於庙详见大鹏赋注扬雄解嘲矫翼厉翮李周翰注矫举也南齐书孝感烟霜】

早秋贈裴十七仲堪

远海动风色吹愁【一作秋】落天涯南星变大火热气余丹霞光景不可回六龙转天车荆人泣美玉鲁叟悲匏瓜功业若梦里【一作中】抚【一作推】琴发长嗟裴生信【一作实】英迈屈【繆本作崛】起多才华历抵海岱豪结交鲁朱家【一作历游赵魏豪结交列如麻繆本下多良图竟未展意欲飞丹砂破产且救人遗身不为家四句】复携两少妾【一作女】艳色惊荷葩【繆本作花】双歌入青云但惜白日斜

穷【一作沧】溟出宝贝大泽饶龙蛇明主傖【一作必】见

收烟霄路非赊时命若不会归应链丹砂【一作知飞万里道勿使岁寒嗟南星南方之星也大火心星也初昏之时大火见南方於时为夏若转而西流则为秋矣郭璞尔雅注大火心也在中最明故时候主焉江淹诗丹霞蔽阳影刘良注丹霞赤云也曹植诗白日西南驰光景不可攀六龙见三卷注天车即日车也荆人卞和泣玉事见四卷注孔子曰吾岂匏瓜也哉焉能系而不食何晏注匏瓠也言瓠瓜得系一处者不食故也吾自食物当东西南北不得如不食之物系滞一处王粲诗摄衣起抚琴後汉书至於扶翼王运皆武人屈起章怀太子注屈起犹勃起也音其勿反禹贡海岱惟青州孔传曰东北据海西南距岱史记鲁朱家者与高祖同时鲁人皆以儒教而朱家用侠闻所藏活豪士以百数其余庸人不可胜言然终不伐其能歆其德诸所尝施惟恐见之振人不赡先从贫贱始家无余财衣不完采食不重味乘不过鞲牛专趋人之急甚己之私既陰脱季布之厄及布尊贵终身不见也自关以东莫不延颈愿交焉鲍照诗会得两少妾说文葩花也韵会赊远也木华海赋翔天沼戏穷溟又曰岂徒积大颠之宝贝左传深山大泽实生龙蛇葩普巴切怕平声】

贈范金乡【萧本作卿】二首【唐书地理志河南道兖州有金乡县】

君子枉清盼不知东走迷离家未几月络纬鸣中闺桃李君不言攀花愿成蹊那能吐芳讯惠好相招携我有结绿珍久藏浊水泥时人弃此物乃与燕石【一作珉】齐摭【繆本作拂】拭欲贈之申眉路无梯辽东慙白豕楚客羞山鸡徒有献芹心终流泣玉【一作血】啼只应自索漠留舌示山妻【淮南子狂者东走逐者亦东走东走则同所以东走则异抱朴子此亦东走之迷忘葵之甘也络纬见三卷注汉书桃李不言下自成蹊顔师古注蹊谓径道也言桃李以其花实之故非有招呼而人争归趋来往不絕其下自然成径以喻人怀诚信之心故能潜有所感也顔延年诗君子吐芳讯感物测子衷谢瞻诗烟煴吐芳讯李周翰注芳讯芳言也诗国风惠而好我左传招携以礼史记周有砥礪宋有结绿梁有悬黎楚有和璞此四宝者立之所生良工之所失也曹植诗妾若浊水泥燕石见二卷注说文摭拾也应璩诗良遇不可值伸眉路何阶後汉书往时辽东有豕生子白头异而献之行至河东见羣豕皆白怀慙而还尹文子楚客担山雉路人问何鸟也担雉者欺之曰凤凰也路人曰我闻凤凰今真见之汝贩之乎曰然则十金勿与请加倍乃与之将欲献楚王经宿而鸟死路人不遑惜金惟恨不得以献楚王国人传之咸以为真凤凰贵欲以献之遂闻楚王王感其欲献於已召而厚赐之过於买鸟之金十倍嵇康絶交书野人有快炙背而美芹子者欲献之至尊虽有区区之意亦已疎矣

卞和泣玉见四卷注文心雕龙思不环口索莫乏气史记张仪尝从楚相饮已而楚相亡璧门下意张仪曰仪贫无行此必盗相君之璧共执张仪掠笞数百不服醢之其妻曰嘻子无读书游说安得此辱乎张仪谓其妻曰视吾舌尚在否其妻笑曰舌在也仪曰足矣 撫音炙】

其二

范宰不买名弦歌对前楹为邦默自化日觉冰壶清百里鸡犬静千庐机杼鸣浮人少荡析爱客多逢迎游子覩嘉政因之听颂声【淮南子弦歌鼓舞缘饰诗书以买名誉於天下老子我无为而民自化鲍照诗清如玉壶冰古诗札札弄机杼机杼织具也机以转轴杼以持纬书盘庚今我民用荡析离居孔颖达正义播荡分析蜀志费祎传丞相亮南征还羣寮於数十里逢迎公羊传什一行而颂声作矣何休注颂声者太平歌颂之声 杼音紵】

赠瑕丘王少府【唐书地理志河南道兖州有瑕丘县】

皎皎鸾凤姿飘飘神仙气梅生亦何事来作南昌尉清风佐鸣琴寂寞道为【一作为谁】贵一见过所闻操持难与羣毫挥鲁邑讼目送瀛洲云我隐屠钓下尔当玉石分无由接高论空此仰清芬【汉书梅福字子真九江壽春人为郡文学补南昌尉後去官归寿春至元始中王莽专政福一朝弃妻子去九江至今传以为仙晋书梁国张伟志趣不常自隐於屠钓瀛洲海中三山之一详见四卷注】

东鲁见狄博通【按唐书宰相世系表博通梁公狄仁杰之曾孙户部郎中光济之孙】

去年别我向何处有人传道游江东谓言挂席度沧海却来应是无长风【谢灵运诗挂席拾海月宋书宗慤传愿乘长风破万里浪】

见京兆韦参军量移东阳二首【按唐书地理志京兆府京兆郡本雍州属关内道婺州东阳郡属江南东道日知录唐朝人得罪贬窜远方遇赦改近地谓之量移旧唐书玄宗纪开元二十年十一月庚午祀后土於雒上大赦天下左降官量移近处二十七年二月己巳加尊号大赦天下左降官量移近处量移字始见於此】

潮水还归海流人却到吴相逢问愁苦泪尽日南珠【庄子子不闻夫越之流人乎陆德明注流人有罪自流徙者也吴都赋渊客慷慨而泣珠刘渊林注俗传鲛人从水中出曾寄寓人家积日卖绡绡者竹孚俞也鲛人临去从主人索器泣而出珠满盘以与主人洞冥记吠勒国去长安九千里在日南人长七尺被发至踵乘犀象之车乘象入海底取宝宿於鲛人之舍得泪珠则鲛人所泣之珠也庾信拟连珠日南枯蚌犹含明月之珠】

其二

闻说金华渡东连五百滩全胜若耶好莫道此行难猿啸千谿合松风五月寒他年一携手摇

艇入新安【一统志五百滩在金华府城西五里滩之最大者俗传舟行挽牵五百人方可渡若耶溪在绍兴府城南二十五里下与镜湖合西施采莲欧冶铸剑於此新安江一名青溪出徽州自歙县经淳安县界至严州府城南合婺港东入浙江广韵艇小船也 艇音挺】

赠丹阳横山周处士惟长【唐书地理志润州丹阳郡有丹阳县本曲阿天宝元年更名太平御覽山谦之丹阳记曰丹阳县东十八里有横山连亘数十里传云楚子重至於横山是也江南通志横山在江宁府江宁县东南一百二十里高淳县东二十里其山四方望之皆横故曰横山亦名横望山太平府志横山在当涂县东六十里高二百丈周八十里穹窿嵒峻苍翠亘天际四望皆横故名横山与江宁溧水接壤丹阳湖在其南春秋楚子重伐吴所至之地】

周子横山隐开门临城隅连峰入户牖胜槩凌方壶时枉【一作作】白紵词放歌丹阳湖水色傲溟渤川光秀菰蒲当其得意时心与天壤俱闲云随舒卷【萧本作卷施】安识身有无抱石耻献玉沉泉笑探珠羽化如可作相携上【一作携手止】清都【方壶方丈也海中三神山之一见明堂赋注白紵词见四卷注江南通志丹阳湖在江宁府高淳县西南三十里太平府当涂县东南七十里以湖之中流分界其源有三徽州高淳宁国广德诸溪皆汇之通为三湖一曰石臼一曰固城一曰丹阳而丹阳最大盖总名也周围三百余里鲍照诗穿池类溟渤谢灵运诗菰蒲冒清浅本草苏颂曰菰根江湖陂泽中皆有之生水中叶如蒲苇刈以秣马甚肥春末生白芽如笋即菰菜也又谓之茭白生熟皆可啖甜美其中心如小儿臂者名菰手作菰首者非矣寇宗奭曰菰乃蒲类河朔边人止以饲马作荐八月开花如苇结青子合粟为粥食甚济饥李时珍曰蒲丛生水际似莞而褊有脊而柔二三月生苗八九月收叶以为席亦可作扇软滑而温张协诗清风激万代名与天壤俱抱石献玉用卞和事见四卷注庄子人有见宋王者锡车十乘以其十乘骄穉庄子庄子曰河上有家贫恃纬萧而食者其子没於渊得千金之珠其父谓其子曰取石来鍛之夫千金之珠必九重之渊而骊龙颌下子能得珠者必遭其睡也使骊龙而寤子尚奚微之有哉今宋国之深非直九重之渊也宋王之猛非直骊龙也子能得车者必遭其睡也使宋王而寤子为齎粉矣羽化成仙而去也清都上帝所都见二卷注】

玉真公主别馆苦雨赠卫尉张卿二首【按唐书公主列传玉真公主睿宗之第十女也始封崇昌县主太极元年出家为道士以方士史崇玄为师改称玉真公主筑玉真观於京师俄进号上清玄都大洞三景师天宝三载上言先帝许妾舍家今仍叨主第食租赋愿去公主号罢邑司归之王府玄宗不许又言妾高宗之孙睿宗之女陛下之女弟於天下不为贱何必名系主号资汤沐然後为贵请入数百家之产延十年之命帝知主意乃许之薨宝应时古楼观紫云衍庆集玉真公主与金仙公主俱入道今楼观南山之麓有玉真公主祠堂存焉俗传其地曰邸宫以为主家别馆之遗址也然碑志湮没图经废舛惟开元中戴璇楼观碑有玉真公主师心此地之语而王维储光羲皆有玉真公主山庄山居之诗则玉真祠堂为观之别馆审矣因尽录唐人题咏刻之祠中元佑二年岁在丁卯七月望日河东薛绍彭题所谓别馆疑即此地是坎埤雅雨久曰苦雨唐书百官志卫尉寺卿一人从三品少卿二人从四品掌器械文物】

秋【繆本作愁】坐金张馆繁阴昼不开空烟迷【繆本作送】雨色萧飒望中来翳翳昏垫苦沉沉忧恨催清秋何以慰白酒盈吾杯吟咏思管乐此人已成灰独酌聊自勉谁贵经纶才弹劔谢公子无鱼良可哀【汉书功臣之後惟有金氏张氏亲近宠贵比於外戚左思诗朝集金张馆暮宿许史庐尚书益稷下民昏垫谢灵运诗久痾昏垫苦张铣注昏雾垫溺也言病此霖雨之苦也论衡人死血脉竭竭而精气灭灭而形体朽朽而成灰土史记冯体弹其剑而歌曰长剑归来乎食无鱼 翳音衣垫音店】

其二

苦雨思白日浮云何由卷稷卨和天人阴阳【许本作霾】乃【繆本作仍】骄蹇秋霖剧倒井昏雾横絶巘欲往咫尺涂遂成山川限淲淲奔湍闻【繆本作泻】浩浩惊波转泥沙塞中途牛马不可辨饥从漂母食闲缀羽陵【一作林】简园家逢秋蔬藜藿不满眼蠨蛸结思幽蟋蟀伤徧浅?竈无青烟刀机生绿藓投筇解鸛鷖换酒醉北堂丹徒布衣者慷慨未可量何时黄金盘一斛荐?榔功成拂衣去摇曳【繆本作裔】沧洲旁【高即契字东都赋统和天人公羊传为其骄蹇左传凡雨自三日已往为霖楚辞皇天淫溢而秋霖韵会剧尤甚也传玄诗霖雨如倒井韵会巘山峯也骆宾王诗薄烟横絶巘轻冻涩回湍韵会淲水会也鲍照诗蹢蹢寒叶离淲淲秋水积庄子秋水时至百川灌河泾流之大两涘渚涯之间不辨牛马陆德明注辨别也言广大故望不分别也漂母见六卷注广韵缀连补也穆天子传天子东游次於雀梁蠹书於羽陵汉书司马迁传粦梁之食藜藿之羹颜师古注藜草似蓬也藿豆叶也史记正义藜似藿而赤表本草纲目藜处处有之即灰藿之红心者茎叶稍大河朔人名落藜南人名臙脂菜亦曰鹤顶草皆因形色名也嫩时亦可食昔人谓藜藿与膏粱不同老则茎可为杖诗国风蠨蛸在户埤雅释虫云蠨蛸长踦萧梢长踦之貌因以名云郭璞曰今小蜘蛛长脚者俗呼喜子亦如蜘蛛布网垂丝着人衣当有亲客至荆州河内之人谓之喜母陆玕诗疏蟋蟀似蝗而小正黑有光泽如漆有角翅一名蜚一名蜻蛚楚人谓之王孙幽州人谓之趣织督促之言也里语曰趣织鸣嬾妇惊是也太平御覽古今注曰苔藓空室无人行则生或紫或青一名圆藓一名绿钱一名绿藓西京杂记司马相如以所着鸛鷖裘就市人杨昌贲酒南史刘穆之传诸葛长人有异谋穆之厚为之备谓所亲曰贫贱常思富贵富贵必践危机今日思为丹徒布衣不可得也穆之少时家贫诞节嗜酒食不修拘捡好往妻兄家乞食多见辱不以为耻江氏後有庆会属令勿来穆之犹往食毕求?榔江氏兄弟戏之曰?榔消食君乃常饥何忽须此及穆之为丹阳尹将召妻兄弟妻泣而稽顙以致谢穆之曰本不匿怨无所致忧及至醉穆之乃令人以金盘贮?榔一斛以进之 淲音丛缀音拙又音赘蛸音梢藓音癣】赠韦秘书子春【唐书百官志秘书省有监一人少监二人丞一人秘书郎三人校字郎十人正字二人未详子春为省中何职】

谷口郑子真躬耕在岩石高名动京师天下皆籍籍斯【繆本作其】人竟不起云卧从所适苟无济代心独善亦何益惟君家世者偃息逢休明谈天信浩荡说剑纷纵横谢公不徒然起来为苍生秘书何寂寂无乃羈豪英且复归碧山安能恋金阙旧宅樵渔地蓬蒿已应没却顾女几峯胡顔见云月徒为风尘苦一官已白发【萧本作须】气同万里合访我来琼都披云覩青天扪虱话良图留侯将绮里【繆本作季】出处未云殊终与安社稷功成去五湖【高

士传郑朴字子真谷口人也修道静默世服其清高成帝时大将军王凤以礼聘之遂不屈扬雄盛称其德曰谷口郑子真耕於岩石之下名振京师雍录谷口在云阳县西四十里郑子真隐於此汉书国中口语籍籍顏师古注籍籍喧聒之意鲍照诗云卧恣天行三国志管宁传环堵华门偃息穷巷史记齐人颂曰谈天衍雕龙爽裴駰注刘向别录曰邹衍之所言五德终始天地广大书言天事故曰谈天庄子有说剑篇世说谢公屡违朝旨高卧东山诸人每相与言安石不肯出将如苍生何元和郡县志女几山在河南府福昌县西南三十四里一统志女几山在河南宜阳县西九十里唐李贺集杜兰香神女上昇遗几在焉故名曹植上诗表忍垢苟全则犯诗人胡顏之讥江淹为萧领军拜侍中刺史章寰海顺典琼都咸光又淹齐太祖诛查郁远域清丽琼都世说卫伯玉为尚书见乐广与中朝名士谈议命子弟造之曰此人人之水镜也见之若披云雾覩青天晋书桓温入关王猛被褐詣之一面谈当世之事扞虱而言旁若无人绮里季见四卷注吴越春秋范蠡乃乘扁舟出三江入五湖人莫知其所适 萧本自徒为风尘苦以下五聯另作一首发字作须叶下韵也今按此诗一气贯注不能断乙通作一首为是故校从古本】

赠韦待御黄裳二首【因话录御史台三院一曰台院其僚曰侍御史衆呼为端公二曰殿院其僚曰殿中侍御史衆呼为侍御三曰察院其僚曰监察御史衆呼亦曰侍御】

太华生长松亭亭凌霜雪天与百尺高岂为微风折桃李卖阳【繆本作摇】艷路人行且迷春光扫地尽碧叶成黄泥愿君学长松慎勿作桃李受屈不改心然後知君子【太华即华山也王应麟诗地理考太华山在华州华阴县南八里刘桢诗亭亭山上松吕向注亭亭高貌】

其二

见君乘骢马知上太行【旧本皆作山今依文苑英华本校作行】道此地果摧轮全身以为宝我如丰年玉弃置秋田草但勸冰壶心无为叹衰老【魏武帝诗北上太行山艰哉何巍巍羊肠坂诘屈车轮为之摧後汉书桓典拜侍御史是时宦官秉权典执正无所回避常乘骢马京师畏惮为之语曰行行且止避骢马御史说文骢马青白杂毛也世说世称庾文康为丰年玉稚恭为荒年谷鲍照诗清如玉壶冰 骢音聪】

赠薛校书【按唐书百官志弘文馆有校书郎二人集贤殿书院有校书四人秘书省有校书郎十人著作局有校书郎二人崇文馆有校书郎二人司经局有校书四人皆九品】

我有吴越【繆本作趋】曲无人知此音姑苏成蔓草麋鹿空悲吟未夸观涛作空郁钓鳌心举手谢东海虚行归故林【古今注吴趋曲吴人以歌其地也陆机诗四坐并清听听我歌吴趋刘良注趋步也此曲吴人歌其土风也吴越春秋吴宫为墟庭生蔓草汉书伍被传子胥諫吴王吴王不用乃曰臣今见麋鹿游姑苏之台也枚乘七发将以八月之望与诸侯远方交游兄弟并往观涛乎广陵之曲江钓鳌见四卷注】

赠何七判官昌浩

有时忽惆怅匡坐至夜分平明空啸咤思欲解世纷心随长风去吹散万里云羞作济南生九十诵古文不然拂剑起沙漠收奇勲老死阡【繆本作田】陌间何因扬清芬夫子今管乐英才冠三军终与同出处岂将沮溺羣【庄子匡坐而弦司马彪注匡正也後汉书清河孝王庆常夜分严装衣冠待明章怀太子注分半也汉书张良传後五日平明与我期此南齐书一朝啸咤事功可立汉书伏生济南人也故为秦博士孝文时求能治尚书者天下无有闻伏生治之欲召时伏生年九十余老不能行於是诏太常使掌故晁错往受之史记名冠三军水经注南阳叶方城邑西有黄城山是沮溺耦耕之所朱异诗虽有遨游美终非沮溺羣惆音抽又音俦咤丑亚切㗎去声】

读诸葛武侯传书【萧本少书字】怀赠长安崔少府叔封昆季【按唐书地理志京兆府有长安县】

汉道昔云季羣雄方战争霸图各未立割据资豪英赤伏起颓运卧龙得孔明当其南阳时陇亩躬自耕鱼水三顾合风云四海生武侯立岷蜀壮志【繆本作士】吞咸京何人先见许但有崔州平余亦草间人【一作士】颇怀拯物情晚途值子玉华发同衰荣托意在经济结交为弟兄无令管与鲍千载独知名【李末也杨炯诗汉氏昔云季中原争逐鹿宋书芟夷鲸鲵驱骋羣雄晋书肇兹王业光启霸图陆机辨亡论割据山川跨制荆吴淮南子齐桓晋文五霸之豪英也後汉书光武先在长安时同舍生强华自关中奉赤伏符曰刘秀发兵捕不道四夷云集龙鬬野四七之际火为主魏书入匡颓运出剿元凶蜀志诸葛亮字孔明琅琊阳都人也躬耕陇亩好为梁父吟身長八尺每自比於管仲乐毅时人莫之许也惟博陵崔州平颍川徐元直与亮友善谓为信然时先主屯新野徐庶谓先主曰诸葛孔明者卧龙也将军岂愿见之乎先主曰君与俱来庶曰此人可就见不可屈致也将军宜枉驾顾之由是先主遂诣亮凡三往乃见先主於是与亮情好日密关羽张飞等不悦先主解之曰孤之有孔明犹鱼之有水也愿诸君勿复言羽飞乃止孔明出师表臣本布衣躬耕南阳後汉书崔瑗字子玉早孤锐志好学尽能传其父业与扶风马融南阳张衡特相友好又文苑列传华发旧德章怀太子注华发白首也史记管仲少时尝与鲍叔牙游鲍叔知其贤管仲贫困尝欺鲍叔鲍叔终善遇之不以爲言已而鲍叔事齐公子小白管仲事公子纠及小白立为桓公公子纠死管仲囚焉鲍叔遂进管仲以身下之】

赠郭将军

将军少年出武威【一作豪荡有天威】入掌银台护紫微平明拂剑朝天去薄暮垂鞭醉酒归爱子临风吹玉笛美人向【一作腾一作娇】月舞罗衣畴昔雄豪如梦里相逢且欲醉春晖【一作今日相逢俱失路何年灞上弄春晖唐时凉州亦谓之武威郡隶陇右道大明宫图紫宸殿侧有右银台门左银台门紫微天子所居之宫也天有紫微宫王者象之故亦谓之紫微艺文类聚日将暮曰薄暮左传嘒昔之羊子为政杜预注畴昔犹前日也晋书刘琨与范阳祖纳俱以雄豪着名】

驾去温泉宫【萧本缺宫字】後赠杨山人【唐书京兆府昭应县有宫在骊山下贞观十八

年置咸亨二年始名温泉宫天宝六载更曰华清宫治汤井为池环山列宫室又筑罗城置百司及十宅】

少年落魄【繆本作托】楚汉间风尘萧瑟多苦顔自言管葛【一作□茧】竟谁许长吁莫错还闭关一朝君王垂拂拭剖心输丹雪胷臆忽蒙白日回景光直上青云生羽翼幸陪鸾辇出鸿都身骑飞龙天马驹王公大人借【萧本作惜】顔色金章【萧本作璋】紫绶来相趋当时结交何纷纷片言道合唯有君待吾尽节报明主然後相携【一作携手沧洲】卧白云【汉书酈食其家贫落魄无衣食业北史杨素少落拓有大志不拘小节琦按扬雄解嘲何为官之拓落也顔师古曰拓落不耦也落拓盖倒用以取新耳楚战国时楚王所据之地汉汉水之滨江淹恨赋闭关却扫塞门不仕鲍照诗白日回清景後汉书光和元年始置鸿都门学生章怀太子注鸿都门名也於内置学时其中诸生皆勅州郡三公举召能为尺牍词赋及工书鸟篆者相课试至千人焉翰林志唐制学士初入院赐中厩马一匹谓之长借马渔隐丛话唐学士例借飞龙厩马唐书兵志其後禁中增置飞龙厩汉书西域传大宛国多善马马汗血言其先天马子也顔师古注大宛国有高山其上有马不可得因取五色母马置下与集生驹皆汗血因号曰天马子云傅玄诗寄言飞龙天马驹吕氏春秋王公大人从而礼之北山移文纽金章绾墨绶李善注金章铜印也宋书太宰太傅太保丞相司徒司空大司马大将军太尉凡将军位从公者骠骑车骑将军凡诸将军加大者征镇安平中军镇军抚军前左右後将军征虏冠军抚□龙骧将军皆金章紫绶梁书萧子恪与弟子范等尝因事入谢高祖在文德殿引见之从容谓曰望卿兄弟尽节报我耳 魄音薄】

温泉侍从归逢故人

汉帝长杨苑夸胡羽猎归子云叨侍从献赋有光辉激赏摇天笔承恩赐御衣逢君奏明主他日共翻飞【雍录汉世之谓侍从者以其职掌近君也行幸则随从在宫则陪侍故总撮凡最而以侍从名之武帝诏严助曰君厌直承明之庐劳侍从之事长杨羽猎子云献赋事详大猎赋注庾信诗校猎长杨苑陈书後主即位雅尚文词每臣下表疏及献上赋颂者躬自省覽其有辞工则神笔激赏加其爵位南齐书圣照玄覽断自天笔杨齐贤曰太白为宫词明皇赏赐以宫锦袍】

赠裴十四

朝见裴叔则朗如行玉山黄河落天走东海万里写入胷怀间身骑白鼯不敢度金高南山买君顾徘徊六合无相知飘若浮云且西去【世说裴令公有儒容仪脱冠冕粗服乱头皆好时人以为玉人见者曰见裴叔则如玉山上行光映照人杨齐贤注黄河出崑仑山在唐吐蕃中隶大羊同国极西为最高其流入中国势犹从天而落也楚辞乘白鼯兮逐文鱼】

赠崔侍御【萧本作郎】

黄河三【萧本作二】尺鲤本在孟津居点额不成龙归来伴【一作作】凡鱼故人东海客

一见借吹嘘风涛恍相因【萧本作见】更欲凌崑墟【缪本下多何当赤车使再往召相如二句水经注尔雅云鱣鲋也出巩穴三月则上度龙门得度则为龙矣否则点额而还白氏六帖大鲤鱼登龙门化为龙不登者点额暴腮矣太平广记龙门山在河东界禹凿山断如门一里余黄河自中流下两岸不通车马每暮春之际有黄鲤鱼逆流而上得上者便化为龙林登云龙门之下每岁季春有黄鲤鱼自海及诸川争来赴之一岁中登龙门者不过七十二初登龙门即有云雨随之天火自後烧其尾乃化为龙矣其龙门水浚箭涌下流七里深三里出三秦记水经注魏土地记曰梁山北有龙门山大禹所凿通孟津河口广八十步岩际镌迹遗功尚存尚书正义孟津孟是地名津是津处在孟地置津谓之孟津杜预云盟津河内河阳县南孟津也在洛阳城北都道所凑古今常以为津武王渡之近世以来呼为武济卢思道孤鸿赋剪拂吹嘘长其光价山海经海内崑仑之墟在西北帝之下都崑仑之墟方八百里高万仞初学记楚国先贤传曰神龙朝发崑仑之墟暮宿於孟诸超腾云汉之表婉转四渎之里墟音区】

述德兼陈情上哥舒大夫【唐书哥舒翰其先盖突骑施酋长哥施部之裔能读左氏春秋汉书通大义疏财多施予故士归心为大斗军副使迁左卫郎将吐蕃盗边与翰遇苦拔海吐蕃枝其军为三行从山差池下翰持半段枪迎击所向辄披靡名盖军中擢授右武卫将军副陇右节度为河源军使翰尝逐虏马惊陷於河吐蕃三将欲刺翰翰大呼皆拥矛不敢动救兵至追杀之拜鸿胪卿为陇右节度副大使踰年筑神威军青海上吐蕃攻破之更筑於龙驹岛翰相其川原宜畜牧谪罪人二千戍之由是吐蕃不敢近青海天宝八载诏翰以朔方河东羣牧兵十万攻吐蕃石堡城数日未克猝其将高秀岩张守瑜将斩之秀岩请三日期如期而下遂以赤岭为西塞开屯田备军实加特进赐赉弥渥十一载加开府仪同三司久之封凉国公兼河西节度使进封西平郡王胡三省通监注唐中世以前率呼将帅为大夫白居易诗所谓武官称大夫是也】

天【萧本作人】为国家孕英才森森矛戟拥灵台浩荡深谋喷江海纵横逸气走风雷丈夫立身有如此一呼三军皆披靡卫青谩【缪本作漫】作大将军白起真成一子【晋书裴楷尝目锺会如观武库森森但见矛戟在前庄子不可纳於灵台注心也晋书桓温挺雄豪之逸气韞文武之奇才史记项羽纪於是项王大呼驰下汉军皆披靡卫青传天子使使者持大将军印即军中拜车骑将军青为大将军诸将皆以兵属大将毕白起传白起者郿人也善用兵事秦昭王平原君传毛遂曰白起小?子耳率数万之衆兴师以与楚战一战而举鄢郢再战而烧夷陵三战而辱王之先人刘世教曰按此诗述德有之而无陈情之词疑有关文胡震亨以为上大帅只此数言亦太潦草不如杜之长律为得体者非也】

雪谗诗赠友人

嗟余沉迷猖獗【缪本作蹶】已久五十知非古人常有立言补过庶存不朽包荒匿瑕蓄此烦【缪本作顽】丑月出致讥貽媿皓首感悟遂晚事往日迁白璧何辜青蝇屡前羣轻折轴下沉黄泉衆毛飞骨上凌【缪本作陵】青天萋斐【缪本作菲】暗成贝锦粲然泥沙聚埃珠玉不鲜【萧本作怜】洪焰【缪本作炎】烁山发自纤烟沧【萧本作苍】波荡日起於

【繆本作乎】微涓交乱四国播於八埏拾尘掇蜂疑圣猜贤哀哉悲夫谁察予之贞坚【丘迟与陈伯之书沉迷猖獗以至於此淮南子蘧伯玉年五十而知四十九年非左传太上有立德其次有立功其次有立言虽久不废此之谓不朽又曰能补过者君子也周易包荒用冯河王弼注能包含荒秽受纳冯河者也左传瑾瑜匿瑕杜预注匿藏也虽美玉之质亦或居藏瑕秽郑康成礼记注瑕玉之病也说文瑕玉小赤也毛萇诗传月出刺好色也在位不好德而悦美色焉李陵诗皓首以为期埤雅青蝇粪尤能败物虽玉犹不免所谓蝇粪点玉是也盖青蝇善乱色故诗人以刺谗尔雅翼说者以青蝇点白为黑点黑为白自昔相传如此今青蝇之行好遗矢於物上遇物之洁者则见论衡曰清受尘白受垢青蝇所污常在练素此所谓点白为黑也汉书丛轻折轴羽翮飞肉顏师古注言积载轻物物多至令车轴毁折而鸟之所以能飞翔者以羽翮扇扬之故也淮南子积羽沉舟羣轻折轴诗小雅萋兮斐兮成是贝锦彼谮人者亦已太甚毛传曰萋斐文章相错也贝锦锦文也郑笺曰锦文者文如余泉余砥之贝文也兴者喻谗人集作已过以成於罪犹女工之集采色以成锦文说文涓小流也诗小雅谗人罔极交乱四国封禅书下泝八埏孟康注八埏地之八际也张銑注八埏八方也家语孔子厄於陈蔡从者七日不食子贡以所齎货窃犯围而出告余於野人得米一石顏回仲由炊之於坏屋之下有埃墨堕甑中顏回取而食之子贡自升望见之不悦以为窃食也以告孔子子曰吾信回之为仁久矣虽汝有云弗以疑也其或者必有故乎吾将问之召顏回曰畴昔予梦见先人岂或启佑我哉子炊而进饭吾将进焉对曰有埃墨堕饭中欲置之则不洁欲弃之则可惜回即食之不可祭也孔子曰然乎吾亦食之顏回出孔子顾二三子曰吾之信回也非特今日也二三子由此乃服之琴操尹吉甫周上卿也有子伯奇伯奇母死更娶後妻生伯邦乃谮伯奇於吉甫曰见妾有美色然有欲心吉甫曰伯奇为人慈仁岂有此也後妻曰试置妾空居中君登楼而察之後妻知 奇仁孝乃取毒蜂缘衣领伯奇前掇之於是吉甫大怒放伯奇於野宣王出游吉甫从伯奇乃作歌感之於宣王宣王曰此放子词吉甫乃收伯奇射杀後妻陆机诗掇蜂灭天道恰尘惑孔顏 埃音哀烁式灼切音铄】彼【繆本下多一妇字】人之猖狂不如鵲之强强彼妇人之淫昏不如鵲之奔奔坦荡

【一作皎皎】君子无悦簧言擢发续罪罪乃孔多倾海

流恶恶无以过人生实难逢此织罗积毁销金沉忧作歌天未丧文其如予何【诗国风鵲之奔奔鵲之强强郑笺曰奔奔强强言其居有常匹飞则相随之貌孔穎达正义曰言鵲则鵲自相随奔奔然鵲则鵲自相随强强然各有常匹不乱其类何晏论语注坦荡荡宽广貌诗小雅巧言如簧孔穎达正义巧为言语结构虚辞速相待合如笙中之簧声相应和史记须贾曰擢贾之发以续贾之罪尚未足按续赎古通用诗小雅谋夫孔多祖君彦为李密檄洛州文罄南山之竹书罪无穷次东海之波流恶难尽左传人生实难其有不获死乎汉书衆口铄金积毁销骨顏师古注美金见毁衆共疑之数被烧炼以至销铄江淹上建平王书积毁销金积谗磨骨吕向注言毁谗之深能销磨金石之坚刘铄诗沉忧怀明发张銑注沉深也孔子曰天之未丧斯文也匡人其如于何何晏注如予何者犹言奈我何也天之未丧斯文则我当传之匡人欲奈我何】姐已灭纣褒女惑周天维荡覆职此之由汉祖吕氏食其在旁秦皇太【萧本作成】后毒亦淫荒蠓螋作昏遂掩太阳万乘尚尔匹夫何伤辞殫意穷心切理直如或妄谈昊天是殛子野善听离娄至明神靡遁响鬼无逃形不我遐弃庶昭忠诚【史记殷本纪纣好酒

淫乐嬖於妇人爱姐已姐已之言是从周武王率诸侯伐纣纣兵败走入登鹿台衣其宝玉衣赴火而死周武王遂斩纣头悬之白旗杀姐已周本纪幽王嬖爱褒姒褒姒生子伯服幽王竟废申后及太子以褒姒为后伯服为太子褒姒不好笑幽王欲其笑万方故不笑幽王为烽燧大鼓有寇至则举烽火诸侯悉至而无寇褒姒乃大笑幽王说之为数举烽火其後不信诸侯亦不至申侯与缯西夷犬戎攻幽王幽王举烽火徵兵兵莫至遂杀幽王骊山下虜褒姒尽取周赂而去後汉书天维陵弛民鬼惨怆西京赋振天维薛综注维纲也左传盖言语漏泄则职汝之由杜预注职主也史记吕后纪吕太后称制以辟阳侯审食其为左丞相不治事令监宫中如郎中令食其故得幸太后常用事公卿皆因而决事说苑秦始皇帝太后不谨幸郎嫪毐封以为长信侯为生两子毐专国事浸益骄与侍中左右贵臣俱博饮酒醉争言而鬪瞋目大叱曰吾乃皇帝之假父也嫪人子何敢乃与我亢所与鬪者走行白皇帝皇帝大怒毐惧诛因作乱战咸阳宫毐败始皇乃取毐四肢车裂之取其两弟囊扑杀之取皇太后迁之於萇阳宫郑玄礼记注螭螭谓之虹孔颖达正义虹是阴阳交会之气纯阴纯阳则虹不见若云薄漏日日照雨滴则虹生毛萇诗传元气广大则称昊天李善文选注子野师旷字晓音曲者縿子董无心曰离娄之目察秋毫之末於百步之外可谓明矣诗国风既见君子不我遐弃毛传遐远也 褒博毛切音包作薄侯切抔音读者非食其音异基毐音霫】

赠参寥子【参寥子当时逸士其姓名无考盖取庄子之说以为号也庄子玄冥闻之参寥参寥闻之疑始崔云皆古人姓名或寓之耳无其人李云参高也高邈寥旷不可名也】

白鹤飞天书南荆访高士五云在岷山果得参寥子肮脏辞故园昂藏入君门天子分玉帛百官接话言毫墨时洒落探玄【缪本作元】有奇作着论穷天人千春秘麟阁长揖不受官拂衣归林峦余亦去金马藤萝同所攀【缪本作欢】相思在何处桂树青云端【陆机演连珠南荆有寡和之歌李善注南荆谓楚也水经注京房易飞候曰何以知贤人隐师曰视四方常有大云五色具而不雨其下贤人隐矣輿地广记襄阳县有岷山羊祜与邹湛尝登之今堕泪碑在焉赵台诗肮脏倚门边章怀太子注肮脏高亢悻直之貌陆机孝侯周处碑汪洋延阙之旁昂藏寮采之上诗大雅告之话言鲍照四贤咏陵令无人事毫墨时洒落世说何平叔注老子始成诣王辅嗣见王注精奇乃神服曰若斯人可与论天人之际矣因以所注为道德二论梁简文帝诗千春谁与乐三辅黄图汉宫殿疏云麒麟阁萧何造以藏秘书处贤才也吴均诗山中自有宅桂树笼青云金马门名见二卷注 肮下党切杭上声脏音葬】

赠饶阳张司户燧【缪本作璿

唐时深州亦谓之饶阳郡属河北道系上州上州之佐有司户参军事二人从七品下】

朝饮苍梧泉夕栖碧海烟宁知鸾凤意远托椅桐前慕蔭岂曩古攀嵇是当年媿非【萧本作此】黄石老安识子房贤功业嗟落日容华弃徂川一语已道意三山期着鞭蹉跎人间世寥落壶中天独见游物祖探元穷化先何当共携手相与排冥【一作置】筌【陆玕诗疏梓实桐皮曰椅史记司马相如少时其亲名之曰犬子相如既学慕蔭相如之为人更名相如顔延年诗交吕既鸿轩攀嵇亦凤举嵇谓嵇康也黄石公见七卷注三山见一卷注後汉书费长房者汝南人曾为市掾市中有老翁卖药悬一壶於肆头及市罢辄跳入壶中市人莫之见惟长

房於樓上觀之異焉因往再拜奉酒脯翁知長房之意其神也謂之曰子明日可更來長房旦日復詣翁翁乃與俱入壺中唯見玉堂嚴麗旨酒甘肴盈衍其中共飲畢而出翁約不與人言之後乃就樓上候長房曰我神仙之人以過見責今畢當去莊子浮游乎萬物之祖物物而不物於物文子虛無恬愉者萬物之祖也陳子昂詩探玄觀羣化顏延年詩開冬眷徂物殘悴盈化先江淹詩一時排冥筌李善注筌捕魚之器言魚之在筌猶人之处塵俗今既排而去之超在塵埃之外李周翰注冥理也筌迹也 椅音衣協音借读音倚藺音吝嵇音奚筌音詮】

贈清漳明府侄聿【繆本少聿字 唐時清漳縣隸河北道之洺州南濱漳水因以為名賓退錄明府漢人以稱太守唐人以稱縣令】

我李百萬葉柯條布中州天開青雲器日為蒼生忧小邑且割雞大刀仁烹牛雷聲動四境惠與清漳流弦歌咏唐堯脫落隱簪組心和得天真風俗犹【一作獨繆本作由】太古牛羊散阡陌夜寢不扃戶問此何以然賢人宰吾土舉邑樹桃李垂陰亦流芬河堤繞淥【蕭本作綠】水桑柘連青雲趙女不冶容提籠昼成羣縑絲鳴機杼百里聲相聞訟息鳥下階高卧披道帙蒲鞭挂檐枝示耻无扑扶琴清月當戶人寂風入室長嘯无一言陶然上皇逸白玉壺冰水壺中見底清清光洞毫髮皎洁照羣情趙北美嘉【繆本作佳】政燕南播高名過客覽行謠因之誦德【一作得頌繆本作頌德】聲【蕭士贊曰史老子傳老子者姓李氏名耳字伯陽諡曰聃正義云玄妙內篇云李母懷胎八十一載逍遙李樹下乃剖左腋而生生而指李樹因以為姓唐以老子為祖白與聿皆帝室之胄故用李樹事叶世也柯條犹枝分派別之義顏延年詩仲容青雲器史記子游為武城宰孔子過聞弦歌之聲莞爾而笑曰割雞焉用牛刀水經清漳水出上黨沾縣西北少山大黿谷南過縣西又從縣南屈東過涉縣西屈從縣南東至武安縣南黍稷邑入於濁漳嵇康琴賦雅昶唐堯終咏微子呂向注唐堯微子操名也說文組綬屬其小者以為冕纓蕭士贊曰隱簪組謂隱於簪組之間即吏隱之意晉書委和履順以保天真鄭玄禮記注唐虞以上曰太古宋書余糧栖畝戶不夜扃蓋東西之極盛也說文扃外閉之關也周易冶容海淫正義云女子妖冶其容謝靈運詩虛館絕淨訟空庭來鳥雀北山移文□帙常摠說文帙書衣也後漢書劉寬遷南陽太守吏人有過但用蒲鞭罰之示辱而已絕不加苦南史崔景真為平昌太守有惠政常懸一蒲鞭而未嘗用說文扶笞击也鄭玄詩譜序詩之興也諒不於上皇之世正義云上皇謂?義三皇之最先者故謂之上皇鮑照詩清如玉壺冰後漢書燕南垂趙北際中央不合大如砥班固幽通賦考遘愍以行謠初學記爾雅曰聲比於琴瑟曰歌徒歌曰謠亦謂之謠韓詩章句曰有章曲曰歌无章曲曰謠 扃音駟杼音紆帙音侄扶音叱】

贈臨洺縣令皓弟【原注時被訟停官 唐時臨洺縣隸河北道之洺州以北濱洺水為名】

陶令去彭澤茫然大【繆本作元】古心大音自成曲但奏无弦琴釣水路非遠連鰲意何深終期龍伯國與尔【繆本作余】相招寻【晉書陶潛為彭澤令素簡貴不私事上官郡遣督郵至縣吏白應束帶見之潛嘆曰我豈能為五斗米折腰拳拳事鄉里小人即解印去縣乃賦歸去來性不解音而畜素琴一張弦徽不具每朋酒之會則抚而和之曰但識琴中趣何勞弦上聲老子大音希聲龍伯國人一釣而連六鰲見四卷注】

贈郭季鷹

河東郭有道於世若浮雲盛德無我位清光獨映君耻將雞并食長與鳳為羣一擊九千仞相期凌紫氛【後漢書郭太字林宗太原介休人也司徒王琮辟太常趙典舉有道并不應卒於家同志者共刻石立碑蔡邕為文既而謂盧植曰吾為碑銘多矣皆有慙德唯郭有道無媿色耳漢書莫能望陛下清光楚辭將與雞鶩爭食乎韻會將與也春秋後語宋玉曰鳳凰上擊九千里翱翔乎窈冥之上劉楨詩鳳凰集南岳徘徊孤竹根於心有不厭奮翅凌紫氛】

邳中贈【蕭本缺贈字】王大勸入高鳳石門山幽居【邳中即邳郡唐時屬河北道又謂之相州後漢書高鳳傳鳳南陽叶人後教授業於西唐山中注曰山在今唐州湖陽縣下言石門山事庾信作高鳳贊有石門云度銅梁雨來云云後人注者亦未詳其地在何處豈石門山即西唐山之異名耶】

一身竟無托遠與孤蓬征千里失所依復將落葉并中途偶良朋問我將何行欲獻濟時策此心誰見明君王制六合海塞無交兵壯士伏草間沉忧亂縱橫飄飄不得意昨發南都城紫鷺枥上嘶青萍匣中鳴投軀寄天下長嘯尋豪英耻學琅邪人龍蟠事躬耕富貴吾自取建功及春榮我願執爾手爾方達我情相知同一已豈唯弟與兄抱子弄白雲琴歌發清聲臨別意難盡各希存令名【鮑照蕘城賦孤蓬自征呂向注孤蓬草也無根而隨風飄轉者賈誼過秦論履至尊而制六合曹植詩四海無交兵陸機詩沉忧萃我心張銑注沉深也鄭樵通志光武以南陽為別都謂之南都沈約詩綠幘文照曜蕘光陸離李善注尸子曰我得民而治則馬有紫燕蘭池呂延濟注紫燕良馬陳琳答東阿王牋秉青萍干將之器呂延濟注青萍劍名也北史投軀萬死之地以邀一旦之功後漢紀琅邪陽都人諸葛亮字孔明躬耕隴亩好為梁父吟習齒通諸葛論諸葛武侯龍蟠江南托好管樂有匡漢之望孝經士有爭友則身不離於令名】

贈華州王司士【唐時華州又謂之華陰郡屬關內道系上州上州之佐有司士參軍事一人從七品下】

淮水不絕波【蕭本作濤】瀾高盛德未泯生英髦知君先負廟堂器今日還須贈寶刀【晉書王導傳初導渡淮使郭璞筮之卦成璞曰吉無不利淮水絕王氏滅其後子姓繁衍竟如璞言傅亮修張良廟教盛德不泯義存祀典爾雅髦選也俊也郭璞注俊士之選也士中之俊如毛中之髦也邢昺疏毛中之長毫曰髦晉書王祥傳呂?有佩刀工相之以為必登三公可服此刀?謂祥曰苟非其人刀或為害卿有公輔之量故以相與】

贈盧徵君昆弟【後漢書黃憲初舉孝廉又辟公府友人勸其仕憲亦不拒之暫到京師而還竟無所就年四十八終天下號曰徵君後世徵君名始此蕭注以盧徵君即是盧鴻考唐書及他書所載鴻事都不言其有弟同隱恐此盧又是一人】

明主訪賢逸雲泉今已空二盧竟不起萬乘高其風河上喜相得壺中趣每同滄洲即此地觀

化游无穷木落海水清【萧本作水落海上清】鰲背覩方蓬与君弄倒影携手凌星虹【神仙传河上公者莫知其姓字汉文帝时公结草为庵於河之滨帝读老子经颇好之有所不解数事时人莫能道之闻时皆称河上公解老子经义乃使齎所不决之事以问公曰道尊德贵非可遥问也帝即幸其庵躬问之帝曰普天之下莫非王土率土之滨莫非王臣子虽有道犹朕民也公即抚掌坐跃冉冉在虚空中去地数丈俛而荅曰予上不至天中不累人下不居地何臣民之有帝下车稽首公乃授素书二卷与帝曰予注此经以来一千二百余年凡传三人连子四矣言毕失所在壶中见本卷注庄子吾与子观化而化及我我又何恶焉陈子昂诗平生倦游者观化久无穷鰲背方蓬见四卷注倒影见二卷注星虹见七卷注】赠新平【一作丰】少年【新平郡名即邠州也见七卷注新丰县名隶京兆府见五卷注】

韩信在淮阴少年相欺凌屈体若无骨壮心有所凭一遭龙颜君啸咤从此兴千金荅漂母万古共嗟称而我竟何【一作胡】为寒苦坐相仍长风入短袂内【一作两】手如怀冰故友不相恤新交宁见矜摧残檻中虎羈縻韉上鹰何时腾风云抟击申【萧本作中】所能【韩信为淮阴少年所辱见三卷注张纘让尚书仆射表吐言如伤屈体无骨汉书高祖为人隆准而龙颜应劭曰顔頡颡也漂母事见六卷注鲍照诗猜恨坐相仍古善哉行自惜袖短内手知寒张华诗挟纊如怀冰汉书猛虎处深山百兽震恐及其在羴檻之中摇尾而求食积威约之渐也鲍照诗昔如韉上鹰刘良注韉以皮蔽手而臂鹰也班固荅宾戏振拔洿涂跨腾风云羈音鸡縻音屑韉音钩】

赠崔侍御【萧本作郎】

长剑一杯酒男儿方寸心洛阳因剧孟托【一作访】宿话胷襟但仰山岳秀不知江海深长安复携手再顾重千金君乃輶轩【萧本作轩辕】佐余叨翰墨林高风摧秀木虚弹落惊禽【缪本作惊弹落虚禽】不取回舟兴而来命驾寻扶摇应惜力【一作便】桃李愿成阴笑吐张仪舌愁为庄舄吟谁怜明月夜肠断听秋砧【汉书剧孟者洛阳人也周人以商贾为资剧孟以侠显曹植诗一顾千金重何必珠玉贱李充诗愿尔降玉趾一顾重千金风俗通周秦常以岁八月遣輶轩之使求异代方言还奏籍之藏於秘室按太白作崔公泽畔吟诗序有中佐宪车之语是崔尝以事为使副故曰君乃輶轩佐作轩辕者非是张协诗寄辞翰墨林张铣注翰笔也谓寄文辞於笔墨之林言林者谓多也李康运命论木秀於林风必摧之李善注秀出也刘良注木高出於林上者故风吹而先折也隋袁朗诗危弦断客心虚弹落惊禽用战国策更羸事见四卷注回舟用王子猷访戴安道事见本卷注世说嵇康与吕安善每一相思千里命驾庄子抟扶摇而上者九万里详後上李邕诗注桃李用说苑赵简子事与张仪舌俱见本卷注史记越人庄舄仕楚执珪有顷而病楚王曰舄故越之鄙人也今仕楚执珪富贵矣亦思越否中谢曰凡人之思故在其病也彼思越则越声不思越则楚声使人往听之犹尚越声也王粲登楼赋庄舄显而越吟笑吐张仪舌喻谈笑之美愁为庄舄吟喻思家之切韵会砧捣缯石也輶音由砧音斟】

走笔赠独孤驸马【唐书玄宗女信成公主下嫁独孤明初学记驸马都尉汉武置也掌御马历两汉多宗室及外戚与诸公子孙任之至魏何晏以主壻拜驸马都尉其後杜预尚晋宣帝

女高陆公主拜驸马都尉王济尚晋文帝女常山公主拜驸马都尉後代因晋魏以为恒每尚公主则拜驸马都尉通典唐驸马都尉从五品皆尚主者为之开元三年八月勅驸马都尉从五品阶宜依令式仍借紫金鱼袋天宝以前悉以仪容美丽者充选】

都尉朝天跃马归香风吹人花乱飞银鞍紫鞵照云日左顾右盼生光辉是时仆在金门里待诏公车谒天子长揖蒙垂国士恩壮心剖出酬知己一别蹉????朝市间青云之交不可攀傥其公子重回顾何必侯嬴长抱关【薛道衡诗卧驰飞玉勒立马前银鞍吴均诗朱轮玳瑁车紫鞵连钱马韵会鞵马勒也曹植与吴质书左顾右盼谓若无人汉书哀帝纪待诏夏贺良等应劭注诸以才技徵召未有正官故曰待诏又东方朔传朔上书高自称誉上律之令待诏公车顔师古注公车令属卫尉上书者所诣也旧唐书翰林院天子在大明宫其院在右银台门内在兴庆宫院在金明门内若在西内院在显福门内若在东都华清宫皆有待诏之所其待诏有词学经术合链僧道卜祝术艺书奕各别院以廩之日晚而退其所重者词学战国策豫让曰智伯以国士遇臣臣故以国士报之江淹袁叔明传友人袁炳与余有青云之交非直衔杯酒而已史记信陵君传魏有隐士曰侯嬴年七十家贫为大梁夷门监者公子数厚遗之不肯受公子於是乃置酒大会宾客坐定公子从车骑虚左自迎侯生侯生摄敝衣冠直上载公子上坐不让又谓公子曰臣有客在市屠中愿枉车骑过之公子引车入市侯生下见其客朱玄睥睨故久立与其客语微察公子公子顔色愈和乃谢客就车至家公子引侯生坐上坐僂赞宾客酒酣侯生谓公子曰嬴乃夷门抱关者也而公子亲枉车骑自迎嬴於衆人广坐之中不宜有所过今公子故过之然嬴欲就公子之名故久立公子车骑市中过客以观公子公子愈恭市人皆以嬴为小人而以公子为长者能下士也於是罢酒侯生遂为上客鞵苦贡切空去声】

赠嵩山焦链师【并序 孔帖道士修行德高思精者谓之链师】

嵩山【繆本作丘】有神人焦【萧本缺焦字】链师者不知何许妇人也又云生於齐梁时其年貌可称五六十常胎息絶谷居少室庐游行若飞倏忽万里世或传其入东海登蓬莱竟莫【繆本作不】能测其往也余访道少室尽登三十六峰闻风有寄洒翰遥赠【汉武内传王真字叔经上党人习闭气而吞之名曰胎息习 舌下泉而咽之名曰胎食真行之断谷二百余口肉色光美力并数人抱朴子得胎息者能不以口鼻嘘吸如在胞胎之中则道成矣少室山有三十六峰详见七卷注】

二室凌【一作倚】青天三花含【一作明】紫【一作绿】烟中有蓬海客宛疑麻姑仙道在喧莫染迹高想已绵时餐金鹅蘂【一作金蛾蘂繆本作金鹅药】屡读青【萧本作古】苔篇八极恣游憩九垓长周旋下瓢酌颍水舞鹤来伊川还归东【繆本作空】山上独拂秋霞眠萝月挂朝镜松风鸣夜弦潜光隐嵩岳链魄栖云幄霓裳【繆本作衣】何飘飏【繆本作飘飘一作葳蕤】凤吹【一作羽驾】转绵邈愿同西王母下顾东方朔紫书傥可传铭【一作冥】骨誓相学【初学记嵩高山者五岳之中岳也戴延之西征记云其山东谓太室西谓少室相去十七里嵩其总名也谓之室者以其下各有石室焉少室高八百六十丈上方十里与太室相埒但小耳述异记少室山有贝多树与衆木有异一年三放花其花白色香美俗

云汉世野人将子种此麻姑已见四卷注杨升庵曰金鹅蘂桂也艺文类聚临海记曰郡东南有白石山高三百余丈望之如雪山上有湖古老相传云金鹅所集八桂所植陈子昂潘尊师碑颂道逢真人昇玄子授以宝书青苔纸淮南子八紘之外乃有八极初学记九天之外次有九垓垓阶也言其阶次有九山海经颍水出少室山郭璞注今颍水出河南阳县乾山东南经颍川汝陰至淮南下蔡入淮吕氏春秋许由遂之箕山之下颍水之阳耕而食终身无经天下之色太平御覽琴操曰许由无有杯器常以手掬水人见由无器以一匏瓢遗之由操饮饮讫挂瓢於树风吹树瓢动历历有声由以为烦扰遂取捐之伊川舞鹤用王子晋事已见五卷注薛道衡诗惊鸿出洛水翔鹤下伊川左传辛有适伊川杜预注伊川伊水也北山移文春萝罢月卢照邻五悲文萝月寡色风泉罢声宋之问诗夜弦响松月朝楫弄苔泉後汉书潜光隐耀世嘉其高太微灵书每月朔望晦日七魄流荡交通鬼神制检还魄之法当此夕仰眠伸足掌心掩两耳令指相接於项上闭息七遍叩齿七通心存鼻端白气如小指大须臾渐大冠身上下九重气忽变成两青龙在两目中两白虎在两鼻孔中朱雀在心上苍龟在左足下灵蛇在右足下两玉女着锦衣手把火光当两耳门毕咽液七过呼七魄名尸狗伏矢雀婴天贼非毒除秽臭肺即呪曰素气九还制魄邪奸天兽守门娇女执□链魄和柔与我相安不得妄动看察形源若有饥渴听饮月黄日丹谢惠连诗寂寥云幄空李周翰注幄帐也楚辞青云衣兮白霓裳丘迟诗驰道闻凤吹吕延济注凤吹笙也博物志汉武帝祭祀名山大泽以求神仙之道时西王母遣使乘白鹿告帝当来乃供帐九华殿以待之七月七日夜漏七刻王母乘紫云车而至於殿西南面东向头上戴七种青气郁鬱如云时东方朔窃从殿南厢朱鸟牖中窥母母顾之谓帝曰此窥牖小儿尝三来盗吾桃帝乃大怪之由此世人谓方朔神仙也汉武内传地真素诀长生紫书真诰道有青要紫书金根衆文云笈七□紫书紫笔缮文也 垓音该】

口号赠杨【繆本作阳】徵君【原注此公时被徵 诗题有口号始於梁简文帝和卫尉新渝侯巡城口号庾肩吾王筠俱有此作至唐遂相袭用之即是口占之义萧本作口号赠徵君鸿而注云见前赠卢徵君题注盖以为即卢鸿矣未详是否注中被徵一作被召】

陶令辞彭泽梁鸿入会稽我寻高士传君与古人齐云卧留丹壑天书降紫泥不知杨伯起早晚向关西【陶令事已见九卷注梁鸿事见八卷注隋书高士传六卷皇甫谧撰又高士传二卷虞盘佐撰册府元龟嵇康为中散大夫撰高士传三卷鲍照诗云卧恣天行又照诗妍客逐丹壑紫泥用以封璽书者见七卷注後汉书杨震字伯起弘农华陰人少好学受欧阳尚书於太常桓郁明经博覽无不穷究诸儒为之语曰□西孔子杨伯起】上李邕【旧唐书李邕广陵江都人少知名开元中为陈州刺史十三年玄宗车驾东封回邕於汴州谒见累献词赋甚称上旨由是颇自矜衒张说为中书令甚恶之俄而陈州贓污事发贬为钦州遵化尉累转括淄滑三州刺史上计京师邕素负美名频被贬斥皆以邕能文养士贾生信陵之流执事忌胜剥落在外人间素有声称後进不谦京洛阡陌聚观以为古人或传眉目有异衣冠望风寻访门巷又中使临问索其新文复为人阴中竟不得进天宝初为汲郡北海二太守尝与左骁卫兵曹柳积马一匹及积下狱吉温令积引邕议及休咎厚相赂遗词状连引勅就郡决杀之时年七十余】

大鹏一日同风起抟【霏玉本作扶】摇直上九万里假令风歇时下来犹能簸【繆本作□

】却沧溟水时【繆本作世】人见我恒【萧本作指】殊调见【霏玉本作□】余大言皆冷笑宣父犹能畏後生丈夫未可轻年少【庄子鹏之徙於南冥也水击三千里抔扶摇而上者九万里陆德明注司马云上行风谓之扶摇尔雅云扶摇谓之风郭璞云暴风从下上也唐书礼乐志贞观十一年诏尊孔子为宣父萧士贇曰此篇似非太白之作】

赠张公洲革处士【杨齐贤曰张公洲在上元县琦按景定建康志张公洲在城西南五里周围三里湖广通志张公洲在武昌府城南二十里晋隐士张公灌园处因名是有二张公洲观诗中所云楚人云汉水则是谓武昌之张公洲而非在上元者矣】

列子居郑圃不将衆庶分革侯遁南浦常恐楚人闻抱瓮灌秋蔬心闲游天云每将瓜田叟耕种汉水滨【一作漬】时登张公洲入兽不乱羣井无桔槔事门絶刺绣文长揖二千石远辞百里君斯为真隐者吾党慕清芬【列子子列子居郑□四十年人无识者国君卿大夫视之犹衆庶也韵会将与也南浦即张公洲以在城之南故曰南浦庄子孔子逃於大泽衣裘褐食杼栗入兽不乱羣入鸟不乱行鸟兽不恶而况人乎又庄子子贡南游於楚反於晋过汉阴见一丈人方将为囿畦凿隧而入井抱瓮而出灌揜揜然用力甚多而见功寡子贡曰有械於此一日浸百畦用力甚寡而见功多夫子不欲乎为圃者仰而视之曰奈何曰凿木为机後重前轻挈水若抽数如洸汤其名曰槔为□者笑曰吾闻之吾师有机械者必有机事有机事者必有机心机心存於胷中则纯白不备纯白不备则神生不定神生不定者道之所不载也吾非不知羞而不为也陆德明注槔桔槔也说文桔槔汲水器也史记刺绣文不如倚市门二千石谓太守百里君谓县令】

李太白集注卷九

卷十

钦定四库全书

李太白集注卷十

钱塘 王琦 撰

古近体诗共二十四首

秋日链药院镊白发赠元六兄林宗【韵会镊箝也音与涅同】

木落识岁秋瓶冰知天寒桂枝日已绿拂雪凌云端弱龄接光景矫翼攀鸿鸾投分三十载荣枯同所欢长吁望青云镊白坐相看秋颜入晓镜壮发凋危冠穷与鲍生贾饥从漂母餐时来极【胡本作拯】天人道在岂吟叹乐毅方【萧本作岂】适赵苏秦初说韩卷舒固在我何事空摧残【淮南子见一叶落而知岁之将暮覩瓶中之冰而知天下之寒陶潜诗弱龄寄事外潘岳诗投分寄石友李善注阮瑀爲魏武与刘备书曰披怀解带投分寄意分犹志也庄子去其危冠杨缙诗壮发危冠下匕首地图中史记管仲曰吾始困时尝与鲍叔贾分财利多自与鲍叔不以我爲贪知我贫也史记燕昭王问伐齐之事乐毅对曰齐霸国之余业也地大人衆未易独攻也王必欲伐之莫如与赵及楚魏於是使乐毅约赵惠文王别使连楚魏令赵啗秦以伐齐之利诸侯害齐湣王之骄暴皆争合从与燕伐齐燕昭王悉起兵使乐毅爲上将军赵惠文王以相国印授乐毅乐毅於是并护赵楚韩魏燕之兵以伐齐破之济西按史记苏秦列传其游说六国先说燕文侯二说赵肃侯三说韩宣惠王四说魏襄王五说齐宣王六说楚威王今引乐毅适赵苏秦说韩二事皆言功业未成就之意】

书情赠蔡舍人雄

尝高谢太傅【一作尝闻谢安石】携妓东山门楚舞醉碧云吴歌断清猿暂因苍生起谈笑安黎元余亦爱此人丹霄冀飞翻遭逢圣明主敢进兴亡言【缪本下多蛾眉积谗妒鱼目嗤璵璠】白璧竟何辜【一作本无瑕】青蝇遂成冤一朝去京国十载客梁园猛犬吠九关杀人愤精魂皇穹雪冤【缪本作天】枉白日开昏氛【缪本作氛昏】泰阶得夔龙桃李满中原倒海索明月凌山采芳荪媿无横草功虚负雨露恩迹谢云台阁心随天马辕【萧本作鞍世说谢安在东山畜妓简文曰安石必出既与人同乐不得与人同忧刘孝标注宋明帝文章志曰安纵心事外疎略常节每畜女妓携持游肆苍生事已见七卷注封禅书以浸黎元吕延济注黎元百姓也王粲诗苟非鸿鵬孰能飞翻范云诗遭逢圣明后来栖桐树枝王僧达诗聊讯兴亡言陈子昂诗青蝇一相点白璧遂成冤梁园梁地也在唐爲汴州今爲开封府其地有汉梁王之园太白在天宝中游梁最久故诗中屡以梁园爲言宋玉九辩岂不郁陶而思君兮君之门以九重猛犬狺狺而迎吠兮关梁闭而不通招魂虎豹九关啄害下人谢灵运诗盛明荡氛昏孟康汉书注泰阶三台也每台二星凡六星晋书三台三公之位也在人曰三公在

天曰三台文心雕龙倒海探珠谢灵运诗浥露馥芳荪江总诗徐步采芳荪汉书终军传军无横草之功顔师古注言行草中使草偃卧故云横草也後汉书臣愿与坐云台之下考试图国之道又樊哙与光武少游旧建武初徵爲侍御史迁河东都尉引见云台玉海五行志云台周家所造图书术籍珍玩宝怪所藏东京赋南则前殿云台洛阳记云台高阁十四间高诱淮南子注台高际於云故曰云台迹谢云台阁心随天马辕即身在江湖心存魏阙之意】夫子王佐才而今复谁论曾飏振六翮不日思腾骞我纵五湖棹烟涛恣崩奔梦钓子陵湍英风【繆本作氛】 緬犹存徒【萧本作彼】 希客星隐弱植不足援千里一回首万里一长歌黄鹤不复来清风奈愁【萧本作愁奈】 何舟浮潇湘月【一作江横罗刹石】 山倒洞庭波投汨笑古人临濠得天和闲时田亩中搔背牧鸡鹅别离解相访应在武陵多【汉书刘向称董仲舒有王佐之材虽伊吕无以加後汉书南阳何顒名知人见荀彧而异之曰王佐才也层飏高风也古诗昔我同门友高举振六翮韵会翮鸟之劲羽也韩诗外传鸿鹄一举千里所恃者六翮耳盖鸟翅之劲者左右各六飞时全藉其力铄其六翮则不能飞矣说文骞飞貌国语越灭吴返至五湖范蠡辞於王曰君王勉之臣不复入越国矣遂乘轻舟以浮於五湖莫知其所终极谢灵运诗圻岸屡崩奔章怀太子後汉书注顾野王輿地志曰桐庐县南有严子陵渔钓处今山边有石上平可坐十人临水名爲严陵钓坛也广韵緬远也艺文类聚会稽典录曰严遵字子陵与世祖俱受业长安建武五年下诏徵遵设乐阳明殿命宴会暮留宿遵以足荷上其夜客星犯天子宿明旦太史以闻上曰此无异也昨夜与严子陵俱卧耳左传其君弱植孔顒达正义周礼谓草木爲植物植谓树立君志弱不树立也潇湘洞庭见惜余春赋注一统志秦望山在杭州府城南一十里山东南有罗刹石横截江涛後更名镇江石五代开平中爲潮沙所没钱塘县志浙江一名罗刹江取风涛险恶意江中有罗刹石风涛至此倍险唐郡守仲秋设祭迎潮於此史记屈原怀石自投汨罗以死应劭注汨水在罗故曰汨罗也史记索隐荆州记云长沙罗县北带汨水去县四十里是原自沉处北岸有庙也楚辞章句汨水在长沙罗县下注湘水中通典岳州湘阴县北有汨水即屈原怀沙自沉之处俗谓之罗江庄子庄子与惠子游於濠梁之上庄子曰儵鱼出游从容是鱼乐也惠子曰子非鱼安知鱼之乐庄子曰子非我安知我不知鱼之乐通典濠州鍾离县有濠水即庄惠观鱼之处庄子若正汝形一汝视天和将至淮南子交被天和食於地德唐时之武陵郡即朗州也属山南东道 骞音轩汨音觅】 忆襄阳旧游赠【繆本下多济阴二字】 马少府巨【唐时之襄阳郡即襄州也属山南东道济阴郡即曹州也属河南道】

昔爲大堤客曾上山公楼开窗碧嶂满拂镜沧江流高冠佩雄剑长揖韩荆州此地别夫子今来思旧游朱顔君未老白发我先秋壮志恐蹉跎功名若云浮【一作有意未得言怀贤若沉忧】 归心结远梦落日悬春愁空思羊叔子堕泪岷山头【一作何时共携手更醉岷山头 襄阳郡城外有大堤有岷山已见五卷注晋时山简爲襄阳太守山公楼是其遗迹今亡所在韵会嶂山之高险者增韵山峰如屏障者韩荆州名朝宗开元中爲荆州长史太白谒见长揖不拜详见後与韩荆州书及魏顒李翰林集序太平御览荆州图记曰羊叔子与邹润甫尝登岷山叹曰自有宇宙便有此山由来贤达登此远望如我与卿者多矣皆湮没无闻念此令人悲伤润甫曰公德冠四海道嗣前哲令闻令望必与此山俱传若润甫辈当如公语耳後参佐爲立碑着故望处百姓每行望碑莫不悲感杜预名爲堕泪碑 嶂音帐】

对雪献从兄虞城宰【唐时宋州睢阳郡有虞城县隶河南道】

昨夜梁园里【繆本作雪】弟寒兄不知庭前看玉树肠断忆连枝【梁园已见七卷注玉树雪中树也苏武诗况我连枝树与子同一身】

访道安陵遇盖寰【萧本作还】爲子造真籙临别留赠【唐时德州平原郡有安陵县隶河北道隋书道经者云其受道之法初受五千文籙次受三洞籙次受洞玄籙次受上清籙籙皆素书纪诸天曹官属佐吏之名有多少又有诸符错在其间文章诡怪世所不识受者必先洁斋然後齎金环一并诸贄币以见於师师受其贄以籙授之仍剖金环各持其半云以爲约弟子得籙緘而佩之 寰音环】

清水见白石仙人识青童安陵盖夫子十岁与天通悬河与微言谈论安可穷能令二千石抚背惊神聪挥毫赠新诗高价掩山东至今平原客感激慕清风学道北海仙传书蕊珠宫丹田了玉阙白日思云空爲我草真籙天人慙妙工七元洞豁落八角辉星虹三灾荡璿玑蛟龙翼微躬举手谢天地虚无齐始终黄金满【繆本作献】高堂答荷难克充下笑世上士【繆本作事】沉魂北罗酆昔日万乘坟今成一科蓬赠言若可重实此轻华嵩【古艶歌行语卿且勿盼水清石自见太平广记汉元寿二年八月己酉西南岳真人赤君西城王君及诸青童并从王母降於茅盈室晋书郭象能清言太尉王衍每云听象语如悬河泻水注而不竭汉书昔仲尼没而微言絶顔师古注精微要妙之言耳汉武帝内传此元始天王在丹房之中所说微言鲍照诗奇声振朝邑高价服乡村平原客谓平原郡中宾客北海仙谓北海高天师如贵太白於齐州请高天师授道籙故盖寰爲之书造真籙也西昇经遂徧历九天上昇上清白阙丹城蕊珠宫梁丘子黄庭内景经注蕊珠上清境宫阙名也真灵位业图有太和殿寥阳殿蕊珠宫黄庭外景经丹田之中精气微梁丘子注脐下三寸是也黄庭内景经肺部之宫似华盖下有童子坐玉阙梁丘子注玉阙者肾中白气上与肺连也云笈七签太微黄书八卷素诀乃含於九天元母结文空胎历岁数劫以成自然之章太皇中岁成洞真金真玉光八景飞经元始天王名之爲八景飞经广生太真名之爲八素上经青真小童名之爲豁落七元隋书道经者云元始天尊所说之经亦禀元一之气自然而有非所造爲亦与天尊常在不灭天地不坏则蕴而莫传劫运若开其文自见凡八字尽道体之奥谓之天书字方一丈八角垂芒光辉照耀惊心眩目虽诸天仙不能省视楼炭经天地有三灾变一者火灾变二者水灾变三者风灾变法苑珠林二十小劫中间有小三灾次第轮转一疾疫灾二刀兵灾三饥饉灾刘昭後汉书补璇玑者谓北极星也晋书天文志魁四星爲璇玑杓三星爲玉衡三灾荡璿玑谓斗神覆护三灾不能爲害也王康琚诗与物齐终始李善注孙卿子曰生人之始也死人之终也顔延年诗美价难克充真诰罗酆山在北方癸地山高二千六百里周围三万里其山下有洞天在山之中周围一万五千里其上其下并有鬼神宫室山上有六洞洞中有六宫辄周围千里是爲六天鬼神之宫也注云此即应是北酆鬼王决断罪人住处白帖罗酆山之洞周一万五千里名曰北帝死生之天皆鬼神所治五帝之宫考谪之府也荀子赠人以言重於金石珠玉】

赠崔郎中宗之【崔佑甫齐昭公崔府君集序公嗣子宗之学通古训词高典册才气声华迈时独步仕於开元中爲起居郎 爲尚书礼部员外郎迁本司郎中时文国礼十年三入終於

右司郎中年位不充海内叹息按唐书崔宗之乃宰相日用之子袭封齐国公好学宽博有风检与李白杜甫以文相知】

胡鴈【一作鹰】拂海翼翱翔鸣素秋惊云辞沙朔飘荡迷河洲【一作胡鹰度日边两龙天地秋哀鸣沙塞寒风雪迷河洲】有【一作乃】如飞蓬人去逐【一作一去】万里游登高望浮云彷彿如旧丘日从海旁没水向天边流长啸倚孤剑目极心悠悠岁晏归去来富贵安可【缪本作所】求仲尼七十说历聘莫见收鲁连逃千金珪组岂可【一作不足】酬时哉苟不会草木爲我俦希君同携手长往南山幽【鲍照诗胡鴈已矫翼初学记梁元帝纂要曰秋曰素秋张华诗星火既夕忽焉素秋李周翰注西方色白故曰素秋沙朔谓朔方沙漠之地薛道衡高祖文皇帝诔运天策於帷辰播神威於沙朔北史泊乎有魏定鼎沙朔商子飞蓬遇飘风而行千里江淹诗渺然万里游鲍照诗复得还旧丘吕向注旧丘旧里也楚辞目极千里兮伤春心诗国风悠悠我心楚辞岁既晏兮孰华予王逸注晏晚也淮南子孔子欲行王道东西南北七十说而无所偶论衡孔子不能容於世周流游说七十余国未尝得安鲁连逃千金详见二卷注左思诗吾慕鲁仲连谈笑却秦军功成耻受赏高节卓不羣临组不肯对珪宁肯分】

赠崔谔议【唐书百官志王府官有谔议参军事一人正五品上掌訏谋议事】

騄【萧本作绿】骥本天马素非伏枥驹长嘶向【一作起】清风倏忽凌九区何言西北至却走【缪本作是】东南隅世道有翻覆前期【一作程一作途】难预图希君一【一作前一作相】剪拂【一作拂便】犹可骋中衢【张衡南都赋騄骥齐镳李善注騄骥骏马名也穆天子传八骏有赤骥騄耳魏武帝诗老骥伏枥志在千里楚辞招魂往来倏忽王逸注倏忽疾急貌史记初天子发书易云神马当从西北来庾肩吾诗渥水出腾驹湘川实应图来从西北道去逐东南隅九区剪拂俱见三卷天马歌注中衢犹中道也淮南子犹中衢而致尊耶傅玄正都赋洒奔駟於中衢】

赠昇州王使君忠臣【唐书地理志江南道昇州江寧郡至德二载以润州之江寧县置上元二年废太平寰宇记安祿山乱肃宗以金陵自古雄据之地时遭艰难不可县统之因置昇州仍加节制实资镇抚时方艰弊力难兴造因旧县宇以爲州城祿山平後复废州依旧爲县】

六代帝王国三吴佳丽城贤人当重寄天子借高名巨海一边静长江万里清应须救赵策未肯弃侯嬴【杨齐贤曰唐昇州吴晋宋齐梁陈所都东极於海西带长江胡三省通鉴注汉置吴郡吴分吴郡置吴兴郡晋又分吴兴丹阳置义兴郡是爲三吴酈道元曰世谓吴郡吴兴会稽爲三吴杜佑曰晋宋之间以吴郡吴兴丹阳爲三吴谢朓诗江南佳丽地北史足下宿当重寄早预心膂侯嬴事见三卷注】

赠别从甥高五

鱼目高太山不如一璵璠贤甥即明月声价动天门能成吾宅相不减魏阳元自顾寡筹略功

名安所存五木思一擲如绳系穷猿枥中骏马空堂上醉人喧黄金久已罄爲报故交恩闻君陇西行使我惊【一作清】心魂与尔共飘飏雪天各飞翻江水流或卷此心难具论贫家羞好客语拙觉辞繁三朝空错莫对饭却慙冤自笑我非夫生事多契阔积蓄【繆本作蓄积】万古愤向谁得开豁天地一浮云此身乃毫末忽见无端倪太虚可包括去去何足道临岐空复愁肝胆不楚越山河亦衮衮云龙若【萧本作将】相从明主会见收成功解相访溪水桃花流【鱼目鱼之目睛似珠者也明月珠夜光珠也俱见二卷注说文璵璠鲁之宝玉孔子曰美哉璵璠远而望之奐若也近而视之瑟若也左传阳虎将以璵璠斂杜预注璵璠美玉也晋书魏舒字阳元少孤爲外家甯氏所养甯氏起宅相宅者曰当出贵甥舒曰当爲外祖成此宅相三国志注江表传曰公瑾文武筹略万人之英世说桓宣武与袁彦道携蒲袁彦道齿不合遂厉色擲去五木元革五木经携蒲古戏其投有五故白呼爲五木以木爲之因谓之木今则以牙角尚饰也演繁露古惟斲木爲子一具凡五子故名五木後世转而用石用玉用象用骨故列子谓之投琼律文谓之出玖世说穷猿奔林岂暇择木唐陇右道有陇西郡按通典渭州禹贡曰导渭自鸟鼠同穴即其地也春秋爲羌戎之居秦置陇西郡以居陇坻之西爲名唐爲渭州亦谓之陇西郡领襄武陇西渭源障四县沈约诗短翮屡飞翻班固东都赋春王三朝章怀太子注三朝元日也谓岁之朝月之朝日之朝李善注三朝岁首朔日也然此诗所谓三朝即三日之义与东都赋所言不同鲍照诗今朝见我顔色衰意中错莫与先异左传成师以出闻敌强而退非夫也杜预注非丈夫也诗国风死生契阔毛传云契阔勤苦也夏侯湛东方朔画赞明济开豁包含宏大庄子号物之数谓之万人处一焉此其比万物也不似毫末之在於马体乎又云反覆终始不知端倪又曰自其异者视之肝胆楚越也自其同者视之万物皆一也诗国风抱衾与裯毛传曰衾被也裯裯被也郑笺曰裯牀帐也孔颖达正义郑既以衾爲被不宜复云裯被也汉世名帐爲裯盖因於古故以爲牀帐溪水桃花用武陵桃花源事见二卷注璵音余璠音烦衮音衮】

赠裴司马【按唐书百官志刺史之僚佐有司马一人位在别驾长史之下上州者从五品下中州者从五品上下州者正六品上】

翡翠黄金缕绣成歌舞衣若无云间月谁可比光辉秀色一如此多爲衆女讥君恩移昔爱失宠秋风归愁苦不窥邻泣上流黄机天寒素手冷夜长烛复微十日不满匹鬓蓬乱若丝犹是可怜人容华世中稀向君发皓齿顾我莫相违【古白头吟皑如山上雪皎若云间月宋玉登徒子好色赋此女登墙窥臣三年至今未许也梁元帝诗网缀流黄机李善文选注环济要略曰间色有五绀红缥紫流黄也礼记正义皇氏云正谓青赤黄白黑五方正色也不正谓五方间色绿红碧紫駟黄是也黄是中央正駟黄是中央间中央爲土土克水水色黑故駟黄之色黄黑也駟黄即流黄之义曹植诗谁爲发皓齿】

叙旧赠江阳宰陆调【唐时淮南道之扬州有江阳县】

太伯让天下仲雍扬波涛清风荡万古迹与星辰高开吴食东溟陆氏世英髦多君秉古节【一作夫子特峻秀】岳立冠人曹风流少年时京洛事游遨腰间延陵剑玉带明珠袍我昔鬪鸡徒连延五陵豪邀遮相组织呵吓来煎熬君开万丛人鞍马皆辟【繆本作辟】易告急清

宪台脱余北门厄间宰江阳邑剪棘树兰芳【一本自腰间延陵剑以下作驂驪红阳鸞玉剑明珠袍一诺许他人千金双错刀满堂青云士望美期丹霄我昔北门厄摧如一枝蒿有虎挟鸡徒连延五陵豪邀遮来组织呵吓相煎熬君披万人丛脱我如狴牢此耻竟未刷且食绥山桃非天雨文章所祖托风骚苍蓬老壮发长策未逢遭别君几何时君无相思否鸣琴坐高楼渌水净窗牖政成闻雅颂人吏皆拱手投刃有余地回车摄江阳错杂非易理先威挫豪强下俱相同又繆本特峻秀作时峻季狴牢作貌牢托风骚作记风骚】城门何肃穆五月飞秋霜好鸟集珍木高才列华堂时从府中归丝管俨成行但苦隔远道无由共衔觴江北荷花开江南杨梅鲜【繆本作熟又下多正好饮酒时怀贤在心目二句】挂席候海色【萧本作拾海月】乘【繆本作当】风下长川多酤新丰醪满载剡溪船中途不遇人直到尔门前大笑同一醉取乐平生年【汉书周太王长子太伯次曰仲雍次曰公季公季有圣子昌太王欲传国焉太伯仲雍辞行采药遂奔荆蛮公季嗣位至昌爲西伯受命而王故孔子美而称曰太伯可谓至德也已矣三以天下让民无得而称焉太伯初奔荆蛮荆蛮归之号曰句吴太伯卒仲雍立至曾孙周章而武王克殷因而封之陆机诗太伯导仁风仲雍扬其波晋书激清风於万古厉薄俗於当年鲍照诗谁令乏古节张铣注古节古人高尚之节陆机诗吴实龙飞刘亦岳立华阳国志谷口子真秉箕颍之操湛然岳立谢灵运诗仲春喜游遨新序延陵季子将西聘晋带宝剑以过徐君王僧孺诗落日映珠袍鬪鸡徒详见二卷注五陵豪见五卷注汉纪邀遮前後危殆不测辟易见二卷注潘正叔诗回迹清宪台李善注汉官仪曰御史爲宪台袁宏三国名臣赞思树芳兰剪除荆棘李善注芳兰以喻君子荆棘以喻小人晋书贺循历试二城刑政肃穆嵇康琴赋华堂曲宴张揖上林赋注梅杨其实似谷子而有核其味酸出江南齐民要术杨梅临海异物志云其子大如弹丸正赤五月熟似梅味甜酸谢灵运诗挂席拾海月洛神赋浮长川而忘反说文酤买酒也新丰酒见四卷注广韵醪美酒也剡溪船用王子猷访戴安道事详见九卷注醪音录】

赠从孙义兴宰铭【唐时常州晋陵郡有义兴县属江南东道】

天子思茂宰天枝得英才朗然清秋月独出映吴台落笔生绮绣操刀振风雷螭屈虽百里鹏骞望三台退食无外事琴堂向山开绿水寂以闲白云有时来河阳富奇藻彭泽纵名杯所恨不见之犹如仰昭回【谢朓诗茂宰深遐睠王僧孺文天枝峻密帝叶英芬操刀用子产语见九卷注潘尼诗螭屈固小往晋书三台六星两两而居起文昌列抵太微一曰天柱三公之位也在人曰三公在天曰三台主开德宣符也西近文昌二星曰上台爲司命主寿次二星曰中台爲司中主宗室东二星曰下台爲司禄主兵所以昭德塞违也诗国风退食自公杨齐贤曰宓子贱爲单父宰弹琴不下堂而单父治故後世以宰之室爲琴堂张協诗荒庭寂以闲山岫峭且深晋书潘岳才名冠世出爲河阳令岳美姿仪辞藻絶丽尤善爲哀诔之文卢照邻诗知君振奇藻晋书陶潜爲镇军建威参军谓亲朋曰聊欲弦歌以爲三径之资可乎执事者闻之以爲彭泽令在县公田悉令种秫谷曰令吾常醉於酒足矣诗大雅倬彼云汉昭回於天朱传曰云汉天河也昭光也回转也言其光随天而转也 騫音轩】元恶昔【萧本作皆】滔天疲人散幽草惊川无恬【萧本作活】鳞举邑罕遗老誓雪会稽耻将奔宛陵道亚相素所重投刃应桑林独坐伤激扬神融一开襟弦歌欣 理和乐醉人心蠹政除害马倾巢有归禽壶浆候君来聚舞共【萧本作若】讴吟农夫弃蓑笠蚕女堕纓簪欢笑相拜贺则知惠爱深【书

康诰元恶大憝晋书巨猾滔天帝京危急潘岳西征赋牧疲人於西夏殷仲文解尚书表洪波振壑川无恬鳞元恶滔天二联指上元中宋州刺史刘展举兵爲乱连陷扬润昇苏湖濠楚舒和徐庐诸州凡三月始平其事详後二十七卷注常州与苏湖扬润四州地界相接其乱离不遑安处槩可知矣春秋繁露大夫蠡大夫种大夫庸大夫辜大夫车成越王与此五大夫谋伐吴遂灭之雪会稽之耻宛陵即宣城也唐时宣州宣城郡理宣城县本汉之宛陵县地太白原注亚相李公重之以能政中丞李公免罢以移官盖铭以刘展称兵避难奔走失官因二公而复职者也唐时御史台有大夫一员正三品中丞二员正四品亚相谓御史大夫独坐谓中丞海录碎事御史大夫谓之亚相盖御史大夫汉时位爲宰相之副故唐人谓之亚相庄子庖丁爲文惠君解牛手之所触肩之所倚足之所履膝之所踦砉然向然奏刀騞然莫不中音合於桑林之舞乃中经首之会陆德明注桑林司马云汤乐名崔云宋舞乐名投刃应桑林言其治民之材如投刃得法绰然有余地也後汉书光武特诏御史中丞与司隶校尉尚书令会同并专席而坐故京师号曰三独坐激扬激浊扬清也潘岳西征赋开襟乎清暑之馆弦歌用子游宰武城事因免罢移官故曰理也汉书张禹传後堂理丝竹管弦如淳曰今乐家五日一习乐爲理乐世说注名士传曰阮咸字仲容陈留人太原郭奕见之心醉不觉叹服庄子牧马小童曰夫爲天下者亦奚以异乎牧马者哉亦去其害马者而已矣曲礼女子许嫁纓孔穎达正义妇人质弱不能自固必有系属故恒系纓纓有二时一是少时常佩香纓二是许嫁时系纓何以知然者内则云男女未冠笄纓郑以爲佩香纓不云纓之形制又昏礼主人入亲说妇纓郑注云妇人十五许嫁笄而礼之因着纓明有系也盖以五采爲之其制未闻又内则云妇事舅姑纓郑云妇人有纓示系属也以此而言故知有二纓也】历职吾所闻称贤尔爲最化洽一邦上名驰三江外峻节贯【繆本作冠】云霄通方堪远大能文变风俗好客留轩盖他日一来游因之严光濂【蜀志卫继敏达夙成学识通博进仕州郡历职清显後汉书牟融以司徒茂才爲丰令视事三年县无狱讼爲州郡最晋书郑袤爲黎阳令吏民悦服太守班下属城特见甄异爲诸县之最史记索隐韦昭云三江谓松江钱塘江浦阳江今按地理志有南江中江北江是爲三江其南江从会稽吴县南东入海中江从丹阳芜湖县东北至会稽阳羡县东入海北江从会稽毘陵县东北入海太平寰宇记郡国志云禹贡三江吴郡南松江钱塘江浦阳江是也峻节高节也顔延年诗峻节贯秋霜李善注贯连也汉书通方之士不可以文乱顔师古注方道也梁书尚书令沈约当朝显贵轩盖盈门水经注自桐庐县至於潜凡十有六濂第二是严陵濂濂带山山下有石室汉光武时严子陵之所居也故山及濂皆即人姓名之山下有盘石周围十数丈交枕潭际盖陵所游也】

草创大还赠柳官廸

天地爲橐籥周流行太易造化合元符交媾【繆本作构】腾精魄自然成妙用孰【繆本作熟】知其指的罗络四季间絪微无一【繆本作一无】隙日月更出没双光岂云只姤女乘河车黄金充轅轳执枢相管辖摧伏伤羽翮朱鸟张炎威白虎守本宅相煎成苦老消烁凝津液髣髴明窗尘死灰同至寂搗【繆本作铸非】冶入赤色十二周律历赫然称大还与道本无隔白日可抚弄清都在咫尺北酆落死名南斗上生籍抑予是何者身在方士格才术信纵横世途自轻掷吾求仙弃俗君晓损胜益不向金阙游思爲玉皇客鸾车速风电龙骑无鞭策一举上九天相携同所适【老子天地之间其犹橐籥乎河上公注天地空虚和气流布万物

自生其空虚犹橐籥也参同契乾坤者易之门户衆卦之父母坎离匡廓运轂正轴牝牡四封以爲橐籥覆冒阴阳之道又曰易有周流屈伸反覆又曰易谓坎离坎离者乾坤二用二用无爻位周流行六虚往来既不定上下亦无常陆佃新刻漏铭入神之制与造化合符吕延济注造化谓阴阳也符同也参同契观夫雌雄交媾之时刚柔相结而不可解得其节符非有工巧以制御之本在交媾定制始先陈子昂诗精魄相交媾参同契自然之所爲兮非有邪僞道惟斯之妙术兮审订不诳语又曰坎戊日精离已月光日月爲易刚柔相当土王四季罗络始终天地媾其精日月相捍持蟾蜍与兔魄日月气双明又曰河上姤女灵而最神得火则飞不见埃尘彭晓注河上姤女者真汞也见火则飞腾抱朴子丹砂可爲黄金河车可作银子得其道可以仙身轭辕端横木驾马领者也龙虎经神室有所象鸡子爲形容五岳峙潜洞际会有枢辖淳于叔通大丹赋升熬於甑山兮炎火张设下白虎倡导前兮苍液和於後朱雀翱翔戏兮飞扬色五采遭遇网罗施兮压止不得举嗷嗷声悲泣兮如婴儿慕母颠倒就汤镬兮摧折伤毛羽俞琰注朱雀火也萧士贇曰老者炼丹火候之老嫩也参同契形体爲灰土状若明窗尘捣冶并合之驰入赤色门固塞其际会务令致完坚炎火张於下昼夜声正勤始文使可修终竟武乃陈候视加谨慎审察调寒温周旋十二节节尽更须亲气索命将絶休死亡魄魂色转更爲紫赫然成还丹清都见二卷注北酆见本卷注搜神记南斗注生北斗注死後汉书穷折方士黄白之术章怀太子注方士有方术之士也阙谓朝廷之门阙金阙犹金门也真灵位业图有玉皇道君太平广记木公亦云东王父亦云东王公盖青阳之元气百物之先也冠三维之冠服九色云霞之服亦号玉皇君居於云房之间以紫云爲盖青云爲城仙童侍立玉女散香真僚仙官巨亿万计各有所职皆禀其命而朝奉翼卫故男女得道者名籍所隶焉出仙传拾遗太平御览尺素诀曰太微天帝登白鸾之车 媾音垢姤丑雅切嗟去声】

赠崔司户文昆季【唐时州之属吏有司户参军事上州二人从七品下中州一人正八品下下州一人从八品下】

双珠出海底俱是连城珍明月两特达余辉旁照【缪本作照旁】人英声振名都高价动殊邻岂伊箕山故特以风期亲惟昔不自媒担簦西入秦攀龙九天上忝列【缪本作别忝】岁星臣布衣侍丹墀密勿草丝纶才微惠渥重谗巧生缁磷一去已十年今来复盈旬清霜入晓鬓白露生衣巾侧见绿水亭开门列华茵千金散义士四座无凡宾欲折月中桂持【萧本作特】爲寒者薪路旁已窃笑天路将何因垂恩倪邱山报德有微身【三国志注孔融与韦康父端书曰前日元将来渊才亮茂雅度弘毅伟世之器也昨日仲将又来懿性贞实文敏笃诚保家之主也不意双珠近出老蚌甚珍贵之魏文帝与鍾繇书不损连城之价事详四卷注礼记圭璋特达郭璞诗圭璋虽特达吕延济注特达美貌古诗照乘有余辉长杨赋遐方疏俗殊邻絶党之域顔师古注邻邑也高士传许由字武仲阳城槐里人也隐於沛泽之中尧让天下於许由由於是遁耕於中岳颍水之阳箕山之下终身无经天下色许由没葬箕山之巔亦名许由山在阳城之南十余里尧因就其墓号曰箕山公神以配食五岳风期犹风度也注见三卷列子鲁有儒生自媒能治之管子自媒之女丑而不信史记虞卿蹢躅担簦徐广曰簦长柄笠音登笠有柄者谓之簦列仙传东方朔者平原厌次人也久在吴中爲书师数十年武帝时上书说便宜拜爲郎至昭帝时时人或谓圣人或谓凡人作深浅默显之行或忠言或戏语莫知其旨至宣帝时初弃郎以避世乱置幘官舍风飘之而去後见於会稽卖药五湖智者疑其

岁星精也汉书俯视兮丹墀孟康注丹墀赤地也通典汉省中以朱漆地故谓之丹墀宋书明光殿以胡粉涂壁画古贤烈士以丹朱饰地谓之丹墀汉书密勿从事不敢告劳颜师古注密勿犹黽勉礼记王言如丝其出如纶郑玄注言言出弥大也纶今有秩嗇夫所佩也孔颖达正义王言初出微细如丝及其出行於外言更渐大如纶也言纶粗於丝潘岳寡妇赋荷君子之惠渥刘良注荷恩惠之厚也任昉诗经途不盈旬谢灵运诗连榻设华茵张铕注茵褥也酉阳杂俎旧言月中有桂西京赋要眇门乎天路墀音池缙音支磷音邻】

赠溧阳宋少府陟【唐时宣州有溧阳县属江南西道】

李斯未相秦且逐东门兔宋玉事襄王能爲高唐赋尝闻绿水曲忽此相逢遇扫洒青天开豁然披云雾葳蕤紫鸾鸟巢在崑山树惊风西北吹飞落南溟去早怀经济策特受龙颜顾白玉栖青蝇君臣忽行路人生感分义贵欲呈丹素何日清中原相期廓天步【李斯事见一卷拟恨赋注高唐赋见二卷注绿水曲见四卷注晋书尚书令卫瓘见乐广而奇之命诸子造焉曰此人之水镜见之莹然若披云雾而覩青天也子虚赋错翡翠之葳蕤吕延济注葳蕤羽毛貌鸾鸟见二卷注南溟南海也见八卷注青蝇见九卷注北史司马子如传子如初爲怀朔镇省事与齐神武相结托分义甚深刘璠传我与府侯分义已定杨齐贤曰丹素心也左传晋楚治兵遇於中原诗小雅天步艰难沈约法王寺碑因斯而运斗枢自兹而廓天步】

戏赠郑溧阳【郑名晏爲溧阳令与上篇宋少府陟俱详见二十九卷溧阳濑水贞义女碑铭序】

陶令日日醉不知五柳春素琴本无弦漉酒用葛巾清风北窗下自谓羲皇人何时到栗【一作溧】里一见平生亲【宋书陶潜少有高趣尝着五柳先生传以自况曰先生不知何许人不详姓氏宅边有五柳树因以爲号焉性嗜酒而家贫不能恒得亲旧知其如此或置酒招之造饮辄尽期在必醉既醉而退曾不吝情去留爲彭泽令解印绶去职赋归去来江州刺史王弘欲识之不能致也潜常往庐山弘令潜故人龐通之齎酒具於半道栗里要之潜有脚疾使一门生二儿輦篮輿既至欣然便共饮酌俄顷弘至亦无忤也潜性不解音声而畜素琴一张无弦每有酒适辄抚弄以寄其意郡将候潜值其酒熟取头上葛巾漉酒毕还复着之尝言五六月北窗下卧遇凉风暂至自谓是羲皇上人太平寰宇记栗里原在庐山南当涧有陶公醉石苏武诗愿子留斟酌叙此平生亲任昉诗何由乘此竹直见平生亲】

赠僧崖公

昔在朗陵东学禅白眉空大地了镜彻回旋寄轮风揽彼造化力持爲我神通晚谒太山君亲见日没云中夜卧山月【一作夜卧雪上月】拂衣逃人羣授余金仙道旷劫未始闻冥机发天光独朗谢垢氛虚舟不系物观化游江濱江濱遇同声道崖乃僧英说法动海岳游方化公卿手秉玉麈尾如登白楼亭微言注百川亶亶信可听一风鼓羣有万籁各自鸣啓闭八【繆本作开七】窗牖托宿掣雷霆自言【繆本作云】历天台搏壁蹑翠屏凌兢石桥去恍惚入青冥昔往今来归絶景无不经何日更携手乘杯向蓬瀛【元和郡县志朗陵山在蔡州朗山

县西北三十里太平寰宇记朗陵故城汉爲县所治在今蔡州朗山县西南三十五里晋武帝封何曾爲朗陵公即此城也白眉空疑是当时释子之名犹禅宗所称南泉愿临济元赵州谿之类杨注引蜀志马良白眉事非矣了者了然分明之意楞严经观诸世间大地山河如镜监明来无所粘过无踪迹法苑珠林依华严经云三千大千世界以无量因缘乃成且如大地依水轮水依风轮风依空轮空无所依然衆生业感世界安住故智度论云三千大千世界皆依风轮爲基又新翻菩萨藏经云诸佛如来成就不思议智故而能行知诸风雨相知世有大风名乌卢博迦乃至衆生诸有觉受皆由此风所摇动故此风轮量高三拘卢舍於此风上虚空之中复有风起名风云轮此风轮量高五拘卢舍於此风上虚空之中复有风起名瞻薄迦此风轮量高十踰缮那如是次第轮上六万八千拘胝风轮之相如来应正等觉依止大慧悉能了知维摩诘经维摩诘即入三昧现神通力示诸大衆太山君主太山之神也广博物志东岳太山君领羣神五千九百人主治死生百鬼之主帅也太山君服青袍戴苍璧七称之冠佩通阳太平之印乘青龙金光明经如来之身金色微妙後世称佛有金仙之号以此隋书天地之外四维上下更有天地亦无终极然皆有成有败一成一败谓之一劫楞严经我旷劫来心得无碍沈约千佛颂千觉俯应通叩冥机庄子宇泰定者发乎天光谢灵运诗兼抱济物性而不纓垢氛李善注垢滓也氛气也庄子泛若不系之舟虚而遨游者也魏书独浩然而任己同虚舟之不系鲍照诗回风起江濱说文濱水涯也周易同声相应同气相求沈约爲齐竟陵王解讲疏肃萃僧英敬敷慧典傅亮文殊师利菩萨赞业化游方罔识厥津晋书王衍妙善玄言唯谈老庄爲事每执玉柄麈尾与手同色世说孙兴公许玄度共在白楼亭共商略先往名达林公既非所关听讫云二贤故自有才情刘孝标注会稽记曰白楼亭在山阴临流映壑也水经注浙江又东北径重山山上有白楼亭亭本山下县令殷朗移置今处升陟远望山湖满目也微言已见前访道安陵诗注中世说谢太傅未冠始出西诣王长史清言良久去後荀子问曰向客何如尊长史曰向客亹亹爲来逼人王?头陀寺碑文行不舍之檀而施治羣有刘良注羣有谓万物韵会凡孔窍机括皆曰籁庄子人籁则比竹是已地籁则衆窍是已天籁则人心之自动者是已孙绰天台山赋跨穹隆之悬磴临万丈之絶冥践莓苔之滑石搏壁立之翠屏李善注悬磴石桥也顾恺之啓蒙记注曰天台山石桥路径不盈尺长数十步步至滑下临絶冥之涧翠屏石桥之上石壁之名也孔灵符会稽记曰赤城山上有石桥悬渡有石屏风横絶桥上边有过径裁容数人甘泉赋驰闾阖而入凌兢服?注凌兢恐惧貌王逸九思增逝兮青冥注云青冥太清也法苑珠林宋京师有释杯渡者不知族姓名氏常乘木杯渡水因而爲目初见在冀州不修细行神力卓越世莫能测其由来尝於北方寄宿一家家有一金像渡窃去家主觉而追之见渡徐行走马逐而不及至孟津河浮木杯於水凭之而渡无假风棹轻疾如飞俄而渡岸达於京师】

游溧阳北湖亭望瓦屋山怀古赠同旅【一作赠孟浩然 景定建康志瓦屋山在溧阳县西北八十里周回二十里高一百六十七丈山形连亘两崖稍陡起宛如屋状李白尝游溧阳望瓦屋山怀古赋诗即此地】

朝登北湖亭遥望瓦屋山天清白露下始觉【一作知】秋风还游子托主人仰观眉睫间目【一作目】色送飞鸿邈然不可攀长吁相劝勉何事来吴关闻有贞义女振穷溧水湾清光了在眼白日如披顔高坟五六墩岑兀栖猛虎遗迹翳九泉芳名动千古子胥昔乞食此女倾

壶浆运开展宿愤入楚鞭平王凜冽天地间闻名若怀霜壮夫或未达十步九太行与君拂衣去万里同翱翔【游子数句言游客仰观主人辞色见其仰视飞鸟意不在宾客故长吁相劝何事来至此地目色送飞鸿是暗用卫灵公仰视蜚雁色不在孔子事已见四卷注越絶书子胥至溧阳界中见一女子擊絮於濑水之中子胥曰岂可得托食乎女子曰诺即发簪饭清其壶浆而食之子胥食已而去谓女子曰掩尔壶浆毋令之露女子曰诺子胥行五步还顾女子自纵於濑水之中而死一统志溧水在应天府溧阳县西北四十里一名濑水萧士贇曰栖猛虎谓坟如猛虎之状犹马鬣封之谓也琦谓坟势岑兀有若猛虎是写遥望中拟似之景耳以马鬣封爲比恐未足据此诗贞义女之坟唐时尚存当在瓦屋山下今则不可考矣木华海赋吹炯九泉李善注地有九重故曰九泉谢灵运诗道消结愤懣运开申悲凉吴越春秋吴王入郢伍胥乃掘平王之墓出其尸鞭之三百左足践腹右手抉其目诮之曰谁使汝用谗谀之口杀我父兄岂不冤哉傅咸神泉赋六合萧条严霜凜冽陆机文赋心檠檠以怀霜】

醉後贈从甥高镇

马上相逢揖马鞭客中相见客中怜欲邀击筑悲歌饮正值倾家无酒钱江东风光不借人枉杀落花空自春黄金逐手快意尽昨日破产今朝贫丈夫何事空啸傲不如烧却头上巾君爲进士不得进我被秋霜生旅鬓时清不及英豪人三尺童儿唾【萧本作重】廉蔺匣中盘剑装?鱼闲在腰间未用渠且将换酒与君醉醉归托宿吴专【缪本作鱄】诸【史记荆轲嗜酒日与狗屠及高渐离饮於燕市酒酣以往高渐离击筑荆轲和而歌於市中相乐也已而相泣旁若无人汉书陈万年传倾家自尽文献通考唐制取士之科有秀才有明经有进士有俊士太平御览南越志曰?鱼南越谓之环雷鱼长二丈其鳞皮有珠文可以饰刀剑琦按?鱼古谓之鮫鱼今谓之沙鱼以其皮爲刀剑鞘者是也廉颇者赵之良将以勇气闻於诸侯将兵数有功封安平君蔺相如亦赵人赵王使奉和氏璧入秦卒完璧归赵赵王以爲贤大夫使不辱於诸侯拜爲上大夫又从赵王与秦王会渑池归国以相如功大拜爲上卿位在廉颇之右吴越春秋专诸堂邑人也伍胥之亡楚如吴时遇之於涂因相其貌碓颡而深目虎膺而熊背戾於从难知其勇士陰而结之欲以爲用?音鵲鱄与专同】

贈秋浦柳少府【唐时秋浦县隶江南西道之池州】

秋浦旧萧索公庭人吏稀因君树桃李此地忽芳菲摇笔望白云开帘当翠微时来引山月纵酒酣清辉而我爱夫子淹留未忍归【树桃李用潘岳事详见後三首注中尔雅山未及上翠微郭璞注近上旁坡邢昺疏谓未及顶上在旁陂陀之处名翠微一说山气青缥色故曰翠微也潜确居类书凡山远望之则翠近之则翠渐微故山色曰翠微亦曰山腰汉书乃罢历下守备纵酒顔师古注纵放也放意而饮酒说文酣酒乐也阮籍诗明月耀清辉】

贈崔秋浦三首

吾爱崔秋浦宛然陶令风门前【一作栽】五杨柳井上【一作夹】二梧桐山鸟下听事檐花落酒中怀君未忍去惆怅意无穷【陶令五柳事已见本卷注元行恭诗惟余一废井尚夹

两株桐盐铁论曾子倚山而吟山鸟下翔北堂书钞益部耆旧传景放爲益州太守威恩洽畅有鳩巢於听事胡三省通监注听他经切听受也中庭曰听事言受事察讼於是也汉晋皆作听事六朝以後始加广作厅何逊诗燕子戏还飞檐花落枕前听音汀】

其二

崔令学陶令【一作君似陶彭泽】北窗常昼眠抱琴时弄【一作待秋】月取意任无弦见客但倾酒爲官不爱钱东臯多种黍劝尔早耕田【一作东臯春事起种黍早归田北窗卧无弦琴俱陶潜事已见本卷注阮籍奏记方将耕於东臯之阳输黍稷之税以避当涂之路张铣注东臯藉所居之东也泽畔曰臯】

其三

河阳花作县秋浦玉爲人地逐名贤好风随惠化春水从天汉落山逼画屏新应念金门客投沙吊楚臣【白帖潘岳爲河阳令种桃李花人号曰河阳一县花庾信春赋河阳一县并是花晋书裴楷风神高迈容仪俊爽博涉羣书特精义理时人谓之玉人又晋书王蘊爲竟陵太守有惠化百姓歌之杨齐贤曰水从天汉落指九华山之瀑布也汉书贾谊爲长沙王太傅既以谪去意不自得及渡湘水爲赋以吊屈原屈原楚贤臣也被谗放逐作离骚赋遂自投江而死谊追伤之因以自谕谢灵运诗投沙理既迫如邛愿亦愆投弃也谓弃之於长沙正用谊事】

望九华山【萧本缺山字】赠青阳韦【繆本作韦青阳】仲堪【太平寰宇记九华山在池州青阳县南二十里旧名九子山李白以九峯有如莲花削成改爲九华山因有诗曰天河挂绿水秀出九芙蓉今山中有李白书堂基址存焉又按顾野王輿地志云其山上有九峯千仞壁立周围二百里高一千丈出碧鸡之类刘禹锡曰九华山在池州青阳县西南九峰竞秀神采奇异昔予仰太华以爲此外无奇爱女几荆山以爲此外无秀今见九华始悼前言之容易也元和郡县志青阳县西南至池州七十里本汉涇县地天宝元年洪州都督徐辉奏於吴所立临城县南置属宣州在青山之阳故名永泰二年隶池州】

昔在九江上遥望【一作观】九华峰天河挂绿水秀出【一作山】九芙蓉我欲一挥手谁人可相从君爲东道主於此卧云松【郭璞山海经注九江在浔阳南江自浔阳而分爲九皆东会於大江书曰九江孔殷是也通典九江在浔阳郡之西北此诗所谓九江则指池州之江也以其承九江之下流故亦冒九江之称左传若舍郑以爲东道主】

李太白集注卷十

卷十一

钦定四库全书

李太白集注卷十一

钱塘 王琦 撰

古近体诗共三十二首

赠王判官时余归隐居庐山屏风叠【一统志屏风叠在庐山自五老峰而下九叠如屏游宦纪闻九叠屏风之下旧有太白书堂有诗曰吾非济代人且隐屏风叠】

昔别黄鹤楼蹉跎淮海秋俱飘零落叶各散洞庭流中年不相见蹭蹬游吴越何处我思君天台绿萝月会稽风月好却遶剡溪回云山海上出人物镜中来一度浙江北十年醉楚台荆门倒屈宋梁苑倾邹枚苦笑我夸诞知音安在哉大盗割鸿沟如风扫秋叶吾非济代人且隐屏风叠中夜天中望忆君思见君明朝拂衣去永与海鸥羣【黄鹤楼见八卷注隋书扬州於禹贡爲淮海之地说文蹭蹬失道也方輿胜覽天台山在台州天台县西一百十里艺文类聚名山略记曰天台山在剡县即是衆圣所降葛仙公山也世说注会稽郡记曰会稽郡多名山水峰嶴隆峻吐纳云雾松栝枫栢擢干竦条潭壑镜彻清流泻注王子敬见之曰山水之美使人应接不暇太平寰宇记剡溪在越州剡县南一百五十步一源出台州天台县一源出婺州武义县即王子猷雪夜访戴逵之所也一名戴溪初学记輿地志曰山阴南湖萦带郊郭白水翠岩互相映发若镜若图故王逸少曰山阴路上行如在镜中游梦梁錄浙江在杭州东南谓之钱塘江内有浙山正居江中潮水投山下曲折而行楚台楚地之台若章华阳云之类荆门谓荆州之地唐时爲江陵郡今湖广之荆州府是也其地有荆门山故文士取以爲称梁苑古睢阳之地唐时爲宋州睢阳郡之宋城县今河南归德州是也其地汉梁孝王之苑囿在焉故文士以梁苑称之屈原宋玉皆生於荆州邹阳枚乘皆客梁孝王引此以喻当时两州之文士大盗指安禄山史记项羽乃与汉王约中分天下割鸿沟而西者爲汉鸿沟而东者爲楚应劭曰在荥阳东南二十里文穎曰於荥阳下引河东南爲鸿沟以通宋郑陈蔡曹卫与济汝淮泗会於楚即今官渡水也十六国春秋荡平残胡如风扫叶海鸥用列子事见二卷注
蹭音寸蹬音邓剡音闪】

在水军宴赠幕府诸侍御【永王军中 汉书莫府省文书晋灼曰将军职在征行无常处所在爲治故言莫府也或曰卫青征匈奴絶大莫大克获帝就拜大将军於幕府中故曰莫府莫府之名始於此也顔师古曰二说皆非也幕府者以军幕爲义古字通单用耳军旅无常居止故以帐幕言之廉颇李牧市租皆入幕府此则非因卫青始有其号】

月化五白【一作百非】龙翻飞凌九天胡沙惊北海电扫洛阳川虏箭雨宫阙皇輿成播迁英王受庙略秉钺清南边云旗卷海雪金戟罗江烟聚散百万人弛张在一贤霜台降羣彦水

国奉戎旃绣服开宴语天人借楼船如登黄金台遥谒紫霞仙卷身编蓬下冥机四十年寧知草间人腰下有龙泉浮云在一决誓欲清幽燕愿与四座公静谈金匱篇齐心戴朝恩不惜微躯捐所冀旄头灭功成追鲁连【十六国春秋慕容熙建始元年太史丞梁延年梦月化爲五白龙梦中占之曰月臣也龙君也月化爲龙当有臣爲君者後汉书电扫羣孽风行巴梁楚辞恐皇舆之败绩王逸注皇后也舆君之所乘十六国春秋华夏大乱皇舆播迁梁书大齐圣主之恩规上党英王之然诺隋书亲承庙略远振国威赵次公杜诗注兵谋谓之庙略盖谋於七庙之中也诗商颂有秉钺东京赋云旗拂霓薛综注熊虎爲旗其高至云故曰云旗也礼记一张一弛文武之道也汉书百万之衆不如一贤霜台御史台也御史爲风霜之任故曰霜台顏延年诗水国周地险谢朓辞随王牋契濶戎旃从容讌语李周翰注戎兵也旃旌也陈子昂诗昔君事胡马予得奉戎旃国语饮酒宴语相亲也天人邯鄲淳美曹植语见五卷注楼船见四卷注太平御覽燕昭王爲郭隗筑台今在幽州燕王故城中土人呼为贤士台亦谓之招贤台又谓之黄金台东方朔非有先生论积土爲室编蓬爲户越絶书欧冶子干将凿茨山泄其溪取铁英作爲铁剑三枚一曰龙渊二曰太阿三曰工布龙泉即龙渊也唐人避高祖讳改称龙渊曰龙泉庄子说剑篇上决浮云下絶地纪史记紂史记石室金匱之书索隐曰石室金匱皆国家藏书之处隋书经籍志有太公金匱二卷後汉书蒙被朝恩负荷重任陆机诗不惜微躯退汉书昂曰髦头胡星也追鲁连言将如鲁连功成身退不受爵赐而去也详见二卷注】

赠武十七谔【并序】

门人武谔深於义【一作诗】者也质木沉悍慕要离之风潜钓川海不数数於世间事闻中原作难西来访余余爱子伯禽在鲁许将冒胡兵以致之酒酣感激援笔而赠

马如一匹练明日过吴门乃是要离客西来欲报恩笑开燕匕首拂拭竟无言狄犬吠清洛天津成塞垣爱子隔东鲁空悲断肠猿林回弃白璧千里阻同奔君爲我致之轻齎涉淮源精诚合天道不媿远游【一作邓攸】魂【艺文类聚韩诗外传曰顏回望吴门焉见一匹练孔子曰马也然则马之光景一匹长耳故後人呼马为一匹要离事见五卷注史记燕太子丹预求天下之利匕首说文赤狄本犬种元和郡县志洛水在河南府洛阳县西南三里西自苑内上阳之南弥漫东流宇文恺作斜堤束令东北流潘岳籍田赋清洛浊渠引流激水天津洛水浮桥名已见二卷注後汉书天设山河秦筑长城汉起塞垣所以别内外异殊俗也鲍照诗追虏穷塞垣张铚注塞垣长城也庾信五张寺经藏碑昔爲畿服今成塞垣世说桓公入蜀至三峡中部伍中有得猿子者其母缘岸哀号行百余里不去遂跳上船至便即絶破视其腹中肠皆寸寸断公闻之怒命黜其人庄子林回弃千金之璧负赤子而趋或曰爲其布坎赤子之布寡矣爲其累坎赤子之累多矣弃千金之璧负赤子而趋何也林回曰彼以利合此以天属也陆德明音义林回司马云殷之逃民之姓名广韵齎装也玉篇齎行道所用也通志地理略淮水源在唐州桐栢县河南志淮渚在南阳府桐栢县西二十五里源出胎簪山流经息阳确山真阳息县固始会沂泗东入於海晋书邓攸没於石勒石勒过泗水攸乃斫坏车以牛马负妻子而逃又遇贼掠其牛马步走担其儿及其弟子绥度不能两全乃谓其妻曰吾弟早亡惟有一息理不可絶止应自弃我儿耳幸而得存我後当有子妻泣而从之其後妻不复孕卒以无嗣时人义而哀之爲之语曰天道无知使邓伯道无儿】

赠间丘宿松【唐时舒州有宿松县属淮南道】

阮籍爲太守乘驴上东平剖竹十日间一朝风化清偶来拂衣去谁测主人情夫子理宿松浮云知古城扫地物莽然秋来百草生飞鸟还旧巢迁人返躬耕何慙宓子贱不减陶渊明吾知千载後却掩二贤名【世说注文士传曰阮籍放诞有傲世情不乐仕宦晋文帝亲爱籍恒与谈戏任其所欲不迫以职事籍常从容言曰平生常游东平乐其土风愿得爲东平太守文帝悦从其意籍便骑驴径到郡皆坏府舍诸壁鄣使内外相望教令清寧十余日便复骑驴去谢灵运诗剖竹守沧海李善注汉书曰初与郡守爲竹使符说文曰符信剖置以竹分而复合吕延济注凡爲太守皆剖竹使符也家语宓不齐字子贱仕爲单父宰有才智仁爱百姓不忍欺孔子美之南史陶潜字渊明爲镇军建威参军谓亲朋曰聊欲弦歌以爲三径之资可乎执事者闻之以爲彭泽令不以家累自随公田悉令吏种秫稻妻子固请种粳乃使二顷五十亩种秫五十亩种粳 宓当作慮音服读作密音者非】

狱中上崔相涣【旧唐书崔涣传天宝十五载七月玄宗幸蜀涣迎谒於路抗词忠恳皆究理体玄宗嘉之以爲得涣晚即日拜黄门侍郎同中书门下平章事扈从成都肃宗灵武即位八月与左相韦见素同平章事房琯崔圆同賛册赴行在时未复京师举选路絶诏涣充江淮宣慰选补使以收遗逸惑於听受爲下吏所鬻滥进者非一以不称职闻乃罢知政事除左散骑常侍兼余杭太守江东采访防御使】

胡马渡洛水血流征战場千门闭秋景万姓危朝霜贤相變元气再欣海县康台庭有夔龙列宿粲成行羽翼三元圣发辉两太阳应念覆盆下雪泣拜天光【说文變和也书周官论道经邦變理阴阳十六国春秋海县分裂天光分耀傅玄诗繁星依青天列宿自成行李周翰注列宿二十八宿也六韜王者帅师必有股肱羽翼以成神威元圣大圣也书汤诰聿求元圣三元圣谓玄宗肃宗广平王也两太阳亦谓玄宗肃宗也抱朴子是责三光不照覆盆之内也吕氏春秋吴起雪泣而应之高诱注雪拭也汉书夫日者衆阳之宗天光之贵东京赋登天光於扶桑吕向注天光日也】

中丞宋公以吴兵三千赴河南军次寻阳脱余之囚参谋幕府因赠之【旧唐书天宝十五载六月以监察御史宋若思爲御史中丞即其人也脱太白囚执事详见二十六卷及三十一卷中唐时浔阳郡又谓之江州隶江南西道】

独坐清天下专征出海隅九江皆渡虎三郡尽还珠组练明秋浦楼船入郢都风高初选将月满欲平胡杀气横千里军声动九区白猿慙剑术黄石借兵符戎虏行当剪鲸鲵立可诛自怜非剧孟何以佐良图【独坐谓御史中丞与司隶校尉尚书令会同得专席而坐也详见十卷注後汉书范滂爲清诏使登车揽轡慨然有澄清天下之志春秋元命苞赐弓矢得专征赐斧钺得诛白虎通好恶无私执意不倾赐以弓矢使得专征後汉书宋均迁九江太守郡多虎暴数爲民患常募设槛穽而犹多伤害均到下记属县曰夫虎豹在山鼃鼃在水各有所托今爲民害咎在残吏而劳动张捕非忧恤之本也其务退奸贪思进忠善可一去槛穽除削课制其後传言虎相与东游渡江孟尝迁合浦太守郡不产谷实而海出珠宝与交趾比境常通商贩

贸余粮食先时宰守并多贪秽诡人采求不知纪极珠遂渐徙於交趾郡界於是行旅不至人物无资贫者死饿於道尝到官革易前弊求民病利曾未岁余去珠复还百姓皆反其业商货流通称为神明左传使邓廖帅组甲三百被练三千以侵吴杜预注组甲被练皆战备也组甲漆甲成组文被练练袍贾逵曰组甲以组缀甲车士服之被练帛也以帛缀甲步卒服之史记江陵故郢都西通巫巴东有云梦之饶汉书地理志南郡江陵故楚郢都楚文王自丹阳徙此北史选将练兵赢粮聚甲隋书突厥侯月将满辄为寇钞刘渊林三都赋注吴越春秋越有处女出於南林之中越王使使聘问以剑戟之事处女将北见於越王道逢老翁自称袁公问处女吾闻子善为剑术愿一观之女曰妾不敢有所隐惟公试之於是袁公即跳於林竹槁折堕地处女即接末袁公操本以刺处女女应节入三入因举杖击之袁公即飞上树化为白猿遂引去李峤诗绛营韬将略黄石请兵符史记如姬盗晋鄙兵符与公子孔颖达左传正义节为兵符秋浦楼船九区黄石鲸鲵剧孟俱已见前注 郢音颖】

流夜郎赠辛判官

昔在长安醉花柳五侯七贵同杯酒气岸遥凌豪士前风流肯落他【一作谁一作诸】人後夫子红颜我少年章台走马着金鞭文章献纳麒麟殿歌舞淹留玳瑁筵与君自谓长如此寧知草动风尘起函谷忽惊胡马来秦宫桃李向明【缪本作胡】开我愁远谪夜郎去何日金鸡放赦回【羣辅录平阿侯王谭成都侯王商红阳侯王音曲阳侯王根高平侯王逢时并以元后弟同日受封京师号曰五侯并奢豪富侈招贤下士谷永楼护皆为贵客潘岳西征赋窥七贵於汉庭李善注七贵谓吕霍上官赵丁傅王也梁书气岸疎凝情途狷隔汉书张敞无威仪时罢朝会走马过章台街孟康注在长安中臣瓚曰章台下街也初学记三辅黄图曰未央宫东有麒麟殿藏秘书即扬雄校书之处也宋之问诗歌舞淹留景欲斜石关犹驻五云车刘桢瓜赋布象牙之席薰玳瑁之筵後汉书设後北虏稍强能为风尘章怀太子注相侵扰则风尘起张骏薤露行三方风尘起猓狁窃上京函谷见二卷五卷注萧士贇曰子见以桃李向明开为公卿归禄山非也是指同时倂类因兵兴之际不次被用为人桃李我独遭谪也向明者向阳花木之义輿地广记唐贞观十六年开山洞置夜郎县为珍州治李白流夜郎即此唐书地理志贞观十六年开山洞置珍州并置夜郎丽臯乐源三县後为夜郎郡隶黔中道元和二年州废地改属溱州旧唐书凡国有赦宥之事先集囚徒於阙下命卫尉树金鸡待宣制讫乃释之】

赠刘都使【都使未详何官诗中有饮水事戎幕之句盖幕职也当是兼衔若都水监使者之类耳】

东平刘公干南国秀余芳一鸣即朱紱五十佩银章饮水事戎幕衣锦华水乡铜官几万人谗讼清玉堂吐言贵珠玉落笔回风霜而我谢明主衔哀投夜郎归家酒债多门客粲成行高谈满四座一日倾千觴所求竟无绪裘马欲摧藏主人若不顧明发钓沧浪【三国志东平刘楨字公干太祖辟为丞相掾属着文赋数十篇史记不鸣则已一鸣惊人易乾凿度天子三公九卿朱紱诸侯赤紱广雅紱绶也汉书韦贤传黼衣朱紱四牡龙旗顔师古注朱紱为朱裳画为亚文也亚古弗字也故因谓之紱汉书百官公卿表凡吏秩比二千石以上皆银印青绶顔师

古注汉旧仪云银印背龟钮其文曰章谓刻曰某官之章也宋书银章青绶庄子今吾朝受命而夕饮冰陆机诗予固水乡士李善注水乡谓吴也唐书地理志宣州南陵县武德四年隶池州州废来属後析置义安县又废义安爲铜官治孔丛子吐言则天下之士莫不属耳目世说注神犹渊镜言必珠玉西京杂记淮南王安着鸿烈二十一篇自云字中皆挟风霜左传投诸四裔以御魑魅杜预注投弃也孔融诗归家酒债多门客粲成行晋书肆一醉於崇朝飞千觴於长夜成公綏啸赋悲伤摧藏李善注摧藏自抑挫之貌明发犹明晨也详见二卷注
绂音拂】

贈常侍御

安石在东山无心济天下一起振横流功成复潇洒大贤有卷舒【繆本作舒卷】季叶轻风雅匡复属何人君爲知音者传闻武安将气振长平瓦燕赵期洗清周秦保宗社登朝若有言爲访南迁贾【傅亮修张良庙教夷项定汉大拯横流吕向注横流谓乱也淮南子盈缩卷施与时变化萧士贇曰叶世也季叶犹季世也孔融论盛孝章书惟公匡复汉室史记赵奢传秦军军武安西秦军鼓噪勒兵武安屋瓦尽振後奢子括长平之战无振瓦事而庾信哀江南赋云碎於长平之瓦周书云瓦震长平则赵分爲二兵出函谷则韩裂爲三未详本何书太白此句盖承二书之说而云耳不本史记也又武安将似指白起以起封武安君故也取以喻时之将帅燕赵皆爲禄山所据故期其洗清周地谓洛阳在唐爲东京秦地谓长安在唐爲西京宗庙社稷在焉故欲其保护安石东山事详见七卷注贾谊南迁事详见十卷注】

贈易秀才

少年解长剑投贈即分离何不断犀象精光暗往时蹉跎君自惜窜逐我因谁地远虞翻老秋深宋玉悲空摧芳桂色不屈古松姿感激平生意劳歌寄此辞【步光之剑陆断犀象见四卷注吴志虞翻性疏直数有酒失孙权积怒非一遂徙翻交州虽处罪放而讲学不倦门徒常数百人在南十余年年七十卒宋玉九辩悲哉秋之爲气也】

经乱离後天恩流夜郎忆旧游书怀贈江夏韦太守良宰【唐时江夏郡乃鄂州也属江南西道按方輿胜覽以贈此诗之韦太守爲韦景骏未知何据】

天上白玉京十二楼五城仙人抚我顶结发受长生误逐世间乐颇穷理乱情九十六圣君浮云挂空名天地赌一掷未能忘战争试涉霸王略将期轩冕荣时命乃大谬弃之海上行学剑翻自哂爲文竟何成剑非万人敌文窃四海声儿戏不足道五噫出西京临当欲去时慷慨泪沾缨叹君倜傥才标举冠羣英开筵引祖帐慰此远徂征鞍马若浮云送余骠骑亭歌钟不尽意白日落昆明【五星经天上白玉京黄金阙抱朴子崑仑山上有五城十二楼应劭汉书注昆仑玄圃五城十二楼仙人之所常居杨齐贤曰自秦始皇至唐玄宗中国传绪之君凡九十有六华阳国志陈登曰雄姿杰出有霸王之略吾敬刘玄德庄子古之所谓隐士者非伏其身而勿见也非闭其言而不出也非藏其知而不发也时命大谬也史记项籍少时学书不成去学剑又不成项梁怒之籍曰书足以记名姓而已剑一人敌不足学学万人敌後汉书梁鸿因

东出关过京师作五噫之歌曰陟彼北芒兮噫顾覽帝京兮噫宫室崔嵬兮噫人之劬劳兮噫
辽辽未央兮噫肃宗闻而非之求鸿不得乃易姓运期名耀字侯光与妻子居齐鲁之间晋书
彬彬藻思绰冠羣英祖帳祖席时所设之帳幕杜审言诗祖帳连河阙军麾动洛城陆机诗牵
世纓时网驾言远徂征骠骑亭玩诗意当在长安杨注以骠骑亭为谢安建者恐误国语女乐
二八歌钟二肆三辅黄图汉昆明池武帝元狩四年穿在长安西南周围四十里西南夷传曰
天子遣使求身毒国市竹而爲昆明所闭天子欲伐之越隗昆明国有滇池方三百里故作昆
明池以象之以习水战因名曰昆明池三辅旧事曰昆明池地三百三十二顷图曰上林苑有
昆明池周围四十里陕西通志昆明池在西安府城西南三十里】十月到幽州戈鋌若罗星
君王弃北海扫地借长鲸呼吸走百川燕然可摧倾心知不得语【一作意】却欲栖蓬瀛弯
弧惧天狼挟矢不敢张揽涕黄金台呼天哭昭王无人贵骏骨緑耳空腾骧乐毅悦再生于今
亦奔亡蹉跎【一作苍茫】不得意驱马过【萧本作还】贵乡逢君听弦歌肃穆坐华堂百
里独太古陶然卧羲皇徵乐昌乐馆开筵列壶觞贤豪间青娥对烛俨成行醉舞纷绮席清歌
绕飞梁欢娱未终朝秩满【一作解印】归咸阳祖道拥万人供帐遥相望一别隔千里荣枯
异炎凉【东都赋元戎竟野戈鋌彗云说文鋌小矛也扬雄羽猎赋焕若天星之罗张铄注言
如天星之罗列也陈琳玛瑙勒赋骈居列峙焕若罗星按唐书安禄山传天宝元年以禄山爲
平卢节度使押两番渤海黑水四府经略使三载代裴寛爲范阳节度仍领平卢军则经略威
武清夷静塞恒阳北平高阳唐兴横海平卢卢龙十一军及榆关守捉安东都护府兵十三万
有奇皆其所统幽蓟嬀檀易恒定漠沧营平十一州之地皆其所治矣幽州以北尽与禄山所
谓君王弃北海扫地借长鲸也宋书弯弧跃马务是畋游楚辞挟长矢兮射天狼王逸注天狼
星名以喻贪残又楚辞思美人兮攀涕而竚眙战国策郭隗对燕昭王曰古之人君有以千金
求千里马者三年不能得涓人言於君曰请求之君遣之三月得千里马马已死买其骨五百
金反以报君君大怒曰安事死马而捐五百金涓人对曰死马且买五百金况生马乎天下必
以君能市马马今至矣於是不能期年千里马之至者三今王诚欲致士先从隗始於是昭王
爲隗筑宫而师之乐毅自魏往驺衍自齐往剧辛自赵往士争凑燕水经注桃林中多野马造
父於此得骅骝緑耳盗骊之乘以献周穆王使之馭以见西王母荀子骅骝驪骥纤离緑耳此
皆古之良马也说文骧马之低昂也西京赋乃奋翅而腾骧元和郡县志魏州有贵郷县太平
御覽陆绩别传曰太守王朗命爲功曹风化肃穆郡内大治嵇康琴赋华堂曲宴郑玄礼记注
唐虞以上曰太古元和郡县志魏州有昌乐县通典三十里置一驿其非通途大路则曰馆薛
道衡诗佳丽俨成行江淹诗绮席生浮埃顔师古汉书注绮文繒也即今之所谓细绫也列子
韩娥东之齐匱粮过雍门鬻歌假食既去余音绕梁欂三日不絶高诱淮南子注日旦至食时
爲终朝秩满俸满也汉书公卿大夫故人邑子设祖道供帐东都门外顔师古注祖道饯行也
骆宾王诗一朝殊语默千里异炎凉】炎凉几度改九土中横溃汉甲连胡兵沙尘暗云海草
木摇杀气星辰无光彩白骨成丘山苍生竟何罪函【萧本作幽】关壮帝居国命悬哥舒长
戟三十万开门纳凶渠公卿奴【萧本作如】犬羊忠说醢与菹二圣出游豫两京遂丘墟【
国语能平九土韦昭注九土九州之土也谢灵运诗天地中横溃李善注横溃以水喻乱也抱
朴子白骨成山虚祭布野史记索隐顔师古曰今桃林县南有洪湍涧水即古之函关按山形
如函故称函关余详二卷五卷注陈後主诗山河壮帝居唐书哥舒翰传天宝十四载禄山反
封常清以王师败帝乃召见翰拜太子先锋兵马元帅以田良丘爲军司马萧昕爲判官王思
礼钳耳大福李承光高元荡苏法鼎管崇嗣爲属将火拔归仁李武定浑萼契苾以本部隶麾

下凡河陇朔方奴刺等十二部兵二十万守潼关师始东先驱牙旗触门堕注旄竿折衆恶之天子御勤政楼临送诏翰以军行过门无下百官郊饯旌旗亘二百里明年禄山遣子庆绪攻关翰击走之贼将崔乾佑守陕郡仆旗鼓羸师以诱战觐者曰贼无备可图也帝信之使者趣战项背相望翰窘不知所出六月引而东恸哭出关次灵宝西原与乾佑战大败翰引数百骑絶河还营羸兵才八千至潼津收散卒复守关乾佑进攻於是火拔归仁等给翰出关执以降贼械送洛阳京师震动由是天子西幸魏乐府贼衆如犬羊北史谗谄甘心忠说息义三国志注遂集矢石於其宫殿而二京爲之丘墟】帝子许专征秉旄控强楚节制非桓文军师拥熊虎人心失去就贼势腾风雨惟君固房陵诚节冠终古仆卧香炉顶浪霞 瑶泉门开九江转枕下五湖连半夜水军来寻阳满旌旄空名适自误迫胁上楼船徒赐五百金弃之若浮烟辞官不受赏翻谪夜郎天夜郎万里道西上令人老扫荡六合清仍爲负霜草日月无偏照何由诉苍昊良牧称神明深仁恤交道【王勃龙怀寺碑蜀王秀以文昭建国帝子专征梁书授以上将任以专征书牧誓王左杖黄钺右秉白旄以麾庾信诗置酒仍开幕麾军即秉旄说文控引也荀子秦之鋭士不可以敌桓文之节制汉书至於齐桓晋文之兵可谓入其域而有节制矣尚书如虎如貔如熊如羆後汉书岑彭传晨夜倍道兼行二千余里径拔武阳使精骑驰广都去成都数十里势若风雨所至皆奔散唐时房陵郡属山南东道即房州也刘孝标世说注终古往古也远法师庐山记东南有香炉山孤峰秀起游气笼其上则氤氲若香烟白云映其外则炳然与衆峰殊别又记云衆岭中第三岭极高峻太史公东游登其峯而遐观南眺五湖北望九江东西肆目若陟天庭焉嵇康诗岂若翔区外浪琼漱朝霞陶潜诗於我若浮烟元和郡县志夜郎西北至上都五千五百五十里曰万里者甚言其远也徐干诗巍巍高山首悠悠万里道君去日已远郁结令人老十六国春秋扫荡万里今其时也礼记日月无私照北史崔士谦授江陵总管荆州刺史外御强敌内抚军人风化大行号称良牧汉书班伯爲定襄太守郡中震栗咸称神明】一忝青云客三登黄鹤楼顾慙称处士虚对鸚鵡洲樊【一作樊误】山霸气尽寥落天地秋【一作彤檐冠白笔爽气凌清秋】江带峨眉雪川横【一作横穿】三峡流万舸此中来连帆过扬州送此万里目旷然散我【一作烦】愁纱窗倚天开水树緑【一作绿树】如发窥日【一作光】畏衔山促酒喜得【一作见】月吴娃与越艷窈窕夸铅红呼来上云梯含笑出帘栊对客小垂手罗衣舞春风宾跪请休息主人情未极覧君荆山作江鲍堪动色清水出芙蓉天然去雕饰逸兴横素襟无时不招寻朱门【一作旄】拥虎士列戟何森森剪凿竹石开萦流涨清深登楼【一作台】坐【一作入】水阁吐论多英【一作奇】音片辞贵白璧一诺轻黄金谓我不媿君青鸟【一作鸾】明【萧本作问】丹心【黄鹤楼见八卷注昭明文选祢衡鸚鵡赋序黄祖太子射宾客大会有献鸚鵡者举酒於衡前曰祢处士今日无用娱宾窃以此鸟自远而至明慧聪善羽族之可贵愿先生爲之赋使四座咸共荣观不亦可乎衡因爲赋笔不停缀文不加点太平寰宇记鸚鵡洲在大江东江夏县西南二里西过此洲从北头七十步大江中流与汉阳县分界後汉书云黄祖爲江夏太守时祖长子射大会宾客有献鸚鵡於此洲故得名元和郡县志樊山在鄂州武昌县西三里谢玄晖诗曰钓台临讲闕樊山开广宴谓此也太平御覧江夏图经云樊山西陆路去州一百七十三里出紫石英山东数十步有冈冈上甚平敞青松緑竹常自蔚然其下有寒溪夏时凜然常有寒气故谓之寒溪有蟠龙石王勃江寧饯宴序霸气尽而江山空皇风清而市朝改三峡记峨嵋积雪经时不散峨嵋山乃岷山之一支也峰峦高峻上极寒冷冬春积雪虽经风日不能消释入夏始得融泮流入岷江经三峡而下清流爲之变色胡三省通鑑注江水自巴东至夷陵

其间有广溪峡巫峡西陵峡谓之三峡一曰三峡西峡归峡巫峡七百里中两岸连山略无阙处隐天蔽日自非日中夜分不见日月广韵楚以大船曰舸陆放翁入蜀记至鄂州泊税务亭贾船客舫不可胜计衔尾不絕者数里自京口以西皆不及李太白赠江夏韦太守诗曰万舸此中来连帆过扬州盖此地自唐爲冲要之地王勃采莲赋吴娃越艷郑婉秦妍说文吴楚之间谓好曰娃後汉书入则乱发坏形出则窈窕作态章怀太子注窈窕妖冶之貌也方言美心爲窈美状爲窕铅粉也红朱也谢惠连诗升月照帘栊李周翰注栊窗也说文栊房室之疏也乐府杂録舞者乐之容也有大垂手小垂手或如惊鸿或如飞燕乐府诗集大垂手小垂手皆言舞而垂其手也吴均曲云垂手忽迢迢飞燕掌中娇罗衫恣风引轻带任情摇又云舞女出西秦蹑影舞阳春且复小垂手广袖拂红尘礼记客跪抚席而辞江鲍江淹鲍照也鍾嵘诗品谢诗如芙蓉出水江淹诗敢不自雕饰王僧达诗清气溢素襟虎士出周礼已见八卷注中华古今注戟以木爲之後世刻爲无复典型赤油韬之亦谓之廸戟亦谓之桠戟王公以下通用以爲前驱唐五品以上皆施桠戟於门唐书百官志凡戟一品之门十六二品及京兆河南太原尹大都督大都护之门十四三品及上都督中都督上都护上州之门十二下都督下都护中州下州之门各十衣幡坏者五岁一易之薨卒者既葬追还汉纪季布立然诺之信时人爲之语曰得黄金百鎰不如季布一诺阮籍诗谁言不可见青鸟明我心宋书重披丹心冒昧以请 祢乃里切音你或作祢音读者误舸音歌又音哥娃音蛙】五色云间鹄飞鸣天上来传闻赦书至却放夜郎回暖气变寒谷炎烟生死灰君登凤池去勿【萧本作忽】弃贾生才桠犬尚吠尧匈奴笑千秋中夜四五叹常爲大国忧旌旆夹两山黄河当中流连鸡不得进饮马空夷犹安得羿善射一箭落旄头【岁华纪丽刘向别録曰燕地寒谷不生五谷邹衍吹律吕以暖之温风至五谷生因名黍谷史记韩安国坐法抵罪蒙狱吏田甲辱安国安国曰死灰独不复然乎田甲曰然即溺之居无何梁内史阙汉使使者拜安国爲梁内史起徙中爲二千石通典魏晋以来中书监令掌赞诏命记会时事典作文书以其地在枢近多承宠任是以人固其位谓之凤凰池焉史记桠之犬可使吠尧汉书车千秋无他材能学术又无伐鬲功劳特以一言悟主旬月取宰相封侯世未尝有也後汉使者至匈奴单于问曰闻汉新拜丞相何用得之使者曰以上书言故事单于曰苟如是汉置丞相非用贤也妄一男子上书即得之矣左传今王室实蠢蠢焉吾小国惧矣然大国之忧也战国策诸侯不可一犹连鸡之不能俱止於栖亦明矣左传将饮马於河而归楚辞君不行兮夷犹王逸注夷犹犹豫也桠犬喻贼将若史思明辈千秋喻宰相若苗晋卿王璵辈两山太华山首阳山夹黄河之二山也连鸡喻当时诸节度使辈汉书昂曰旄头胡星也】

江夏使君叔席上赠史郎中

凤凰丹禁里衔出紫泥书昔放三湘去今还万死余仙郎久爲别客舍问何如酒辙思流水浮云失旧居多慙华省贵不以逐臣疎复如竹林下而【萧本作叨】陪芳宴初希君生羽翼一化北溟鱼【凤凰衔诏事已见五卷注潜确居类书天子所居曰禁以丹涂壁故曰丹禁亦曰紫禁元和郡县志武都有紫水泥亦紫汉朝封玺书用紫泥即此水之泥也三湘详见悲清秋赋注庄子周昨来有中道而呼者周顾视车辙中有鲋鱼焉曰我东海之波臣也君岂有升斗之水而活我哉潘岳秋兴赋独辗转乎华省晋书阮咸任达不拘与叔父籍爲竹林之游北溟有鱼其名爲鯢详见大鹏赋注】

博平【萧本作晋】郑太守自庐山千里相寻入江夏北市门见访却之武陵立马赠别【唐时博平郡即博州也隶河北道武陵郡即朗州也隶山南东道元和郡县志庐山在江州浔阳县东三十二里本名鄣山昔有匡俗字子孝隐沦潜景庐於此山汉武帝拜爲大明公俗号庐君故山取号周环五百余里】

大梁贵公子气盖苍梧云若无三千客谁道信陵君救赵复存魏英威天下闻邯郸能屈节访博从毛薛夷门得隐沦而与侯生亲仍要鼓刀者乃是袖鎚人好士不尽心何能保其身多君重然诺意气遥相托五马入市门金鞍照城郭都忘虎竹贵且与荷衣乐去去桃花源何时见归轩相思无终极肠断朗江【一作陵】猿【归藏曰有白云出自苍梧入於大梁史记信陵君传公子留赵闻赵有处士毛公藏於博徒薛公藏於卖浆家公子欲见两人两人自匿不肯见公子闻所在乃闲步往从此两人游甚欢公子留赵十年不归秦日夜出兵东伐魏魏王患之使使往请公子公子恐其怒之诫门下有敢爲魏王使通者死毛公薛公往见公子曰秦攻魏魏急而公子不恤使秦破大梁而夷先王之宗庙公子当何面目立天下乎语未及卒公子立变色告车趣驾归救魏魏王以上将军印授公子公子率五国之兵破秦军於河外乘胜逐秦军至函谷关秦兵不敢出当是时公子威振天下其用夷门隐士侯生策使朱亥袖铁椎椎杀晋鄙夺其军进击秦兵以救邯郸存赵事详见三卷注江淹诗延陵轻宝剑季布重然诺五马见六卷注梁简文帝诗金鞍照龙马虎竹见五卷注楚辞荷衣兮蕙带桃花源在武陵详见二卷注梁昭明太子诗相思无终极长夜起叹息方輿胜覽朗水在常德府武陵县其水西南自辰锦州入郡界经郡城入大江谓之朗江】

江上赠窦长史【长史已见七卷注】

汉求季布鲁朱家楚逐伍胥去章华万里南迁夜郎国三年归及长风沙闻道青云贵公子锦帆游戏【缪本作奕】西江水人疑天上坐楼船水净霞明两重绮相约相期何太深棹歌摇艇月中寻不同珠履三千客别欲论交一片心【史记季布爲气任侠有名於楚项籍使将兵数窘汉王及项羽灭高祖购求布千金敢有舍匿罪及三族季布匿濮阳周氏周氏曰汉购将军急迹且至臣家将军能听臣臣敢献计即不能愿先自刳季布许之乃髡钳季布衣褐衣置广柳车中并与其家僮数十人之鲁朱家所卖之朱家心知是季布乃买而置之田诫其子曰田事听此奴必与同食朱家乃乘轺车之洛阳见汝阴侯滕公滕公心知朱家大侠意季布匿其所待间果言如朱家指上乃赦季布又史记楚平王囚伍奢而召其二子伍尚遂归伍胥弯弓属矢出见使者曰父有何罪以召其子爲将射使者还走遂出奔吴章华台详见一卷注台在楚地伍胥自楚出奔故曰去章华也华阳国志夜郎郡夜郎国也属县二千户杨齐贤曰池州雁下八十里有长风沙江南通志长风沙在安庆府东六十里李白泊此作长干行阴铿诗平湖锦帆张南史樊猛领青龙八十艘爲水军於白下游奕以御隋六合兵湖广通志西江水在安陆府景陵县境乃襄江之一派沈佺期诗人疑天上坐鱼似镜中悬西京赋齐桡女纵棹歌李善注棹歌引棹而歌也说文艇小舟也史记春申君客三千余人其上客皆蹑珠履】

赠王汉阳【唐沔州汉阳郡有汉阳县属江南西道】

天落白【一作上墮】玉棺王乔辞叶【萧本作邳误】县一去未千年汉阳复相见犹乘飞
鳧尚识仙人面鬓发何青青童顔皎如练吾曾弄海水清浅嗟三变果愜麻姑言时光速流
电与君数杯酒可以穷欢宴白云归去来何事坐交战【後汉书王乔者河东人显宗世爲叶
令乔有神术每月朔望常自县诣台朝帝怪其来数而不见车骑密令太史伺望之言其临至
辄有双鳧从东南飞来於是侯鳧至举罗张之但得一双鳧焉乃诏上方诊视则四年中所赐
尚书官属履也後天下玉棺於堂前吏人推排终不动摇乔曰天帝独召我耶乃沐浴服饰寝
其中盖便立覆宿昔葬於城东土自成坟其夕县中牛皆流汗喘乏而人无知者百姓乃爲立
庙号叶君祠神仙传麻姑云接待以来见东海三爲桑田向到蓬莱水又浅於往日陶潜诗一
生复能几倏如飞电惊又贫富常交战道胜无戚顔 愜音怯】

赠汉阳辅録事二首【唐时刺史属官司马之下有録事参军事上州者从七品中州者正八
品下州者从八品有録事皆从九品每县亦有録事在丞尉之下则流外官也】

闻君罢官意我抱汉川湄借问久疎索何如听讼时天清江月白心静海鸥知应念投沙客空
余吊屈悲【风俗通贾谊爲长沙太傅既之官内不自得及渡湘水投吊书曰闕茸尊显佞谀
得志以哀屈原离谗邪之咎亦因自伤爲邓通等所愬也投沙详见十卷赠崔秋浦第三首注
】

其二

鸚鵡洲横汉阳渡水引寒烟没江树南浦登楼不见君君今罢官在何处汉口双鱼白锦鳞令
传尺素报情人其中字数无【萧本作何】多少祇是相思秋复春【潜确类书云鸚鵡洲在
湖广汉阳渡之上祢衡尝作鸚鵡赋後埋玉於此故名洲虽跨汉江而尾连黄鹤矶故图经属
武昌郡云秋水涨盛时隐没不见至水落乃出一统志汉阳渡在汉阳府城东南浦在武昌府
城南三里汉口在大别山北即汉水与涓水合流入江处胡三省通监注汉口汉水入江之口
其地在鄂州汉阳县东大别山下杨升庵曰古乐府尺素如残雪结成双鲤鱼要知心里事看
取腹中书据此诗古人尺素结爲鲤鱼形即緘也文选客从远方来遗我双鲤鱼即此事也下
云呼兒烹鲤鱼中有尺素书亦譬况之言非真烹也五臣及刘履谓古人多於鱼腹寄书引陈
涉羣鱼倡祸事证之何异痴人说梦】

江夏赠韦南陵冰【唐宣城郡有南陵县隶江南西道】

胡骄马惊沙尘起胡雏【缪本作驹】饮马天津水君爲张掖近酒泉我窜三巴九千里天地
再新法令寛夜郎迁客带霜寒西忆故人不可见东风吹梦到长安寧期此地忽相遇惊喜茫
如堕烟雾玉箫金管喧四筵苦心不得申长【一作一】句昨日绣衣倾緑樽病如桃李竟何
言昔骑天子大宛马今乘欸段诸侯门赖遇南平豁方寸复兼夫子持清论有似山开万里云
四望青天解人闷人闷还心闷苦辛长苦辛愁来饮酒二千石寒灰重暖生阳春山公醉後能
骑马别是风流贤主人头陀云月多僧气山水何曾称人意不然【一作能】鸣笳按鼓戏沧
流呼取江南女儿歌棹讴我且爲君搥碎黄鹤楼君亦爲吾倒却鸚鵡洲赤壁争雄如梦里且

须歌舞寬离忧【汉书孝惠高后时冒顿濩骄矜傲之意晋书石勒年十四随邑人行贩洛阳倚啸上东门王衍见而异之顾谓左右曰向者胡雏吾观其声视有奇志恐将爲天下之患驰遣收之会勒已去汉书狂夫鸣譟於东崖匈奴饮马於渭水唐时张掖郡甘州也酒泉郡肃州也俱属陇右道通典张掖郡西到酒泉郡四百二十里三巴详见四卷注太白虽流夜郎然甫至三巴而遇赦故曰我窜三巴九千里江淹恨赋迁客海上汉书百官公卿表侍御史有绣衣直指出讨奸猾治大狱顔师古注衣以绣者尊宠之也沈约诗忧来命緑樽汉书桃李不言下自成蹊史记大宛多善马马汗血言其先天马子也後汉书乘下泽车御欸段马章怀太子注欸犹缓也言形段迟缓也南平谓南平太守李之遥也开云望青天用卫瓘美乐广语已见八卷注寒灰重暖用韩安国语已见本卷注山公醉後骑马事见五卷注杨齐贤曰头陀寺在鄂州宋大明五年建天竺言头陀此言抖擞抖擞烦恼也元和郡县志头陀寺在鄂州江夏县东南二里陆放翁入蜀记头陀寺在鄂州城之东隅石城山方輿胜覽头陀寺在黄鹤山上自南齐王中作碑遂爲古今名利谢灵运诗鸣笳发春渚李周翰注笳箫也楚辞钟按鼓造新歌些刘良注按犹擊也蜀都赋吹洞箫发棹讴刘渊林注棹讴鼓棹而歌也黄鹤楼见八卷注鸚鵡洲见前首注华阳国志孙权遣周瑜程普水军三万助先主拒曹公大破公军於赤壁焚其舟船曹公引归杨齐贤曰赤壁矶与百人山对峙在今鄂州上流八十里】

赠卢司户

秋色无远近出门尽寒山白云遥相识待我苍梧间借问卢耽鹤西飞几岁还【水经注邓德明南康记曰昔有卢耽仕州爲治中少栖仙术善解云飞每夕辄凌虚归家晓则还州尝於元会至朝不及朝列化爲白鹤至阁前回翔欲下威仪以石掷之得一只履耽惊还就列内外左右莫不骇异】

赠从弟南平太守之遥二首【唐时南平郡即渝州也先名巴郡天宝元年更名隶剑南道】

少年不得【繆本作作】意落魄【繆本作拓】无安居愿随任公子欲钓吞舟鱼常时饮酒逐风景壮心遂与功名疎兰生谷底人不锄云在高山空卷舒汉家天子驰驷马赤车蜀道迎相如天门九重谒圣人龙顔一解四海春彤庭左右呼万岁拜贺明主收沉沦翰林秉笔回英盼麟阁峥嵘谁可见承恩初入银台门【一作侍从甘泉宫】着书独在金銮殿龙驹雕镫白玉鞍象牀绮席【一作食】黄金盘当时笑我微贱者却来请谒爲交欢一朝谢病游江海畴昔相知几人在前门长揖後门关今日结交明日改爱君山岳心不移随君云雾迷所爲梦得池塘生春草使我长价登楼诗别後遥传临海作可见羊何共和之【史记酈生家贫落魄无以爲衣食业庄子任公子投竿东海钓得大鱼见大鹏赋注三国志芳兰生门不得不锄司马相如赤车驷马事见四卷注郑玄礼记注天子九门路门也应门也雉门也库门也臯门也城门也近郊门也远郊门也关门也列子夫子始一解顔而笑彤庭天子之庭以朱漆饰之也详见明堂赋注梦溪笔谈唐翰林院在禁中乃人主燕居之所玉堂承明金銮殿皆在其间应供奉之人自学士以下工伎羣官司隶籍其间皆称翰林如今之翰林医官翰林待诏之类是也谢朓诗俯仰流英盼初学记汉西京未央宫中有麟阁亦藏秘书即扬雄校书之处也石林燕语唐翰林院在银台门之北玉海两京记大明宫紫宸殿北曰蓬莱殿其西曰还周殿还周西

北曰金銮殿殿旁坡名金銮坡又云金銮殿在蓬莱正西微南徐陵诗白马号龙驹吴均诗白玉镂鞦韆绮席见十一卷注畴昔前日也见九卷注三国志由夷逸操山岳不移南史谢惠连年十岁能属文族兄灵运嘉赏之云每有篇章对惠连辄得佳语尝於永嘉西堂思诗竟日不就忽梦见惠连即得池塘生春草大以爲工尝曰此语有神助非吾语也按池塘生春草句乃灵运登池上楼诗故曰长价登楼诗灵运又有登临海峤初发强中作与从弟惠连可见羊何共和之诗一首临海晋时郡名即今台州也羊何谓泰山羊璿之东海何长瑜与灵运惠连以文章赏会共爲山泽之游 鐙丁邓切登上声】

其二

东平与南平今古两步兵素心爱美酒不是顾专城谪官桃源去寻花几处行秦人如旧识出户笑相迎【太白自注南平时因饮酒过度贬武陵李善文选注臧荣绪晋书曰阮籍拜东平相不以政事爲务沉醉日多晋书阮籍闻步兵人善酿有贮酒三百斛乃求爲步兵校尉江淹诗素心正如此李善注素本也专城谓县令得专主一城政事者也古陌上桑词三十侍中郎四十专城居桃源在武陵详见二卷注】

赠潘侍御论钱少阳

绣衣柱史何昂藏铁冠白笔横秋霜三军论事多引纳塔前虎士罗干将虽无二十五老者且有一翁钱少阳眉如松雪齐四皓调笑可以安储皇君能礼此最下士九州拭目瞻清光【汉书王贺爲武帝绣衣御史逐捕魏郡羣盗坚卢等党与通典汉武帝时侍御史又有绣衣直指者出讨奸猾理大狱而不常置初学记汉官仪曰侍御史周官也爲柱下史冠法冠一名柱後以铁爲柱言其审固不挠常清峻也魏略曰帝尝大会殿中御史簪白笔侧阶而坐上问左右此爲何官何主左右不对辛毗曰此爲御史旧时簪笔以奏不法今者直备官但眊笔耳陆机孝侯周处碑汪洋延阙之旁昂藏寮采之上虎士出周礼见八卷注吴越春秋吴阖闾请干将作名剑二枚干将妻断发剪爪投於炉遂以成剑阳曰干将阴曰莫耶阳作龟文阴作漫理又子虚赋建干将之雄戟张揖注干将韩王剑师雄戟胡矛有?者干将所造则戟亦可称干将矣说苑公子推行年十五而相荆仲尼闻之使人往视还曰廊下有二十五俊士堂上有二十五老人仲尼曰合二十五人之智智於汤武并二十五人之力力於彭祖以治天下其固免矣乎史记四皓保护太子事见四卷注谢瞻诗定都护储皇三国志四海延颈八方拭目】

赠柳圆

竹实满秋浦【萧本作圃】凤来何苦饥还同月下鹄三绕未安枝夫子即琼树倾柯拂羽仪怀君恋明德归去日相思【陆玕诗疏凤凰一名鷕非梧桐不栖非竹实不食非醴泉不饮魏武帝短歌行月明星稀乌鹄南飞绕树三匝何枝可依琼树即琼枝也以璆琳琅玕爲实凤凰食之详见二卷注中谢灵运诗倾柯引弱枝攀条摘蕙草】流夜郎半道承恩放还兼欣剋复之美书怀示息秀才

黄口爲人罗白龙乃鱼服得罪岂怨天以愚陷网目鲸鲵未翦灭豺狼屡翻覆悲作楚地囚何由【萧本作日】秦庭哭遭逢二明主前後两迁逐去国愁夜郎投身窜荒谷半道雪屯蒙旷如鸟出笼遥欣尅复美光武安可同天子巡剑阁储皇守扶风扬袂正北辰开襟揽羣雄胡兵出月窟雷破关之东左扫因右拂旋收洛阳宫回輿入咸京席卷六合通叱咤开帝业【一作宇】手成天地功大驾还长安两日忽再中一朝让宝位剑玺传无穷媿无秋毫力谁念矍铄翁弋者何所慕高飞仰冥鸿弃剑学丹砂临炉双玉童寄言息夫子岁晚陟方蓬【家语孔子见罗雀者所得皆黄口小雀问之曰大雀独不得何也罗者曰大雀善惊而难得黄口贪食而易得黄口雀之初生其吻尚带黄色者也东京赋白龙鱼服见困豫且事详六卷注王融策秀才文爲网罗之目尚简李周翰注目网孔也梁书宗社缀旒鲸鲵未翦曹冏六代论扫除凶逆翦灭鲸鲵李周翰注鲸鲵大鱼吞食小鱼者以喻不义人也鲍照诗边尘屡翻覆吴越春秋申包胥乃之於秦求救楚昼驰夜趋足踵跣裂裳裹膝鹤倚哭於秦庭七日七夜口不絶声二明主谓玄宗肃宗太白前事明皇被谗遭逐後值肃宗坐累远流所谓两迁逐也庾信哀江南赋序予乃窜身荒谷公私涂炭杨素诗在昔天地闭品物属屯蒙屯蒙者艰难蒙晦之义楞严经远离三有如鸟出笼剑阁入蜀之险道已见前注时明皇幸蜀故曰天子巡剑阁至德元载七月改扶风爲凤翔郡二载二月肃宗幸凤翔至十月两京克复始自凤翔还长安驻兵扶风者凡十月故曰储皇守扶风初学记荆州星占曰北辰一名天关一名北极北极者紫宫太一座也此以喻天子之位晋书张宾谦虚敬慎开襟下士士无贤不肖造之者莫不得尽其情後汉书邓禹传於今之计莫如延揽英雄旧唐书郭子仪传二年九月从元帅广平王率蕃汉之师十五万进收长安回纥遣叶护太子领四千骑助国讨贼子仪与叶护宴狎修好誓平国难相得甚欢子仪与贼将安守忠李归仁战於京西香积寺之北王师结阵横亘三十里贼衆十万阵於北回纥以奇兵出贼阵之後夹攻之贼军大溃自午至酉斩首六万级贼将张通儒守长安闻归仁等败夜奔陕郡翌日广平王入京师老幼百万夹道欢呼涕泣而言曰不图今日复见官军广平王休士三日率师东趣十月安庆绪遣严庄悉其衆十万来赴与张通儒同抗官军屯於陕西负山爲阵子仪以大军击其前回纥登山乘其背遇贼潜师於山中与鬪过期大军稍却贼分兵三千人絶我归路子仪麾回纥令进尽杀之师驰至其後於黄埃中发十余矢贼惊顾曰回纥来即时大败僵尸徧山泽严庄张通儒走归洛阳遂与安庆绪渡河保相州子仪奉广平王入东都陈兵於天津桥士庶欢呼於路肃宗纪至德二载十月癸亥上自凤翔还京遣太子太师韦见素入蜀迎上皇丙寅至望贤宫得东京捷书上大喜丁卯入长安士庶涕泣拜忭曰不图复见吾君十二月丙午上皇至自蜀上至望贤宫奉迎上皇御宫南楼上望楼辟易下马趋进再拜蹈舞称庆上皇下楼上匍匐奉上皇足涕泗呜咽不能自胜遂扶侍上皇御殿亲自进食自御马以进上皇上马又躬挽辔而行止之後退上皇曰吾享国长久吾不知贵见吾儿爲天子吾知贵矣上乘马前导自开远门至丹凤门旗帜烛天彩棚夹道士庶拚舞路侧皆曰不图今日再见二圣百僚班於含元殿庭上皇御殿左相苗晋卿率百辟称贺上皇诣长乐殿谒九庙神主即日幸兴庆宫上请归东宫上皇遣高力士再三慰譬而止十二月甲子上皇御宣政殿授上传国玺上于殿下涕泣而受之史记席卷天下包举宇内字林叱咤发怒也汉书五载而成帝业国语夫成天地之大功者其子孙未尝不章虞夏商周是也蔡邕独断大驾则公卿奉引大将军参乘太仆御属车八十一乘备千乘万骑在长安出祀天於甘泉备之西京赋云大驾幸乎平乐之馆吕延济注大驾天子驾也盖後人泛指天子之驾爲大驾易解终备日再中乌连嬉仁圣出握知时封禅书新垣平言臣候日再中居顷之日却复中

周易圣人之大宝曰位西京杂记汉帝相传以秦王子婴所奉白玉玺高帝斩白蛇剑後汉书武威将军刘尚擊武陵五溪蛮夷深入军没马援因复请行时年六十二帝愍其老未许之援自请曰臣尚能披甲上马帝令试之援据鞍顾盼以示可用帝笑曰矍铄哉是翁也章怀太子注矍铄勇貌又逸民传扬雄曰鸿飞冥冥弋者何篡焉言其违患之远也章怀太子注篡字诸本或作慕法言作篡宋衷曰篡取也鸿高飞冥冥薄天虽有弋人何所施巧而取焉喻贤者隐处不罹暴乱之害也方蓬方丈蓬莱海中二神山也】

赠张相镐二首【时逃难病在宿松山作萧本缺病字旧唐书张镐博州人风仪魁岸廓落有大志涉猎经史好谈王霸大略天宝末自褐衣拜左拾遗玄宗幸蜀镐自山谷徒步扈从肃宗即位玄宗遣镐赴行在所镐至凤翔奏议多有弘益拜谏议大夫寻迁中书侍郎同中书门下平章事时方兴军戎帝注意将帅以镐有文武才业命兼河南节度使持节都统淮南等道诸军事及收复两京加镐银青光禄大夫封南阳郡公以本军驻汴州招讨残孽】

神器难窃弄天狼窥紫宸六龙迁【一作驾】白日四海【一作九落】暗胡尘昊穹降元宰君子方经纶澹然养浩气歛起持大【缪本作天】钧秀骨象山岳英谋合鬼神佐汉解鸿门生唐爲後身【一作兴唐思退身一作功成思退身】拥旄秉金钺伐鼓乘朱轮虎将如雷霆【一作电】总戎向东巡诸侯拜马首猛士骑鲸鳞泽被鱼鸟悦令行草木春圣智【一作逢圣】不失时建功及良辰丑虏安足纪可贻帼与巾倒泻溟海珠尽爲入幕珍冯异献赤伏邓生歛【萧本作倏】来臻庶同昆阳举再覩汉仪新【东京赋巨猾间豊窃弄神器薛综注神器帝位也天狼谓狼星也见十一卷注曹植卞太后诔龙飞紫宸奄有九土蠡海集天子之居曰紫宸六龙驾日车者也详见三卷注晋书昔者幽后不纲胡尘暗於戏水封禅书肇自昊穹生民顔师古曰昊穹皆谓天也顓言气顓汗也穹言形穹隆也王融曲水诗序元宰比肩於尚父中铉继踵於周南李善注元宰冢宰也周易云雷屯君子以经纶北史陛下不以刘裕歛起纳其使贡唐书张镐兴布衣不数年位将相独孤及唐故洪州刺史张公镐遗爱颂隐居南山盖三十期天宝十四年始褐衣召见由是一命左拾遗再命右补阙修国史三命侍御史四命谏议大夫五命中书侍郎同中书门下平章事起布衣二年绾相印佐王业明敷之盛耀动古今於时至德二载也周书英谋电发神旆风驰汉书项羽至戏西鸿门闻沛公欲王关中独有秦府库珍宝亚父范增劝羽击沛公飡士旦日合战羽季父项伯素善张良良时从沛公项伯夜以语良良与俱见沛公因伯自解於羽明日沛公从百余骑至鸿门谢羽自陈封秦府库还军霸上以待大王闭关以备他盗不敢背德羽意已解范增欲害沛公赖张良樊哙得免唐书肃宗本纪至德二载五月丁巳谏议大夫张镐爲中书侍郎同中书门下平章事八月甲申张镐兼河南节度使都统淮南诸军事十一月张镐率四镇伊西北庭行营兵马使李嗣业陕西节度使来瑱河南都知兵马使嗣吴王祗克河南郡县班固涿邪山祝文杖节拥旄钲人伐鼓任昉宣德皇后令拥旄司部李周翰注拥持也旄旌旗之属以麾衆者也古今注大将军出征特加黄钺者以铜爲之黄金涂刃及柄不得纯金得赐黄钺则斩持节将陆云吴故丞相陆公诔金钺镜曰云旗绦天册府元龟天宝元年正月一日改元诏曰文宣垂训事必正名黄钺古者以金爲饰金者应五行之数布肃杀之威去金称黄理或未当其黄钺宜改爲金钺符威武之意焉诗小雅伐鼓渊渊又大雅如雷如霆徐方震惊魏书奉律总戎廓寧淮右羽猎赋乘巨鳞骑鲸鱼史记智者不失时王者不絶世诗大雅仍执丑虏通监司马懿与诸葛亮相守百余

日亮数挑战懿不出亮乃遗懿巾帼妇人之服懿怒上表请战亮曰彼本无战情所以固请战者以示武於其衆耳胡三省注刘昭注补舆服志公卿列侯夫人绀繒帼盖妇人首饰之称独孤及张公鎬遗爱碑旌选乃僚必国之良有若博陵崔贲昌黎韩洄赵郡李惟岳北海王士华河间邢宙河东裴孝智陇西李道皆卿材也以嘉言硕画参公军事晋书谢安与王坦之尝诣桓温论事温令郗超帐中卧听之风动帐开安笑曰郗生可谓入幕之宾矣後汉纪萧王至中山羣臣上尊号王不听诸将固请王召冯异问以羣臣之议异曰三王背叛更始败亡天下无主宗庙之忧在於大王宜从衆议上以安社稷下以济百姓王曰我昨梦乘赤龙上天觉悟心中悸动此何祥也异再拜贺曰此天命发於精神心中悸动大王重慎之至也会诸生强华自长安奉赤伏符诣郾羣臣复请曰受命之符人应爲大今万里合信周之白鱼焉足比乎符瑞昭晰宜答天神以光上帝六月己未即皇帝位於郾後汉书邓禹传禹闻光武安集河北即杖策北渡追及於邳光武见之甚欢汉书王莽传莽遣大司空王邑驰传之洛阳与司徒王寻发衆郡兵百万平定山东邑至洛阳州郡各选精兵牧守自将定会者四十二万人余在道不絶车甲士马之盛自古出师未尝有也六月邑与寻发洛阳欲至宛道出颍川过昆阳昆阳时已降汉汉兵守之二公纵兵围昆阳世祖悉发鄠定陵数千人来救昆阳寻邑易之自将万余人行阵敕诸营皆按部毋得动独迎与汉兵战不利大军不敢擅相救汉兵乘胜杀寻昆阳中兵出并战邑走军乱天风蜚瓦雨如注水大衆崩坏号譟虎豹股栗士卒奔走各还归其郡後汉书光武帝纪时三辅吏士东迎更始见诸将过皆冠帻而衣妇人衣诸于绣襦莫不笑之或有畏而走者及见司隶僚属皆欢喜不自胜老吏或垂涕曰不图今日复见汉官威仪 歟音忽】昔爲管将鲍中奔吴隔秦一生欲报主百代期荣亲其事竟不就哀哉难重陈卧病宿松山【繆本作古松滋】苍茫【繆本作山】空四邻风云激壮志枯槁惊常伦闻君自天来目张气益振亚夫得剧孟敌【一作七】国空【一作定】无人扞虱对桓公愿得论悲辛大块方噫气何辞鼓青苹斯言傥不合归老汉江滨【韵会将与也管鲍事见三卷注曹植求自试表事父尚於荣亲吕向注荣亲谓爵禄名誉太平寰宇记舒州宿松县本汉皖县地元始中爲松滋县属庐江晋武平吴以荆州有松滋县遂改爲宿松县左思诗荆轲饮燕市酒酣气益振史记条侯时乘六乘传会兵荥阳至洛阳见剧孟喜曰七国反吾乘传至此不自意全又以爲诸侯已得剧孟剧孟今无动吾据荥阳以东无足忧者晋书桓温入关王猛披褐诣之一面谈当世之事扞虱而言旁若无人庄子大块噫气其名爲风宋玉风赋风生於地起於青苹之末】

其二【一作书怀重寄张相公】

本家【一作家本】陇西人先爲汉边将功略盖天地名飞青云上苦战竟不侯当【萧本作富】年颇惆怅世传崆峒勇气激金风壮英烈遗厥孙百代神犹王十五观奇书作赋凌相如龙顔惠殊宠麟阁凭天居【一作侍从承明庐】晚途未云已蹭蹬遭谗毁想像晋末时崩腾胡尘起衣冠陷锋镝戎虏盈【一作荆棘生】朝市石勒窥神州刘聪【一作曜】劫【一作役】天子抚剑夜吟啸雄心日千里誓欲斩鲸鲵澄清洛阳水六合【一作三台】洒霖雨万物【一作六合】无凋枯我挥一杯水自笑何区区【繆本作驱驱】因人耻成事贵欲决良图灭虏不言功飘然陟【一作向】方壶惟有安期舄留之沧海隅【唐书宗室世系表李氏出自嬴姓其後有仲翔爲河东太守征西将军讨叛羌於素昌战没葬陇西狄道东川因家焉仲翔生伯考陇西河东二郡太守伯考生尚成纪令尚生广前将军广二子长曰当户次曰敢

郎中令关内侯敢生禹禹生丞公河南太守丞公生先蜀郡北平太守先生长宗渔阳丞长宗生君况博士议郎太中大夫况生本郎中侍御史本生次公巴郡太守西夷校尉次公生轨魏临淮太守司农卿轨生隆长安令积弩将军隆生艾晋骁骑将军魏郡太守艾生雍济北东莞二郡太守雍生二子长曰伦次曰柔北地太守柔生弇前凉天水太守武卫将军安西亭侯弇生昶凉太子侍讲昶生暲西凉武昭王兴圣皇帝云云太白爲兴圣皇帝九世孙故以广爲祖李陵报苏武书陵先将军功略盖天地义勇冠三军刘良注先将军广也功绩谋略甚大可盖於天地道德指归论名在青云之上史记李广尝与望气王朔燕语曰自汉击匈奴广未尝不在其中而诸部校尉以下材能不及中人然以击胡军功取侯者数十人广不爲後人然无尺寸之功以得封邑者何也岂吾相不当侯耶且固命也尔雅太平之人仁丹穴之人智大蒙之人信崆峒之人武郭璞注地气使之然也史记正义括地志云崆峒山在肃州福祿县东南六十里又云笄头山一名崆峒山在原州高平县西百里按通典原州平高县有崆峒山岷州溢乐县有崆峒山肃州福祿县有崆峒山是有三崆峒山也惟岷州汉时属陇西郡张景阳诗金风扇素节李善注西方爲秋主金故秋风曰金风也诗大雅貽厥孙谋世说见子嵩在其中常自神王汉书蜀有司马相如作赋甚弘丽温雅杨齐贤曰龙顔惠殊宠言召见之时御手调羹步辇降迎事也刘琨表猥蒙天恩光授殊宠鲍照诗层阁肃天居刘良注高阁肃然天子之居谢灵运诗崩腾永嘉末逼迫太元始吕延济注崩腾破坏貌梁书衣冠髡锋镝之下老幼粉戎马之足晋书孝怀帝纪永嘉五年六月癸未刘曜王弥石勒同寇洛川王师频爲所败死者甚衆丁酉刘曜王弥入京师帝开华林园门出河阴藕池欲幸长安爲曜等所追及曜等遂焚烧宫庙逼辱妃后百官士庶死者三万余人帝蒙尘於平阳刘聪以帝爲会稽公左传右抚剑左援带後汉书斯诚雄心尚武之几先志翫兵之日徐陵册陈王九锡文屠戮於中原斩鲸鲵於蒙汜後汉书时冀州饥荒盗贼羣起乃以范滂爲清诏使按察之滂登车揽轡有澄清天下之志左思诗俯仰生容华咄嗟复凋枯广雅区区小也史记毛遂曰公等録録所谓因人成事者也十六国春秋勉思良图自求多福蓬壶蓬菜也见明堂赋注安期爲已见二卷注又南方草木状番禺东有涧涧中生菖蒲皆一寸九节安期生采服仙去但留玉舄焉】

闻谢杨儿吟猛虎词因有此赠

同州隔秋浦闻吟猛虎词晨朝来借问知是谢杨儿【同州隔秋浦谓同在池州而所隔者祇一秋浦之水也秋浦水在池州府城西南八十里见八卷注】

宿清溪主人【清溪在池州详见二卷注】

夜到清溪宿主人碧岩里檐楹挂星斗枕席响风水月落西山时啾啾夜猿起【楚辞猿啾啾兮狢夜鸣吕延济注啾啾猿声】

系寻阳上崔相涣三首

邯鄲四十万同日陷长平能回造化笔或冀一人生【史记白起越韩魏而攻强赵北坑马服诛屠四十余万之衆尽之於长平之下流血成川沸声若雷遂入围邯鄲论衡秦将白起坑赵

降卒於长平之下四十万衆同时皆死沈炯自长安还至方山怆然自伤诗秦军坑赵卒遂有一人生】

其二

毛遂不墮井曾参寧【一作不】杀人虚言误公子投杼惑慈亲白璧双明月方知一玉真【西京杂记赵有两毛遂野人毛遂墮井而死客以告平原君平原君曰嗟乎天丧予矣既而知野人毛遂非平原君客也战国策曾子处费费人有与曾子同名族者而杀人人告曾子母曰曾参杀人曾子之母曰吾子不杀人织自若若顷焉人又曰曾参杀人其母织尚自若也顷之一人又告之曰曾参杀人其母惧投杼踰墙而走说文杼机之持纬者也萧士贇注太白引此自况其遭诬耳杼音紵】

其三

虚传一片雨枉作阳台神纵爲梦里相随去不是襄王倾国人【庾信诗何劳一片雨唤作阳台神旧注此一首恐非上崔相亦恐非太白之作】

巴陵赠贾舍人【唐时巴陵郡即岳州也隶江南西道唐书贾至字幼隣擢明经第解褐单父尉从玄宗幸蜀拜起居舍人知制诰历中书舍人至德中坐小法贬岳州司马宝应初召复故官】

贾生西望忆京华湘浦南迁莫怨嗟圣主恩深汉文帝怜君不遣到长沙【史记贾生年少通诸子百家之书文帝召以爲博士超迁一岁中至太中大夫後亦疏之不用其议乃以爲长沙王太傅贾生既辞往行闻长沙卑湿自以寿不得长又以谪去意不自得及渡湘水爲赋以吊屈原长沙在洞庭湖之南去巴陵又远五百五十里】

李太白集注卷十一

卷十二

钦定四库全书

李太白集注卷十二

钱塘 王琦 撰

古近体诗共二十五首

赠别舍人弟台卿之江南【按旧唐书永王璘传云璘以薛缪李台卿蔡珣为谋主其即此台卿欤太白之见辟於永王璘想斯人为之累也】

去国客行远还山秋梦长梧桐落金井一叶飞银牀觉罢揽明【缪本作把朝】镜鬓毛飒已霜良图委蔓草古貌成枯桑欲道心下事时人疑夜光因为洞庭叶飘落之【一作流浪至】潇湘令弟经济士【一作才】谪居我何伤【一作出门见我伤】潜虬隐尺【一作斗】水着论谈兴亡客【一作玄】遇王子乔口传不死方入洞过天地登真朝玉皇吾将抚尔背挥手遂翱翔【一作携手凌苍苍淮南王篇後园凿井银作牀金瓶素绠汲寒浆庾肩吾诗银牀落井桐韵会井干井上木栏也其形四角或八角又谓之银牀皆井栏也史记明月之珠夜光之璧以闇投人於道路人无不按劒相眄者何则无因而至前也楚辞洞庭波兮木叶下谢灵运诗末路值令弟又诗潜虬媚幽姿说文虬龙子有角者水经注仙人王子乔碑曰王子乔者盖上世之真人闻其仙不知兴何代也博闻道家或言颍川或言产蒙抱朴子李少君有不死之方】

醉後赠王历阳【淮南道有历阳县隶和州历阳郡】

书秃千兔毫诗裁两牛腰笔踪【萧本作纵】起龙虎舞袖拂云霄双歌【一作寄】二胡姬更奏【一作唱】远清朝举酒挑朔雪从君不相饶【晋书虽秃千兔之翰聚无一毫之筋苏颂曰诗裁两牛腰言其卷大如牛腰也梁武帝书评王右军字势雄强如龙跳天门虎卧凤阙故历代宝之永以为训甯戚歌清朝饭牛至夜半清朝犹清晨也鲍照诗日月流迈不相饶】

赠历阳褚司马时此公为稚子舞故作是诗也【缪本缺此五字】

北堂千万壽侍奉有光辉先同稚子舞更着老莱衣因为小儿啼醉倒月下归人间无此乐此乐世中稀【艺文类聚列士传曰老莱子孝养二亲行年七十婴儿自娱着五色采衣尝取浆上堂跌仆因卧地为小儿啼或弄乌乌於亲侧】

对雪醉後赠王历阳

有身莫犯飞龙鳞有手莫辨猛虎须君看昔日汝南市白头仙人隐玉壶子猷闻风动窗竹相邀共醉盃中绿历阳何异山阴时白雪飞花乱人目君家有酒我何愁客多乐酣秉烛游谢尚自能鸛鹤舞相如免脱鸛鹤裘清晨鼓棹【一作兴罢】过江去千里相思明月楼【一作他日西看却月楼】庄子疾走料虎头编虎须几不免虎口哉神仙传壶公者不知其姓名汝南费长房为市掾忽见公从远方来入市卖药常悬一空壶於屋上日入之後公跳入壶中人莫能见惟长房楼上见之知非常人乃日日自扫公座前地及供馔物公受而不辞积久长房犹不懈亦不敢有所求公知长房笃信谓长房曰至暮无人时更来长房如其言即往公语房曰见我跳入壶中时卿便可效我跳自当得入长房依言果不觉已入入後不复是壶惟见仙宫世界楼观重门阁道公左右侍者数十人公语房曰我仙人也昔处天曹以公事不勤见责因谪人间耳卿可教故得见我王子猷居山阴夜大雪眠觉开室命酌酒详见九卷注王僧孺诗半饮杯中绿古诗昼短苦夜长何不秉烛游晋书王导辟谢尚为掾始到府通谒导以其有胜会谓曰闻君能作鸛鹤舞一坐倾想宁有此理否尚曰佳便着衣帻而舞导令坐者抚掌撃节尚俯仰在中旁若无人西京杂记司马相如以所着鸛鹤裘就市人杨昌贲酒陶潜诗鼓棹路崎曲吴均诗相思自有处春风明月楼太平寰宇记江陵县湘东苑有明月楼顔之推诗云屡陪明月宴将军扈羲所造又鲍照吴歌夏口樊城岸曹公却月楼 鸛音育】赠宣城宇文太守兼呈崔侍御【唐时宣州亦谓之宣城郡隶江南西道今之寧国府也】

白若白鹭鲜清如清唳蝉受气有本性不为外物迁饮水箕山上食雪首阳巔回车避朝歌掩口去盗泉迢嶢广成子倜傥鲁仲连卓絶二公外丹心无间然【隋书食货志是岁翟雉尾一值十缣白鹭鲜半之登封县志箕山在县东南二十五里高大四絶其形如箕山北为黄城许由隐处也又名许由山颍水自山阴东流而去世称箕颖虚岩幽壑茂草平林即当盛暑亦无炎蒸之气旁为弃瓢岩昔许由隐箕颖间以手掬水饮之人遗一瓢得以操饮饮讫挂木上风 吹历历有声由以为烦弃之岩下故名弃瓢岩洗耳泉在其西元和郡县志首阳山在河南府偃师县西北二十五里太平寰宇记首阳山在偃师县西北三十五里阮籍诗云步出上东门北望首阳岑下有采薇士上有嘉树林山上有夷齐祠诗国风采苓采苓首阳之巔食雪事无考汉书邑号朝歌墨子回车晋灼曰纣作朝歌之音朝歌者不时也顔师古曰朝歌殷之邑名也淮南子云墨子非乐不入朝歌水经注盗泉出卞城东北卞山之阴尸子曰孔子至於胜母暮矣而不宿於盗泉渴矣而不饮恶其名也故论语撰考讖曰水名盗泉仲尼不 即斯泉矣淮南子曾子立廉不饮盗泉广成子鲁仲连俱见二卷注迢嶢喻其品之高迈倜傥美其才之不羈三国志管寧德行卓絶海内无偶 唳音例】昔攀六龙飞今作百链铅怀恩欲报主投佩向北燕弯弓绿弦开满月不憚坚闲骑骏马猎一射两虎穿回旋若流光转背若双鸛胡虜三叹息兼知五兵权枪枪突云将却掩我之妍多逢剿絶儿先着祖生鞭据鞍空矍铄壮志竟谁宣蹉跎复来归忧恨坐相煎无风难破浪失计长江边危苦惜颓光金波忽三圆时游敬亭上闲听松风眠或弄宛溪月虚舟信洄沿顔公二【繆本作三】十万尽付酒家钱兴发每取之聊向醉中仙过此无一事静谈秋水篇【六龙已详八卷注百链铅言其柔铅性不能刚经百链则益柔矣袁淑诗投佩出甘泉吕延济注投佩谓去官也虞世南诗绿沈明月弦张华诗腾超如激电回旋如流光白帖後魏托跋翰从太宗游白登东北有双鸛飞鸣於上太宗命左右射之莫能中鸛旋飞稍高翰因而自射之二箭下双鸛太宗嘉之赐御弓矢以旌之号曰射鸛都尉郑康成周礼注郑司农云五兵者戈殳戟酋矛夷矛又云车之五兵郑司农所云者是也

步卒之五兵则无夷矛而有弓矢晋书刘琨与祖逖为友闻逖被用与亲旧书曰吾枕戈待旦志梟逆虏常恐祖生先吾着鞭其意气相期如此後汉书马援披甲上马据鞍顾盼以示可用帝笑曰矍铄哉是翁也宋书宗慤曰愿乘长风破万里浪李峤诗穷纪送颜光汉书月穆穆以金波顔师古注言月光穆穆若金之流波也李善文选注宣城郡图经曰敬亭山在宣城县北十里南史陶弘景特爱松风庭院皆植松每闻其响欣然为乐一统志宛溪在寧国府城东源出峰阳山其流清澈陶潜诗虚舟纵逸棹谢灵运诗水涉尽洄沿洄逆水而上也沿顺水而下也宋书顔延之在寻阳与陶潜情款後为始安郡经过日日造潜每往必酣饮致醉临去留二万钱与潜潜悉送酒家稍就取酒庄子有秋水篇】君从九卿来水国有丰年鱼盐满市井布帛如云烟下马不作威水壶照清川霜眉邑中叟皆美太守贤时时慰风俗往往出东田竹马数小兒拜迎白鹿前含笑问使君日【一作早】晚可回旋遂【一作还】归池上酌掩抑清风弦曾标横浮云【一作游云端】下抚谢眺肩楼高碧海出树古青萝悬【唐以太常光禄卫尉宗正太仆大理鸿臚司农太府为九卿见通典顔延年诗水国周地险云烟多貌陈植诗文钱亿万采帛若烟云鲍照诗清如玉壶水陆机诗清川含藻影谢眺为宣城太守有游东田诗後汉书郭汲为并州牧始至行部到西河美稷有童儿数百各骑竹马道次迎拜汲问兒曹何自远来对曰闻使君到喜故迎汲辞谢之及事讫诸儿复送至郭外问使君何日当还汲谓别驾从事计日当告之行部既还先期一日汲为违信於诸儿遂止於野亭须期乃入艺文类聚谢承後汉书曰郑弘为临淮太守行春有两白鹿随车夹轂而行弘怪问主簿黄国鹿为吉凶国拜贺曰闻三公车幡画作鹿明府当为宰相後弘果为太尉谢眺诗已有池上酌复此风中琴李周翰注池上酌谓酌酒池上也萧士贇曰曾标言其标致之高也】光禄紫霞盃伊昔忝相传良图扫沙漠别梦绕旌旄富贵日成疎愿言杳无缘登龙有直道倚玉阻芳筵敢献绕朝策思同郭泰船何言一水浅似隔九重天崔生何傲岸纵酒复谈玄身为名公子英才苦迍邅鸣凤托高梧凌风何翩翩安知慕羣客弹剑拂秋【一作青】莲【後汉书李膺独持风裁以声名自高士有被其容接者名为登龙门章怀太子注以鱼为喻也龙门河水所下之口在今绛州龙门县辛氏三秦记曰河津一名龙门水险不通鱼鼈之属莫能上江海大鱼薄集龙门下数千不得上上则为龙也世说魏明帝使后弟毛曾与夏侯玄共坐时人谓兼葭倚玉树左传士会乃行绕朝赠之以策杜预注策马挝临别授之马挝并示已所策以展情後汉书郭泰字林宗游於洛阳始见河南尹李膺膺大奇之遂相友善於是名震京师後归乡里衣冠诸儒送至河上车数千两林宗惟与李膺同舟而济衆宾望之以为神仙楚辞圜则九重孰营度之王逸注言天圆而九重孰营度而知之乎十六国春秋子陵颉颃於光武君平傲岸於蜀肆纵酒纵适而饮酒也史记田广与酈生日纵酒晋书苻融谈玄论道虽道安无以出之左思诗英雄有迍邅由来自古昔韵会迍邅难行不进之貌马融广成颂栖凤凰於高梧鲍照诗岂念慕羣客咨嗟恋景沉】

赠宣城赵太守悦

赵得宝符盛山河功业存三千堂上客出入拥平原六国扬清风英声何喧喧大贤茂远业虎竹光南藩错落千丈松虬龙盘古根枝下无俗草所植惟兰荪【史记赵世家简子告诸子曰吾藏宝符於常山上先得者赏诸子驰之常山上求无所得母恤还曰已得符矣简子曰奏之母恤曰从常山上临代代可取也简子於是知母恤贤以为太子简子卒母恤代立是为襄子

遂兴兵平代地平原君传平原君赵胜者赵之诸公子也诸子中胜最贤喜宾客宾客盖至者数千人相赵惠文王及孝成王三去相三复位封於东武城虎竹谓铜虎符竹使符汉时郡守分其半与之详见五卷塞下曲注东方朔七谏闻南藩乐而欲往王逸注南国诸侯为天子藩蔽故称藩也此用其字以称宣城宣城在南藩故曰南藩世说庾子嵩日和峤森森如千丈松虽磊砢有节目施之大厦有栋梁之用沈约诗今守馥兰荪刘良注兰荪香草也诗意以千丈松喻平原君兰荪喻赵太守谓英豪之後其子孙自多俊异也】忆在南阳时始承国士恩公为柱下史脱绣归田园伊昔簪白笔幽都逐游魂持斧佐【萧本作冠】三军霜清天北门差池宰两邑鸛立重飞翻焚香入兰台起草多芳言夔龙一顾重矫翼凌翔鹄赤县扬雷声强项闻至尊惊飈摧【萧本作頽】秀木迹屈道弥敦出牧历三郡所居猛兽奔【唐时之南阳郡即邓州也属山南东道战国策豫让曰智伯以国士遇臣臣故以国士报之史记张苍秦时为御史主柱下方书索隐曰周秦皆有柱下史谓御史也所掌及侍立恒在殿柱之下故老聃为周柱下史汉书苍自秦时为柱下御史通典侍御史於周为柱下史老聃尝为之秦时张苍为御史主柱下方书亦其任也章怀太子後汉书注武帝置绣衣御史通典魏置御史八人当大会殿中御史簪白笔侧陞而坐帝问左右此何官何主辛毗曰此为御史旧时簪笔以奏不法当如今者直备位但眊笔耳淮南子南至交趾北至幽都汉书天兵四临幽都先加顔师古注幽都北方谓匈奴太平寰宇记晋地道记曰幽州因幽都以为名山海经有幽都之山今列於北荒矣郑樵尔雅注幽都即幽州在今燕北史劾寇游魂於北狡贼负险於南汉书武帝末军旅数发郡国盗贼羣起绣衣御史暴胜之使持斧逐捕盗贼以军兴从事诛二千石以下潘岳诗驱役宰两邑政绩竟无施埤雅鸛性好峙故每立更不移处所谓鸛立义取诸此汉书御史中丞在殿中兰台掌图籍秘书外督部刺史内领侍御史通典御史所居之署後汉以来谓之御史台亦谓之兰台寺谢朓诗平生一顾重通典大唐县有赤畿望紧上中下七等之差京都所治为赤县京之旁邑为畿县其余则以户口多少资地美恶为差胡三省通监注唐制凡置都其郭下县为赤县余县为畿县通监辨误唐之西京以长安万年为赤县东都以河南洛阳为赤县後汉书董宣为洛阳令时湖阳公主苍头白日杀人因匿主家吏不能得及主出行而以奴骖乘宣於夏门亭候之叱奴下车因格杀之主即还宫诉帝帝使宣叩头谢主宣不从强使顿之宣两手据地终不肯俯帝因敕强项令出荀子天子者势位至尊无敌於天下陆机诗惊飈蹇反信李康运命论木秀於林风必摧之陈子昂诗清静道弥敦後汉书刘昆迁弘农太守先是崤崤驿道多虎灾行旅不通昆为政三年仁化大行虎皆负子渡河庾信诗昆阳猛兽奔】迁人同卫鹤谿上懿公轩自笑东郭履侧惭狐白温闲吟步竹石精义忘朝昏顛顛成丑士风云何足论猕猴骑士牛羸马夹双辕愿借羲和【萧本作皇】景为人照覆盆溟海不震【萧本作振】荡何由纵鹏鷖所期要津日【萧本作玄津白】倜傥假腾骞【左传卫懿公好鹤鹤有乘轩者杜预注轩大夫车也孔穎達正义服虔曰车有藩曰轩史记东郭先生久待诏公车贫困饥寒衣敝履不完行雪中履有上无下足尽践地道中人笑之东郭先生应之曰谁能履行雪中令人视之其上履也其履下处乃似人足者乎王微诗诘忆无衣苦但知狐白温吕向注狐白谓狐腋之白毛以为裘也陆机诗玄冕无丑士三国志注世语曰司马宣王辟周泰泰频丧考妣祖九年居丧宣王留缺待之至三十六日擢为新城太守宣王为泰会使尚书鍾繇调泰君释褐登宰府三十六日擢麾盖守兵马郡乞儿乘小车一何驶乎秦曰诚有此君名公之子少有文采故守吏职猕猴骑士牛又何迟也广雅曰御谓之羲和抱朴子是责三光不照覆盆之内也列子终髮之北有溟海者天池也有鱼焉其广数千里其长称焉其名为鯢

有鸟焉其名为鹏翼若垂天之云其体称焉世岂知有此物哉大禹行而见之伯益知而名之夷坚闻而识之古诗何不策高足先据要路津吕向注要路津谓仕宦居要职者亦如进高足居於要津则人出入由之广韵騫飞举貌】

赠从弟宣州长史昭【按宣州在唐为上州上州之长史为从五品官】

淮南【一作北】望江南千里碧山对我行倦【一作尽】过之半落青天外宗英佐雄郡水陆相控带长川豁中流千里泻吴会君心亦如此包纳无小大摇笔起风霜推诚结仁爱讼庭垂桃李宾馆罗轩盖何意苍梧云飘然忽相会才将圣不偶命与时俱背独立山海间空老圣明代知音不易得抚剑增感慨【缪本作槩】当结九万期中途莫先退【唐时之淮南道江南道皆古扬州之境中隔一江江之北为淮南江之南为江南汉书河间贤明礼乐是修为汉宗英三国志孙贲传时策已平吴会二郡又朱桓传使部伍吴会二郡知吴会者是吴郡与会稽也然此诗所称吴会专指吴地而言盖在春秋战国时为吴会在秦汉为会稽郡後又分为吴郡合而言之曰吴会也归藏启筮曰有白云出自苍梧入於大梁庄子抟扶摇羊角而上者九万里 吴会之会古外切音脰相会之会本音】

於五松山赠南陵常赞府【南陵县唐时隶江南西道之宣州一统志五松山在池州铜陵县南五里铜陵在唐为南陵县之铜官治南唐时始分置铜陵县隶昇州宋改隶池州容斋随笔唐人呼县丞为赞府】

为草当作兰为木当作松兰幽【缪本作秋】香风远松寒不改容松兰相因依萧艾徒丰茸鸡与鸡并食鸾与鸾同枝?珠去沙砾但有珠相随远客投名贤真堪写怀抱若惜方寸心待谁可倾倒虞卿弃赵相便与魏齐行海上五百人同日死田横当时不好贤岂传千古名愿君同心人於我少留情寂寂还寂寂出门迷所适长铗归来乎【缪本作长剑归来乎来一作长剑歌归来】秋风思归客【谢灵运诗蒲稗相因依长门赋罗丰茸之游树李善注丰茸衆饰貌说文砾小石也谢灵运诗欢娱写怀抱史记范睢传秦昭王遗赵王书曰范君之仇魏齐在平原君之家王使人疾持其头来不然吾举兵而伐赵赵孝成王乃发卒围平原君家急魏齐夜亡出见赵相虞卿虞卿度赵王终不可说乃解其相印与魏齐亡又田儋传汉灭项籍立为皇帝田横与其徒属五百余人入居海岛中高帝闻之以为田横兄弟本定齐齐人贤者多附焉今在海中不收恐後为乱乃使使赦田横罪而诏之横乃与其客二人乘传诣洛阳未至三十里至尸乡廐置自刭令客奉其头从使者驰奏之高帝为之流涕拜其二客为都尉发卒二千人以王者礼葬田横既葬二客穿其塚旁孔皆自劲下从之高帝闻之乃大惊以田横之客皆贤吾闻其余尚五百人在海中使使召之至则闻田横死亦皆自杀於是乃知田横能得士也战国策齐人有冯煖者贫乏不能自存使人属孟尝君愿寄食门下左右以君贱之也食以草具居有顷倚柱弹其剑歌曰长铗归来乎食无鱼孟尝君曰食之比门下之客居有顷复弹其剑歌曰长铗归来乎出无车孟尝君曰为之驾比门下之车客後有顷复弹其剑铗歌曰长铗归来乎无以为家孟尝君使人给其食用无所乏茸音戎砾音力】

自梁园至敬亭山见会公谈陵阳山水兼期同游因有此赠【一统志梁园在开封府城东南

一名梁苑汉梁孝王游赏之地敬亭山在寧国府城北十里江南通志陵阳山自石埭县西北迤 而来三峯连亘东接宣州西二峯下有黄鹤池昔窆子明跨鹤飞昇於此有丹池即子明链丹处】

我随秋风来瑶草恐衰歇中途寡名山安得弄云月渡江如昨日黄叶向人飞敬亭慙素尚弭棹流清辉冰谷明且秀陵峦抱江城粲粲吴与史衣冠耀天京水国饶英奇潜光卧幽草会公真名僧所在即为宝开堂振白拂高论横青云雪山扫粉壁墨客多新文为余话幽栖且述陵阳美天开白龙潭月映清秋水黄山望石柱突兀谁开张【一作白柱插星汉西崖谁开张】黄鹤久不来子安在苍茫东南安可穷山鸟飞絶处【繆本作山鸟絶飞处一作猿猱絶行处】稠叠千万峰相连入云去闻此期振策归来空闭关相思如明月可望不可攀何当移白足早晚凌苍山且寄一书札令予解愁顔【江淹诗瑶草正翳蒨张载诗下车如昨日江淹诗弭棹阻风雪李善注弭止也范云诗岱山饶灵异水国富英奇後汉书商山四皓有园公夏黄公潜光隐耀世嘉其高十六国春秋佛图澄天竺人也本姓帛氏少出家清真务学诵经数百万言石虎倾心事澄乃下书曰和尚国之大宝荣爵不加高禄不受荣禄匪顾何以旌德法华经手执白拂侍立左右雪山扫粉壁谓画雪山於粉壁之上墨客多新文谓文墨之客多以新文赞美之会公盖工於绘事者也宋书幽栖穹谷外缘两絶杨齐贤曰白龙潭在宣州世传窆子明弃官学遁钓得白龙放之於此因名白龙潭江南通志黄山在徽州歙县西北二百八十里寧国府太平县南三十里山当二郡之界高一千三百七十丈盘互三百里旧名黟山唐天宝间勅改今名以图经称为轩辕栖真之所故也上多古木灵药其泉香美清温冬夏不变沐浴饮之百疾皆愈有三十六峯三十六泉石柱山在寧国府旌德县西六十里双石挺立而一巨石承之名豹子尖列仙传陵阳子明者銓乡人也好钓鱼於旋溪钓得白龙子明惧解钓拜而放之後得白鱼腹中有书教子明服食之法子明遂上黄山采五石脂沸水而服之三年龙来迎去止陵阳山上百余年山去地千余丈大呼山下人令上山半告言溪中子安当来问子明钓鱼在否後二十余年子安死人取葬石山下有黄鹤来栖其塚边树鸣呼子安云陆机诗振策涉崇丘按轡遵平莽张铣注振举也策鞭也法苑珠林前魏太武时沙门昙始甚有神异常坐不卧五十余年足不涉履跣行泥秽中奋足便净色白如面俗呼曰白足阿练古诗客从远方来遗我一书札张铣注札笔也琦按顔师古汉书注札木简之薄小者也古时未有纸故书於札以为笔者恐未是】

赠友人三首

兰生不当户别是闲庭草夙被霜露欺红荣已先老谬接瑶华枝结根君王池顾无馨香美叨沐清风吹余芳若可佩卒岁长相随【陈琳诗嘉木凋緑叶芳草殲红荣楚辞折疎麻兮瑶华王逸注瑶华玉华也古诗冉冉孤生竹结根泰山阿史记优哉游哉维以卒岁】

其二

?中赵匕首买自徐夫人玉匣闭霜雪经燕复历秦其事竟不捷沦落归沙尘持此愿投赠与君同急难【一作岁寒】荆卿一去後壮士多摧残长号易水上为我扬波澜凿井当及泉张帆

当济川廉夫惟重义骏马不劳鞭人生贵相知何必金与钱【史记太子豫求天下之利匕首得赵人徐夫人?首取之百金乃装为遣荆卿索隐曰徐姓夫人名谓男子也余详四卷结客少年场注西京杂记高祖斩白蛇剑刃上常如霜雪】

其三

慢世薄功业非无胸中画谿浪万古贤以为儿童剧立产如广费匡君怀长策但苦北山寒谁知道南宅岁酒上逐风霜鬓两边白蜀主思孔明晋家望安石时来【萧本作人】列五鼎谈笑期一掷虎伏避胡尘渔歌游海滨敝裘耻妻嫂长剑托交亲夫子秉家义羣公难与邻莫持西江水空许东溟臣他日青云去黄金报主人【嵇康司马相如赞长卿慢世越礼自放诗国风谿浪笑傲三国志孙策与周瑜同年独相友善瑜推道南大宅以舍策升堂拜母有无通共梁元帝诗滩声下溅石猿鸣上逐风又云长条垂拂地轻花上逐风诸葛孔明详见九卷注谢安石详见七卷注刘孝标辨命论开东阁列五鼎汉书音义张晏曰五鼎食牛羊豕鱼麋也诸侯五卿大夫三战国策苏秦说秦王说十上而说不行墨貂之裘敝去秦而归至家妻不下紵嫂不为炊父母不与言长剑托交亲用冯煖事详见本卷注庄子庄周家贫往贷粟於监河侯监河侯曰诺我将得邑金将贷子三百金可乎庄周曰周昨来有中道而呼者周顾视车辙中有鲋鱼焉周问之曰鲋鱼来子何为者耶对曰我东海之波臣也君岂有升斗之水而活我哉周曰诺我且南游吴越之王激西江之水而迎子可乎鲋鱼忿然作色曰吾失我常与我无所处吾得升斗之水然活耳君乃言此曾不如早索我於枯鱼之肆】

陈情赠友人

延陵有宝剑价重千黄金观风历上国暗许故人深归来挂坟松万古知其心懦夫感遼节壮士激青衿【缪本作壮气激素衿】鲍生荐夷吾一举致齐相斯人无良朋岂有青云望临财不苟取推分固辞让後世称其贤英风邈难尚论交但若此有【当作友】道孰云丧多君骋逸藻掩映当时人舒文振颓波秉德冠彝伦卜居乃此地共井为比隣清琴弄云月美酒娱冬春薄德中见捐忽之如遗尘英豪未豹变自古多艰辛他人纵以疎君意宜独亲奈何成离居相去复几许飘风吹云霓蔽目不得语投珠冀有【萧本作相】报按剑恐相拒所思采芳兰欲赠隔荆【一作修】渚沉忧心若醉积恨泪如雨愿假东壁辉余光照贫女【新序延陵季子将西聘晋带宝剑以过徐君徐君观剑不言而色欲之季子为有上国之使未献也然其心许之矣致使於晋顾返而徐君死於楚於是脱剑致之嗣君从者止之曰此吴国之宝非所以赠也延陵季子曰先日吾来徐君观吾剑不言而其色欲之吾为有上国之使未献也虽然吾心许之矣今死而不进是欺心也爱剑伪心廉者不为也遂脱剑致之嗣君嗣君曰先君无命孤不敢受剑於是季子以剑带徐君墓树而去徐人嘉而歌之曰延陵季子兮不忘故脱千金之剑兮挂坟墓鲍照诗我方历上国诗国风青青子衿毛传曰青衿青领也学子之所服史记管夷吾者颖上人也少时尝与鲍叔牙游鲍叔牙知其贤管仲贫困尝欺鲍叔鲍叔终善遇之不以为言已而鲍叔事齐公子小白管仲事公子纠及小白立为桓公公纠死管仲囚焉鲍叔进管仲管仲既用任政於齐齐桓公以霸九合诸侯一匡天下管仲曰吾始困时常与鲍叔贾分财利多自与鲍叔不以我为贪知我贫也徐勉诗壮思如泉涌逸藻似云翔顔延年诗舒

文广国华张铄注舒其文章周礼大司徒职云五家为比遂人职云五家为邻郑玄注郑司农云田野之居其比伍之名与国中异制故五家为邻玄谓异其名者示相变耳释名五家为伍以五为名也又谓之邻邻连也相连接也又曰比相亲比也汉书徙入舍祭竈请比邻周易君子豹变古诗同心而离居离骚飘风屯其相离兮帅云霓而来御王逸注回风为飘飘风无常之风以兴邪恶之象也云霓恶气也以喻佞人史记明月之珠夜光之璧以闇投入於道路人无不按剑相眄者何则无因而至前也陆机诗沉忧萃我心张铄注沉深也诗国风行迈靡靡中心如醉魏武帝诗惋叹泪如雨列女传齐女徐吾者齐东海上贫妇人也与邻妇李吾之属会烛相从夜绩徐吾最贫而烛数不属李吾谓其属曰徐吾烛数不属请无与夜徐吾曰一室之中益一人烛不为暗损一人烛不为明何爱东壁之余光不使贫女得蒙见爱之恩长为妾役之事使诸君常有惠施於妾不亦可乎李吾莫能应遂复与夜终无後言】

赠从弟冽

楚人不识凤重【一作高】价求山鸡献主昔云是今来方觉迷自居漆园北【萧本作地】久别【萧本作识】咸阳西风飘落日去节变流莺啼桃李寒未开幽关岂来蹊逢君发花萼若与青云齐及此桑叶绿春蚕起中闺日出布【缪本作拨】谷鸣田家拥锄犁顾余乏尺土东作谁相携传说降霖雨公输造云梯羌戎事未息君子悲涂泥报国有长策成功羞执珪无由谒明主杖策还蓬藜他年尔相访知我在磻溪【太平广记楚人有担山鸡者路人问曰何鸟也担者欺之曰凤凰也路人曰我闻凤凰久矣今真见之汝卖之乎曰然乃酬十金弗与请加倍乃与之方将献楚王经宿而鸟死路人不遑恤其金惟恨不得以献王国人传之咸以为真凤而贵宜欲献之遂闻於楚王王感其欲献已也召而厚赐之过买凤之价十倍出笑林太平寰宇记漆园城在曹州冤句县北五十里庄周为吏之所城北有庄周钓台又濠州定远县有漆园在县东三十里其地东西南北约方三百步唐天宝中尚有漆树一二十株野火燔烧其树在故县村西一百步即楚国庄周为吏之处今为陇亩一统志漆园在凤翔府定远县东三十里即庄生为吏之处又云漆园城在山东曹县西北五十里庄生为漆园吏即此又云漆园城在大名府东明废县东北二十里今名漆园村内有庄子庙盖庄周为吏之所据二书漆园有三此所云者当指曹州漆园也史记桃李不言下自成蹊何逊诗伊我念幽关夫君思赞务谢瞻诗花萼相光饰吕延济注花萼喻兄弟也禽经鸣鸠戴胜布谷也张华注扬雄曰鸣鸠戴胜生树穴中不巢生尔雅曰鵲戴鵲即首上胜也头上尾起故曰戴胜农事方起此鸟飞鸣於桑间云五谷可布种也故曰布谷又云此鸟鸣时耕事方作农人以为候广韵锄田器也犁垦田器也尚书平秩东作孔安国传岁起於东而始就耕谓之东作汉书方东作时应劭注东作耕也颜师古注春位在东耕者始作故曰东作尚书说命若岁大旱用汝作霖雨淮南子公输天下之巧士作云梯之械设以攻宋高诱注云梯攻城具高长上与云齐故曰云梯左传使吾子辱在泥涂久矣吕氏春秋得伍员者爵执圭高诱注周礼侯执信圭言爵之为侯也又高诱淮南子注楚爵功臣赐以圭谓之执圭比附庸之君也汉书迁为执珪张晏注侯伯执珪以朝位比之後汉书遂杖策归乡里水经注磻溪中有泉谓之兹泉泉水潭积自成渊渚即吕氏春秋所谓太公钓兹泉也今人谓之凡谷石壁深高幽篁邃密林嶂秀阻人迹罕及东南隅有石室盖太公所居也水流次平石钓处即太公垂钓之所其投竿跪饵两膝遗迹犹存是有磻溪之称也其水清冷神异北流十二里注於渭通典扶风郡虢县有磻溪太公钓鱼於此

礲音盪】

赠间丘处士

贤人有素业乃在沙塘陂竹影扫秋月荷衣【霏玉本作花】落古池闲读山海经散帙卧遥帷且耽田家乐遂旷【一作广】林中期野酌劝芳酒园蔬烹露葵如能树桃李为我结茅茨【江南通志沙塘陂在宿松城外唐间丘处士筑别业於此李太白有诗赠之云云吴越春秋禹巡行四渚与益夔共谋行到名山大泽召其神而问之山川脉理金玉所有鸟兽昆虫之类及八方之民俗殊国异域土地里数使益疏而记之名之曰山海经谢灵运诗散帙问所知刘良注散帙谓开书帙也说文帙书衣也按古时书卷必有帙包之如裹袱之类或以细竹为帘裘以薄缯藏古书画家尚存此制江淹诗泛琴卧遥帷宋玉讽赋炊雕胡之饭烹露葵之羹尔雅翼古者葵称露葵今摘葵必待露解语曰触露不掐葵日中不剪韭各有宜也按本草葵一名露葵今谓之滑菜古人以为常馔四时皆可食六七月种者为秋葵八九月种者为冬葵正二月种者为春葵有紫茎白茎二种大叶小花花紫黄色其实大如指头皮薄而扁今人不复食种者亦鲜汉书茅茨不剪颜师古注屋盖曰茨茅茨以茅覆屋也释名屋以草盖曰茨茨次也次草为之也 帙音侄】

赠钱徵君少阳【一作送赵云卿】

白玉一盃酒绿阳三月时春风余几日两鬓各成丝秉烛惟须饮投竿也未迟如逢渭水【许本作川】猎犹可帝王师【古诗昼短苦夜长何不秉烛游投竿谓投竿於水而钓也周文王猎於渭水之阳遇太公望载与俱归立为师见四卷注杨齐贤曰少阳年八十余故方之太公】

赠宣州灵源寺仲【缪本作冲】潜公

敬亭白云气秀色连苍梧下映双溪水如天落镜湖此中积龙象独许潜公殊风韵逸江左文章动海隅观【一作了】心同水月解领得明珠今日逢支遁高谈出有无【敬亭山苍梧白云已见本卷注一统志双溪在宁国府城下二水合流释子中能负荷大法者谓之龙象翻译名义大论云那伽或名龙或名象是五千阿罗汉诸罗汉中最大力以是故言如龙如象水行中龙力最大陆行中象力最大中阿含经佛告邬陀夷若沙门等从人至天不以身口意害我说彼是龙象胡三省通监注江郢阳南徐之地为江左豫南兖南豫之地为江右通雅金陵居长江下流前朝有江南者皆都之据金陵而言则江南居左尚书海隅日出罔不率俾水月谓水中月影非有非无了不可执慧者观心亦复如是解领解悟也明珠喻菩提大道也晋书沙门支遁以清谈着名於时风流胜贵莫不崇敬以为造微之功足参诸正始僧肇维摩诘经注不可得而有不可得而无者其惟大乘行乎欲言其有无相无名欲言其无万德斯行万德斯行故虽无而有有无相无名故虽有而无然则言有不乖无言无不乖有或说有行或说无行有无虽殊其致一也潜音峻】

赠僧朝美

水客凌洪波长鲸涌溟海百川随龙舟?吸【繆本作噏】竟安在中有不死者探得明月珠高价倾宇宙余辉照江湖苞卷金缕褐萧然若空无谁人识此宝窃笑有狂夫了心何言说各勉黄金躯【吴都赋长鲸吞航修鲛吐浪刘渊林注异物志曰鲸鱼长者数千里小者数十丈雄曰鲸雌曰鲛或死於沙上得之者皆无目俗言其目化为明月珠水经注北眺巨海杳冥无极天际两分白黑方别所谓溟海者也海赋鱼则横海之鲸突兀孤游茹鳞甲吞龙舟噏波则洪连蹙踏吹滂则百川倒流淮南子龙舟鷁首浮吹以娱高诱注龙舟大舟也刻为龙文以为饰也隋书波斯多金缕织成楞严经汝之心灵一切明了若汝现成所明了心实在身内谢朓诗遂铄黄金躯陈子昂诗之子黄金躯如何此荒域 诗言水客泛舟大海舟为长鲸所?吸遂遭溺没其中乃有不死者反於海中得明月之珠卷而藏之不自眩耀人亦不识以喻人在烦恼海中为一切嗜慾所汨没醉生梦死飘流无极乃其中有不昧本来者反於烦恼海中悟得如来法宝其价则倾乎宇宙其光则照乎江湖卷而怀之不自以为有而若空无者然人皆不能识此宝而惟我能识之夫心既明了更无言说可以酬对惟有劝勉珍重此躯而已盖人身难得六道之中以人道为最是此躯之重等於黄金未可轻忽故曰各勉黄金躯也又按後汉书西方有神名曰佛其形长丈六尺而黄金色各勉黄金躯者是勉以修道成佛之意】

赠僧行融

梁有【繆本作曰】汤惠休常从鲍照游峩眉史怀一独映陈公出卓絶二道人结交凤与麟行融亦俊发吾知有英骨海若不隐珠骊龙吐明月大海乘虚舟随波任安流赋诗旃檀阁纵酒鸚鵡洲待我适东越相携上白楼【宋书时有沙门释惠休善属文辞采绮艶徐湛之与之厚善世祖命使还俗本姓汤位至扬州从事史鲍照有秋日示休上人及答休上人诸诗卢藏用陈子昂别传友人赵贞固凤阁舍人陆余庆殿中侍御史毕构监察御史王无竞亳州长史房融右史崔泰之处士郭襄微道人史怀一皆笃岁寒之交崔顥赠怀一上人诗法师东南秀世实豪家子削发十二年诵经峩嵎里是史怀一为峩嵎僧也三国志管寧德行卓絶海内无偶西京赋海若游乎玄渚薛综注海若海神也庄子夫千金之珠必在九重之渊而骊龙颌下陆德明注骊龙黑龙也谢灵运诗溟涨无端倪虚舟有超越李周翰注轻舟而进曰虚舟沈佺期香山寺诗旃檀晓阁金舆度鸚鵡晴林彩仗分元和郡县志鸚鵡洲在鄂州江夏县西南二里东越即会稽也施宿会稽志府城卧龙山南旧传有白楼亭今遗址无所考诗用支道林事详见十卷赠僧崖公注 骊音离】

赠黄山胡公求白鸛【并序 张华禽经注白鸛似山鸡而色白行止闲暇黄山志白鸛性耿介难畜雄采而文素角玄英二角壮时隆起出英上有时靡缩盖因气鼓而後壮也觜爪皆赤其羽末黑文如洒戢若缘袈又如界地锦惟尾按二茎无缙文斑如也志中亦载李白向黄山胡公求白鸛事以胡公名晖未详何据存之以广异闻】

闻黄山胡公有双白鸛盖是家鸡所伏自小驯狎了无惊猜以其名呼之皆就掌取食然此鸟耿介尤难畜之予平生酷好竟莫能致而胡公辍赠於我惟求一诗闻之欣然适会宿意因援

笔三叫文不加点以赠之【郭璞尔雅注以笔灭字为点南史刘儒尝在御座为李赋受诏便成文不加点】

请以双白璧买君双白鹇白鹇白如锦白雪耻容颜照影玉潭里刷毛琪树间夜栖寒月静朝步落花闲我愿得此鸟翫之坐碧山胡公能辍赠笼寄野人还【孔颖达礼记正义素锦白锦也白鹇毛羽白质黑边有似锦文故曰白如锦虞騫诗泠泠玉潭水山海经崑仑墟之北有琪树】

登敬亭山南望怀古赠窦主簿

敬亭一回首目尽天南端仙者五六人常闻此游盘谿流琴高水石耸麻姑坛白龙降陵阳黄鹤呼子安羽化骑日月云行翼鸾下视宇宙间四溟皆波澜汰【缪本作决】絶目下事从之复何难百岁落半途前期浩漫漫强食不成味清晨起长叹愿随子明去链火烧金丹【元和郡县志敬亭山在宣州宣城县北十二里即谢朓赋诗之所阮籍诗仙者四五人逍遥宴兰房江南通志琴高山在寧国府泾县北二十里昔琴高於此山修炼得道故名有隐雨岩是其控鲤上昇之所岩下有炼丹洞洞旁有钓台台下流水即琴溪也每岁上巳前後数日溪中出小鱼谓之琴鱼传为仙人药渣所化九域志宣州宣城郡有花姑山亦谓之麻姑山昔麻姑修道於此上昇有仙坛在焉江南通志麻姑山在寧国府城东三十五里峰峦奇秀作镇郡东昔麻姑修道於此飈举有仙坛丹竈剑池石碁枰钓鱼台天游亭诸迹水经注水出阳陵山下径陵阳县西为旋溪水昔县人阳子明钓得白龙处後三年龙迎子明上陵阳山山去地千余丈後百余年呼山下人令上山半与语溪中子安问子明钓鱼所在後二十年子安死山下有黄鹤栖其塚树常鸣呼子安庄子乘云气骑日月而游乎四海之外张协诗雨足洒四溟李善注四溟四海也曹植诗盛年处房室中夜起长叹抱朴子夫金丹之为物烧之愈久变化愈妙黄金入火百链不消埋之毕天不朽服此二药链人身体故能令人不老不死一统志丹台在陵阳山中峰之半平夷可容数人相传窦子明尝炼丹其上】

经乱後将避地剡中留赠崔宣城【剡中即剡县唐时为越州会稽郡之属邑隶江南东道宣城县为宣州宣城郡之属邑隶江南西道】

双鷺飞洛阳五马渡江徼何意上东门胡雏更长啸中原走豺虎烈火焚宗庙太白昼经天颓阳掩余照王城皆荡覆世路成奔峭四海望长安嘔眉寡西笑苍生疑落叶白骨空相吊连兵似雪山破敌谁能料我垂北溟翼且学南山豹崔子贤主人欢娱每相召胡牀紫玉笛却坐青云叫杨花满州城置酒同临眺忽思剡溪去水石远清妙雪昼天地明风开湖山貌闷为洛生咏醉发吴越调赤霞动金光日足森海峽独散万古意闲垂一溪钓猿近天上啼人移月边棹无以墨绶苦来求丹砂要华髮长折腰将贻陶公诮【晋书五行志孝怀帝永嘉元年二月洛阳东北步广里地陷有苍白二色鷺出苍者飞翔冲天白者止焉陈留董养曰步广周之狄泉盟会地也白者金色国之行也苍为胡象其可尽言乎是後刘元海石勒相继乱华太安中童谣曰五马游渡江一马化为龙後中原大乱宗藩多絶惟琅琊汝南西阳南顿彭城同至江东而元帝嗣统矣史记索隐张揖云徼塞也以木栅水为蛮夷界顔师古汉书注徼犹塞也东北

谓之塞西南谓之徼塞者以障塞为名徼者取徼遮之义晋书石勒年十四随邑人行贩洛阳倚啸上东门王衍见而异之顾谓左右曰向者胡雏吾观其声视有奇志恐将为天下之患张载诗季叶丧乱起盗贼如豺虎唐书安禄山陷两京宗庙皆焚毁汉书太白经天天下革政孟康注谓出东入西出西入东也太白阴星出东当伏东出西当伏西过午为经天晋灼注日阳也日出则星亡昼见午上为经天文献通考肃宗至德二载七月巳酉太白昼见经天至於十一月戊午不见历秦周楚郑宋燕之分谢瞻诗颓阳照通津夕阴暖平陆颓阳落日也艺文类聚桓谭新论曰关东鄙语曰人闻长安乐出门向西笑後汉书举首嚬眉之感汉书欲令久连兵无决列女传南山有玄豹雾雨七日而不下食者何也欲以泽其毛而成文章也故藏而远害王粲诗愿我贤主人与天享巍巍胡三省通监注胡牀今谓之交牀其制本自虜来隋恶胡字改曰交牀唐犹谓之胡牀今之交椅是也十六国春秋凉州人胡据盗发张骏墓得赤玉箫紫玉笛薛方山浙江通志剡溪在绍兴府嵊县南一名戴溪溪有二源一出天台一出武义西南流至东阳入剡南北流入上虞界以达於江晋王徽之雪夜由此溪访戴逵世说人问顾长康何以不作洛生咏荅曰何至作老婢声刘孝标注洛下书生咏音重浊故云老婢声释名山銳而长曰峤贾公彦周礼疏汉法丞相中二千石金印紫绶御史大夫二千石银印黄绶县令六百石铜印墨绶南史陶潜为彭泽令郡遣督邮至县吏白宜束带见之潜叹曰我不能为五斗米折腰向乡里小儿即日解印绶去职赋归去来以遂其志 徼音教】

献从叔当涂宰阳冰【唐江南西道宣州有当涂县宣和书谱李阳冰字少温赵郡人官至掾作少监善词章留心小篆迨三十年初见李斯峰山碑与仲尼延陵季子字遂得其法乃能变化开合自名一家推原字学作笔法论以别其点画又尝立说谓於天地山川得其方圆流峙之形於日月星辰得其经纬昭回之度近取诸身远取万类幽至鬼神情状细至於喜怒之舒惨莫不毕载後人不足以明此於是误谬滋多义理扫地虽李斯之博雅以束为束蔡邕之知书以丰作丰故孔壁之余文汲冢之旧简所存无几幸天未丧斯文宗旨在已其自许慎至是作刊定说文三十卷以纪其学人指以为苍颉後身方时顔真卿以书名世真卿书碑必得阳冰题其额欲以擅连璧之美盖其篆法妙天下如此议者以虫蚀鸟迹语其形风行雨集语其势太阿龙泉语其利嵩高华岳语其峻实不为过论有唐三百年以篆称者惟阳冰独步】

金镜霾六国亡新乱天经焉知高光起自有羽翼生萧曹安 岷耿贾摧橈枪吾家有季父杰出圣代英虽无三台位不借【萧本作惜】四豪名激昂风云气终協龙虎精弱冠燕赵来贤彦多逢迎鲁连善【繆本作擅】谈笑季布折公卿【北堂书钞尚书考灵曜云秦失金镜鱼目入珠注曰金镜喻明道也汉书王莽以戊辰直定即真天子位定有天下之号曰新後溪书亡新侈僭渐以即真庄子乱天之经逆物之情萧何曹参佐汉高以平天下耿弇贾复辅光武以定乱离 岷不安也详三卷注中尔雅彗星为橈枪郭璞注亦谓之孛言其形孛孛如帚彗春秋含汉孛三公在天法三台九卿法北斗汉书列国公子魏有信陵赵有平原齐有孟尝楚有春申皆藉王公之势竞为游侠鸡鸣狗盗无不宾礼皆以取重诸侯显名天下搃擊而游谈者以四豪为称首周易云从龙从虎孔穎達正义龙是水畜云是水气故龙吟则景云出是云从龙也虎是威猛之兽风是震动之气亦是同类相感故虎啸则谷风生是风从虎也礼记二十曰弱冠孔颖達正义二十成人初加冠礼体犹未壮故曰弱也左太冲诗吾慕鲁仲连谈笑却秦军详见二卷注史记单于尝为书嫚吕后吕后大怒召诸将议之上将军樊噲曰臣愿

得十万衆横行匈奴中诸将皆阿吕后意曰然季布曰樊哙可斩也夫高帝将兵四十余万衆困於平城今哙奈何以十万衆横行匈奴中面欺且秦以事於胡陈胜等起今疮痍未瘳哙又面谀欲动摇天下是时殿上皆恐太后罢朝遂不复议匈奴事 霾音埋櫜初衔切插平声音同櫜枪音撑】遥知礼数絶常恐不合并惕想结宵梦素心久已冥顾慙青云器谬奉玉樽倾山阳五百年緑竹忽再荣高歌振林木大笑喧雷霆落笔洒篆文崩云使人惊吐辞又炳焕五色罗华星秀句满江国高才揆天庭【任昉诗平生礼数絶式瞻在国桢李周翰注礼数絶谓交道相得虽品命有异不为礼数王粲诗何惧不合并顔延年诗仲容青云器江淹诗共惜玉樽暮三国志注魏氏春秋曰嵇康寓居河内之山阳县与陈留阮籍河内山涛河南向秀藉兄子咸琅邪王戎沛人刘伶相与友善游於竹林号为七贤按阮籍叔侄与嵇康为竹林之游不知是何年而康之死在魏景元二年以後顺数而下至唐肃宗上元二年共得五百年竹林之游相去亦不过在此时博物志薛谭学讴於秦青未穷青之旨遂辞归秦青乃饯於郊衢抚节悲歌声振林木响遏行云鲍照飞白书势铭轻如游雾重似崩云昭明太子锦带书笔阵引崩云之势魏文帝诗丹霞夹明月华星出云间上天垂光采五色一何鲜蜀都赋摘藻揆天庭吕向注揆犹盖也揆舒瞻切闪去声】宰邑艰难时浮云空古城居人若薙草扫地无纤茎惠泽及飞走农夫尽归耕广汉水万里长流玉琴声雅颂播吴越还如太阶平【说文薙除草也陈书两藩毗庶扫地无遗宋书政事修理惠泽沾被後汉书恩信寛泽仁及飞走诗国风汉之广矣不可泳思称汉水曰广汉本此而非陇西之广汉郡也当涂之江与汉水殊远然汉水之下流亦由当涂而过诗意取子贱弹琴而单父治之意谓玉琴之声与长流万里汉水之声相应盖亦倒装句法也太阶平详见一卷明堂赋注薙音雉又音替】小子别金陵来时白下亭羣凤怜客鸟差池相哀【霏玉本作爱】鸣各拔五色毛意重太山轻赠微所费广斗水浇长鲸弹剑歌苦寒严风起前楹月衔天门晓霜落牛渚清长叹即归路临川空屏营【图经白下亭在上元县北景定建康志旧志白下亭驿亭也旧在城东门外国李太白献从叔当涂宰阳冰诗曰小子别金陵来时白下亭留别金陵诸公诗曰五月金陵西祖予白下亭又云驿亭三杨树正当白下门按此亭在府西盖新旧各在一处旧志所指是其新者耳诗国风燕燕于飞差池其羽郑笺曰差池其羽谓张舒其尾翼也苦寒行古清商曲也因行役遇寒而作元和郡县志博望山在宣州当涂县西三十五里与和州对岸江西岸山曰梁山两山相望如门俗谓之天门山山上皆有却月城宋车骑将军王玄谟所筑牛渚山在宣州当涂县北三十五里山突出江中谓之牛渚圻古津渡处也旧唐书牛渚山一名采石在当涂县北三十五里大江中後汉书夙夜屏营章怀太子注屏营彷徨也屏府盈切音并】

书怀赠南陵常赞府【南陵赞府已见本卷注】

岁星入汉年方朔见明主调笑当时人中天谢云雨一去麒麟阁遂将朝市乖故交不过门秋草日上阶当时何特达独与我心谐置酒凌歊台欢娱未曾歇歌动白紵山舞回天门月问我心中事为君前致辞君看我才能何似鲁仲尼大圣犹不遇小儒安足悲云南五月中频丧渡泸师毒草杀汉马张兵夺秦【萧本作云】旗至今西二【一作洱】河流血拥僵屍将无七擒略鲁女惜园葵咸阳天下【缪本作地】枢累岁人不足虽有数斗玉不如一盘粟赖得契宰衡持钓慰风俗自顾无所用辞家方未【萧本作来】归霜惊壮士髮泪满逐臣衣以此不安席蹉跎身【萧本作因】世违终当灭卫谤不受鲁人讥【太平广记东方朔未死时谓同

舍郎曰天下人无能知朔知朔者惟太王公耳朔卒後武帝得此语召太王公问之曰尔知东方朔乎对曰不知公何所能曰颇善星历帝问诸星皆具在否曰诸星具在独不见岁星十八年今复见耳帝仰天叹曰东方朔生在朕旁十八年而不知是岁星哉图经凌歊台在当涂县城北黄山上宋武帝南游尝登此台因建离宫焉太平寰宇记黄山在太平州当涂县西北五里上有宋凌歊台周围五里一百步高四十丈石碑现存白苎山在当涂县东五里本名楚山桓温领妓游此山奏乐好为白苎歌因改为白苎山天门山已见上首注江淹诗小儒安足为关中之地古秦地也故谓关中兵旗曰秦旗唐书天宝十载四月壬午剑南节度使鲜于仲通及云南蛮战於西洱河败绩大将王天运死之十三载六月剑南节度留後李宓及云南蛮战於西洱河死之按西洱河即叶榆河也出云南大理府之点苍山滙为巨湖周三百里亦曰西洱海传云以形如人耳故名三国志注汉晋春秋曰诸葛亮至南中所在战捷闻孟获者为夷汉所服募生致之既得使观於营阵之间问曰此军何如获对曰向者不知虚实故败今蒙赐观营阵若祇如此即定易胜耳亮笑纵使更战七纵七擒亮犹遣获获止不去曰公天威也南人不复反矣列女传鲁漆室邑之女过时未适人当穆公时君老太子幼女倚柱而嘯其邻人妇从之游谓曰何嘯之悲也子欲嫁耶吾为子求偶漆室女曰嗟乎吾岂为不嫁不乐而悲哉吾忧鲁君老太子幼邻女笑曰此乃鲁大夫之忧妇人何与焉漆室女曰不然昔晋客舍吾家系马园中马逸驰走践吾葵使我终岁不食葵今鲁君老悖太子少愚奸伪日起夫鲁国有患者君臣父子皆被其祸祸及衆庶妇人独安所避乎吾甚忧之子乃曰妇人无与者何哉邻妇谢曰子之所虑非妾所及三年鲁果乱齐楚攻之鲁连有寇男子战鬪妇人转输不得休息袁淑诗秦地天下枢李善注枢要也汉书加安汉公号曰宰衡应劭注周公为太宰伊尹为阿衡采伊周之尊以加莽也後人称宰相为宰相本此旧唐书天宝十二载八月京城霖雨米贵令出太仓米十万五减价粿与贫人十三载秋霖雨积六十余日京城垣屋颓坏殆尽物价暴贵人多乏食令出太仓米一百万石开塲贱粿以济贫民 歊音器】

赠汪伦【杨齐贤曰白游泾县桃花潭村人汪伦常醞美酒以待白伦之裔孙至今宝其诗】

李白乘舟将欲行忽闻岸上踏歌声桃花潭水深千尺不及汪伦送我情【按通监唐记阎知微为虜踏歌胡三省注蹋歌者连手而歌蹋地以为节也一统志桃花潭在寧国府泾县西南一百里深不可测唐汝询曰伦一村人耳何亲於白既醞酒以候之复临行以祖之情固超俗矣太白於景切情真处信手拈出所以调絶千古後人效之如欲问江深浅应如远别情语非不佳终是杞柳杯棬】

李太白集注卷十二

卷十三

钦定四库全书

李太白集注卷十三

钱塘 王琦 撰

古近体诗共二十五首

安陆白兆山桃花岩寄刘侍御绾【一作春归桃花岩贻许侍御太平寰宇记白兆山在安州安陆县西三十里一统志白兆山在德安府城西三十里下有桃花岩及李太白读书堂绾乌板切穹上声】

云卧三十年好闲复爱仙蓬壶虽冥绝鸾凤心悠然归来桃花岩得憩云窗眠【一作幼采紫房谈早爱沧溟仙心迹颇相误世事空徂迁归来丹崖曲得憩青霞赋】对岭人共语饮潭猿相连时昇翠微上邈若罗浮巅两岑抱东壑一嶂横西天树杂日易隐崖倾月难圆芳草换野色飞萝摇春烟入远构石室选幽开山田独此林下意杳无区中缘永辞霜台【一作绣衣】客千载方来旋【鲍照诗云卧恣天行拾遗记蓬壶蓬莱也埤雅猿不践土好上茂木渴则接臂而饮尔雅翼猿好攀援其饮水辄自高崖或大木上累累相接下饮饮毕复相收而上翠微者山未及顶上而在旁坡陀之处详见十卷注太平寰宇记广州增城县东有罗浮山浮水出焉是为浮山与罗山并体故曰罗浮非羽化莫有登其极者嶮尖之峰四百四十有二同归於罗山上则三峰争竦各五六千仞其穴冥然莫测其极北通句曲之山茅君内传云第七洞名朱明耀真之天璿房瑶室七十有二 嶮穹窿自然云竦尔雅山小而高岑邢昺疏山形虽小而高嶮崐者名岑也韵会嶮山峰如屏障者谢灵运诗缅邈区中缘张凤翼注区中世间也缘尘缘也霜台御史台也详十一卷注】

淮南卧病书怀寄蜀中赵徵君蕤【唐书地理志淮南道寿州寿春郡本淮南郡天宝元年更名唐书艺文志赵蕤字太宾梓州人开元中召之不赴有长短要术十卷北梦琐言赵蕤者梓州盐亭人博学铃韬长於经世夫妻俱有节操不受交辟撰长短经十卷王霸之道见行於世四川志赵蕤盐亭人隐於梓州郪县长平山安昌岩博考六经诸家同异着长短经十卷明王霸大略其文亦申鉴论衡之流凡六十三篇又注关朗易传明皇屡徵之不就李白尝造其庐访焉】

吴会一浮云飘如远行客【一作万里无主人一身独为客】功业莫从就岁光屡奔迫良图俄弃捐衰疾乃绵剧古琴藏虚匣长剑挂空壁楚怀奏锺仪越吟比庄舄【二句一作卧来恨已久兴发思逾积又萧本上句作楚冠怀锺仪】国门遥天外乡路远山隔朝忆相如台夜梦子云宅旅情初结缡【一作如结骨】秋气方寂历风入松下清露出草间白故人不可见幽梦谁与适【一作故人不在此而我谁与适】寄书西飞鸿赠尔慰离析【魏文帝诗西北有

浮云亭亭如车盖惜哉时不遇适与飘风会吹我东南行行行至吴会潘岳诗人居天地间飘若远行客左传晋侯观於军府见锺仪问之曰南冠而縶者谁也有司对曰郑人所献楚囚也使税之问其族对曰泠人也公曰能乐乎对曰先父之职官也敢有二事使与之琴操南音范文子曰乐操土风不忘旧也杜预注南音楚声王粲登楼赋庄舄显而越吟详见九卷赠崔侍御诗注初学记王褒益州记曰司马相如宅在州西笮桥北百步许李膺云市桥西二百步得相如旧宅今海安寺南有琴台故墟太平寰宇记益部耆旧传云相如宅在少城中笮桥下北百余步是也有琴台在焉今为金花寺成都志相如琴台在城外浣花溪之海安寺南今为金花寺元魏伐蜀下营於此掘堑得大瓮二十余口盖所以响琴也太平御览成都记曰成都县南百步有扬雄宅今草玄亭遗迹尚存太平寰宇记子云宅在益州少城西南角一名草玄堂一统志扬雄宅在成都府城内西南内有草玄堂及墨池今成都县治即其地也江淹诗寂历百草晦李善注寂历凋疎貌谢灵运诗路阻莫赠问云何慰离析何晏论语注不可聚会曰离析】

寄弄月溪吴山人

尝闻龐德公家住洄【萧本作洞】湖水终身栖鹿门不入襄阳市夫君弄明月灭影清淮里高踪邈难追可与古人比清扬杳莫覩白云空望美待我辞人间携手访松子【後汉书龐公者南郡襄阳人也居岷山之南未尝入城府夫妻相敬如宾荆州刺史刘表数延请不能屈乃就候之後携其妻子登鹿门山因采药不反章怀太子注襄阳记曰司马德操年小德公十岁兄事之呼作龐公故俗人谓龐公是德公名非也鹿门山旧名苏岭山建武中襄阳侯习郁立神祠於山刻二石鹿夹神道口俗因谓之鹿门庙遂以庙名山也洄湖事无所考证孟浩然诗亦有闻就龐公隐移居近洄湖之句按酈道元水经注蔡洲大岸西有洄湖停水数十亩长数里广减百步水色常綠杨仪居上洄杨顥居下洄与蔡洲相对在岷山南广昌里云云与後汉书岷山之南相合岂洄湖即洄湖之讹欤然道元不言洄湖为德公所居而以渔梁洲为德公所居则又未敢据也谢灵运山居赋广灭影於崆峒许遁音於箕山傅咸诗岂不企高踪麟趾邈难追诗国风有美一人清扬婉兮毛萇传清扬眉目之间松子赤松子也详见六卷注又抱朴子赤松子以玄虫血渍玉为水而服之能乘烟上下真诰我之所师南岳松子松子为太虚真人左仙公】

秋山寄卫尉张卿及王徵君【卫尉卿见九卷注】

何以折相赠白花青桂枝月华若夜雪见此令人思虽然剡溪兴不异山陰时明发怀二子空吟招隐诗【沈约诗月华临静夜夜静灭氛埃晋书王徽之尝居山陰夜雪初霁月色清朗四望浩然独酌酒咏左思招隐诗忽忆戴逵逵时在剡便夜乘小船诣之经宿方至造门不前而反人问其故徽之曰本乘兴而来兴尽而返何必见安道耶明发犹明早也详见二卷注】

望终南山寄紫阁隐者【史记正义括地志云终南山一名中南山一名太乙山一名南山一名橘山一名楚山一名秦山一名周南山一名地肺山在雍州万年县南五十里图书编终南乃关中南山西起陇东踰商洛绵亘千里有余其南北亦然随地异名总言之则曰南山耳

西安志紫阁峰乃终南山之一峰也详见五卷注】

出门见南山引领意无限秀色难为名苍翠日在眼有时白云起天际自舒卷心中与之然托兴每不浅何当造幽人灭迹栖絶巘【後汉书昔人之隐遭时则放声灭迹巢栖茹薇张协七命发絶巘遡长风张铣注絶巘高峰也 巘语蹇切年上声】

夕霁杜陵登楼寄韦繇【元和郡县志杜陵在京兆府万年县东南二十里胡三省通监注自汉宣帝起杜陵邑至後汉为县属京兆隋迁京城并杜陵入大兴县唐改大兴曰万年】

浮阳灭霁景万物生秋容登楼送远目伏槛观羣峰原野旷超缅关河纷错【萧本作杂】重清晖映竹日【一作水竹】翠色明云松蹈海寄遐想还山迷旧踪徒然迫晚暮未果谐心曾结桂空伫立折麻恨莫从【一作采菊竞谁举游兰恨莫从】思君达永夜长乐闻疎钟【张协诗浮阳映翠林吕向注浮阳日光也谢灵运诗浮阳灭清晖楚辞坐堂伏槛临曲池些王逸注槛楯也鲍照诗绮肴纷错重楚辞结桂枝兮延伫王逸注延长也伫立也结木为誓长立而望也楚辞折疏麻兮瑶花将以遗兮离居谢灵运诗行觞奏悲歌永夜继白日徐陵玉台新咏序厌长乐之疎钟三辅黄图长乐宫本秦之兴乐宫也高皇帝始居栢阳七年长乐宫成徙居长安城三辅旧事宫殿疏皆云兴乐宫秦始皇造汉修饰之周回二十里】

秋夜宿龙门香山寺奉寄王方城十七丈奉国莹【萧本作营】上人从弟幼成令问【河南通志龙门山在河南府城西南三十里两山对峙东曰香山西曰龙门石壁峭立伊水出其间故又名伊阙左氏传晋赵鞅纳王使女寛守阙塞服虔谓南山伊阙是也杜预注洛阳西南伊阙口也而今谓龙门矣壁间石佛大小数百皆後魏及唐时所凿香山寺在龙门山上後魏时建白居易修香山寺记洛阳四郊山水之胜龙门首焉龙门十寺游观之胜香山首焉唐山南东道之唐州有方城县】

朝发汝海东暮栖龙门中水寒夕波急木落秋山空望极九霄迴赏幽万壑通目皓沙上月心清松下【一作里】风玉斗横【一作生】网户银河耿花宫兴在趣方逸欢余情未终【一作咫尺世喧隔微冥真理融】凤驾忆王子虎溪怀远公桂枝坐萧瑟【一作销歇】棣华不复同流恨【一作浪】寄伊水盈盈焉可穷【刘琨诗朝发广莫门暮宿丹水山枚乘七发南望荆山北望汝海李善注汝称海大言之也郭璞山海经注汝水出南阳鲁阳县大孟山东北至河南梁县东南经襄城颍川汝南至汝陰褒信县入淮梁简文帝诗夕波照孤月九霄即九天也详见明堂赋注玉斗即北斗色明朗如玉故曰玉斗网户门扉上刻为方目如罗网状若今之隔亮也楚辞网户朱缀刻方连些详见明堂赋注初学记天河亦曰银河谢朓诗秋河曙耿耿吕延济注耿耿明净也花宫佛寺也佛说法处天雨衆花故诗人以佛寺为花宫何逊诗凤驾啓千羣王子谓仙人王子乔一统志虎溪在九江府城南晋僧惠远送客过此虎辄鸣号因名道书以虎溪山为七十二福地之一鲍照诗容华坐销歇棣华详见七卷注王子以喻王方城远公以比国?上人棣华谓幼成令问二弟水经注伊水出南阳西蔓渠山东北过伊阙中又东北至洛阳县南北入於洛元和郡县志伊阙山在河南府伊阙县北四十五里两山相对望之若阙伊水流其间故名古诗盈盈一水间脉脉不得语】

春日独坐寄郑明府

蘼麦青青游子悲河堤弱柳郁金香枝长条一拂春风去尽日飘扬无定时我在河南别离久那堪对此当【萧本作坐此对】窗牖情人道来竟不来何人共醉新丰酒【邢昺尔雅疏薺一名雀麦一名燕麦本草云生故墟野林下苗似小麦而弱实似穰麦而细在处有之本草纲目燕麦野麦也燕雀所食故名宗奭曰苗与麦同但穗细长而疎唐刘梦得所谓莧葵燕麦摇荡春风者也河堤弱柳郁金香枝言弱柳之枝似郁金香之黄也本草郁金香生蜀地及西戎苗似姜黄花白质红末秋出茎心而无实其根黄赤梁元帝诗试酌新丰酒遥劝阳台人】

寄淮南友人

红颜悲旧国青岁歇芳洲不待金门诏空持宝剑游海云迷驿道江月隐乡楼谁作淮南客因逢桂树留【陈子昂春台引迟美人兮不见恐青岁之还遒杨齐贤曰青岁犹青春也汉书东方朔传待诏金门稍得亲近三辅黄图东方朔主父偃严安徐乐皆待诏金马门淮南王招隐士词桂树丛生兮山之幽攀援桂树兮淹留】沙丘城下寄杜甫【杨齐贤曰赵有沙丘宫在钜鹿此沙丘当在鲁琦按在钜鹿者乃沙丘台赵於其地作宫故有沙丘宫非沙丘城也太平寰宇记莱州掖县有沙丘城殷纣所筑始皇崩处夫纣所筑始皇崩处古今皆指在钜鹿者是不云在莱州乐史所证亦误据此诗而约其地当与汶水相近唐书杜甫字子美襄阳人少贫不自振客吴越齐赵间李邕奇其才先往见之举进士不中第困长安天宝十三载玄宗朝献太清宫飧庙及郊甫奏赋三篇帝奇之使待制集贤院擢河西尉不拜改右卫率府胄曹参军至德二年拜右拾遗出为华州司户参军严武节度劔南东西川表为参谋检校工部员外郎】

我来竟何事高卧沙丘城城边有古树日夕连秋声鲁酒不可醉齐歌空复情思君若汶水浩荡寄南征【庄子鲁酒薄而邯郸围谢朓诗婵娟空复情一统志汶水其源有三一发泰山之旁仙台岭一发莱芜县原山之阳一发莱芜县寨子村至泰安州静封镇合马名曰堑汶西南流与徂徕山之阳小汶河合又西南流注洸河入济按水经有五汶北汶羸汶柴汶浯汶牟汶名虽有五而其流则同】

闻丹丘子於城北山【箫本缺山字】营石门幽居中有高风遗迹仆离羣远怀亦有栖遁之志因叙旧以寄之

春华【一作弄】沧江月秋色碧海云离居盈寒暑对此长思君思君楚水南望君淮山北梦魂虽飞来会面不可得畴昔在嵩阳同衾卧羲皇緑萝笑簪绂丹壑贱岩廊晚涂各分析乘兴任所适仆在雁门关君为峨眉客心悬万里外影滞两乡隔长劔复归来相逢洛阳陌陌上何喧喧都令心意烦迷津觉路失托势随风翻以兹谢朝列长啸归故园【古诗同心而离居忧伤以终老礼记予畴昔之夜郑玄注畴发声也昔犹前也嵩阳嵩山之阳羲皇犹云自谓是羲皇上人鲍照诗妍容逐丹壑汉书游於岩廊之上文颖曰岩廊殿下小屋也晋灼曰廊堂边庑岩廊谓岩峻之廊也韵会岩廊殿旁高庑也太平寰宇记雁门关在宪州东南六十里属天池

县雁门乡其关东临汾水西倚高山接岚朔州一统志雁门关在山西马邑县东南七十里东西山岩峭拔中有路盘旋崎岖絶顶置关南通代州元和郡县志峨嵋山在嘉州峨眉县西七里蜀都赋云抗峨眉於重阻两山相对望之如峨眉故名此山亦有洞天石室高七十六里吴均诗陌上何喧喧匈奴围塞垣谢灵运诗脱冠谢朝列潘岳诗长啸归东山】故园恣闲逸求古散缥帙久欲入【一作寻】名山婚娶殊未毕人生信多故世事岂惟一念此忧如焚怅然若有失闻君卧石门宿昔契弥敦方从桂树隐不羨桃花源高风【缪本作凤】起遐旷幽人迹复存松风清瑶瑟溪月湛芳樽安居偶佳赏丹心期此论【徐陵玉台新咏序开兹缥帙散此緗编後汉书向长字子平隐居不仕建武中男女娶嫁既毕敕断家事勿相关当如我死於是遂肆意与同好北海禽庆俱游五岳名山不知所终沈约诗早欲寻名山期待婚嫁毕谢灵运诗中饮顾宿心怅焉若有失淮南王招隐士桂树丛生兮山之幽桃花源见二卷注刘孝绰诗华茵藉初卉芳樽散绪寒
湛牀减切嶮上声澄也又直禁切沈去声投物水中也又子禁切音浸浸也】

淮陰书怀寄王宋城【一作宗城缪本作宗成

唐书地理志淮南道楚州淮陰郡有淮陰县河南道宋州睢阳郡有宋城县】

沙墩至梁苑二十五长亭大舶夹双艚中流鷺鸕鸣云天扫空碧川岳涵余清飞鳧从西来适与佳兴并眷言王乔舄婉变故人情复此亲懿会而增交道荣沿洄且不定飘忽怅徂征暝投淮陰宿欣得漂母迎斗酒烹黄鸡一餐感素诚予为楚壮士不是鲁诸生有德必报之千金耻为轻緡书羈孤意远寄棹歌声【按通典宋城县即汉睢阳县其地有汉梁孝王兔园平台雁鷺池长亭即斥堠也古制十里一长亭二十五长亭则二百五十里矣唐书释音舶大舟櫓与櫓同鷺鸕鸣谓舟人喧?有似鷺鸕之声耳王乔舄详见十一卷注後汉书婉变龙姿章怀太子注婉变犹亲爱也谢庄月赋亲懿莫从李善注亲懿懿亲也左氏传富辰曰兄弟虽有小忿不废懿亲杜预曰懿美也沿逆流而上也汨顺流而下也陆机诗驾言远徂征漂母事已见六卷注琦按太白因在淮陰故用淮陰古事为喻所谓楚壮士者正指韩信而言杨氏以淮陰侯传中辱信少年当之未是史记叔孙通使徵鲁诸生三十余人谢庄月赋羈孤逋进李善注羈孤羈客孤子也西京赋纵棹歌李善注棹歌引棹而歌也 舶音白变音恋】

闻王昌龄左迁龙标遥有此寄【唐书王昌龄字少伯江寧人第进士补校书郎又中宏辞迁汜水尉不护细行贬龙标尉以世乱还乡里为刺史闾丘晓所杀昌龄工诗绪密而思清时谓王江宁云汉书周昌传吾极知其左迁顔师古注是时尊右而卑左故谓贬秩位为左迁唐书地理志黔中道叙州潭阳郡有龙标县】

杨花落尽【一作扬州花落】子规啼闻道龙标过五溪我寄愁心与明月随风【缪本作君】直到夜郎西【通典五溪一辰溪二酉溪三巫溪四武溪五沅溪今黔中道谓之五溪又云五溪中地归汉以後列代开拓今播州涪川夜郎义泉龙溪溱溪等郡地】寄王屋山人孟大融【河南通志王屋山在怀庆府济源县西北九十里接山西平阳府垣曲县及泽州阳城县界山有三重其状如屋或曰以其山形如王者车盖故名或曰山空其中列仙居之其内广阔如王者之宫也其絶顶曰天坛山峰突兀即济水发源处常有云气覆之轮囷纷郁雷雨在其

下相传古仙灵朝会之所其东峰曰日精其西峰曰月华道书谓之清虚小有洞天唐司马承祯修道於此】

我昔东海上劳山餐紫霞亲见安期公食枣大如瓜中年谒汉主不惬还归家朱颜谢春晖白髮见生涯所期就金液飞步登云车愿随夫子天坛上闲与仙人扫落花【太平寰宇记莱州即墨县有大劳山小劳山按郡国志云吴王夫差登之得灵宝度人经晏谟齐记云太山虽言高不如东海劳昔郑康成领徒於此山高二十五里周回八十里在县东南三十八里山东通志劳山在莱州府即墨县东南六十里海滨山有二其一高大曰大劳山其一差小曰小劳山二山相联又名牢盛山秦始皇登牢盛山望蓬莱即此处顔延年诗本自餐霞人李周翰注餐霞仙者之流真诰九华真妃曰日者霞之实霞者日之精君惟闻服日之法未知餐霞之精也夫餐霞之经甚秘致霞之道甚易此谓体生玉光霞映上清之法也史记李少君曰臣常游海上见安期生安期生食巨枣大如瓜抱朴子金液太乙所服而仙者也合之用古秤黄金一斤并用玄明龙膏太乙旬首中石冰石紫游女玄水液金化石丹砂封之百日成水真经云金液入口则其身皆金色郭璞诗翹手攀金梯飞步登玉阙洛神赋载云车之容裔刘良注神以云为车】忆旧游寄譙郡元参军【唐时所称譙郡即亳州也隸河南道】

忆昔洛阳董糟丘为余天津桥南造酒楼黄金白璧买歌笑一醉累月轻王侯海内贤豪青云客就中与君【一作与君一见】心莫逆回山转海不作难倾情倒意无所惜【天津桥在河南县北洛水上详见二卷注蜀都赋乐饮今夕一醉累月庄子子桑户孟子反子琴张三人相与为友曰孰能相与於无相与相为於无相为孰能登天游雾挠挑无极相忘以生无所终穷三人相视而笑莫逆於心遂相与友】我向淮南攀桂枝君留洛北愁梦思不忍别还相随相随迢迢访仙城三十六曲水回萦一溪初入千花明万壑度尽松风声银鞍金络到【萧本作倒】平地汉东太守来相迎紫阳之真人邀我吹玉笙浪霞楼上动仙乐嘈然宛似鸾凤鸣袖长管催欲轻举汉中太守醉起舞【一作汉东太守酣歌舞】手持锦袍覆我身我醉横眠枕其股当筵意气凌九霄星离雨散不终朝分飞楚关山水遥余既还山寻故巢君亦归家度渭桥【淮南王招隐士攀援桂枝兮聊淹留李善文选注凡草木花实荣茂谓之明枝叶凋伤谓之晦早延年诗银鞍何煜爚陌上桑古辞骢马金络头唐时汉东郡即随州也隶山南东道汉中郡即梁州也本名汉川天宝元年始更名汉中隶山南西道紫阳先生於随州苦竹院置餐霞楼详见三十卷紫阳碑铭毛茛诗传自旦及食时为终朝史记索隐渭桥有三所一在城西北咸阳路曰西渭桥一在东北高陵路曰东渭桥其中渭桥在故城之北】君家严君勇貔虎作尹并州遏戎虏五月相呼渡太行摧轮不道羊肠苦行来北凉【当作京】岁月深感君贵义轻黄金琼杯绮食青玉案使我醉饱无归心时时出向城西曲晋祠流水如碧玉浮舟弄水箫鼓鸣微波龙鳞莎草绿兴来携妓恣经过其若杨花似雪何红【一作鲜】糝欲醉宜斜日【一作如花落】百尺清潭写翠娥翠娥婵娟初月辉美人更唱舞罗衣清风吹歌入空去歌曲自绕行云飞【周易家人有严君焉父母之谓也书牧誓勗哉夫子尚桓桓如虎如貔如熊如罴於商郊陆玕诗疏貔似虎或曰似熊一名执夷一名白狐其子为□辽东人谓之白罴唐书百官志开元十一年太原府置尹及少尹以尹为留守少尹为副留守旧唐书开元十一年改并州为太原府史记正义拾地志云太行山在怀州河内县北二十五里有羊肠坂又云羊肠坂道在太行山上南口怀州北口潞州李善文选注羊肠其山盘纡如羊肠魏武帝诗北上

太行山艰哉何巍巍羊肠坂诘屈车轮为之摧北凉即张掖郡按汉武帝始置张掖郡魏晋时隶凉州及沮渠蒙逊立国於此号为北凉以凉州五郡张掖在其北也唐时为甘州又谓之张掖郡然上文言并州太行下文言晋祠中间忽言北凉不合当是北京之讹耳盖天宝之初号太原为北京也张衡诗何以报之青玉案李善注玉案君所凭依刘良注玉案美器可以致食扬升庵曰古诗青玉案即盘也今以为桌非矣孟光举案即举盘也若桌安事举乎琦案周礼玉人案有十二寸史记高祖过赵赵王自持案进食万石君对案不食皆指桮禁之类而言不谓几案也元和郡县志晋祠一名王祠周唐叔圻祠也在太原府晋阳县西南十二里山西通志唐叔虞祠在太原府太原县西南十里悬瓮山之麓乃晋水发源处今谓之晋祠叔虞始受封为唐侯後改国号曰晋祠亦以名魏地形志云晋阳有晋王祠即此水经注山海经曰悬瓮之山晋水出焉今在县之西南昔智伯之遏晋水以灌晋阳其川上 後人踵其遗迹蓄以为沼沼西际山枕水有唐叔虞祠水侧有凉堂结飞梁於水上左右杂树交?希见?景至有淫朋密友羈游宦子莫不寻乐契集用相娱慰於晋川之中最为胜处汉武帝秋风辞箫鼓鸣兮发棹歌潘岳诗濫泉龙鳞澜埤雅夫须莎草也可以为笠又可以为簣疎而无温故字从沙广韵婣娟好恣恣貌高唐赋更唱迭和赴曲随流列子秦青抚节悲歌声振林木响遏行云 貔音近皮】此时行【一作欢】乐难再遇西游因献长杨赋北阙青云不可期东山白首【一作髮】还归去渭桥南头【一作渭水桥南一作渭水桥南】一遇君鄠台之北又离羣问余别恨今【萧本作知】多少落花春暮争纷纷【一作莺飞求友满芳树落花送客何纷纷】言【一作情】亦不可尽情【一作言】亦不可极呼儿长跪緘此辞寄君千里遥相忆【扬雄从成帝至射熊馆还上长杨赋详见一卷大猎赋注汉书萧何治未央宫立东阙北阙顔师古注未央殿虽南向而上书奏事谒见之徒皆诣北阙公车司马亦在此焉是以北阙为正门陶潜诗帝乡不可期太平寰宇记鄠县汉县属沛郡古今地名即鄠亭是也輿地志云魏以鄠县属譙郡汉封萧何为鄠侯茂陵书云何封国在南阳姚崇曰两县同作鄠字南阳鄠音赞沛郡鄠音嵯班固泗水亭高祖碑云文昌四友汉有萧何序功第一受封於鄠以韵而言则非南阳者音赞也锦绣万花谷鄠有二县音字多乱其属沛郡者音嵯属南阳者音赞此所云鄠台者属於譙郡当作嵯音读 唐仲言曰历叙旧游之事凡合而离者四焉在洛则我就君游适淮则君随我往并州戎马之地而携妓相遇西游落魄之余而不忘晤对叙事四转语若贯珠絶非初唐牵合之比】

月夜江行寄崔员外宗之【崔宗之事见十卷注】

飘飏【萧本作飘飘】江风起萧飒海树秋登舳美清夜挂席移轻舟月随碧山转水合青天流杳如【一作然】星河上但觉云林幽归路方浩浩徂川去悠悠徒悲蕙草歇复听菱歌愁岸曲迷後浦沙明瞰前洲怀君不可见望远增离忧【江总诗海树一边出鲍照诗登舳眺淮甸李善注李斐曰舳船前头刺櫂处也谢灵运诗挂席拾海月广韵瞰视也楚辞思公子兮徒离忧 瞰音勘】

宿白鹭洲寄杨江宁【太平御览丹阳记曰白鹭洲在县西三里隔江中心南边新林浦西边白鹭洲洲上多聚白鹭因名之唐书地理志江南东道有上元县本江宁县肃宗上元二年更名上元隶昇州江宁郡】

朝别朱雀门暮栖白鹭洲波【一作沙】光摇海月星影入城楼望美金陵率如思琼树忧徒令魂作【萧本作入】梦翻觉夜成秋绿水解人意余西北流因声玉琴里荡漾寄君愁【六朝事迹晋咸康二年作朱雀门新立朱雀浮航在县城东南四里对朱雀门南渡淮水亦名朱雀桥地志云朱雀门北对吴都城宣阳门相去六里又云朱雀门晋都城南门也按晋作新宫立三门於南面正中曰宣阳与朱雀门相对吴均诗思君甚琼树不见方离忧】

新林浦阻风寄友人【一作金陵阻风雪书怀寄杨江宁 景定建康志新林浦在城西南二十里阔三丈深一丈长十二里源出牛头山西七里入大江秋夏胜五十石舟春冬涸一统志新林浦在应天府西南二十里一名新林港】

潮水定可信天风难与期清晨西北转薄暮东南吹以此难挂席佳期益相思【一本作洄沿颇淹迟其下又多使索金陵书又叨贤宰知弦歌止过客惠化闻京师四句】海月破圆【一作团】景菰蒋生绿池昨日北湖梅开花已满枝【一作昨日北湖花初开未开枝】今朝【一作看】白【萧本作东】门柳夹道垂青丝岁物忽如此我来定【一作复】几时纷纷江上雪草草客中悲明发新林【一作板桥】浦空吟谢朓诗【潮水昼夜再来其大小早晏依期而至不爽时刻故人谓之潮信艺文类聚日将暮曰薄暮谢灵运诗挂席拾海月楚辞与佳期兮夕张谢灵运诗图景早已满梁书读中并饶菰蒋尔雅翼菰者蒋草也生水中叶如蔗荻江东人呼为茭草刈以饲马甚肥其苗有茎梗者谓之菰蒋至秋则为菰米徐爱释问晋大兴三年始创北湖筑长堤以壅北山之水东自覆舟山西至宣武城六里宋元嘉中有黑龙见因改名玄武湖江南通志玄武湖在江宁府太平门外一名蒋陵湖晋元帝始名北湖宋文帝改名习武湖元嘉中又名玄武湖白门柳详见四卷杨叛儿注庾信诗岸柳被青丝诗小雅劳人草草毛传云草草劳心也谢朓有之寅城出新林浦向板桥浦诗】寄韦南陵冰余江上乘兴访之遇寻颜尚书笑有此赠【唐时江南西道有南陵县隶宣州宣城郡唐书肃宗即位颜真卿拜工部尚书兼御史大夫乾元二年拜浙西节度使】

南船正东风北船来自缓江上相逢借问君语笑【一作声】未了风吹断闻君携妓访情人应为尚书不顾身堂上三千珠履客瓮中百斛金陵春恨我阻此乐淹留楚【一作此】江滨月色醉远客山花开欲燃春风狂杀人一日剧三年乘兴嫌太迟焚却子猷船梦见五柳枝已堪挂马鞭何日到彭泽长【一作狂】歌陶令前【身犹我也魏晋後多自称曰身史记春申君客三千余人其上客皆蹑珠履金陵春酒名也唐人名酒多以春杜子美诗云闻道云安麴米春韩退之诗且须勤买抛青春刘梦得诗鹦鹉杯中若下春白居易诗注云杭州酿酒趁梨花时熟号为梨花春国史补云酒则有荥阳之土窟春富平之石冻春剑南之烧春裴鉶传奇有松醪春之类诗国风一日不见如三岁兮王子猷乘船访戴安道陶渊明宅边有五柳树及为彭泽令俱已见前注】

题情深树寄象公

肠断枝上猿泪添山下樽白云【萧本作虎误】见我去亦为我飞翻【格物论猿性急而肠狭哀鸣则肠俱断而死】

北山独酌寄韦六

巢父将许由未闻买山隐道存迹自高何惮去人近纷吾下兹岭地闲諠亦泯门横羣岫开水凿衆泉引屏高而在云窈深莫能准川光昼昏凝林气夕凄紧於焉摘朱果兼得养玄牝坐月观宝书拂霜弄瑶轸倾壶事幽酌顾影还独尽念君风尘游傲尔令自哂【一作安知世上人名利空蠢蠢韵会将与也偕也世说支道林就深公买印山深公曰未闻巢由买山而隐南史刘虬以江陵西沙洲去人远乃徙居之说文岫山穴也殷仲文诗风物自凄紧米果谓果中之米色者耳萧注以为火枣异名未是老子谷神不死是谓玄牝玄牝之门是为天地根河上公注玄天也在人为鼻牝地也於人为口夫五炁从鼻归五藏出入於口也江淹诗宝书为君掩李善注道学传曰夏禹撰真灵之玄要集天官之宝书李周翰注宝书真经也琴下系弦之柱谓之轸或以玉为之故曰瑶轸陶潜诗倾壶絶余沥又饮酒诗序偶有名酒无夕不欢顾影独尽忽焉复醉岫音就】

寄当涂赵少府炎【当?少府俱见八卷注】

晚登高楼望木落双江清寒山饶积翠秀色连州城目送楚云尽心悲胡雁声相思不可见回首故人情

寄东鲁二稚子【在金陵作】

吴地桑叶緑吴蚕已三眠我家寄东鲁谁种龟陰田春事已不及江行复茫然南风吹归心飞堕酒楼前楼东一株桃枝叶拂青烟此树我所种别来向三年桃今与楼齐我行尚未旋娇女字平阳折花倚桃边折花不见我泪下如流泉小儿名伯禽与姐亦齐肩双行桃树下抚背复谁怜念此失次第肝肠日忧煎素写远意因之汶阳川【蚕将蜕辄卧不食古人谓之俯荀卿蚕赋三俯三起事乃大已是也後人谓之眠本草蚕三眠三起二十七日而老是也水经注龟山北即龟陰之田也春秋定公十年齐人来归龟陰之田是也太平广记李白自幼好酒於兖州习业平居多饮又於任城县构酒楼日与同志荒宴客至少有醒时邑人皆以白重名望其里而加敬焉刘琨诗据鞍长叹息泪下如流泉刘桢诗起坐失次第一日三四迁郑康成礼记注素生帛也顔师古急就篇注素谓绢之精白者即所用写书之素也汶水已见本卷注】

独酌清溪江【似缺一祖字】石上寄权昭夷【清溪江租石俱在池州注见八卷秋浦歌下】

我携一樽酒独上江租石自从天地开更长几千尺举杯向天笑天回日西照永愿【萧本作赖】坐此石长垂严陵钓寄谢山中人与尔同调【苏武诗我有一尊酒欲以赠远人严陵钓台详见二卷注】禅房怀友人岑伦【太白自注时南游罗浮兼泛桂海自春徂秋不返仆旅江外书情寄之一统志罗浮山在广东惠州府博罗县西北三十里即道书十大洞天之一昔有山浮海而来博於罗山合而为一故曰罗浮又曰博罗南越志山高三千六百丈周回三百余里岭十五峰三十二其峰之秀者曰飞云玉鹅麻姑仙女会真会仙锦绣玳瑁洞之幽者

曰金沙石白朱明黄龙朱陵黄猿水帘蝴蝶大小二石楼登之可望沧海楼前一石门方广可容几席二山相接处有石磴状如桥梁名曰铁桥桥端两石柱亦曰铁柱人迹罕到又有跳鱼石伏虎石阿耨池夜乐池卓锡泉皆兹山之奇胜唐六典注桂水出桂州临源县历昭富梧三州界入郁水江淹诗文轻薄桂海李善注南海有桂故曰桂海是以南海为桂海太白所云桂海虽袭其文而实则指桂州之桂水也亦犹枚乘七发称汝水为汝海其义一也】

婵娟罗浮月摇艷桂水云美人竟独往而我安能羣一朝笑语隔万里懽情分沉吟彩霞没梦寐羣【繆本作琼】芳歇归鸿度三湘游子在百越【萧本作粤】边尘染衣劒白日凋华髮春气【萧本作风】变楚关秋声落吴山草木结悲绪风沙凄苦顔竭来已永久颓思如循环飘飘【一作飘飏】限江裔想像空留滞离忧每醉心别泪徒盈袂坐愁青天末出望黄云蔽目极何悠悠梅花南岭头空长灭征鸟水阔无还舟宝劒终难托金囊非易求归来傥有问桂树山之幽【广韵婵娟好恣态貌三湘见一卷悲清秋赋注通典自岭而南当唐虞三代为蛮夷之国是百越之地亦谓之南越古谓之雕题汉书高帝纪从百粤之兵服?注非一种若今言百蛮也谢灵运诗览物起悲绪何逊行经孙氏陵诗竭来已永久年代暖微微蜀都赋殆而竭来相与刘渊林注竭去也韵会竭去也又发语辞长门赋遂颓思而就牀李善注颓怀也淮南子注喙江裔高诱注裔边也汉书太史公留滞周南不得与从事楚辞思公子兮徒离忧诗国风行迈靡靡中心如醉鲍照诗安能行叹复坐愁楚辞目极千里兮伤春心南岭即大庾岭在广东南雄府其上多梅亦曰梅岭史记高祖使陆贾赐尉陀印为南越王尉陀赐陆生橐中装直千金宋之问诗不求汉使金囊赠盖用其事也淮南王招隐士桂树丛生兮山之幽竭邱謁切音近揭】

李太白集注卷十三

卷十四

钦定四库全书

李太白集注卷十四

钱塘 王琦 撰

古近体诗共二十六首

庐山谣寄卢侍御虚舟【太平寰宇记庐山在江州南高三千三百六十丈周回二百五十里其山九叠川亦九派郡国志云庐山叠嶂九层崇岩万仞山海经所谓三天子鄩亦曰天子都也周武王时匡俗字子孝兄弟七人皆有道术结庐於此仙去空庐尚存故曰庐山李华三贤论范阳卢虚舟幼真质方而清贾至有授卢虚舟殿中侍御史制云勅大理司直卢虚舟闲邪存诚邈世颐养操持有清廉之誉在公推干蛊之才可殿中侍御史云云殆其人也】

我本楚狂人凤歌笑【一作哭非】孔丘手持绿玉杖【一作枝】朝别黄鹤楼五岳寻仙不辞远一生好入名山游庐山秀出南斗旁屏风九叠云锦张影落明湖青黛光金阙前开二峰长【缪本作帐】银河倒挂【一作泻】三石梁香炉瀑布遥相望回崖沓嶂凌【一作何缪本作峻】苍苍翠影红霞映朝日【一作照千里】鸟飞不到吴天长登高壮观天地间大江茫茫去不还黄云万里动风色白波九道流雪山好为庐山谣兴因庐山发闲窥石镜清我心谢公行处苍苔没【一作绿萝开处悬明月】早服还丹无世情琴心三叠道初成遥见仙人彩云里手把芙蓉朝玉京先期汗漫九垓上愿接卢敖游太清【高士传陆通字接舆楚人也好养性躬耕以为食楚昭王时通见楚政无常乃佯狂不仕时人谓之楚狂孔子适楚接舆游其门曰凤兮凤兮何如德之衰也来世不可待往世不可追也天下有道圣人成焉天下无道圣人生焉方今之时仅免刑焉福轻乎羽莫之知载祸重乎地莫之知避己乎己乎临人以德殆乎殆乎画地而趋迷阳迷阳无伤吾行却曲却曲无伤吾足山木自寇也膏火自煎也桂可食故伐之漆可用故割之人皆知有用之用而不知无用之用也孔子下车欲与之言趋而避之不得与之言楚王闻陆通贤遣使者持金百镒车马二辆往聘曰王请先生治江南通笑而不迎使者去夫负釜甑妻载絰器变名易姓游诸名山食桂栢实服黄精子隐蜀峨眉山壽数百年俗传以为仙云湖广通志黄鹤楼在武昌府城西南隅黄鹤矶上周省齐曰宋陈令举庐山记旧志云汉武帝过九江筑羽章馆於屏风叠下临相思涧今五老一峰叠石如屏嶂盖其故地水经注庐山之北有石门水水出岭端有双石高竦其状若门因有石门之目焉水导双石之中悬流飞瀑近三百步许散漫数十步上望之连天若曳飞练於霄中矣寻阳记曰庐山上有三石梁长数十丈广不盈尺杳然无底查晦余曰元李洞言三石梁在开先寺西?崱言在五老峰上或云在简寂观及上霄紫霄二峰间桑乔庐山记事则竟以为无如竹林之幻境衆说纷然莫知所指今三叠泉在九叠屏之左水势三折而下如银河之挂石梁与太白诗句正相脗合非此外别有三石梁也後人必欲求其地以实之失之凿矣释慧远庐山记其山大岭凡七重□基周回垂五百里其南岭临宫亭湖下有神庙七岭会同莫有升之者东南有香炉

峰游气笼其上氤氲若香烟西南有石门山其形似双阙壁立千余仞而瀑布流焉其中鸟兽草木之美灵药芳林之奇所称名代扬齐贤曰庐山记山南山北瀑布无虑十余处香炉峰与双剑峰在瀑布之旁水源在山顶人未有穷者或曰西入康王谷为水帘东为开先禅院之瀑布杨炯诗重岩窅不极叠嶂凌苍苍尚书九江孔殷孔安国注江於此州界分为九道尚书音释九江潯阳记云一曰乌白江二曰蟠江三曰乌江四曰嘉靡江五曰畎江六曰源江七曰廩江八曰提江九曰箴江张须元缘江□云一曰三里江二曰五州江三曰嘉靡江四曰乌土江五曰白蚌江六曰白乌江七曰箴江八曰沙堤江九曰廩江参差随水长短或百里或五十里始於鄂陵终於江口会於桑落洲太康地记曰九江刘歆以为湖汉九水入彭蠡泽也太平寰宇记潯阳记云九江在潯阳去州五里名白马江是大禹所疏会於桑落洲上下三百余里合流昔秦皇汉武并登庐山以望九江也琦按太史公曰予南登庐山观禹疏九江淮南子曰禹凿江而通九路应劭曰江自寻阳分为九郭璞江赋曰流九派於寻阳自西汉迄东晋皆言大江至寻阳分为九江寻阳记缘江图又备列其名而朱子九江辩独辟之不从其说林少颖曰九江之名与地势久远不可强通然各自别源而下流入江则可以意臆也当由水道通塞离合古今各异之故斯言当矣艺文类聚宫亭湖边旁山间有石数枚形圆若镜明可以监人谓之石镜太平寰宇记石镜在东山悬崖之上其状团圆近之则照见形影一统志石镜峰在南康府西二十六里有一员石悬崖明净照人见影隐见无时谢灵运诗攀崖照石镜即此谢灵运有登庐山絶顶望诸峤诗抱朴子还丹服一刀圭百日仙也朱鸟凤凰翔覆其上玉女至旁广弘明集烧丹成水银还水银成丹故曰还丹黄庭内景经琴心三叠舞胎仙梁丘子注琴和也叠积也存三丹田使和积如一枕中书元始天王在天中心之上名曰玉京山山中宫殿并金玉饰之淮南子卢敖游於北海经乎太陰入乎玄阙至於蒙谷之上见一士焉深目而玄鬓淚注而鸢眉丰上而杀下轩轩然方迎风而舞顾见卢敖慢然下其臂遽逃乎碑下卢敖就而视之方倦龟殼而食蛤梨卢敖与之语曰惟敖为背羣离党穷观於六合之外者非敖而已乎敖幼而好游至长不渝周行四极惟北陰之未□今卒覩夫子於是子殆可与敖为友乎若士者□然而笑曰吾与汗漫期於九垓之外吾不可以久驻若士举臂而竦身逐入云中高诱注卢敖燕人秦始皇召以为博士使求神仙亡而不反汗漫不可知之也九垓九天之外瀑音仆】

下寻阳城泛彭蠡寄黄判官【唐时潯阳郡即江州也隶江南西道元和郡县志彭蠡湖在江州都昌县西六十里按彭蠡湖今江西之鄱阳湖是也在南昌府城东北一百五十里饶州府城西四十里南康府城东五里九江府城东南九十里四州诸水皆入焉周围四百五十里春水涨时茫无涯畔足配洞庭又北历星子都昌德化湖口注於大江】

浪动灌婴井寻阳【一作吾知】江上风开帆入天镜直向彭湖东落影转疎雨晴云散远空名山发佳兴【三句一作返影照疎两轻烟澹远空中流得住兴】清赏亦何穷石镜挂遥月香炉灭彩虹【一作瀑布洒青壁遥山挂彩虹】相思俱对此举目与君同【元和郡县志江州城古之湓口城也汉高帝六年灌婴所筑建安中孙权经此城自标井地令工掘之正得古井铭曰汉六年颍陰侯开卜云三百年当塞塞後不满百年当为应运者所开权以为己瑞井极深大江中风浪井水辄自动陆放翁入蜀记泛彭蠡口四望无际乃知太白开帆入天镜之句为妙彭湖即彭蠡湖也石镜香炉俱见上首注】书情寄从弟邠州长史昭【唐书地理志

关内□邠州新平郡义宁二年折北地郡之新平三水置邠故作邠开元十三年以字类幽改长史详见七卷注】

自笑客行久我行定几时绿杨已可折攀取最长枝翩翩【一作翻翻】弄春色延伫寄相思谁言贵此物意愿【一作厚】重琼蕤昨梦见惠连朝吟谢公诗东风引碧草不觉生华池临玩忽云夕杜鹃夜鸣悲怀君芳岁歇庭树落红滋【楚辞结幽兰以延伫延伫长立也陆机诗玉颜侔琼蕤张铄注琼蕤玉花也锺荣诗品谢氏家录云康乐每对惠连辄得佳话後在永嘉西堂思诗竟日不就寤寐间忽见惠连即得池塘生春草故常云此诗有神助非吾语也楚辞蛙黾游乎华池王逸注华池芳华之池也埤雅杜鹃一名子规苦啼啼血不止一名怨鸟夜啼達旦血渍草木凡鸣皆北向啼苦则倒悬於树说文所谓蜀王望帝化为子寓今谓之子规是也华阳风俗录杜鹃大如鹊而羽鸟声哀而脰有血春至则鸣临海异物志杜鹃至三月鸣昼夜不止芳岁犹芳春也鲍照诗泉涸甘井竭节徙芳岁残】

寄王汉阳【唐时江南西道有汉陽县隶沔州汉阳郡】

南湖秋月白王宰夜相邀锦帐郎官醉罗衣舞女娇【繆本作骄】笛声諠沔鄂歌曲上云霄别後空愁我相思一水遥【此诗是泛沔州城南郎官湖之後所作王宰谓汉阳令王公郎官谓尚书郎张谓详见二十卷诗序後汉书郎官上应列宿出□百里唐之沔州即汉阳郡今为汉阳府唐之鄂州即江夏郡今为武昌府二郡相对中间隔江七里】

春日归山寄孟浩然【繆本作孟六浩然

胡震亨曰玩诗意乃偕一显者游禅寺和诗疑题有误琦按孟六浩然恐是孟赞府之讹】

朱绂遗尘境青山谒梵筵金绳开觉路宝筏渡迷川岭树攒飞拱岩花覆谷泉塔形标海日【萧本作月】楼势出江烟香气三天下钟声万壑连荷秋珠已满松密盖初圆鸟聚疑闻法龙参若护禅媿非流水韵叨入伯牙弦【朱绂详见十一卷注陈子昂诗山水开精舍琴歌列梵筵法华经国名离垢琉璃为地有八交道黄金为绳以界其侧法苑珠林涉迷津於?识微尘之数易穷返觉路於初心僧祇之期难满翻释名义功德施论云如欲济川先应取筏至彼岸已舍之而去韵会筏说文海中大船广韵大曰筏小曰桴方言□谓之筏编竹木浮河以运物南土名簰北土名筏三天即三界也谓欲界色界无色界玉策记千岁松四边?起上杪不长望而视之有如偃盖法苑珠林舍街国祇树精舍衆集之时猕猴飞鸟羣类数千悉来听法寂寞无声事竟即去各还所止犍椎适鸣已复来集吕氏春秋伯牙鼓琴钟子期听之志在流水钟子期曰善哉乎鼓琴汤汤乎若流水骆宾王诗成风郢匠斲流水伯牙弦 瀛奎律髓云太白负不羁之才乐府大篇翕然变化而律诗工夫缜密如此与杜审言宋之问相伯仲别有赠浩然诗曰醉月频中圣迷花不事君虽飘逸不如此诗之端整】

流夜郎永华寺寄浔阳羣官

朝别凌烟楼暝投永华寺贤豪满行舟宾散予独醉【繆本作朝别凌烟楼贤豪满行舟暝投

永华寺宾散余独醉】愿结九江流添成万行泪写意寄庐岳何当来此地天命有所悬安得苦愁思【凌烟楼宋临川王造鲍照凌烟楼铭序云伏见所制凌烟楼栖置崇迴延澈平寂即秀神皇因基地势东临吴甸西眺楚关奔江永写鳞岭相葺重树穹天通原尽日九江已见本卷注湛方生诗彭蠡纪三江庐岳主衆阜吕氏春秋晏子曰鹿生於山命悬於厨今婴之命有所悬矣】

流夜郎至西塞驿寄裴隐【西塞驿当在西塞山边元和郡县志西塞山在鄂州武昌县东八十五里太平御览江夏风俗记曰西塞山高一百六十丈周回三十七里峻嶒横江危峰断岸长波阻以东注高浪为之西翻袁宏东征赋云沿西塞之峻嶒是也】

扬帆借天风水驿苦不缓平明及西塞已先投沙伴回峦引羣峰横蹙楚山断砮冲万壑会震沓百川满龙怪潜溟波候【许本作俟】时救灾旱我行望雷雨安得沾枯散鸟去天路长人愁【繆本作悲】春光短空将泽畔吟寄尔江南管【裴隐疑亦当时逐臣故用贾谊投沙事谢灵运诗投沙理既迫详见十卷赠崔秋浦诗注广韵砮水击山岩声也国语水之怪曰龙罔象韦昭注龙神兽也非常所见故曰怪曹植诗天路安可穷楚辞屈原既放游於江潭行吟泽畔顔色憔悴形容枯槁谢朓诗要取洛阳人共命江南管 砮披水切音烹】

自汉阳病酒归寄王明府

去岁左迁夜郎道琉璃砚水长枯槁今年敕放巫山阳蛟龙笔翰生辉光圣主还听子虚赋相如却欲【萧本作与】论文章愿扫鹦鹉洲与君醉百场啸起白云飞七泽歌吟渌水动三湘莫惜连船沽美酒千金一掷买春芳【史记周昌传高祖曰吾极知其左迁索隐曰地道奠右右贤左贱故谓贬秩为左迁演繁露古人得罪下迁者皆曰左迁太白无官而用左迁字盖借作窜逐字用史记通夜郎道为置吏甚易徐陵玉台新咏序琉璃砚匣终日随身通典夔州巫山县有巫山及高丘山即楚辞所谓巫山之阳高丘之岨也史记蜀人杨得意为狗监侍上上读子虚赋而善之曰朕独不得与此人同时哉得意曰臣邑人司马相如自言为此赋上惊乃召问相如相如曰有是然此乃诸侯之事未足观也请为天子游猎赋赋成奏之上许令尚书给笔札相如以子虚虚言也为楚称乌有先生者乌有此事也为齐难无是公者无是人也明天子之义故空藉此三人为辞以推天子诸侯之苑囿其卒章归之於节俭因以讽谏奏之天子天子大说太平御览江夏记曰鹦鹉洲在荆北黄祖为江夏太守宾客大会有献鹦鹉於此洲者故以为名荆州记曰江夏郡城西临江有黄鹤矶有鹦鹉洲七泽见七卷注三湘见一卷注】

望汉阳柳色寄王宰

汉阳江上柳望客引东枝树树花如雪纷纷乱若丝春风传我意草木度前知【一作别前知一作发前墀】寄谢弦歌宰西来定未迟【沈约诗杨柳乱如丝绮罗不自持】

江夏寄汉阳辅録事【録事详见十一卷注】

谁道此水广狭如一匹练江夏黄鹤楼青山汉阳县大语犹可闻故人难可见君草陈琳檄我书鲁连箭报国有壮心龙颜不回眷西飞精卫鸟东海何由填鼓角徒悲鸣楼船习征战抽劒步霜月夜行空庭偏长呼结浮云埋没顾荣扇他日观军容投壶接高宴【杨齐贤曰唐鄂州江夏郡治江夏县黄鹤楼在郡城之东南与汉阳县大别山相望止隔一水陆放翁入蜀记鄂州西与汉阳相对止隔一水人物草木可数三国志太祖以陈琳阮瑀为司空军谋祭酒管记室军国书檄多琳瑀所作战国策燕将攻聊城人或谗之燕将惧诛遂保守?城不敢归田单攻之岁余士卒多死而?城不下鲁连乃为书约之矢以射城中遗燕将燕将因罢兵倒鞬而去故解齐国之危救百姓之死仲连之说也精卫衔西山木石以填东海洋见一卷大鹏赋注唐六典凡诸道行军皆给鼓角通典军城及野营行军在外日出日没时挝鼓千挝三百三十三挝为一通鼓音止角音动吹十二声为一叠角音止鼓音动如此三角三鼓而昏明毕史记楼船十万师应劭曰作大船船上施楼故曰楼船晋书陈敏率万余人将与甘卓战未获济顾荣以白羽扇挥之敏衆溃散後汉书祭遵为将军取士皆用儒术对酒设乐必雅歌投壶】

早春寄王汉阳

闻道春还未相识走傍寒梅访消息昨夜东风入武昌【一作阳】陌头杨柳黄金色碧水浩浩云茫茫美人不来空断肠预拂青山一片石与君连日醉壶觞

江上寄巴东故人【唐时巴东郡即归州也隶山南东道】

汉水波浪远巫山云雨飞东风吹客梦西落此中时觉後思白帝佳人与我违瞿塘饶贾客信莫令希【汉水巫山白帝瞿塘俱见前注杨齐贤曰白帝城在夔州瞿塘关山上下瞰灩澦堆一统志白帝城在四川夔州府治东公孙述据蜀自称白帝更号鱼复曰白帝城】

江上寄元六林宗

霜落江始寒枫叶绿未脱客行悲清秋永路苦不达沧波眇川汜白日隐天末停棹依林峦惊猿相叫聒夜分河汉转起视溟涨阔凉风何萧萧流水鸣活活浦沙净如洗海月明可掇兰交空怀思琼树讵解渴聶哉沧洲心岁晚庶不夺幽赏颇自得兴远与谁豁【陆云诗永路隔万里尔雅水决复入为汜邢昺疏凡水决之岐流复还大水者名汜说文汜水别复入水也一曰汜穷渎也江淹诗白日隐寒树谢庄月赋气霁地表云敛天末曹植上责躬应诏诗表夜分而寝张铣注夜分夜半时也谢灵运诗溟涨无端倪诗国风北流活活广韵活活水流声韵会浦水滨也风土记云大水有小口别通曰浦魏武帝诗明明如月如何可掇李善注掇拾取也李峤诗桂友寻东阁兰交聚北堂李陵诗思得琼树枝以解长渴饥 汜音祀活音括】

寄从弟宣州长史昭

尔佐宣城【萧本作州】郡守官清且闲常夸云月好邀我敬亭山五落洞庭叶三江犹未还相思不可见叹息损朱颜【唐官制每州有长史一人位在别驾之下司马之上乃太守之佐

职也宣州又谓之宣城郡隶江南西道唐书宣州宣城县有敬亭山楚辞洞庭波兮木叶下水经注巴陵城跨冈岭滨阻三江巴陵西对长洲其洲南临湘浦北对大江故曰三江也三水所会亦或谓之三江口矣一统志三江在岳州府城下岷江为西江澧江为中江湘江为南江皆会於此故名】

泾溪东亭寄郑少府谔【一统志赏溪在宁国府泾县西一名泾溪源出石埭支流出太平县流至泾县南陵宣城踰芜湖入於江 泾音京】

我游东亭不见君沙上行将白鹭羣白鹭闲【萧本作行】时散飞去又如雪点青山云欲往泾溪不辞远龙门蹙波虎眼转杜鹃花开春已阑归向陵阳钓鱼晚【江南通志龙门山在寧国府太平县西北四十里林麓幽深岩壁峭拔中有石窦若门产茶及诸药草虎眼转谓水波旋转有光相映若虎眼之光刘禹锡诗汴水东流虎眼文是也杜鹃花一名红踯躅一名山石榴一名映山红处处山谷有之高二三尺春时蘂叶齐出一枝数萼花色红丽二月中徧满山谷烂然若火入夏方歇韵会□晚也太平寰宇记陵阳山在泾县西南百三十里石埭县北三里按輿地志陵阳令窦子明於溪侧钓鱼一日钓得白龙子明惧而放之又数年钓得一白鱼剖其腹中乃有书教子明服饵之术三年後白龙来迎子明遂得上昇溪环遶山足今有仙坛祭醮不絶】

宣城【萧本作州】九日闻崔四侍御与宇文太守游敬亭余时登响山不同此赏醉後寄崔侍御二首【潜确居类书响山在宣城县当鳌峰之前两崖对峙下瞰响潭潭上有钓台】

九日茱萸熟插鬓伤早白登高望山海满目悲古昔远访投沙人因为逃名客故交竟谁在独有崔亭伯重阳不相知载酒任所适手持一枝菊调笑二千石日暮岸帻归传呼隘阡陌彤檐双白鹿宾从何辉赫夫子在其间遂成云霄隔良辰与美景两地方虚掷晚从南峰归萝月下水壁却登郡楼望松色寒转碧咫尺【一作望昊】不可亲弃我如遗舄【艺文类聚风土记曰茱萸橄也九月九日熟色赤可采时也太平御览风土记曰九月九日律中无射而数九俗尚此日以茱萸气烈成熟可折其房以插头言辟恶气而御初寒投沙用贾谊谪长沙事以谕崔四侍御见十卷赠崔秋浦注後汉书崔駰字亭伯涿郡平安人博学有伟才尽通古今训诂百家之言善属文少游太学与班固传毅同时齐名晋书刘隗岸帻大言意气自若胡三省曰岸帻帻微脱额也毛诗正义以帟障车之旁如裳为容饰故或谓之帟裳或谓之童容其上有盖四旁垂而下谓之幰章怀太子後汉书注幰帷也车上施帷以屏蔽者白帖刺史彤幰皂盖束幰谢承後汉书郑弘为临淮太守行春有两白鹿随车夹毂而行谢灵运诗序天下良辰美景赏心乐事四者难并卢照邻五悲文萝月寡色风泉罢声古诗不念携手好弃我如遗迹】

其二

九卿天上落五马道旁来列戟朱门晓褰帷碧帟【缪本作幰】开登高望远海召客得英才紫绶【缪本作丝误】欢情洽黄花逸兴催山从图上见溪即【一作向】镜中回遥羨重阳作应过戏马台【周弘正诗将军天上落童子弃繻来五马太守事详见六卷注旧唐书唐制

三品以上门皆列棨戟後汉书贾琮为冀州刺史旧典传车骖驾垂赤帷裳迎於州界及琮之部升车言曰刺史当远视广听纠察美恶何有反垂帷裳以自掩塞乎乃命御者褰之百僚闻风自然竦震唐制二品三品得服紫绶详见五卷注太平寰宇记戏马台在彭城县南三里项羽所筑戏马於此宋武北征至彭城遣长史王虞等立第舍於项羽戏马台起斋作阁桥度池重九日公引宾佐登此台令将佐百僚赋诗以观志作者百余人独谢灵运诗最工云季秋边朔苦旅雁达霜雪凄凄阳卉腓皎皎寒潭洁良辰感圣心云旗兴暮节鸣笳戾朱宫兰卮献时哲饯宴光有孚和乐隆所缺云云太白诗意盖谓崔侍御重阳之作过於谢公戏马台之诗也】

寄崔侍御

宛溪霜夜听猿愁去国长如【繆本作为】不系舟独怜一雁飞南海却羡双溪解北流高人屡解陈蕃榻过客难登谢朓楼【萧本作舟】此处别离同落叶明朝分散敬亭秋【宛溪在寧国府城东双溪以二水合流而名环遶宁国府城而北去敬亭山在宁国府城北俱见前注贾谊鵬赋汜兮若不系之舟江南通志谢公楼在宁国府城内郡治之後因山为基即谢朓为宣城太守时之高斋地一名北楼唐咸通间刺史独孤霖改建易名叠嶂楼後汉书徐穉传陈审为太守以礼请署功曹穉不就之既谒而退蕃在郡不接宾客唯穉来特设一榻去则悬之】

泾溪南蓝山下有落星潭可以卜筑余泊舟石上寄何判官昌浩【江南通志泾溪在寧国府泾县西南一里一名赏溪其源有三一出石埭县舒姑泉一出太平黄山一出绩溪下有赏溪桥沙堤其西为新河蓝山在泾县西五十里高千仞李白诗蓝岑耸天壁突兀如鲸额即此落星潭在泾县西五十里蓝山下晋有陈霸兄弟捕鱼於此见一星落潭中故名】

蓝岑耸【繆本作竦】天壁突兀如鲸额奔蹙横澄潭势吞落星石沙带秋月明水摇寒山碧佳境宜缓棹清辉能留客恨君阻欢游使我自惊惕所期俱卜筑结茅链金液【宋之问诗崖口衆山断嶽崑崙天壁木华海赋横海之鲸突机孤游李善注突机高貌谢灵运诗山水含清晖清晖能娱人鲍照诗结茅野中宿链金液详见十三卷寄王屋山人孟大融注】

早过漆林渡寄万巨

西经大蓝山南来漆林渡水色倒空青林烟横积素漏流昔吞翕沓浪竞奔注潭落天上星龙开水中雾嶢【繆本作嶢】岩注公栅突兀陈焦墓岭峭纷上千川明屡回顾因思万夫子解渴同琼树何日覩清光相欢咏佳句【落星潭见上首注胡震亨曰注公疑是左公隋末左难当筑城栅拒辅公祐於泾与大蓝山近江南通志晋陈焦墓在泾县五城山左三国志永安四年安吴民陈焦埋之六日更生穿土中出按安吴县名旧属宣城郡隋时并入泾县子虚赋交错纠纷上千青云宋之问诗放溜觐前淑连山纷上千李陵诗思得琼树枝以解长渴饥】

游敬亭寄崔侍御【一作登古城望府中奉寄崔侍御】

我家敬亭下辄继谢公作【一作我登谢公楼辄继敬亭作】相去数百年风期宛如昨登高素秋月【一作高城素秋日】下望青山郭俯视鸳鸯羣【一作府中鸿鹭羣】饮啄自鸣跃夫子虽蹭蹬瑶台雪中鹤独立窥浮云其心在寥廓时来一顾我笑饭葵与藿【一作时来顾我笑一饭与葵藿】世路如秋风相逢尽萧索腰间玉具劒意许无遗诺【一作愿为经冬柏不逐天霜落又玉具劒繆本作玉巨劒】壮士不可轻【一作疎】相期在【一作随集】云阁【元和郡县志敬亭山在宣州宣城县北十二里即谢朓赋诗之所朓诗云兹山亘百里合沓与云齐隐沦既已托灵异居然栖上干蔽白日下属带回谿交藤荒且蔓樛枝耸复低云云韵会蹭蹬困顿也汉书焦贛已翔於寥廓顔师古注寥廓天上寛广之处李善文选注寥廓高远也陆机诗取笑葵与霍魏文帝诗秋风萧瑟天气凉汉书赐以玉具劒孟康注标首鐔卫尽用玉为之顔师古注鐔劒口旁横出者也卫劒鼻也意许无遗诺用延陵季子事已见十二卷注十六国春秋振纓云□耀价连城梁元帝与萧挹书握兰云阁解绂龙楼云阁犹云台也】

三山望金陵寄殷淑【太平寰宇记三山在昇州江宁县西南五十七里周回四里其山孤絶面东西絶大江輿地志云其山积石滨於大江有三峰南北接故曰三山旧为吴津所谢玄晖晚登三山还望京邑诗云灞浹望长安河阳视京县白日丽飞甍参差皆可见余霞散成绮澄江静如练即此地也】

三山怀谢朓水澹【一作緑水】望长安芜没河阳县秋江正北看卢龙霜气冷鵙鵲月光寒耿耿忆琼树天涯寄一欢【太平寰宇记卢龙山在昇州上元县西北二十里周回五里西临大江按旧经晋元帝初渡江北地尽为虏寇所有以其山连石头为固关塞以卢龙名焉六朝事迹卢龙山图经云在城西北十六里周回五里高三十六丈东有水下注平陆西临大江旧经云晋元帝初渡江到此见岭山连绵接石头城真江上之关塞似北地卢龙因以为名一统志狮子山在应天府西二十里与马鞍山接晋元帝初渡江见此山绵连以拟北地卢龙山故易名卢龙山□鵙楼名详见八卷永王东巡歌注琼树已见前二首注】

自金陵泝流过白壁山翫月达天门寄句容王主簿【江南通志白壁山在太平府城北三十里有三峰中峰最峻赤壁在其北一统志无白壁山而有白壁水盖字误也太平府志白壁山一名石壁在郡治北二十五里化洽乡滨江三峰中拔起如垜有石似龟状俗名龟山传言上有白玉采之者衆遂絶李白与崔宗之乘舟月夜自金陵泝流过白壁山玩月白衣宫锦袍坐舟中两岸观者如堵白笑傲自若旁若无人今按白诗秋月照白壁皓如山陰雪十字殆不可方真兴会所到也一统志天门山在太平府城西南三十里二山夹大江东曰博望西曰梁山对峙如门亦名峨眉山又曰东梁山西梁山唐书地理志江南东道昇州江寧郡有句容县唐制每县设主簿一人九品官京县则二人八品官】

沧江泝流归白壁见秋月秋月照白壁皓如山陰雪幽人停宵征贾客忘早发进帆天门山回首牛渚没川长信风来日出宿雾歇故人在咫尺新赏成胡越寄君青兰花惠好庶不絶【广韵泝逆流而上也世说王子猷居山陰夜大雪眠觉开室命酌酒四望皎然诗国风肃肃宵征一统志牛渚山在太平府城北二十五里下有矶曰牛渚矶去采石矶近一里旧为险要备御之地亦名燃犀浦鲍照诗洲回风正悲江寒雾未歇陶弘景答谢中书书晓雾将歇猿鸟乱鸣

胡地在北越地在南成胡越盖言其隔远而不能相见之意後汉纪形神不接虽兄弟亲戚可全之於吴越】寄上吴王三首【按唐书吴王祗太宗第三子吴王恪之孙张掖郡王琨之子袭封嗣吴王出为东平太守安禄山反河南陈留荥阳灵昌相继陷祗募兵拒战玄宗壮之累迁陈留太守持节河南道节度采访使历太仆宗正卿其为庐江太守无考盖史失载也】

淮王爱八公携手緑云中小子忝枝叶亦攀丹桂丛谬以词赋重而将枚马同何日背淮水东之观土风【神仙传淮南王刘安好方术之士於是有八公诣门皆须眉皓白门吏先密以白王王使□人自以意难问之曰我王乃欲求延年长生不老之道今先生年已耆矣似无驻衰之术八公笑曰闻王尊礼贤士故远致其身何以年老而逆见嫌耶王必若见少年则谓之有道皓首则谓之庸叟薄吾老今则少矣言未竟八公皆变为童子年可十四五角髻青丝色如桃花门吏大惊走以白王王闻之足不履跣而迎登思仙之台执弟子之礼北面叩首八童子乃复为老人後雷被伍被诬告称安谋反天子使宗正持节治之八公曰可以去矣即白日升天八公与安所踏山石皆陷成迹左传公族公室之枝叶也杨齐贤曰太白兴圣皇帝九世孙与唐同出故云忝枝叶淮南王招隐士攀援桂枝兮?淹留沈约诗□侧青莎被岩间丹桂丛南方草木状桂有三种叶如柏叶皮赤者为丹桂叶似柿叶者为菌桂叶似枇杷叶者为牡桂邹阳諫吴王书臣所以历数王之朝背淮千里而自致者非恶臣国而乐吴民也窃高下风之行尤说大王之义】

其二

坐啸庐江静闲闻进玉觞去时无一物东壁挂胡牀【後汉书南阳太守□璜委功曹岑暄郡为谣曰南阳太守岑公孝弘农成璜但坐啸唐庐江郡即庐州也隶淮南道傅毅舞赋溢金罍而列玉觞李善注玉觞玉爵也三国志注魏略曰襄潜为兖州时尝作一胡牀及其去也留以挂柱】

其三

英明庐江守声誉广平籍洒扫【缪本作扫洒】黄金台招邀青云客客曾与天通出入清禁中襄王怜宋玉愿入兰台宫【谢朓诗广平听方籍李善注王隐晋书曰郭褒为中郎散骑常侍会广平太守缺宣帝谓褒曰贤叔大匠浑垂称於平阳魏郡蒙惠化且卢子家王子□继踵此郡欲使世不乏贤故复相屈在郡先以德化善为条教百姓爱之上谷郡图经黄金台在易水东南十八里燕昭王置千金於台上以延天下之士三辅黄图汉宫中谓之禁中谓宫中门阁有禁非侍卫通籍之臣不得妄入宋玉风赋楚襄王游於兰台之宫宋玉景差侍】

李太白集注卷十四

卷十五

钦定四库全书

李太白集注卷十五

钱塘 王琦 撰

古近体诗共三十五首

秋日鲁郡尧祠亭上宴别杜补阙范侍御【唐时鲁郡即兖州也隶河南道元和郡县志尧祠在兖州瑕丘县南七里洙水之右通典武太后垂拱中置补阙拾遗二官以掌供奉讽谏自开元以来尤为清选唐书百官志门下省有左补阙六人中书省有右补阙六人从七品西阳杂俎衆言李白惟戏杜考功饭颗山头之句成式偶见李白祠亭上丘别杜考功诗今録首尾曰我觉秋兴逸谁言秋兴悲山将落日去水共晴空宜烟归碧海夕雁度青天时相失各万里茫然空尔思琦按成式此则谓杜考功即子美也然子美未尝为考功且与太白同游时尚为布衣未登仕籍而诗题又微有不同疑成式所见另是一本】

我觉秋兴逸谁云秋兴悲山将落日去水与晴空宜鲁酒白玉壶送行驻金羁歇鞍憩古木解带挂横枝歌鼓川上亭曲度神飈吹云归碧海夕雁没青天时相失各万里茫然空尔思【一本无歌鼓川上亭二句其下增入南歌忆郢客东瞻见齐姬清波忽淡荡白雪纷逶迤一隔范杜游此欢各弃遗三韵 潘岳秋兴赋善乎宋玉之言曰悲哉秋之为气也萧瑟兮草木摇落而变衰慄栗兮若在远行登山临水送将归曹植诗白马饰金羁後汉书多聚声乐曲度比诸郊庙章怀太子注曲度谓曲之节度也曹植诗神飈接丹毂李周翰注飈疾风也 胡震亨曰太白慎押宜字如山将落日去水与晴空宜月色不可尽空天交相宜又诡浪偏相宜置酒正相宜春风与醉客今日乃相宜凡五用而前两韵尤佳】

别鲁颂【繆本题上多一留字】

谁道太山高下却鲁连节谁云秦军衆摧却鲁连舌独立天地间清风洒兰雪夫子还倜傥攻文继前烈错落石上松无为秋霜折赠言镂宝刀千岁庶不灭【鲁连事详见二卷注书武成公刘克笃前烈江淹诗故人赠宝劒镂以瑶华文庾信诗山精镂宝刀】

别中都明府兄【唐时河南道有中都县本平陆县天宝元年更名隶兖州鲁郡贞元十四年改隶郛州东平郡】

吾兄诗酒继陶君试宰中都天下闻东楼喜奉连枝会南陌愁【繆本作还】为落叶分城隅【一作江城】渌水明秋日海上青山隔暮云取醉不辞留夜月雁行中断惜离羣【陶潜为彭泽令见前注苏武诗况我连枝树与子同一身吕向注兄弟如木连枝而同本萧综诗昔朋

旧爱各东西譬如落叶不更齐】

梦游天姥吟留别【一作别东鲁诸公 太平寰宇记天姥山在越州剡县南八十里名山志云山有枫千余丈萧萧然後吴录云剡县有天姥山传云登者闻天姥歌谣之响谢灵运诗云暝抵剡中宿明登天姥岑高高入云霓还期那可寻即此也一统志天姥峰在台州天台县西北与天台山相对其峰孤峭下临嵊县仰望如在天表 姥音母】

海客谈瀛洲烟涛微茫【一作弥漫】信难求越人语【一作道】天姥云霞明灭或【一作安】可覩天姥连天向天横势拔【一作枝】五岳掩赤城天台四【当作一】万八千丈对此欲【一作絶】倒东南倾【十洲记瀛洲在东海中地方四十里大抵是对会稽去西岸七十万里上生神芝仙草又有玉石高且千丈出泉如酒味甘名之为玉醴饮之数升辄醉令人长生洲上多仙家风俗似吴人山川如中国也太平广记章安县西有赤城山周三十里一峰特高可三百余丈海录碎事顾野王舆地志云赤城山有赤石罗列长里余遥望似赤城云笈七籤天台山高一万八千丈洞周围五百里名上玉清平之天即桐柏王真人所理葛仙翁链丹得道处上应台宿故曰天台在台州天台县楚辞康回冯怒地何故以东南倾】我欲因之【一作冥搜】梦吴越一夜飞渡镜湖月湖月照我影送我至剡溪谢公宿处今尚在渌水荡漾清猿啼脚着谢公屐身登青云梯半壁见海日空中闻天鸡千岩万转路不定迷花倚石忽已暝熊咆龙吟殷岩泉慄深林兮惊层巖云【一作枫】青青兮欲雨水澹澹兮生烟列缺霹雳丘峦崩摧洞天石扇【一作扉】訇然中【一作而】开青冥浩荡不见底日月照耀金银台霓为衣兮风【一作凤】为马云之君兮纷纷而来下虎鼓瑟兮鸾回车仙之人兮列如麻忽魂悸以魄动恍惊起而长嗟惟觉时之枕席失向来之烟霞【薛方山浙江志监湖又曰镜湖在会稽县西南三十里故南湖也图经曰後汉马臻为太守创立监湖在会稽山陰二县界元和郡县志剡溪出越州剡县西南北流入上虞县界为上虞江南史谢灵运寻山陟岭必造幽峻岩嶂数十重莫不备尽登蹑尝着木屐上山则去其前齿下山去其後齿灵运诗共登青云梯青云梯谓山岭高峻如上入青云故名述异记东南有桃都山上有大树曰桃都枝相去三千里日初出照此木天鸡则鸣天下之鸡皆随之鸣淮南王招隐士虎豹鬬兮熊黑咆广韵咆嗥熊虎声高唐赋水澹澹而盘纡说文澹水摇也扬雄校猎□霹雳列缺吐火施鞭应劭曰霹雳雷也列缺天隙电光也通雅列缺电光也阳气从云决裂而出故曰列缺郭璞诗但见金银台傅玄吴楚歌云为车兮风为马西京赋总会仙倡戏豹舞黑白虎鼓瑟苍龙吹箎太平御覽太微天帝登白鸾之车上元夫人步元曲忽过紫微垣真人列如麻说文悸心动也 咆音庖訇音薨悸音忌】世间行乐亦如此古来万事东流水别君去兮【萧本作时】何时还且放白鹿青崖间须行即骑访名山安能摧眉折腰事权贵使我不得开心颜【楚辞骑白鹿而容与江淹诗猿啸青崖间摧眉低首也折腰曲躬也陶潜不能为五斗米折腰已见前注 范德机云梦吴越以下梦之源也以次诸节梦之波澜也其间显而晦晦而显至失向来之烟霞梦极而与人接矣非太白之胷次笔力亦不能发此枕席烟霞二句最有力结语平衍亦文势当如此】

留别曹南羣官之江南【谷梁传宋公曹人邾人盟於曹南范甯注曹南曹之南鄙唐人谓曹州为曹南】

我昔钓白龙放龙溪水旁道成本欲去挥手凌苍苍时来不关人谈笑游轩皇献纳少成事归休辞建章十年罢西笑揽镜如秋霜闭劔琉璃匣链丹紫翠房身佩豁落图腰垂虎鞶囊仙人借【萧本作驾】彩凤志在穷遐荒恋子四五人徘徊未翱翔东流送白日骤歌兰蕙芳仙宫两无从人间久摧藏范蠡脱【箫本作说】句践屈平去怀王飘飏紫霞心流浪忆江乡愁为万里别复此一衔觴淮水帝王州金陵绕丹阳楼台照海色衣马摇川光及此北望君相思泪成行朝云落梦渚瑶草空高唐【萧本作堂非】帝子隔洞庭青枫满潇湘怀归【萧本作君非】路綈邈覽古情凄凉登岳眺百川杳然万恨长却【萧本作知】恋峨眉去弄景偶骑羊【陵阳子明於旋溪钓得白龙解而放之详见十二卷注不关人犹云不由人也两都赋序朝夕论思日月献纳韩诗外传田子为相三年归休三辅黄图武帝作建章宫度为千门万户桓谭新论人闻长安乐则出门西向而笑西京杂记杂厠五色琉璃为劔匣十洲记又有墉城金台玉楼相鲜如流精之□光碧之堂琼华之室紫翠丹房锦云烛日朱霞九光西王母之所治也道经凡欲修行大洞真经三十九章雌一玉检五老宝经元母简十二上愿佩神虎金虎符豁落七元流金火铃神仙传王远冠远游冠朱衣虎头鞶囊五色绶带劔通典按汉代着鞶囊者侧在腰间或云鞶囊或云绶囊然则以此囊□绶也或盛或散各有其时汉书抚宁遐荒刘琨诗抱膝独摧藏吕向注摧藏忧伤也范蠡屈平俱见二卷注脱句践谓脱身辞句践而去也魏书神与理宜形随流浪太平寰宇记淮水发源於华山在丹阳姑熟之界西北流经建康秣陵二县之间萦紆京邑之内至於石头入江绵流三百余里景定建康志祥符江宁图经曰淮水去县一里其源从宣州东南漂水县乌刹桥西入百五十里丹阳记云建康有淮源出华山入江輿地志云秦始皇巡会稽凿山阜此淮即所凿也亦名秦淮金陵山即鍾山也在唐之昇州上元县西北一十八里丹阳谓润州其地即古时丹阳郡唐天宝初亦改称丹阳郡朝云瑶草高唐见一卷注梦渚即云梦之渚也范云诗阳台雾初解梦渚水裁绿山海经洞庭之山帝之二女居之是常游於江湖澧沅之风交潇湘之浦是在九江之间出入必以飘风暴雨楚辞湘夫人云帝子降兮北渚目眇眇兮愁子嫋嫋兮秋风洞庭波兮木叶下招魂湛湛江水兮上有佩日极千里兮伤春心搜神记葛由蜀羌人也周成王时好刻木作羊卖之一旦桑木羊入蜀中蜀中王侯贵人追之上绥山绥山多桃在峨眉山西南高无极也随之者不得还皆得仙道】

留别于十一兄逖裴十三游塞垣【萧颖士莲□散序友生于逖张南容在大梁唐诗纪事于逖独孤及李白皆有诗赠之盖天宝间诗人也】

太公渭川水李斯上蔡门钓周猎秦安黎元小鱼?兔何足言天张云卷有时节吾徒莫叹羝触藩于公白首大梁野使人怅望何可论既知朱亥为壮士且愿束心秋毫里秦赵虎争血中原当去抱关救公子裴生覽千古龙鸾炳天【萧本作文】章悲【一作高】吟雨雪动林木放书辍劔思【一作悲】高堂劝尔一杯酒拂尔裘上霜尔为我楚舞我为尔楚歌且探虎穴向沙漠鸣鞭走马凌黄河耻作易水别临岐淚滂沱【太公钓於渭水李斯牵黄犬出上蔡东门逐狡兔俱见一卷注封禅书以浸黎元吕延济注黎元百姓也说文?狡兔也周易羝羊触藩羸其角孔颖达正义藩藩篱也史记各兴军聚衆虎争中原吴质答魏太子牋摘藻下笔鸾龙之文奋矣李善注鸾龙鳞羽之有五彩故以喻焉艺文类聚琴操曰曾子耕太山之下天雨雪冻旬日不得归思其父母作梁山歌史记为我楚舞吾为若楚歌三国志吕蒙年十五六窃随邓

当击贼当顾见大惊归以告蒙母母患欲罚之蒙曰贫贱难可居脱误有功富贵可致且不探虎穴安得虎子太平御覽春秋後语曰荆轲将行太子及宾客知其事者二十余人皆白衣冠以送之至易水上既祖取道高渐离击筑荆轲和歌为濮上声士皆流涕诗国风涕泗滂沱?音俊又音逵又音詮羝音低】

留别王司马嵩【按唐书百官志王府官属及都督都护刺史之佐职皆有司马有从四品正五品从五品正六品从六品之不同不知嵩为何官】

鲁连卖谈笑岂是顾千金陶朱虽相越本有五湖心余亦南阳子时为梁甫吟苍山容偃蹇白日惜颓侵愿一佐明主功成还旧林西来何所为孤劔托知音鸟爱碧山远【一作凤集碧梧秀】鱼游沧海深呼鹰过上蔡卖畚向嵩岑他日闲相访丘中有素琴【鲁连谈笑而却秦军平原君以千金为寿鲁连辞而去范蠡乘扁舟以游於五湖止於陶为陶朱公诸葛亮躬耕南阳好为梁父吟俱见前注左传彼皆偃蹇杜预注偃蹇骄傲也郭璞客傲庄周偃蹇於漆园李斯臂苍鹰出上蔡东门详见三卷行路难注十六国春秋王猛少贫贱以鬻畚为业尝货畚於洛阳有一人贵买其畚而云无直自言家去此无远可随我取直猛利其贵而从之行不觉远忽至深山其人止猛且住树下当先启道君来须臾猛进见一老公踞胡牀而坐须发悉白侍从十许人有一人引猛曰大司马可进猛因进拜老公曰王公何缘拜也乃十倍偿畚直遣人送之既出顾视乃嵩高山也春秋经传集解畚以草索为之筥属陆云登遐颂北食中岳鍊形嵩岑左思诗岩穴无结构丘中有鸣琴 畚音本】

还山留别金门知己【一本作出金门後书怀留别翰林诸公】

好古笑流俗素闻贤达风方希佐明主长揖辞成功白日在青天回光瞩【一作照】微躬恭承凤凰诏歛起云【一作藤】萝中清切紫霄迴优游丹禁通君王赐顔色声价凌烟虹乘輿拥翠盖扈从金城东宝马骤絶景锦衣入新丰倚岩望松雪对酒鸣丝桐方学扬子云献赋甘泉宫天书美片善清芳播无穷归来入咸阳谈笑皆王公一朝去金马飘落成飞蓬宾友【一作从】日疎散玉樽亦【一作寻】已空长才犹可倚不惭世上雄闲来东武吟曲尽情未终书此谢知己扁舟【一作沧波】寻钓翁【此篇即五卷之东武吟也句字互有同异今仍旧本两存之注不重出 瞩音竹】

夜别张五

吾多张公子别酌酣高堂听歌舞银烛把酒轻罗霜横笛弄秋月琵琶弹陌桑龙泉解锦带为尔倾千觴【汉书诸公闻之皆多袁盎顔师古注多犹重也梁元帝诗银烛含朱火金炉对宝笙宋书傅玄琵琶赋曰汉遣乌孙公主嫁昆弥念其行道思慕故使工人裁箏筑为马上之乐欲从方俗语故曰琵琶取其易传於外国也风俗通曰以手琵琶因以为名杜挚云长城之役弦鼗而鼓之未详孰是乐府杂録琵琶古曲有陌上桑水经注晋太康地理志曰西平县有龙泉水可以砥砺刀劔特坚利故有坚白之论矣是以龙泉之劔为楚宝也】魏郡别苏明【缪本作少】府因北游【唐时魏郡即魏州属河北道】

魏都接燕赵美女夸芙蓉淇水流碧玉舟车日奔冲青楼夹两岸万室喧歌钟天下称豪贵游此每相逢【一作天下豪贵游此中每相逢】洛阳苏季子劔戟森词峰六印虽未佩【一作说秦复过赵】轩车若飞龙黄金数百镒白璧有几双散尽空掉臂高歌赋还【一作临】叩【繆本此下多合从又连横其意未可封二句】落魄【繆本作拓】乃如此何【一作谁】人不相从远别隔两河云山杳千重【一作云天满愁容】何时更杯酒再得论心胷【西京杂记卓文君姣好眉色如望远山脸际常若芙蓉尚书正义河内共县淇水出焉东至魏郡黎阳县入河史记苏秦者东周洛阳人也说赵肃侯一韩魏齐楚燕赵以从亲以畔秦赵王乃饰车百乘黄金千镒白璧百双锦绣千纯以约诸侯於是六国从合而并力焉苏秦为从约长并相六国喟然叹曰使我有洛阳负郭田二顷岂能佩六国相印乎裴駰注譙周曰苏秦字季子鲁□钱神论空手掉臂何所希望谢朓诗还叩歌赋似史记司马相如家徒四壁立与文君俱之临叩还叩盖用此事也又史记酈食其家贫落魄无以为衣食业】

留别西河刘少府【唐时西河郡即汾州属河东道】

秋【一作我】髮已种种所为竟无成闲倾鲁壶酒笑对刘公荣谓我是方朔人间落几星白衣千万乘何事去天庭君亦不得意高歌羡鸿冥世人若醢鸡安可识梅生虽为刀笔吏缅怀在赤城余亦如流萍随波乐休明自有两少妾双骑骏马行东山春酒绿归隐谢浮名【左传予髮如此种种予奚能为杜预注种种短也世说王戎弱冠诣阮籍时刘公荣在坐阮谓王曰偶有二斗美酒当与君共饮彼公荣者无预焉二人交觴酬酢公荣遂不得一杯而言语谈戏三人无异或有问之者阮答曰胜公荣者不得不与饮酒不如公荣者不可不与饮酒惟公荣可不与饮酒初学记汉武帝内传曰西王母使者至东方朔死上以问使者对曰朔是木帝精为岁星下游人中以观天下非陛下之臣法言鸿飞冥冥弋人何篡焉庄子其犹醢鸡与郭象注醢鸡者瓮中之蠓蟻梅生谓梅福福尝为南昌尉故以比刘少府史记尧年少刀笔吏耳正义曰古用简札书有错谬以刀削之故号曰刀笔吏汉书萧何曹参皆起秦刀笔吏顔师古注刀所以削书也古者用简牍故吏皆以刀笔自随也洞天福地记赤城洞周围三百里名上玉清平之天在台州唐兴县详见七卷注】

颍阳别元丹丘之淮阳【旧唐书载初元年析河南伊阙嵩阳三县置武临县开元十五年改为颍阳隶河南府淮阳郡即陈州也属河南道】

吾将元夫子异姓为天伦本无轩裳契素以烟霞亲尝恨迫世网铭意俱未伸松柏虽寒苦羞逐桃李春悠悠市朝间玉顔日缁磷所共【当作失】重山岳所得轻埃尘精魄渐芜秽渐老相凭因我有锦囊诀可以持君身当餐黄金药去为紫阳宾万事难并立百年犹崇晨别尔东南去悠悠多悲辛前志庶不易远途期所遵已矣归去来白云飞天津【韵会将与也谷梁传兄弟天伦也范甯注兄先弟後天之伦次陆机诗世?婴我身古诗含意俱未伸汉武帝内传帝见王母巾器中有一卷书盛以紫锦之囊帝问此书是仙灵方耶抱朴子仙药之上者丹砂次则黄金周氏冥通记第一紫阳左真人治葛衍山周君第二紫阳右真人治嶧冢山王君崇展犹诗所谓崇朝谓从旦至食时也天津桥名在河南见二卷注】

留别广陵诸公【一作留别邯郸故人 唐时广陵郡即扬州也属淮南道】

忆昔作少年结交赵与燕金羁络骏马锦带横龙泉寸心无疑事所向非徒然晚节觉此疎猎精草太玄空名束壮士薄俗弃高贤中回圣明顾挥翰凌云烟骑虎不敢下攀龙忽堕天还家守清真孤洁励秋蟬炼丹费火石采药穷山川卧海不关人租税辽东田乘兴忽复起棹歌【繆本作我】溪中船临醉谢葛强山公欲倒鞭狂歌自此别垂钓沧浪前【曹植诗白马饰金羁龙泉剑名已见前注谢灵运诗晚节值衆贤李周翰注晚节暮年也汉书扬雄传时雄方草太玄有以自守泊如也论衡扬子云作太玄经造於助思极杳冥之深非庶几之才不能成也蟬出自土壤升於高木之上吟风饮露不见其食故郭璞蟬赞虫之精洁可贵惟蟬潜蛻弃秽饮露恒鲜宋书或终身隐处不关人事谢朓诗言税辽东田李善注魏志曰管宁闻公孙度令行海外遂至於辽东皇甫谧高士传曰人或牛暴宁田者宁为牵牛饲之其人大慙西京赋齐棹女引棹歌晋书山简出镇襄阳优游卒岁惟酒是耽诸习氏荆上豪族有佳园池简每出游嬉多之池上置酒辄醉名之曰高阳池时有儿童歌曰山公出何许往至高阳池日夕倒载归酩酊无所知时时能骑马倒着白接罗举鞭向葛强何如并州儿强家在并州简爱将也】

广陵赠别

玉瓶沽美酒数里送君还系马垂杨下衔杯大道间天边看绿水海上见青山兴罢各分袂何须醉别【萧本作别醉】 顔

感时留别从兄徐王延年【一作平】从弟延陵【按旧唐书延年乃高祖第十子徐王元礼之後元礼子茂茂子瓘瓘之子则延年也开元二十六年封嗣徐王除员外洗马天宝初拔汗那王入朝延年将嫁女与之爲右相李林甫所奏贬文安郡别驾彭城长史坐贓贬永嘉司士至德初爲余杭郡司马卒】

天籟何参差噫然大块吹玄元包【繆本作苞】橐籥紫气何逶迤【一作融怡】七叶运皇化千龄光本支【繆本作枝】仙风生指树大雅歌螽斯诸王若鸾虬肃穆列藩维哲兄锡茅土圣代罗【繆本作含】荣滋九卿领徐方七步继陈思【庄子子綦曰汝闻人籟而未闻地籟汝闻地籟而未闻天籟夫子游曰敢问其方子綦曰夫大块噫气其名为风是唯无作作则万窍怒号通典乾封元年追号老君为太上玄元皇帝老子天地之间其犹橐籥乎史记索隐列异传老子西游关令尹喜望见其上有紫气浮关老子果乘青牛而过说文逶迤邪去貌唐自高祖至肃宗凡七帝诗大雅文王孙子本支百世毛传曰本本宗也支支子也神仙传老子之母适至李树下而生老子生而能言指李树曰以此为我姓诗国风螽斯羽诜诜兮宜尔子孙振振兮郑笺曰凡物有陰阳情慾者无不妬忌惟螽斯不尔各得受气而生子故能诜诜然衆多后妃之德如是则宜然也埤雅螽斯虫之不妬忌一母百子者也故诗以为子孙衆多之况一名春?亦或谓之春箕草木疏云蝗类青色长角长股股鸣者也或曰似蝗而小股黑有文五月中以股相切作声闻数步者是也江东谓之蚱蜢朱子集传螽斯一生九十九子诗纪苏氏曰螽斯一生八十一子数虽不同言其多子则均也说文虬龙子无角者尔雅穆穆肃肃敬也诗大雅价人惟藩毛传曰藩屏也後汉书诸王封者受茅土归以立社稷礼也独断天子太

社以五色土为坛皇子封为王者受天子之社土以所封之方色东方受青南方受赤他如其方色苴以白茅授之各以其所封方之色归国以立社故谓之受茅土後汉书陶谦传是时徐方百姓殷盛谷食甚丰胡三省通监注古语多谓州为方故八州八伯谓之方伯书曰惟彼陶唐有此冀方诗曰徐方不庭是也世说文帝尝令束阿王七步中作诗不成者行大法应声便为诗曰煮豆持作羹漉枝以为汁萁在釜下然豆在釜中泣本是同根生相煎何太急帝深有惭色东阿王即曹植也太和三年徙封东阿王六年以陈四县封为陈王思者其谥也 噫音衣透音威迤音夷】伊昔全盛日雄豪动京师冠劔朝凤阙楼船侍龙池鼓钟出朱邸金翠照丹墀君王一顾盼选色献蛾眉列戟十八年未曾辄迁移大臣小暗鸣谪窜天南垂长沙不足舞贝锦且成诗佐郡浙江西病闲絶趋【萧本作驱】驰阶轩日苔藓鸟雀噪檐帷时乘平【萧本作小】肩輿出入畏人知北宅聊偃憩欢愉恤惻嫠差言梁苑地烜赫耀旌旗【後汉书窦融传赏赐恩宠倾动京师史记建章宫其东则凤阙高二十余丈索隐曰三辅黄图云武帝营建章起凤阙高二十五丈三辅故事云北有图阙高二十丈上有铜凤凰故曰凤阙也唐六典注兴庆宫即今上潜龙旧宅也初上居此第其里名协圣讳所居宅之东有旧井忽涌为小池周袤才数尺常有云气或见黄龙出其中至景龙中潜复出水其沼浸广时即连合为一未半岁而里中人悉移居遂鸿洞为龙池马演繁露後世诸侯王及达官所居之屋皆饰以朱故曰朱门又曰朱邸西京赋青琐丹墀李善注汉官典职曰以丹漆地故曰丹墀吕向注丹墀阶也以丹漆涂之太平御覽天子赤泥殿下曰丹墀唐制嗣王郡王皆列棨戟於门李涪刊误凡戟天子二十四诸侯十通典天宝六年四月敕改仪制令嗣王郡王门十六戟後汉书郡处南垂不闲典训潘岳西征赋历敝邑之南垂刘良注南垂南界也广韵垂疆也汉书长沙定王发以其母微无宠故王卑湿贫国应劭曰景帝後二年诸王来朝有诏更前称壽歌舞定王但张袖小举手左右笑其拙上?问之对曰臣国小地狭不足回旋帝乃以武陵零陵桂阳益焉诗小雅萋兮双兮成是贝锦彼谮人者亦已太甚大臣小暗鸣谪窜天南垂言其为李林甫所奏而遭贬谪也彭城在南方故曰天南垂长沙不足舞谓为长史不足展其才也贝锦且成诗谓又以贓而贬永嘉也司马为郡守之辅佐故曰佐郡余杭郡即杭州也其地在浙江之西世说谢中郎尝着白纶巾肩輿径至扬州南齐书豫章文献王嶷自以地位隆重深怀退素北宅旧有田园之美乃盛修理之汉书梁孝王筑东苑方三百余里广睢阳城七十里大治宫室为复道自宫连属於平台三十余里得赐天子旌旗从千乘万骑出称警入言蹕拟於天子 惻音穷嫠音离】兄弟八九人吴秦各分离大贤达机兆岂独虑安危小子谢麟阁雁行忝肩随令弟字延陵凤毛出天姿清英神仙骨芬馥茝兰蕙梦得春草句将非惠连谁深心紫河车与我特相宜金膏犹罔象玉液尚磷缁伏枕寄宾馆宛同清漳湄药物多见馈珍羞亦兼之谁道溟渤深犹言浅恩慈【欧阳建诗古人达机兆策马游近关三辅黄图麒麟阁萧何造以藏秘书处贤才礼记兄之齿雁行又曰五年以长则肩随之世说王敬伦风姿似父作侍中加授桓公公服从大门入桓公望之曰大奴固自有凤毛北齐书北平王贞武成第五子也沈审寛恕帝常曰此儿得我凤毛广韵茝香草字林云靡芜别名说文蕙草木花垂貌谢灵运梦见其弟惠连遂得池塘生春草之句大以为工详见十一卷注紫河车丹药也详见二卷注穆天子传天子之珎玉果璿珠烛银黄金之膏郭璞注金膏亦犹玉膏皆其精洵也张衡思玄赋沛以罔象李善注罔象即彷徨也楚词吮玉液兮止渴王逸注玉液琼蘂之精气刘桢诗予婴沈痼疾窜身清漳滨溟渤海也见七卷注 馥音伏茝音止】鸣蝉游子意促织念归期骄阳何火赫海水烁龙龟百川尽凋枯舟楫阁中逵策马摇【缪本作采】凉月通宵出郊圻【缪本作岐】泣别目眷

眷伤心步迟迟愿言保明德王室伫清夷掺袂何所道援毫投此辞【尔雅翼蟋蟀似蝗而小正黑有光泽一名蜚一名蜻蛚一名促织以夏生秋初鸣其声如急织故幽州谓之促织其时正织之候故以戒妇功春秋说题辞曰趣织为言趣织也织兴事遽故趣织鸣女作兼又里语曰趣织鸣嬾妇惊诗意言鸣蝉促织之候已动游子之意而念归期矣因天旱水涸舟楫阻阁故策马於凉月之下乘夜而留别也春秋考邮异早之为言悍也阳骄蹇所致也说文赫大赤貌诗国风施於中逵毛萁传逵九达之道也谢朓诗停琴伫凉月灭烛听归鸿谢灵运诗旅馆眺郊岐楚辞九叹志蛩蛩而怀顾兮魂眷眷而独逝王逸注眷眷顾貌诗曰眷眷怀顾诗国风行道迟迟傅咸诗王度日清夷刘良注夷平也诗国风遵大路兮掺执子之祛兮毛传曰掺?也祛袂也郑笺曰欲?持其袂而留之 櫂音接与楫同圻音畿掺所斩切衫上声】

别储邕之剡中【唐时江南东道有剡县隶越州会稽郡 剡音闪】

借问剡中道东南指越乡舟从广陵去水入会稽长竹色溪下绿荷花镜里香辞君向天姥拂石卧秋霜【太平御览郡国志曰天姥山与括苍山相连石壁上有刊字科斗形高不可识春月樵者闻箫鼓笳吹之声括耳元嘉中遣名画写状於□扇即此山也施宿会稽志天姥山在新昌县东南五十里东接天台□顶峰西北联沃州山上有枫千余丈□藏经云沃洲天姥福地也】

留别金陵诸公

海水昔飞动三龙纷战争锺山危波澜倾侧骇奔鲸黄旗一扫荡割壤开吴京六代更霸王遗迹见都城【一作遗都见空城】至今秦淮间礼乐秀羣英地扇邹鲁学诗腾顔谢名五月金陵西祖余白下亭欲寻庐峰顶先绕汉水行香炉紫烟灭瀑布落太清若攀星辰去挥手缅含情【剧秦□新海水羣□李善注海水喻万民羣飞言乱三龙蜀吴魏也太平寰宇记蒋山在昇州上元县东北十五里周回六十里面南顾东东逵青龙□门等山西临青溪□山南面有锺浦水流下入秦淮北连雉亭山按輿地志云蒋山古曰金陵山县之名因此而立汉輿地图名锺山吴大帝时有蒋子文发神验於此封子文为蒋侯改曰蒋山谢朓诗奔鲸自此曝顔延年诗襟卫徙吴京吴京金陵也以吴人所都故曰吴京景定建康志古城按官苑记□大帝所筑周回二十里一十九步在淮水北五里晋元帝过江不改其旧宋齐梁陈皆都之輿地志曰晋琅邪王渡江镇建业因吴旧都修而居之宋齐而下宫室有因有革而都城不改东南利便书曰孙权虽据石头以扼江险然其都邑则在建业历代所谓都城也东晋宋齐梁因之虽时有改筑而其经画皆吴之旧初学记孙盛晋阳秋曰秦始皇东游望气者云五百年後金陵有天子气於是始皇於方山掘流西入江亦曰淮今在润州江宁县土俗号曰秦淮太平寰宇记丹阳记云始皇凿金陵方山其断处为渎即今淮水经城中入大江是曰秦淮史记邹鲁滨邾泗犹有周公遗风俗好儒备於礼汉书邹鲁守经学宋书顔延之与谢灵运俱以词采齐名自潘岳陆机之後文士莫及也江左称顔谢焉所着并传於世郑玄仪礼注将行而饮酒曰祖萧士□曰图经白下亭在上元县西北庐峰即庐山也江西通志庐山在南康府治北二十里九江府城南二十五里脉接衡阳由武功来古南障山也高三千三百六十丈或云七千三百六十丈凡有七重周回五百里山无主峰横溃四出巍巍嶸嶸各为尊高不相拱揖异於武当

太岳诸名山出风降雨抱异怀灵道书称为第八洞天香炉峰在开先文殊寺後其形圆耸如炉山南山北皆见峰上常出云气有似香烟故名太平寰宇记庐山瀑布在山东亦名白水源出高峰挂流三百许丈远望如匹布故名瀑布刘琨诗挥手长相谢】

口号【口号即口占也详九卷注】

食出野田美酒临远水倾东流若未尽应见别离情

金陵酒肆留别

风吹【一作白门】柳花满【一作酒】店香吴姬压酒唤【许本作使一本作劝】客尝金陵子弟来相送欲行不行各尽觞请君试问【缪本作问取】东流水别意与之谁短长【渔隐丛话诗眼云好句须要好字如李太白诗吴姬压酒唤客尝见新酒初熟江南风物之美工在压字】

金陵白下亭留别【杨齐贤曰白下亭在今建康东门外】

驿亭三杨树正当白下门吴烟暝长条汉水啮古根向来送行处回首阻笑言别後若见之为余一攀翻别东林寺僧【一统志东林寺在庐山晋僧□远与同门慧永居西林学徒日衆别居林之东谢灵运为凿池种莲】

东林送客处月出白猿啼笑别庐山远何烦过虎溪【杨齐贤曰庐山在江州南三十里东林西林二寺在山之南五里许小岭可到两寺相邻規制广袤若一大县水石深怪古迹无穷东林是远法师所居三门内有小渠名虎谿远师送客未尝过谿西林是永法师所居規制稍不及东林莲社高贤传远法师居东林其处流泉匝寺下入於谿每送客过此辄有虎号鸣因名虎谿後送客未尝过独陶渊明陆静修至语道契合不觉过谿因相与大笑世传为三笑图】

甯夜郎於乌江留别宗十六璟【唐淮南道有乌江县隶和州历阳郡按浔阳记载九江之名一曰乌白江三曰乌江张须元缘江图载九江之名四曰乌土江六曰白乌江太平寰宇记引浔阳记云九江在浔阳去州五里名曰乌江是大禹所疏知此诗所谓乌江者指浔阳江耳非和州之乌江县也胡震亨曰旧注以太白娶许相圉师女谓诗题别宗十六为误今按诗中斩螯翼娲皇三入凤凰池是言相武后又是入相三次者而圉师为高宗相又只入相一次与此不合此正是宗楚客耳安得谓赠别其後人为误哉白凡四娶始娶许终娶宗皆相门女见魏颢白集序中旧注失考往往如是】

君家全盛日台鼎何陆离斩螯翼娲皇链石补天维一回日月顾三入凤凰池失势青门旁种瓜复几时犹会衆【缪本作旧】宾客三千光路岐皇恩雪愤懣松柏含荣滋我非东牀人令姊忝齐眉浪迹未出世空名动京师适遭云罗解翻谪【一作遣】夜郎悲拙妻莫邪剑及此二龙随慙君湍波苦千里远从之白帝晓猿断黄牛过客迟遥瞻明月峡西去益相思【晋书

三台六星三公之位也在人曰三公在天曰三台汉书鼎三足三公象初学记环济要略曰三公者象鼎三足共承其上也後汉书位登台鼎楚辞长余佩之陆离许慎云陆离美好貌淮南子往古之时四极废九州裂天不兼覆地不兼载於是女娲鍊五色石以补苍天断鳌足以立四极高诱注三皇时天不足西北故补之师说如此鳌大龟天废顿以鳌足柱之楚辞曰鳌戴山拚其何以安之是也宋玉大言赋壮士愤兮絶天维晋书荀勗守尚书令勗久在中书专管机事及失之甚惘惘怅怅或有贺之者勗曰夺我凤凰池诸君贺我耶三辅黄图广陵人邵平为秦东陵侯秦破为布衣种瓜青门外世说郗太傅在京口遣门生与王丞相书求女壻丞相语郗信君往东厢任意选之门生归白郗曰王家诸郎亦皆可佳闻来觅壻咸自矜持惟有一郎在东牀上坦腹卧如不闻郗公曰此正好访之乃是逸少因嫁女与焉後汉书梁鸿每归妻为具食不敢於鸿前仰视举业齐眉江淹诗旷哉宇宙惠云罗更四陈吴越春秋干将者吴人也与欧冶子同师俱能为剑阖闾使作二枚一曰干将一曰莫耶莫耶干将之妻也干将作剑采五山之铁精六合之金英候天伺地陰阳同光百神临观天气下降而金铁之精不销沦流於是干将不知其由莫耶曰子以善为剑闻於王使子作剑三月不成其有意乎干将曰吾不知其理也莫耶曰神物之化须人而成今夫子作剑得无得其人而後成乎干将曰昔吾师作冶金铁之类不销夫妻俱入冶炉中然後成物至今後世即山作冶麻經蓑服然後敢铸金於山今吾作剑不变化者其若斯耶莫耶曰师知铄身以成物吾何难哉於是干将妻乃断髮剪爪投於炉中使童男童女三百人鼓橐装炭金铁乃濡遂以成剑阳曰干将陰曰莫耶阳作龟文陰作漫理一统志白帝山在四川夔州府城东五里峡中视之孤特甚峭北缘马岭接赤甲山公孙述据蜀殿前井中常有白龙出因称白帝山亦以名水经江水又东径黄牛山酆道元注下有滩名黄牛滩南岸重岭叠起最外高崖间有石如人负刀牵牛人黑牛黄成就分明既人迹所絶莫得究焉此岩既高加以江湍纡回虽途径信宿犹望见此物故行者謡曰朝发黄牛暮宿黄牛水路迂深回望如一矣太平寰宇记黄牛山在南郑县西南五十里山有石黄色远望如牛故曰黄牛山山下有黄牛川十道记云黄牛川有再熟之稻土人重之太平御覽李膺益州记曰明月峡在巴县东峡前南岸壁高四十丈其壁有圆孔形如满月因以为名杨齐贤曰白帝城隶夔州黄牛峡隶峡州明月峡隶渝州琦按唐书宗楚客本传及宰相表楚客字叔敖蒲州人武后从姊子长六尺八寸明皙美须髯进士及第累迁户部侍郎坐贓流岭外岁余得还神功元年六月由尚方少监检校夏官侍郎同凤阁鸾台平章事圣历元年正月罢为文昌左丞为武懿宗所劾贬播州司马稍为豫州长史迁少府少监岐陕二州刺史长安四年三月复以夏官侍郎同凤□鸾台平章事七月坐事贬原州都督神龙初为太仆卿武三思引为兵部尚书景龙元年九月同中书门下三品韦后安乐公亲赖之寻迁中书令韦氏败与诛传又言其冒於权利外附韦氏内蓄逆谋故卒以败其行迹若此乃太白有斩鳌翼娲皇鍊石补天维之褒诛後亦未闻放罪之辞赠葬之典乃太白有皇恩雪愤懣松柏含荣滋之美在诗人固多溢颂之辞又为亲者讳不得不然若深叙情亲少序家势更为得体矣

娲音戈懣草本切门上声】

留别龚处士

龚子栖闲地都无人世喧柳深陶令宅竹暗辟强园我去黄牛峡遥愁白帝猿赠君卷施草心断竟何言【陶渊明宅边有五柳树尝为彭泽令详见前注世说王子猷自会稽经吴门闻顾

辟强有名园刘孝标注顾氏谱曰辟强吴郡人历郡功曹平北参军范成大吴郡志辟强园自东晋以来传之池馆林泉之胜号吴中第一辟强姓顾氏晋唐人题咏甚多陆羽诗云辟强旧林园怪石纷相向陆龟蒙云吴之辟强园在昔胜?敌皮日休云更葺园中景应为顾辟强本朝张伯玉云于公门馆辟强园放荡襟怀水石间今莫知遗迹所在考龟蒙之诗则在唐为任晦园亭今任园亦不可考矣唐诗纪事吴门有辟强园按陆龟蒙诗吴之辟强园在昔胜槩敌前闻富修竹後说纷怪石张南史诗深竹闲园暗辟强益其地饶修竹多怪石往往见於题咏黄牛白帝已见前首注尔雅卷施草拔心不死邢昺疏卷施草一名宿莽拔其心亦不死也按离骚云朝搴毗之木兰兮夕?中洲之宿莽王逸云草冬生不死者楚人名之曰宿莽】

赠别郑判官

窜逐勿复哀慙君问寒灰浮云本无【缪本作无本】意吹落章华台远别泪空尽长愁心已摧二【萧本作三】年吟泽畔顛顛几时回【通典春秋时楚章华台在复州监利城内方輿胜覽江陵府有章华台杜预云在今南郡华容城中华容即今监利楚辞卜居云屈原既放三年不得复见渔父云屈原既放游於江潭行吟泽畔顔色顛顛形容枯槁】

黄鹤楼送孟浩然之广陵

故人西辞黄鹤楼烟花三月下扬州孤帆远影【一作映】碧山【萧本作空】尽唯见长江天际流【杨齐贤曰黄鹤楼以黄鹤山而名在鄂州通典广陵郡今之扬州陆放翁入蜀记太白登黄鹤楼送孟浩然诗云征帆远映碧山尽唯见长江天际流盖帆樯映远山尤可观非江行久不能知也】

将游衡岳过汉阳双松亭留别族弟浮屠谈皓【通监地理通释衡岳在潭州衡山县西三十里衡州衡阳县北七十里有五峰曰紫盖天柱芙蓉石?祝融一统志双松亭在湖广汉阳府秋兴亭东册府元龟浮屠正号曰佛陀其声相近皆西方言华言译之则谓净觉】

秦欺赵氏璧却入邯鄲宫本是楚家玉还来荆山中符彩照【萧本作丹彩浮】沧溟清【缪本作精】辉凌白虹青蝇一相点流落此时同卓絶道门秀谈玄乃支公延罗结幽居剪竹绕芳丛凉花拂户牖天籁【一作乐】鸣虚空忆我初来时蒲萄开景风今兹大火落秋叶黄梧桐水色梦沅湘长沙去何穷寄书访衡峤但与南飞鸿【史记赵惠文王时得楚和氏璧秦昭王闻之遗赵王书愿以十五城易璧赵王遣蔺相如奉璧西入秦秦王坐章台见相如相如奉璧奏秦王秦王大喜传以示美人及左右相如视秦王无意偿赵城乃前曰璧有瑕请指示王王授璧相如因持璧却立倚柱怒髮上冲冠谓秦王曰臣观大王无意偿赵王城邑故臣复取璧大王必欲急臣臣头与璧俱碎於柱矣秦王恐其破璧乃辞谢召有司按图指从此以往十五都予赵相如度秦王特以诈佯为予赵城实不可得乃谓秦王曰赵王送璧时斋戒五日今大王亦宜斋戒五日秦王遂许斋五日相如乃使其从者衣褐怀璧从径道亡归赵秦王曰今杀相如终不能得璧也而絶秦赵之欢卒廷见相如□礼而归之楚人卞和得玉璞於荆山两献楚王两刖其足见四卷注礼记气如白虹天也孔颖达正义云白虹谓天之白气言玉之白

气似天白气也陈子昂诗青蝇一相点白璧遂成冤埤雅青蝇粪尤能败物虽玉犹不免所谓蝇粪点玉是也三国志管宁德行年二十无偶太平广记支遁字道林本姓关氏陈留人或云河内林虑人年二十五出家每至讲肆善标宗会而章句或有所遗时为守文者所陋谢安闻而喜之曰此乃古人之相马也略其玄黄而取其骏逸於时殷浩王羲之等并一代名流皆着尘外之狎鲍照诗延萝倚峰壁吴均诗剪竹制山扉庄子汝闻地籁而未闻天籁天籁乃虚空之际自然音响易纬通卦验夏至景风至大火心星也落犹下也心星於夏月昏时当南方之位入秋则下而西流矣汉书□九疑浮沅湘顔师古注沅水出牂牁湘水出零陵二水皆入江一统志湘江至沅州与沅水合曰沅湘古长沙郡秦始皇置在古荆州之域唐时之长沙已陵衡阳零陵江华桂阳邵阳连山八郡皆其地也衡山及沅湘二水俱在境中萧琛诗相思将安寄怅望南飞鸿 峤音轿沅音元又音阮】

留别贾舍人至二首【贾至见十一卷注】

大梁白云起飘飏来南洲徘徊苍梧野十见罗浮秋鳌拚【萧本作挟】山海倾四溟扬洪流意欲托孤凤【世本作雁误】从之摩天游凤苦道路难翱翔还崑丘不肯衔我去哀鸣慙不留【一作周】远客谢主人明珠难暗投拂拭倚天剑西登岳阳楼长啸万里风扫清胷中忧谁念刘越石化为绕指柔【归藏启筮有白云出自苍梧入於大梁山海经南方苍梧之丘苍梧之渊其中有九疑山舜之所葬在长沙零陵界中郭璞注山左零陵营道县南其山九谿皆相似故云九疑古者总名其地为苍梧也盖古所称苍梧之野其地甚广凡九疑山前後数百里粤西湖南之地兼跨而有之若汉之所置苍梧郡视古之苍梧野为狭唐之所置苍梧郡视汉之苍梧郡则又狭皆只在粤西一隅而长沙零陵非其所统矣或者据史记本纪舜崩於苍梧之野葬於江南九疑是为零陵因崩葬各纪其地疑苍梧九疑不在一处者非也舜葬於苍梧之野盖□?先已记之矣名山志罗浮山在广东增城博罗二县之境本二山也在西者为罗山在东者为浮山二山合体故总称罗浮旧记曰山高三千六百丈周围二百七十七里旧说浮山从会稽来博於罗山故又称博罗今罗浮山上独有东方草木或云浮山乃蓬莱之一岛尧时洪水浮至依罗山而止焉二山断处有石磴相联接状如桥梁号曰铁桥奇禽灵卉不可胜纪楚辞鳌戴山拚王逸注鳌大龟也击手曰拚列仙传曰有巨灵之鳌背负蓬莱之山而拚沧海之中尔雅翼天问曰鳌戴山拚何以安之拚者两手相击也言鳌以首戴山偁用前两手相击则山上之仙圣何以安乎张衡思玄赋登蓬莱而容与兮鳌虽拚而不倾吕延济注言巨鳌浮蓬莱山虽拚击而不倾侧太白引此盖以喻禄山之乱也张协诗两足洒四溟李善注四溟四海也王□诗鸛鹄摩天游邢昺尔雅疏崑仑山记云崑仑山一名崑丘史记明月之珠夜光之璧以暗投人於道路人无不按剑相眄者何则无因而至前也王褒诗白璧求善价明珠难暗投宋玉大言赋长剑耿耿倚天外岳阳风土记岳阳楼城西门楼也下瞰洞庭景物寛濶唐开元四年中书令张说除守此州每与才士登楼赋诗自尔名著刘越石诗何意百鍊刚化为绕指柔吕延济注百鍊之铁坚刚而今可绕指自喻今破败而至柔弱也琦按贾之谪在岳阳去罗浮甚远而太白行迹亦未尝至广惠□何云徘徊苍梧野十见罗浮秋?又太白旅寓岳州约计只一二年而贾之谪在至德中召还故官在宝应初约计首尾亦不至十年之久所云十见更指何人耶恐是他人之作而误入集中者否则笔字之讹欤】

其二

秋风吹胡霜凋此檐下芳折芳怨岁晚离别凄以伤谬攀青琐贤延我於此堂君为长沙客我独之夜郎劝此一杯酒岂唯道路长割珠两分赠寸心贵【萧本作久】不忘何必儿女仁相看泪成行【刘昭後汉书补宫合簿青琐门在南宫卫瓘注吴都赋曰青琐户边青镂也一曰天子门内有楣格再重囊青画曰琐章怀太子後汉书注青琐谓刻为琐文而以青饰之也西京赋青琐丹墀吕向注青琐窗也以青饰之吴都赋青琐丹楹刘渊林注琐户内边以青画为琐文吕延济注青琐门窗栞刻为琐文染以青色割珠事无考曹植诗无乃儿女仁】

渡荆门送别【通典荆门山後汉岑彭破田戎於此公孙述又遣将任满拒吴汉作浮桥处在今峡州宜都县西北五十里水经云江水东楚荆门虎牙之间荆门山在南上合下开若门虎牙山在北石壁危江间有白文类牙故以为名荆门虎牙二山即楚之西塞】

渡远荆门外来从楚国游山随平野尽江入大荒流月下飞天镜云生结海楼仍怜【许本作连】故乡水万里送行舟【杨齐贤曰荆门军有山名荆门蜀之诸山至此不复见矣史记海旁蜃气象楼台国史补海上居人时见飞楼如绡构之状甚壮丽丁龙友曰胡元瑞谓山随平野尽江入大荒流此太白壮语也子美诗星随平野阔江入大荒流二语骨力过之予谓李是昼景杜是夜景李是行舟暂视杜是停舟细观未可槩论】

闻李太尉大举秦兵百万出征东南懦夫请缨冀申一割之用半道病还留别金陵崔侍御十九韵【通监上元二年五月以李光弼为河南副元帅太尉兼侍中都统河南淮南东西山南东荆南江南西浙江东西八道行营节度出镇临淮汉书遣终军使南越说其王欲令入朝比内诸侯军自请愿受长缨必羁南越王而致之阙下军遂往说越王越王听许请举国内属後汉书班超曰昔魏绛列国大夫尚能和辑诸戎况臣奉大汉之威而无铅刀一割之用乎】

秦出天下兵蹴踏燕赵倾黄河饮马竭赤羽连天明太尉杖旄钺云骑【缪本作旗】绕彭城三军受号令千里肃雷霆函谷絶飞鸟武关拥连营意在斩巨鳌何论鱣长鲸【一作鲛与鲸】恨无左车略多愧鲁连生拂劒照严霜雕戈鬣【当作纒】胡纓愿雪会稽耻将期报恩荣半道谢病还无因【一作由】东南征亚夫未见顾剧孟阻先行天夺壮士心长吁别吴京金陵遇太守倒屣欣【一作相】逢迎羣公咸祖饯四座罗朝英初发临沧观醉栖征虏亭旧国见秋月长江流寒声帝车【一作居误】信回转河汉复纵【缪本作纵复】横孤凤向西海飞鸿辞北溟因之出寥廓挥手谢公卿【家语由愿得白羽若月赤羽若日史记师尚父左杖黄钺右把白旄以誓谢灵运诗云骑乱汉南吕向注云骑言多如云也唐之彭城郡即徐州也隶河南道旧唐书李光弼拜太尉充河南淮南山南东道荆南等副元帅侍中如故出镇临淮史朝义乘邙山之胜寇申光等十三州自领精骑围李岑於宋州将士皆惧请南保扬州光弼径赴徐州以镇之遣田神功击败之浙东贼首袁晁攻剡郡县浙东大乱光弼分兵除讨剡定江左人心乃安光弼未至河南也田神功平刘展後□□於扬府尚衡殷仲卿相攻於兗郛来瑱旅距於襄阳朝廷患之及光弼轻骑至徐州史朝义退走神功遽归河南尚□殷仲卿来瑒皆惧其威名相继赴阙又云光弼御军严肃天下服其威名每申号令诸将不敢仰视元和郡

县志函谷故城在陕州灵宝县南十里秦函关城汉弘农县也西征记曰函谷关城路在谷中深险如函故以为名其中劣通行路东西四十里絶岸壁立岩上柏林陰映谷中殆不见日关去长安四百里日入则闭鸡鸣则开秦法也东自穀山西至潼津通名函谷号曰天险所谓秦得百二也史记集解应劭曰武关秦南□通南阳文颖曰武关在析西百七十里弘襄界太平寰宇记武关在商州商洛县东南九十里春秋时少习也左氏传曰将通於少习以听命注少习商县武关是也三国志树栅连营七百余里史记赵王成安君陈余闻汉且袭之也聚兵井陘口号称二十万广武君李左车说成安君曰愿足下?臣奇兵三万人从间路絶其輜重足下深沟高垒坚营勿与战不至二十日而两将之头可致於戏下成安君不听韩信引兵出井陘口斩成安君泚水上禽赵王歇信乃令军中毋杀广武君有能生得者购千金於是有缚广武君而致戏下者信乃解其缚东乡坐西乡对师事之鲁连事见二卷注图语穆公横雕戈出见使者韦昭注雕镂也戈戟也庄子说劒篇垂冠纓胡之纓司马彪曰纓胡之纓谓粗纓无文理也会稽耻见十卷注亚夫剧孟事见三卷注杨齐贤曰吴京建康也十六国春秋宋繇每闻儒士在门常倒屣出迎停寝政事引谈经籍汉书丞相为祖道顔师古注祖者送行之祭因宴饮焉左传郑六卿饯宣子於郊杜预注饯送行饮酒也太平寰宇记临沧观在劳劳山上有亭七间名曰新亭吴所筑宋改为临沧观周顓与王导等当春日登之会宴顓曰风景不殊举目有江山之异即此处也谓之劳劳亭古送别之所胡三省曰临沧观在江寧县南十五里世说注丹阳记曰征虏亭太安中征虏将军谢石立此亭因以为名胡三省通监注征虏亭在方山南自玄武湖头大路北出至征虏亭史记斗为帝车运於中央临制四方晋书斗为帝车取乎运动之义也魏文帝诗天汉回西流三五正纵横汉书焦明已翔於寥□顔师古注寥廓天上宽广之处】

别韦少府

西出苍龙门南登白鹿原欲寻商【一作南】山皓犹恋汉皇恩水国远行迈仙经深讨论洗心句溪【萧本作向秋】月清耳敬亭猿筑室在人境闭关无世諠多君枉高驾赠我以微言交乃意气合道因风雅存别离有相思瑶瑟与金樽【史记集解关中记曰东有苍龙阙北有玄武阙吴均诗已蔽苍龙门元和郡县志白鹿原在京兆府万年县东二十里亦谓之霸上汉文帝葬其上谓之霸陵王仲宣诗曰南登霸陵岸回首望长安即此也太平寰宇记白鹿原在蓝田县西六里按三秦记云周平王东迁之後有白鹿游此原是以得名长安志白鹿原在万年县东南二十里自蓝田县界至滻水川尽东西一十五里南接终南北至灞川尽南北一十里亦谓之灞上雍録白鹿原者自南山分支而下行乎蓝田县以及汉城之东古志云原接南山西北入万年界抵滻水其东西可十五里南北可二十里也商山四皓见四卷注江南通志句溪在宁国府城东五里溪流回曲形如句字源出笼丛天目诸山东北流二百余里合衆流入江李白诗洗心句溪月盖谓其清也隋书宣城郡宣城县有敬亭山陶潜诗结庐在人境而无车马喧章怀太子後汉书注多重也汉书仲尼没而微言絶江淹诗瑶瑟讵能阙】

南陵别儿童入京【一作古意】

白酒新【一作初】熟山中归黄鸡啄黍秋正肥呼童烹鸡酌白酒儿女嬉【缪本作歌】笑

牵人衣高歌取醉欲自慰起舞落日争光辉游说万乘苦不早着鞭跨马涉远道会稽愚妇轻买臣余亦辞家西【一作方】入秦仰天大笑出门去我辈岂是蓬蒿人【陶潜诗归去来山中山中酒应熟诗小雅无啄我黍汉书朱买臣家贫好读书不治产业常刈薪樵卖以给食担束薪行且诵书其妻亦负担相随数止买臣母歌讴道中买臣愈益疾歌妻羞之求去买臣笑曰我年五十当富贵今已四十余矣汝苦日久待我富贵报汝功妻恚怒曰如公等终饿死沟中耳何能富贵买臣不能留即听去史记淳于髡仰天大笑冠缨索绝】

别山僧

何处名僧到水西乘舟【一作杯】弄月宿泾溪平明别我上山去手携金策踏云梯腾身转觉三天近举足回看万岭低谿浪肯居支遁下风流还与远公齐此度别离何日见相思一夜暝猿啼【江南通志水西山在宁国府泾县西五里林壑邃密下临泾溪旧建宝胜崇庆白云三寺浮屠对峙楼间参差碧山浮烟咫尺万状晋葛洪刘遗民唐李白杜牧之皆常游憩於此宝胜寺即水西寺白云寺即水西首寺崇庆寺即天宫水西寺也泾溪在泾县西南一里下流至芜湖入江孙绰天台山赋振金策之铃铃李善注金策锡杖也云梯谓山中磴道梯之而上如入云中故曰云梯法苑珠林沙门支遁字道林陈留人也神宇隼发为老释风流之宗神僧传释慧远本姓贾氏雁门楼烦人也少为诸生博综六经尤善老庄性度弘伟风监朗拔虽宿儒英達莫不服其深致後闻沙门释道安讲波若经豁然而悟投簪落□委命受业既入乎道厉然不羣常欲总摄纲维以大法为己任 唐诗品彙云七言排律唐人不多见如太白别仙僧高适宿田家等作虽聯对精密而律调未纯终是古诗体段】

赠别王山人归布山

王子析道论微言破秋毫还归布山隐兴入天云高尔去安可迟瑶草恐衰歇我心亦怀归屡梦松上月【许本作衣】傲然遂独往长啸开岩扉林壑久已芜石道生薔薇愿言弄笙鹤岁晚来相依【三国志注管辂别传曰何尚书神明精微言皆巧妙巧妙之至殆破秋毫孙绰太尉庾亮碑微言散於秋毫玄风畅乎德音诗小雅岂不怀归】

江夏别宋之悌

楚水清若空遥将碧海通人分千里外兴在一杯中谷鸟吟晴日江猿啸晚风平生不下泪於此泣无穷【刘桢诗烟峯晦如昼寒水清若空陆放翁入蜀记自鸛鵒洲以南为汉水水色澄澈可监太白云楚水清若空盖言此也】

李太白集注卷十五

卷十六

钦定四库全书

李太白集注卷十六

钱塘 王琦 撰

古近体诗共二十一首

南阳送客

斗酒勿爲【一作与】薄寸心贵不忘坐惜故人去偏令游子伤离顔怨芳草春思结垂杨挥手再三别临岐空断腸【古诗斗酒相娱乐聊厚不为薄谢眺诗坐惜红粧变刘铄诗挥手从此辞张铄注挥手举手辞别也】

送张舍人之江东

张翰江东去正值秋风时天清【一作晴】一鴈远海濶孤帆迟白日行欲暮沧波杳难期【一作白日行已晚欲暮杳难期】吴洲如【一作好】见月千里幸相思【晋书张翰爲大司马东曹掾因见秋风起乃思吴中菰菜蓴羹鲈鱼脍曰人生贵得适意何能羈宦数千里以要名爵乎遂命驾而归杨素诗千里悲无驾一见杳难期顔延年诗振楫发吴洲谢庄月赋隔千里兮共明月】

送王屋山人魏万还王屋【唐诗纪事魏万後名颢上元初登第始见李白於广陵白曰尔後必着大名於天下无忘老夫与明月奴因尽出其文命颢集之详见三十一卷魏颢序中】

王屋山人魏万云自嵩宋沿吴相访【繆本作送】数千里不遇乘兴游台越经永嘉观谢公石门後於广陵相见美其【萧本作面】爱文好古浪迹方外因述其行而赠是诗【一作见王屋山人魏万云自嵩历兗游梁入吴计程三千里相访不遇因下江东寻诸名山往复百越後於广陵一面遂乘兴共过金陵此公爱奇好古独往物表因述其行李遂有此作】

仙人东方生浩荡弄云海沛然乘天游独往失所在【一作东方不辞家独访紫泥海时人少相逢往往失所在】魏侯继大名本家聊摄城卷舒入元化【一作杂仙隐】迹与古贤并十三弄文史挥笔如振绮辩折田巴生心齐鲁连子西涉清洛源颇惊人世喧采秀卧王屋因窥洞天门【以上美万之爱文好古而隐居王屋之事汉武内传东方朔一旦乘龙飞去同时衆人见从西北上冉冉仰望良久大雾覆之不知所适左传晋侯赐毕万魏以爲大夫卜偃曰毕万之後必大万盈数也魏大名也以是始赏天启之矣又左传聊摄以东姑尤以西杜预注聊摄齐西界也平原聊城县东北有摄城路史聊摄故博平是今聊城东北三十里有故摄城或

以聊摄为一城误一统志聊城在东昌府城西北十五里摄城在博平县西南二十里太平御覽鲁连子曰齐之辩士田巴辩於沮丘议於稷下毀五帝罪三王訾五伯离坚白合同异一日而服千人有徐劫者其弟子曰鲁连谓徐劫曰臣愿得当田子使之不敢复谈徐劫言之田巴曰走弟子年十二耳然千里驹也愿得侍议於前可乎田巴曰可於是鲁连往见曰臣闻堂上之粪不除郊草不芸白矢交前不救流矢何者急者不救缓者非务今楚军南阳赵伐高唐燕人十万之衆在聊城而不去国亡在旦暮先生将奈何田巴曰无可奈何鲁连曰危不能爲安亡不能爲存则无贵学士矣今臣将罢南阳之师还高唐之兵却聊城之衆所贵谈说者为若此也若不能者如先生之言有似梟鸣出声而人皆恶之愿先生勿复谈也田巴曰谨受教明日见徐劫曰先生之驹乃飞兔騊也岂特千里哉於是杜口易业终身不复谈潘岳藉田赋清洛浊渠引流激水史记正义括地志曰洛水出商州洛南县西冢岭山东北流入河楚词采三秀兮山间王逸注三秀谓芝草也元和郡县志王屋山在河南府王屋县北十五里周围一百三十里高三十里尚书禹贡底柱析城至於王屋是也太平寰宇记王屋山在泽州阳城县南五十里仙经云王屋山有仙宫洞天广三千里号小有清虚洞天山高八千丈广数百里太行析山爲佐命中条古钟爲辅翼三十六洞小有爲羣洞之尊四十九山王屋爲重山之最实不死之灵乡真人之洞境也名山洞天福地记王屋洞周围一万里名小有清虚之天在东都】
竭来游嵩峰羽客何双双朝携月光子暮宿玉女窻?谷上窈窕龙潭下奔湍东浮汴河水访我三千里逸兴满吴云飘颻浙江汜挥手杭越间樟【萧本作章】亭望潮还涛卷海门石云【繆本作雪】横天际山白马走素车雷奔骇心颜【以上叙其自嵩宋沿吴相访之事大人赋回车竭来兮絶道不周通雅竭来何来也元和郡县志嵩高山在河南府登封县北八里亦名方外山东曰太室西曰少室嵩高其总名即中岳也山高二十里周围一百三十里艺文类聚仙经云嵩高山东大岩下石孔方圆一丈四方北入五六里有大室高三十余丈周围三百步自然明烛相见如日月无异中有十六仙人云月光童子常在天台时亦往来此中人非有道不得望见五色线图经云嵩山有玉女窗汉武帝於窗中见玉女谢绛游嵩山书云进窥玉女窗捣衣白石诚异窗则亡是玉女窗在宋时已无之矣元和郡县志?谷在河南府告成县北五里即六国时?谷先生所居也一统志?谷在河南府登封县北五里史记苏秦洛阳人师事於齐而习於?谷即此史记集解徐广曰颍川阳城有?谷尉迟汾状嵩高灵胜诗自注九龙潭在寺侧崇崖对耸壁立千仞九曲分蓄 黑不测一统志龙潭在登封县东二十五里嵩顶之东九潭相接其深莫测登封县志九龙潭在太室东岩山巔有水流下激冲成潭盈坎而出复作一潭共有九潭逦相灌输水色洞黑其深无际崖?险峻波涛怒激登临者至此辄凜然生畏焉有石记戒人游龙潭者勿语笑以黥龙神神怒则有雷恐毛茌诗传溱水会也说文小水入大水曰溱玉海汴河盖古萇荡渠也首受黄河水隋开浚以通江淮漕运兼引汴水亦曰通济渠一统志汴河源出荥阳县大周山合東溱须郑四水东南至中牟县北入於黄河聂心汤钱塘县志钱塘江在县之东南本名浙江虞喜云潮水投浙江下折而曲一云江有反涛水势折归故云浙江卢肇曰浙者折也盖取其潮出海屈折而倒流也一名折河山海经云禹治水至於折河又名曲江枚乘七发曰观涛於广陵之曲江今名钱塘江其源发黟县曲折而东以入於海潮水昼夜再上奔腾冲击声撼地轴陆机诗愿假归鸿翼翻飞浙江汜挥手以手指画也杭谓杭州余杭郡古时爲越国西境越谓越州会稽郡古时爲越国都城二郡中隔浙江江之北爲杭州江之南爲越州咸淳临安志樟亭驿晏公輿地志云在钱塘县旧治之南五里今为浙江亭西溪丛语浙江夹岸有山南曰弁北曰赭二山相对谓之海门岸狭势逼涌而爲涛枚

乘七发观涛於广陵之曲江其始起也淋淋焉若白鹭之下翔其少进也浩浩澄澄如素车白马帷盖之张陵赤岸簪扶桑横奔似雷行 濛音丛】遥闻会稽美一弄【一作且度】耶溪水万壑与千岩崢嶸镜湖里秀色不可名清辉满江城人游月边去舟在空中行此中久延伫入剡寻王许笑读曹娥碑沉吟黄绢语天台连四明日入向国清五峰转月色百里行松声灵溪恣【萧本作咨】沿越华顶殊超忽石梁横青天侧足履半月【以上叙其乘兴游台越之事太平寰宇记若耶溪在越州会稽县东南二十八里世说顾长康从会稽还人问山川之美顾云千岩竞秀万壑争流草木蒙笼其上若云兴霞蔚施宿会稽志镜湖在会稽县东二里故南湖也一名长湖又名太湖通典云东汉永和五年太守马臻始筑塘立湖周三百一十里溉田九千余顷人获其利王逸少有云山陰路上行如在镜中游镜湖之得名以此輿地志云山陰南湖萦带郊郭白水翠岩互相映发若镜若图延伫迁延企望之意楚辞延伫乎吾将返元和郡县志剡县西北去越州一百八十五里晋书会稽有佳山水名士多居之孙绰李充许询支遁等皆以文义冠世并筑室东土与王羲之同好太平寰宇记曹娥碑地志云余姚有孝女曹娥父泝涛而死娥年十四号痛入水因抱父屍出而死县令度尚使门生邯鄲子礼为碑文後蔡邕过读碑乃题八字曰黄绢幼妇外孙藿白此碑今在上虞县水滨世说魏武尝过曹娥碑下杨修从碑背上见题作黄绢幼妇外孙藿白八字魏武谓修曰解否答曰解魏武曰卿未可言待我思之行三十里魏武乃曰吾已得令修别记所知修曰黄绢色丝也於字为絶幼妇少女也於字为妙外孙女子也於字为好藿白受辛也於字为辞所谓絶妙好辞也魏武亦记之与修同太平寰宇记天台山在台州西一百一十里临海记云天台山超然秀出山有八重视之如一凡高一万八千丈周围八百里又有飞泉悬流十仞似布登真隐诀注云此山在桐柏山後四明山东南三百里启蒙记注云天台山去天不远路经油溪水深险清冷前有石桥路径不盈尺长数十丈下临絶冥之涧惟忘其身然後能跻跻者梯岩壁援萝葛之茎度得平路见天台山蔚然绮秀列双岭於青霄上有琼楼玉阙天堂碧林醴泉仙物毕具也晋隐士帛道猷得过之获醴泉紫芝灵药今石桥名相山又道书所谓玉堂天台山其山八重视之如一中有金庭不死之乡许迈与王逸少书云自山陰至临海多有金庭玉堂仙人芝草也四明山在越州余姚县西南一百里会稽记云县南有四明山高峰轶云连岫蔽日孙绰天台赋序云涉海则有方丈蓬莱登陆则有四明天台宁波府志四明山发自天台屹峙於郡治之坤隅上有二百八十峰绵亘明越台三州之境为三十六洞天之一九域志景德寺旧名国清寺隋煬帝在藩日为智顗禅师所建唐会昌五年废大中五年再建柳公权书额时以齐州灵岩荊州玉泉润州栖霞台州国清爲四絶天台山志国清寺在天台县北十里旧名天台寺昔智者大师初入天台游历山水宿石桥有一老僧谓之曰仁者若欲造寺山下有皇太子寺基舍以仰给智者曰正如今日草舍尚难当於何时能办此寺老僧曰今非其时三国成一大势力人能起此寺寺若成国即清当呼爲国清寺後将灭时复标杙山下又画殿堂为图以作樣式後晋王命司马王弘依图造寺高敞秀丽方之释宫呼为国清寺五峰在国清寺侧其峰有五正北曰八桂东北曰灵禽东南曰祥云西南曰灵芝西北曰映霞前有双涧合流南注大溪凿字岩在县北三里岩上有万松径三字相传昔时由岩至国清寺大松成列今无矣灵溪在县北十五里福圣观前今县东三十里亦有灵溪盖其名适类也孙绰赋云过灵溪而一濯疏烦想於心胸华顶峰在县东北六十里乃天台第八重最高处高一万八千丈周围一百里少晴多晦夏有积雪中有黄金洞石色光明登降魔塔东望沧海弥漫无际号望海尖可观日之出没下瞰衆山如龙虎蟠踞旗鼓布列之状草木薰郁殆非人世天台九峰翠嶺犹如莲花此为华心之

顶故名华顶鲍照诗明涧子沿越飞萝子系牵王巾头佗寺碑文东望平臯千里超忽吕向注超忽远貌侧足者言石桥险狭仅可侧足而行半月喻石桥弯环之状】眷【一作忽】然思永嘉不憚海路賒挂席历海峤回瞻赤城霞赤城渐微没孤屿前嶢兀水续万古流亭空千霜月缙云川谷难石门最可观瀑布挂北斗莫穷此水端喷壁洒素雪空蒙生昼寒却思【繆本作寻】恶溪去宁惧恶溪恶咆哮七十滩水石相喷薄路创李北海岩开谢康乐【一作岭路始北海岩诗题康乐杨升庵引此诗作远寻恶溪去不憚恶溪恶途传李北海滩闻谢康乐以岩字为误】松风和猿声搜索连洞壑径出【一作岸接】梅花桥双溪纳归潮落帆金华岸赤松若可招沈约八咏楼城西孤迢嶢迢嶢四荒外旷望羣川会云卷天地【繆本作池】开波连浙西大乱流新安口北指严光瀨钓台碧云中邈与苍岭【繆本作梧】对【以上叙其自台州泛海至永嘉徧游缙云金华诸名胜之事唐之永嘉郡即温州也隶江南东道谢灵运诗挂席拾海月太平寰宇记赤城山在天台县北六里孔灵符会稽记云赤城山土色皆赤状似云霞登真隐诀云此山下有洞在三十六小洞天数其山是赤城丹洞周回三百里名上玉清平天也孙绰天台赋云赤城霞起以建标瀑布飞流而界道又述异记云赤城山一峯特高可三百丈丹壁烁日一统志孤屿山在温州府城北有东西二峯峰上各有塔薛方山浙江通志永嘉县北曰孤屿山在永宁江中东西两峰相峙唐之缙云郡即处州也隶江南东道太平寰宇记处州缙云县有缙云山名山记云孤石干云高可三百丈黄帝鍊丹於此郡国志云缙云有瀑布日照如晴虹风吹如细雨即此山方輿胜覽石门洞在处州青田县西七十五里两峰壁立高数十丈相对如门因名有瀑布直泻至天壁凡三百尺自天壁飞洒至下潭凡四百尺有亭曰喷雪道书载青田山元鹤洞天即此薛方山浙江通志处州青田县有石门山在石盖山之西十里两峰对峙如门中有洞曰石门洞道书所谓元鹤洞天乃三十六洞天之第三十也西南高谷有瀑布泉自上潭奔流至天壁三十余丈自天壁至下潭四十余丈旧在榛莽间至刘宋时永嘉守谢灵运性好游覽始觅此洞说文蒙微雨也元和郡县志处州丽水县有丽水本名恶溪以其湍流岨嶮九十里间五十九瀨名爲大恶开皇中改爲丽水皇朝因之以爲县名太平寰宇记恶溪出处州丽水县东北大瓮山西南二百一十五里至括州城下谢灵运与从弟惠连书云出恶溪至大江水清如镜輿地志云恶溪道间九十里而有五十九瀨两岸连云高岩壁立诸书皆云五十九滩而此云七十滩所未详也太白自注李公邕昔为括州开此岭路唐书李邕传开元二十三年起为括州刺史後历淄滑二州刺史上计京师出为汲郡北海太守时称李北海又太白自注恶溪有谢康乐题诗处方輿胜覽谢公岩在好溪上亦名康乐岩一统志谢公岩在缙云县南十里一名康乐岩谢灵运游宴之地王褒洞箫赋玄猿悲嘯搜索乎其间李善注搜索往来貌梅花桥今无考当在梅花溪之上薛方山浙江通志金华县东石碕岩高十余丈俯瞰大溪岩下有洞曰梅花洞又名梅花溪双溪在金华县南一曰东港一曰南港东港之源出东阳之大盆山过义乌合衆流西行入县境又合杭慈溪白溪东溪西溪坦溪玉泉溪赤松溪之水经马铺岭石碕岩下与南港会南港之源出缙云之黄碧山过永康武义入县境又合松溪梅溪之水经屏山西北行与东港会於城下故曰双溪又名□溪西行受白沙溪桐溪盘溪之水入於兰溪会衢水北折於桐江同新安之水东流於浙江放於海元和郡县志金华山在婺州金华县北二十里赤松子得道处太平寰宇记金华县有赤松涧赤松子游金华山以火自烧而化故山上有赤松之祠涧自山而出故曰赤松涧薛方山浙江通志金华县北有赤松山相传黄初平叱石成羊处初平号赤松故山以是名後人为之立祠名赤松宫一统志八咏楼在金华府治西南隅旧名玄畅楼南齐太守沈约建有登台望

秋月会圃临春风秋至愍衰草寒来悲落桐夕行闻夜鹤晨征听晓鸿解佩去朝市被褐守山东八咏诗金华府志南齐隆昌元年沈约以吏部郎出爲东阳太守题八诗於玄畅楼後人更为八咏楼云方輿胜覽八咏楼在婺州子城西即沈隐侯玄畅楼至道间郡守冯伉更今名琦按自太白诗外崔颢有题沈隐侯八咏楼诗及严维明月双溪水清风八咏楼之句八咏之名盖不始於宋矣庄子南溟者天池也唐六典注浙江水有三源一出歙州一出衢州一出婺州历睦杭越三州界入海薛方山浙江通志新安江一名清溪出徽州自歙经淳安县界至严州府城南合婺港东入浙江富春山在严州桐庐县西三十五里一名严陵山清丽奇絶号锦峰绣岭前临大江乃汉严子陵钓处也人称为严陵瀨有东西二钓台各高数百丈西征记云自桐君而西羣山蜿蜒如两蛇对走於平野之上三江之水并流於其间惊波间驰秀壁双峙上有严子陵钓台孤峰特操耸立千仞奔走名利汨没尘埃者一过其下清风袭人毛髮立使人有遗世独立之意又西曰七里滩太平寰宇记严子陵钓台在桐庐县南大江侧坛下连七里瀨按东观汉记云光武与子陵友旧及登位望之陵隐於孤亭山垂钓为业时知天文者奏每日出常有客星同流帝曰严子陵耳访得之陵不受封今郡有台并坛亦谓严陵瀨一统志钓台在严州府城东五十里东西二台各高数百丈汉严子陵垂钓处避暑録话严陵滩东西二钓台各在山巔与滩不相及突然石出峰外略如台上平可坐数十人因以名耳薛方山浙江通志苍岭在台州仙居县西北九十里高五千丈周回八十里界於縉云重冈复径随势高下其险峭峻絶为东浙之最行者病焉又云处州縉云县有括苍山一名苍岭图经载十六洞天括苍为第十名成德隐真洞天周三百里东跨仙居南控临海吴录云括苍山登之俯视雷雨高一万六千丈棠溪赤溪管溪三水分流环遶其下岫音序】稍稍来吴都徘徊上姑苏烟緜横九疑潏荡【一作荡潏繆本作潏荡】见五湖目极心更远悲歌但长吁回桡楚江滨挥策扬子津身着日本裘昂藏出风尘五月造我语知非佞【繆本作儻】僂人相逢乐无限水石日在眼徒干五诸侯不致百金产吾友扬子云弦歌播清芬虽为江宁宰好与山公羣乘兴但一行且知我爱君【以上叙其自姑苏至广陵相见之事刘渊林三都赋注吴都者苏州是也通典苏州春秋吴国之都也自阖闾後并都於此艺文类聚吴地记曰吴王阖闾十一年起台於姑苏山因山为名西南去国三十五里春夏游焉後夫差复高而饰之越伐吴遂见焚太史公云余登姑苏望五湖五湖去此台二十余里吴地记姑苏台在吴县西南三十五里阖闾造经营九年始成其台高三百丈望见三百里外作九曲路以登之宋范至能曰与客登苏台山顶正平有坳堂薛石可列坐相传为吴故宫闲台别馆其前湖光接松陵独见孤塔之尖少北点墨一螺爲崑山其後西山竞秀攒青丛碧与洞庭林屋相宾大约目力踰百里具登高临远之胜琦按登姑苏以望五湖自是实景若九疑远在湖广南垂相去数千里岂目力所能及或者设为想像之辞耳否则是其所望见之山其时亦有冒九疑之名者因指而入咏亦未可定陆羽慧山寺记曰慧山古华山也顾欢吴地记云在吴城西北一百里其山有九陇俗谓之九陇山或曰九龙山或曰鬪龙山九龙者言山陇之形若苍虬縹螭合沓然鬪龙者相传隋大业末山上有龙鬪六十日因名此山当太湖之西北隅萦竦四十余里惟中峰有丛篁灌木余尽古石嵌崿而已凡烟岚所集发於萝薜今石山横亘浓翠可掬周柱史伯阳谓之神山岂虚言哉九疑或是指此耳江南通志五湖在吴郡西南三十余里禹贡谓之震泽周礼谓之具区左氏谓之笠泽史记谓之五湖今之太湖也其大三万六千顷东西二百余里南北一百二十里延袤五百余里湖中有七十二山跨苏湖常三州北有百渚纳建康常润数郡之水南有诸漚纳宣歙临安苕霅诸溪之水东南巨浸无大於此广韵桡楫也韵会櫂之短者吴越人呼为桡

江南通志扬子津在扬州府城南十五里一名扬子渡唐高宗永淳间扬子县也旧时建康有四津横江为建康之西津扬子为建康之东津太白自注裘则朝卿所赠日本布为之朝卿事详见後二十五卷注史记正义倭国武皇后改曰日本国在百济国隔海依岛而居凡百余小国太平寰宇记倭有名日本自云国在日边因以爲称盖恶旧名也陆机周孝侯碑昂藏僚采之上五月虽纪时节亦是暗用披裘公事耳广韵伶儗不前也儗儗痴貌韵会伶儗固滞貌田汝成曰言人进退不果曰伶儗扬子云谓杨利物太白有江宁宰杨利物画赞即是此人陆机文赋诵先人之清芬世说山季伦为荊州时出酣畅人为之歌曰山公时一醉径造高阳池日暮倒载归酩酊无所知复能乘骏马倒着白接?举手问葛强何如并州儿 桡音饶伶儗音炽义儗音贷碍】君来几何时仙台应有期东窗绿玉树定长三五枝至【一作如】今天坛人当笑尔归迟我苦惜远别茫然使心悲黄河若不断白首长相思【以上叙其还山而相别也一统志天坛山在怀庆府济源县西一百二十里王屋山北山峯突兀其东曰日精西曰月华絶顶有石坛名清虚小有洞天旦有五色影夜有仙灯按天坛山即王屋山中之一峰也黄河若不断白首长相思此是倒装句法谓白首相思若黄河之水絶无断絶时耳】

金陵洲翰林谪仙子 王屋山人魏万

君抱碧海珠我怀蓝田玉各称希代宝万里遥相烛长卿慕蔦久子猷意已深平生风云人暗合江海心去秋忽乘兴命驾来东土谪仙游梁园爱子在邹鲁二处一不见拂衣向江东五两挂淮月扁舟随海风南游吴越徧高揖二千石雪上天台山春逢翰林伯宣父敬项橐【一作托】林宗重黄生一长复一少相看如弟兄惕然意不尽更逐西南去同舟入秦淮建业龙盘处楚歌对吴酒借问承恩初宫买长门赋天迎驷马车才高世难容道废可推命安石重携妓子房空谢病金陵百万户六代帝王都虎石踞西江锺山临北湖湖山信为美王屋人相待应爲岐路多不知岁寒在君游早晚还勿久风尘间此别未远别秋期到仙山【後汉书蓝田出美玉长安志蓝田山在长安县东南三十里其山产玉亦名玉山汉书司马相如字长卿少时名犬子既学慕蔦相如之为人也更名相如世说王子猷居山陰夜大雪眠觉开室命酌酒四望皎然忽忆戴安道即便夜乘小船就之经宿方至造门不前而返人问其故王曰吾本乘兴而行兴尽而返何必见戴郭璞江赋觐五两之动静李善注许慎淮南子注曰統候风也楚人谓之五两汉书范蠡乃乘扁舟浮江湖孟康注扁舟特舟也唐书贞观十一年诏尊孔子为宣父史记项橐生七岁为孔子师後汉书郭林宗少游汝南先过袁闓不宿而退後往从黄宪累日方还或以问林宗林宗曰奉高之器譬诸泛滥虽清而易挹叔度汪汪若干顷陂澄之不清淆之不浊不可量也方輿胜覽秦淮在上元县南三里始皇时望气者言金陵有天子气使朱衣凿山为渎以断地脉以秦开故曰秦淮或曰淮水发源屈曲不类人工一统志秦始皇以金陵有都邑之气改曰秣陵吴自京口徙都於此改为建业晋平吴改建业为秣陵寻分秣陵北为建业建兴初改为建康汉陈皇后退居长门宫奉黄金百斤为司马相如取酒相如为作长门赋详见四卷注汉书朱买臣拜会稽太守长安廐吏乘驷马车来迎买臣遂乘传去晋书谢安虽放情丘壑然每游赏必以妓女从史记留侯性多病即导引不食谷杜门不出太平御覽丹阳记曰石头城吴时悉土塢义熙初始加砖瓮因山以为城因江以为池地形险固尤有奇势故诸葛亮云锺山龙蟠石城虎踞良有之矣六朝事迹吴孙权於江岸必争之地筑城名曰石头常以腹心大臣镇守之今石城故基乃杨行密稍迁近南夹淮带江以尽地利其形势与

长干山连接輿地志云环七里一百步在县西五里去台城九里南抵秦淮口今清凉寺之西是也诸葛亮论金陵地形云锺阜龙蟠石城虎踞真帝王之宅正谓此也太平广记锺山今江宁东北蒋山是也江南通志玄武湖在江宁府太平门外一名蒋陆湖晋元帝改名北湖宋武帝改名习武湖元嘉中因黑龙见改名玄武湖此诗杨萧本不载今从繆本补录】

送当涂赵少府赴长芦【唐时有二长芦一是长芦县隶河北道之沧州一是长芦镇在淮南道扬州之六合县南二十五里陆放翁入蜀记曰发真州过瓜步山望长芦寺楼堽重复江面渺弥无际殊可畏李太白诗云维舟至长芦目送烟云高是也则谓是六合之长芦也】

我来扬都市送客回轻舠因夸楚【繆本作吴】太子便覩广陵涛仙尉赵家玉英风凌四豪维舟至长芦目送烟云高摇扇对酒楼持袂把蟹螯前途傖相思登岳一长谣【唐书地利志扬州广陵郡隶淮南道广韵舠小船也枚乘七发楚太子有疾吴客往问之客曰将以八月之望与诸侯远方交游兄弟并往观涛乎广陵之曲江陶弘景瘞鹤铭丹阳仙尉江陰真宰汉梅福为南昌尉人传以为仙去称尉曰仙尉本此汉书以信陵平原孟尝春申四君为四豪详见十二卷注世说毕茂世云一手持蟹螯一手持酒杯拍浮酒池中便足了一生赵景真与嵇茂齐书昔李叟入秦及关而叹梁生适越登岳长谣夫以嘉遁之举犹怀恋恨况乎不得已者哉李善注老子之叹不为入秦梁鸿长谣不由适越且复以至郊为及关升邱为登岳斯盖取意而略文也太白引用取义又异於此可窥古人用事之法】

送友人寻越中山水

闻道稽山去偏宜谢客才千岩泉洒落万壑树萦回东海横秦望西陵遶越台湖清霜【许本作双误】镜晓涛白雪山来八月枚乘笔三吴张翰杯此中多逸兴早晚向天台【晋书夏统传先公惟寓稽山朝会万国周书齐宪王传兴稽山之会总盟津之师称会稽山为稽山本此锺嵘诗品钱塘杜明师夜梦东南有人来入其馆是夕谢灵运生於会稽旬日而谢玄亡家以子孙难得送灵运於杜治养之十五方还都故名客儿世说顾长康从会稽还人问山川之美顾曰千岩竞秀万壑争流鲍照诗千岩盛阻积万壑势萦回水经注秦望山在州城正南为衆峰之杰陟境便见史记云秦始皇登之以望南海自平地以取山顶七里悬磴孤危径路险絶攀萝扞葛然後能升山上无草木当由地迴多风所致施宿会稽志秦望山在会稽县东南四十里旧经云衆岭最高者水经注浙江又径固陵城北昔范蠡筑城於浙江之滨言可以固守谓之固陵今之西陵也有西陵湖亦谓之西城湖湖西有湖城山东有夏架山湖水上承妖皐谿而下注浙江嘉泰会稽志西陵城在萧山县西一十二里方輿胜览西兴渡在萧山县西十二里本名西陵吴越武肃王以非吉语改曰西兴述异记勾践延四方之士作台於外而馆之今会稽山有越王台一统志越王台旧在种山东北越王勾践登眺之所宋汪纲复建在山之西麓太平御览王羲之云每行山陰道上如镜中游王献之望镜湖澄澈清流泻注乃云山川之美使人应接不暇八月枚乘笔用七发中八月观涛事已见前首注晋书张翰吴郡吴人也任心自适不求当世曰使我有身後名不如即时一杯酒】

送族弟凝之滁求婚崔氏【唐时滁州隶淮南道】

与尔情不浅忘筌已得鱼玉台挂宝镜持此意何如坦腹东牀下由来志气疎遥知向前路擲果定盈车【筌与荃同庄子荃者所以在鱼得鱼而忘荃蹄者所以在兔得兔而忘蹄言者所以在意得意而忘言吾安得夫忘言之人而与之言哉陆德明注荃七全反崔音孙香草也可以饵鱼或云积柴水中使鱼依而食焉一云鱼笱也世说温公丧妇从姑刘氏家值乱离散唯有一女甚有姿慧姑以属公觅婚公密有自婚意荅曰佳婿难得但如峤比云何姑曰丧乱之余乞粗存活便足慰吾余年何敢希汝比却後少日公报姑曰已觅得婚处门第粗可婿身名宦尽不减峤因下玉镜台一枚姑大喜既婚交礼女以手披纱扇拊掌笑曰我固疑是老奴玉镜台是公爲刘越石长史北征刘聪所得晋书太尉郗鉴使门生求女壻於王导令就东厢徧观子弟门生归谓鉴曰王氏诸少并佳然闻信至咸自矜持惟一人在东牀坦腹食独若不闻鉴曰此正佳壻耳访之乃羲之也遂以女妻之世说注语林曰潘安仁至美每行老嫗以果擲之蒲车 筌音詮】

送友人游梅湖【初学记始兴有梅湖北堂书钞地里志云梅湖者昔有梅筏沉於此湖有时浮出至春则开花流满湖矣玩诗内新林浦金陵月之句此地当与金陵相近】

送君游梅湖应见梅花发有使寄我来无令红芳歇暂行新林浦定醉金陵月莫惜一雁书音尘坐胡越【太平御览荆州记曰陆凯与范蔚宗善自江南寄梅花一枝诣长安与范并赠诗曰折梅逢驿使寄与陇头人江南无所有聊赠一枝春胡三省通监注新林浦去今建康城二十里西值白鹭洲诗人用雁书悉本汉书苏武传中诳匈奴事非实有其事也胡越者胡在北越在南以喻间隔而不相闻之意】

送崔十二游天竺寺【咸淳临安志天竺寺者余杭之胜刹也飞来峰者武林之奇巘也晋时梵僧慧理指此山乃灵鹫之一小岭不知何年飞来至此挂锡置院初曰翻经隋开皇中法师真观广之改为天竺寺琦按杭州天竺寺有三上天竺寺创自石晋天福间道翊禅师得异木刻以为大士像吴越忠懿王即其地创佛庐奉之号天竺观音看经院者是也中天竺寺创自宋太平兴国元年吴越王即宝掌禅师道场旧趾改建号崇壽院者是也下天竺寺创自隋开皇中真观法师即慧理之翻经院改建号南天竺寺者是也上中二寺皆唐以後所建其始亦无天竺寺之名唐之天竺寺乃今之下天竺也】

还闻天竺寺梦想怀东越每年海树霜桂子落秋月送君游此地已属流芳歇待我来岁行相随浮溟渤【杭州春秋时为越地而在东方故曰东越与史汉称东瓯为东越者不同咸淳临安志旧俗所传月坠桂子惟天竺素有之唐天宝中寺前一子成树今月桂峰在焉刺史白居易诗云宿因月桂落醉为梅榴开注云天竺尝有月中桂子落又东城桂诗云子堕本从天竺寺根盘今在阖闾城注云旧说杭州天竺寺每岁秋中有月桂子坠又刺史卢公辅诗云远客徧求月桂子老僧不志石莲花刘铈诗屡见流芳歇鲍照诗穿池类溟渤溟溟海渤海也】

送杨山人归天台

客有思天台东行路超忽涛落浙江秋沙明浦阳月今游方厌楚昨梦先归越且尽秉烛欢无

辞凌晨发我家小阮贤剖竹赤城边诗人多见重官烛未曾然兴引登山履情催泛海船石桥如可度携手弄云烟【王中头陀寺碑文东望平臯千里超忽吕向注超忽远貌元和郡县志浙江在杭州钱塘县南一十二里庄子云浙河即谓浙江盖取其曲折为名江涛每日昼夜再上尝以月十日二十五日最小月三日十八日最大小则水渐涨不过数尺大则涛涌高至数丈每年八月十八日数百里士女共观舟人渔子泝涛触浪谓之弄涛浦阳江在婺州浦阳县西北四十里出桑溪山岭东入越州诸暨县施宿会稽志浦阳江源出婺州浦阳北流一百二十里入诸暨县溪又东北流由峡山直入临浦湾以至海俗名小江一名钱清江古诗昼短苦夜长何不秉烛游小阮谓阮籍之侄阮咸也後人谓侄曰小阮本此谢灵运诗剖竹守沧海太平寰宇记赤城山在台州天台县北六里文献通考唐李嘉佑别名从一赵州人天宝七年进士为秘书正字袁台二州刺史善为诗绮靡婉丽有齐梁之风时以比吴均何逊云唐诗纪事李嘉佑上元中尝为台州刺史大历间刺袁州与严维刘长卿冷朝阳友善嘉佑有送从叔阳冰寄从弟纾及侄端诗盖三子之族也艺文类聚谢承後汉书曰巴祗为扬州刺史与客坐暗暝之中不燃官烛太平御览会稽典录曰陈修字奉迁乌伤人也为豫章太守修性清洁履约恭俭十日一炊不然官烛南史谢灵运寻山陟岭必造幽峻登蹑尝着木屐上山则去其前齿下山则去其後齿晋书谢安尝与孙绰等泛海风起浪涌诸人并惧安吟啸自若舟人以安为悦犹去不止风转急安徐曰如此将无归耶舟人承言即回衆咸服其雅量法苑珠林天台悬崖峻峙峰岭切天古老相传云上有往时精舍得道者居之虽有石桥跨涧而横石断人且莓苔青滑自终古以来无得至者】

送温处士归黄山白鹅峰旧居【方輿胜览黄山旧名黟山在徽州歙县西北一百二十八里高一千一百八十仞郡志其山有摩天戛日之高宣歙池饶江等州山并是此山之支脉矣诸峰有如削成烟岚无际雷雨在下其霞城洞室岩窦瀑泉则无峰不有信灵仙之窟宅山势西北中坼望之类太华山有峯三十六其水源亦三十六溪二十四洞十有二岩八水流而下合扬之水为浙江之源第四峯有泉沸如汤常涌朱砂世传黄帝尝命驾与容成子浮丘公同游合丹於此其後又有仙人曹阮之属琦按黄山图白鹅峰在石门峰乌泥岭之间志云吟啸桥在白鹅岭下名最着钱百川曰李白有送温处士归黄山白鹅峰诗今白鹅峰不在三十六峰之列盖三十六峰皆高七百仞以上其外诸峯高二三百仞者不与焉白鹅峰亦诸峰之一也】

黄山四千仞三十二莲峰丹崖夹石柱菡萏金芙蓉伊昔昇絶顶下窥天目松仙人链玉处羽化留余踪亦闻温伯雪【一作云】独往今相逢采秀辞五岳攀岩历万重归休白鹅岭渴饮丹砂井凤吹我时来云车尔当整去去陵阳东行行芳桂丛回谿十六度碧嶂尽晴空他人还相访乘桥蹑彩虹【黄山志江以南诸山最黄山其高四千仞按黄山诸峯最高者志称九百仞止矣四千仞者大都自山麓平地而准拟之诸书皆言黄山之峰三十有六而白诗只言三十有二盖四峰唐以前未有名也山志云羣峰耸秀罗列当前曰青鸾曰朱砂曰天都曰老人曰鉢盂尽作莲花莲蕊状嵇康琴赋丹崖嶮巖青壁万寻广韵菡萏荷花未舒也邢昺尔雅疏今江东人呼荷花为芙蓉说文未发为菡萏已发为芙蓉埤雅萼曰芙蓉秀曰菡萏乐府子夜歌玉藕金芙蓉按山志莲花峰在朱砂峯北高九百仞石蕊中尊千叶簇簇如瓣并峙诸山皆及肩而止无敢争高者汪晋谷云峰巍然中立环视万峯面面皆莲而此峰为衆莲母石柱峰

在碁石峯西北高七百九十仞亭亭独上刺日撑霄其形俨如天干芙蓉峰在松林峰西高七百五十仞巖嵒峭拔如菡萏一枝向天而开青天削出芙蓉惟此足当之是莲花石柱芙蓉皆黄山峰名而诗意则谓黄山三十二峰皆如莲花丹崖夹峙中植立若柱然其顶之圆平者如菡萏之未舒其顶之开敷者如芙蓉之已秀未尝专指三峯而言也太平寰宇记杭州於潜县有天目山上有两湖若左右目故名天目也山极高峻上多美石泉水名茶咸淳临安志天目山在临安县西五十里高三千九百丈周回八百里有三十六洞为仙灵所居水经注於潜县北天目山山极高峻崖岭竦叠西临後洞山上有霜木皆是数百年树谓之翔凤林山志引郡国志云浙江天目山高一万八千丈仅及黄山之麓盖地势自高而下有如建瓴黄山上峙於高原天目峭拔乎卑壤以卑拟高则天目之顶仅及黄山之趾太白所谓昇絶顶而下窥天目松者良有以也鲍照诗至哉链玉人处此长自毕山志链丹峰高八百七十仞相传浮丘公链丹峯顶经八甲子丹始成黄帝服七粒不藉云霓昇空游戏石室内丹竈杵臼俨然尚存峰前有晒药台台下深黝不可测羽化谓仙人解形而去也庄子温伯雪子适齐反舍於鲁仲尼见之而不言子路曰吾子欲见温伯雪子久矣见之而不言何耶仲尼曰若夫人者目撃而道存矣亦不可以容声矣太白借其名以喻温处士若所谓河东郭有道吾友扬子云洛阳苏季子笑对刘公荣之类集中甚多皆借古人之名以谓今人而黄山志遽以伯雪为温处士之名失其解矣楚辞采三秀兮山间王逸注三秀芝草也庄子归休乎君予无所用天下为苕溪渔隐丛话汤泉多作硫黄气浴之则袭人肌肤惟新安之黄山是朱砂泉图经云黄山东峯下有朱砂汤泉热可点茗春时即色微红江南通志黄山朱砂泉自朱砂峰来依岩连二小池上池莹澈广可七尺深半之毫髮可鉴泉出石底累累如贯珠不絶气馥郁若汤酌之甘芳盖非他硫黄泉比也浴者垢旋流出纤尘不留令人心境清廓气爽体舒相传沉痾者澡雪立差丘迟诗驰道闻凤吹水经注中山卫叔卿居华山中尝乘云车驾白鹿见汉武帝元和郡县志陵阳山在宣州泾县西南百三十里陵阳子明得仙处谢惠连诗行行道转远去去情弥迟枚乘七发依絶区兮临回溪李周翰注回溪曲涧也山志天桥在链丹台一名仙人桥一名仙石桥为黄山最险两峰絶处各出峭石彼此相抵有若笋接接而不合似续若断登者莫不叹为奇絶若图经载唐开元中见於链丹峰侧长三十余丈近代谓见於莲花峰西南又谓有采药人宿桥下闻桥上笙歌声天明觅桥不见皆虚诞不信石桥固真境非幻境也方拱乾游黄山记过狮子峰登清凉台瞰天桥如长虹亘於岩上下而亲至桥侧三尺合成两石如桥柱一石覆之柱下无所着可以绳度上脊不盈五寸下大阔如都城闔俯视鸣弦泉恰覆之不知去此四十里也乘桥蹑彩虹盖指天桥如彩虹耳又武夷山记武夷君於八月十五日大会村人於武夷山上置幔亭化虹桥通山下是以彩虹为桥可以乘蹑者又一说也 菡音憾萏谈上声】

送方士赵叟之东平【方士谓方术之人史记封禅书燕齐海上之方士传其术唐书地理志河南道有郢州东平郡】

长桑晚洞视五藏无全牛赵叟得秘诀还从方士游西过获麟台为我吊孔丘念别复怀古潸然空泪流【史记扁鹊者渤海郡郑人也姓秦氏名越人少时为人舍长舍客长桑君过扁鹊独奇之常谨遇之长桑君亦知扁鹊非常人也出入十余年乃呼扁鹊私坐间与语曰我有禁方年老欲传与公公母泄扁鹊曰敬诺乃出其怀中药与扁鹊饮是以上池之水三十日当知物矣乃悉取其禁方书尽与扁鹊忽然不见殆非人也扁鹊以其言饮药三十日视见垣一方

人以此视病尽见五脏症结特以诊脉为名耳索隐曰长桑君隐者盖神人也正义曰五藏谓心肝脾肺肾也庄子庖丁曰始臣解牛之时所见无非牛者三年之後未尝见全牛也方今之时臣以神遇而不以目视左传西狩於大野叔孙氏之车子鉏商获麟以为不祥以赐虞人仲尼观之曰麟也然後取之史记正义括地志曰获麟堆在郢州钜野县东十二里春秋哀十四年经云西狩获麟国都城记云钜野故城东十里泽中有土台广轮四五十步俗云获麟堆去鲁城可三百余里一统志获麟台在钜野县东南五十里即西狩获麟之所後人於此筑台】

送韩準裴政【一作正】孔巢父还山【旧唐书孔巢父冀州人字弱翁早勤文史少时与韩準裴政李白张叔明陶沔隐於徂徕山时号竹溪六逸永王璘起兵江淮闻其贤以从事辟之巢父知其必败侧身潜遁由是知名德宗幸奉天迁给事中河中陕华等州招讨使寻兼御史大夫充魏博宣慰使遇害】

猎客张兔置不能挂龙虎所以青云人高歌【一作卧】在岩户韩生信英【一作豪】彦裴子含清真孔侯复秀出俱与云霞亲峻节凌远松同衾卧盘石斧冰漱寒泉三子同【一作传】二履时时或乘兴往往【一作去去】云无心出山揖牧伯长啸轻衣簪昨宵梦里还云弄竹溪月今晨鲁东门帐饮与君别雪崖滑去马萝径迷归人相思若烟草历乱无冬春【诗国风肃肃兔置毛传曰兔置兔罟也成公绥啸赋坐盘石漱清泉李善注声类云盘大石也魏武帝苦寒行担囊行取薪斧冰持作糜陶渊明归去来词云无心以出岫尚书正义曲礼曰九州之长曰牧王制曰千里之外设方伯八州八伯然则牧伯一也伯者言一州之长牧者言牧养下民郑玄曰殷之州牧曰伯虞夏及周曰牧後人称太守曰牧伯本此帐饮谓於旷地张帐而饮也别赋帐饮东都送客金谷王融诗雪崖似留月萝径若披云鲍照诗忧来无行伍历乱如覃葛】

送杨少府赴选

大国置衡镜準平天地心羣贤无邪人朗鉴穷清【萧本作情】深吾君咏南风袞冕弹鸣琴时泰多美士京国会纓簪山苗落涧底幽松出高岑夫子有盛才主司得球琳流水非郑曲前行遇知音衣工剪绮绣一误伤千金何惜刀尺余不裁寒女袞我非弹冠者感别但开襟空谷无白驹贤人岂悲吟大道安弃物时来或招寻尔见山吏部当应无陆沉【庾信代人乞致仕表出拥干旄入参衡镜陆机诗朗鉴岂远假吕延济注朗明也鉴镜也淮南子舜为天子弹五弦之琴歌南风之诗而天下治仪礼天子袞冕负斧依左传袞冕黻珽杜预注袞画衣也冕冠也孔穎達正义画衣谓画龙於衣也毛萇诗传袞冕者君之上服也任昉诗时泰玉阶平左思咏史诗鬱鬱涧底松离离山上苗以兴起世胄蹶高位英俊沉下僚之意太白反而用之以喻因才器使高下各得其宜也陆机诗长秀被高岑淮南子西北方之美者有崑仑之球琳琅玕焉高诱注球琳琅玕皆美玉也吕氏春秋伯牙鼓琴锺子期聽之志在流水锺子期曰善哉乎鼓琴汤汤乎若流水史记郑卫之曲动而心淫汉书王吉与禹贡为友世称王阳在位禹贡弹冠言其取舍同也毛萇诗传白驹大夫刺宣王也宣王之末不能用贤贤人有乘白驹而去者其末章云皎皎白驹在彼空谷生刍一束其人如玉母金玉尔音而有遐心传云空大也晋书山涛为吏部尚书前後选举周徧内外而并得其才涛所奏甄拔人物各为题目时称山公启

事庄子是陆沉者也郭象注人中隐者譬无水而沉也】

对雪奉饯任城六父秩满归京【郑康成毛诗笺饯送行饮酒也唐书地理志河南道兖州鲁郡有任城县】

龙虎谢鞭策鸛鸾不司晨君看海上鹤何似笼中鵩独用天地心浮云乃吾身虽将簪组狎若与烟霞亲季父有英风白眉超常伦一官即梦寐脱屣归西秦窦公敞华筵墨客尽来臻燕歌落胡雁郢曲回阳春征马百度嘶游车动行尘踟躇未忍去恋此四座人饯离驻高驾惜别空殷懃何时竹林下更与步兵邻【抱朴子麟不吠守凤不司晨维摩诘经是身如浮云须臾变灭韵会将与也蜀志马良字季常兄弟五人并有才名乡里为之谚曰马氏五常白眉最良良眉中有白毛故以称之魏志崔林为幽州刺史曰刺史视去此州如脱屣宁当相累耶胡三省曰履不蹶根曰屣言脱之易耳韵会敞开也古乐府有燕歌行李善文选注歌录曰燕地名犹楚宛之类乐府古题要解燕歌行晋乐奏魏文帝秋风萧瑟天气凉别日何易会日难二篇言时序迁换而行役不归佳人怨旷无所诉也客有歌於郢中者其曲弥高其和弥寡详见二卷注落胡雁谓其声之精妙能令飞鸟感之而下集回阳春谓其音之美善能令阳气应之而潜动江淹别赋驱征马而不顾见行尘之时起晋书阮咸狂達不拘与叔父籍为竹林之游】

鲁郡尧祠送吴五之琅琊【太平寰宇记尧祠在兖州瑕丘县东南七里通典鲁郡今兖州琅琊郡今沂州】

尧没三千岁青松古庙存送行奠桂酒拜舞清心魂日色促归人连歌倒芳樽马嘶俱醉起分手【缪本作首】更何言【楚辞奠桂酒兮椒浆王逸注桂酒切桂置酒中也江淹诗何用苦心魂刘孝绰诗芳樽散绪寒谢瞻诗分手东城闕】

鲁郡尧祠送窦明府薄华还西京【时久病初起作】

朝策犁眉騊举鞭力不堪强扶愁疾向何处角巾微服【一作步】尧祠南长杨扫地不见日石门喷作金沙潭笑夸故人【一作笑谑伯明】指絶境山光水色青於蓝庙中往往来擊鼓尧本无心尔何苦门前长跪双石人有女如花日歌舞银鞍【缪本作鞭】绣轂往复回簸林蹶石鸣风雷远烟空翠时明灭白鸥历乱长飞雪红泥亭子赤【一作朱】栏干碧流环转青锦湍深沉百丈洞海底那知不有蛟龙蟠【缪本作盘十六国春秋姚襄所乘骏马曰黧眉騊日行千里说文騊黄马黑喙也黧黑也黧眉騊则黄马而黑眉者矣】

【古犁黧字通用胡三省通监注幅巾以横幅为之角巾则巾之有角者郭林宗遇雨巾一角垫则角巾也梁简文帝诗枝中水上春并归长杨扫地桃花飞荀子青出於蓝而青於蓝王勃诗银鞍绣轂盛繁华西京赋荡川渌簸林薄李周翰注荡簸谓摇动张協七命甝林蹶石扣拔幽丛李善注蹶动摇之貌谢灵运诗空翠难为名】君不见绿珠潭水流东海绿珠红粉沉光彩【一作白首同归翳光彩】绿珠楼下花满园今日曾无一枝在昨夜秋声闾阖来洞庭木落骚人哀遂将三五少年辈登高远望【缪本作送远】形神开生前一笑轻九鼎魏武何悲

铜雀台【洛阳伽蓝记昭仪寺有池京师学徒谓之翟泉後隐士赵逸云此地是晋侍中石崇家池池南有绿珠楼於是学徒始悟经过者想见绿珠之容也太平寰宇记洛阳县石崇宅有绿珠楼今谓之狄泉是也孔颖达春秋正义易纬通卦验云秋分阊阖风至王叔齐籀记阊阖风一名盲风又曰飊风亦曰泰风起自成天之阊阖门从西方来楚辞洞庭波兮木叶下高唐赋登高望远使人心悴魏志建安十五年冬作铜雀台陆机吊魏武帝文魏武帝遗令曰吾婕妤妓人皆着铜雀台於台堂上施八尺牀张总帐朝晡上脯糒之属月朝十五辄向帐作伎汝等时时登铜雀台望吾西陵墓田】我歌白云倚窗牖【一作大开口】尔闻其声但挥手长风吹月渡海来遥劝仙人一杯酒酒中乐酣宵向分举觞酌尧尧可闻何不令臯繇【一作陶】拥篲横八极直上青天扫【一作挥】浮云高阳小饮真琐琐山公酩酊何如我竹林七子去道赍兰亭雄笔安足夸尧祠笑杀五【一作镜】湖水至今憔悴空荷花尔向西秦我东越暂向瀛洲访金阙蓝田太白若可为余扫洒石上月【上林赋於是酒中乐酣颜师古注酒中饮酒中半也乐酣奏乐洽也沈约诗月落宵向分紫烟鬱氛氲臯繇即臯陶字异音同本汉书古今人表汉书太公拥篲颜师古注篲者所以扫也水经注襄阳侯习郁依范蠡养鱼法作大陂陂长六十步广四十步又作石伏逗引大池水於宅北作小鱼池池长七十步广十二步西枕大道东二边限以高堤楸竹夹植莲芡覆水是游宴之名处也山季伦之镇襄阳每临此池未尝不大醉而还恒言此是我高阳池故时人为之歌曰山公出何去径至高阳池日暮倒载归酩酊无所知尔雅琐琐小也玉篇酩酊醉甚也羣辅录魏步兵校尉陈留阮籍字嗣宗中散大夫譙嵇康字叔夜晋司徒河内山涛字巨源建威参军沛刘伶字伯伦始平太守陈留阮咸字仲容散骑常侍河内向秀字子期司徒琅琊王戎字浚冲魏嘉平中并居河南山阳共为竹林之游世号竹林七贤何延之兰亭始末记兰亭者晋右将军会稽内史琅琊王羲之所书之序也右军联绵美胄萧散名贤雅好山水尤善草隶以晋穆帝永和九年暮春三月三日宦游山陰与太原山统孙绰广汉王彬之陈郡谢安高平郗昙太原王蕴释支遁并其子凝之徽之操之等四十有二人修祓禊之礼於山陰之兰亭挥毫制序兴乐而书用蚕茧纸鼠须笔遒媚劲健絶代更无凡二十八行三百二十四字字有重者皆构别体就中之字最多乃有二十许个变转悉异遂无同者其时乃有神助及醒後他日更书数十百本终无及者右军亦自珍爱宝贵此书留付子孙杨齐贤曰五湖太湖也东越会稽也瀛洲金阙事详见四卷登高丘而望远海注太平寰宇记蓝田山在蓝田县西三十里一名玉山一名覆车山郭缘生述征记云山形如覆车之象也按後魏风土记云山巔方二里仙圣游集之所刘雄鸣学道於此下有祠甚严灊水之源出於此图书编太白山在郿县东南关中诸山莫高於此上有铁铸山神牌三有湫池虽三伏亦凝冰山巔常有积雪不消盛夏视之犹烂然故以太白名有?谷即鬼谷子授苏秦押闔术处 篲音遂】

金乡送韦八之西京【按唐书地理志河南道兖州鲁郡有金乡县】

客自长安来还归长安去狂【一作秋】风吹我心西挂咸阳树此情不可道【一作论】此别何时遇望望不见君连山起烟雾【鲍照诗连山渺烟雾长波迴难依】

送薛九被讒去鲁

宋人不辨玉鲁贱东家丘我笑薛【一作而我笑】夫子胡为两地游黄金消衆口白璧竟难投梧桐生蒺藜绿竹乏佳实凤凰宿谁家遂与羣鷄匹田【一作方】家养老马穷士归其门蛾眉笑蹙者宾客去平原却斩美人首三千还骏奔毛公一挺剑楚赵两相存孟尝习【一作悦】狡兔三窟赖冯谖信陵夺兵符为用侯生言【一作朱子击晋鄙为感信陵恩】春申一何愚刎首为李园贤哉四公子抚掌黄泉里借问笑何人笑人不好士尔去且无喧【一作论】桃李竟何言沙丘无漂母谁肯饭王孙【宋人得燕石以为玉而藏之详见二卷注沈约辩圣论当仲尼在世之时世人不言为圣人也伐树削迹干七十君而不一值或以为东家丘或以为丧家犬五臣文选注鲁人不识孔子圣人乃曰彼东家丘者吾知之矣言轻孔子也国语衆口铄金韦昭注铄消也衆口所毁虽金石犹可消之也太平御覽风俗通曰衆口铄金俗说有美金於此衆人咸共诋訾言其不纯卖金者欲其售因取煨烧以见真此为衆口铄金史记明月之珠夜光之璧以暗投入於道路人无不按剑而眄者何则无因而至前也郑康成毛诗笺凤凰之性非梧桐不栖非竹实不食淮南子田子方见老马於道喟然有志焉以问其御曰此何马也其御曰此故公家畜也老罢而不为用出而鬻之曰少而贪其力老而弃其身仁者弗为也束帛以赎之罢士闻之知所归心矣史记平原君家楼临民家民家有蹇者盘散行汲平原君美人居楼上临见大笑之蹇者至门请曰臣不幸有罢癯之疾而君之後宫临而笑臣臣愿得笑臣者头平原君笑应曰诺蹇者去平原君曰子乃欲以一笑之故杀吾美人不亦甚乎终不杀居岁余宾客门下舍人引去者过半平原君怪之曰胜所以待诸君者未尝敢失礼而去者何多也门下一人前对曰以君之不杀笑蹇者以君为爱色而贱士士即去耳於是平原君斩笑蹇者美人头自造门进蹇者因谢焉门下乃复稍稍来诗周颂骏奔走在庙郑笺曰骏大也孔穎達曰大者多而疾来之意後汉书骏奔郊畴章怀太子注骏疾也史记秦之围邯鄲赵使平原君求救合从於楚约与食客门下有勇力文武备具者二十人偕得十九人门下有毛遂者前自赞於平原君曰愿君即以遂备员而行矣平原君至楚与楚合纵日出而言之日中不决毛遂按剑历阶而上谓平原君曰纵之利害两言而决耳今日出而言纵日中不决何也楚王叱曰胡不下吾乃与而君言汝何为者也毛遂按剑而前曰王之所以叱遂者以楚国之衆也今十步之内王不得恃楚国之衆也王之命悬於遂手吾君在前叱者何也楚地方五千里持戟百万此霸王之资也以楚之强天下弗能当白起小子耳率数万之衆兴师以与楚战一战而举鄢郢再战而烧彝陵三战而辱王之先人此百世之怨而赵之所羞而王勿知恶焉合从者为楚非为赵也楚王曰唯唯诚若先生之言谨奉社稷以从毛遂谓楚王之左右曰取鷄狗马之血来毛遂奉铜盘而跪进之楚王曰王当?血而定从次者吾君次者遂遂定从於殿上楚使春申君将兵赴救赵战国策冯谖为孟尝君收债於薛矫命以债赐诸民因烧其券长驱到齐孟尝君见之曰债毕收乎曰收毕矣以何市而反谖曰君云视吾家所寡有者臣窃计君所寡有者以义耳窃以为君市义孟尝君不悦期年孟尝君就国於薛民扶老携幼迎君道中孟尝君顾冯谖曰先生所为文市义者乃今日见之冯谖曰狡兔有三窟仅得免其死耳今有一窟未得高枕而卧也请为君复凿二窟西游梁谓梁王曰齐放其大臣孟尝君诸侯先迎之者国富而兵强於是梁王遣使者聘孟尝君梁使三反齐王闻之遣太傅谢君曰寡人不祥沉於谄谀之臣开罪於君寡人不足为也愿君顾先王之宗庙反国统万人乎冯谖戒孟尝君曰愿请先王之祭器立宗庙於薛庙成还报君曰三窟已就君始高枕为乐矣孟尝君为相数十年无纤芥之祸冯谖之计也信陵君用侯生计窃兵符夺晋鄙兵救赵详见三卷注史记李园陰养死士欲杀春申君国人颇有知之者朱英谓春申君曰世有无望之福又有无望

之祸今君处无望之世事无望之主安可以无无望之人乎春申君曰何谓无望之福曰君相楚二十余年矣虽名相国实楚王也今楚王病旦暮且卒而君相少主因而代立当国如伊尹周公王长而反政不即遂南而称孤而有楚国此所谓无望之福也春申君曰何谓无望之祸曰李园不治国而君之仇也不为兵而养死士之日久矣楚王卒李园必先入据权而杀君以灭口此所谓无望之祸也春申君曰何谓无望之人曰君置臣郎中楚王卒李园必先入臣为君杀李园此所谓无望之人也春申君曰李园弱人也仆又善之且又何至此朱英知言不用恐祸及身刀亡去後十七日考烈王卒李园果先入伏死士於棘门之内春申君入棘门死士夹刺春申君斩其头投之棘门外李善文选注服左氏传注曰天玄地黄泉在地中故言黄泉论衡其死也葬之黄泉之下史记桃李不言下自成蹊沙丘在鲁地详见十三卷注漂母事见六卷注琦按田家养老马以下十四句盖历言古人好士之美而杂以春申一何愚刎首为李园似非伦类下文又接以贤哉四公子云云譬之李家娘子才入墨池忽登雪岭矣太白斗酒百篇信笔疾书不无疵類然不应数句之间黑白不分明至此苟非缺文则为讹笔盖无疑矣

单父东楼秋夜送族弟沈【缪本作况】之秦【一作西京太白自注时凝弟在席单父县名唐时属河南道宋州睢阳郡 单音善父音甫】

尔从咸阳来问我何劳苦沐猴而冠不足言身骑土牛滞东鲁沈弟欲行凝弟留孤飞一雁秦云秋坐来黄叶落四五北斗已【一作稍】挂西城楼丝桐感人弦亦【一作已】绝满堂送客【萧本作君】皆惜别卷帘见月清兴来疑是山阴夜中雪明日斗酒别惆怅清路尘遥望长安日不见长安人长安宫阙九天上此地曾经为近臣一朝复一朝发白心不改屈平憔悴滞江潭亭伯流离放辽海折翮翻飞随转蓬【一作翼短天长去不穷】闻弦虚坠下霜空圣朝久弃青云士他日谁怜【一作谁肯相思】张长公【史记说者曰人言楚人沐猴而冠耳张晏曰沐猴猕猴也汉书蓼太子以为汉廷公卿列侯皆如沐猴而冠耳言其虽着衣冠但微似人形无他才能也猕猴骑土牛又何迟也是周泰答鍾繇语详见十二卷赠宣城赵太守诗注王粲诗桐感人情为我发悲音世说王子猷居山阴夜大雪眠觉开室命酌酒四望皎然曹植诗君若清路尘楚辞屈原既放游於江潭行吟泽畔颜色憔悴後汉书崔駰字亭伯为窦宪主簿前後奏记数十切指长短宪不能容稍疎之因察駰高第出为长岑长駰自以远去不得意遂不之官而归章怀太子注长岑县属乐浪郡其地在辽东曹植诗转蓬离本根飘飏随长风何意回飏举吹我入云中高高上无极天路安可穷类此游客子捐躯远从戎闻弦虚坠用战国策更羸引弓虚发而下鸟事详见大猎赋注史记张释之传其子曰张挚字长公官至大夫免以不能取容当世故终身不仕】

送族弟凝至晏堦单父三十里

雪满原野白戎装出盘游挥鞭布猎骑四顾登高丘兔起马足间苍鹰下平畴喧呼相驰逐取乐销人忧舍此戒禽荒微【萧本作微】声列齐讴鸣鷄发晏堦别雁惊涖沟西行有东音寄与长河流【淮南子周视原野高诱注广平曰原郊外曰野书五子之歌盘游无度孔安国传盘乐游逸也又五子之歌外作禽荒鲍照诗选色徧齐岱微声匝邛越说文讴齐歌也魏书东

平郡范县有涑沟山东通志单县东门外有涑河源出汴水晋时所开北抵济河南通徐沛元以後渐湮惟下流入沛者仅存水道吕氏春秋夏后氏孔甲作破斧之歌实始为东音】

鲁城北郭曲腰桑下送张子还嵩阳

送别枯桑下调叶落半空我行憎道远尔独知天风谁念张仲蔚还依蒿与蓬何时一杯酒更与李膺同【古乐府枯桑知天风李善注枯桑无枝尚知天风说文憎不明也高士傳张仲蔚者平陵人也与同郡魏景卿俱修道德隐身不仕明天官博物善属文好诗赋常居穷素所处蓬蒿没人闭门养性不治荣名时人莫识惟刘龚知之憎音梦】

李太白集注卷十六

卷十七

钦定四库全书

李太白集注卷十七

钱塘 王琦 撰

古近体诗共四十四首

送鲁郡刘长史迁弘农长史【鲁郡即兖州弘农郡即虢州俱属河南道为上州上州刺史别驾之下有长史一人从五品】

鲁国一杯水难容横海鳞仲尼且不敬况乃寻常人白玉换斗粟黄金买尺薪闭【缪本作闲】
【门木叶下始觉秋非春闻君向西迁地即鼎湖邻宝镜匣苍藓丹经埋素尘轩后上天时攀
龙遗【一作唯】小臣及此留惠爱庶几风化淳鲁缟如白烟五缣不成束临行赠贫交一尺
重山岳相国齐晏子赠行不及言托阴当树李忘忧当树萱他日见张祿绋袍怀旧恩【抱朴
子寸鲋游牛迹之水不贵横海之巨鳞谢世基诗伟哉横海鳞壮矣垂天翼史记黄帝采首山
铜铸鼎於荆山下鼎既成有龙垂胡髯下迎黄帝黄帝上骑羣臣後宫从上者七十余人龙乃
上去余小臣不得上乃悉持龙髯龙髯拔堕堕黄帝之弓百姓仰望黄帝既上天乃抱其弓与
龙髯号故後世因名其处曰鼎湖其弓曰乌号通典弘农郡湖城县故曰胡汉武帝更为湖县
有荆山黄帝铸鼎於荆山其下曰鼎湖即此也太平广记黄帝铸十五镜其第一横径一尺五
寸法满月之数也以其相差各校一寸路史黄帝范十有二镜六乳四兽变异得以占焉罗苹
注应十有二次随有得者以占日蚀刻分无差抱朴子黄帝陟王屋而授丹经路史黄帝回驾
王屋启石函发玉笈得九鼎飞灵神丹诀汉书强弩之末力不能入鲁缟顔师古注缟素也曲
阜之地俗善作之尤为轻细说文缣并丝繒也琦按二句相承而言上句既用缟字则下句不
当又用缣字疑缣乃兼字之譌也六书故二丈为端二端为匹为两为兼兼匹两之义一也今
人犹以匹为兼是五兼者为五匹坎郑玄周礼注十个为束又仪礼注凡物十曰束胡三省通
监注唐制帛以十端为束今止五匹故不成束也後汉书德重山岳泽深河海晏子春秋曾子
将行晏子送之曰君子赠人以轩不若以言吾请以言乎以轩乎曾子曰请以言晏子曰婴闻
之君子居必择邻游必就士择居所以求士求士所以避患也婴闻汨常移质习俗移性不可
不慎也说苑树桃李者夏得休息秋得其实焉树蒺藜者夏不得休息秋得其刺焉诗国风焉
得谖草言树之背毛传曰谖草令人忘忧徐勉萱草赋惟平章之萱草欲忘忧而树之上言长
史以鲁缟五匹见赠下言已无所荅而效晏子以言赠行托阴当树李二句即所赠之言盖勉
以树人之义李以喻人之有德能可以庇荫者萱以喻人之有才华可以欣赏者也史记范雎
既相秦秦号曰张祿而魏不知魏闻秦且东伐韩魏使须贾於秦范雎闻之为微行敝衣闲步
至邸见须贾须贾意哀之留与坐饮食曰范叔一寒至此哉乃取一绋袍以赐之索隐曰绋厚
繒也音啼盖今之絁也正义曰绋袍今之麓袍】送族弟单父主簿凝摄宋城主簿至郭南月
桥却回栖霞山留饮赠之【唐河南道宋州睢阳郡有宋城县在郭下有单父县在州之东北

一百四十九里一统志栖霞山在兖州单县东四里单县即旧时单父县也 单父音善甫】

吾家青萍剑操割有余闲往来纠二邑此去何时还鞭马月桥南光辉岐路间贤豪相追饯却到栖霞山羣花散芳园斗酒开离颜乐酣相顾起征马无由攀【青萍剑名操割用子产未能操刀而使割语俱详九卷注韵会纠督也又察也周礼大司徒纠万民音与九同陶潜诗斗酒开芳颜江淹别赋驱征马而不顾】

鲁郡东石门送杜二甫【居易录孔博士东塘言曲阜县东北有石门山即杜子美诗题张氏隐居所谓春山无伴独相求刘九法曹郑瑕丘石门宴集所谓秋水清无底者是也李太白有石门送杜二甫诗何时石门路更有金樽开亦其地山麓今尚有张氏庄相传为唐隐士张叔明旧居张盖与太白孔巢父辈同隐徂徕称竹溪六逸者也山不甚高大石峡对峙如门故名中有石门寺寺後曰涵峰峰顶有泉流入溪涧往往成瀑布】

醉别复几日登临徧池台何时【繆本作言】石门路【一作下】重有金樽开秋波落泗水海色明徂徕飞蓬各自远且尽手【繆本作林】中杯【元和郡县志泗水源出兖州泗水县东陪尾山其源有四四泉俱导因以为名一统志泗水源发陪尾山四泉并发循泗水县北八里始合为一西经曲阜县贯兖州府城下至济寧分流南北南流入徐州境北流入会通河水经注邹山记曰徂徕山在梁甫奉高博三县界犹有美松亦曰尤来之山一统志徂徕山在泰安州东南四十里上有紫原池玲珑山独秀峰天平东西三寨商子飞蓬遇飘风而行千里】鲁郡尧祠送张十四游河北【唐书地理志河北道盖古幽冀二州之境有孟怀魏博相卫贝澶邢洺惠镇冀深赵沧景德定易幽涿瀛莫平妣檀蓟营二十九州】

猛虎伏尺草虽藏难蔽身有如张公子肮脏在风尘岂无横腰剑屈彼淮阴人擊筑向北燕燕歌易水滨归来泰山上当与尔为邻【後汉书注肮脏高亢悻直之貌淮阴用韩信为淮阴少年所辱详见三卷注水经注太子丹遣荆轲刺秦王宾客知谋者皆素衣冠送之於易水之上荆轲起为寿歌曰风萧萧兮易水寒壮士一去兮不复还高渐离擊筑宋如意和之为壮声士皆髮冲冠为哀声士皆流涕陶潜诗老夫有所爱思与尔为邻】

杭州送裴大泽时赴庐州长史【唐时杭州余杭郡属江南东道庐州庐江郡属淮南道】

西江天柱远东越海门深去割辞【许本作慈】亲恋行忧报国心好风吹落日流水引长吟五月披裘者应知不取金【汉书庐江郡灊县天柱山在南三国志灊中有天柱山高峻二十余里道险狭步径裁通一统志霍山在庐州府六安州西南九十里一名衡山一名天柱汉武帝南巡至盛唐以南岳衡山远阻乃移岳神於霍而祀焉又名南岳山山顶有天池龙湫风洞岳井诚心崖凌霄树咸淳临安志海门在仁和县东北六十五里有山曰赭山与龛山对峙潮生出其间辍耕録浙江之口有两山焉其南曰龛山其北曰赭山盖峙於江海之会谓之海门论衡延陵季子出游见路有遗金当夏五月有披裘而薪者季子呼薪者曰取彼地金采薪者投鎌於地瞋目拂手而言曰何子居之高视之下仪貌之壮语言之野也吾当夏五月披裘而薪岂取金者哉季子谢之请问姓氏薪者曰子皮相之士也何足语姓氏遂去不顾】

灊陵行送别

送君灊陵亭灊水流浩浩上有无花之古树下有伤心之春草我向秦人问路岐云是王粲南登之古道古道连绵走西京紫阙【繆本作关】落日浮云生正当今夕断阳处骊歌【萧本作黄鹂】愁絶不忍听【太平寰宇记灊陵在咸阳县东北二十五里水经注灊水历白鹿原东即灊川西故芷阳矣是谓之灊上汉文帝葬其上谓之灊陵上有四出道以沔水在长安东南三十里故王仲宣赋诗云南登霸陵岸回首望长安王粲字仲宣以西京扰乱乃之荆州依刘表作七哀诗即南登霸陵岸回首望长安一首汉书王式曰客歌骊驹主人歌客无容归服?曰骊驹逸诗篇名见大戴礼客欲去歌之其辞曰骊驹在门仆夫具存骊驹在路仆夫整驾骊音离】

送贺监归四明应制【册府元龟贺知章为秘书监授银青光禄大夫天宝三载因老疾恍惚不醒若神游洞天三清上数日方觉遂有志入道乃上疏请度为道士归舍本乡宅为观玄宗许之仍拜其子典设郎曾为会稽郡司马使侍养御制诗以赠行皇太子以下咸就执别御制诗并序云天宝三年太子宾客贺知章鉴止足之分抗归老之疏解组辞荣志期入道朕以其夙有微尚年在迟暮用循挂冠之事俾遂赤松之游五月五日将归会稽遂饯东路乃命六卿庶尹大夫供帐青门崇行迈也岂惟崇德尚齿抑亦励俗劝人无令二疏独光汉册乃赋诗赠行云遗荣期入道辞老竟抽簪岂不惜贤达其如高尚心环中得秘要方外散幽襟独有青门饯羣英怅别深又云筵开百壶饯诏许二疏归仙记题金籙朝章换羽衣悄然承睿藻行路满光辉按诗纪载知章之归越也诏令供帐束门外百僚祖饯於长乐坡自李适以下作诗送之今诗存者三十七首太白其一也】

久辞荣禄遂初衣曾向长生说息机真诀自从茅氏得恩波寧【萧本作应】阻洞庭归瑶台含雾星辰满仙峤浮空岛屿微借问欲【繆本作候】栖珠树鹤何年却向帝城飞【楚辞进不入以离尤兮退将复修乎初服制芰荷以为衣兮集芙蓉以为裳王逸注初服初始洁清之服也太玄真人传茅盈仙去与家人及亲戚辞归句曲二弟闻之弃官还家汉元帝永光元年渡江求兄於东山遂与相见兄曰卿已老矣欲难可补纵得真诀适可成地上主者耳水经注太湖中有大雷小雷三山亦谓之三山湖又谓之洞庭湖吴地记扬州记曰太湖一名震泽一名洞庭拾遗记须弥山旁有瑶台十二各广千步皆五色玉为台基梁武帝诗瑶台含碧雾罗幕生紫烟列子渤海之东中有五山其根无所连着常随潮波上下往还详见四卷注仙峤浮空盖用其事淮南子崑仑中有珠树玉树璇树不死树在其西论衡海外西南有珠树焉神仙传苏仙公得道数岁之後昇云而去後有白鹤来止郡城东北楼上或挟弹弹之鹤以爪攫楼板似漆书曰城郭是人民非三百甲子一来归我是苏公弹我何为 峤音轿】

送窦司马贬宜春【按唐时宜春郡即袁州也隶江南西道为上州上州刺史长史之下有司马一人从五品】

天马白银鞍亲承明主欢鬪鸡金宫【一作闔】里射雁碧云端堂上罗中【繆本作巾】贵歌钟清夜阑何言谪南国拂剑坐长叹赵璧为谁点隋珠枉被弹圣朝多雨露莫厌此行难【

陈後主诗照耀白银鞍鬪鸡中贵俱见二卷注歌钟见拟恨赋注史记赵惠文王时得楚和氏璧陈子昂诗青蝇一相点白璧遂成冤搜神记隋侯出行见大蛇被伤中断疑其灵异使人以药封之蛇乃能去因号其处为断蛇丘岁余蛇衔明珠以报之珠盈径寸纯白而夜有光明如月之照可以烛室故谓之隋侯珠亦曰灵蛇珠又曰明月珠庄子今且有人於此以隋侯之珠弹千仞之雀世必笑之是何也则其所用者重而所要者轻也】

送羽林陶将军【唐书百官志左右羽林军大将军各一人正三品将军各三人从三品掌统北衙禁兵督摄左右厢飞骑仪仗】

将军出使拥楼船江上旌旗拂紫烟万里横戈探虎穴三杯拔剑舞龙泉莫道词人无胆气临行将赠绕朝鞭【楼船水军所载之船也详见四卷注东都赋羽旄扫霓旌旗拂天不探虎穴安得虎子用吕蒙语详见十五卷注龙泉剑名即龙渊也见十一卷注绕朝鞭见十二卷注唐仲言曰此篇全是律体疑龙泉下脱一联方弘静曰此篇当是近体八句而逸其五六也今以为古诗或以为六句律琦按六句近体唐人时有之本於六朝人或号为小律】

送程刘二侍御【萧本作郎】兼独孤判官赴安西幕府【按旧唐书封常清传开元末安西四镇节度使夫蒙灵警判官有刘眺独孤峻盖其人也程则无考通监唐纪安西节度抚宁西域统龟兹焉耆于阗疏勒四镇治龟兹城兵二万四千册府元龟周礼六官六军并有吏属大则命於朝廷次则皆自辟除春秋诸国有军司马尉候之职而未有幕府之名战国之际始谓将帅所治为幕府唐节度使之属有副使一人行军司马一人判官二人掌书记一人参谋五员随军四人自是正为幕府之职皆奏请有出身人及六品以下正员官为之】

安西幕府多才雄喧喧唯道三数公绣衣貂裘明积雪飞书走檄如飘风朝辞明主出紫宫银鞍送别金城空天外飞霜下葱海火旗云马生光彩胡塞尘清计日归【萧本作清尘几日归】汉家草绿遥相待【汉书侍御史有绣衣直指顔师古注衣以绣者尊宠之也西京杂记枚臯文章敏疾扬子云曰军旅之际戎马之间飞书驰檄用枚臯紫宫即紫微宫天子所居也见二卷注金城长安城也见五卷注通典安西郡西至疏勒镇守使军三千里去葱岭七百里凉州异物志葱岭水分流东西西入大海东为河源火旗谓旗之赤似火云马谓马之多似云梁简文帝诗悲笳动胡塞】

送侄良?二妓赴会稽戏有此赠

?妓东山去春光半道催遥看若【缪本作二】桃李双入镜中开【一统志东山在绍兴府上虞县西南四十五里晋太傅谢安居此今絶顶有谢公调马路白云明月二亭遗迹曹植诗南国有佳人容华若桃李王逸少云山陰路上行如在镜中游详见十一卷注】

送贺宾客归越【旧唐书天宝三年十二月乙酉太子宾客贺知章请度为道士还乡三载正月庚子遣左右相以下祖别贺知章於长乐坡赋诗赠之法书要録贺知章字维摩会稽永兴人太子洗马德仁之孙少以文辞知名工草隶书进士及第历官礼部侍郎集贤学士太子右

庶子兼皇子侍读检校工部侍郎集贤学士太子宾客庆王侍读知章性放善谑晚年尤纵无复规检年八十六自号四明狂客每兴酣命笔好书大字或三百言或五百言诗笔惟命问有几纸报十纸纸尽语亦尽二十纸三十纸纸尽语亦尽忽有好处与造化相争非人工所可到也天宝二年以年老上表请入道归乡里特诏许之重令入阁储皇以下拜辞上亲制诗序令所司供帐百僚饯送赐诗叙别知章表谢手诏荅曰卿儒才旧业德着老成方欲乞言以光东序而乃高蹈世表归心妙门虽雅意难违良深耿叹眷言离祖是用赠诗宜保松乔慎行李也儿子辈常所执经故令亲别尊师之义何以谢为仍拜其子典设郎曾子为朝散大夫本郡司马以伸侍养通典皇太子宾客四人掌调护侍从规谏凡太子有宾客之事则为上齿盖取象於四皓焉资位闲重其流不杂】

镜湖流水漾清【一作春始】波狂客归舟逸兴多山阴道士如相见应写黄庭换白鹅【通典越州会稽县有镜湖野客丛书西清诗话曰太白诗山阴道士如相见应写黄庭换白鹅按晋书右军写道德经换道士鹅非黄庭也仆观陶谷跋黄庭经曰山阴道士刘君以鹅羣献右军乞书黄庭经此是也谷亦谓黄庭得非承太白之误乎黄鲁直诗为君写就黄庭了不博山阴道士鹅梅圣俞诗道士难换黄庭经又曰黄庭换白鹅皆承此谬或谓晋史但言道士鹅羣不知谷何以知其为道士刘君也仆考晋帖献之有刘道士鹅羣亦复归也无乃据此乎米元章书史黄素黄庭经一卷是六朝人书陶谷跋云山阴道士刘君以鹅羣献右军乞书黄庭经此即是也晋史载为写道德经当举羣相赠因李白诗送贺监云山阴道士如相见应写黄庭换白鹅世人遂以黄庭经为换鹅经甚可笑也黄伯思东观余论世传黄庭真帖为逸少书仆尝考之非也按陶隐居真诰翼真检论上清真经始末云晋哀帝兴宁二年南岳魏夫人所授弟子司徒公府长史杨君使作隶字写出以传护军长史许君及子上计掾掾以付子黄民民以传孔默後为王兴先窃写之始济浙江遇风沦漂惟黄庭一篇得存盖此经也仆按逸少以晋穆帝昇平五年卒是年岁在辛酉後二年岁在甲子即哀帝兴宁二年始降黄庭於世安得逸少预书之又按梁虞龢论书表云山阴县?村养鹅道士谓羲之曰久欲写河上公老子缣素早办而无人能书府君若能自屈书道德经两章便合羣以奉於是羲之便停半日为写毕?鹅去晋书本传亦着道士云爲写道德经当举羣相赠耳初未尝言写黄庭也以二书考之则黄庭非逸少书无疑然陶隐居与梁武帝启云逸少有名之蹟不过数首黄庭劝进告誓等不审犹有存否盖此启在着真诰前故未之考证耳至唐张怀瓘作书估云乐毅黄庭但得几篇即为国宝遂误以为逸少书李太白承之作诗山阴道士如相见应写黄庭换白鹅苟欲随之耳初未尝考之而韩退之第云数纸尚可博白鹅而不云黄庭岂非觉其谬欤王氏法书苑伯思之论似若详悉以予考之其说非也盖书黄庭经换鹅与书道德经换鹅自是两事伯思谓黄庭之传在右军死後此最失於详审也道家有黄庭内景经黄庭外景经及黄庭遁甲缘身经黄庭玉轴经世俗例称为黄庭经内景经乃大道玉晨君所作扶桑大帝君命阳谷神王传魏夫人凡三十六章即真诰所言者外景经三篇乃老君所作即右军所书者与魏夫人所传初不同于家旧藏右军所书外景经石刻一卷凡六十行末云永和十三年五月二十五日在山阴县写与小欧阳集古録目校之与文忠所藏本同则右军之写黄庭甚晓然缘诸公考之未详故未免纷纭如此伯思谓与梁武启在着真诰之前此又曲为之辩也予又尝於道藏中得务成子注外景经一卷有序云晋有道士好黄庭之术意专书写常求序人闻王右军精於草隶而复爱白鹅遂以数头赠之得其妙翰右军逸兴自纵未免脱漏但美其书耳张君房所进

云笈七籤亦載此序此最為的據也蓋道德經是偶悅道士之鵝因為之寫若黃庭是道士聞其善書且喜鵝故以是為贈以求其書此是兩事頗分明緣俱以寫經得鵝遂使後人指為一事而妄起異論唯李太白知其為二事故其書右軍一篇云右軍本清真瀟灑出風塵山陰過羽客要此好鵝賓掃素寫道經筆精妙入神書罷籠鵝去何曾別主人此言書道德經得鵝也送賀賓客歸越一篇云山陰道士如相見應寫黃庭換白鵝此言書黃庭經得鵝也太白於兩詩亦各言之都未嘗誤乃後人自誤也又程文簡演繁露云王羲之本傳以書換鵝者道德經也文士用作黃庭人皆以為誤張彥遠法書要錄載褚遂良右軍書目正書第二卷有黃庭經六十行與山陰道士其時真蹟故在既可以見其為黃庭無疑又武平一徐氏法書記親在禁中見武后曝太宗時法書六十餘函所記憶者扇書樂毅告誓黃庭又徐浩古蹟記玄宗時大王正書三卷以黃庭為第一不聞道德經則傳之所云却誤程云晉書傳誤者蓋未詳太白之詩故不知為二事也琦按白氏六帖右軍王羲之嘗見山陰道士有羣鵝求之乃邀右軍書黃庭經以換遂書之太平御覽何法盛晉中興書曰山陰有道士養羣鵝羲之意甚悅道士云為寫黃庭經當舉以相贈乃為寫乞籠鵝而去仙傳拾遺山陰道士管霄霞籠紅鵝一雙遺羲之請書黃庭經太白所用似非誤記即謂仙傳拾遺或出於偽撰白氏六帖所引又不著本自何書自當以晉書所載為信然太平御覽所引何法盛晉中興書則又晉史之先鞭也豈亦不足信乎夫一經也或以為黃庭或以為道德一道士也或以為劉或以為管一鵝也或以為舉羣或以為一雙蓋所謂傳聞異辭之故遐考一事兩傳者載籍固多有也乃取其一說而以訾其餘或以為太白之誤或以為晉書之誤或以為右軍換鵝本有二事或以為右軍初未嘗書黃庭經皆失之執矣又洪容齋四筆謂太白眼高四海沖口成章必不規規然簡閱晉史看逸少傳然後落筆正使誤以道德為黃庭於理正自無害夫詩之美劣原不關乎用事之誤與否然白璧微瑕不能不受後人之指摘若太白此詩則固未嘗有瑕者也故歷引昔人之論而辨晰之且以見考古者之不易也】

送張遙之壽陽幕府【唐書地理志淮南道有壽州壽春郡中督都府本淮南郡天寶元年更名琦按壽春之名本自戰國史記楚世家考烈王徙都壽春正義曰壽春在南壽州壽春縣是也壽陽之名起自東晉通典東晉以鄭皇后諱改壽春曰壽陽宜春曰宜陽富春曰富陽凡名春者悉改之唐時名壽春而太白用壽陽蓋襲用舊名耳史記索隱凡將軍謂之幕府者蓋兵門合施帷帳故稱幕府崔浩曰古者出征為將帥軍還則罷理無常處以幕帟為府署故曰幕府】

壽陽信天險天險橫荊關苻堅百萬衆遙阻八公山不假築長城大賢在其間戰夫若熊虎破敵有余閑張子勇且英少輕衛霍辱投軀紫髯將千里望風顏勗爾效才略功成衣錦還【太平寰宇記壽陽城臨淝水北有八公山山北即淮水自東晉至今常為要害之地十六國春秋苻堅銳意欲取江東遣征南大將軍陽平公融督驃騎將軍張蚝撫軍大將軍苻方衛軍將軍梁成等率步騎二十五萬号称三十萬為前鋒堅發長安戍卒六十餘萬騎二十七萬前後千里旗鼓相望衆号百萬晉遣謝石為征虜將軍征討大都督與前鋒都督謝玄西中郎將桓伊輔國將軍謝琰等水陸七萬相繼來拒堅與融登壽春城望之見晉兵部陣嚴整將士精銳又望見八公山上草木皆以為晉兵顧謂融曰此亦勁敵何謂弱也恍然始有惧色謝玄謝琰桓伊等以精卒八干涉渡淝水擊之仍進決戰於淮水南融馳騎略陣馬倒為晉軍所殺軍遂大

败江南通志八公山在壽州城北五里淝水之北淮水之南汉淮南王安与其宾客八公俱登此山学仙今山有淮南王庙图安及八士像山以八公名盖本於此苻坚望晋兵见八公山草木皆旌旗状即此山也三国志刘备以梟雄之姿而有关羽张飞熊虎之将江表传战如熊虎不惜躯命盖本於牧誓如虎如貔如熊如黑之义汉书张耳传吾王孱王也孟康注冀州人谓懦弱为孱鲍照诗投躯报明主紫髯将军是孙会稽详见四卷注南史柳庆远出为雍州刺史帝餞於新亭谓曰卿衣锦还乡朕无西顾之忧矣孱士连切音近残】

送裴十八图南归嵩山二首【地理今释嵩山在河南府登封县北十里西接洛阳县北接巩县东接开封府密县界縣亘一百五十里】

何处可为别长安青绮门胡姬招素手延【一作留】客醉金樽临当上马时我独【一作因】与君言风吹【一作惊】芳兰折日没鸟鹊喧举手指飞鸿此情难具论同归无早晚颍水有清源【三辅黄图长安城东出南头第一门曰霸城门民见门色青名曰青城门庙记曰霸城门亦曰青绮门洞冥记有青雀羣飞於霸城门乃改为青雀门乃更修饰刻木为绮橑雀去因名青绮门风吹芳兰折喻君子被抑不得伸其志也日没鸟雀喧喻君闇而谗言竞作也晋书郭瑀隐於临松薤谷张天锡遣使者孟公明持节以蒲轮玄纁备礼徵之公明至山瑀指翔鸿以示之曰此鸟安可笼哉遂深逃絶迹举手指飞鸿盖用其事以明已将去之意谢灵运诗风潮难具论颍水出嵩岳之少室山详见七卷注吴均诗济水有清源桂树多芳根刘履注清源水初出清浅处也】

其二

思君颍水绿忽复归嵩岑归时莫洗耳为我洗其心洗心得真情洗耳徒买名谢公终一起相与济苍生【高士传许由尧召为九州长由不欲闻之洗耳於颍滨世说谢公屡违朝旨高卧东山诸人每相与言安石不肯出将如苍生何】

同王昌龄送族弟襄归桂阳【一作同王昌龄崔国辅送李舟归彬州】二首【唐时桂阳郡即彬州也隶江南西道】

秦地见碧草楚谣对青樽把酒尔何思鸛鹄啼南园予欲罗浮隐犹怀明主恩踟躇紫宫恋孤负沧洲言终然无心云海上同飞翻相期乃不浅幽桂有芳根【名山洞天福地记罗浮洞周围五百里名朱明耀真之天在惠州博罗县八十里太平寰宇记罗浮山本是蓬莱山之一峰浮在海中与罗山合因名之山有洞通勾曲又有璇房瑶室七十二所裴渊广州记云罗浮二山隐天惟石楼一路可登矣增韵踟躇犹豫也紫宫天子所居之宫以比天之紫微垣故曰紫宫吴均诗桂树多芳根太白虽用其句然诗意则用淮南招隐士桂树丛生山之幽也】

其二

尔家何在潇湘川青莎白石长江边昨梦江花照江日【萧本作国】几枝正发东窗前觉来

欲往心悠然魂随越鸟飞南天秦云连山海相接桂水横烟不可涉送君此去令人愁风帆茫茫隔河洲春潭琼草绿可折西寄长安明月楼【潇水出湖广道州之九疑山湘水出广西桂林之海阳山至永州城西而合流焉自湖而南二水所经之地甚广至长沙湘阴县始达青草湖注洞庭与岷江之流合故湖之北汉沔是主不得谓之潇湘若湖之南皆可以潇湘名之此诗送人归桂阳而言尔家何在潇湘川止是约略所近之地而言之耳其实潇湘之水在桂阳之下不能逆流而经桂阳也楚辞青莎杂树兮蘋草蘼靡按莎草有二一是雀头香其叶似幽兰而绝细耐水旱乐蔓延虽拔心陨叶弗之能绝今之香附子是也一是夫须可为衣以御雨今谓之蓑衣诗云南山有台台即此草是水经注桂水出桂阳县北界山山壁高耸三面特峻石泉悬注瀑布而下北径南屏县而东北流屈钟亭右会钟水通为桂水也故应劭曰桂水出桂阳东北入湘按桂水出彬州桂东县之小桂山下流合於耒水耒水至衡州府城北始与潇湘合徐彦伯诗云生阴海没花落春潭空自伤琼草绿讵惜铅粉红莎音梭】

送外甥郑灌从军三首

六博争雄好彩来金盘一掷万人开丈夫赌命报天子当斩胡头衣锦回【演?露博用六子楚词谓之六博采本是采色之采指其文而言也如黑白之以色别雉犊之以物别皆采也投得何色其中程者胜因遂名之为采今俗语凡事小而幸得者皆以采名之义盖起此也宋书刘毅家无儋石之储擲捕一掷百万】

其二

丈八蛇矛出陇西弯弧拂箭白猿啼破胡必用龙韬策积甲应将熊耳齐【十六国春秋陇上人作壮士之歌曰丈八蛇矛左右盘十荡十决无当前说文弧木弓也淮南子楚王有白猿王自射之则转矢而熙使养由基射之始调弓矫矢未发而猿拥柱号矣太公六韬有龙韬後汉书赤眉忽遇大军震惊不知所为乃遣刘恭乞降积兵甲宜阳城西与熊耳山齐】

其三

月蚀西方破敌时及瓜归日未应迟斩胡血变黄河水梟首当悬白鹊旗【左传齐侯使连称管至父戌葵丘瓜时而往曰及瓜而代汉书梟故塞王欣头栢阳市顔师古注梟悬首於木上也史记武王以黄钺斩纣头悬太白之旗白鹊旗未详】

送于十八应四子举落第还嵩山【通典开元二十九年始於京师置崇玄馆诸州置道举生徒有差谓之道举举送课试与明经等京都各百人诸州无常员习老庄文列谓之四子?第与国子监同唐会要开元二十九年正月十五日於玄元皇帝庙置崇玄学令习道德经庄子文子列子待习成後每年随举人例送名至省准明经考试通者准及第人处分】

吾祖吹橐籥天人信森罗归根复太素羣动熙元和炎炎四真人摘辩若涛波交流无时寂杨墨日成科夫子闻洛诵夸才才故多为金好踊跃久客方蹉跎道可束【繆本作东】卖之五

宝溢山河劝君还嵩丘开酌盼庭柯三花如未落乘兴一来过【杨齐贤曰吾祖老子也老子云天地之间其犹橐籥乎又云万物芸芸各复归其根归根曰静列子太素者质之始也白虎通始起先有太初後有太始形兆既成名曰太素混沌相连视之不见听之不闻潜夫论太素之时元气窈冥形兆未成淮南子偃其聪明抱其太素旧唐书天宝元年庄子号为南华真人文子号为通元真人列子号为冲虚真人庚桑子号为洞虚真人其四子所着书改为真经班固答宾戲驰辩如涛波摛如春华顏师古注大波曰涛摛布也庄子副墨之子闻诸洛诵之孙陆德明音义李云副墨可以副贰元墨也洛诵诵通也苞落无所不通也崔云皆古人姓名或寓言耳无其人也庄子大冶铸金金踊跃曰我必为镆铘大冶必以为不祥之金归去来辞引壶觞以自酌盼庭柯以怡顏吕向注柯树枝也初学记汉世有道士从外国将贝多子来於嵩高西脚下种之有四树与衆木有异一年三花白色香异摛音痴】

送别

寻阳五溪水沿洄直入巫山里胜境由来人共传君到南中自称美送君别有八月秋飒飒芦花复益愁云帆望远不相见日暮长江空自流【萧士贇曰巫山介乎夔峡二州之间峡有青溪赤溪綠萝溪滄茫溪姜师溪为峡之五溪盖谓别者由寻阳上五溪而入巫山也乃子见指为武陵五溪恐失诗意武陵五溪由沅合湘瀘於洞庭至岳阳而後入江与巫峡地势不相聯属所引非武陵五溪明矣琦按诗句五溪当在寻阳然无所考据按一统志五溪水在池州青阳县西二十里源出九华山五溪龙溪池溪漂溪双溪兰溪合流北入大江寻阳或是青阳之误未可知杨氏以武陵之五溪萧氏以巫峡之五溪当之恐皆非是沿谓顺水而下也洄谓逆水而上也王勃诗檻外长江空自流】

送族弟綰【一作瑄】从军安西【通典安西都护府本龟兹国也大唐明庆中置东接焉耆西连疏勒南邻吐蕃北拒突厥】

汉家兵马乘北风鼓行而【一作向】西破犬戎尔随汉将【一作挥长剑】出门去剪虏若草收奇功君王按剑望边色旄头已落胡天空匈奴系颈数应尽明年应【一作驱】入蒲桃宫【汉书项籍传我引兵鼓行而西必举秦矣顏师古注鼓行谓擊鼓而行无畏惧也国语穆王将征犬戎韦昭注犬戎西戎也文献通考犬戎西戎之别名在荒服汉书昂曰旄头胡星也贾谊传陛下何不试以臣为属国之官以主匈奴行臣之计请必系单于之颈而制其命吴均诗匈奴数欲尽仆在雁门关三辅黄图蒲桃宫在上林苑西汉哀帝元壽三年单于来朝以太岁厌胜所在舍之即此宫也】

送梁公昌从信安王【萧本缺王字】北征【册府元龟开元二十年正月以朔方节度副大使礼部尚书信安郡王禕为河东河北两道行军副大总管知节度事率兵讨契丹率户部侍郎裴耀卿诸副将分道统兵出范阳之北大破两蕃之衆擒其酋长余党窜入山谷】

入幕推英选捐书事远戎高谈百战术郁作万夫雄起舞莲花剑行歌明月宫将飞天地阵兵出塞垣通祖席留丹景征麾拂彩虹旋应献凯入麟阁伫深功【世说郗生可谓入幕宾也史

记外黄徐子谓太子曰臣有百战百胜之妙术汉书音义晋灼曰古长剑首以玉作井鹿卢形上木作山形如莲花初生未敷时吴均诗玉鞭莲花剑六韬武王问太公曰凡用兵为天阵地阵奈何太公曰日月星辰斗柄一左一右一向一背此谓天阵丘陵水泉亦有前後左右之利此谓地阵塞垣边墙也後汉书秦筑长城汉起塞垣杨齐贤曰丹景日也张衡思玄赋前祝融使举旄兮自注尚书曰右秉白旄以麾案执旄以指麾也秦汉以来即以所执之旄名曰麾谓麾幢曲盖者也范甯谷梁传注麾旌旛也古今注麾所以指麾武王右秉白旄以麾是也乘輿以黄诸公以朱刺史二千石以纁沈佺期诗天人开祖席朝案候征麾刘子玄诗将军献凯入歌舞溢重城通监汉纪甘露三年上以戎狄宾服思股肱之美乃图画其人於麒麟阁法其容貌署其官爵姓氏霍光张安世韩增赵充国魏相丙吉杜延年刘德梁丘贺萧望之苏武凡十一人皆有功德知名当世是以表而扬之明着中兴辅佐列於方叔召虎仲山甫焉陈子昂诗单于不敢射天子仁深功】送白利从金吾董将军西征【唐书百官志左右金吾卫上将军各一人大将军各一人将军各二人】

西羌延国讨白起佐军威剑决浮云气弓弯明月辉马行边草绿旌卷曙霜飞抗手凛相顾寒风生铁衣【後汉书西羌之本出自三苗姜姓之别也其国近南岳及舜流四凶徙之三危河关之西南羌地是也滨於赐支至於河首绵地千里南接蜀汉徼外蛮夷西北鄯善车师诸国所居无常依随水草少五谷以产牧为业唐时则槩指吐蕃为西羌延迁延也史记白起者郿人也善用兵料敌合变出奇无穷声震天下庄子天子之剑上决浮云下绝地纪孔丛子子高游赵平原君客有邹文李节者与子高相善及将还鲁诸故人诀既毕文节送行三宿临别文节流涕交颐子高徒抗手而已分背就路李善文选注抗手举手而拜也古木兰辞朔气传金柝寒光照铁衣】

送张秀才从军【国史补进士通称之为秀才】

六駮食猛武耻从驽马羣一朝长鸣去矫若龙行云壮士怀远略志存解世纷周粟犹不顾齐珪安肯分抱剑辞高堂将投霍【萧本作崔】冠军长策扫河洛宁亲归汝坟当令千古後麟阁着奇勲【诗国风隰有六駮毛萸传駮如马锯牙食虎豹孔颖達正义释畜云駮如马锯牙食虎豹郭璞引山海经云有兽名駮如白马黑尾锯牙音如虎食虎豹然则此兽名駮而已言六駮者王肃曰言六据所见而言也北史张华原为兖州刺史先是州境数有猛兽为暴自华原临政州东北七十里甌山中忽有六駮食猛兽咸以为化感所致萧士贇曰猛武当作猛虎唐国讳虎故以武易之楚辞将随驽马之迹乎楚辞章句驽钝马也後汉书情从远略志辟四方史记伯夷叔齐义不食周粟谢灵运诗弦高犒晋师鲁连却秦军临组乍不縶对珪宁肯分李善注史记曰平原君欲封鲁连连不肯受左太冲咏史诗曰临组不肯縶对珪不肯分据仲连文虽不见分珪之事古者分爵皆随其爵之轻重而赐之珪璧执以为瑞信今仲连不受齐赵之分爵明其不肯分珪也吴均诗仆本幽并儿抱剑事边陲史记霍去病为剽姚校尉斩首虏二千二十八级及相国当户斩单于大父行籍若侯产生捕季父罗姑比再冠军以千六百户封去病为冠军侯扬子法言孝莫大于宁亲诗国风遵彼汝坟郑康成周礼注水涯曰坟汝坟谓汝水之涯也後汉书郡国志汝阴本胡国注曰诗所谓汝坟也又应奉传赞二应克聪亦表汝坟盖凡汝水之滨皆可谓之汝坟矣麟阁已见前注此诗当作於禄山寇陷洛阳之後】

送崔度还吴度故人礼部员外国辅【萧本作辅国误】之子【唐书艺文志崔国辅应县令举授许昌令集贤直学士礼部员外郎坐王鉷近亲贬竟陵郡司马唐书品彙崔国辅吴郡人】

幽燕沙雪地万里尽黄云朝吹归秋雁南飞日几羣中有孤凤雏哀鸣九天闻我乃重此鸟彩章五色分胡为杂凡禽鸡鹜轻贱君举手捧尔足疾心若火焚拂羽泪满面送之吴江濱去影忽不见踌躇日将曛【孙万壽诗被甲吴江濱 濱音焚】

送祝八之江东赋得浣纱石【太平御览孔晔会稽记曰句践索美女以献吴王得诸暨苧罗山卖薪女西施郑旦先教习於土城山山边有石云是西施浣纱石太平寰宇记诸暨县有苧罗山山下有石迹云是西施浣纱之所浣纱石犹在】

西施越溪女明艷光云海未【一作来】入吴王宫殿时浣纱古石【一作石古】今犹在桃李新开映古【一作杏】查菖蒲犹短出平沙昔时红粉照流水今日青苔覆落花君去西秦适东越碧山清江几超忽若到天涯思故人浣纱石上窥明月【广韵植水中浮木也江总诗古查横近涧危石耸前洲何逊诗野岸平沙合连山远雾浮王巾头陀寺碑文东望平臯千里超忽吕向注超忽远貌】

送侯十一

朱亥已擊晋侯嬴尚隐身时无魏公子岂贵抱关人余亦不火食游梁同在陈空余湛卢剑赠尔托交亲【朱亥侯嬴事详三卷注庄子孔子穷於陈蔡之间七日不火食吴越春秋楚昭王卧而寤得吴王湛卢之剑於牀不知其故乃召风胡子而问曰寡人卧觉而得宝剑不知其名是何剑也风胡子曰此谓湛卢之剑五金之英太阳之精寄气托灵出之有神服之有威可以折冲拒敌然人君有逆理之谋其剑即出故去无道以就有道今吴王无道杀君谋楚故湛卢入楚】

鲁中送二从弟赴举之西京【一作送族弟鎰】

鲁客向西笑君门若梦中霜凋逐臣髮日忆明光宫复羨二龙去才华冠世雄平衢骋高足逸翰凌长风舞袖拂秋月歌筵闻早鸿送君日千里良会何由同【桓谭新论人闻长安乐则出门向西而笑雍録汉有明光宫三一在北宫与长乐宫相连者武帝太初四年起即王商之所指借欲以避暑者也别有明光宫在甘泉宫中亦武帝所起发燕赵美女三千人充之至尚书郎主作文书起草更直於建礼门内则近明光殿矣建礼门内得神仙门神仙门内得明光殿省中皆胡粉涂壁以丹漆地谓之丹墀尚书郎握兰含鸡舌香奏事此明光殿约其方向必在未央正宫殿中不与北宫甘泉设为奇玩者比则臣下奏事之地也琦按太白所用正指明光殿而借用宫字以趁韵耳世说谢子微见许子将兄弟曰平舆之渊有二龙焉谢灵运诗平衢修且直古诗何不策高足李善注高上也亦谓逸足也汉书高祖纪乘传诣洛阳如淳注律四马高足为置传四马中足为驰传四马下足为乘传江淹诗桂水日千里因之平生怀陈子昂

诗蜀山余方隐良会何时同】

奉饒高尊师如贵道士传道籙毕归北海【道籙详见十卷注唐时北海郡即青州也肆河南道】

道隐不可见灵书藏洞天吾师四万劫历世递相传别杖留青竹行歌蹑紫烟离心无远近长在玉京悬【老子道隐无名河上公注道潜隐使人无能指名也庄子道不可闻闻而非也道不可见见而非也太平御覽後圣道君列记曰刻以紫玉为简青金为文龟母按笔真童拂筵玉童结编名曰灵书度人经此二章并是诸天上帝及至灵魔王隐秘之音皆是大梵之言非世上常辞言无韵丽曲无华宛上天所宝秘於玄都紫微上宫依玄科四万劫一传後汉书费长房随从壶公入深山长房辞归翁予一竹杖曰骑此任所之则自至矣既至可以杖投葛陂中长房乘杖须臾来归以杖投陂顾视则龙也玉京详见五卷注】

金陵送张十一再游东吴

张翰黄花句风流五百年谁人今继作夫子世称贤再动游吴棹还浮入海船春光白门柳霞色赤城天去国难为别思归各未旋空余贾生泪相顾共凄然【张翰诗青条若总翠黄花如散金胡三省通监注白门建康城西门也西方色白故以为称古杨叛曲暂出白门前杨柳可藏鸦台州府志赤城山在天台县北六里一名烧山石皆霞色望之如雉堞因以为名孙绰赋所谓赤城霞起而建标是也支遁天台山铭序曰往天台山当由赤城为道而神邕山图亦以赤城山为天台南门石城山为西门也汉书贾谊自伤为傅无状常哭泣】

送纪秀才游越

海水不满眼观涛难称心即知蓬莱石却是巨鳌簪送尔游华顶令余发舄吟仙人居射的道士住山阴禹穴寻溪入云门隔岭深绿罗秋月夜相忆在鸣琴【初学记玄中记曰东海之大者有巨鳌焉以背负蓬莱山周围千里巨鳌巨龟也一统志华顶峰在天台县东北六十里周围百余里高万丈絶顶东望沧海俗名望海尖草木薰郁都非人世夏有积雪王粲登楼赋庄舄显而越吟见九卷注艺文类聚孔晔会稽记曰县东南十八里有射的山远望的的有如射的故谓之射的射的之西有石室可方二丈谓之射室传云羽客之所游憩土人常以此占谷食贵贱射的明则米贱暗则贵谚曰射的白斛一百射的玄斛一千又云孔灵符会稽山记曰射的山西南水中有白鹤常为仙人取箭曾刮壤寻索遂成此山也书断王羲之性爱鹅山阴昙壤村有一道士养好者十余王清旦乘小船往看之意大愿乐乃告求市易道士不与百方譬说不能得之道士言性好道久欲写河上公老子缣素早办而无人能书府君若能自屈书道德经各两章便合羣以奉羲之停半日为写毕笼鵞而归大以为乐方輿胜覽禹穴在绍兴府龙瑞宫之侧东莱云大石中断成罅殊不古殆非司马子长所探也辍耕録会稽阳明洞天在秦望山後禹庙之西南云即古禹穴越之胜境也诸峰环耸郁盘空曲施宿会稽志会稽山与宛委相接宛委山即禹穴号阳明洞天按旧经引吴越春秋东南天柱号宛委乃禹藏书处在会稽山南三里则宛委别一山也水经注山阴县南有玉笥竹林云门天柱精舍并疏山创

基架林裁宇割涧延流尽泉石之好施会宿稽志云门山在会稽县南三十里按旧经云晋义熙二年中书令王子敬居此有五色云见诏建寺号云门山有谢敷宅何公井好泉亭王子敬山亭永禅师临书阁】

送长沙陈太守二首【唐长沙郡即潭州也隶江南西道】

长沙陈太守逸气凌青松英主赐五【繆本作玉】马本是天池龙湘水迴九曲衡山望五峯荣君按节去不及【一作得】远相从【十六国春秋张谧幼有逸气太守陆云见而异之庾信春赋马是天池之龙种水经注衡山东南二面临映湘川自长沙至此江湘七百里中有九背故渔者歌曰帆随湘转望衡九面艺文类聚湘中记曰遥望衡山如阵云沿湘千里九向九背乃不复见通监地理通释衡岳在潭州衡山县西三十里衡州衡阳县北七十里有五峯曰紫盖天柱芙蓉石廩祝融子虚赋按节未舒索隐曰郭璞云言顿辔也司马彪云按辔而行得节故曰按节】

其二

七郡长沙国南连湘水滨定王垂舞袖地窄不回身莫小二千石当安远俗人洞庭乡路远遥羨锦衣春【按唐时潭州长沙郡衡州衡阳郡永州零陵郡连州连山郡道州江华郡郴州桂阳郡邵州邵阳郡此七郡者在秦汉时皆长沙故地定王舞袖事详见十五卷注汉时太守秩二千石通典岳州巴陵县有洞庭湖】

送杨燕之东鲁

关西杨伯起汉旧称贤四代三【一作五】公族清风播人天夫子华阴居开门对玉莲何事历衡霍云帆今始还君坐稍解顔为我【一作君】歌此篇我固侯门士谬登圣主筵一辞金华殿蹭蹬长江边二子鲁门东别来已经年因君此中去不觉泪如泉【後汉书杨震字伯起弘农华阴人少好学明经博覧无不穷究诸儒为之语曰关西孔子杨伯起永宁元年代刘恺为司徒延光三年代刘恺为太尉震子秉延熹五年代刘矩为太尉秉子赐熹平二年代唐珍为司空五年代袁隗为司徒光和五年拜太尉赐子彪中平六年代董卓为司空其冬代黄琬为司徒兴平元年代朱隳为太尉自震至彪四世太尉德业相继与袁氏俱为东京名族云三公旧本或有作五公者杨注以三公为是琦按後汉书诸袁事汉四世五公陈子昂梓州司马杨君神道碑迨震秉彪赐四代五公光烈昭於汉室盛德充於海内李颀诗汉家名臣杨德祖四代五公享茅土五公谓太傅太尉司徒司空大将军也杨氏四世但为三公未有登太傅大将军之位不知诸书何以言之然其语则已所本末可以为误也太平寰宇记华州华阴县以在太华山之阴故名之华山有莲花峯以形似莲花故名玉莲盖指此或谓指玉女莲花二峯而言或谓华山记云山顶有池生千叶莲花服之羽化昌黎诗所谓太华峯头玉井莲花开十丈藕如船玉莲似指玉井莲也史记正义括地志云衡山一名岫崦山在衡州湘潭县西四十一里太平寰宇记霍山一名衡山一名天柱山在寿州六安县南五里尔雅霍山为南岳注云即天柱也汉武帝以衡山辽远?纬皆以霍山为南岳故祭其神于此今其土俗皆呼南岳大

山黄庭内景玉经曰霍山下有洞房二百里司命君之府也有西北东南二门其中有五香芝飞华金瓶之宝神瞻灵瓜食之者得仙江南通志霍山在庐州府霍山县西北五里汉武帝南巡以衡山远阻移祭此山又名南岳山马融广成颂张云帆施蛰棣列子夫子始一解颜而笑三辅黄图未央宫有金华殿刘琨诗据鞍长叹息泪下如流泉】

送蔡山人

我本不弃世世人自弃我一乘无倪舟八极纵远桡燕客期跃马唐生安敢讥采珠勿惊龙大道可暗归故山有松月迟尔翫清晖【韵会倪极际也郭璞江赋凌波纵桡释名船其尾曰桡桡拖也後见拖曳也且弼正船使顺流不使他戾也玉篇柁正船木也设于船尾与舵同一作柁战国策燕客蔡泽天下骏雄弘辩之士也史记蔡泽者燕人也游学于诸侯小大甚衆不遇而从唐举相曰若臣者何如唐举熟视而笑曰先生曷鼻巨肩魑顔蹙齁膝挛吾闻圣人不相殆先生乎蔡泽知唐举戏之乃曰富贵吾所自有吾所不知者寿也愿闻之唐举曰先生之寿从今以往者四十三岁蔡泽笑谢而去谓其御者曰吾持梁刺齿肥跃马疾驱怀黄金之印结紫绶于腰揖让人主之前食肉富贵四十三年足矣庄子千金之珠必在九重之渊而骊龙颌下详见九卷注曹植诗迟奉圣顔李善注迟犹思也吕向注迟待也倪音涯桡徒可切驮上声】

送萧三十一之鲁中兼问稚子伯禽

六月南风吹白沙吴牛喘月气成霞水国郁【一作歔】蒸不可处时炎道远无行车夫子如何涉江路云帆嫋嫋金陵去高堂倚门望伯鱼鲁中正是趋庭处我家寄在沙丘旁三年不归空断肠君行既识伯禽子应驾小车骑白羊【晋书惠帝元康中京洛童谣曰南风起吹白沙遥望鲁国何嵯峨千岁髑髅生齿牙埤雅风俗通曰吴牛望月而喘言使之苦於日是故见月而喘盖伤禽惊于虚弦疲牛望月而喘物之胆怯见似而惊有如此者傅玄苦热诗呼吸气郁蒸程晓诗平生三伏时道路无行车战国策王孙贾之母曰汝朝出而晚来则吾倚门而望家语伯鱼之生也鲁昭公以鲤鱼赐孔子荣君之赐故因名鲤而字伯鱼沙丘详见十三卷注世说注卫玠韶髫时乘白羊车于洛阳市上咸曰谁家璧人】

送杨山人归嵩山【元和郡县志嵩高山古河南府告成县西北二十三里登封县北八里亦名外方山东曰太室西曰少室嵩高总名即中岳也山高二十里周回一百三十里】

我有万古宅嵩阳玉女峯长留一片月挂在东溪松尔去掇仙草菖蒲花紫茸【一作君行到此峯餐霞驻衰容】岁晚或相访青天骑白龙【登封县志太室二十四峯有玉女峯峯北有石如女子上有大篆七字人莫能识江淹赤虹赋掇仙草於危峯镌神丹于崩石神仙传嵩山石上菖蒲一寸九节服之长生抱朴子菖蒲须得生石上一寸九节以上紫花者尤善谢灵运诗新蒲舍紫茸李善注仓颉篇曰茸草貌然此茸谓蒲花也广博物志瞿武後汉人也七岁絶粒服黄精紫芝入峨眉山天竺真人授以真诀乘白龙而去】

送殷淑三首【顏真卿元静先生广陵李君碑真卿与先生门人中林子殷淑遗名子韦渠牟尝接采真之游绪闻含一之德云云是即此人也】

海水不可解连江夜为潮俄然浦屿濶岸去酒船遥惜别耐取醉鸣榔且长謡天明尔当去应有便【萧本作便有】风飘【韵会浦水滨也屿海中洲也刘渊林吴都赋注屿海中洲上有石山也潘岳西征赋鸣榔厉响李善注说文云榔高木也以长木叩船为声所以惊鱼令入网也一说榔船板也船行则响谓之鸣榔骆宾王诗鸣榔下贵洲沈佺期诗鸣榔晓帐前是也若太白此篇送客非观渔停舟饮酒非挂帆长行所谓鸣榔者当是击船以为歌声之节犹叩舷而歌之义】

其二

白鹭洲前月天明送客回青龙山後日早出海云来流水无情去征帆逐吹开相看不忍别更进手中杯【六朝事迹白鹭洲图经云在城西南八里周回十五里对江寧之新林浦景定建康志青龙山在城东南三十五里周回二十里高九十丈又溧阳县界别有青龙山】

其三

痛饮龙筵下灯青月复寒醉歌惊白鹭半夜起沙滩送岑徵君归鸣臯山【唐书地理志河南府陆浑县有鸣臯山】

岑公相门子雅望归安石奕世皆夔龙中台竟【一作有】三拆至人达机兆高揖九州伯奈何天地间而作隐沦客贵道能【一作皆】全真潜辉卧幽邻【一作鳞】探元入窅默观化游无垠光武有天下严陵为故人虽登洛阳殿不屈巢由身余亦谢明主今称偃蹇臣登高覽万古思与广成邻蹈海寧受赏还山非问津西来【一作终期】一摇扇共拂元规尘【琦按岑参感旧赋序云国家六叶吾门三相矣江陵公为中书令辅太宗邓国公为文昌右相辅高宗汝南公为侍中辅睿宗相承宠光继出辅弼逮乎武后临朝邓国公由是得罪先天中汝南公又得罪朱轮翠轂如梦中矣按唐书岑文本邓州棘阳人祖善方後梁吏部尚书父之象隋邯鄲令贞观中文本历官中书令封江陵县子从子长倩永淳中累官兵部侍郎同中书门下平章事垂拱中拜文昌右相封邓国公为来俊臣所诬陷斩于市文本孙羲累官至同中书门下三品景云间进侍中封南阳郡公羲兄献为国子司业弟仲翔陕州刺史仲休商州刺史兄弟子姓在清要者数十人羲叹曰物极则反可以惧矣然不能抑退坐豫太平公主谋诛籍其家晋书谢安字安石自幼有公辅之望杨齐贤曰奕世累世也晋书天文志永康元年三月中台星坼占曰台星失常三公忧赵王伦寻废杀贾后斩司空张华欧阳建诗古人达机兆孔安国尚书传牧牧民九州之伯晋书桓玄曰父为九州伯儿为五湖长桓谭新论天下神人五曰神仙二曰隐沦谢灵运诗既枉隐沦客庄子子之道狂狂汲汲诈巧虚伪事也非可以全真也又曰至道之精窈窈冥冥至道之极昏昏默默淮南子上游于霄霓之野下出于无垠之门高诱注无垠无形状之貌袁宏後汉纪伏见太原周党使者三聘乃肯就车陛下亲见诸庭党伏而不谒偃蹇自高逡巡求退後汉书偃蹇反俗章怀太子注偃蹇骄傲也严子陵广成子及

鲁仲连欲蹈东海事俱见二卷注晋书庾亮虽居外镇而执朝廷之权既据上流拥强兵趣向者多归之王导内不能平常遇西风尘起举扇自蔽徐曰元规尘污人 宵音杳】

送范山人归泰山【地理今释泰山在今山东济南府泰安州北五里】

鲁客抱白鹤【一作鸡】别余往太山初行若片雪【一作云】杳在青崖间高高至天门日观【一作海日】近可攀云生【萧本作山】望不及此去何时还【抱朴子欲求芝草入名山带灵宝符牵白犬抱白鸡以白盐一斗及开山符檄着大石上续博物志陶隐居云学道之士居山宜养白鸡白犬可以辟邪後汉书祭祀志马第伯封禅仪记曰是朝上太山至中观去平地二十里南向极望无不覩仰望天关如从谷底仰视抗峯其为高也如视浮云其峻也石壁窅窱如无道径遥望其人端如行朽兀或如白石或如雪久之白者移过树乃知是人也初学记太山记云盘道屈曲而上凡五千余盘经小天门大天门仰视天门如从穴中视天窻矣自下至古封禅处凡四十里山顶西岩为仙人石间东岩为介丘东南岩名日观日观者鸡一鸣时见日始欲出长三文所】

李太白集注卷十七

卷十八

钦定四库全书

李太白集注卷十八

钱塘 王琦 撰

古近体诗共三十五首

送韩侍御之广德【缪本德字下多一令字

唐书地理志江南西道宣城郡有广德县本绥安县至德二载更名广德】

昔日绣衣何足荣今宵贯酒与君倾暂就东山赠月色酣歌一夜送泉明【汉书侍御史有绣衣直指出讨奸猾治大狱颜师古注衣以绣者尊宠之也汉书高帝纪尝从王媼武负贯酒颜师古注贯赠也陶渊明尝为彭泽令故用之以拟韩侍御也野客丛书海录碎事谓渊明一字泉明李白诗多用之不知称渊明为泉明者盖避唐高祖讳耳犹杨渊之称杨泉非一字泉明也齐东野语高祖讳渊渊字尽改为泉杨升庵曰今人改泉明为泉声可笑贯始制切音世又神夜切音射义同】

白云歌送友人

楚山秦山多白云白云处处长随君君今还入楚山里云亦随君渡湘水水上女萝衣白云早卧早行君早起【萧士贇曰此诗已见七卷特首尾数语不同而此则尾语差拙恐是初本未经改定者今两存之】送通禅师还南陵隐静寺【太平府志隐静寺在繁昌县东南二十里隐静山一名五峰寺山有碧霄桂月鸣磬紫气行道五峰寺当五峰之会漓岏拱合林木幽奇古涧委折殷雷轰地相传寺为杯渡禅师所建飞锡定基江神送木现诸神异寺外有十里松径传云禅师手植或曰距寺二里许有双松对峙势若虬龙者即师手泽又尝取新罗五叶松种寺西迄今尚存旧志又言寺有朗公橘杯渡所携频伽鸟一双皆晋宋遗迹又有木米盐酱等池言剏寺时诸物皆从此出云旧额云江东第二禅林按御昌县南唐时析南陵分置在唐时尚属南陵】

我闻隐静寺山水多奇踪岩种朗公橘门深杯渡松道人制猛虎振锡还孤峰他日南陵下相期谷口逢【释氏要览智度论云得道者名为道人余出家未得道者亦名道人法苑珠林晋沙门于法兰高阳人也尝夜坐禅虎入其室因蹲牀前兰以手摩其头虎奋耳而伏数日乃去沈约法王寺碑振锡经行祇林晏坐锡释家所执锡杖一名德杖一名智杖有金环绕之作锡锡声行时以节步趋者】

送友人

青山横北郭白水遶东城此地一为别孤蓬万里征浮云游子意落日故人情挥手自兹去萧萧班马鸣【鲍照芜城赋孤蓬自振惊砂坐飞浮云一往而无迹故以比游子之意落日衔山而不遽去故以比故人之情诗小雅萧萧马鸣左传有班马之声杜预注班别也主客之马将分道而萧萧长鸣亦若有离羣之感畜犹如此人何以堪】

送别

斗酒渭城边垆头醉不眠梨花千树雪杨叶万条烟惜别倾壶醕临分赠马鞭看君颍上去新月到应【繆本作家】圆【水经注长安故咸阳也汉高帝更名新城武帝元鼎三年别为渭城在长安西北渭水之阳史记正义括地志云咸阳故城亦名渭城在雍州北五里今咸阳县东十五里太平寰宇记故渭城在今县东北二十二里渭水北即秦之杜邮其城周八里秦自孝公至始皇皆都於此城武帝元鼎三年更名渭城後汉省并地入长安故此城存史记集解韦昭曰鑪酒肆也以土为墮边高似鑪汉书注如淳曰酒家开肆待客设酒鑪故以鑪名肆臣瓚曰卢酒瓮也师古曰二说皆非也卢者卖酒之区也以其一边高形如鍛家炉故取名耳非即谓火炉及酒瓮也初学记醕首酒也玉篇醕美酒也正字通俗呼醕为尾酒醕为头酒河南道颍川汝阴郡有颍上县太平寰宇记颍上县以地枕颍水上游为名沧浪诗话太白诗斗酒渭城边垆头醉不眠乃岑参之诗误编入琦按文苑英华亦以此诗为岑参作题云送杨子岑集亦载之】

江上送女道士褚三清游南岳【南岳衡山也在今湖广衡州府衡山县西北三十里接衡阳县及长沙府界】

吴江女道士头戴莲花巾霓衣【繆本作裳】不湿雨特异阳台云【繆本作神】足下远游履凌波生素尘寻仙【萧本作倦寻】向南岳应见魏夫人【太平御覽登真隐诀曰太元上丹灵玉女戴紫华芙蓉巾巫山神女旦为朝云暮为行雨朝朝暮暮阳台之下详见二卷注洛神赋践远游之文履曳露绡之轻裾凌波微步罗襪生尘吕向注远游履名步於水波之上如生尘也南岳魏夫人传魏夫人者晋司徒剧阳文康公舒之女名华存字贤安幼而好道静默恭谨志慕神仙味真耽玄欲求冲举吐纳气液摄生夷静住世八十三年以晋成帝咸和九年岁在甲午太乙元仙遣飈车来迎夫人乃托剑化形而去位为紫虚元君领上真司命南岳夫人比秩仙公使治天台大霍山洞台中主下训奉道教授当为仙者男曰真人女曰元君】

送友人入蜀

见说蚕丛路崎岖不易行山从人面起云傍马头生芳树笼秦栈春流遶蜀城升沉应已定不必问【繆本作访】君平【蚕丛蜀王之先详见三卷蜀道难注李善文选注通俗文曰板阁曰栈史记去辄烧絶栈道索隐曰栈道阁道也音士谏反包恺音士版反崔浩云险絶之处傍凿山岩而施板梁为阁琦按入蜀之道山路县险不容坦行架木而度名曰栈道以其自秦入蜀之道故曰秦栈水经注成都县有二江双流郡下故扬子云蜀都赋曰两江珥其前者也高士传严遵字君平蜀人也隐居不任尝卖卜於成都市日得百钱以自给卜讫则闭肆下帘以

着书为事 徐而庵曰山从二句是承上崎岖不易行五字勿作好景会】

送赵云卿

白玉一杯酒绿杨三月时春风余几日两鬓各成丝秉烛唯须饮投竿也未迟如逢渭川猎犹可帝王师【此篇与十二卷内赠钱徵君少阳诗无一字差异盖编者重入未删】

送李青归华阳川【胡三省通监注华阳川在虢州华阳山南雍胜略华阳水在汉中府褒城县西二十五里源出牛头山南流与汉水合萧本作南叶阳川误】

伯阳仙家子容色如青春日月秘灵洞云霞辞世人化心养精魄隐几宵天真莫作千年别归来城郭新【列仙传老子姓李名耳字伯阳陈人也生於殷时为周柱下史转为守藏史积八十余年史记云二百余年时称隐君子江淹诗隐沦驻精魄庄子南郭子綦隐几而坐陆德明音义隐凭也丁令威歌去家千年今始归城郭如故人民非】

送舍弟

吾家白额【一作马】驹远别临东道他日相思一梦君应得池塘生春草【魏志曹休闲行北归见太祖太祖谓左右曰此吾家千里驹也吾家白额驹即吾家千里驹之意而改用李氏事耳晋书武昭王讳暕字玄盛姓李氏汉前将军广之十六世孙也尝与太史令郭璆及其同母弟宗綽同宿璆起谓綽曰君当位极人臣李君有国土之分家有駟草马生白额驹此其时也吕光末京兆段业自称凉州牧以炖煌太守孟敏为沙州刺史署京盛效谷令敏寻卒护军郭谦等以玄盛温毅有惠政推为炖煌太守玄盛初难之宗綽言於玄盛曰君忘郭璆之言即白额驹今生矣玄盛乃从之谢灵运梦见从弟惠连得池塘生春草句详见十一卷注】

送别【得书字】

水色南天远舟行若在虚迁人发佳兴吾子访闲居日落看归鸟潭澄羡【一作怜】跃鱼圣朝思贾谊应降紫泥书【汉书贾谊为长沙王太傅後岁余帝思谊徵之紫泥用之以封玺书见七卷注】

送鞠十少府

试发清秋兴因为吴会吟碧云敛海色流水折江心我有延陵剑君无陆贾金艰难此为别惆怅一何深【新序延陵季子将西聘晋带宝剑以□徐君详见十二卷注汉书陆贾有五男出所使越橐中装卖千金分其子子二百金令为生产】

送张秀才谒高中丞【并序】

余时系寻阳狱中正读留侯传秀才张孟熊蘊灭胡之策将之广陵谒高中丞余喜子房之风感激於斯人因作是诗以送之【史记世家第二十五为留侯世家曰留侯传盖变称也旧唐书高适者渤海蓆人也为谏议大夫负气敢言上皇以诸王分镇适切谏不可及永王叛肃宗闻其论谏有素召而谋之适因陈江东利害永王必败上奇其对以适兼御史大夫扬州大都督府长史淮南节度使诏与江东节度来瑱率水部兵平江淮之乱会於安州师将渡而永王败适喜言王霸大略务功名尚节义逢时多难以安危为已任然言过其实为大臣所轻】

秦帝沦玉镜【一作六雄灭金虎】留侯降氛氲感激黄石老经过沧海君壮士挥金槌报讎六国【繆本作合】闻智勇冠终古萧陈难与羣两龙争鬪时天地动风云酒酣【一作纵横】舞长剑仓卒解汉纷宇宙初倒悬鸿【繆本作洪】沟势将分英谋信奇絶夫子扬清芬【一作夫子称卓絶超然继清芬】胡月入紫微三光乱天文高公镇淮海谈笑却【繆本作廓】妖氛采尔幕中画戡难光殊勲我无燕霜感玉石俱烧焚但洒一行泪临岐竟何云【尚书帝命验桀失玉镜用其噬虎郑康成注玉镜谓清明之道史记留侯世家留侯张良者其先韩人也秦灭韩良悉以家财求客刺秦王为韩报仇以大父父五世相韩故良尝学礼淮阳东见沧海君得力士为铁椎重百二十斤秦皇帝东游良与客狙击秦皇帝博浪沙中误中副车秦皇帝大怒大索天下求贼甚急良乃更姓名亡匿下邳尝从容步游下邳地上有一老父衣褐至良所直堕其履圯下顾谓良曰孺子下取履良愕然欲殴之为其老强忍下取履父曰履我良业为取履因长跪履之父以足受笑而去良殊大惊随目之父去里所复还曰孺子可教矣後五日平明与我会此良因怪之跪曰诺五日平明良往父已先在怒曰与老人期後何也後五日早会五日鸡鸣良往父又先在复怒曰後何也後五日复早来五日良夜未半往有顷父亦来喜曰当如是出一编书曰读此则为王者师矣後十年兴十三年孺子见我济北谷城山下黄石即我矣遂去不复见旦日视其书乃太公兵法也项羽本纪项羽兵四十万在新丰鸿门沛公兵十万在霸上范增说项羽急击勿失项伯者项羽季父也素善张良乃夜驰之沛公军私见张良具告以事欲呼张良与俱去母从俱死良曰沛公有急亡去不义不可不语良乃入具告沛公出要项伯入见沛公奉卮酒为寿约为婚姻曰愿伯具言臣之不敢倍德也项伯许诺谓沛公曰旦日不可不蚤自来谢旦日从百余骑来见项王至鸿门谢项王因留沛公与饮范增出召项庄谓曰若入前为寿寿毕请以剑舞因击沛公於坐杀之庄则入为寿寿毕曰军中无以为乐请以剑舞项王曰诺项庄拔剑起舞项伯亦拔剑起舞常以身翼蔽沛公庄不得击张良至军门见樊哙曰今日乏事何如良曰甚急项庄拔剑舞其意常在沛公也哙曰此迫矣臣请入与之同命哙即带剑拥盾入军门须臾沛公起如厕因招樊哙出於是遂去令张良留谢汉四年项王与汉约中分天下割鸿沟以西者为汉鸿沟而东者为楚项王已约乃引兵解而东归汉欲西归张良陈平说曰汉有天下大半诸侯皆附之楚兵罢食尽此天亡楚之时也不如因其饥而遂取之今释弗击此所谓养虎自遗患也汉王听之汉书音义沧海君晋灼曰海神也如淳曰秦郡县无沧海或曰东夷君长也顔师古曰二说并非盖当时贤者之号也琦按史记汉书载博浪沙事并云铁椎惟水经注云张良为韩报仇於秦以金椎击秦始皇不中中其副车骆宾王诗金椎许报韩盖出於此汉书张良传赞闻张良之智勇以为其貌魁梧奇伟反若妇人女子卢谌诗智勇冠当代史记彭越传两龙方鬪且待之说文酣酒乐也应劭曰不醉不醒曰酣晋书月为胡王陈书陈宝应起兵沙门惠标作五言诗以送之曰匹马犹临水离骑稍引风好看今夜月当入紫微宫陈书文参礼乐武定妖氛谢瞻诗婉婉幕中画

广韵戡胜也克也太平御覽邹衍事燕惠王尽忠左右潛之王系之仰天而哭夏五月天为之降霜书胤征火炎崑冈玉石俱焚 戡音堪】

寻阳送弟昌峒【繆本作峒】鄱阳司马作【鄱阳唐时郡名即饶州也隶江南西道为上州有司马一人从五品】

桑落洲渚连沧江无云烟寻阳非剡水忽见子猷船飘然【繆本作了见】欲相近来迟杳若仙人乘海上月帆落湖中天一觀无二诺朝欢更胜昨尔则吾惠连吾非尔康乐朱绂白银章上官佐鄱阳松门拂中道石镜回清光摇扇及于越水亭风气凉与尔期此亭期在秋月满时过或未来两乡心已断吴山对楚岸彭蠡当中州相思定如此有穷尽年愁【太平寰宇记桑落洲在舒州宿松县西南一百九十四里江水始自鄂陵分???为九於此合流谓之九江口此洲与江州寻阳县分中流为界一统志桑落洲在九江府城东北过江五十里昔江水泛涨流一桑於此因名王子猷乘船往剡溪访戴安道详见九卷注魏徵诗季布无二诺侯嬴重一言宋书谢惠连幼有才悟而轻薄不为父方明所知灵运尝自始寧至会稽造方明过视惠连大相咨赏谓方明曰阿连才悟如此而尊作常儿遇之韵会绂绶也增韵印组也章印章也朱绂银章详见十一卷赠刘都使诗注凡除官到任谓之上官司马州之佐职江西通志松门山在南昌府城西比二百十五里枕鄱湖之东两岸悉生松遥望如门故名上有石镜光可照人谢康乐诗攀崖照石镜牵叶入松门是也太平寰宇记于越渡在余干县西南一百二十步置津吏主守四时不絕于越亭在余干县东南三十步屹然孤立古今游者多留题章句焉江西通志于越亭在饶州府余干县羊角山文公谈苑云前瞰琵琶洲後枕思禅寺林麓森郁千峰竞秀唐初张彦俊建通监地理通释彭蠡在江州浔阳县括地志在县东南五十里六典注一名宫亭湖在南康军星子县南江州彭泽县西地理志在豫章郡彭泽县西郡县志在都昌县西六十里与浔阳县分湖为界禹贡扬州彭蠡既豬即江汉所汇之泽合江西江东诸水跨豫章饶州南康军三州之地】

钱校书叔云

少年费白日歌笑矜朱顏不知忽已老喜见春风还惜别且为懽徘徊桃李间看花饮美酒听鸟临晴山向晚竹林寂无人空闭关【晋书阮咸任达不拘与叔父籍为竹林之游闭关犹闭门也江淹恨赋闭关却扫塞门不仕】

送王孝廉覲省

彭蠡将天合姑苏在日边寧亲候海色欲动孝廉船窈窕晴江转参差远岫连相思无昼夜东注【萧本作泣】似长川【江西志鄱阳湖在南昌府城东北一百五十里即禹贡之彭蠡也一名宫亭湖一名扬澜湖跨南昌饶州南康三郡合上流诸水入焉周围数百里阔四十里长三百里每春夏之间江汉水涨则彭蠡之水郁不得流而逆回倒积遂成巨浸弥渺数百里无复畔岸逮夫二水渐消则彭蠡之水始出大江循南岸而行与二水颉颃趋海韵会将与也鲍照登大雷岸与妹书长波天合杨齐贤曰姑苏苏州吴郡以其近东海日出之地故云日边

法言孝莫大於寧亲世说张凭举孝廉出都负其才气谓必参时彦欲诣刘尹乡里及同举者共笑之张遂诣刘清言弥日因留宿至晓刘曰卿且去正当取卿共诣抚军张还船同侣问何处宿张笑而不荅须臾真长遣传教觅张孝廉船同侣惋愕】

同吴王送杜秀芝举入京【按诗题当是送杜秀才赴举入京芝字疑譌】

秀才何翩翩王许回也贤暂别庐江守将游京兆天秋山宜落日秀水出寒烟欲折一枝桂还来雁沼前【庐江郡名即庐州也隶淮南道通典雍州开元三年改为京兆府凡周秦汉晋西魏後周隋至於我唐并为帝都晋书郗诜曰臣举贤良对策为天下第一犹桂林之一枝崑山之片玉西京杂记梁孝王筑兔园园中有雁池池间有鹤洲鳧渚其诸宫观相连延亘数十里奇果异树瑰禽怪兽毕备王与宫人宾客弋钓其中】

洞庭醉後送绛州吕使君杲【萧本作果】流澧州【湖广志洞庭湖在岳州西南绵跨八百里绛州又谓之绛郡隶河东道澧州在澧水之阳又谓之澧阳郡隶山南东道在京师东南一千八百九十三里】

昔别若梦中天涯忽相逢洞庭破秋月纵酒开愁容赠剑刻玉字延平两蛟龙送君不尽意书及雁回峰【中华古今注晋时斗牛间常有紫气张华知是剑气乃以雷焕为丰城令焕到县掘县狱深得剑两枚一送与张华一焕自佩後华死子韞佩过延平津跃入水使人寻之乃见化为龙也雷焕卒子亦佩之於延平津亦跃入水化为龙矣方輿胜覽回雁峰在衡阳之南雁至此不过遇春而回故名或曰峰势如雁之回湖广志回雁峰在衡州府城南里许相传雁不过衡阳至此而回然闻桂林间尚有雁声知此说非矣或谓峰之形势如雁回转者是也南岳周环八百里回雁为首岳麓为足云】

与诸公送陈郎将归衡阳【并序 按唐书百官志左右十四卫及太子左右六率府皆有郎将乃五品官也衡阳唐时郡名即衡州隶江南西道】

仲尼旅人文王明夷苟非其时圣贤低眉况仆之不肖者而迁逐枯槁固非【非字疑当作亦】其宜朝心不开暮髮尽白而登高送远使人增愁陈郎将义风凛然英思逸发来下曹城之榻去邀才子之诗动清兴於中流泛素波而径去诸公仰望不及连章祖之序慙起予辄冠名贤之首作者嗤我乃为抚掌之资乎【京氏易传易曰旅人先笑後号咷又曰得其资斧仲尼为旅人固可知矣周易明入地中明夷内文明而外柔顺以蒙大难文王以之周易集解郑玄曰夷伤也日出地上其明乃光至其入地明则伤矣故谓之明夷日之明伤犹圣人君子有明德而遭乱世抑在下位则宜自艰无干政事以避小人之害也荀爽曰明在地下为坤所蔽大难之象文王君臣相伤故当大难也王弼易注文王明夷则主可知矣仲尼旅人则国可知矣高唐赋登高望远使人心悴晋书左思赋三都初陆机入洛欲为此赋闻思作之抚掌而笑与弟云书曰此间有伧父欲作三都赋须其成当以覆酒瓮耳及思赋出机絶叹伏以为不能加也遂辍笔焉王羲之与谢万书语田里所行故以为抚掌之资其为得意可胜言即】

衡山苍苍入紫冥下看南极老人星回飈吹散五峰雪往往飞花落洞庭气清岳秀有如此郎将一家拖金紫门前食客乱浮云世人皆比孟尝君江上送行无白璧临歧惆怅若为分【方輿胜覽南岳一名衡山在衡山县西三十里晋因山以名郡湘中记度应斗衡位值离宫故曰衡山又名霍山南岳记衡山者朱陵之灵台太虚之宝洞上承翼轸铃总万物故名衡山下踞离宫统摄火乡故号南岳赤帝馆其岭祝融宅其阳逮於轩辕以潜霍二山副焉长沙记衡山轩翔耸拔九千余丈尊卑参差七十二峰岩洞溪涧泉石之胜交错其中又有数十洞十五岩三十八泉二十五溪九池九潭六源八桥六井三穿三漏此最着者七十二峰最大者五祝融紫盖云蜜石廩天柱而祝融为最高水经注湘水又北径衡山县东山在西南有三峰一名紫盖一名石廩一名容峰容峰最为竦杰自远望之苍苍隐天故罗含云望若陈云自非清霁素朝不见其峰丹水涌其左醴泉流其右山经谓之岫崦山为南岳也史记天官书狼北地有大星曰南极老人老人见治安常以秋分时候之於南郊晋书老人一星在弧南一曰南极常以秋分之旦见於景春分之夕而没於丁见则治平主壽昌魏书发响九臯翰飞紫冥谢灵运诗回飈流轻雪陆机谢平原内史表怀金拖紫退就散輩後汉书圣恩横加猥赐金紫章怀太子注汉官仪曰二千石金印紫绶也史记孟尝君在薛招致诸侯宾客及亡人有罪者皆归孟尝君孟尝君舍业厚遇之以故倾天下之士食客数千人无贵贱一与文等吕氏春秋郈成子为鲁聘於晋过卫右宰谷臣止而觴之酒酣而送之以璧】送赵判官赴黔府中丞叔幕【册府元龟赵国珍天宝中为黔府都督本管经略等使国珍有武略习知南方地形在五溪凡十余年中原兴师惟黔中封境无虞通监黔中节度使赵国珍本牂牁夷也胡三省注赵国珍牂牁别部充州蛮酋赵君道之裔杨国忠兼剑南节度以国珍有方略授黔中都督护五溪十余年天下方乱其所部独寧所谓黔府中丞者即其人坎中丞是其兼衔耳唐书地理志黔州黔中郡下都督府本黔安郡天宝元年更名黔音琴】

廓落青云心结交黄金尽富贵翻相忘令人忽自哂蹭蹬鬓毛斑盛时难再还巨源咄石生何事马蹄间绿萝长不厌却欲还东山君为鲁曾子拜揖高堂里叔继赵平原偏承明主恩风霜推【一作摧非】独坐旌节镇雄藩虎士秉金钺蛾眉开玉樽才高幕下去义重林中言水宿五溪月霜啼三峡猿东风春草绿江上候归轩【宋玉九辩廓落兮羁旅而无友生吕延济注廓落空寂也韵会蹭蹬困顿也晋书山涛字巨源河内怀人也州辟部河南从事与石鉴共宿涛夜起蹴鉴曰今为何等时而眠耶知太傅卧何意鉴曰宰相三不朝与尺一令归第卿何虑也涛曰咄石生无事马蹄间耶投传而去未二年果有曹爽之事又晋书谢安虽受朝寄然东山之志始末不渝每形於言色史记曾参南武城人孔子以为能通孝道故授之业作孝经平原君赵胜者赵之诸公子也诸子中胜最贤喜宾客宾客至者数千人汉时御史中丞与司隶校尉尚书令会同得专席而坐详见十卷注旧唐书天宝中缘边御戎之地置八节度使受命之日赐之旌节谓之节度使得以专制军事外任之重无比焉新唐书百官志节度使辞日赐双旌双节行则建节竖六纛入境州县筑节楼迎以鼓角虎士有力之士详见八卷注诗商颂有?秉钺秉执也陆云吴故丞相陆公诔金钺镜日云旗绛天晋书阮咸任达不拘与叔父籍为竹林之游谢灵运诗水宿淹晨暮吕延济注水宿宿舟中也通典黔中古蛮夷之国春秋战国皆楚地秦惠王欲楚黔中地以武关外易之即此是也通谓之五溪注云五溪谓西辰巫武沅五溪也水经注宜都记曰自黄牛滩东入西陵界至峡口一百许里山水纡曲两岸高山重嶂非日中夜半不见日月絶壁或千许丈其石彩色形容多所像类林木高茂略尽冬春猿鸣至

清山谷传响泠泠不絕所谓三峡此其一也白帖荆州记曰巴东三峡猿长鸣至三声闻者莫不垂泪南齐书凡车有幡者谓之轩】

送陆判官往琵琶峡【方輿胜覽琵琶峡在巫山对蜀江之南形如琵琶此乡妇女皆晓音律】

水国秋风夜殊非远别时长安如梦里何日是归期【杨升庵曰太白诗天山三丈雪岂是远行时又曰水国秋风夜殊非远别时岂是殊非变幻二字愈出愈奇孟蜀韩琬诗晚日低霞绮晴山远画眉青青河畔草不是望乡时亦祖太白句法】

送梁四归东平【东平唐时郡名即郢州也隶河南道】

玉壶挹美酒送别强为欢大火南星月长郊北路难殷王期负鼎汶水起垂竿莫学东山卧参差老谢安【六经天文编夏氏曰仲夏之月初昏之时大火见於南方正午之位史记阿衡欲干汤而无由乃为有莘氏媵臣负鼎俎以滋味说汤致於王道越絶书伊尹负鼎入殷遂佐汤取天下春秋正义释例曰汶水出泰山莱芜县西南经济北至东平须昌县入济行水金监述征记云泰山郡水皆名汶今县界有五汶皆源别而流同其原山之汶水西南流经乾封县治南去县三里又西南流九十里入郢州中都县按五汶者曰北汶小汶柴汶牟汶其一则经流也谢安高卧东山见七卷注】

江夏送友人【江夏唐时郡名即鄂州也属江南西道】

雪点翠云裘送君黄鹤楼黄鹤振玉羽西飞帝王州凤无琅玕实何以赠远游徘徊相顾影泪下汉江流【宋玉讽赋翳水日之华披翠云之裘杨齐贤曰黄鹤楼在鄂州图经云费文禕得仙驾黄鹤憩此鲍照舞鹤赋振玉羽而临霞琅玕实见二卷注】

送郗昂谪巴中【按羊士谔诗集有诗题云乾元初严黄门自京兆少尹贬巴州刺史云云诗下注云时郗詹事昂自拾遗贬清化尉黄门年三十余且为府主与郗意气友善赋诗高会文字犹存又李华杨骑曹集序刑部侍郎长安孙公逖以文章之冠为考功员外郎精试羣材君与南阳张茂之京兆杜鸿渐琅琊顔真卿兰陵萧颖士河东柳芳天水赵骅顿丘李琚赵郡李?李颀南阳张阶常山阎防范阳张南容高平郗昂等连年登第】

瑶草寒不死移植沧江滨东风洒雨露会入天地【一作池】春予若洞庭叶随波送逐臣思归未可得书此谢情人【江淹诗瑶草正翕葩李善注瑶草玉芝也琦按诗家用瑶草谓珍异之草耳未必专指玉芝而言楚辞洞庭波兮木叶下】

江夏送张丞

欲别心不忍临行情更亲酒倾无限月客醉几重春藉草依流水攀花赠远人送君从此去回

首泣迷津【孙绰天台赋藉萋萋之纤草李善注以草荐地而坐曰藉】

赋得白鹭鸶送宋少府入三峡【三峡详见八卷注】

白鹭拳一足月明秋水寒人惊远飞去直向使君滩【水经注江水东经羊肠虎臂滩杨亮为益州刺史至此舟覆惩其波澜蜀人至今犹名之为使君滩太平寰宇记使君滩在万州东二里大江中昔杨亮赴任益州行船至此覆没故名一统志使君滩在荆州夷陵州西一百十里】

送二季之江东

初发强中作题诗与惠连多惭一日长不及二龙贤西塞当中路南风欲进船云峰出远海帆影挂清川禹穴藏书地匡山种杏田此行俱有适迟尔早归旋【谢灵运有登临海峤初发强中与从弟惠连诗刘履曰强中地名今山下有强口疑即此也世说谢子微见许子将兄弟曰平舆之渊有二龙焉杨齐贤曰西塞山在鄂州陆放翁入蜀记晚过道士矶石壁数百尺色正青了无窍穴而竹树迸根交错其上苍翠可爱自过小孤临江峰嶂无出其右矶一名西塞山即玄真子渔父辞所谓西塞山前白鹭飞者李太白送弟之江东云西塞当中路南风欲进船必在荆处作故有中路之句张文潜云危矶插江生石壁劈青玉殆为此山写真又云已逢妩媚散花峡不怕艰危道士矶盖江行推马当及西寨最为湍险难上谢灵运诗灭迹入云峰太平御览九土文括略曰会稽山有一石穴委曲黄帝藏书於此禹得之施宿会稽志阳明洞天在会稽县宛委山龙瑞宫旧经云三十六洞天之十一洞也洞外飞来石下为禹穴传云禹藏书处一云禹得玉匱金书於此薛方山浙江通志宛委山上有石匱壁立中有孔穴号阳明洞即旧经所谓三十六洞天之十一洞也夏禹发之得赤珪如日碧珪如月又於中得金简玉字之书悟百川之理贺知章纂山记曰黄帝号宛穴为赤帝阳明之府於此藏书大禹始於此穴得书复於此穴藏之人因谓之禹穴匡山即庐山也庐山记匡续结庐於山故号匡庐山神仙传董奉还豫章庐山下居不种田日为人治病亦不取钱重病愈者使栽杏五株轻者一株如此数年计得十余万株郁郁成林乃使山中百禽羣兽游戏其下卒不生草常如芸治杏子熟於林中作一草仓示人曰欲买杏者不须报奉但将谷一器置仓中即自往取一器杏去常有人置谷少而取杏多者林中群虎出吼逐之大怖急挈杏走路旁倾覆至家量杏一如谷多少或有人偷杏者虎逐之到家啗至死家人知其偷杏乃送还奉叩头谢过乃却使活韵会迟待也谢灵运有南楼中望所迟客诗云临江迟来客是也诗小雅言旋言归复我邦族谢灵运诗三载期归旋迟音治】

江西送友人之罗浮【艺文类聚罗浮山记曰罗浮者盖总称罗罗山也浮浮山也二山合体谓之罗浮在增城博罗二县之境旧说罗浮高三千丈有七十二石室七十二长溪神明神禽玉树朱草】

桂水分五岭衡山朝九疑乡关眇安西流浪将何之素色愁明湖秋渚晦寒姿畴昔紫芳意已过黄发期君王纵疎散云壑借巢夷尔去之罗浮我还憩峨眉中阔道万里霞月遥相思如寻

楚狂子琼树有芳枝【通与桂州临桂县有离水一名桂江水源多桂不生杂树汉书南有五岭之戍顏师古注西自衡山之南东穷於海一山之限耳而别标名则有五焉裴氏广州记曰大庾始安临贺桂阳揭阳是为五岭邓德明南康记曰大庾岭一也桂阳骑田岭二也九真都龐岭三也临贺萌渚岭四也始安越成岭五也戴凯之竹谱五岭之说互有异同余往交州行路所见兼访旧老考诸古志则今南康始安临贺为北岭临漳寧浦为南岭五都界内各有一岭以隔南北之水供通南越之地南康临贺始安三郡通广州寧浦临漳二郡在广州西南通交州或赵佗所通或马援所并厥迹在焉故陆机诗伐鼓五岭表道九真也徐广杂记以剡松阳建安康乐为五岭其谬远矣俞益期与韩康伯以晋兴所统南移大营九冈为五岭之数又其谬也初学记南岳衡山朱陵之灵台太虚之宝洞上承冥宿銓德钧物故名衡山下踞离宫掇位火乡赤帝馆其岭祝融托其阳故号南岳周旋数百里高四千一十丈东南临湘川自湘川至长沙七百里九向九背然後不见元和郡县志九疑山在道州延唐县东南一百里九山相似行者疑惑故名杨齐贤曰唐安西大都护府初治西州後徙治高昌故地又徙治龟兹而故府复为西州交河郡琦按文义安西字疑讹指为陇右道安西大都护府者?未是陶潜祭从弟文流浪无成惧负素志畴昔昔日也已见前注江淹诗终覩紫芳心李善注紫芳紫芝也尔雅黄发寿也郭璞注黄发发落更生黄者邢昺疏舍人曰黄发老人发白更黄也曹植诗王其爱玉体俱享黄髮期张铕注黄发期谓寿考也北山移文诱我松桂欺我云壑通典嘉州峨眉县有峨眉山列仙传陆通者云楚狂接輿也好养生食橐卢木实及茱萸子游诸名山在蜀峨眉山上世世见之历数百年仙去】

宣州谢朓楼饯别校书叔云【一作陪侍御叔华登楼歌 江南通志叠嶂楼在寧国府郡治後即谢朓为宣城太守时之高斋地一名北楼亦称谢公楼唐咸通间刺史独孤霖改建易今名】

弃我去者昨日之日不可留乱我心者今日之日多烦忧长风万里送秋雁对此可以酣高楼蓬萊文章建安骨中间小谢又清发俱怀逸兴壮思飞欲上青天【一作云】覽明【萧本作日】月抽刀断水水更流举杯消愁愁更【一作复】愁人生【一作男儿】在世不称意明朝散发弄扁舟【一作举棹还沧洲 陆机诗长风万里举庆云郁嵯峨後汉书窦章传是时学者称东观为老氏藏室道家蓬萊山章怀太子注言东观经籍多也蓬萊海中神山为仙府幽经秘録并皆在焉东汉建安之末有孔融王粲陈琳徐干刘桢应?阮瑀及曹氏父子所作之诗世谓之建安体风骨遒上最饶古气鍾嵘诗品论谢惠连云小谢才思富捷恨其兰玉夙凋故长轡未骋卢思道卢记室谏丽词泉涌壮思云飞散发科头也扁舟特舟也俱见二卷注】宣城送刘副使入秦【按唐书百官志节度使之下有副使一人同节度副使十人又安抚使观察使团练使防御使之下皆有副使一人】

君即刘越石雄豪冠当时凄清横吹曲慷慨扶风词虎啸俟腾跃鷄鸣遭乱离千金市骏马万里逐王师结交楼烦将侍从羽林儿统兵扞吴越豺虎不敢窥大勳竟莫叙已过秋风吹秉钺有季公凜然负英姿寄深且戎幕望重必台司感激一然诺纵横两无疑伏奏归北阙鸣驄忽西驰列将咸出祖英寮惜分离斗酒满四筵歌笑宛溪湄君携东山妓我咏北门诗贵贱交不易恐伤中园葵昔赠紫骝驹今倾白玉卮同驩万斛酒未足解相思此别又【一作外别】千

里秦吴眇天涯月明关山苦水剧陇头悲借问几时还春风入黄池无令长相思折断绿杨枝
【晋书刘琨字越石少得隽朗之目与范阳祖纳俱以雄豪着名在晋阳尝为胡骑所围数重城中窘迫无计琨乃乘月登楼清啸贼闻之皆凄然长叹中夜奏胡笳贼又流涕歔歔有怀土之思向晓复吹之贼并弃围而走刘越石有扶风歌朝发广莫门暮宿丹水山左手弯繁若右手挥龙渊云云凡九首其横吹曲今逸不存或指吹胡笳而言恐未的张衡思玄赋超踰腾跃絶世俗世说注晋阳秋曰祖逖与刘琨俱以雄豪着名年二十四与琨同辟司州主簿情好绸缪共被而寝中夜闻鸡鸣俱起曰此非恶声也史记所将卒斩楼烦将五人李奇曰楼烦县名其人善骑射故以名射士为楼烦取其美称未必楼烦人也张晏曰楼烦胡国名汉书羽林掌送从武帝太初元年置名曰建章营骑後更名羽林骑费?诗家本楼烦俗召募羽林儿上元中宋州刺史刘展举兵反其党张景超孙待封攻陷苏湖进逼杭州为温晁李藏用所败见後二十八卷注刘副使於时亦在兵间而功不得録故有统兵扞吴越豺虎不敢窥大勳竟莫叙已过秋风吹之句诗商颂有?秉钺南齐书秉钺出关凝威江甸季公谓季广琛旧唐书上元二年正月温州刺史季广琛为宣州刺史充浙江西道节度使十六国春秋英姿迈古艺业超时戎幕节度使之幕府羊祜让开府表伏闻恩诏拔臣使同台司注台司三公也汉书贯高此固赵国立名义不侵为然诺者也北阙是上书奏事之徒所诣者见十三卷注北史鸣驺清路盛列羽仪章怀太子後汉书注驺骑士也诗大雅韩侯出祖出宿於屠江南通志宛溪在寧国府城东世说谢安在东山畜妓毛萇诗传北门刺仕不得志也言卫之忠臣不得其志耳古诗采葵莫伤根伤根葵不生交结莫羞贫羞贫交不成汉书高帝纪上奉玉卮为太上皇寿应劭曰卮饮酒礼器也古以角作受四升晋灼曰音支顔师古曰卮饮酒圆器也韩非子今有白玉之卮而无当庾信荡子赋关山惟月明郭仲产秦川记陇山东西百八十里登山岭东望秦川四五百里极目泯然山东人行役至此而顾瞻者莫不悲思故歌曰陇头流水分离四下念我行役飘然旷野登高望远涕零双堕刘三省通监注宣州当涂县有黄池镇一统志黄池河在太平府城南六十里东接固城河西接芜湖县河入大江南至黄池镇北至宣城县界江南通志黄池河在池州当涂县南七十里宁国府城北一百二十里一名玉溪郡东南之水皆聚此出大江河心分界南属宣城北属当涂】

泾川送族弟鐔【太白自注时卢校书草序常侍御为诗】

泾川三百里若耶羞见之锦石照碧山两边白鹭鸶佳境千万曲客行无歇时上有琴高水下有陵阳祠仙人不见我明月空相知问我何事来卢敖结幽期蓬山振雄笔绣服挥清词江湖发秀色草木含荣滋置酒送惠连吾家称白眉媿无海峤作敢阙河梁诗见尔复几朝俄然告将离中流漾彩鷁列岸丛金羈叹息苍梧凤分栖琼树枝清晨各飞去飘落天南垂望极落日尽秋深暝猿悲寄情与流水但有长相思【泾川即泾溪也在泾县西南一里唐时隶宣城郡源出石埭流经南陵宣城踰芜湖入大江通典宣州泾县有泾水越州会稽县有若耶溪江南通志琴溪在宁国府泾县源出自宁国诸山与溪头水合西过琴高山下乃名琴溪传是仙人琴高控鲤之地一统志望仙亭在陵阳山中峰之半相传汉窦子明昇仙之地有唐天宝间所建仙坛宫陵阳祠即仙坛宫也卢敖详见十四卷注学者称东观为道家蓬莱山见前二首注綉衣御史见十一十二卷注蓬山振雄笔谓卢校书草叙也绣服挥清词谓常侍御作诗也马氏五常白眉最良见十六卷注谢灵运有登临海峤与从弟惠连诗与子别山阿含酸赴修畛

中流袂就判欲去情不忍李陵与苏武诗携手上河梁游子暮何之刘良注河梁桥也魏书中山王熙之镇邺也知友才学之士袁翻李琰李神儒王诵兄弟裴敬宪等咸饯於河梁赋诗告别吴均诗有客告将离赠言重兰蕙子虚赋浮文鷁张揖注鷁水鸟也画其像於船首宋之问太平公主山池赋文虹桥兮彩鷁舟陆机云赋翼灵凤於苍梧起滞龙於潢汗琼树枝见二卷注垂边也】

五松山送殷淑【杨齐贤曰五松山在宣州南陵】

秀色发江左风流奈若何仲文了不还独立扬清波载酒五松山颓然白云歌中天度落月万里遥相过抚酒惜此月流光畏蹉跎明日别离去连峰郁嵯峨【江左江南也详见十二卷注晋书殷仲文南蛮校尉顗之弟也少有才藻美容貌】

送崔氏昆季之金陵【一作秋夜崔八丈水亭送崔二】

放【一作吴】歌倚东楼行子期晓发秋风渡江来吹落山上月主人出美酒灭烛延清光二崔向金陵安得不尽觞水客弄归棹云帆卷轻霜扁舟敬亭下五两先飘扬峡石入水花碧流日更长思君无岁月西笑阻河梁【刘铄诗罗帐延秋月吕向注延引也马融广成颂张云帆施蛻螭孟康汉书注扁舟特舟也唐书地理志宣州宣城县有敬亭山郭璞江赋觐五两之动静韵会统船上候风羽楚人谓之五两】

登黄山凌【繆本作陵】歊台送族弟溧阳尉济充【一作统】泛舟赴华阴【一本下有得齐字三字杨齐贤曰太白自注时在当涂即今之太平也黄山在城北凌歊台在其上太平府志黄山在郡治北五里高四十丈山如初月形旧传浮丘公牧鸡於此亦名浮丘山上有宋孝武避暑离宫及凌歊台遗址陆放翁入蜀记凌歊台正如凤凰台之类特因山巔为之宋高祖所营面势虚旷高出氛埃之表南望青山龙山九井诸峰如在几席稍西江中二小山相对云东梁西梁也北户临和州新城楼櫓历历可辨盖自絕江至和州财十余里溧阳宣州县名隶江南东道华阴郡名即华州隶关内道歊音嚣】

鸾乃凤之族翱翔紫云霓文章辉五色【一作耀五采】双在琼树栖一朝各飞去凤与鸾俱啼炎赫五月中朱曦烁河堤尔从泛舟役使我心魂凄秦地无草木南云喧鼓鼙君王减玉膳早起思鸣鸡【当是民饥之讹】漕引救关辅疲人免涂泥宰相作霖雨农夫得耕犁静者伏草间羣才满金闺空手【许本作乎】无壮士穷居使人低送君登黄山长啸倚【一作上】天梯小舟若鳬雁大舟若鲸鲵开帆散长风舒卷与云齐日入牛渚晦苍然夕烟迷相思在何许【一作在何所一作定何许】杳在洛阳西【张华禽经注鸾者凤凰之亚始生类凤久则五彩变易高诱淮南子注翱翔鸟之高飞翼上下曰翱直刺不动曰翔琼树凤所栖食之树见二卷古诗第四十首注中郭璞诗朱羲将由白李善注朱羲日也左传秦於是输粟於晋自雍及绛相继命之曰泛舟之役旧唐书天宝六载自五月不雨至秋七月乙酉以旱命宰相台寺府县録系囚死罪决杖配流徒以下特免庚寅始雨九载三月时久旱制停封西岳五月庚寅以旱録囚徒盖天宝时京师之旱见於史者有二未详此诗作於何年後汉书其旱也公卿官

长以次行雩礼求雨反拘朱索社伐朱鼓春秋繁露求雨开神山神渊积薪夜击鼓噪而燔之文章正宗神农求雨书祈而不雨则积薪击鼓而焚神山章怀太子後汉书注漕水运也鲍照诗家世宅关辅李善注关关中也汉书曰右扶风左冯翊京兆尹是为三辅潘岳西征赋牧疲人於西夏书说命若岁大旱用汝作霖雨江淹别赋金闺之诸彦李善注金闺金马门也王逸九思缘天梯兮北上登太乙兮玉台宜都记俯临大江如紫带焉视舟如鳬雁矣通典宣州当涂县有牛渚圻亦谓之采石险固可守处杨齐贤曰华阴在洛阳之西】

送储邕之武昌【武昌县鄂州之属县也隶江南西道】

黄鹤西楼月长江万里情春风三十度空忆武昌城送尔难为别衔杯惜未倾湖连张乐地山逐泛舟行诺谓楚人重诗传谢朓清沧浪吾有曲寄入棹歌声【潜确居类书黄鹤山在武昌府城西南俗呼蛇山一名黄鹄山昔仙人王子安骑黄鹤憩此地志云黄鹤山蛇行而西吸於江其首隆然黄鹤楼枕焉其下即黄鹤矶庄子帝张咸池之乐於洞庭之野谢朓诗洞庭张乐地潇湘帝子游史记楚人谚曰得黄金百斤不如得季布一诺南齐书谢朓善草隶长五言诗沈约常云二百年来无此诗也西京赋齐棹女纵棹歌】

李太白集注卷十八

卷十九

钦定四库全书

李太白集注卷十九

钱塘 王琦 撰

古近体诗共三十二首

誄谈少府

一尉居倏忽梅生有仙骨三事或可羞匈奴晒千秋壮心屈黄绶浪迹寄沧洲昨观荆岷作如从云汉游老夫当暮矣蹠足惧骅骝【太平御覽梅福於是弃南昌尉去妻子入洪崖山得道为神仙代代有人见或於玉笥山中逢之汉书天子我监登我三事顏师古注三事三公之位谓丞相也田千秋以一言悟主旬月取宰相封侯匈奴讥之见十一卷注顏师古汉书注丞尉职卑皆黄绶唐六典注荆山在襄州荆山县岷山在襄州襄阳县诗经集传云汉天河也在箕斗二星之间其长竟天曹粹中曰汉之在天似云而非云故曰云汉汉书造父善御习马得骅骝耳之乘顏师古注骅骝言其色如华之赤也顏延年赭白马赋望朔云而蹠足张铄注蹠足疾行也蹠音叠】

誄宇文少府见贈桃竹书筒【苕溪渔隐丛话桃竹叶如?身如竹密节而实中犀理瘦骨天成拄杖也岭外人多种此胡三省通监注桃竹桃枝竹也今江南有之】

桃竹书筒绮绣文良工巧妙称絶羣灵心圆映三江月彩质叠成五色云中藏宝诀峨眉去千里提携长忆君【宝诀仙书也唐书地理志剑南道嘉州罗目县有峨眉山】

五月东鲁行荅汶上翁【萧本作君】

五月梅始黄【一作梅子黄一作禾黍绿】蚕凋桑柘空鲁人重织作机杼鸣帘栊顾余不及仕学剑来山东举鞭访前涂获笑汶上翁下愚【一作宵人】忽壮士未足论穷通我以一箭书能取聊城功终然不受赏羞与时人同西归去直道落日昏阴虹此【一作我】去尔勿言甘心如转蓬【机杼见九卷注帘栊见十一卷注史记燕将攻下聊城聊城人或才之燕燕将惧诛因保守聊城不敢归齐田单攻聊城岁余士卒多死而聊城不下鲁连乃为书约之矢以射城中遗燕将燕将见鲁连书泣三日乃自杀聊城乱田单遂屠聊城归而言鲁连欲爵之鲁连逃隐於海上曰吾与富贵而诎於人宁贫贱而轻世肆志焉杨齐贤曰阴虹指林甫国忠辈昏蔽其君转蓬蓬草之随风旋转者详见九卷注】

早秋单父南楼誄窦公衡【太平广记崔圆开元二十三年应将帅举科又於河南府充乡贡

进士其日正於福唐观试遇敕下便於试場中唤将拜执戟参谋河西军事应制时与越州剡县尉竇公衡同場并坐亲见其事公衡之名位略见於此 单父音善甫】

白露见日灭红顔随霜凋别君若俯仰春芳辞秋条太山嵯峨夏云在疑是白波涨东海散为飞雨川上来遥帷却卷清浮埃知君独坐青轩下此时结念同所怀【繆本作同怀者】我闭南楼看【繆本作着】道书幽帘清寂若【萧本作在】仙居曾无好事来相访赖尔高文一起予【梁简文帝长沙宣武王碑秋条下叶春卉含芳江淹诗链药瞩虚幌泛瑟卧遥帷卢炎诗青轩明月时谢灵运诗结念属霄汉孤影莫与谖汉书扬雄家素贫嗜酒人希至其门时有好事者载酒肴从游学江淹诗高文一何绮】

山中问答【一作答问繆本作山中答俗人】

问余何意【一作事】栖碧山笑而不答【一作语】心自闲桃花流水窅【一作宛】然去别有天地非人间

荅友人赠乌纱帽【中华古今注武德九年太宗诏曰自今以後天子服乌纱帽百官士庶皆同服之】

领得乌纱帽全胜白接?山人不照镜稚子道相宜【广韵接?白帽也归去来词稚子侯门】

酬张司马赠墨

上党碧松烟夷陵丹砂末兰麝凝珍墨精光乃堪掇黄头奴子双鸦鬓锦囊养之怀袖间今日赠余兰亭去兴来洒笔会稽山【唐时上党郡即潞州也属河东道夷陵郡即峡州也属山南东道江淹扇上彩画赋粉则南阳铅泽墨则上党松心晁氏墨经古用松烟石墨二种石墨自晋魏以後无闻松烟之制尚笑汉贵扶风渝麋终南山之松晋贵九江庐山之松唐则易州潞州之松上党松心尤先见贵曹植诗墨出青松烟齐民要术合墨法墨一斤好胶五两鸡子白去黄五颗朱砂一两麝香一两都合调下铁臼中宜刚不宜泽捣三万杵杵多益善双鸦鬓谓头上双髻色黑如鸦也晁氏墨经凡蓄故墨亦利频风日时以手润泽之时置於衣袖中弥善水经注会稽山阴县湖口有亭号曰兰亭亦曰兰上里太守王羲之谢安兄弟数往造焉太守王虞之移亭在水中晋司空何无忌之临郡也起亭於山椒极高尽眺矣太平寰宇记兰亭在山阴县西南二十七里輿地志云山阴县西有兰渚渚有兰亭王羲之所谓曲水之胜境制序於此元和郡县志会稽山在越州会稽县东南二十里】

荅湖州迦叶司马问白是何人【湖州唐时隶江东南道为上州上州之佐职有司马一人从五品下通志氏族略迦叶氏西域天竺人唐贞观中有泾原大将试太常卿迦叶济司马殆其裔族歟】

青莲居士谪仙人酒肆藏名三十春湖州司马何须问金粟如来是後身【杨齐贤曰青莲居

士太白自号也五色线净名经义钞梵语维摩诘此云净名般提之子母名离垢妻名金机男名善思女名月上过去成佛号金粟如来严沧浪曰因问人为迦叶故作此荅不则诞妄矣】

荅长安崔少府叔封游终南翠微寺太宗皇帝金沙泉见寄【唐书长安县南五十里太和谷有太和宫武德八年置贞观十年废二十一年复置曰翠微宫笼山为苑元和中以为翠微寺元和郡县志太和宫在长安县南五十五里终南山太和谷武德八年造贞观十年废二十一年以时熟公卿重请修筑於是使将作大匠阎立德缮理焉改为翠微宫今废为寺雍録翠微宫武德八年改名太和在终南山上贞观二十一年改翠微宫寝名含风殿苏文忠诗曰植立含风广殿用此也太宗於此宫上仙杨大年谈苑曰宫在骊山絶顶太宗尝避暑於此後改为寺寺亦废法苑珠林今上皇帝恭膺宝位祥祚惟新思罔极於先皇濡惠津於羣品鼎湖之驾邈矣不追长陵之魂悠然滋永聿与净业标树福田先帝所幸之宫翠微玉华并舍为寺供施殷厚缘设雕华据此所称今上皇帝是指高宗而言则唐书所云元和中为翠微寺者非矣又诸书皆云在终南山而谈苑云在骊山者又非矣太白诗题亦其一证金沙泉湮没无可考】

河伯见海若傲然夸秋水小物昧【缪本作暗】远图宁知通方士【一作寧识通方理】多君紫霄意独往苍山里地古寒云【一作雪】深岩高长风起初登翠微岭复憩金沙泉践苔朝霜滑弄波夕月圆饮彼石下流【一作潭】结萝宿豁烟鼎湖梦绿水龙驾空【一作何】茫然早行子午关【一作间一作峰】却登山路远【一作却叹山路远一作颇识关路远】拂琴听霜猿灭烛乃星饭人烟无明异鸟道絶往返攀崖倒青天【一作到青山】下视白日晚既过【一作遇】石门隐还唱【一作闻】石潭歌涉雪攀紫芳【一作采紫茎】濯缨想【一作掬】清波此【一作斯】人不可见此地君自过为余谢风泉其如幽意何【庄子秋水时至百川灌河泾流之大两涘渚涯之间不辨牛马於是河伯欣然自喜以天下之美为尽在已顺流而东行至於北海东面而视不见水端於是河伯始旋其面目望洋向若而叹曰野语有之曰闻道百以为莫已若者我之谓也吾非至子之门则殆矣吾长见笑於大方之家北海若曰井蛙不可以语於海者拘於虚也夏虫不可以语於冰者笃於时也曲士不可以语於道者束於教也今尔出於涯涘观於大海乃知尔丑陆德明注若海神也汉书通方之士不可以文乱顔师古注方道也旧唐书太宗纪贞观二十三年四月己亥幸翠微宫五月己巳上崩於含风殿鼎湖龙驾黄帝昇天事见三卷注以喻太宗上仙也唐书地理志长安县南有子午关汉书王莽以皇后有子孙瑞通子午道子午邇从杜陵直絶南山径汉中顔师古注子北方也午南方也言通南北道相当故谓之子午耳今京城直南山有谷通梁汉道名子午谷又宜州西界庆州东界有山名子午岭计南北直相当此则北山是子南山是午共为子午道元和郡县志子午关在长安县南一百里王莽通子午道因置此关也一统志子午谷在西安府城南一百五里子午关在子午谷中汉平帝时置关广雅攀取也史记注臣瓚曰拔取曰攀江淹诗终覲紫芳心李善注紫芳紫芝也】

赠李十二 左司郎中崔宗之【附】

凉秋八九月白露空园亭耿耿意不畅稍稍【一作悄悄缪本作稍稍俱误】风叶声思见雄俊士共话古今情李侯忽来仪把袂苦不早清论既抵掌玄谈又絶倒分明楚汉事历历王霸

道担囊无俗物访古千里余袖有?首剑怀中茂陵书双眸光照人词赋凌子虚酌酒弦素琴霜气正凝洁平生心事中今日为君说我家有别业寄在嵩之阳明月出高岑清溪澄素光云散窗户静风吹松桂香子若同斯游千载不相忘【旧唐书尚书省有左司郎中一员从五品上崔宗之事蹟见十卷注崔少府女诗哲人忽来仪战国策见说赵王於华屋之下抵掌而谈世说注卫玠别传曰王平子高气不羣迈世独傲每闻玠之语议至於理会之间要妙之际辄絶倒於地前後三闻为之三倒时人遂曰卫君谈道平子三倒战国策羸滕履躑负书担囊史记索隐?首?音比刘氏云短剑也盐铁论以为长尺八寸其头类?故曰匕首史记司马相如家居茂陵口吃而善著书茂陵书盖用此事魏顗太白集序称其眸子炯然哆如饿虎少任侠手刃数人西京杂记司马相如为上林子虚赋意思萧散不复与外事相关控引天地错综古今忽然如睡涣然而兴几百日而後成梢音笏】

訓崔五郎中

朔云横高天万里起秋色壮士心飞扬落日空叹息长啸出原野凜然寒风生幸遭圣明时功业犹未成奈何怀良图郁悒独愁【一作空】坐杖策寻英豪立谈乃知我崔公生民【繆本作人】秀?邈青云姿制作参造化托讽含神只海岳尚可倾吐诺终不移是时霜飈寒逸兴临华池起舞拂长剑四坐皆扬眉因得穷欢情赠我以新诗又结汗漫期九垓远相待举身憩蓬壶濯足弄沧海从此陵倒景一去无时还朝游明光宫暮入闾阖关但得长把袂何必嵩丘山【顔延年赭白马赋望朔云而蹠足楚辞心飞扬兮浩荡淮南子周视原野原野谓平原旷野之地也刘琨诗功业犹未建夕阳忽西流楚辞曾歔歔予郁悒兮王逸注郁悒忧也後汉书邓禹即杖策北渡扬雄解嘲或立谈而封侯顔延年诗仲容青云器实稟生民秀李善注青云言高远也後汉书崔瑗之称平子曰数术穷天地制作侔造化楚辞蛙黾游乎华池淮南子若士曰吾与汗漫期於九垓之外吾不可以久驻详见十四卷注蓬壶蓬莱也详见明堂赋注倒景见二卷古诗第二十首注王褒九怀朝发兮葱岭夕至兮明光王逸注暮宿东极之丹峦也又远游注云丹丘昼夜常明九怀云夕宿乎明光明光即丹丘也阮籍诗朝起瀛洲野日夕宿明光淮南子俶真训排闾阖沦天门高诱注闾阖始昇天之门也又地形训西方曰西极之山曰闾阖之门高诱注闾大也阖闭也大聚万物而闭之故曰闾阖之门】

以诗代书荅元丹丘

青鸟【一作乌】海上来今朝发何处口衔云锦字【一作书】与我忽飞去鸟去凌紫烟书留绮窗前开缄方【一作时】一笑乃是故人传故人深相勸忆我劳心曲离居在咸阳三见秦草緑置书双袂间引领不暂闲长望【一作叹】杳难见浮云横远山【玉佩金璫经元始天王与大帝乘碧霞流飈辇上登九玄之崖有青鸟来翔口衔紫书集於玉轩汉武帝内传盛以云锦之囊李善文选注古曰鸿颂曰兹亦耿介矫翮紫烟古诗交疏结绮窗李善注说文曰绮文缯也此刻镂象之蜀都赋列绮窗而瞰江吕向注绮窗雕画若绮也陆机诗邃宇列绮窗兰室接罗幕张铣注绮窗窗为锦绮之文也说文勸勉也诗国风乱我心曲韵会怀抱曰心曲楚辞折疏麻兮瑶华将以遗兮离居】

金門荅蘇秀才【揚雄解嘲歷金門上玉堂應劭注金門金馬門也】

君還石門日朱火始改木春草如有情山中尚含綠折芳媿遙憶永路當自勸遠見故人心平生以此足巨海納百川麟閣多才賢獻書入金闕酌醴奉琮筵屢忝白雲唱？聞黃竹篇恩光照【繆本作煦】拙薄云漢希騰遷銘鼎悅云遂扁舟方渺然我留在金門君【繆本作不】去卧丹壑未果三山期遙欣一丘樂玄珠寄罔象赤水非寥廓願狎東海鷗共營西山药栖岩君寂滅【繆本作蔑】處世【蕭本作士】余龍蠖良辰不同賞永日應閑居鳥吟檐間樹花落窗下書緣谿見綠筱隔岫窺紅蕖采薇行笑歌眷我情何已月出石鏡間松鳴風琴里得心自虛妙外物空顛靡身世如兩忘從君老烟水【張華詩朱火青無光張協詩鑽燧忽改木呂向注改木謂改其鑽火之木也楚辭折芳馨兮遺所思陸云詩永路隔萬里謝靈運詩百川赴巨海三輔黃圖漢宮殿疏云麒麟閣蕭何造以藏秘書處賢才也巨海二句是正喻對寫句法言麟閣之廣集才賢猶巨海之受納百川甚言其多也金闕天子之門闕猶金門也謝朓詩復酌琮筵醴張銑注琮筵天子宴羣臣之席言琮者珍美言之醴酒也白雲唱即白雲在天山陵自出一篇西王母與穆天子相唱和者詳見大獵賦注穆天子傳曰日中大寒北風雪有凍人天子作詩三章以哀民曰我徂黃竹口員閼寒帝收九行嗟我公侯百辟豕卿皇我萬民旦夕勿忘我徂黃竹口員閼寒帝收九行嗟我公侯百辟豕卿皇我萬民旦夕無窮有蛟者駱翩翩其飛嗟我公侯口勿則遷居樂甚寡不如遷土禮樂其民天子曰余一人則淫不皇萬民口登乃宿於黃竹江淹詩宵人重恩光云漢天河也云漢希騰遷猶致身青雲之上意也禮記夫鼎有銘銘者自名也自名以稱揚其先祖之美而明着之後世者也楊齊賢曰扁舟言功成名遂身退如范蠡乘扁舟泛五湖也鮑照詩妍容逐舟壑史記海中有三神山名曰蓬萊方丈瀛洲神仙居之漢書叙傳漁釣於一壑則萬物不奸其志栖遲於一丘則天下不易其樂莊子黃帝游乎赤水之北遺其玄珠乃使象罔象罔得之詳見大獵賦注李暉述志賦寄玄珠於罔象李善文注注寥廓高遠也列子海上之人有好鷗鳥每旦之海上從鷗鳥游鷗鳥之至者百往而不止魏文帝詩西山一何高高高殊無極上有兩仙童不飲亦不食與我一丸筑光耀有五色沈約詩若蒙西山药頽齡倘能度周易尺蠖之屈以求信也龍蛇之蟄以存身也說文筱小竹也謝靈運詩綠筱媚清漣廣韻山有穴曰岫紅蕖荷華也詩國風陟彼南山言采其薇未見君子我心傷悲朱傳曰薇似蕨而差大有芒而味苦韻會說文薇似藿菜之微者也徐鉉曰一云似萍陸機曰山菜也莖葉皆似小豆蔓生味如小豆藿可作羹項氏曰今之野豌豆苗也蜀謂之巢菜方弘靜曰月出石鏡間松鳴風琴里言月出石若鏡風入松若琴也琦謂石鏡風琴蓋是蘇秀才山中之地名耳若如方氏所解恐大家未必有有此句法顛靡顛壞靡散之義岫音袖靡音米】訓坊州王司馬與閻正字對雪見贈【唐武德二年析鄜州之中部鄜城二縣置坊州取馬坊為名隸關內道州有司馬一人從六品唐書百官志司經局正字二人從九品上掌校刊經史按寶刻叢編天寶中太子正字閻寬撰襄陽令盧僎德政碑未知即此閻正字否】

游子東南來自宛適京國飄然無心云倏忽復西北訪戴昔未偶尋嵇此相得愁顏發新歡終宴叙前識閻公漢庭舊沉郁富才力價重銅龍樓聲高重門側寧期此相遇華館倍游息積雪明遠峰寒城鎖【繆本作沍】春色主人蒼生望假我青雲翼風水如見資投竿佐皇極【宛郎南陽縣地在周時為申伯國戰國時為韓之宛邑秦為宛縣至後魏時改上陌縣後周改上宛縣隋改南陽縣唐因之隸鄧州王子猷雪夜乘小船訪戴安道見九卷注世說嵇康與呂安

善每一相思千里命驾汉书上尝急召太子出龙楼门张晏曰门楼上有铜龙若白鹤飞廉之为名也谢朓诗平明振衣坐重门犹未开吕向注重门帝宫门也书洪范建用皇极孔安国传皇大也极中也凡立事当用大中之道】

鄒中都小吏携斗酒双鱼于逆旅见赠【唐时河南道郢州东平郡之中都县本平陆县隶兖州天宝元年更名贞元十四年改隶郢州今为山东之汶上县】

鲁酒若琥珀【一作琥珀色】汶鱼紫锦鳞山东豪吏有俊气手携【一作持】此物赠远人意气相倾两相顾斗酒双鱼表情素【缪本此下多酒来我饮之脍作别离处二句】双鳃呀呷鳍鬣张跋刺银盘欲飞去呼儿拂机霜刃挥红肌花落白雪霏为君下筯一餐饱【一作罢】醉着金鞍上【一作走】马归【元和郡县志汶上北去中都县二十四里行水金监尚书说云汶水五源皆出褒庆奉符县界至东北中都县贯钜泽入济史记少年豪吏如萧曹樊哙等鲍照诗意气相倾死何有史记蔡泽传披腹心示情素广韵鳃鱼颊也木华海赋犹尚呀呷李善注呀呷波相吞吐之貌鳍鬣鱼之翅也在背上曰鳍在鳃下曰鬣野客丛书拔刺者划烈震激之声善诱文拔刺上音鉢下音辣鱼掉尾声谢灵运赋鱼水深而拔刺杜子美诗船尾跳鱼拔刺鸣曰跋刺曰拔刺曰拔刺字虽少异其义同也刘勰新论白羽相望霜刃竞接张协七命命支离飞霜锷红肌绮散素肤雪落太白意本於此谓其红者如花白者如雪也广韵霏雪貌晋书任恺一食万钱犹云无可下筯处

呷呼甲切喊入声】鄒张卿夜宿南陵见赠【南陵宣州之属县也隶江南西道】

月出鲁城东明如天上雪鲁女惊莎鸡鸣机【萧本作鸡】应秋节当君相思夜火落金风高河汉挂户牖欲济无轻舠我昔辞林丘云龙忽相见客星动太微朝去洛阳殿尔来得茂彦七叶仕汉余身为下邳客家有圯桥书传说未梦时终当起岩野万古骑辰星光辉照天子与君各未遇长策委蒿莱宝刀隐玉匣绣【缪本作锈】澁空莓苔遂令世上愚轻我土与灰一朝攀龙去?龟安在哉故山定有酒与尔倾金罍【莎鸡秋夜鸣声尤急札札不止详见四卷注惊犹趣织鸣?妇惊之意江淹丽色赋秋梭鸣机梁武帝诗鸣机罢秋日谢灵运诗已复谢秋节火大火也即心星至秋则落而西流详见五卷注白怙秋风曰金风广韵舠小船也客星犯帝座严子陵事见二卷注晋书天文志太微天子庭也五帝之座也十二诸侯府也任昉诗濬冲得茂彦夫子值狂生吕向注王戎字濬冲为吏部尚书得李茂彦为吏部郎戎以礼待之左思诗金张籍旧业七叶珥汉貂汉书张汤传张氏自宣元以来为侍中中常侍诸曹散骑列校尉者十余人张良匿於下邳步游沂水圯上遇黄石公受书见七卷注太平御覽帝王世纪曰武丁思建良辅梦天赐贤人姓傅名说乃使工写其像求诸天下见筑者胥靡衣褐带索役於虞虢之间傅岩之野是为傅说登以为相淮南子此傅说之所以骑辰尾也高诱注言殷王武丁梦得贤人使工写其象旁求之得傅说於傅岩遂以为相为高宗成八十一符致中兴死托精於辰尾之星一名策也汉书攀龙附凤并乘天衢国语鼃鼃之与同隋韦昭解鼃鼃虾蟆也顔师古急就篇注鼃一名蝼蝈色青小形而长股尔雅在水者鼃郭璞注耿鼃也似青蛙大腹一名土鸭金罍酒器也见七卷注 邳音批圯音夷鼃音猛】

鄒岑勋见寻就元丹丘对酒相待以诗见招【世传顔鲁公所书西京千福寺多宝佛塔碑乃

天宝十一载所建其文为南阳岑勋所撰疑即此人 勋古勳字】

黄鹤东南来寄书写心曲倚松开其緘忆我肠断续不以千里遥命驾来相招中逢元丹丘登岭晏碧霄对酒忽思我长啸临清飈蹇余未相知茫茫緑云垂俄然素书及解此长渴饥策马望山月途穷造堵墀喜兹一会面若覩琼树枝忆君我远来我欢方速至开顔酌美酒乐极忽成醉我情既不浅君意方亦深相知两相得一顾轻千金且向山客笑与君论素心【诗国风乱我心曲郑笺曰心曲心之委曲也世说嵇康与吕安善每一相思千里命驾楚辞蹇将憺兮寿宫王逸注蹇词也盖发语声也李陵诗思得琼树枝以解长渴饥江淹诗愿一见顔色不异琼树枝李周翰注琼树玉树也在崑仑山故难见言君行之远思见之难不异琼树枝也】

荅从弟幼成过西园见赠

一身自潇洒万物何器誼拙薄谢明时栖闲归故园二季过旧壑四邻驰华轩衣剑照松宇宾徒光石门山童荐珍果野老开芳樽上陈樵渔事下叙农圃言昨来荷花满今见兰苕繁一笑复一歌不知夕景昏醉罢同所乐此情难具陈【缪本作论 谢灵运王子晋赞王子爱清浄区中实器誼陶潜诗华轩盈道路刘孝绰诗芳樽散绪寒郭璞诗翡翠戏兰苕李善注兰苕兰秀也张铄注苕枝鲜明也古诗欢乐难具陈 苕音条】

洲王补阙惠翼庄庙宋丞泚赠别【诗题疑有舛错按睿宗子申王撝开元八年薨諡惠庄太子宋泚必为惠庄太子陵庙丞者也翼则王补阙之名耳惠翼当作翼惠为是】

学道三十【萧本作千】春自言羲皇【萧本作和】人轩盖宛若梦云松长相亲偶将二公合复与三山邻喜结海上契自为天外宾鸾翮我先铄龙性君莫驯朴散不尚【一作向】古时讹皆失真勿踏荒溪波竭来浩然津薛带何辞楚桃源堪避秦世迫且离别心在期隐沦洲赠非炯诫永言铭佩绅【宋书陶潜尝言五六月北窗下卧遇凉风暂至自谓是羲皇上人韵会将与也三山蓬莱方丈瀛洲也见大鹏赋注顔延年诗鸾翮有时铄龙性谁能驯李善注许慎曰铄残羽也朴散谓淳朴之风散失也王积游北山赋荷衣薛带藜杖葛巾薛带用屈原语屈原既为楚所放逐迁於沅湘之间作九歌其山鬼一章云被薜荔兮带女萝盖指山鬼而言此用其意指屈原以薜荔为带矣桃源在武陵见一卷注竭发语声详见十三卷注班固幽通赋又申之以炯戒顔师古曰炯明也论语子张书诸绅何晏注绅大带也邢昺疏子张以孔子之言书之绅带意其佩服毋忽亡也以带束腰垂其余以为饰谓之绅 竭音杰薛音佩】

洲裴侍御对雨感时见赠

雨色秋来寒风严清江爽孤高绣衣人萧洒青霞赏平生多感激忠义非外獎祸连积怨生事及徂川往楚邦有壮士鄢郢翻扫荡申包哭秦庭泣血将安仰鞭尸辱已及堂上罗宿莽颇似今之人蠹贼陷忠说渺然一水隔何由税归鞅日夕听猿愁【萧本作怨】怀贤盈梦想【绣衣御史所服见十一十二卷注江淹恨赋郁青霞之奇意李善注青霞奇意志意高也谢灵运诗客心非外獎李善注獎劝也江淹诗得失非外獎张铄注得失由心非外物所能獎劝壮士

谓伍胥按史记伍子胥者楚人也父曰伍奢为太子太傅楚平王信费无极之谗杀伍奢及其子尚伍子胥奔吴阖闾以为行人与谋国事九年悉兴师伐楚乘胜而前五战遂至郢时平王已卒子昭王出奔伍子胥求昭王不得乃掘楚平王墓出其尸鞭之三百然後已於是申包胥走秦告急求救於秦秦不许申包胥立於秦庭昼夜哭七日七夜不絕其声秦哀公怜之曰楚虽无道有臣若是可无存乎乃遣车五百乘救楚击吴通监地理通释鄢故城在襄州率道县南九里今襄阳府宜城县郢城在荆州江陵县东北六里林氏曰江陵郢也襄阳鄢也蠡贼皆害苗之虫也食根曰蠡食节曰贼又诗诂蠡贼一虫以禾将黄而虫害之故曰蠡贼取以喻谗恶之人楚辞夕揽中洲之宿莽王逸注草冬生不死者楚人名之曰宿莽谢朓诗无由税归鞅李周翰注税息也鞅驾也】

赠李十二 摄监察御史崔成甫【附】

我是潇湘放逐臣君辞明主汉江滨天外常求太白老金陵捉得酒仙人【按李华崔孝公文集序云长子成甫进士擢第校书郎陕县尉知名当时不幸早世其摄侍御史无考而唐诗品彙载崔宗之名成甫以字行日用之子开元中官至右司郎中侍御谪金陵与李白以诗酒倡和云云盖以成甫宗之为一人非也】

酬崔侍御

严陵不从万乘游归卧空山钓碧流自是客星辞帝坐元非太白醉扬州【严子陵事见二卷注】

翫月金陵城西孙楚酒楼达曙歌吹日晚乘醉着紫绮裘乌纱巾与酒客数人棹歌秦淮往石头访崔四侍御【景定建康志旧传秦始皇时望气者言五百年後金陵有天子气於是东游以厌之乃凿方山断长垄为渎入於江是曰秦淮按实录注本名龙藏浦其水有二源一发自华山经句容西南流一发自东庐山经溧水西北流入江宁界二源合自方山埭西注大江分???屈曲不类人工疑非秦皇所开或曰方山西渎直属上山三十里是秦开又凿石碓山西而疏决此浦因名秦淮江南通志秦淮在江宁府上元县东南以秦始皇所开故曰秦淮有二源一出句容县之华山一出溧水县之东庐山合流由方山埭北流西入通济水门南经武定镇淮饮虹三桥又西出三山水门沿石城以达於江湖三省通监注石头城在今建康城西二里张舜民曰石头城者天生城壁有如城然在清凉寺北覆舟山上江行自北来者循石头城转入秦淮六朝事迹吴孙权沿淮立栅又於江岸必争之地筑城名曰石头尝以腹心大臣镇守之輿地志云环七里一百步在县西五里去台城九里南抵秦淮口今清凉寺之西是也诸葛亮论金陵地形云锺阜龙盘石城虎踞真帝王之宅正谓此也】

昨翫西城月青天垂玉鉤朝沽金陵酒歌吹孙楚楼忽忆绣衣人乘船往石头草裹乌纱巾倒披紫绮裘两岸拍手笑疑是王子猷酒客十数公崩腾醉中流谿浪掉【萧本作棹】海客喧呼傲阳侯半道逢吴姬卷帘出揶揄我忆君到此不知狂与羞月下【萧本作一月】一见君三杯便回桡舍舟共连袂行上南渡桥兴发歌绿水秦客为之谣【一作讴】鸡鸣复相招清

宴逸云霄赠我数百字字字凌风飏系之衣裘上相忆每长谣【鲍照翫月城西门廨中诗始见西南楼纤纤如玉钩绣衣御史所服详见十一十二卷注紫绮紫色绂也古诗紫绮为上襦王子猷雪夜乘舟访戴安道事见九卷注诗国风谑浪笑傲应劭汉书注阳侯古之诸侯也有罪自投江其神能为大波後汉书王霸至市中募人市人皆大笑举手邪揄之章怀太子注说文曰𩚑?手相笑也𩚑音弋丈反痴音踰或音由此云邪揄语轻重不同广韵桡楫也緑水古歌曲见四卷注 桡音饶】

江上荅崔宣城【唐时宣州有宣城县隶江南西道】

太华三芙蓉明星玉女峰寻仙下西岳陶令忽相逢问我将何事湍波历几重貂裘非季子鹤氅似王?谬忝燕台召而陪郭隗踪水流知入海云去或从龙树绕芦洲月山鸣鹄镇钟还期如可访台岭荫长松【一统志太华山在陕西华阴县南一十里即西岳也以西有少华山故此曰太华白虎通云西方太阴用事万物生华故曰华山是山削成四方高五千仞有芙蓉明星玉女三峰苍龙岭黑龙潭白莲池日月崖及仙掌石月之胜陶令谓陶潜潜尝为彭泽令以喻崔宣城战国策李兑送苏子黑貂之裘黄金百镒苏子得以为用西入於秦季子苏秦字也见史记注晋书王恭尝披鹤氅裘涉雪而行孟昶窥见之叹曰此真神仙中人也燕台郭隗见二卷注芦洲旧注指为樊口之芦洲琦按鲍照还都道中诗昨夜宿南陵今旦入芦洲是芦洲当在南陵之下若樊口之芦洲旧传为伍子胥所渡处其地乃在武昌与南陵宣城殊远恐未是元和郡县志鹄头镇在宣州南陵县西一百一十里即春秋时楚伐吴败于鹄岸是也沿流八十里有鹄尾洲吴时屯兵处孙绰游天台山赋苟台岭之可攀亦何羨於层城又曰藉萋萋之纤草荫落落之长松

氅昌两切昌上声隗五委切危上声】荅族侄僧中孚赠玉泉仙人掌茶【并序】

余闻荆州玉泉寺近清溪诸山山洞往往有乳窟窟中多玉泉交流其【缪本无其字】中有【一作见】白蝙蝠大如鸦按仙经蝙蝠一名仙鼠千岁之後体白如雪【一作银】栖则倒悬盖饮乳水而长生也其水边处处有茗草罗生枝叶如碧玉惟玉泉真公常采【萧本作来】而饮之年八十余岁顔色如桃花而此茗清香滑熟异於他者所以能还童振枯扶【一作壮】人寿也余游金陵见宗僧中孚示余茶数十片拳然重叠其状如手号为仙人掌茶盖新出乎玉泉之山旷古未覩因持之见遗兼赠诗要余荅之遂有此作後之高僧大隐知仙人掌茶发乎中孚禅子及青莲居士李白也【方輿胜覽玉泉寺在荆门军当阳县西南二十里玉泉山陈光大中浮屠知顓自天台飞锡来居此山寺雄于一方殿前有金龟池一统志玉泉寺在荆州当阳县西三十里隋大业间建清溪山在南漳县临沮城界内其山高峻东有泉潜确居类书玉泉山在当阳泉色白而莹又曰珠泉泉南为天台智者道場即阇帝遣鬼工所造抱朴子千岁蝙蝠色如白雪集则倒悬脑重故也述异记荆州清溪秀壁诸山山洞往往有乳窟窟中多玉泉交流中有白蝙蝠大如鸦按仙经云蝙蝠一名仙鼠千载之後体白如银栖即倒悬盖饮乳水而长生也太白此序所谓余闻者盖本之此本草拾遗乳穴水近乳穴处流出之泉也人多取水作饮酿酒大有益其水浓者称之重於他水煎之上有盐花此真乳液也说文茗茶芽也郭璞尔雅注茶树小如梔子冬生叶可煮作羹饮今呼早采者为茶晚取者为茗吕温南岳弥陀寺承远和尚碑开元二十三年至荆州玉泉寺谒兰若真和尚郎玉泉真公也

蝙蝠鞭】

常闻玉泉山山洞多乳窟仙鼠如白鸦倒悬清【一作深】溪月茗生此中石玉泉流不歇根柯洒芳津采服润肌骨丛【缪本作楚】老卷绿叶枝枝相接连曝成仙人掌似拍洪崖肩举世未见之其名定谁传宗英乃禅伯投赠有佳篇清镜烛无盐顾慙西子妍朝坐有余兴长吟播诸天【郭璞诗左挹浮丘袖右拍洪崖肩薛综西京赋注洪崖三皇时伎人新序齐有妇人极丑无双号曰无盐女赵岐孟子注西子古之好女西施也佛书言三界共有三十二天自四天王天至非有想非无想天总谓之诸天】

洲裴侍御留岫师弹琴见寄【岫音就】

君同鲍明远邀彼休上人鼓琴乱白雪秋变江上春瑶草绿未衰攀翻寄情亲相思两不见流泪空盈巾【鲍照字明远与休上人以诗相赠答见十二卷注锦绣万花谷内有德智外有胜行在人之上名上人初学记琴历曰琴曲有幽兰白雪乐府诗集谢希逸琴论曰刘涓子善歌琴制阳春白雪曲琴集曰白雪师旷所作商调曲也唐书乐志曰白雪周曲也张华博物志曰白雪者太帝使素女鼓五十弦瑟曲名也】

张相公出镇荆州寻除太子詹事余时流夜郎行至江夏与张公相【萧本缺相字】去千里公因太府丞王昔使车寄罗衣二事及五月五日赠余诗余答以此诗【旧唐书肃宗以张镐不切事机遂罢相位授荆州大都督府长史寻徵为太子宾客职官志东宫官属有太子宾客四员正三品太子詹事一员正三品太府寺有丞四人从六品上】

张衡殊不乐应有四愁诗慙君锦绣段赠我慰相思鸿鹄复矫翼凤凰忆故池荣乐一如此商山老紫芝【张衡四愁诗序张衡不乐久处机密阳嘉中出为河间相时天下渐与郁郁不得志为四愁诗四思曰美人赠我锦绣段云云扬雄解嘲矫翼厉翮矫翼举翼也李善文选注晋中兴书曰荀勖徙中书监为尚书令人贺之乃发恚曰夺我凤凰池卿诸人何贺我耶慎蒙名山记商山在陕西商州东九十里一名楚山一名商洛山汉四皓隐处四皓采芝操莫莫高山深谷逶迤晔晔紫芝可以疗饥】

醉後荅丁十八以诗讥予搥碎黄鹤楼【阎伯理黄鹤楼记州城西南隅有黄鹤楼图经云昔费祎登仙尝驾黄鹤还憩於此遂以名楼】

黄鹤高楼已搥碎黄鹤仙人无所依黄鹤上天诉玉帝却放黄鹤江南归神明太守再雕饰新图粉壁还芳菲一州笑我为狂客少年往往来相讥君平帘下谁家子云是辽东丁令威作诗调【缪本作掉】我惊逸兴白云遶笔窗前飞待取明朝酒醒罢与君烂漫寻春晖【汉书黄霸为颍川太守吏民咸称神明汉书严君平卜筮於成都市得百钱足自养则闭肆下帘而授老子搜神後记丁令威本辽东人学道於灵墟山杨升庵曰李白过武昌见崔颢黄鹤楼诗叹服之不复作去而赋金陵凤凰台其後禅僧用此事作一偈曰一拳搥碎黄鹤楼一脚踢翻鹦鹉洲眼前有景道不得崔颢题诗在上头旁一游僧亦举前二句而缀之曰有意气时消意气

不风流处也风流又一僧云酒逢知己艺压当行原是借此一事设辞非太白诗也流传之久信以为真宋初有人伪作太白醉後荅丁十八诗黄鹤高楼已搥碎一首乐史编太白遗诗遂收入之近世解学士作吊太白诗云也曾搥碎黄鹤楼也曾踢翻鹦鹉洲殆类优伶之语太白一何不幸耶琦按太白江夏赠韦南陵诗原有我且为君搥碎黄鹤楼君亦为吾倒却鹦鹉洲之句要是设言之辞而玩此诗则真有搥碎一事矣要之禅僧偈语本用赠韦诗中语非醉荅丁十八一诗本禅僧之偈而伪撰也升庵因彼而疑此殆亦目睫之见也夫】

荅裴侍御先行至石头驿以书见招期月满泛洞庭【方輿胜覽汪彦章石头驿记云自豫章絕江而西有山屹然并江而出者石头渚也阻江负城十里而近胡三省通监注石头驿在豫章江之西岸】

君至石头驿寄书黄鹤楼开缄识远意速此南行舟风水无定准湍波或【一作成】滯留忆昨新【一作初】月生西檐若琼鈎今来何所似破镜悬清秋恨不三五明平湖泛澄流此欢竟莫遂狂杀王子猷巴陵定近远持赠解【繆本作何】人忧【古乐府破镜飞上天古时三五明月满张铈注三五谓十五日也王子猷用乘舟访戴事见九卷注巴陵县名属岳州古巴丘也洞庭湖在其地】

荅高山人兼呈权顾二侯

虹霓掩天光哲后起康济应运生夔龙开元扫氛翳太微廓金镜端拱清遐裔轻尘集嵩岳虚点盛明意謬挥紫泥诏献纳青云际谗惑英主心恩疏佞臣计旁徨庭阙下叹息光阴逝未作仲宣诗先流贾生涕挂帆秋江上不为云罗制山海向东倾百川无尽势我於鴟夷子相去千余岁运阔英达稀同风遥执袂登舳望远水忽见沧浪桡高士何处来虚舟渺安系衣貌本淳古文章多佳丽延引故乡人风义未沦替顾侯达语默权子识通蔽曾是无心云俱为此留滯双萍易飘转独鹤思凌厉明晨去潇湘共谒苍梧帝【杨齐贤曰虹霓指太平公主辈哲后指玄宗晋书虹蜺日旁气也斗之乱精汉书夫日者衆阳之宗天光之贵潘尼释奠颂於穆伊何思文哲后书蔡仲之命康济小民开元玄宗即位所改年号晋书天文志太微天子庭也五帝之座也尚书考灵曜秦失金镜注曰金镜喻明道也端拱谓端居拱手犹垂拱无为之义晋书阮孚传正应端拱啸咏以乐当年耳遐裔远方也张华鷦鷯赋鷽鸡窜於幽险孔翠生乎遐裔隋书涓流赴海诚心屡竭轻尘集岳功力盖微裴駙史记集解序譬彗星之继朝阳轻尘之集华岳紫泥古人用之以封诏书详七卷注班固两都赋序朝夕论思日月献纳仲宣王粲字也作七哀诗南登灞陵岸回首望长安汉书贾谊上疏陈政事曰臣窃惟事势可为痛哭者一可为流涕者二江淹诗旷哉宇宙间云罗更四陈史记范蠡事越王句践句践以霸而范蠡称上将军以为大名之下难以久居乃浮海出齐变姓名自谓鴟夷子皮耕於海畔鲍照诗登舳眺淮甸李善注李裴曰舳船前头刺櫂处也谢朓诗早玩华池阴复鼓沧浪桡广韵桡櫂也沧浪桡用楚辞渔父事详六卷注谢灵运诗虚舟有超越李周翰注轻舟而进曰虚舟杨齐贤曰通蔽通塞也汉书太史公留滯周南双萍喻权顾二侯独鹤喻高山人班固覽海赋遵霓雾之掩荡登云涂以凌厉博雅凌驰也广韵凌厉也汉书息夫躬传鷹隼横厉顔师古注厉疾飞也凌厉犹横厉也方輿胜覽湘水自阳海发源至零陵与潇水会二水合流谓之潇湘吴均诗欲谒

苍梧帝过问沅湘姬苍梧帝谓虞舜 榘音裔】

荅杜秀才五松山【萧本缺山字】见赠【旧注五松山南陵铜玩西五六里】

昔献长杨赋天开云雨欢当时待诏承明里皆道扬雄才可观勅赐飞龙二天马黄金络头白玉鞍浮云蔽日去不返总为秋风摧紫兰角巾东出商山道采秀行歌咏芝草路逢园绮笑向人两【缪本作而】君解来一何好闻道金陵龙虎盘还同谢朓望长安千峯夹水向秋浦五松名山当夏寒铜井炎炉歊九天赫如铸鼎荆山前陶公矍铄【缪本作攫烁】呵赤电回禄睢盱扬紫烟此中岂是久留处便欲烧丹从列仙爱听松风且高卧飏飏【缪本作飏飏】吹尽炎氛过登崖独立望九州阳春欲奏谁相和闻君往年游锦城章仇尚书倒屣迎飞牋络绎奏明主天书降问回恩荣肮脏不能就珪组至今空扬高蹈【缪本作道】名夫子工文絶世奇五松新作天下推吾非谢尚邀彦伯异代风流各一时一时相逢乐在今袖拂白云开素琴弹为三峡流泉音从兹一别武陵去去後桃花春水深【汉书扬雄传孝成帝时客有荐雄文似相如者召雄待诏承明之庭从至射熊馆还上长杨赋聊因笔墨之成文章故藉翰林以为主人子墨为客卿以讽顔师古注承明殿在未央宫长杨宫名也在盩厔县中有射熊馆李善曰诸以才术见知直於承明待诏即见故曰待诏焉唐制学士出入院例赐飞龙厩马一匹天马御厩之马也俱详九卷注古乐府青丝系马尾黄金络马头吴均诗白玉镂衢鞍黄金马脑勒文子日月欲明浮云蔽之丛兰欲秀秋风败之商山采芝见本卷注楚辞采三秀兮山间王逸注三秀谓芝草也汉书汉兴有园公绮里季夏黄公角里先生此四人者当秦之世避而入商洛深山以待天下之定也金陵之地鍾山龙蟠石城虎踞详见七卷注谢朓诗晚登三山还望京邑诗灞浹望长安河阳视京县秋浦水名在池州秋浦县依此水立名详八卷注唐书地理志南陵有铜官冶元和郡县志铜井山在南陵县西南八十五里出铜一统志铜官山在铜陵县南十里又名利国山山有源泉冬夏不竭可以浸鉄煮铜旧尝于此置铜官塲韵会歊炎气也元和郡县志荆山在虢州湖城南即黄帝铸鼎之处列仙传陶安公者六安铸冶师也数行火火一旦散上行紫色冲天公伏冶下求哀须臾赤雀止冶上曰安公安公冶与天通七月七日迎汝以赤龙至期赤龙至大雨而安公骑之东南上一城邑数万人衆共送视之皆与辞诀云矍铄勇健貌汉光武称马援语见十一卷注左传禳火於玄冥回禄杜预注回禄火神庄子而睢睢而盱盱郭象注睢睢盱盱跋扈之貌初学记小风曰飏水经注风飏飏而飏飏虞翻诗清风送凉气薄暮荡炎氛新序客有歌於郢中者为阳春白雪国中属而和者数十人而已锦城即属郡成都府城详三卷八卷注通监天宝五载以剑南节度使章仇兼琼为户部尚书宝刻丛编章仇兼琼鲁郡任城人官至户部尚书殿中监諡曰忠三国志蔡邕才学显着贵重朝廷常车骑填巷宾客盈坐闻王粲在门倒屣迎之粲至年既幼弱容状短小一坐尽惊邕曰此王公孙也有异才吾不如也韵会络绎连属不絶也赵台诗肮脏倚门边章怀太子注肮脏高亢悻直之貌晋书袁宏字彦伯有逸才文章絶美曾为咏史诗是其风情所寄少孤贫以运租自业谢尚时镇牛渚秋夜乘月率尔与左右微服泛江会宏在舫中讽咏声既清会辞又藻拔遂驻听久之遣问焉荅曰是袁临汝郎诵诗即其咏史之作也尚倾率有胜致即迎升舟与之议论申旦不寐自此名誉日茂尚为安西将军豫州刺史引宏参其军事邢邵遗辛术书足下今能如此可谓异代一时乐府诗集琴集曰三峡流泉晋阮咸所作也武陵桃花见二卷注歊音器睢音辉盱音吁飏音授肮杭上声脏音葬】

至陵阳山登天柱石訓韩侍御见招隐黄山【杨齐贤曰陵阳山在泾县西南百里乃窋子明钓得白龙放之之处按地志陵阳山在池州府石埭县之北宁国府宣城县之西三峰连接迤屈盘天柱石是其山之一峰也洪焱祖新安续志新安广录云郡西北黄山有三十六峰也宣池接境岩岫秀丽可爱仙翁释子多隐其中山有汤泉色红可以澡瀹一统志黄山在宁国府太平县南三十里昔黄帝与浮丘仙人炼丹於此山当宣徽二郡界有三十二峯三十六源二十四溪十八洞八大岩】

韩衆骑白鹿西往华山中玉女千余人相随在云空见我传秘诀精诚与天通何意到陵阳游目送飞鸿天子昔避狄与君亦乘骢拥兵五陵下长策馭【繆本作遏】胡戎时泰解绣衣脱身若飞蓬鸾凤翻羽【繆本作翕】翼啄粟坐樊笼海鹤一笑之思归向辽东黄山过石柱巘嶠上攒丛因巢翠玉树忽见浮丘公又引王子乔吹笙舞松风朗咏紫霞篇请开蕊珠宫步纲绕碧落倚树招青童何日可携手遗形入无穷【神仙传刘根字君安如华阴山中见一人乘白鹿车从者十余人左右玉女四人执采旄之节皆年十五六余再拜稽首求乞一言神人乃告曰尔开有韩衆否荅曰实闻有之神人曰我是也嵇康诗目送归鸿手挥五弦後汉书桓典拜侍御史常乘骢马京师畏惮五陵谓献陵昭陵乾陵定陵桥陵也详见八卷注过秦论振长策而御宇内任昉诗时泰玉阶平綉衣御史之服详见十一十二卷注枚乘七发飞鸟闻之翕翼而不能去吕延济注翕敛也陶潜诗久在樊笼里复得返自然谢灵运诗连嶂叠巘李善注巘崖之别名甘泉赋翠玉树之青葱列仙传王子乔者周灵王太子晋也好吹笙作凤凰鸣游伊洛之间遇道士浮丘公接以上蒿高山萧士贇曰紫霞篇即黄庭内景经也经曰上清紫霞虚皇前太上大道玉晨君闲居蕊珠作七言散化五行变万神是为黄庭曰内篇梁丘子注蕊珠上清境宫阙名也真诰使经师授以方诸洞房步网之道真灵位业图栢成子高汤时退耕修步纲之道度人经道言昔於始青天中碧落空歌注云始青天乃东方第一天有碧霞徧满是云碧落真灵位业图龚仲阳幼阳兄弟二人受道於青童君庄子广成子曰余将去汝入无穷之门以游无极之野琦按太白武昌宰韩君碑云云卿文章冠世拜监察御史朝廷呼为子房李翱韩夫人韦氏墓志铭礼部郎中云卿好立节义有大功於昭陵其事迹史传不载观此诗所谓天子昔避狄与君亦乘骢拥兵五陵下长策馭胡戎之句相合韩侍御之为云卿殆无疑矣但太白未尝作侍御何以云与君亦乘骢耶岂他人之作误采入集抑字句少有讹谬坎巘语蹇切年上声音谔】

訓崔十五见招

尔有鸟迹书相招琴溪饮手迹尺素中如天落云锦读罢向空笑疑君在我前长吟字不灭怀袖且三年【水经注仓颉本鸟迹为字取其孳乳相生故文字有六义焉一统志琴溪在宁国府泾县东北二里溪侧有石台相传琴高控鲤之所古诗呼儿烹鲤鱼中有尺素书木华海赋云锦散文于沙汭之际张铉注云锦朝霞也古诗置书怀袖中三岁字不灭】

荅王十二寒夜独酌有怀

昨夜吴中雪子猷佳兴发万里浮云卷碧山青天中道流孤月孤月沧【繆本作苍】浪【一

作波】河汉清北斗错落长庚明怀余对酒夜霜白玉牀金井冰峥嵘人生飘忽百年内且须酣畅万古情【王子猷居山阴夜大雪眠觉开室命酌酒忽忆戴安道详九卷注谢庄月赋素月流天沧浪犹沧凉寒冷之意广雅太白谓之长庚曹宪音释金星也晨见东方为启明昏见西方为长庚牀井栏也玉牀金井者言其美丽之饰如玉如金也陆机叹逝赋时飘忽其不再】君不能狸膏金距学鬪鸡坐令鼻息吹虹霓君不能学哥舒横行青海夜带刀西屠石堡取紫袍吟诗作赋北窗里万言不直一杯水世人闻此【一作之】皆掉头有如东风射马耳【艺文类聚庄子谓惠子曰羊沟之鸡三岁为株相者视之则非良鸡也然而数以胜人者以狸膏涂其头尔雅翼鬪鸡私取狸膏涂其头辄鬪无敌此非有厌胜特是狸能捕鸡异鸡闻狸之气则畏而走左传季郕之鸡鬪季氏介其鸡郕氏为之金距高诱曰金距施金芒於距也梁简文帝鸡鸣篇陈思助鬪协狸膏郕昭妒敌安金距玄宗好鬪鸡时以鬪鸡供奉者若王准贾昌之流皆赫奕可畏详见二卷注旧唐书哥舒翰天宝七载筑神威军於青海上吐蕃至攻破之又筑城於青海中龙驹岛吐蕃屏迹不敢近青海吐蕃保石堡城路遥而险久不拔八载以朔方海东监牧十万衆委翰总统攻石堡城翰使麾下将高秀岩张守瑜进攻不旬日而拔之上録其功拜特进鸿胪员外卿与一子五品官赐物千匹庄宅各一所加摄御史大夫太平广记哥舒翰为安西节度控地数千里甚着威令故西鄙人歌之曰北斗七星高哥舒夜带刀吐蕃总杀尽更筑两重濠胡三省通监音注石堡城本吐蕃鉄仞城也宋白曰石堡城在龙支县西四面悬崖数十仞石路盘屈长三四里西至赤岭三十里庄子鸿蒙拊脾雀跃掉头】鱼目亦笑我请【一作谓】与明月同骅骝拳局不能食蹇驴得志鸣春风折杨黄华合流俗晋君听琴枉清角巴【一作几】人谁肯和阳春楚地犹来贱奇璞黄金散尽交不成白首为儒身被轻一谈一笑失顔色苍蝇贝锦喧谤声曾参岂是杀人者谗言三及慈母惊【张协诗瓠瓠夸瓊璠鱼目笑明月明月谓明月珠也穆天子传天子之驄赤骥盗骝白义踰轮山子渠黄华骝緑耳郭璞注华骝色如华而赤今名马缥赤者为枣骝枣骝赤也离骚仆夫悲予马怀兮蜷局顾而不行王逸注蜷局诘屈不行貌广韵局不伸也拳局与蜷局局义同汉书驪驾罢牛骖蹇驴兮顔师古注蹇跛也庄子大声不入里耳折杨皇华则嗑然而笑陆德明注折杨皇华皆古歌曲也韩非子晋平公曰音莫悲于清徵乎师旷曰不如清角平公曰清角可得而闻乎师旷曰不可昔日黄帝合鬼神于太山之上驾象车而六蛟龙毕方并辖蚩尤居前风伯进扫雨师洒道虎狼在前鬼神在後腾蛇伏地凤凰覆上大合鬼神乃作清角今主君德薄不足聽之聽之将恐有败平公曰寡人老矣所好者音也愿遂听之师旷不得已而鼓之一奏之有玄云从西北方起再奏之大风至大雨随之裂帟幕破俎豆堕廊瓦坐者散走平公恐惧伏於廊室之间晋国大旱赤地三年平公之身遂癯病巴人阳春事见二卷注奇璞用卞和献玉事见四卷注司马彪诗卞和潜幽冥谁能证奇璞苍蝇即青蝇也诗小雅营营青蝇止於樊岂弟君子无信谗言又萋兮斐兮成是贝锦彼谮人者亦已太甚新序昔者曾参之处郑人有与曾参同名姓者杀人人告其母曰曾参杀人其母织自若也顷然一人又来告之其母曰吾子不杀人有顷一人又来告其母投杼下机踰墙而走夫以曾参之贤与其母信之也然三人疑之其母惧焉】与君论心握君手荣辱於余亦何有孔圣犹闻伤凤麟董龙更是何鸡狗一生傲岸苦不谐恩疎媒劳志多乖严陵高揖汉天子何必长剑拄颐事玉阶达亦不足贵穷亦不足悲韩信羞将绦灌比称衡耻逐屠沽儿君不见李北海英风豪气今何在君不见裴尚书土坟三尺蒿棘【一作下】居少年早欲五湖去见此弥将钟鼎疎【史记孔子将西见赵简子至於河而闻窦鸣犢舜华之死也曰窦鸣犢舜华晋国之贤大夫也赵简子未得志之时须此两人

而後从政及其已得志杀之乃从政丘闻之也刳胎杀夭则麒麟不至郊竭泽涸渔则蛟龙不合阴阳覆巢毁卵则凤凰不翔何则君子讳伤其类也夫鸟兽之於不义也尚知避之而况乎丘哉乃还息乎陬乡作为陬操以哀之又孔子尝叹凤鸟之不至悲西狩之获麟或指此二事而言亦可也十六国春秋王堕为宰相着匪躬之节性刚峻疾恶雅好直言右仆射董荣以佞幸进疾之如仇每於朝见之际略不与言或谓之曰董尚书贵幸一时无比公宜降意接之堕曰董龙是何鸡狗而令国士与之言乎荣闻而慙恨会有天变荣言於苻生曰天谴甚重宜以贵臣应之乃杀堕龙荣之小字也鲍照诗傲岸平生中不为物所裁宋玉神女赋交希恩踈不可尽畅楚辞心不固兮媒劳严子陵事注见二卷说苑大冠若箕长剑拄颐史记韩信为淮阴侯居常鞅鞅羞与绛灌等列後汉书祢衡来游许下是时许都新建贤士大夫四方来集或问衡曰盍从陈长文司马伯达乎对曰吾焉能从屠沽儿耶唐书李邕字泰和扬州江都人开元二十三年起为括州刺史後历淄滑二州刺史上计京师邕早有名重义爱士久斥外不与士大夫接既入朝人间传其眉目瓌异至阡陌聚观後生望风内谒门巷填隘中人临问索所为文章具进上以谄媚不得留出为汲郡北海太守天宝中左骁卫兵曹参军柳积有罪下狱邕尝遗积马宰相李林甫素忌邕因傅以罪就郡杖杀之邕虽拙不进而文名天下时称李北海卢藏用尝谓邕如干将镆耶难与争锋但虞其伤缺耳後卒如言邕资豪放不能治细行所在贿谢田游自肆终以败云江邻几杂志李白诗君不见裴尚书古坟三尺蒿棘居问修唐书吕缙叔云是濯又云是冕宋次道云是检校官与李北海作对非齷齪人也琦按玄宗朝裴耀卿为尚书左仆射裴光庭为吏部尚书裴濯为吏部尚书裴伾先为工部尚书裴寬为户礼二部尚书裴敦复为刑部尚书凡六裴尚书太白所指称未知何人考裴敦复以平海贼功为李林甫所忌贬淄川太守与李邕皆坐柳积事同时杖死今与李北海并称或者正指其人而言似为近之若裴冕之为尚书左仆射则又在肃宗时矣】

李太白集注卷十九

卷二十

钦定四库全书

李太白集注卷二十

钱塘 王琦 撰

古近体诗共六十首

游南阳白水登石激作【南阳唐时郡名即邓州也隶山南东道方輿胜覽枣阳有白水即白河一统志淅水在南阳府城东三里俗名白河石激在南阳府城东三里淅水环流为一城之胜可以御水患而障城郭其坚完磬石犹在】

朝涉白水源暂与人俗踈岛屿佳境色江天涵清虚目送去海云心闲游川鱼长歌尽落日乘月归田庐游南阳清冷泉【一统志丰山在南阳府东北三十里下有泉曰清冷泉】

惜彼落日暮爱此寒泉清西辉【繆本作耀】逐流水荡漾游子情空歌望云月曲尽长松声【萧子范诗暝景促西晖】

寻鲁城北范居士失道落苍耳中见范置酒摘苍耳作【居易録鲁城北有范氏庄即太白访范居士失道落苍耳中者琦按杜甫有与李十二白同寻范十隐居诗云李侯有佳句往往似阴铿予亦东蒙客怜君如弟兄醉眠秋共被携手日同行更想幽期处还寻北郭生入门高兴发侍立小童清落景闻寒杵屯云对古城何来吟橘颂谁欲讨蓴羹不愿论簪笏悠悠沧海情疑即此人也埤雅荆楚记曰卷耳一名璫草亦云苍耳丛生如盘今人以叶覆麦作黄衣者所在有之尔雅翼卷耳菜名也幽冀谓之?菜雒下谓之胡枲江东呼为常枲叶青白色似胡葵白花细茎可煮为茹滑而少味又谓之常思菜伧人皆食之又以其叶覆麴作黄衣其实如鼠耳而苍色上多刺好着人衣今人通谓之苍耳】

雁度秋色远日静无云时客心不自得浩漫将何之忽忆范野人闲园养幽姿茫然起逸兴但恐行来迟城壕失往路马首迷荒陂不惜翠云裘遂为苍耳欺入门且一笑把臂君为谁酒客爱秋蔬山盘荐霜梨他筵不下筯此席忘朝饥酸枣垂北郭寒瓜蔓东篱还倾四五酌自咏猛虎词近作十日欢远为千载期风流自簸荡谿浪偏相宜酣来上马去却笑高阳池【江淹诗饮马出城濠吕延济注壕城池也壕濠古字通用说文陂阪也宋玉讽赋翳承日之华披翠云之裘齐民要术藏梨法初霜後即收本草陶弘景曰酸枣今出山东间云即山枣树子似武昌枣而味极酸东人噉之以醒睡苏颂曰酸枣今近汴洛及西北州郡皆有之野生多在坡坂及城垒间似枣木而皮细其木心赤色茎叶俱青花似枣花八月结实紫红色似枣而圆小味酸梁书滕昙恭母杨氏患热思食寒瓜本草陶弘景言永嘉有寒瓜甚大可藏至春史记秦昭王佯为好书遗平原君曰寡人闻君之高义愿与君为十日之饮鲍照诗从风簸荡落西家诗国

风谿浪笑傲高阳池用山简事见五卷注】

东鲁【繆本作鲁东】门泛舟二首【一统志东鲁门在兖州府城东】

日落沙明天倒开波摇石动水萦回轻舟泛月寻溪转疑是山阴雪後來【王徽之常居山阴夜雪初霁月色清朗忽忆戴逵逵时在剡便夜乘小船诣之详见十三卷注】

其二

水作青龙盘石堤桃花夹岸鲁门西若教月下乘舟去何啻风流到剡溪【剡音闪】

秋猎孟诸夜归置酒单父东楼观妓【杜预春秋经传集解孟诸宋大薮也在梁国睢阳县东北元和郡县志孟诸泽在宋州虞城县西北十里周回五十里俗号盟诸泽单父音善甫】

倾晖速短炬走海无停川冀餐圆丘草欲以还颓年此事不可得微生若浮烟骏【繆本作俊】发跨名驹雕弓控鸣弦鹰豪鲁草白狐兔多肥鲜邀遮相驰逐遂出城东田一扫四野空喧呼鞍马前归来献所获炮炙宜霜天出舞两美人飘飏若云仙留欢不知疲清晓方来旋【鲍照诗倾晖忽西下郭璞诗圆丘有奇草李善注外国图曰圆丘有不死树食之乃寿吕向注圆丘山名奇草芝草也陆机愍思赋乐来日之有继伤颓年之莫纂诗周颂骏发尔私郑笺云骏疾也东京赋雕弓斯彀薛综注雕弓谓有刻画也汉书逢蒙列眦羿氏控弦顔师古注控引也羽猎赋淫淫与与前後要遮说文炙毛炙肉也韵会钱氏曰凡肉置火中曰炮近火曰炙应璩诗公子敬爱客乐饮不知疲】

游泰山六首【一作天宝元年四月从故御道上泰山史记正义泰山一曰岱宗东岳也在兖州博城县西北三十里山东通志泰山在济南府泰安州北五里一曰兖镇周围一百六十里自山下至絶顶四十余里上有石表巍然传是秦时无字碑】

四月上泰山石平【萧本作屏】御道开六龙过万壑涧谷随萦回马迹遶碧峰於今满青苔飞流洒絶巘水急【一作色】松声哀北眺?嶂奇倾崖向东摧洞门闭石扇地底【许本作低霏玉本作砥】兴云雷登高望蓬瀛想象金银【繆本作籙】台天门一长啸万里清风来玉女四五人飘飏下九垓含笑引素手遗我流霞杯稽首再拜之自媿非仙才旷然小宇宙弃世何悠哉【旧唐书开元十三年十月辛酉东封泰山发自东都十一月丙戌至兖州岱宗顿巳丑日南至备法驾登山仗卫罗列山下百余里诏行从留于谷口上与宰臣礼官升山庚寅祀昊天上帝於上坛有司祀五帝百神於下坛礼毕藏玉册於封祀坛之石碣然後燔柴燎发羣臣称万岁传呼自山顶至岳下震动山谷宋书天子所御驾六其余副车皆驾四按书称朽索御六驾逸礼王度记曰天子驾六袁盎谏汉文驰六飞魏时天子亦驾六六龙之义本此余见八卷注鲍照诗千岩盛阻积万壑势回萦孙绰天台赋瀑布飞流以界道张协七命发絶巘遡长风絶巘高峰也鲍照诗合沓?嶂云郭璞诗神仙排云出但见金银台山东通志上泰山屈曲盘道百余经南天门东南三天门至絶顶高四十余里左思诗长啸激清风郭璞诗升降随】

长烟飘飏戏九垓张铎注九垓九天也抱朴子项曼都入山学仙十年而归家曰仙人以流霞一杯与我饮之辄不饥渴汉武内传王母曰虽当语之以至道殆恐非仙才也
巘语蹇切年上声嶓音愕嶂音帐垓音该】

其二

清晓骑白鹿直上天门山山际逢羽人方瞳好容颜扪萝欲就语却掩青云关遗我鸟迹书飘然落岩间其字乃上古读之了不闲感此三叹息从师方未还【楚辞仍羽人於丹丘王逸注人得道身生羽毛也朱子注羽人飞仙也抱朴子仙人目瞳正方神仙传李根瞳子皆方按仙经云八百岁人瞳子方也徐干中论苍颉视鸟迹而作书尔雅闲习也荀子多见曰闲】

其三

平明登日观举手开云关精神四飞扬如出天地间黄河从西来窈窕入远山凭崖览【萧本作揽】八极目尽长空闲偶然值青童绿发双云鬟笑我晚学仙蹉跎凋朱颜踟躇忽不见浩荡难追攀【水经注应劭汉官仪云泰山东南山顶名曰日观鸡一鸣时见日始欲出长三丈许故以名焉北山移文岫岫掩云关云关者云气拥蔽如门关也初学记泰山记云黄河去泰山二百余里於祠所瞻黄河如带若在山趾】

其四

清斋三千日裂素写道经吟诵有所得衆神卫我形云行信长风飒若羽翼生攀崖上日观伏檻窥东溟海色动远山天鸡已先鸣银台出倒景白浪翻长鲸安得不死药高飞向蓬瀛【南岳魏夫人传夫人入洛阳山中清斋五百日读大洞真经顔师古急就篇注素谓绢之精白者即所用写书之素也楚辞坐堂伏檻临曲池些东溟东海也海色晓色也俱见二卷注天鸡见一卷大鹏赋注谢灵运诗张组眺倒景列筵□归潮李善注游天台山赋曰或倒景於重溟王彪之游仙诗曰远游絶尘雾轻举观沧溟蓬莱荫倒景崑仑罩层城并以山临水而景倒谓之倒景此篇倒景正作此解与二卷中所用倒景故自不同蓬莱瀛洲在渤海中有不死药金银为宫阙详见四卷注】

其五

日观东北倾两崖夹双石海水落眼前天光遥空碧千峰争攒聚万壑絶凌历缅彼鹤上仙去无云中迹长松入霄【萧本作云】汉远望不盈尺山花异人间五月雪中白终当遇安期於此链玉液【缅思貌岁华纪丽泰山冬夏有雪安期生古之仙人见二卷注江淹诗道人读丹经方士链玉液张铎注玉液玉膏也】

其六

朝饮王母池暝投天门关【繆本作阕】独抱绿绮琴夜行青山间【繆本作月】山明月露
白夜静松风歇仙人游碧峰处处笙歌发寂静【繆本作听】娱清辉玉真连翠微想象鸾凤
舞飘飏龙虎衣扪天摘匏瓜恍惚不忆归举手弄清浅误攀织女机明晨坐相失但见五云飞
【山东通志王母池在泰山下之东南麓一名瑶池水极甘冽灋沸潏潏不竭不盈乡人取水
祭雨颇验张载诗美人遗我绿绮琴李周翰注绿绮琴名傅玄琴赋序曰司马相如有绿绮蔡
邕有焦尾皆名器也尔雅疏山未及顶上在旁陂阪之处名翠微楚辞遂儵忽而扪天隋书匏
瓜五星在离珠北史记索隐荆州占云匏瓜一名天鸡在河鼓东匏瓜明则岁大熟古诗河汉
清且浅相去复几许史记正义织女三星在河北天纪东天女也五云五色云也见七卷注】

秋夜与刘弼山泛宴喜亭池【弼山县名唐时隶河南道宋州睢阳郡刘盖为弼山令者也江
南通志宴喜台在徐州碭城县东五十步台上有石刻三大字相传唐李白笔碭音荡】

明宰试舟楫张灯宴华池文招梁苑客歌动郢中儿月色望不尽空天交相宜令人欲泛海只
待长风吹【华池郢中歌见二卷注梁苑客见七卷注】

携妓登梁王栖霞山孟氏桃园中【一统志栖霞山在兖州单县东四里世传梁孝王尝游此
】

碧草已满地柳与【繆本作与柳】梅争春谢公自有东山妓金屏笑坐如花人今日非昨日
明日还复来白发对绿酒强歌心已摧君不见梁王池上月昔照梁王樽酒中梁王已去明月
在黄鹂愁醉啼春风分明感激眼前事莫惜醉卧桃园东【陈後主诗三春桃照李二月柳争
梅谢安在东山畜妓见十卷注黄鹂今谓之黄莺儿见六卷注】

与从侄杭州刺史良游天竺寺【唐时杭州隶江南东道州有天竺寺乃今之下天竺寺详见
十六卷注咸淳临安志下竺灵山寺在钱塘县西十七里隋开皇十三年僧真观法师与道安
禅师建号南天竺寺唐永泰中赐今额淳佑志云大凡灵竺之胜周回数十里而岩壑尤美实
聚於下天竺灵山寺自飞来峯转至寺後岩洞皆嵌空玲珑莹滑清润如虬龙瑞凤如层华吐
萼如皱縠叠浪穿幽透深不可名貌林木皆自岩骨拔起不土而生传言兹岩产玉故腴润能
育焉其间唐宋游人题名不可殫纪一统志下天竺寺在杭州府城西十五里晋咸和中建寺
前後有飞来莲花诸峰合涧跳珠诸泉梦谢流盃月桂诸亭游人多至其间】

挂席凌蓬丘观涛憩樟楼三山动逸兴五马同遨游天竺森在眼松风【繆本作门】惊秋覽
云测变化弄水穷清幽叠嶂隔遥海【霏玉本作响】当轩写归流诗【萧本作转】成傲云
月佳趣满吴洲【十州记蓬丘蓬莱山也梦梁录樟亭驿即浙江亭也在跨浦桥南江岸浙江
通志樟亭在钱塘县旧志南五里後改为浙江亭今浙江驿其故址也三山谓蓬莱方丈瀛洲
三神山见四卷注五马古太守事见六卷注杨齐贤曰自西湖入天竺寺路夹道皆古松其地
名曰九里松灵隐天竺同在一处皆由松门而进顏延年诗振楫发吴洲】

同友人舟行【繆本於行字下多游台越作四字】

楚臣伤江枫谢客拾海月怀沙去潇湘挂席泛溟渤蹇予访前迹独往造穷发古人不可攀去若浮云没愿言弄倒景从此链真骨华顶窥絶冥蓬壶望超忽不知青春度但怪緑芳歇空持钓鳌心从此谢魏阙【楚辞湛湛江水兮上有枫目极千里兮伤春心王逸注言湛湛江水浸润枫木使之茂盛伤已不蒙君惠而身放弃曾不若树木得其所也宋书谢灵运小字客儿故诗人多称为谢客其游赤石进帆海诗有云扬帆采石华挂席拾海月李善注临海水土物志云海月大如镜色白正圆常生海边其尖柱如搔头大本草陈藏器曰海月蛤类也似半月故名水沫所化史记屈原作怀沙之赋於是怀石遂自投汨罗以死溟渤海也注见七卷楚辞蹇谁留兮中洲王逸注蹇辞也庄子穷发之北有冥海者天池也倒景见本卷游太山第四首注方輿胜覧华顶峰在天台县东北六十里盖天台第八重最高处高一万丈絶顶东望沧海俗名望海尖草木薰郁殆非人世孙绰所谓涉降信宿迄乎仙都是也絶冥远海也十州记蓬壶蓬莱也王巾头陀寺碑文东望平臯千里超忽吕向注超忽远貌钓鳌事见四卷注淮南子身处江湖之上而神游魏阙之下高诱注魏阙王者门外阙也所以用悬教民之书於象魏也巍巍高大故曰魏阙】

下终南山过斛斯山人宿置酒【元和郡县志终南山在雍州万年县南五十里太平寰宇记终南山在郿县南三十里雍録终南山横亘关中南面西起秦陇东彻蓝田凡雍岐郿鄠长安万年相去且八百里而连绵峙据其南者皆此一山也通志氏族略代北复姓有斛斯氏其先居广牧世袭莫勿大人号斛斯部因氏焉】

暮从碧山下山月随人归却顾所来径苍苍横翠微相携及田家童稚【一作稚子】开荆扉緑竹入幽径【繆本作援】青萝拂行衣欢言得所憩美酒聊共挥长歌吟松风曲尽河星稀我醉君复乐陶然共忘机【翠微山岭之色详十卷注沈约诗荆扉新且故李周翰注荆扉以荆为门扉也】

朝下过卢郎中叙旧游

君登金华省我入银台门幸遇圣明主俱承云雨恩复此休浣时闲为畴昔言却话山海事宛然林壑存明湖思晓月叠嶂忆清猿何由返初服田野醉芳樽【刘孝绰诗步出金华省遥望承明庐蔡梦弼杜诗注按汉宫阙记金华殿在未央宫白虎观右秘府图书皆在焉故王思远逊侍中表云奏事金华之上进议玉台之下後世以门下省名金华省盖出此也雍録翰林院在大明宫右银台门内稍退北有门榜曰翰林之门鲍照诗休浣自公日休浣犹休沐也汉律吏五日得一休沐言休息以洗沐也杨升庵曰唐制十日一休沐故韦应物诗云九日驱驰一日闲白居易诗云公假日三旬是也杜预左传注畴昔犹前日也任昉诗叠嶂易成响重以夜猿悲楚辞退将复修吾初服刘孝绰诗芳樽散绪寒】

侍从游宿温泉宫作【温泉宫注见九卷】

羽林十二将罗列应星文霜仗悬秋月霓旌卷夜云严更千户肃清乐九天闻日出瞻佳气葱葱【繆本作丛丛】绕圣君【汉书武帝太初元年初置建章营骑後更名羽林骑顔师古注

羽林宿卫之官言其如羽之疾如林之多也一说羽所以为王者羽翼也按唐制左右羽林军各置大将军一人将军三人凡八将无所谓十二将也而开元天宝之时天子禁兵有十六卫其左右卫左右金吾卫总谓之四卫若左右骁卫左右武卫左右威卫左右领军卫左右监门卫左右千牛卫十二卫谓之杂卫疑所谓十二将者指十二杂卫之主将而言以其专掌禁卫当爪牙御侮之任与汉之羽林骑相似故曰羽林十二将也晋书羽林四十五星在营室南一曰天军主军骑又主翼王也杨升庵曰唐武德中置十二军皆取天星为名以万年道为参旗军长安道为鼓旗军富平道为玄戈军醴泉道为井钺军同州道为羽林军华州道为骑官军宁州道为折威军岐州道为平道军幽州道为招摇军麟州道为苑游军泾州道为天纪军宜州道为天节军太白盖用其事琦按通典会要诸书分阙中之衆为十二卫取象天官为名号乃武德二年事五年即废久矣杨说虽创揆之作者之心恐未必用此典故上林赋拖霓旌张揖注析羽毛染以五采缀以缛为旌有似虹蜺之气也西京赋重以虎威章沟严更之署薛综注严更督行夜鼓也唐会要清乐九代之遗声其始即清商三调是也并汉魏以来旧曲乐器制度并诸歌章古调与魏三祖所作者皆备於史籍自晋氏播迁其音分散不存於内地苻坚灭凉始得之传於前後二秦及宋武定关中收之入於江南隋平陈获之隋文聽之善其节奏曰此华夏正声也因更损益去其哀怨考而补之乃置清商署总谓之清乐至炀帝乃立清乐西凉等九部隋室丧乱日益沦缺天后朝犹有六十三曲新唐书礼乐志清商伎者隋清乐也有编钟编磬独弦琴击琴瑟秦琵琶卧箜篌筑箏节鼓皆一笙笛箫篪方响跋膝皆二歌二人吹叶一人舞者四人梦溪笔谈先王之乐为雅乐前世新声为清乐後汉书望气者苏伯阿为王莽使至南阳遥望见舂陵郭喈曰气佳哉郁郁葱葱】

邯鄲南亭观妓【邯鄲县名唐时隶河北道之磁州】

歌鼓【一作妓】燕赵儿魏姝弄鸣丝粉色艶日【繆本作月】彩舞袖【一作衫】拂花枝把酒领【一作顾】美人请歌邯鄲词清箏何缭绕度曲緑云垂平原君安在科斗生古池座客三千人於今知有谁我辈不作乐但为後代悲【潘岳笙赋紫纒歌鼓网罗钟律韵会姝美色也顔师古急就篇注箏亦瑟类也本十二弦今则十三苕溪渔隐丛话艺苑雌黄云世人言度曲者多作徒故切谓歌曲也张平子西京赋云度曲未终云起雪飞子美陪李梓州泛江诗翠眉紫度曲云鬓俨成行皆作徒故切读考之前汉元帝纪赞云帝多才艺善史书鼓琴吹洞箫自度曲被歌声应劭注自隐度作新曲因持新曲以为歌声也顔注度音大各切则与张平子杜诗所言度曲异矣而臣瓚注则云度曲谓歌终更授其次则又误以度曲为歌曲夫度曲虽有两音若读元帝纪止可作大各切唐书段安节善乐律能自度曲其意正与元帝纪相合琦按太白诗意自应作徒故切读而杨注引自度曲解之非是緑云垂即响遏行云之意古今注虾蟆子曰蝌蚪一曰玄针一曰玄鱼形圆而尾尖尾脱即脚出顔师古急就篇注科斗一名活东一名活师即虾蟆所生子也未成虾蟆之时身及头并圆而尾长渐乃变耳史记平原君喜宾客宾客盖至者数千人又曰平原君得敢死之士三千人古诗为乐当及时何能待来兹愚者爱惜费但为後世嗤姝音枢】春日【繆本缺日字】游罗敷潭【王阮亭曰罗敷谷水在华州】

行歌入谷口路尽无人跻攀崖度絶壑弄水寻回溪云从石上起客到花间迷淹留未尽兴日

落羣峰西【说文跻登也】

春陪商州裴使君游石娥溪【原注时欲东游遂有此赠游繆本作归商州古商国也在晋为上洛郡在西魏为洛州在後周为商州在唐亦谓之商州或为上洛郡地有商山洛水依此立名属关内道使君太守之称石娥溪当在仙娥峰下按雍胜略商略陕西通志仙娥峰在商州西十里峰之麓有西岩洞壑幽邃下临丹水古称栖真之地李白尝游此有诗曰暂出城东边遂游西岩前横天耸翠壁喷壑鸣红泉云云是石娥溪即仙娥峰下之溪也所谓红泉者其即丹水欤】

裴公有仙标拔俗数千丈澹荡沧洲云飘飏紫霞想剖竹商洛间政成心已闲萧条出世表冥寂闭玄关我来属芳节解榻时相悦褰帷对云峰扬袂指松雪暂出东城边遂游西岩前横天耸翠壁喷壑鸣红泉寻幽殊未歇爱此春光发溪旁饶名花石上有好月命驾归去来露华生翠【繆本作緑】苔淹留惜【繆本作昔】将晚复听清猿哀清猿断人肠游子思故乡明发首东路此欢焉可忘【世说注向秀别传曰秀字子期河内人少为同郡山涛所知又与谯国嵇康东平吕安善并有拔俗之韵谢灵运诗剖竹守沧海商洛详见题注郭璞客傲无岩穴而冥寂无江湖而放浪王?头陀寺碑玄关幽键感而遂通张铉注玄幽谓道之深邃也关键皆所以闭距於门者宋南平王铄诗徘徊去芳节梁元帝纂要春节曰芳节後汉书陈蕃为乐安太守郡人周璆高洁之士前後郡守招命莫肯至唯蕃能致焉特为置一榻去则悬之攀惟後汉贾琮事见十四卷注顔延年诗山明望松雪谢灵运诗铜陵映碧涧石磴泻红泉孔子歌巾车命驾将适唐都江淹诗风光多树色露华翻蕙陰苏武诗征夫怀远路游子恋故乡汉书韩信传北首燕路顔师古曰首谓趣向也音式究反鲍照诗首路或参差投驾均远托】

陪从祖济南太守泛鵲山湖三首【唐时齐州隶河南道本谓之齐郡天宝元年更名临淄郡五载十月又更名济南郡一统志泺水自大明湖东北流注华不注山下汇为鵲山湖又东北入于济伪齐刘豫自城北导之东行为小清河而水不及鵲山湖矣山东志鵲山湖在济南府城北二十里】

初谓鵲山近宁知湖水遥此行殊戴访自可缓归桡【隋书齐郡历城有鵲山一统志鵲山在济南府城北二十里俗云每岁七八月间乌鵲翔集於此又云扁鵲尝於此炼丹王子猷乘船访戴安道见九卷注方言楫谓之桡或谓之櫂 桡音饶】

其二

湖阔数十【萧本作千误】里湖光摇碧山湖西正有月独送李膺还【郭林宗与李膺同舟而济见十二卷注】

其三

水入北湖去舟从南浦回遥看鵲山转却似送人来【杨齐贤曰南浦在鵲山湖之南】

春日陪杨江宁及诸官宴北湖感古作【扬名利物为润州江寧令李善文选注药游苑晋时药□元嘉中筑堤壅水名为北湖六朝事迹晋元帝大兴三年始创为北湖筑长堤以遏北山之水东至覆舟山西至宣武城太平寰宇记玄武湖在昇州上元县西北七里周回四十里东西两???下水入秦淮春夏深七尺秋冬四尺灌田百顷徐爰释问曰湖本桑泊晋元帝大兴中创为北湖宋筑堤南抵西塘以肄舟师也又京都记云从北湖望锺山似宫亭湖望庐岳也按安帝元嘉二十三年筑堤以堰水为此】

昔闻顏光禄攀龙宴京【一作重一作明】湖楼船入天镜帐殿开云衢君王歌大风如乐丰沛都延年献佳作邈与诗人俱我来不及此独立锺山孤杨宰穆清风【一作飏】芳声腾海隅英僚满四座粲若琼林敷鹄首弄倒景蛾眉缀【繆本作掇】明珠新弦采【一作来繆本作彩非】梨园古舞娇吴歆曲度绕云【一作清】汉听者皆欢娱鸡栖何嘈嘈沿【一作江】月沸笙竽古之帝宫苑今乃人樵苏感此劝一觴愿君覆瓢壶荣盛【一作盛时】当作乐无令後贤吁【南史顏延之字延年孝武登阼以为金紫光禄大夫夫汉书攀龙附凤并乘天衢帐殿天子行幸野次连帐以为殿也沈约诗帐殿临春簾帷宫绕芳芸左思白发赋开论云衢史记高祖还归过沛留置酒沛宫悉召故人父老子弟纵酒发沛中儿得百二十人教之歌酒酣高祖擊筑自为歌诗曰大风起兮云飞扬威加海内兮归故乡安得猛士兮守四方令儿皆和习之汉书高祖沛丰邑中阳里人也应劭曰沛县也丰其乡也孟康曰後沛为郡而丰为县按顏延年有应劭观北湖田收诗所谓献佳作者未知是此诗否抑另有其诗而今逸之欽唐六典注蒋山一名锺山在润州江寧县诗大雅吉甫作颂穆如清风淮南子龙舟鹄首高诱注鹄大鸟也画其像着船头故曰鹄首也曹植洛神赋缀明珠以耀軀唐会要开元二年上以天下无事听政之暇於梨园自教法曲必尽其妙谓之皇帝梨园弟子唐书礼乐志玄宗既知音律又酷爱法曲选坐部伎子弟三百教於梨园声有误者帝必觉而正之号皇帝梨园弟子宫女数百亦为梨园弟子居宜春院北梨园楚辞吴歆蔡讴奏大吕些梁元帝纂要吴?曰歆王粲诗管弦发徽音曲度清且悲吴质荅东阿王书耳嘈嘈而无闻刘良注嘈嘈喧甚也博雅笙以匏为之十三管宫管在左方竽象笙三十六管宫管在中央宋书笙随所造不知何代人列管匏内施簧管端宫管在中央三十六簧曰竽宫管在左旁十九簧至十三簧曰笙其他皆相似也汉书樵苏後?顏师古注樵取薪也苏取草也覆瓢壶犹倾尊倒瓮之意陶潜诗取欢当作乐】

宴郑参卿山池【杜甫诗参卿休坐幄荡子不还家耿漳送郭参军诗人传府公政记室有参卿皆谓参军也疑唐时有此称谓】

尔恐碧草晚我畏朱顏移愁看杨花飞置酒正相宜歌声送落日舞影回清池今夕不尽杯留欢更邀谁【萧本作诗】

游谢氏山亭

沦老卧江海再欢天地清病闲久寂寞岁物徒芬荣借君西池游聊以散我情扫雪松下去扞萝石道行谢公池塘上春草【一作风】飒已生花枝拂人来山鸟向我鸣田家有美酒落日

与之倾醉罢弄归月遥欣稚子迎【因谢氏山亭故用灵运池塘生春草之句作映带】

把酒问月【原注故人贾淳令予问之】

青天有月来几时我今停杯一问之人攀明月不可得月行却与人相随皎如飞镜临丹阙绿烟灭尽清辉发但见宵从海上来宁知晓向云间没白兔捣药秋复春嫦娥孤栖与谁邻今人不见古时月今月曾经照古人古人今人若流水共看明月皆如此唯愿当歌对酒时月光长照金樽里【木华海赋朱 绿烟傅玄拟天问月中何有白兔捣药独异志羿烧仙药药成其妻姮娥窃而食之遂奔入月中曹操短歌行对酒当歌人生几何】

同族侄【一作弟】评事黯游昌禅师山池二首【唐书百官志大理寺有评事八人从八品下】

远公爱康乐为我开禅关萧然松石下何异清凉山花将色不染水与心俱闲一坐度小劫观空天地间【莲社高贤传谢灵运为康乐公主孙袭封康乐公至庐山一见远公肃然心服乃即寺筑台翻涅槃经凿池种白莲时远公诸贤同修净土之业因号白莲社历代三宝记即立禅关於闲旷地法苑珠林代州东南五台山古称神仙之宅也山方三百里巉岩崇峻有五高台上不生草唯松柏茂林森於谷底地极严寒多雪号曰清凉山经中明文殊将五百仙人往清凉山说法即斯地也所以古来求道之士多游此山遗窟灵迹即目极多胡三省通鉴注五台山在代州五台县山形五峙相传以为文殊示现之地华严经疏云清凉山者即代州鴈门五台山也岁积坚冰夏仍飞雪曾无炎暑故曰清凉五峰耸出顶无林木有如垒土之台故曰五台释迦方志按索河世界一大劫中千佛出世寻夫劫波之号不可以时数推之假以方石芥城推为一期之候中舍四大中劫谓成住坏空也如从十岁增至八万复从八万至于十岁经二十反为一小劫二十小劫为一成劫以年算之则经八千万万亿百千八百万岁也止为一小劫耳隋书每佛灭度遗法相传有正象末三等淳漓之异年岁远近亦各不同末法已後衆生愚钝无复佛教而业行转恶年寿渐短经数千百载间乃至朝生夕死然後有大水大火大风之灾一切除去之而更立生人又归淳朴谓之小劫每一小劫则一佛出世法华经大通智胜佛破魔军已垂得阿耨多罗三藐三菩提而诸佛法不现在前如是一小劫乃至十小劫结跏趺坐身心不动偈曰世尊甚希有一坐十小劫身体及手足静然安不动涅槃经观一切法本性皆空僧肇维摩诘经注二乘观空惟在无我大乘观空无法不在】

其二

客来花雨际秋水落金池片石寒青锦疎杨挂绿丝高僧拂玉柄童子献双梨惜去爱佳景烟萝欲暝时【法华经是时天雨曼陀罗花摩诃曼陀罗花曼殊沙花摩诃曼殊沙花而散佛上及诸大衆弥陀经七宝池底纯以金沙布地梁元帝诗飘花拂叶度金池玉柄谓麈尾】

金陵凤凰台置酒【法苑珠林白塔寺在秣陵三井里晋升平中有凤凰集此地因名其处为

鳳凰台六朝事迹鳳凰山宋元嘉中鳳凰集於是山乃筑台於山椒以旌嘉瑞在府城西南二里今保寧寺是也方輿勝覽鳳凰山在建康府城南二里余保寧寺是也鳳凰台故基在寺後】

置酒延落景金陵鳳凰台長波寫萬古心與云俱開借問往昔時鳳凰為誰來鳳凰去已久正當今日回明君越義軒天老坐三台豪士無所用彈弦醉金壘東風吹山【蕭本作出】花安可不盡杯六帝沒幽草深宮冥綠苔置酒勿復道歌鐘但相催【江淹詩徘徊踐落景義軒伏義軒轅也韓詩外傳黃帝即位施惠承天一道修德惟仁是行宇內和平未見鳳凰惟思其象夙寐晨興乃召天老而問之曰鳳象何如天老對曰夫鳳象鴻前麟後蛇頸而魚尾龍文而龜身燕頤而雞喙戴德負仁抱忠挾義小音金大音鼓延頸奮翼五彩備明舉動八風氣應時□食有質飲有儀往即文始來即嘉成惟鳳凰能通天祉應地靈律五音覽九德天下有道得鳳象之一則鳳過之得鳳象之二則鳳翔之得鳳象之三則鳳集之得鳳象之四則鳳春秋下之得鳳象之五則鳳沒身居之黃帝曰於戲允哉朕何敢與焉於是黃帝乃服黃衣戴黃冕致齋於宮鳳乃蔽日而至黃帝降於東階西面再拜稽首曰皇天降祉不敢不承命鳳乃止帝東園集帝梧桐食帝竹實沒身不去章懷太子後漢書注帝王世紀曰黃帝以風后配上台天老配中台五聖配下台謂之三公明君越義軒二句乃一章上下關鍵處上以承鳳凰今日當來之故下以起豪士無所用而置酒取樂之由金壘酒器詳七卷注六帝六代帝王也古詩棄捐勿復道國語歌鐘二肆韋昭注歌鐘歌時所奏】

秋浦清溪雪夜對酒客有唱鷓鴣者【秋浦縣名唐時隸池州清溪在其北詳八卷注樂府詩集山鷓鴣羽調曲也】

披君【一作我】貂襜褕對君白玉壺雪花酒上滅頓覺夜寒無客有桂陽至能吟山鷓鴣清風動窗竹越鳥起相呼持此足為樂何煩笙與竽【張衡詩美人贈我貂襜褕顏師古急就篇注襜褕直裾禪衣也謂之褕者取其襜褕而寬裕也桂陽者唐時郡名即郴州也隸江南西道越鳥即鷓鴣也以越地最多故謂之越鳥 襜音近占褕音史】

與周剛清【繆本作青】溪玉鏡潭宴別【原注潭在秋浦桃胡陂下予新名此潭桃胡陂繆本作桃樹陂周必大泛舟游山錄清溪水正碧色下淺潭數里至玉鏡潭水自南來觸岸西折彎環可喜潭深裁二三丈李白詩云溪水正南奔回作玉鏡潭實錄也江南通志玉鏡潭在池州府城西南七十里過白面渡匯為秋浦李白詩回作玉鏡潭澄明洗心魂即此宋陳應直刻玉鏡潭三大字於石上潛确居類書玉鏡潭上有桃胡陂一名桃花陂】

康樂上官去永嘉游石門江亭有孤嶼千載迹猶存我來游【繆本作憩】秋浦三入桃陂源千峰照【一作點】積雪萬壑盡啼猿興與謝公合文因周子論掃崖去落葉席月開清樽溪當大樓南溪水正南奔回作玉鏡潭澄明洗心魂此中得佳境可以絕囂喧清夜方歸來酣【一作蓮】歌出平原別後經此地為予謝蘭荪【南史謝靈運襲封康樂公出為永嘉太守一統志石門山在溫州府城北薛方山浙江通志溫州府北山說者謂為郡主山有石崖懸瀑高百余丈瀦為二潭名曰水際又曰石門山太平寰宇記孤嶼在溫州城北四里永嘉江中渚長

三百丈阔七十步屿有二峰谢康乐有登石门最高顶诗又有登江中孤屿诗陶隐居解官表席月涧门横梁云际江南通志大楼山在池州府城南六十里韵会荪香草陶隐居云荪生溪侧有名溪荪者极似石菖蒲而叶无脊】

游秋浦白筇陂二首【江南通志白筇堰在池州府城西南二十五里李白诗何处夜行好月明白筇陂即其地也 筇音哥又音杲又音秆】

何处夜行好月明白筇陂山光摇积雪猿影挂寒枝但恐佳景晚小令归棹移人来有清兴及此有相思【萧士贇曰末句有字依孟子音又去声一本竟改作又字非也】

其二

白筇夜长啸爽然溪谷寒鱼龙动陂水处处生波澜天借一明月飞来碧云端故乡不可见肠断正西看

宴陶家亭子

曲巷幽人宅高门大士家池开照胆镜林吐破颜花绿水藏春日青轩秘晚霞若闻弦管妙金谷不能夸【照胆镜用西京杂记咸阳方镜事详四卷注借言池水之清照人若镜也五灯会元世尊在灵山会上拈花示众是时众皆默然唯迦叶尊者破颜微笑石崇金谷诗叙予以元康六年从太璞卿出为使持节监青徐诸军事征虏将军有别庐在河南县界金谷涧中或高或下有清泉茂林众果竹柏药草之属莫不毕备又有水碓鱼池土窟其为娱目欢心之物备矣时征西大将军祭酒王诩当还长安余与众贤共送往涧中昼夜游宴屡迁其坐或登高临下或列坐水滨时琴瑟笙筑合载车中道路并作及住令与鼓吹通奏遂各赋诗以叙中怀或不能者罚酒三斗感性命之不永惧凋落之无期故具列时人官号姓名年纪又写诗着後後之好事者其覽之哉太平寰宇记郭缘生述征记曰金谷谷也地有金水自太白原南流经此谷晋卫尉石崇因即川阜而造制园馆】在水军宴韦司马楼船观妓【缪本下有永王军中四小字】

摇曳帆在空清流【一作川】顺归风诗因鼓吹发酒为剑歌雄对舞青楼妓双鬟白玉童行云且莫去留醉楚王宫【鲍照诗摇曳高帆举艺文类聚俗语曰桓玄作诗思不来辄作鼓吹既而思得云鸣鹄响长阜叹曰鼓吹固自来人思】

流夜郎至江夏陪长史叔及薛明府宴兴德寺南阁

绀殿横江上青山落镜中岸回沙不尽日映水成空天乐流【一作闻】香阁莲舟扬晚风恭陪竹林宴留醉与陶公【徐陵孝义寺碑绀殿安坐莲花养神说文绀深青扬赤色也华严经百万天乐各奏百万种法相续不断宋之问诗香阁临清汉丹梯隐翠微沈君攸诗平川映晓霞莲舟泛浪华莲舟采莲舟也扬者随风摇荡之义晋书阮咸任達不拘与叔父籍为竹林之

游陶公谓陶潜以喻薛明府 扬音恙】

泛沔州城南郎官湖【并序

唐时沔州隶江南西道又谓之汉阳郡有汉阳汉川二县湖广通志郎官湖在汉阳府城内】

乾元岁秋八月白迁於夜郎遇故人尚书郎张谓出使夏口沔州牧杜公汉阳宰王公觞於江城之南湖乐天下之再平也方夜水月如练清光可掇张公殊有胜槩四望超然乃顾白曰此湖古来贤豪游者非一而枉践佳景寂寥无闻夫子可为我标之嘉名以传不朽白因举酒酌水号之曰郎官湖亦由郑圃之有仆射陂也席上文士辅翼岑静以为知言乃命赋诗纪事刻石湖侧将与大别山共相磨灭焉【唐诗纪事张谓登天宝二年进士第奉使长沙作长沙风土记大历间为礼部侍郎唐诗品彙张谓字正言河南人旧唐书鄂州江夏县本汉沙羡县地属江夏郡江汉二水会於州西春秋谓之夏汭晋宋谓之夏口宋置江夏郡治於此隋不改武德四年改为鄂州一统志唐史皆称鄂州为夏口梁元帝诗昆明夜月光如练上林朝花色如霰毛萸诗传掇拾也广韵酌以酒沃地也元和郡县志李氏陂在郑州管城县东四里後魏孝文帝以此陂赐仆射李冲故俗呼为仆射陂周回十八里又云鲁山一名大别山在沔州汉阳县东北一百步其山前枕蜀江北带汉水湖广通志大别山在汉阳府城东北半里汉江西岸禹贡内方至於大别即此一名翼际山又名鲁山山之陰有锁穴即孙皓以铁索截江处酌音类】

张公多逸兴共泛沔城隅当时秋月好不減武昌都四坐醉清光为欢古来无郎官爱此水因号郎官湖风流若未減名与此山俱【武昌孙权尝建都於此故曰武昌都秋月似用庾亮南楼谈咏竟坐事详见二十二卷武昌夜饮怀古诗注晋书羊佑传公德冠四海道嗣前哲令闻令望必与此山俱传末句借用其语】

陪侍郎叔游洞庭醉後三首【元和郡县志洞庭湖在岳州巴陵县西南一里五十步周回三百六十里】

今日竹林宴我家贤侍郎三杯容小阮醉後发清狂【袁宏竹林名士传阮咸字仲容籍之兄子也与籍俱为竹林之游汉书昌邑王传清狂不惠苏林曰凡狂者阴阳脉尽浊今此人不狂似狂者故言清狂也或曰色理清徐而心不慧曰清狂清狂如今白痴也琦按诗人所称多以纵情诗酒之类为清狂与汉书所解殊异】

其二

船上齐桡乐湖心泛月归白鸥闲不去争拂酒筵飞【广韵桡楫也桡音饶】

其三

剗却君山好平铺湘水流巴陵无限酒醉杀洞庭秋【广雅剗削也北梦琐言湘江北流至岳

阳达蜀江夏潦後蜀涨势高遏住湘波让而退溢为洞庭湖凡阔数百里而君山宛在水中秋水归壑此山复居於陆岳阳风土记君山在洞庭湖中昔人有诗云四顾疑无地中流忽有山正此谓也夏秋水涨皆巨浸不可以陆行往杨齐贤曰君山在洞庭东距巴陵四十里登岳阳楼望之横陈其前君山之後乃大湖渺茫无际直抵沅澧鼎三州通典岳州巴陵县汉下隲县地古巴丘也有君山洞庭湖剡音产】

夜泛洞庭寻裴侍御清酌

日晚湘水绿孤舟无端倪明湖涨秋月独泛巴陵西遇憩裴逸人岩居陵丹梯抱琴出深竹为我弹鷗鸡曲尽酒亦倾北窗醉如泥人生且行乐何必组与珪【文献通考巴陵县有湘水有洞庭湖潜确居类书湘江在长沙府城西水至清彻谢灵运诗溟涨无端倪李周翰注端倪犹崖际也谢朓诗即此陵丹梯李善注丹梯谓山也吕延济注丹梯谓山高峰入云霞处嵇康琴赋鷗鸡游弦李善注古相和歌有鷗鸡曲李周翰曰琴有鷗鸡鸿鴈之曲後汉时人语一日不斋醉如泥汉书人生行乐耳须富贵何时】

陪族叔邢部侍郎煜及中书贾舍人至游洞庭五首【旧唐书乾元二年凤翔七马坊押官为盗劫掠平人天兴令谢夷甫擒杀之其妻进状诉冤诏监察御史孙莹推之莹直其事其妻又诉诏令御史中丞崔伯阳刑部侍郎李煜大理卿权献为三司讯之与莹同妻论诉不已侍御史毛若虚言伯阳等有情不能质定刑狱伯阳贬端州高要尉权献贬郴州桂阳尉煜贬岭下一尉贾至见十一卷注】

洞庭西望楚江分水尽南天不见云日落长沙秋色远不知何处吊湘君【杨齐贤曰岷江自西来至岳杨楼前与洞庭之水合而东行潭州长沙郡在洞庭上流三百余里史记秦始皇问博士曰湘君何神博士曰闻之尧女舜之妻列女传二妃死于江湘之间俗谓之湘君】

其二

南湖秋水夜无烟耐可乘流直上天且就洞庭赊月色将船买酒白云边【耐可犹言若可也详八卷注】

其三

洛阳才子谪湘川元礼同舟月下仙记得长安还欲笑不知何处是西天【潘岳西征赋贾生洛阳之才子谓贾谊也贾至亦何南洛阳人故以谊比之後汉李膺字元礼与郭林宗同舟而济见十二卷注用此以拟李煜二人俱谪官故用桓谭新论中人闻长安乐出门向西笑之语以致其思望之情】

其四

洞庭湖西秋月辉潇湘江北早鸿飞醉客满船歌白苧不知霜露入秋衣【卢照邻诗霜氛落早鸿白苧清商调曲也苧是吴地所产故旧说以为吴人之歌始则田野之作後乃大乐用焉一云即子夜歌也在吴歌为白苧在雅歌为子夜余见四卷注】

其五

帝子潇湘去不还空余秋草洞庭间淡扫明湖开玉镜丹青画出是君山【楚辞帝子降兮北渚王逸注帝子谓尧女也尧二女娥皇女英随舜不反墮於湘水之渚因为湘夫人元和郡县志君山在岳州巴陵县西三十里青草湖中昔秦始皇欲入湖观衡山遇风浪至此山止泊因号焉或云湘君所游止故名之也方輿胜覽君山在洞庭湖中方六十里亦名洞庭之山昔帝之二女居之曰湘夫人又曰湘君所游故名君山一统志君山在岳州府城西南十五里洞庭湖中状如十二螺髻】

楚江黄龙矶南宴杨执戟治楼

五月分【霏玉本作入】五洲碧山对青楼故人杨执戟春赏楚江流一见醉【霏玉本作波】漂月三杯歌棹讴桂枝攀不尽他日更相求【水经注江中有五洲相接故以五洲为名宋孝武帝举兵江中建牙洲上有紫云?之即是洲也胡三省通监注五洲当在今黄州江州之间蜀都赋吹洞箫发梓讴刘渊林注棹讴鼓棹而歌也淮南王招隐士攀援桂枝兮聊淹留】

铜官山醉後絕句【陆游入蜀记隔荻港即铜陵界远山崭然临大江者即铜官山海録碎事铜官山在宣州】

我爱铜官乐千年未拟还要须回舞袖拂尽五松山【海録碎事五松山在宣城南陵】

与南陵常赞府游五松山【原注山在南陵铜井西五里有古精舍南陵县隶宣州容斋随笔唐人呼县丞为赞府潜确居类书輿地纪胜五松山在铜陵县南铜官西南山旧有松一本五枝苍鳞老干翠色参天】

安石泛溟渤独啸长风还逸韵动海上高情出人间灵异可并迹澹然与世闲我来五松下置酒穷跻攀徵古絶遗老因名五松山五松何清幽胜境美沃洲萧飒鸣涧壑终年风雨秋响入百泉去听如三峡流剪竹扫天花且从傲吏游龙堂若可憩吾欲归精修【世说谢太傅盘桓东山时与孙兴公诸人泛海戏风起浪涌孙王诸人色并遽便唱使还太傅神情方王吟啸不言舟人以公貌闲意悦犹去不止既风转急浪猛诸人皆喧动不坐公徐云如此将无归舟人即承响而回於是审其量足以镇安朝野溟渤海也见七卷注胡震亨曰观此诗是五松非山本名乃太白所名亦如名九华也太平寰宇记沃洲山在越州剡县东七十二里施宿会稽志沃洲山在新昌县东三十二里晋白道猷法深支遁皆居之戴许王谢十八人与之游号为胜会亦白莲社之比也唐白乐天山院记云东南山水剡为面沃洲天姥为眉目山有灵湫杖锡泉养马坡放鹤峰皆因支道林得名吴虎臣漫録云沃州天姥号山水奇絶处自异僧白道猷

来自西天竺赋诗云连峰数十里修林带平津茅茨隐不见鸡鸣知有人晋宋之世隐逸为多诗大雅逝彼百泉通监地理通释三峡广溪峡巫峡西陵峡也广溪为三峡之首昔禹凿以通江所谓巴东之峡东至西陵七百里萧飒风雨百泉三峡皆状五松涛声之美法华经时诸梵天王雨衆天花香风时来吹去萎者更雨新者郭璞诗漆园有傲吏江南通志龙堂精舍在南陵县五松山李白与南陵常赞府游此有诗沃音屋】

宣城清【萧本作青】溪【一作入清溪山琦按清溪在池州秋浦县北五里而此云宣城清溪者盖代宗永泰元年始析宣州之秋浦青阳及饶州之至德为池州其前固隶宣城郡耳】

清【萧本作青】溪胜桐庐水木有佳色山貌日高古石容天倾侧彩鸟昔未名白猿初相识不见同怀人对之空叹息【太平□宇记睦州桐庐县汉为富春县地吴黄武四年分富春置此县耆老相传云桐溪侧有大桐树垂条偃盖?数亩远望似庐遂谓为桐庐县也吴均与朱元思书自富阳至桐庐一百里许奇山异水天下独絶】与谢良辅游泾川陵岩寺【唐诗纪事谢良辅登天宝十一年进士第德宗时刺商州为团练所杀江南通志泾溪在宁国府泾县西南一里岩陵教寺在泾县西七十五里隋时建泾川即泾溪也】

乘君素舸泛泾西宛似云门对若溪且从康乐寻山水何必东游入会稽【谢灵运诗可怜谁家郎缘流乘素舸方輿胜覧云门寺在会稽县南三十一里今名雍熙为州之伟观昔王子敬居此有五色祥云诏建寺号云门杨齐贤曰若耶溪云门寺在越州会稽县南宋书谢灵运出为永嘉太守郡有各山水灵运素所爱好出守既不得志遂肆志游遨徧历诸县动踰旬朔民间辞讼不复关怀所至辄为诗咏以寄其意舸音哿泾音京】

游水西简郑明府

天宫水西寺云锦照东郭清湍鸣回溪緑竹【萧本作水】遶飞阁凉风日潇洒幽客时憩泊五月思貂裘谓言秋霜落石萝引古蔓岸笋开新箨吟翫空复情相思尔佳作郑公诗人秀逸韵宏寥廓何当一来游惬我雪山诺【按江南通志有水西寺水西首寺天宫水西寺皆在泾县西五里之水西山中天宫水西寺者本名陵岩寺南齐永平元年淳于棼舍宅建上元初改天宫水西寺大中时重建宋太平兴国间赐名崇庆寺凡十四院其最胜者曰华严院横跨两山廊庑皆阁道泉流其下东京赋飞阁神行薛综注阁道相通不在于地故曰飞韵会箚笋皮也顔师古汉书注寥廓天上寛广之处广弘明集按文殊师利般涅盘经云佛灭度後四百年文殊至雪山中为五百仙人宣说十二部经讫还归本土入于涅盘案地理志西域传云雪山者即葱岭也其下三十六国先来属秦汉以葱岭多雪故号雪山焉文殊往化仙人即其处也】

九日登山【玩诗义当是偕一宗室为宣城别驾者於九日登其所新筑之台而作诗题应有缺文】

渊明归去来不与世相逐为无杯中物遂偶本州牧因招白衣人笑酌黄花菊我来不得意虚

过重阳时题舆何俊发遂结城南期筑土接【萧本作按】响山俯临宛【萧本作远】水湄胡人叫玉笛越女弹霜丝自作【当是非字之讹】英王胄斯乐不可窥赤鲤涌琴高白龟道水【许本作冯】夷灵仙如彷彿奠酌遥相知古来登高人今复几人在沧洲违宿诺明日犹可待连山似惊波合沓出溟海扬袂挥四座酩酊安所知齐歌送清觞【萧本作扬】起舞乱参差宾随落叶散帽逐秋风吹别後登此台愿言长相思【晋书陶潜为彭泽令郡遣督邮至县吏白应束带见之潜叹曰吾不能为五斗米折腰拳拳事乡里小人即解印去县乃赋归去来刺史王弘以元熙中临州甚钦迟之後自造焉潜称疾不见既而语人曰我性不狎世因疾守闲幸非洁志慕声岂敢以王公纡轸为荣耶弘每令人候之密知当往庐山乃遣其故人龐通之等齎酒先於半道要之潜既遇酒便饮酌野亭欣然忘进弘乃出与相闻遂欢宴穷日弘後欲见辄於林泽间候之至於酒米乏絕亦时相贍陶渊明诗天运苟如此且进杯中物艺文类聚续晋阳秋曰陶潜尝九月九日无酒出宅边菊丛中摘菊盈把坐其侧久之望见白衣人至乃王弘送酒也即便就酌醉而後归梦梁錄九为阳数其日与月并应故号曰重阳北唐书钞谢承後汉书曰同景为豫州刺史辟陈蕃为别驾不就景题别驾舆曰陈仲举座也不复更辟蕃惶惧起视职方輿胜覽响山在宣城县南五里一统志响山在寧国府城南五里下俯宛溪权德輿记响山两崖耸峙苍翠对起其南得响潭焉清泚可鑒滌洄澄淡霜丝乐器上弦也韵会胄裔也系也嗣也列仙传琴高者赵人也以鼓琴为宋康王舍人行涓彭之术浮游冀州涿郡之间二百余年後辞入涿水中取龙子与弟子期日皆洁斋待於水旁设祠果乘赤鲤来出坐祠中旦有万人观之留一月余复入水去山海经从极之渊深三百仞维氷夷恒都焉氷夷人面乘两龙郭璞注氷夷冯夷也淮南云冯夷得道以潜大川即河伯也穆天子传所谓河伯无夷者竹书作冯夷字或作冰也河图括地象冯夷恒乘龙车驾两龙白龟事未详楚辞河伯云乘白鼃兮逐文鱼与汝游兮河之渚白龟殆白鼃之讹欤广韵酌以酒沃地也木华海赋波如连山太白本其语而倒用之谓连山似惊波遂成奇语谢朓诗合沓与云齐吕向注合沓高貌说文酩酊醉也卢照邻诗客散同秋叶人亡似夜川晋书孟嘉为征西桓温参军温甚重之九月九日温燕龙山僚佐毕集时佐吏并着戎服有风至吹嘉?墮落嘉不之觉温使左右勿言以观其举止嘉良久如厕温令取还之命孙盛作文嘲嘉着嘉坐处嘉还见即荅之其文甚美四坐嗟叹】

九日

今日云景好水綠秋山明携壶酌流霞攀菊泛寒荣地远松石古风扬弦管清窺觴照欢顏独笑还自倾落帽醉山月空歌怀友生【流霞酒名按抱朴子项曼都言仙人以流霞一杯与我饮之辄不饥渴今故拟之以为名耳楚辞章句攀手取也寒荣犹寒花也陶渊明诗一觴虽独进杯尽壶自倾】

九日龙山饮【九域志太平州有龙山晋大司馬桓温尝於九月九日登此山孟嘉为风飘帽落即此山也太平府志龙山在当涂县南十里蜿蜒如龙蟠溪而卧故名旧志载桓温以重九日与僚佐登山孟嘉落帽事或云孟嘉落帽之龙山当在江陵而元和志寰宇记皆云是此山疑必温移镇姑孰时事也】

九日龙山饮黄花笑逐臣醉看风帽落舞爱月留人【淮南子季秋之月菊有黄花高诱注菊色不一而专言黄者秋令在金以黄为正也史正志菊谱菊草属也以黄为正所以盘称黄花】

九月十日卽事

昨日登高罢今朝更举觞菊花何太苦遭此两重阳【岁时杂记都城重九後一日宴赏号小重阳菊以两遇宴饮两遭采掇故有太苦之言】

陪族叔当涂宰游化城寺升公清风亭【太平府志古化城寺在府城内向化桥西礼贤坊吴大帝时建基趾最广宋孝武南巡驻蹕於此增置二十八院唐天宝间寺僧清升能诗文造舍利塔大戒坛建清风亭於寺旁西湖上铸铜钟一李白铭之今尽废宋知州郭纬以东城雄武之地改迁化城寺撤其西北之地为城守而存其余为西庵凡西庵至西北两城隅皆古化城寺基也】

化城若化出金榜天宫开疑是海上云飞空结楼台升公湖上【一作山一作中】秀粲然有辩才济人不利已立俗无嫌猜了【萧本作子误】见水中月青莲出尘埃闲居清风亭左右清风来当暑陰广殿太阳为徘徊茗酌待幽客珍盘荐雕梅飞文何洒落万象为之摧季父拥鸣琴德声布云雷虽游道林室亦【一作不】举陶潜杯清乐动诸天长松自吟哀留欢若可尽劫石乃成灰【法华经导师以方便力於险道中过三百由旬化作一城是时疲极之衆心大欢喜我等今者免斯恶道前入化城生安稳想寺之立名盖取此义神异经中央有宫以金为墙有金榜以金镂题三齐界记海上蜃气时结楼台名海市维摩诘经维摩诘深达实相善说法要辩才无滞智慧无礙又云菩萨观衆生如智者见水中月昭明丈选序飞文染翰则卷盈乎绡帙说苑宓子贱治单父弹鸣琴身不下堂而单父治法苑珠林支遁字道林本姓关氏陈留人或云河东林虑人幼而神理聪明秀彻王羲之覩遁才藻惊絶罕俦遂披衿解带留连不能已乃请住灵嘉寺意存相近又投迹剡山於沃洲小岭立寺行道僧衆百余尝随稟学晋书陶潜为彭泽令在县公田悉令种秫谷曰令吾常醉於酒足矣清乐前代新声也见本卷注诸天释氏所称三十二天也见十九卷注王积荅冯子华书松柏羣吟搜神记汉武帝凿昆明池甚深悉是灰墨无复土举朝不解以问东方朔朔曰臣愚不足以知之可试问西域人帝以朔不知难以移问至後汉明帝时西域道人来洛阳时有忆方朔言者乃试以武帝时灰墨问之道人云经云天地大劫将尽则劫烧此劫烧之余也】

李太白集注卷二十

卷二十一

钦定四库全书

李太白集注卷二十一

钱塘 王琦 撰

古近体诗共三十六首

登锦城散花楼【太平寰宇记锦城华阳国志云成都万里桥南岸道西有城故锦官也命曰锦里杨齐贤曰成都记府城亦呼为锦官城以江山明丽错杂如锦也散花楼在摩诃池上蜀王秀所建春明退朝录成都府有散花楼】

日照锦城头朝光散花楼金窗夹绣户珠箔悬银【缪本作琼】钩飞梯绿云中极目散我忧【一作愁】暮雨向三峡春江绕双流今来一登望如上九天游【梁简文帝诗网户珠缀曲琼钩太平寰宇记三峡谓西峡巫峡归峡俗云巴东三峡巫峡长清猿三声泪沾裳即禹所疏以导江也絶峻万仞瞥见阳光不分云雨左思蜀都赋带二江之双流刘渊林注蜀守李冰凿离堆穿两江为人开田百姓享其利水经注成都县有二江双流郡下故扬子云蜀都赋曰两江珥其前者是也风俗通曰秦昭王使李冰为蜀守开成都两江溉田万顷元和郡县志成成都府双流县北至府四十里本汉广都县也隋仁寿元年避炀帝讳改为双流因县在二江之间仍取蜀都赋云带二江之双流为名也皇朝因之】

登峨眉山【四川通志峨眉山去嘉州峨眉县百里自白水寺登山初二十里有石磴可陟又二十里多无路以木为梯行三二里方踏实地又二十里有雷洞始到光相寺则峨眉絶顶也其上树木禽鸟多与平地异天气尤不同九月初已下雪居者皆绵衣絮衾山上水煮饭不熟饭食皆从白水寺造上】

蜀国多仙山峨眉邈难匹周流试登览絶怪安可悉【萧本作息】青冥倚天开彩错疑画出冷然紫霞赏果得锦囊术云间吟琼箫石上弄宝瑟平生有微尚欢笑自此毕烟容如在顔尘累忽相失恍逢骑羊子携手凌白日【青冥青而暗昧之状楚辞据青冥而攄虹兮盖谓天为青冥也太白借用其字别指山峯而言与楚辞殊异江淹诗冷然空中赏李周翰注冷然轻举貌武帝内传帝以王母所授五真图灵光经及上元夫人所授六甲灵飞十二事自撰集为一卷及诸经图皆奉以黄金之箱封以白玉之函以珊瑚为轴紫锦为囊安着栢梁台上沈约诗象筵鸣宝瑟周礼乐器图雅瑟饰以宝玉者曰宝瑟顔延年诗嘉运既我从欣愿自此毕南史阮孝绪曰庶保促生以免尘累列仙传葛由者羌人也周成王时好刻木羊卖之一旦骑羊入西蜀蜀中王侯贵人追之上绥山山在峨眉山西南高无极也随之者不复还皆得仙道陈子昂诗携手登白日远游戏赤城】大庭库【太平寰宇记大庭氏库高二丈在曲阜县城内县东一百五十步路史大庭氏之膺籙也都於曲阜故鲁有大庭氏之库昔者黄帝斋於大庭氏

之馆兹其所矣罗苹注库在鲁城中曲阜之高处今在仙源县内东隅高二丈】

朝登大庭库云物何苍然莫辨陈郑火空霾邹鲁烟我来寻梓慎观化入寥天古木朔气多松风如五弦帝图终冥没叹息满山川【左传昭公十八年宋卫陈郑皆火梓慎登大庭氏之库以望之曰宋卫陈郑也数日皆来告火杜预注大庭氏古国名在鲁城内於其处作库高显故登以望气左传凡分至启闭必书云物杜预注云物气色灾变也庄子安排而去化乃入于寥天一郭象注入于寂寞而与天为一也宋之问诗笙歌入玄地诗酒坐寥天宋书帝图凝远瑞美昭宣】

登单父陶少府半月台【山东通志半月台在旧单县城东北隅相传陶沔所筑单县即唐时之单父县也隶宋州单父音善甫】

陶公有逸兴不与常人俱筑台像半月迴向【一作出】高城隅置酒望白云商【一作高】飚起寒梧秋山入远海桑柘罗平芜水色绿且明【一作清】令人思镜湖终当过江去爱此暂踟蹰【陆机诗岁暮商飚飞吕延济注商飚秋风也江淹去故乡赋穷阴匝海平芜带天平芜庶草丰茂遥望平坦若剪者也镜湖在会稽山阴两县界其水清澈澄明若镜故名详见六卷注】

天台晓望

天台隣四明华顶高百越门标赤城霞楼栖沧岛月凭高远登览直下见溟渤云垂大鹏翻波动巨鳌没风潮争汹涌神怪何翕忽观奇迹无倪好道心不歇攀条摘朱实服药链金骨安得生羽毛千春卧蓬阙【台州府志天台山在天台县北三里自神迹石起至华顶峰皆是为一邑诸山之总称按陶弘景真诰曰高一万八千丈周围八百里山有八重四面如一十道志谓其顶对三辰或曰当牛女之分上应台宿故曰天台登真隐诀曰处五县中央为余姚句章临海天台剡县也顾野王舆地志云天台山一名桐栢山衆岳之最秀者也徐灵府记云天台山与桐栢接而少异神邕山图又采浮屠氏说以为阎浮震旦国极东处又号灵越孙绰赋所谓托灵越以正基是也华顶峰在天台县东北六十里乃天台山第八重最高处可观日月之出没东望大海弥漫无际寧波府志四明山在府西南一百五十里为郡之镇山由天台发脉向东北行一百三十里涌为二百八十峯周围八百余里绵亘于寧之奉化慈谿鄞县绍之余姚上虞嵊县台之宁海诸境上有方石四面有穴如窗通日月星辰之光故曰四明山太平寰宇记赤城山在天台县北六里孙绰天台山赋赤城霞起以建标李善注支遁天台山铭序曰往天台山当由赤城为道迳孔灵符会稽记曰赤城山石色皆赤状似云霞天台山图曰赤城山天台之南门也建标立物以为表识也溟渤海也见七卷注大鹏巨鳌俱见一卷注刘琨诗朱实陨劲气王逸楚辞注人得道身生羽毛也梁简文帝诗千春谁輿乐王勃诗芝?光分野蓬阙感规模】

早望海霞边

四明三千里朝起赤城霞日出红光散分辉照雪崖一餐咽琼液五内发金沙举手何所待青龙白虎车【楚辞章句凌阳子明经言春食朝霞者日始出赤黄气真诰日者霞之实霞者日之精君惟闻服日之法未知餐霞之精也夫餐霞之经甚秘致霞之道甚易此谓体生玉光霞映上清之法也南岳魏夫人传有冉酖琼液而叩棺参同契金砂入五内雾散若风雨太平广记沈羲吴都人学道於蜀中能消灾除病救济百姓功德感天天神识之羲与妻贾共载诣子妇卓孔寧家道逢白鹿车一乘青龙车一乘白虎车一乘从者皆数十人骑皆朱衣仗矛带剑辉耀满道问羲曰君是沈羲否羲愕然不知何等答曰是也何为问之骑人曰羲有功于民心不忘道自少小以来履行无过受命不长年壽将过黄老今遣仙官来下迎之侍郎薄延之乘白鹿车是也度世君司马生青龙车是也送迎使者徐福白虎车是也须臾有三仙人羽衣持节以白玉简青玉册丹玉字授羲遂载羲升天】

焦山【繆本下多一杳字】望松寥山【一统志焦山在镇江府城东北九里江中後汉焦先隐此因名旁有海门二山王西樵曰海门山一名松寥夷山即孟浩然诗所云夷山对海滨者也鲍天鍾丹徒县志焦山之余支东出分峙于鲸波弥淼中曰海门山唐诗称松寥称夷山即此】

石壁望松寥宛然在碧霄安得五彩虹架天作长桥仙人如爱我举手来相招

杜陵絶句【胡三省通监注杜陵在长安南五十里】

南登杜陵上北望五陵间秋水明落日流光灭远山【西都赋南望杜霸北眺五陵章怀太子注杜霸谓杜陵霸陵在城南故南望也五陵谓长陵安陵阳陵茂陵平陵在渭北故北眺也】

登太白峯【一统志太白山在陕西武功县南九十里山极高上恒积雪望之皓然谚云武功太白去天三百山下军行不得鸣鼓角鸣则疾风暴雨立至上有洞即道书第十一洞天又有太白神祠山半有横云如瀑布则澍雨人常以为候验语曰南山瀑布非朝即暮】

西上太白峯夕阳穷登攀太白与我语为我开天关愿乘冷风去直出浮云间举手可近月前行若无山一别武功去何时复更【萧本作见】还【尔雅山西曰夕阳山东曰朝阳邢昺疏日即阳也夕始得阳故名夕阳诗大雅公刘云度其夕阳幽居允荒是也庄子列子御风而行冷然善也郭象注冷然轻妙之貌冷音零】

登邯郸洪波台置酒观发兵【原注时将游蓟门元和郡县志洪波台在磁州邯郸县西北五里邯音寒】

我把两赤羽来游燕赵间天狼正可射感激无时闲观兵洪波台倚剑望玉关请缨不系越且向燕然山风引龙虎旗歌钟昔【一作忆】追攀击筑落高月投壶破愁顔遥知百战胜定扫鬼方还【赤羽谓箭之羽染以赤者国语所谓赤羽之矰是也又六韬注飞鳧赤茎白羽以铁为首电影青茎赤羽以铜为首皆矢名楚辞举长矢兮射天狼王逸注天狼星名江淹诗倚剑

临八荒括地志玉门关在沙州壽昌县西北一百十八里终军自请愿受长缨必羈南越王而致之阙下详十五卷注後汉纪永元二年窦宪耿秉自朔方出塞三千里斩首大获铭燕然山而还国语歌钟二肆韦昭注歌钟歌时所奏顏师古急就篇注筑形如小瑟而细颈以竹击之通典筑不知谁所造史籍惟云高渐离善击筑汉高帝过沛所击释名曰筑以竹鼓之也似箏细项按今制身長四尺三寸项長三寸围四寸五分头七寸五分上濶七寸五分下濶六寸五分後汉书祭遵为将军对酒设乐必雅歌投壶周易高宗伐鬼方三年克之汉书外伐鬼方以安诸夏顏师古注鬼方絕远之地一曰国名晋书夏曰薰鬻殷曰鬼方周曰玁狁汉曰匈奴】

登新平楼【新平郡名即邠州也隶关内道】

去国登兹楼怀归伤暮秋天长落日远水净寒波流秦云起岭树胡鴈飞沙洲苍苍几万里目极令人愁【王粲登楼赋登兹楼以四望兮聊暇日以销忧楚辞目极千里兮伤春心】

谒老君庙

先君怀圣德灵庙肃神心草合人踪断尘浓鸟迹深流沙丹竈灭关路紫烟沉独伤千载後空余松栢林【宋书灵庙荒残遗象陈昧列仙传关令尹喜与老子俱游流沙化胡服巨胜实莫知其所终太平御覽关令内传曰真人尹喜周大夫也为关令少好学善天文秘纬登楼四望见东极有紫气西迈喜曰应有异人过此乃斋戒扫道以俟之及老子度关喜先戒关吏曰若有翁乘青牛薄板车者勿聽过止以白之果至吏白愿少止喜带印绶设师事之道老子重辞之喜曰愿为我着书说大道之意得奉而行焉于是着道德经上下二卷 文苑英华以此诗为玄宗过老子庙诗而以先君为仙居丹竈灭为丹竈没三字不同琦玩草合一聯似非太平时天子巡幸景象此诗定是太白作耳】

秋日登扬州西灵塔【太平广记扬州西灵塔中国之尤峻特者唐武宗未拆寺之前一年天火焚塔俱尽白雨如泻旁有草堂一无所损】

宝塔凌苍苍登攀览四荒顶高元气合标出海云长万象分空界三天接画梁水摇金刹影日动火珠光鸟拂琼檐【萧本作帘】度霞连绣栱张目随征路断心逐去帆扬露浩梧楸白霜【繆本作风】催橘柚黄玉毫如可见于此照迷方【楚辞将往观乎四荒王逸注荒远也十洲记鍾山有金台玉阙亦元气之所合天帝居治处也孝经钩命决地以舒形万象咸载三天谓欲界天色界天无色界天也法华经起七宝塔长表金刹伽蓝记宝塔五重金刹高耸胡三省通监注刹柱也浮图上柱今谓之相轮旧唐书火珠大如鸡卵圆白皎洁光照数尺状如水精正午向日以艾蒸之即火燃张协七命翠观岑青雕阁霞连沈约明堂登歌雕梁绣栱丹楹玉墀楚辞白露既下百草兮掩离披此梧楸韵会梧桐色白叶如青铜有子肥美可食楸说文梓也通志曰梓与楸相似尔雅以为一物误矣陆玕谓楸之疏理白色而生子者为梓齐民要术谓白色有角为梓无子为楸皆不辨楸梓梓与楸自异生子不生角说文柚条也似橙而酢史记正义小曰橘大曰柚树有刺冬不凋叶青花白子黄赤二树相似非橙也法华经尔时佛放眉间白毫相光照东方万八千世界靡不周遍下至阿鼻地狱上至阿迦吒天鲍照佛影颂

玉毫遗觚 柚音右】

登金陵冶城西北谢安墩【太白自注此墩即晋太傅谢安与右军王羲之同登超然有高世之志余将营园其上故作是诗太平寰宇记冶城在今上元县西五里本吴铸冶之地因以为名元帝太兴初以王导久疾方士戴洋云君本命在申申地有冶金火相铄不利遂使范逊移冶于石城东髑髅山处以其地为园多植林馆徐广晋记成帝适司徒府游观冶城之园即此也六朝事迹谢安墩在南山报宁寺之后基址尚存谢安与王羲之尝登此超然有高世之志世说王右军与谢太傅登冶城谢悠然远想有高世之志王谓谢曰夏禹勤王手足胼胝文王旰食日不暇给今四郊多垒宜人人自效而虚谈废务浮文妨要恐非当今所宜谢荅曰秦任商鞅二世而亡岂清谈致患耶】

晋室昔横溃永嘉遂【萧本作逐】南奔沙尘何茫茫龙虎鬬朝昏胡马风汉草天骄蹙中原哲匠感颓运云鹏忽飞翻组练照楚国旌旗连海门西秦百万衆戈甲如云屯投鞭可填江一扫不足论【一作投策可填江一朝为我吞】皇运有返正丑虏无遗魂谈笑遏横流苍生望斯存冶城访古迹【一作至今古城隅一作至今冶城隅】犹有谢安墩凭览周地险高标絶人喧想像东山姿?怀右军言梧桐识嘉【缪本作佳】树蕙草留芳根白鹭映春洲青龙见朝暾地古云物在台倾禾黍繁我来酌清波於此树名园功成拂衣去归入【一作长啸】武陵源【南史中原横溃衣冠道尽按晋书怀帝永嘉五年刘曜王弥入洛阳帝开华林园门出河陰藕池欲幸长安为曜等所迫及曜等遂焚烧宫庙逼辱后妃百官士庶死者三万余人衣冠之族相率而奔避乱江左书费誓马牛其风孔穎達正义风放也牝牡相诱谓之风然则马牛风佚因牝牡相逐而遂至放佚远去也汉书胡者天之骄子也左传南国蹙韵会蹙迫也殷仲文诗哲匠感萧辰组练战服也见十一卷注陆机诗胡马如云屯晋书苻坚载记坚銳意荆扬将谋入寇引羣臣会议坚曰以吾之衆旅投鞭於江足断其流谢安传时苻坚强盛疆场多虞诸将败退相继安遣弟石兄子玄等应机征讨所在尅捷坚後率衆号百万次於淮淝京师震恐玄入问计安夷然无惧色荅曰已别有旨玄不敢复言乃令张玄重请安遂命驾出山墅亲朋毕集方与玄围碁赌别墅安常碁劣於玄是日玄惧便为敌手而又不胜安顾谓其甥羊昙曰以墅乞汝遂游涉至夜乃还指授将帅各当其任玄等既破坚有驿书至安方对客围碁看书既竟即摄放牀上了无喜色碁如故客问之徐荅曰小儿辈遂以破贼既罢还内过户限心喜甚不觉其屐齿之折其矫情镇物如此诗大雅仍执丑虏晋书索琳传永嘉荡覆海内横流世说谢公在东山朝命屡降而不动诸人每相与言安石不肯出将如苍生何顔延年诗水国周地险河山信重复谢灵运诗想像崑山姿?邈区中缘左传宴於季氏有嘉树焉宣子誉之太平寰宇记白鹭洲在江宁县西三里大江中多聚白鹭因名之杨齐贤曰白鹭洲在金陵城下秦淮之外一统志青龙山在应天府东南三十五里江南通志青龙山在江寧府上元县东三十里山产石甚良土人取为碑础通雅晓日为朝暾谢灵运诗晓见朝日暾李周翰注暾日初出貌武陵源陶渊明所记者见二卷注又述异记武陵源在吴中山无他木尽生桃李俗呼为桃李源源上有石洞洞中有乳水世传秦末丧乱吴中人于此避难食桃李实者皆得仙则又一武陵源也 暾音吞】

登瓦官阁【杨齐贤曰瓦官寺碑云江左之寺莫先於瓦官晋武时建以陶官故地故名瓦官

讹而为棺或云昔有僧诵经於此既死葬以虞氏之棺墓上生莲花故曰瓦棺中有瓦棺阁高二十五丈唐为昇元阁景定建康志古瓦官寺又为昇元寺在城西南隅晋哀帝兴宁二年诏移陶官於淮水北遂以南岸窑地施僧慧力造瓦官寺旧志曰瓦棺者非也据俗说云瓦棺寺之名起自西晋时长沙城隅陆地生青莲两朵民以闻官掘得一瓦棺见一僧形貌俨然其花从舌根生父老云昔有一僧不说姓名平生诵法华经百余部临死遗言以瓦棺葬之遂以寺名为瓦棺本此其说颇涉误诞纵有此事亦在长沙与此无与也不知陶官为瓦官而易官为棺殆附会而为之说耳方輿胜览昇元寺即瓦棺寺也在建康府城西隅前瞰江面後据重冈最为古迹李主时昇元阁犹在乃梁朝故物高二百四十尺李白诗所谓日月隐檐楹是也今西南隅戒坛乃是故基】

晨登瓦官阁极眺金陵城鍾山对北户淮水入南荣漫漫雨花落嘈嘈天乐鸣两廊振法鼓四角吟【一作吹】风筝查出霄汉上仰攀日月行山空霸气灭地古寒陰生寥廓云海晚苍茫宫观平门余闾阖字楼识凤凰名雷作百山动神扶万拱倾灵光何足贵长此镇吴京【一统志鍾山在应天府东北山周回六十里汉秣陵尉蒋子文逐盗死於此吴大帝立庙因改蒋山輿地志蒋山古曰金陵山一名北山其山磅礴奇秀比诸山特高杨齐贤曰淮水即秦淮源於句容溧水两山间自方山合流至建邺贯城中而西以达於江太平寰宇记昇州江寧县有淮水北去县一里源从宣州东南溧水县乌刹桥西流八百五十里輿地志云秦始皇巡会稽凿断山阜此淮即所凿也故名秦淮水孙盛晋春秋亦云是秦所凿王导令郭璞筮即此淮也又称未至方山有直渎行三十里许以地形论之淮水发源诘屈不类人工则始皇所掘宜此渎也丹阳记云建康有淮源出华山流入江徐爰释问云淮水西北贯都輿地志云淮水发源於华山在丹阳姑孰之界西北流径建康秣陵二县之间萦紆京邑之内至於石头入江绵亘三百许里上林赋曝於南荣郭璞曰荣南檐也应劭曰荣屋檐两头如翼也沈括笔谈荣屋翼也今谓之两徘徊又谓之两厦阿弥陀经彼佛国土常作天乐昼夜六时雨天曼陀罗花天乐者天人所作音乐清畅嘹唳微妙和雅一切音声所不能及雨花者诸天於空中散花供养若雨之从天而下故曰雨花埤苍嘈嘈声衆也法华经今佛世尊欲说大法雨大法雨吹大法螺击大法鼓孙绰天台赋法鼓琅以振响李周翰注法鼓钟也真西山曰风筝檐铃俗呼风马儿杨升庵曰古人殿阁檐棱间有风琴风筝皆因风动成音自谐宫商元微之诗鸟啄风筝碎珠玉高骈有夜聽风筝诗僧齐已有风琴引王半山有风琴诗此乃檐下铁马也今人名纸鸢曰风筝非也寥廓寬广貌景定建康志按宫苑记晋成帝修新宫南面开四门最西曰西掖门正中曰大司马门次东曰南掖门最东曰东掖门南掖门宋改闾阖门陈改端门江南通志按宫苑记凤凰楼在凤台山上宋元嘉中建甘泉赋抗浮柱之飞榱兮神莫莫而扶倾顏师古注言举立浮柱而驾飞榱其形危竦有神於冥冥之中扶持故不倾也鲁灵光殿赋神灵扶其棟宇历千载而弥坚後汉纪鲁?王好宫室起灵光殿甚壮丽鲁灵光殿赋序鲁灵光殿者盖景帝程姬之子?王余之所立也恭王始都下国好治宫室遂因鲁僖基兆而营焉吴京谓金陵之地见五卷注】

登梅冈望金陵赠族侄高座寺僧中孚【太平寰宇记梅岭冈在昇州江寧县南九里周迴六里輿地志云在国门之东晋豫章太守梅賾家於冈下故民名之景定建康志梅岭冈在城南九里长六里高二丈上有亭为士庶游春之所江南志聚宝山在江寧府城南聚宝门外其东

岭为雨花台山麓为梅冈晋豫章内史梅赜家於此旧多亭榭自六朝迄今为士人游览胜地高座寺在江寧府雨花台梅冈晋永嘉中建名甘露寺西竺僧尸黎密据高座说法世谓高座道人葬此故名或云晋法师竺道生所居】

鍾山抱金陵霸气昔腾发天【一作神】开帝王居海色照宫阙羣峰如逐鹿奔走相驰突江水九道来云端遥明没时迁大运去龙虎势休歇我来属天清登览穷楚越吾宗挺禅伯特秀鸾凤骨【一作吾宗道门秀特异鸾凤骨】衆星罗青天明【繆本作朗】者独有月冥居顺生理草木不翦伐烟窗引薔薇石壁老野蕨吴风谢安屐白足傲霜韞几宿一下山【一作下山来】萧然忘干谒谈经演金偈降鹤舞海雪时闻天香来了与世事絶佳游不可得春去【萧本作风】惜远别赋诗留岩屏千载庶不灭【江南通志鍾山在江宁府东北一曰金陵山一曰蒋山一名北山一名玄武山俗名紫金山周围六十里高一百五十丈诸葛亮对吴大帝云鍾山龙蟠指此曹植诗壮哉帝王居住丽殊百城书禹贡荆州九江孔殷孔安国注江於此州界分为九道琦按今之九江仅有其名九派之迹邈不可见盖川渚之形不能无变迁故也详见十四卷注但金陵去九江甚远即使唐时水脉未改然登梅岗而望九江亦岂目力之所能及诗人夸大之辞多过其实往往若此矣何晏景福殿赋乃大运之攸戾李周翰注大运天运龙虎势谓龙蟠虎踞之势金陵之地古为吴地其西为楚其南为越吴风谓吴人风俗晋书谢安傅玄等既破苻坚有驿书至安还内过户限心喜甚不觉其屐齿之折谢安屐是借用其事神僧传释昙始关中人出家以後多有异迹足白於面虽洗涉泥水未尝沾湿天下咸称白足和尚长安人王胡其叔死数年忽见形将胡遍游地狱示诸果报谓曰已知因果应当奉事白足何练胡遍访衆僧惟见始足白於面因而事之北史酈道约好以荣利干谒偈释氏韵辞也佛所说之偈谓之金偈华严经雨衆天花天香天末香】

登金陵凤凰台【江南通志凤凰台在江宁府城内之西南隅犹有陂陀尚可登览宋元嘉十六年有三鸟翔集山间文彩五色状如孔雀音声谐和衆鸟羣附时人谓之凤凰起台于山谓之凤凰台山曰凤台山里曰凤凰里珊瑚钩诗话金陵凤凰台在城之东南四顾江山下窥井邑古今题咏惟谪仙为絶唱】

凤凰台上凤凰游凤去台空江自流吴宫【一作时】花草埋幽径晋代【一作国】衣冠成古丘三山半落青天外【一作二】水中分白鹭洲总为【一作尽道】浮云能蔽日长安不见使人愁【吴宫谓孙权建都时所造宫室景定建康志三山在城西南五十七里周回四里高二十九丈輿地志云其山积石森鬱滨于大江三峯排列南北相连故号三山陆放翁入蜀记三山自石头及凤凰台望之杳杳有无中耳及过其下则距金陵才五十余里史正志二水亭记秦淮源出句客溧水两山自方山合流至建业贯城中而西以达於江有洲横截其间李太白所谓二水中分白鹭洲是也一统志白鹭洲在应天府西南江中陆子新语邪臣之蔽贤犹浮云之障日月也刘後村曰古人服善李白登黄鹤楼有眼前有景道不得崔颢题诗在上头之语至金陵乃作凤凰台诗以拟之今观二诗真敌手棋也瀛奎律髓太白此诗与崔颢黄鹤楼相似格律气势未易甲乙此诗以凤凰台为名不过起两句已尽之矣下六句乃登台而观望之景也三四怀古人之不见五六七八咏今日之景而慨帝都之不可见登台而望所感深矣田子艺曰人知李白凤凰台鹦鹉洲出於黄鹤楼不知崔颢又出於龙池篇沈诗五龙

二池四天崔诗三黄鹤二去二空二人二悠悠历历萋萋李诗三凤二凰二台又三鹦鹉二江三洲二青四篇机杼一轴天锦灿然各用叠字成章尤奇絕也赵宦光曰诗原引沈佺期龙池篇云龙池跃龙龙已飞龙德先天天不违池开天汉分黄道龙向天门入紫微邸第楼台多气色君王鳬雁有光辉为报寰中百川水来朝此地莫东归崔颢笃好之先拟其格作雁门胡人歌云高山代郡东接燕雁门胡人家近边解放胡鹰逐塞鸟能将代马猎秋田山头野火寒多烧雨里孤峯湿作烟闻道辽西无鬪战时时醉向酒家眠自分无以尚之别作黄鹤楼诗云昔人已乘黄鹤去此地空余黄鹤楼黄鹤一去不复返白云千载空悠悠晴川历历汉阳树芳草萋萋鹦鹉洲日暮乡関何处是烟波江上使人愁然後直出云?之上视龙池直俚谈耳李白压倒不敢措词别题鹦鹉洲云鹦鹉来过吴江水江上洲传鹦鹉名鹦鹉西飞陇山去芳洲之树何青青?开兰麝香风暖岸夹桃花锦浪生迁客此时徒极目长洲孤月向谁明而自分调不若也於心终不降又作凤凰台云凤凰台上凤凰游凤去台空江自流吴宫花草埋幽径晋代衣冠成古丘三山半落青天外二水中分白鹭洲总为浮云能蔽日长安不见使人愁然後可以雁行无媿矣按前後五篇并古风也而後人以龙池题作篇鴈门题作歌遂入之古体黄鹤鹦鹉凤凰入之近体非也弇州元瑞亦举崔颢雁门胡人歌沈佺期龙池篇谓当与黄鹤同调不当一置之律二置之古也按黄鹤诗调取之龙池格取之雁门李之拟崔鹦鹉取其格凤凰取其调徐栢山谓李白鹦鹉洲诗全效崔颢黄鹤凤凰非其正拟也予则以为论字句鹦鹉逼真论格调则鹦鹉卑弱略非凤凰黄鹤敌手当时太白既赋鹦鹉不慊而更转高调调故可以相颉颃而语稍粗矣二诗皆本之崔然鹦鹉不敢出也又曰黄鹤凤凰相敌在何处黄鹤第四句方成调凤凰第二句即成调不有後句二诗首唱皆浅穉语耳调当让崔格则逊李颢虽高出不免四句已尽後半首别是一律前半则古絕也邵氏闻见後録欧阳公每哦太白三山半落青天外二水中分白鹭洲之句曰杜子美不道也予谓约以子美律诗青天外正可以白鹭洲作偶】

望庐山瀑布二首【太平御览周景式庐山记曰白水在黄龙南数里即瀑布水也土人谓之白水湖其水出山腹挂流三四百丈飞湍於林峯之表望之若悬素注水处石悉成井其深不测也】

西登香炉峯南见【一作望】瀑布水挂流三百丈【一作千匹】喷壑数十里歛如飞电【一作练】来隐若白虹起初惊河汉【一作银河】落半洒云天【一作半泻金潭】里仰观势转雄壮哉造化功海风吹不断江【一作山】月照还空空中乱濺射左右洗青壁飞珠散轻霞流沫沸穹石而我乐【繆本作游】名山对之心益闲无论漱琼液且得洗尘顔且谐宿所好永愿辞人间【一作集谱宿所好永不归人间白居易庐山草堂记匡庐奇秀甲天下山山北峯曰香炉峯太平寰宇记香炉峯在庐山西北其峯尖圆?云聚散如博山香炉之状沈约诗掣曳沔流霞奔飞似白虹诗经集传濺水会也上林赋触穹石张揖注穹石大石也】

其二

日照香炉生紫烟遥看瀑布挂前【繆本作长】川飞流直下三千尺疑是银河落九【一作半】天【一本题云望庐山香炉峯瀑布曰庐山上与星斗连日照香炉生紫?下两句同韵

语阳秋徐凝瀑布诗有云千古犹疑白练飞一条界破青山色或谓乐天有赛不得之语独未见李白诗耳李白望庐山瀑布诗曰飞流直下三千尺疑是银河落九天故东坡云天遣银河一派垂古来惟有谪仙词飞流溅沫知多少不为徐凝洗恶诗以余观之银河一派犹涉比拟不若白前篇云海风吹不断江月照还空凿空道出为可喜也苕溪渔隐丛话太白望庐山瀑布絶句东坡美之有诗云帝遣银河一派垂古来惟有谪仙词然余谓太白前篇古诗云海风吹不断江月照还空磊落清壮语简而意尽优於絶句多矣】

望庐山五老峯【太平御覽浔阳记云庐山北有五老峯於庐山最为峻极横隐苍穹积石巉巖迴压彭蠡其形势如河中虞卿县前五老之形故名太平寰宇记五老峯在庐山东悬崖突出如五人相逐罗列之状方輿胜覽五老峯在庐山五峯相连故名浮屠老子宫皆在其下潜确居类书五老峯在庐山顶东南自府治北望森然如施帘幕者是也商丘漫语曰自下望之状如离立其上相距甚远不相聯属巉峭壁立数千仞轩轩然如人箕踞而窥重湖又如五云翩翩欲飞旧有李太白书堂江西通志五老峯在南康府城北三十里为庐山尽处石山骨立突兀凌霄如五人骈肩然悬岩峭壁难於登陟云雾卷舒乃郡之发脉山也李白尝筑居於此】

庐山东南五老峯青天削出金芙蓉九江秀色可揽结吾将此地巢云松【芙蓉莲花也山峯秀丽可以比之其色黄故曰金芙蓉也乐府子夜歌玉藕金芙蓉晋书安帝隆安中百姓忽作懊懣之歌其曲曰草生可揽结女儿可揽擷方輿胜覽图经李白性喜名山飘然有物外志以庐阜水石佳处遂往游焉卜筑五老峯下有书堂旧址後北归犹不忍去指庐山曰与君再会不敢寒盟丹崖绿壑神其鑒之杜甫诗匡山读书处头白好归来或以为绵之匡山】

江上望皖公山【唐书地理志舒州怀寧县有皖山太平御覽汉书地理志曰皖山在灊山与天柱峯相连其山三峯鼎峙叠嶂重峦拒云?日登陟无由山经曰皖山东面有激水冬夏悬流状如瀑布下有九泉井有一石牀可容百人其井莫知深浅若天时亢旱杀一犬投其中即降雷雨犬亦流出方輿胜覽皖山在安庆府淮宁县西十里皖伯始封之地江南通志皖山一名皖公山在安庆府潜山县与潜山天柱山相连三峯鼎峙为长淮之扞蔽空青积翠万仞如翔仰摩层霄俯瞰广野瑰奇秀丽不可名状上有天池峯峯上有试心桥天印石瓮岩状如瓮人不可到有石楼峯势若楼观皖音近缓】

奇峯出奇云秀木含秀气清宴皖公山巉絶称人意独游沧江上终日淡无味但爱兹岭高何由讨灵异默然遥相许欲往心莫遂待吾还丹成投迹归此地【扬雄校猎赋於是天清日晏顔师古注晏无云也陆游入蜀记北望正见皖山太白江上望皖公山诗巉絶称人意巉絶二字不刊之妙也老子道之出口淡乎其无味甄鸾笑道论神仙金液经云金液还丹太上所服而神今令烧水银还复为丹服之得仙白日升天求仙不得此道徒自苦耳】

望黄鹤山【萧本作楼误太平御覽江夏图经云黄鹤山在鄂州江夏县东九里其山断絶无连接旧传云昔有仙人控黄鹤於此山故以为名梁湘东王晋安寺?云黄鹤从天而夜响是也苕溪渔隐丛话鄂州城之东十里许其高耸而秀者是为黄鹤山一统志黄鹤山在武昌府城

西南一名黄鹤山世传仙人骑黄鹤过此因名】

东望黄鹤山雄雄半空出四面生白云中峯倚红日岩峦行穹跨峯嶂亦冥密颇闻列仙人于此学飞术一朝向蓬海千载空石室金竈生?埃玉潭秘清谧地古遗草木庭寒老芝术蹇余美攀跻因欲保闲逸观奇徧诸岳兹岭不可匹结心寄青松永悟客情毕【鲍照诗青冥摇烟树穹跨负天石陈子昂诗石林何冥密幽洞无留行清谧犹清静也江淹诗金竈炼神丹谢灵运昙隆法师诔茹芝术而共餌披法言而同卷楚辞蹇谁留兮中洲王注蹇辞也谓发语声说文跻登也 谧音密】

鹦鹉洲【胡三省通监注鹦鹉洲在江夏江中祢衡作鹦鹉赋於此洲因以为名洲之下即黄鹄矶陆游入蜀记鹦鹉洲上有茂林神祠远望如小山洲盖祢正平被杀处按鹦鹉洲在汉阳府城西南二里大江中尾直黄鹄矶明季为水冲没遂不可见】

鹦鹉来过吴江水江上洲传鹦鹉名鹦鹉西飞陇山去芳洲之树何青青烟开兰叶香风暖岸夹桃花锦浪生迁客此时徒极目长洲孤月向谁明【卢照隣五悲凤凰楼上陇山云鹦鹉洲前吴江水艺文类聚秦川记曰陇西郡有陇山山东人升此而顾瞻者莫不悲思哀伤通典天水郡有大阪名曰陇坻亦曰陇山楚辞采芳洲兮杜若王逸注芳洲香草丛生水中之处洛阳伽蓝记春风动树则兰开紫叶梁简文帝诗春衫湔锦浪瀛奎律髓太白此诗乃是效崔颢体皆於五六加工尾句寓感叹是时律诗犹未甚拘偶也】

九日登巴陵置酒望洞庭水军【旧注时贼逼华容县 书经集传东陵巴陵也今岳州巴陵县也地理今释东陵即巴丘山一名天岳山今湖广岳州府城是其遗址一统志巴丘山在岳州府城南一名巴蛇塚羿屠巴蛇于洞庭积骨为丘故名是巴陵即巴丘山也洞庭湖在岳州府城西南元和郡县志岳州有华容县去州一百六十里】

九日天气清登高无秋云造化辟川岳了然楚汉分长风鼓横波合沓蹙龙文忆昔传游豫楼船壮横汾今兹讨鲸鲵旌旆何缤纷白羽落酒樽洞庭罗三军黄花不掇手战鼓遥相闻剑舞转颍阳当时日停曛酣歌激壮士可以摧妖氛握颺【缪本作?跂】东篱下渊【缪本作泉】明不足羣【楚汉谓楚地之山及汉水也高唐赋长风至而浪起昭明文选上行幸河东祠后土顾视帝京欣然中流与羣臣饮燕上欢甚乃自作秋风辞曰泛楼船兮济汾河横中流兮扬素波箫鼓鸣兮发棹歌李善注作大船上施楼故号曰楼船鲸鲵大鱼之恶者以喻盗贼详八卷注家语白羽若月赤羽若日旌旗缤纷下盘於地剑舞停曛用虞公挥戈回日事已见三卷注谢宣远诗颍阳照通津南史清妖氛於灊石灭沴气於雩都史记酈生传皆握颺好奇礼应劭曰握颺急促之貌韦昭曰握颺小节也陶渊明诗采菊东篱下悠然见南山萧士贇曰用武之时儒生必轻太白此言其以渊明自况乎 颺音近促】

秋登巴陵望洞庭

清晨登巴陵周览无不极明湖映天光彻底见秋色秋色何苍然际海俱澄鲜山青灭远树水

绿无寒?来帆出江中去鸟向日边风清长沙浦霜【萧本作山】空云梦田瞻光惜颜髮閱水悲阻年北渚既荡漾东流自潺湲郢人唱白雪越女歌采莲听此更肠断凭崖淚如泉【谢灵运诗空水共澄鲜地理今释洞庭湖在今湖广岳州府巴陵县西南北接华容安鄉二县西南接常德府龙阳县东南接长沙府湘陰县界为湖南衆水之滙长沙浦谓自长沙而入洞庭之水古云梦泽跨江之南北自岳州外凡江夏汉阳沔阳安陆德安汉阳荆州皆其兼亘所及艺文类聚宋玉小言赋曰楚襄王登阳云之台命诸大夫景差唐勒宋玉等并造大言赋赋毕而宋玉受赏曰有能为小言赋者赐之云梦之田瞻光瞻日月之光閱水閱逝去之水後汉书马援传徂年已流壮情方勇楚辞帝子降兮北渚江淹诗北渚有帝子荡漾不可期汉书河荡荡兮激潺湲顔师古注潺湲激流也郢人白雪见二卷注刘琨诗泪下如泉流】

与夏十二登岳阳楼【方輿胜覽岳阳楼在岳州郡治西南西面洞庭左顧君山不知创始为谁唐开元四年中书令张说出守是邦与才士登临赋咏自此名著】

楼观岳阳尽川迴洞庭开鴈引愁心【一作鴈别秋江】去山衔好月来云间连【繆本作逢】下榻天上接行杯醉後凉风起吹人舞袖回【岳阳谓天岳山之阳楼依此立名洞庭一湖正在楼前浩浩荡荡茫无涯畔所谓巴陵胜槩尽在是矣下榻用陈蕃礼徐穉周璆事见十四卷注沈约诗宾至下尘榻王勃文徐孺下陈蕃之榻下字本此传盃而饮曰行盃】

登巴陵开元寺西阁赠衡岳僧方外【唐会要天授元年十月二十九日两京及天下诸州各置大云寺一所开元二十六年六月一日并改为开元寺胡三省通监注开元寺今诸州间亦有之盖唐开元中所置也】

衡岳有开【萧本作闡】士五峯秀真骨见君万里心海水照秋月大臣南溟去问道皆请谒洒以甘露言清凉润肌髮明湖落天镜香阁凌银阙登眺餐惠风新花期启发【通典衡山在今衡阳郡湘潭县释氏要覽开士经音疏云开達也明也解也士则士夫也经中多呼菩萨为开士前秦苻坚赐沙门有德解者号开士李雁湖曰妙法莲花经跋陀罗等与其同伴十六开士云云开士者能自开觉又开他心菩萨之异名也传灯録惠可大师返香山终日宴坐经八载于寂默中见一神人谓曰将欲受果何滯此耶翊日觉头痛如刺其师欲治之空中有声曰此乃换骨非常痛也师视其顶即如五峯秀出矣法华经如以甘露洒除热得清凉维摩诘经上方界分过四十二恒河沙佛土有国名衆香佛号香积其界一切皆以香作楼阁初学记梁元帝纂要曰春风曰惠风】

与贾至【繆本缺至字】舍人於龙兴寺剪落梧桐枝望?湖【岳阳风土记龙兴观故基在太平寺东旧有西阁为登览之胜?湖在州南春冬水涸昔人谓之乾湖水经谓之滸湖秋夏水涨即渺弥胜千石舟通阁子镇元和郡县志?湖一名滸湖在岳州巴陵县南一十里一统志?湖在岳州府城东南五里赵冬曦?湖诗序巴丘南?湖者盖沅湘澧汨之余波焉兹水也沦滸洞庭澹澹千里夏潦奔注则泆为此湖冬霜既零则涸为平野按尔雅云水反入为?斯名之作有由焉耳】

翦落青梧枝?湖坐可窺雨洗秋山净林光澹碧滋水闲明镜转云绕画屏移千古风流事名贤共此时

挂席江上待月有怀

待月月未出望江江自流倏忽城西郭青天悬玉钩素华虽【繆本作难】可揽清景不同游耿耿金波里空瞻鵷鹊楼【鲍照翫月城西诗始见西南楼纖纖如玉钩陆机诗安寝北堂上明月入我牖照之有余辉揽之不盈手谢朓诗金波丽鵷鹊刘良注金波月也鵷鹊馆名】

金陵望汉江

汉江回万里派作九龙盘横溃豁中国崔嵬飞迅湍六帝沦亡後三吴不足观我君混区宇垂拱衆流安今日任公子沧浪罢钓竿【郭璞江赋流九派乎浔阳应劭汉书注江自庐江浔阳分为九详见十四卷注谢灵运诗天地中横溃江赋长波浹淥峻湍崔嵬张铣注崔嵬湍高貌六帝吴晋宋齐梁陈六代之帝水经注吴後分为三世号三吴吴兴吴郡会稽也东京赋区宇乂宁书武成垂拱而天下治孔穎达正义说文云拱敛手也垂拱而天下治谓所任得人人皆称职手无所营下垂其拱故美其垂拱而天下治也战国策秦王垂拱而取西河之外鲍彪注垂衣拱手言无所事也任公子投竿东海钓得大鱼详见大鹏赋注因衆???安流水无巨鱼故任公子之钓竿可罢喻言江汉寧静地无巨寇则王者之征伐可除也】

秋登宣城谢朓北楼【一统志北楼在宁国府治北南齐守谢朓建江南通志陵阳山在宁国府城南冈峦盘屈三峯秀拔为一郡之镇上有楼即谢朓北楼李白所称江城如画者】

江城如画里山晚望晴空两水夹明镜双桥落彩霞人烟寒【一作空】橘柚秋色老梧桐谁念北楼上临风怀谢公【宣州图经宛溪句溪两水遶郡城合流有凤凰济川二桥开皇时建江南通志宛溪在寧国府城东跨溪上下有两桥上桥曰凤凰直城东南秦和门外下桥曰济川直城东阳德门外并隋开皇中建】

望天门山【图经天门山在太平州当涂县西南二十里又名蛾眉山二山夹大江对峙东曰博望西曰梁山】

天门中断楚江开碧水东流至北回两岸青山相对出孤帆一片日边来【至北繆本作直北一作至此毛西河曰因梁山博望夹峙故江水至此一回旋也时刻误此作北既东又北既北又回已乖句调兼失义理】

望木瓜山【一统志木瓜山在常德府城东七里李白谪夜郎过此有诗云云又江南通志木瓜山在池州府青阳木瓜铺杜牧求雨处今尚有庙二处皆太白常游之地未知孰是】

早起见日出暮见【繆本作看】栖鸟还客心自酸楚况对木瓜山【千金翼方木瓜实味酸

】

登敬亭北二小山余时【按客字上似缺一送字】客逢崔侍御并登此地【一统志敬亭山在宁国府城北十里】

送客谢亭北逢君纵酒还屈盘戲白马大笑上青山回鞭指长安西日落秦关帝鄉三千里杳在碧云间【一统志谢公亭在宁国府治北即谢朓送范云之零陵处汉书田广与食其日纵酒顔师古注纵意而饮酒】

过崔八丈水亭

高阁横秀气清幽并在君檐飞宛溪水窗落敬亭云猿啸风中斷漁歌月里聞閑隨白鷗去沙上自為羣【宛溪水敬亭山俱見前注】

登广武古战場怀古【水经注郡国志荥阳县有广武城城在山上汉所城也高祖与项羽临絕涧对语責羽十罪羽射汉祖中胸处也後汉书注西征记曰有三皇山或謂三室山山上有二城东者曰东广武西者曰西广武各在一山头相去二百余步其間隔深涧汉祖与項籍語处元和郡县志东广武西广武二城各在一山头相去二百余步在郑州荥泽县西二十里汉高与项羽俱临广武而军今东城有高坛即是项羽坐太公於上以示汉军处一统志古战場在开封府广武山下即楚汉战处】

秦鹿奔野草逐之若飞蓬項王气盖世紫电明双瞳呼吸八千人横行起江东赤精斩白帝叱咤入关中两龙不并跃五纬与天同楚灭无英图汉兴有成【繆本作来】功按剑清八极归酣歌大风伊昔临广武连兵决雌雄分我一盃羹太皇乃汝翁战争有古迹壁壘頽层穹猛虎啸【繆本作吟】洞壑饥鷹鸣秋空翔云晓列阵杀气赫长虹拨乱属豪圣俗儒安可通沉?呼豎子狂言非至公抚掌黄河曲嗤嗤阮嗣宗【史记蒯通曰秦失其鹿天下共逐之於是高材捷足者先得焉張晏曰以鹿喻帝位也項羽垓下歌力拔山兮气盖世史记項羽本紀聞項羽亦重瞳子又羽本紀籍与江东子弟八千人渡江而西汉书待詔夏賀良等言赤精子之?应劭注高祖感赤龙而生自謂赤帝之精陳子昂詩復聞赤精子提劍入咸京斬白帝事詳一卷拟恨賦注史记索隱叱咤發怒聲通典平王东迁洛邑以岐豐之地賜秦襄公乃为秦地至孝公作为咸陽筑冀闕徙都之故謂之秦川亦曰关中地关中記曰东自函关今弘农郡灵宝县界西至陇关今汧阳郡汧源县界二闕之中謂之关中东西千余里史记汉王之入闕五星聚东井东井者秦分也先至必霸西京賦高祖之始入也五纬相計以旅於东井李善注五纬五星也宋书英图武略事駕前古高誘淮南子注八极八方之极也汉高帝沛宮歌大风起兮云飞扬威加海内兮归故乡詳見二十卷注項羽本紀汉王引兵渡河復取成臯軍广武就敖仓食項王已定东海来西与汉俱临广武而军相守数月項王为高俎置太公其上告汉王曰今不急下吾烹太公汉王曰吾与項羽俱北面受命怀王曰约为兄弟吾翁即若翁必欲烹而翁则幸分我一杯羹項王怒欲杀之項伯曰天下事未可知且为天下者不顧家虽杀之无益祇益禍耳項王从之楚汉久相持未决丁壯苦军旅老弱罢转漕項王謂汉王曰天下匈匈数岁徒

以吾两人耳愿与汉王挑战决雌雄母徒苦天下之民父子为也汉王笑谢曰吾寧鬪智不能鬪力於是项王乃即汉王相与临广武间而语汉王数之项王怒欲一战汉王不听项王伏弩射中汉王史记秦楚之际月表拨乱诛暴平定海内卒践帝阼成於汉家淮南子康乐沉?高诱注沉?淫酒也韩诗薛君章句夫饮之礼齐顔色均衆寡谓之沉闭门不出谓之?广韵嗤笑也三国志注阮籍字嗣宗魏氏春秋曰籍尝登广武观楚汉战处乃叹曰时无英雄使竖子成名东坡志林昔先友史经臣彦辅谓余阮籍登广武而叹曰时无英雄使竖子成名岂谓沛公竖子乎予曰非也伤时无刘项也竖子指晋魏间人耳今日读李白登广武古战塲诗沉?呼竖子狂言非至公乃知太白亦误认嗣宗语嗣宗虽放荡本有志於世以魏晋间多故故一放於酒何至以沛公为竖子乎洪容斋曰阮籍登广武叹曰时无英雄使竖子成名盖叹是时无英雄如昔人者俗士不达以为籍讥汉祖虽李白亦有是言失之矣萧士贇曰予尝读阮籍传未尝不美其能以佯狂任达全身远害於晋魏之交非见远识微孰能与於此品量人物之际岂不识汉高之为人至发广武之叹哉因味其言至於时之一字而知籍之所谓时无英雄者非指汉高也盖谓所遭之时炎刘之末桓灵之君无英雄之材卒使神鼎暗移於臣下也竖子者指曹氏父子籍之兴叹者此耳或曰然则太白之诗失言矣曰此非太白之诗也诗中语意错乱用事失伦大风之歌能事毕矣诗乃重申广武之事此诗本意称述高祖之美如仗义入关缟素代楚军临广武数羽十罪可称者不少曾无一语及此分羹之语出於一时处变之权奚足为高祖道者可谓无识者矣太白有识者也肯作此语乎吾故曰非太白之诗也琦按阮籍盖习见夫三国之时覆军杀将亘胜亘败而终未能一统以视项羽之一败而遂不复振相去天渊矣使三国之君而生於其世恐汉高亦不能以五载而成帝业如此其易也广武一叹初无深义自东坡别创一说而後之人皆因之萧氏更谓桓灵无英雄之才而以竖子指曹氏父子则其说益左夫汉高固英雄然观其鸿门之困睢水之败荥阳之围广武之弩濒於危者数矣而卒不死终以有天下者天命也岂真筭无遗策而天下莫能当者哉且观其生平惟以诈术制御羣材好骂侮士漫言负约以阮籍之白眼观之呼为竖子亦何足异太白非至公之言亦尊题之法自当如此或两人所见实有不同安得訾其误哉若云诗中语意错乱则归酣歌大风以上是泛言楚汉之兴废伊昔临广武以下乃始着题与登金陵冶城西北谢安墩一诗同一机轴条理井然若云用事失伦在分我盃羹一语追想当时情事良平之俦何贾之伍言语妙天下岂不知此语之缪第恐卑辞屈节适足以长楚人之焰而堕其计中矫手措足悉为所制不得已而为是悖逆之辞以见为天下者不顧家之意非此一语不足折楚人之心舍此一语亦无以复楚之命其实太公生死全不在此一言正不必为汉高讳也仗义入关缟素伐楚俱非军广武时事此处何可搀入萧氏之云云无乃皆贅乎叱嗔入声咤嚟去声?音勉嗤音痴】

卷二十二

钦定四库全书

李太白集注卷二十二

钱塘 王琦 撰

古近体诗共五十八首

安州应城玉女汤作【旧注荆州记云尝有玉女乘车投此泉元和郡县志淮南道安州有应城县东北至州八十里艺文类聚盛弘之荆州记曰新阳县惠泽中有温泉冬月未至数里遥望白气浮蒸如烟上下采映状若绮疏又有车轮双辕形世传昔有玉女乘车自投此泉今人时见女子姿仪光丽往来倏忽一统志玉女泉在湖广德安府应城县西五十五里其泉热沸野老相传玉女炼丹之地】

神女歿幽境汤池流大川陰阳结炎炭造化开灵泉地底烁朱火沙旁歛素烟沸珠跃明【缪本作晴】月皎镜涵空天气浮兰芳满色涨桃花然精览万殊入潜行七泽连愈疾功莫尚变盈道乃全濯纓掬【萧本作濯濯气】清泚曦髮弄潺湲散下楚王国分浇宋玉田可以奉巡幸奈何隔穷偏独随朝宗水赴海输微涓【贾谊鵬赋天地为鑪兮造化为工陰阳为炭兮万物为铜古诗朱火然其中青烟扬其间说文歛气出貌沈约诗洞彻随清浅皎镜无冬春吕向注皎镜清明如镜也淮南子承天地之和形万物之殊子虚赋楚有七泽水经注温泉能瘥百病周易地道变盈而流谦楚辞沧浪之水清兮可以濯吾纓谢朓诗寒流自清泚说文泚清也楚辞与汝沐兮咸池曦汝髮兮阳之阿王逸注曦乾也谢灵运诗且申独狴意乘月弄潺湲宋玉小言赋楚襄王登阳云之台令诸大夫景差唐勒宋玉等曰有能为小言赋者赐之云梦之田宋玉曰无内之中微物潜生比之无象言之无名云云王曰善赐以云梦之田禹贡江海朝宗於海孔安国传二水入海有似於朝百川以海为宗宗尊也孔穎达正义周礼大宗伯诸侯见天子之礼春见曰朝夏见曰宗郑云朝犹朝也欲其来之早也宗尊也欲其尊王也朝宗是人事之名水无性识非有此义以海大而江汉小以小就大似诸侯归於天子假人事而言之也张正见诗康衢飞驶羽大海滴微涓萧士贇曰寄兴谓士不幸居於僻远之乡虽抱王佐之才而无由自达身在江湖心存魏阙而已悲夫 烁音铄歛音器】

之广陵宿常二南郭幽居【萧本作南顾壮居误广陵郡名即扬州也唐时隶淮南道】

绿水接柴门有如桃花源忘忧或假草满院罗丛萱暝色湖上来微雨飞南轩故人宿茅宇夕鸟栖【缪本作归】杨园还惜诗酒别深为江海言明朝广陵道独忆此倾樽【桃花源见二卷注述异记萱草一名紫萱又呼为忘忧草吴中书生呼为疗愁草稽中散养生论云萱草忘忧诗小雅杨园之道毛传曰杨园园名】

夜下征虏亭【景定建康志征虏亭在石头坞东晋太元中创】

船下广陵去月明征虏亭山花如綉颊江【萧本作红】火似流萤

下途归石门旧居【题下似缺别人字按太平府志横望山在当涂县东六十里春秋楚子重伐吴至於横山即此山也实为金陵朝对之山真诰称其石形瓌奇洞穴盘纒陶隐居尝栖迟此地炼丹故有陶公读书堂石门古祠灰井丹炉诸遗迹书堂今为澄心寺石门山水尤奇盘道屈曲沿道而入峭壁二里夹石参天左拥右抱罗列拱揖高者抗层霄下者入衍奥中有玉泉嵌空渊渊而来春夏霖潦奔驰秋冬澄流一碧萦绕如练观诗中所称隐居山寺陶公链液石门流水诸句知石门旧居盖在其处矣】

吴山高越水清握手无言伤别情将欲辞君挂帆去离魂不散烟郊树此心鬱悵谁能论有愧叨承国土恩云物共倾三月酒岁时同饯五侯门【虞炎时聚学从烟郊栖遁事环珓五侯见十一卷注】羨君素书常满案含丹照白霞色烂余尝学道穷冥筌梦中往往游仙山何当脱屣谢时去壶中别有日月天俛仰人间易凋朽【繆本作鑪】峯五云在轩牖惜别愁窥玉女窗归来笑把洪崖手【神仙传王烈入河东抱犊山中见一石室中有素书两卷琦按古人以绢素写书故谓书曰素书含丹者书中之字以朱写之白者绢色丹白相映烂然如霞矣江淹诗一时排冥筌冥赤如注冥理也筌迹也言理迹双遣也一说冥幽也筌迹也冥筌道中幽冥之迹也汉书郊祀志天子曰诚得如黄帝吾视去妻子如脱屣耳顏师古注屣小履脱屣者言其便易无所顾也列仙传王子乔乘白鹤驻山头举手谢时人数日而去灵台治中録施存鲁人学大丹之道三百年十链不成唯得变化之术後遇张申为云台治官常悬一壶如五升器大变化如天地中有日月如世间夜宿其内自号壶天人谓曰壶公名山洞天福地记鍾山周回一百里名朱湖太生之天在润州上元县五云五色云也见七卷注玉女窗在嵩山见十六卷注洪崖三皇时伎人得仙者广博物志青城山洞周回二千里昔洪崖先生服琅玕之华而隐代为青城真人筌音詮】隐居寺隐居山陶公链液栖其间灵神闭气昔登攀恬然但觉心绪闲数人不知几甲子昨来【萧本作夜误】犹带冰霜顔我离虽则岁物改如今了然识【许本作失误】所在别君莫道不尽欢悬知乐客遥相待【因话録宣州当涂隐居山岩即陶贞白链丹所也炉迹犹在後为佛舍左传晋悼夫人食輿人之城杞者绛县人或年长矣无子而往与於食有与疑年使之年曰臣小人也不知纪年臣生之岁正月甲子朔四百又四十五甲子矣其季於今三之一也】石门流水徧桃花我亦曾到秦人家不知何处得鸡豕就中仍见繁桑麻翛然远与世事间装鸾驾鹤又复【繆本作服】远何必长从七贵游劳生徒聚万金产挹君去长相思云游雨散从此辞欲知悵别心易苦向暮春风杨柳丝【桃花流水鸡豕桑麻比之秦人之桃源也详见二卷注庄子翛然而往翛然而来陆德明音义翛音萧徐音叔李音悠向云翛然自然无心而自尔之义郭崔云往来不难之貌江淹别赋驾鹤上汉骖鸾腾天七贵见十一卷注庾信诗惜无万金产东求沧海君挹即揖也古字通用】

客中作【萧本作客中行】

兰陵美酒鬱金香玉碗盛来琥珀光但使主人能醉客不知何处是他乡【唐时沂州之丞县

春秋时鄆国也後魏於此置兰陵郡隋废郡为兰陵县唐武德四年改曰丞县在沂州西一百八十里元和郡县志兰陵县城在沂州丞县东六十里史记荀卿适楚春申君以为兰陵令正义云兰陵县属东海郡今沂州丞县有兰陵山梁书鬱金香出罽宾国花色正黄而细与芙蓉花里被莲者相似国人先取以上佛寺积日香稿乃粪去之贾人从寺中徵顾以转卖与他也香谱鬱金香魏略云生大秦国二三月花如红蓝四五月采之其香十二叶为百草之英】

太原早秋【太原郡即并州也唐时隶河东道】

岁落衆芳歇时当大火流霜威出塞早云色渡河秋梦遶边城月心飞故国楼思归若汾水无日不悠悠【张衡定情歌大火流兮草虫鸣图书编大火心星也以六月之昏加於地之南至七月之昏则下而西流矣唐六典注汾水出忻州历太原汾晋绛蒲五州入河太平寰宇记汾水出静乐县北管涔山东流入太原郡界 塞音赛】

奔亡道中五首

苏武天上田横海岛边万重关塞断何日是归年【唐书地理志伊州伊吾县在大碛外南去玉门关八百里东去阳关二千七百三十里有折罗漫山亦曰天山刘删苏武诗食雪天山近思归海路长盖以天山为匈奴地耳其实苏武嚙雪及牧羊之处不在天山也史记汉灭项籍汉王立为皇帝田横惧诛与其徒属五百余人入海居岛中韦昭曰海中山曰岛正义曰按海州东海县有岛山去岸八十里】

其二

亭伯去安在李陵降未归愁容变海色短服改胡衣【後汉书崔駰字亭伯为窦宪主簿出为长岑长自以远去不得意遂不之官而归汉书李陵败降匈奴大将军霍光左将军上官桀素与李陵善遣陵故人陇西任立政等三人至匈奴招陵立政等至单于置酒赐汉使者李陵卫律皆侍坐後陵律持牛酒劳汉使博饮两人皆胡服椎结梦溪笔谈窄?短衣长勒靴皆胡服也窄?利於驰射短衣长靴便於涉草】

其三

谈笑三军却交游七贵疎仍留一只箭未射鲁连书【左太冲诗吾慕鲁仲连谈笑却秦军详见二卷注七贵见十一卷注鲁连射书聊城见十四卷注】

其四

函谷如玉关几时可生还洛阳【繆本作川】为易水嵩岳是燕山俗变羌胡语人多沙塞顔申包惟恸哭七日鬢毛斑【函谷详见五卷注後汉书班超久在絶域年老思土上疏曰臣不敢望到酒泉郡但愿生入玉门关帝乃徵超还章怀太子注玉门关属敦煌郡今沙州是也长

安三千六百里关在敦煌县西北通志地理略洛水出商州上洛县经虢州河南入河史记正义易水出易州易县东流过幽州归义县东与噶沱河合通志地理略中岳嵩山在河南告成县隋书渔阳郡无终县有燕山太平御覽隋图经云燕山在易县东南七十里左传吴入郢昭王在随申包胥如秦乞师曰吴为封豕长蛇以荐食上国虐始於楚寡君失守社稷越在草莽使下臣告急秦伯使辞焉曰子姑就馆将图而告对曰寡君越在草莽未获所伏臣何敢即安日依於庭牆而哭日夜不絕絕声勺饮不入口七日秦哀公为之赋无衣九顿首而坐秦师乃出太白意谓函谷之地已为禄山所据未知何日平定得能生入此关洛川嵩岳之间不但有同边界而风俗人民亦且渐异华风已之所以从永王者欲效申包恸哭乞师以救国家之难耳自明不敢有他志也其心亦可哀矣】

其五

淼淼望湖水青青芦叶齐归心落何处日没大江西歇马傍春草欲行远道迷谁忍子规鸟连声向我啼【广韵淼大水也子规即杜鹃鸟鸣声哀苦若云不如归去远客闻之心为凄惻淼音藐】

郢门秋怀【郢门即荆门也唐时为峡州夷陵郡其地临江有山曰荆门上合下开有若门象故当时文士概称其地曰荆门或又谓之郢门西通巫巴东接云梦历代常为重镇】

郢门一为客巴月三成弦朔风正摇落行子愁归旋杳杳山外日茫茫江上天人迷洞庭水鴈度潇湘烟清旷谐宿好緇磷及此年百龄何荡漾万化相推迁空谒苍梧帝徒寻溟海仙已闻蓬海【缪本作岳】浅岂见三桃园【胡本作桃三圆】倚剑增浩叹扪襟还自怜终当游五湖濯足沧浪泉【吴均诗别离未几日高月三成弦楚辞九辨萧瑟兮草木摇落而变衰刘向九叹日杳杳以西倾後汉书仲长统欲卜居清旷以乐其志梁昭明太子陶靖节集序处百龄之内居一世之中庄子若人之形万化而未始有极也吴均诗欲谒苍梧帝过问沅湘姬十洲记蓬莱山对东海之东北岸周回五千里外别有圆海绕山圆海水正黑而谓之溟海也无风而洪波百丈不可得往来上有九老丈人九天真王宫盖太上真人所居惟飞仙能到其处耳神仙传麻姑云向到蓬莱水又浅於往日汉武帝故事东郡送一短人长五寸衣冠具足上疑其精召东方朔至朔呼短人曰巨灵阿母还来否短人不对因指谓上王母种桃三千年一结子此儿不良已三过偷之失王母意故被谪来此上大惊始知朔非世中人也江淹诗倚剑临八荒宋之问诗扪心空自怜洞庭潇湘五湖沧浪俱见前注】

至鸭栏驿上白马矶赠裴侍御【一统志鸭栏矶在岳州临湘县东十五里吴建昌侯孙虑作鬪鸭栏於此白马矶在岳州巴陵县境湖广通志白马矶在岳州临湘县北十五里】

侧叠万古石横为白马矶乱流若电转举棹扬珠辉临驿卷缙幕升堂接绣衣情亲不避马为我解霜威【刘公干诗明月照缙幕李善注缙丹色也绣衣用汉书绣衣直指事见十一卷注避马用後汉书桓典事见九卷注御史为风霜之任故曰霜威 缙音题】

荆門浮舟望蜀江【胡三省通鑑注荆川在峽州宜都縣其地有荆門山故後人因以廣稱其境皆曰荆門耳】

春水月峽來浮舟望安極正是【繆本作見】桃花流依然錦江色江色綠【繆本作淥】且明茫茫與天平逶迤巴山盡遙曳楚雲行雪照聚沙雁花飛出谷鶯芳洲却已轉碧樹森森迎流目浦烟夕揚帆海月生江陵識遙火應到渚宮城【通鑑渝州巴縣有明月峽其山上石壁有圓孔形如滿月故以為名方輿勝覽明月峽在重慶府巴縣石壁高四十丈有孔若明月庾信枯樹賦臨風亭而唳鶴對月峽而吟猿漢書溝洫志來春桃花水盛必羨溢顏師古注月令仲春之月始雨水桃始華蓋桃方花時既有雨水川谷水泮衆流猥集波瀾盛長故謂之桃花水耳韓詳傳云三月桃花水通鑑蜀郡成都縣有錦江按錦江卽蜀江也成都人織錦既成取此水濯之則色更鮮麗故又謂之錦江說文逶迤邪去貌通鑑峽州夷陵郡巴縣北有山曲折似巴字因以為名鮑照詩搖曳高帆舉昭明太子錦帶書啼鶯出谷爭傳求友之聲說文森木多貌後漢書馮衍傳游精宇宙流目八紘謝靈運詩揚帆采石華通鑑荊州江陵县故楚之郢地秦分郢置江陵县今縣界有渚宮城方輿勝覽江陵府有渚宮郡縣志楚別宮也左傳楚子西沿漢沔江將入郢王在渚宮見之今之城楚船官地也梁元帝名以渚宮一統志渚宮在江陵故城東南楚建梁元帝卽位渚宮卽此陸放翁曰杜子美曉看紅濕處花重錦官城李太白蜀江綠且明用濕字明字可謂奪化工之巧世未有拈出者又放翁入蜀記曰與兒輩登堤觀蜀江乃知李太白荆門望蜀江詩江色綠且明真善狀物也】

上三峽

巫山夾青天巴水流若茲巴水忽可盡青天無到時三朝上黃牛三暮行太遲三朝又三暮不覺鬢成絲【唐書地理志夔州巫山縣有巫山一統志巫峽在夔州府巫山縣東三十里卽巫山也與西陵峽歸峽並稱三峽連山七百里略無斷處自非亭午夜分不見日月巴水謂三巴之水經三峽中者而言太平御覽三巴記曰閬白二水合流自漢中至始寧城下入涪陵曲折三回如巴字故曰巴江經峻峽中謂之巴峽卽此水也太平寰宇記峽州夷陵縣有黃牛山盛弘之荊州記雲南岸重嶺疊起最外高崖間有石狀如人負刀牽牛人黑牛黃成就分明此岩既高加以江湍紆回雖途經信宿猶望見之行者歌曰朝發黃牛暮宿黃牛三朝三暮黃牛如故】自巴東舟行經瞿唐峽登巫山最高峯晚還題壁【巴東卽歸州也唐時隸山南東道方輿勝覽瞿唐峽在夔州東一里舊名西陵峽乃三峽之門兩崖對峙中貫一江望之如門陸放翁入蜀記瞿塘峽兩壁對聳上入霄漢其平如削成視天如匹練方輿勝覽巫峽在巫山縣之西水經注云杜宇所凿以通江水圖經云此山當抗峰岷峨偕嶺衡岳凝結翼附并出青霄謂之巫山有十二峰上有神女廟陽雲台高百二十丈】

江行幾千里海月十五圓始經瞿唐峽遂步【胡本作陟】巫山巔巫山高不窮巴國盡所歷日邊攀垂蘿霞外倚穹石飛步凌絕頂極目無纖烟却顧失丹壑仰觀臨青天青天若可扞銀漢去安在望雲知蒼梧記水辨瀛海周游孤光晚歷覽幽意多積雪照空谷悲風鳴森柯歸途行欲曛佳趣尚未歇江寒早啼猿松暝已吐月月色何悠悠清猿响啾啾辭山不忍听揮策還孤舟【山海經西南有巴國郭璞注今三巴是杜元凱左傳注巴國在巴郡江州縣通鑑巴國

今清化始寧咸安符阳巴川南宾南浦是其地也文献通考重庆府古巴国谓之三巴郭璞诗翹手攀金梯飞步登玉阙上林赋触穹石张揖注穹石大石也後汉书和熹邓皇后尝梦扞天荡荡正青若有鍾乳状乃仰 饮之章怀太子注扞摸也归藏启筮有白云出自苍梧入於大梁史记驺衍以为儒者所谓中国者於天下乃八十一分居其一分耳中国名曰赤县神州赤县神州内自有九州禹之序九州是也不得为州数中国外如赤县神州者九乃所谓九州也於是有裨海环之人民禽兽莫能相通如一区中者乃为一州如此者九乃有大瀛海环其外天地之际焉鲍照诗孤光独徘徊吴均诗疎峰时吐月任昉竟陵文宣王行状清猿与壶人争旦张铄注清猿谓猿鸣声清也楚辞猿啾啾兮狻夜鸣】

早发白帝城【一作白帝下江陵】

朝辞白帝彩云间千里江陵一日还两岸猿声啼不尽轻舟已过【一作须臾过却】万重山【杨齐贤曰白帝城公孙述所筑初公孙述至鱼复有白龙出井中自以承汉土运故称白帝改鱼复为白帝城琦按白帝城在夔州奉节县与巫山相近所谓彩云正指巫山之云也水经注自三峡七百里中两岸连山略无阙处重岩叠嶂隐天蔽日自非亭午夜分不见曦月至於夏水襄陵沿泝阻絶王命急宣有时朝发白帝暮宿江陵其间千二百里虽乘奔御风不加疾也每至晴初霜旦林寒涧肃常有高猿长啸属引凄异空谷传响哀啾久絶故渔者歌曰巴东三峡巫峡长猿鸣三声泪沾裳】

秋下荆門【荆門已见前注】

霜落荆門江树空布帆无恙挂秋风此行不为鲈鱼鱸自爱名山入剡中【晋书顾恺之为殷仲堪参军仲堪在荆門恺之尝因假还仲堪特以布帆借之至破冢遭风船败恺之与仲堪笺曰地名破冢直破冢而出行人安稳布帆无恙艺文类聚世说曰张季鹰辟齐王东曹掾在洛见秋风起因思吴蓴菜羹鲈鱼鱸曰人生贵适志耳何能从宦数千里以要名爵遂命驾便归俄而齐王败时人皆谓之见机而作广博物志剡中多名山可以避灾故汉晋以来多隐逸之士沃州天姥是其处】

江行寄远

剡木出吴楚危檣百余尺疾风吹片帆日暮千里隔别时酒犹在已为异乡客思君不可得愁见江水碧【周易剡木为舟孔穎达正义舟必用大木剡凿为之故云剡木也萧士贇曰张骞乘槎乃剡全木为之今沅湘中有此名为 艚船吴均诗悲衔别时酒 槎鋤加切音近茶】

宿五松山下荀媪家【五松山在池州铜陵县南五里详见二十卷注汉书注文穎曰幽州及汉中皆谓老嫗为媪孟康曰媪母别名音乌老反顏师古曰媪女老称也】

我宿五松下寂寥无所欢田家秋作苦邻女夜舂寒跪进雕胡【繆本作凋胡】饭月光明素盘令人慙漂母三谢不能餐【杨惲报孙会宗书田家作苦宋玉讽赋为臣炊雕胡之饭烹露

葵之羹本草陶弘景曰菰米一名雕胡可作饼食苏颂曰菰生水中叶如蒲苇其苗有茎梗者谓之菰蔣草至秋结实乃雕胡米也古人以为美饌今饥岁人犹采以当粮葛洪西京杂记云菰之有米者长安人谓为雕胡菰之有首者谓之绿节李时珍曰雕胡九月抽茎开花如苇?结实长寸许霜後采之大如茅针皮黑褐色其米甚白而滑膩作饭香脆杜甫诗波漂菰米沉云黑卽此周礼供御乃六谷九谷之数管子书谓之雁膳漂母见六卷注】

下泾县陵阳溪至湓滩【一统志湓滩在寧国府泾县西九十五里怪石峻立如虎伏龙蟠】

湓滩鸣嘈嘈两山足猿猱白波若卷雪侧石【萧本作足】不容舫渔子【繆本作人】与舟人撑折万张篙【诗国风谁谓河广曾不容刀郑笺不容刀喻狭小船曰刀孔颖达正义刘释名云二百斛以上曰艇三百斛曰刀江南所谓短而广安不倾危者也李君实谓末二句断非太白语】

下陵阳沿高溪三门六刺滩

三门横峻滩六刺走波澜石惊虎伏起水状龙萦盘何慙七里瀨使我欲垂竿【李善文选注甘州记曰桐庐县有七里瀨瀨下数里至严陵瀨太平寰宇记七里瀨卽富春渚也避暑录话严陵七里瀨在洞下二十余里两山耸起壁立连亘七里土人谓之泷讹为笼言若笼中因谓初至为入泷既尽为出泷泷本音间江反奔湍貌以为若笼谬也七里之间皆滩瀨今因沈约诗误为一名非是严陵滩最大居其中方輿胜览七里滩距沈州四十余里与严陵瀨相接谚云有风七里无风七十里】

夜泊黄牛闻殷十四吴吟【江南通志黄山在太平府城西北五里相传浮丘翁牧鸡於此又名浮丘山此诗所谓及下首鸡鸣发黄山正是其处在太平州当涂县与徽州寧国二郡界内之黄山名同而地异矣】

昨夜谁为吴会吟风生万壑振空林龙惊不敢水中卧猿啸时闻岩下音我宿黄山碧溪月听之却罢松间琴朝来果是沧洲逸酤酒提【萧本作醞】盘饭霜栗半酣更发江海声客愁顿向杯中失【吴会吴地也详见十二卷注说文酤买酒也会音脍】

宿鰕湖

鸡鸣发黄山暝投鰕湖宿白雨映寒山森森似银竹提携采铅客结荷水边沐半夜似天【萧本作边】开星河烂人目明晨大楼去冈陇多屈伏当与持斧翁前溪伐云木【张景阳诗森森散雨足森森雨散貌鲍照登大雷岸与妹书栈石星饭结荷水宿太白古诗有采铅清溪滨时登大楼山之句疑与此诗是一时之作黄山在池州府城南九十里大楼山在池州府城南七十里清溪在池州府城北五里鰕湖当与之相去不远】

西施

西施越溪女出自苧萝山秀色掩今古荷花羞玉颜浣纱弄碧水自与清波闲皓齿信难开沉吟碧云间勾践徵絶艷扬眉入吴关提携馆娃宫杳渺讵可攀一破夫差国千秋竟不还【太平御览越王谓大夫种曰孤闻吴王淫而好色惑乱沉湎不领政事因此而谋可乎乃使相者於国中得苧萝山鬻薪之女曰西施郑旦饰以罗縠教以容步习於土城临於都巷三年学成而献於吴吴王大悦施宿会稽志苧萝山在诸暨县南五里輿地志云诸暨县苧萝山西施郑旦所居其方石乃晒纱处十道志云勾践索美女以献吴王得之诸暨苧萝山卖薪女西施山下有浣纱石一统志浣浦在诸暨县治东南一名浣渚俗传西子浣纱於此曹植诗时俗薄朱颜谁为发皓齿沈约诗扬眉一含睇娟好且修吴地记胥葬亭东二里有馆娃宫吴人呼西施作娃夫差置今灵岩山是也范石湖吴郡志砚石山在吴县西三十里上有馆娃宫方言曰吴有馆娃宫今灵岩寺即其地也山有琴台西施洞砚池翫花池山前有采香径皆宫之故迹】

王右军

右军本清真潇洒在【许本作出】风尘山阴遇【萧本作过】羽客要【萧本作爱】此好鹅宾扫素写道经笔精妙入神书罢笼鹅去何曾别主人【晋书王羲之起家秘书郎征西将军庾亮请为参军累迁长史亮临薨上疏称羲之清真有鉴裁为右军将军会稽内史性爱鹅山阴有一道士养好鹅羲之往观焉意甚悦因求市之道士云为我写道德经当举羣相赠耳羲之欣然写毕笼鹅而归甚以为乐孔稚圭北山移文潇洒出尘之想郑玄礼记注素生帛也江淹别赋渊云之墨妙严乐之笔精蔡邕篆书势体有六篆妙巧入神古诗新声妙入神】

上元夫人

上元谁夫人偏得王母娇嵯峨三角髻余髮散垂腰裘披青毛锦身着赤霜袍手提羸女儿闲与凤吹箫眉语两自笑忽然随风飘【太平御览茅君传曰王母遣侍女郭密香与上元夫人相闻茅固问王母不审上元夫人何真也曰三天真皇之母上元之高真统领十万玉女之名籙者也及上元夫人来闻云中箫鼓声龙马嘶鸣既至从者甚衆皆女子齐年十六七容色明逸多服青绫之衣光彩夺目上元夫人年未笄天姿絶艷服赤霜之?披青毛锦裘头作三角髻余髮散垂之至于腰戴九晨夜月之冠鸣六山火藻之佩曳凤文琳华之绶执流黄挥精之剑入室向王母拜王母坐止之呼与同坐羸女儿谓秦穆公女弄玉见六卷注刘孝威诗窗疏眉语度纱轻眼笑来阮籍诗魂气随风飘】

苏台览古

旧苑荒台杨柳新菱歌清【繆本作春误】唱不胜春只今惟有西江【霏玉本繆本作江西】月曾照吴王宫里人【范成大吴郡志姑苏台旧图经云在吴县西三十里续图经云三十五里一名姑胥一名姑余史记正义云在吴县西南三十里横山西北?姑苏山上山水记云阖闾作春秋游焉又云夫差作台三年不成积材五年乃成造九曲路高见三百里越絶书云阖庐造九曲路以游姑胥之台吴越春秋言阖庐昼游苏台盖此台始基于阖庐而成于夫差庶可以合传记之说】

越中览古

越王句践破吴归义士还家【许本作乡】尽锦衣宫女如花满春殿只今惟有鹧鸪飞【萧本作啼 史记越败吴越王句践欲迁吴王夫差于甬东吴王自剄死越王灭吴诛太宰嚭以为不忠而归义士吴舒扈以为战士传写之讹谓越人安得称义士云云未知是否】

商山四皓【雍胜略商山去商州东南九十里一名楚山一名商洛山形如商字汤以为国号郡以为名汉四皓隐处盛弘之荆州记曰商州上洛县有商山其地险阻林壑深邃四皓隐焉】

白髮四老人昂藏南山侧偃蹇【繆本作卧】松云【繆本作雪】间冥翳不可识云窗拂青霭石壁横翠色龙虎方战争於焉自休息秦人失金镜汉祖昇紫极阴虹浊太阳前星遂沦匿一行佐明两【萧本作圣】歟【萧本作倏】起生羽翼功成身不居舒卷在胷臆宵冥合元【许本作玄】化茫昧信难测飞声塞天衢万古仰遗迹【高士传四皓者皆河内轵人也或在汲一曰东园公二曰角里先生三曰绮里季四曰夏黄公皆修道洁己非义不动秦始皇时见秦政暴虐乃退入蓝田山而作歌曰莫莫高山深谷逶迤晬晬紫芝可以疗饥唐虞世远吾将安归驷焉高盖其忧甚大富贵之畏人不如贫贱而肆志乃共入商洛隐地肺山以待天下定及秦败汉高闻而徵之不至深自匿终南山不能屈已汉纪上欲废太子吕后闻之使留侯为太子计留侯曰上有所不能致者四人曰东园公夏黄公角里先生绮里季皆逃在山中然上高之今令太子卑辞安车迎此四人来以为客时随入朝则一助也吕后从其计四人果米年皆八十须眉皓白故谓之四皓及讌置酒太子侍四人从上怪而问之四人前对各言姓名上乃惊曰吾召公等不奉诏今侍太子者何四人对曰陛下喜骂轻士臣等义不受辱故亡今闻太子仁孝爱人敬士天下莫不延颈愿为太子死者臣等故来上曰烦公等幸卒调护太子四人退上召戚夫人指示曰吾欲易太子彼四人者为之辅羽翼已成难摇动也太子遂定陆机周孝侯碑昂藏寮采之上後汉纪太原周党偃蹇自高详十七卷注鲍照登大雷岸与妹书左右青霭表里紫霄广韵霭云状班固答宾戏分裂诸夏龙战虎争尚书考灵曜秦失金镜注曰金镜喻明道也紫极王者所居之宫曹植表情注于皇居心注乎紫极春秋潜潭巴虹出日旁后妃陰胁主杨齐贤注陰虹以喻戚夫人晋书心三星天王正位也中星曰明堂天子位前星为太子後星为庶子周易明两作离大人以继明照于四方虞翻注两谓日月也作成也日月在天动成万物故称作矣或以日与火为明两作也卢谿诗日磬效忠飞声有汉汉书攀龙附凤并乘天衢】

过四皓墓【太平寰宇记四皓墓在商州上洛县西四里雍胜略四皓墓在商州西四里鸡原】

我行至商洛幽独访神仙园绮复安在云萝尚宛然荒凉千古迹芜没四坟连伊昔鍊金鼎何年【繆本作言】闭玉泉陇寒唯有月松古渐无烟木魅风号去山精雨啸旋紫芝高咏罢青史旧名传今日并如此哀哉信可怜【商洛谓商山洛水之间详二十卷注江淹别赋鍊金鼎而方坚李善注鍊金为丹之鼎也贾公彦周礼疏魅人面兽身而四足好感人山林异气所生

为人害说文魅老精物也抱朴子山精之形如小儿而独足走向後喜来犯人人入山若夜闻人音声大语其名曰跂知而呼之即不敢犯人也一名热内亦可兼呼之又有山精如鼓赤色亦一足其名曰暉异苑玄中记山精如人一足长三四尺食山蟹夜出昼藏鲍照芜城赋木魅山鬼野鼠城狐风嗥雨啸昏见晨趋紫芝已见前首注江淹上建平王书俱启丹册并图青史李善注汉书有青史子音义曰古史官记事】

岘山怀古【湖广通志岘山在襄阳府城南十里欧阳公记曰岘山临汉上望之隐然盖诸山之小者而其名特着于荆州襄沔记曰岘山南五百步东临汉水上有羊祜碑汉武坛】

访古登岘首凭高眺襄中天清远峰出水落寒沙空弄珠见游女醉酒【一作月】怀山公感叹发秋兴长松鸣夜风【岘首谓岘山之巔鲍照诗晨登岘山首後人因之遂谓岘山曰岘首孟浩然岘首晨风送马戴白云登岘首皆本此襄中襄阳也张衡南都赋游女弄珠于汉皋之曲李善注韩诗外传曰郑交甫将南适楚遵彼汉皋台下乃遇二女佩两珠大如荆鸡之卵山公醉酒见十五卷注】

苏武

苏武在匈奴十年持汉节白雁上林飞空传一书札牧羊边地苦落日归心絶渴饮月窟水饥飡天上雪东还沙塞远北怆河梁别泣把李陵衣相看泪成血【汉书天汉元年武帝遣苏武以中郎将使持节送匈奴使留在汉者因厚赂单于既至匈奴单于欲降之幽武置大害中絶不饮食天雨雪武饿啮雪与旃毛并咽之数日不死匈奴以为神乃徙武北海无人处使牧羝羝乳乃得归别其官属常惠等各置他所武仗汉节牧羊卧起操持节毛尽落初武与李陵俱为侍中武使匈奴明年陵降昭帝即位数年匈奴与汉和亲汉求武等匈奴诡言武死後汉使复至匈奴常惠夜见汉使教使者谓单于言天子射上林中得雁足有系帛书言某等在某泽中使者如惠语以让单于单于视左右而惊谢汉使曰武等实在于是李陵置酒谓武曰今足下还归扬名于匈奴功显于汉室虽古竹帛所载丹青所画何以过子卿泣下数行因与武诀匈奴召会武官属前已降及物故凡随武还者九人武留匈奴凡十九岁始以强壮出及还须发尽白顔师古汉书高祖本纪注节以毛为之上下相重取象竹节因以为名将命者持之以信长杨赋西戾月窟东震日域李陵与苏武诗携手上河梁游子暮何之李陵与苏武书此陵所以仰天搥心而泣血者也】经下邳圯桥怀张子房【按唐书地理志河南道有下邳县初隶泗州临淮郡元和中改隶徐州彭城郡水经注沂水於下邳县北西流分为二水一水经城东屈从县南注泗谓之小沂水水上有桥徐泗间以为圯昔张子房遇黄石公於圯上即此处也汉书注服虔曰圯音颐楚人谓桥曰圯说文东楚谓桥为圯或嗤诗题圯桥二字为复用者按庾信吴明彻墓志铭圯桥取履早见兵书则圯桥之称唐之前早已有此误矣一统志圯桥在邳州城东南隅年久湮没元和郡志下邳县有沂水号为长利池池上有桥即黄石公授张良素书之所 邳音批圯音夷】

子房未虎啸破产不为家沧海得壮士椎秦博浪沙报韩虽不成天地皆振动潜匿游下邳岂曰非智勇我来圯桥上怀古钦英风惟见碧流水曾无黄石公叹息此人去萧条徐泗空【汉

书张良字子房其先韩人也大父开地相韩昭侯宣惠王襄哀王父平相厘王悼惠王悼惠王三十三年平卒卒二十岁秦灭韩良少未宦事韩韩破良家僮三百人弟死不葬悉以家财求客刺秦王为韩报仇以五世相韩故良尝学礼淮阳东见沧海君得力士为铁椎重百二十斤秦皇帝东游至博浪沙中良与客狙擊秦皇帝误中副车秦皇帝大怒大索天下求贼急甚良乃更名姓亡匿下邳良尝闲从容步游下邳圯上有一老父衣褐至良所直堕其履圯下顾谓良曰孺子下取履良愕然欲殴之为其老乃强忍下取履因跪进父以足受之笑去良殊大惊父去里所复还曰孺子可教矣後五日平明与我期此良因怪跪曰诺五日平明良往父已先在怒曰与老人期後何也去後五日早会五日鸡鸣往父又先在复怒曰後何也去後五日复早来五日良夜半往有顷父亦来喜曰当如是出一编书曰读是则为王者师後十年兴十三年孺子见我济北谷城山下黄石即我已遂去不见旦日视其书乃太公兵法赵景真与嵇茂齐书龙睇大野虎啸六合吴舒鳧曰张良传云不爱万金之资为韩报仇强秦天下振动太白正用其语刻本改为天地皆震动天地何震动之有耶】

金陵三首

晋家南渡日此地旧【一作即】长安地即帝王宅山为龙虎盘【一作碧宇楼台满青山龙虎盘】金陵空壮观天塹【一作江塞】净波澜醉客回桡去吴歌且自欢【一作谁云行路难晋元帝南渡江於金陵即位遂都之鍾山龙蟠石头虎踞诸葛武侯称为帝王之宅详七卷金陵歌注隋书陈祯明三年隋师临江後主从容言曰齐兵三来周兵再来无勿摧败彼何为者都官尚书孔范曰长江天塹古以限隔南北今日北军岂能飞渡耶顔师古汉书注楫谓櫂之短者也今吴越之人呼为桡桡音饶】

其二

地拥金陵势城回江【一作汉】水流当时百万户夹道起朱楼亡国生春草王【繆本作离】宫没古丘空余後湖月波上对瀛洲【一作江洲艺文类聚徐爰释问略曰建康壮十余里有鍾山旧名金陵山汉末金陵尉蒋子文讨贼战亡灵发於山因名蒋侯祠故世号曰蒋山谢眺诗逶迤带緑水迢遰起朱楼初学记建叶有後湖一名玄武湖景定建康志玄武湖亦名蒋陵湖亦名秣陵湖亦名後湖在城北二里周回四十里东西有沟流入秦淮深七尺灌田一百顷一统志玄武湖在应天府太平门外周回四十里晋名北湖宋元嘉末有黑龙见故改名今称後湖】

其三

六代兴亡国三杯为尔歌苑方秦地少【一作小】山似洛阳多古殿吴花草深宫晋绮罗并随人事灭东逝与【一作只】沧波【小学紺珠六朝吴东晋宋齐梁陈皆都建业景定建康志洛阳四山围伊洛瀍涧在中建康亦四山围秦淮直渎在中故云风景不殊举目有河山之异李白云山似洛阳多许浑云只有青山似洛中谓此也太平寰宇记丹阳记云出建阳门望鍾山似出上东门望首阳山也】

秋夜板桥浦泛月独酌怀谢眺【水经注江水经三山又湘浦出焉水上南北结浮桥渡水故曰板桥浦太平寰宇记板桥浦在昇州江寧县南四十里五尺源出观山三十七里注大江谢玄晖之宣城出新林浦向板桥诗云江路西南永归流东北鹜天际识归舟云中辨江树】

天上何所有迢迢白玉?斜低建章阙耿耿对金陵汉水旧如链霜江夜清澄长川泻落月洲渚晓寒凝独酌板桥浦古人谁可徵玄晖难再得洒洒气填膺【谢眺诗玉?低建章李善注春秋元命苞曰玉衡北两星为玉?星宋书永光元年以石头城为长乐宫以北邸为建章宫南齐书谢眺字玄晖陈郡阳夏人少好学有美名文章清丽江淹恨赋置酒欲饮悲来填膺李善注填满也】过彭蠡湖【史记正义括地志云彭蠡湖在江州浔阳县东南五十二里】

谢公入彭蠡因此游松门余方窥石镜兼得穷江源前赏迹可见後來道空存而欲继风雅岂惟【萧本作云】清心魂云海方助兴波涛何足论青嶂忆遥月绿萝愁鸣【繆本作鸣愁】猿水碧或可采金膏秘莫言余将振衣去羽化出嚣烦【谢灵运入彭蠡湖口诗攀崖照石镜牵叶入松门三江事多往九???理空存灵物吝奇怪异人秘精魂金膏灭明光水碧缀流温李善注张僧鉴浔阳记曰石镜山东有一圆石悬崖明净照见人形顾野王輿地志曰自入湖三百三十里穷於松门东西四十里青松遍於两岸吕向注金膏仙药也水碧水玉也此江中有之豫章古今记松门在豫章北二百里江水遶山上有松柏太平寰宇记松门山在洪州南昌县北水路二百一十五里其山多松遂以为名北临大江乃彭蠡湖口山有石镜光明照人太平广记幽明录曰宫亭湖边傍山间有石数枚其圆若镜明可监人谓之石镜後有行人过以火燎一枚今不复明山海经耿山多水碧郭璞注亦水玉类西溪丛语子尝见墨子道书大药中有水脂碧洪炎杂家引旧书云宫亭湖中有孤石介立周回一里竦直百丈上有玉膏可采岂非水碧耶金膏见十五卷注左思诗振衣千仞冈濯足万里流道家谓昇仙曰羽化】

入彭蠡经松门观石镜?怀谢康乐题诗书游览之志【旧注二篇或同或异故并録之】

谢公之彭蠡因此游松门余方窥石镜兼得穷江源将欲继风雅岂徒清心魂前赏逾所见後來道空存况属临泛美而无洲渚喧漾水向东去漳流直南奔空蒙三川夕回合千里昏青桂隐遥月绿枫鸣愁猿水碧或可采金精秘莫论吾将学仙去冀与琴高言【书禹贡嶓冢导漾东流为汉又东为沧浪之水过三澨至於大别南入於江东滙泽为彭蠡孔安国书传泉始出山为漾水东西流为沔水至汉中东流为汉水通志略汉水名虽多而实一水说者纷然其原出兴元府西县嶓冢山为漾水东流为沔水又东至南郑为汉水有褒水从武功来入焉又东左与文水会又东过西城旬水入焉又东过郿乡县南又屈而东南过武当县又东过顺阳县有洧水自虢州卢氏县北来入焉又东过中庐别有淮水自房陵淮山东流入焉又东过南漳荆山而为沧浪之水或云在襄阳即为沧浪之水又东南过宜城有鄢水入焉又东过都敖水入焉又东南白水入焉又东过云杜而为夏水有郢水入焉又东至汉阳触大别山南入於江班云行一千七百六十里孔穎达左传正义释例云漳水出新城沔乡县南至荆山东南经襄阳南郡当阳县入沮通志略漳水出临沮县东荆山东南至当阳县右入於沮临沮今襄阳南漳县当阳今隶荆州军一统志漳江源出临沮县南至荆州当阳北与沮水合流入大江谢眺诗空蒙如薄雾三川三江也按三江孔安国班固郑玄韦昭桑钦郭璞诸说不一惟郑云左合

汉为北江右合彭蠡为南江岷山居其中为中江今考江水发源蜀地最居上流下至湖广汉江之水自北来会之又下至江西则彭蠡之水自南来会之三水合流而东以入於海所谓三江既入也禹贡既以岷江为中江汉水为北江则彭蠡之水为南江可知矣苏东坡谓岷山之江为中江岷江之江为北江豫章之江为南江盖本郑说也谢灵运诗州岛骤回合王僧达诗黄沙千里昏木华海赋金精玉英填其里李善注穆天子传河伯曰示汝黄金之膏郭璞曰金膏其精洵也琴高事见二十八卷注】

庐江主人妇

孔雀东飞何处栖庐江小吏仲卿妻为客裁缝君【缪本作石】自见城乌独宿夜空啼【古词孔雀东南飞五里一徘徊古乐府汉末建安中庐江府小吏焦仲卿妻刘氏为仲卿母所遣自誓不嫁其家逼之乃投水而死仲卿闻之亦自缢於庭树时人伤之为诗云尔张华禽经注乌之失雌雄则夜啼】

陪宋中丞武昌夜饮怀古【元和郡县志鄂州江夏郡有武昌县西至州一百七十里】

清景南楼夜风流在武昌庾公爱秋月乘兴坐胡牀龙笛吟寒水天河落晓霜我心还不浅怀古【一作留客】醉余觞【世说庾太尉在武昌秋夜气佳景清佐吏殷浩王胡之之徒登南楼理咏音调始适闻函道中有履声甚厉定是庾公俄而率左右十许人步来诸贤欲起避之公徐云诸君少住老子於此处兴复不浅因便据胡牀与诸人咏谑竟坐琦按世说晋书载庾亮南楼事皆不言秋月而太白数用之岂古本秋夜乃秋月之讹抑有他传是据欤】

望鸚鵡洲怀【缪本作悲】祢衡【一统志鸚鵡洲在武昌府城南跨城西大江中尾直黄鹤矶乃黄祖杀祢衡处衡尝作鸚鵡赋故遇害地得名海录碎事黄祖杀祢衡埋於沙洲之上後人因号其洲为鸚鵡洲以衡尝为鸚鵡赋故也二说不同今并録之】

魏帝营八极蚁观一祢衡黄祖斗筭人杀之受恶名吴江赋鸚鵡落笔超羣英锵锵振金玉句句欲飞鸣鸚啄孤凤千春伤我情五岳起方寸隐然诂可平才高竟何施寡识冒天刑至今芳洲上兰蕙不忍生【後汉书祢衡少有才辩而尚气刚傲好矫时慢物建安初来游许下孔融深爱其才数称述於曹操操欲见之衡素相轻疾自称狂病不肯往而数有恣言操怀忿而以其才名不欲杀之闻衡善擊鼓乃召为鼓吏孔融退而数之因宣操区区之意衡许往融复见操说衡狂疾今求得自谢操喜勅门者有客便通待之极晏衡乃着布单衣疎巾手持三尺棨杖坐大营门以杖箠地大骂吏白外有狂生坐於营门言语悖逆请牧案罪操怒谓孔融曰祢衡竖子孤杀之犹鼠雀耳顾此人素有虚名远近将谓孤不能容之今送与刘表视当何如於是遣人骑送之刘表及荆州士大夫先服其才名甚宾礼之後复侮慢於表表耻不能容以江夏太守黄祖性急故送衡与之祖亦善待焉祖长子射为章陵太守尤善於衡射时太会宾客人有献鸚鵡者射举卮於衡曰愿先生赋之以娱嘉宾衡揽笔而作文无加点辞学甚丽後黄祖在蒙冲船上大会宾客而衡言不逊顺祖慙乃诃之衡更熟视曰死公云等道祖大怒令五伯将出欲加箠衡方大骂祖恚遂令杀之射徒跣来救不及乃厚加棺斂衡时年二十六梁

简文帝诗千春谁与乐三国志纠?天刑章厥有罪楚辞采芳洲兮杜若 严沧浪曰才高识寡断尽称衡李榕村曰首二句向皆错解玩通章诗意所痛惜於衡者深矣虽有才高识寡之言然至目为孤凤则操与祖皆鸷鹗之羣耳起句盖言魏武经营天下而视之直作蝼蚁观者唯一称衡也如此营字方有照应一字方有着落且下句鄙薄黄祖何故起处张大曹操乎】

宿巫山下

昨夜巫山下猿声梦里长桃花飞绿水三月下瞿塘雨色风吹去南行拂楚王高丘怀宋玉访古一沾裳【巫山桃花水瞿塘已见前注宋玉高唐赋妾在巫山之阳高丘之阻楚词哀高丘之无女王逸注楚有高丘之山或云高丘阆风山上也旧说高丘楚地名也太平寰宇记巫山县有高都山江源记云楚词所谓巫山之阳高丘之阻高丘盖高都也】

金陵白杨十字巷【六朝事迹白杨路图经云县南十二里石山冈之横道是也】

白杨十字巷北夹湖【当作潮】沟道不见吴时人空生唐年草天地有反覆宫城尽倾倒六帝余古丘樵苏泣遗老【一统志潮沟在应天府上元县西四里吴赤乌中所凿以引江潮接青溪抵秦淮西通运渎北连後湖六朝事迹輿地志潮沟吴大帝所开以引江潮建康实录云其北又开一渎北至後湖以引湖水今俗呼为运渎其实自古城西南行者是运渎自归蒋山寺门前东出至青溪者名潮沟其沟向东已湮塞西则见通运渎按实录所载皆唐事距今数百年其沟日益淹塞未详所在今府城东门外西抵城濠有沟东出曲折当报寧寺之前里俗亦名潮沟此近世所开非古潮沟也三国志注九州春秋曰马腾韩遂之败樊稠追至陈仓遂与稠曰天地反覆未可知也六帝谓六代开国之帝也汉书樵苏後?顔师古注樵取薪也苏取草也】

谢公亭【原注盖谢眺范云之所游 海録碎事谢公亭在宣州太守谢玄晖置范云为零陵内史谢送别於此故有新亭送别诗方輿胜览谢公亭在宣城县北二里名胜志谢公亭在江南寧国府宣城县北郭外齐太守谢眺送别处旧图经谓是眺送范云之零陵内史处】

谢亭【萧本作公】离别处风景每生愁客散青天月山空碧水流池花春映日窗竹夜鸣秋今古一相接长歌怀旧游纪南陵题五松山【一作南陵五松山感时赠别山名铜坑村五里五松山在南陵已见二十卷注胡震亨曰此是咏古或感兴诗也旧本题作纪南陵题五松山误】

圣达有去就潜光愚其德鱼与龙同池龙去鱼不测当时板筑辈岂知传说情一朝和【一作雨】殷人【一作羹】光气为列星伊尹生空桑捐【萧本作指】庖佐皇极桐宫放太甲摄政无愧色三年帝道明委质终辅翼旷哉至人心万古可为则时命或大谬仲尼将【一作其】奈何鸾凰忽覆巢麒麟不来过龟山蔽鲁国有斧且无柯归来归去来【一作归去来归去来】宵济越洪波【晋书郭瑀传潜光九臯怀真独远史记君子盛德容貌若愚韩诗外传传说负土而板筑以为大夫其遇武丁也李善文选注郭璞三苍解诂曰板

墙上下板筑杵头鉄?也书说命若岁大旱用汝作霖雨若作和羹尔惟盐梅庄子傅说得之以相武丁奄有天下乘东维骑箕尾而比於列星陆德明音义崔云傅说死其精神乘东维托龙角乃为列宿今尾上有傅说星水经注昔有莘氏女采桑於伊川得婴儿於空桑中言其母孕於伊水之滨梦神告之曰白水出而东走母明视而见白水出焉告其邻居而走顾望其邑咸为水矣其母化为空桑子在其中有莘氏女取而献之命养於庖长有贤德殷以为相曰伊尹也史记伊尹为有莘媵臣负鼎俎以滋味说汤致於王道汤任以国政汤崩伊尹立太丁之子太甲太甲既立不遵汤法乱德於是伊尹放之於桐宫伊尹摄行政太甲居桐宫三年悔过自责反善於是伊尹乃迎太甲而授之政委质有二解左传策名委质孔穎达曰质形体也拜则屈膝而委身体於地以明敬奉之也章怀太子後汉书注委质犹屈膝也国语委质为臣无有二心韦昭解质贄也士贄以雉委质而退史记索隐服?注左氏云古者始仕必先书其名於策委死之质於君然後为臣示必死节於其君也依前二说作哲音读依後二说作至音读庄子时命大谬也详十一卷注家语孔子自卫入晋至河闻赵简杀窦犢鸣犢舜华乃临河而叹曰丘闻之刳胎杀夭麒麟不至其郊覆巢破卵凤皇不翔其邑何则君子违伤其类也遂还息於陬孔子龟山操予欲望鲁龟山蔽之手无斧柯奈龟山何乐府诗集琴操曰龟山操孔子所作也季桓子受齐女乐孔子欲諫不得退而望鲁龟山作此曲以喻季氏若龟山之蔽鲁也元和郡县志龟山在兖州泗水县东北七十里陆贾新语有斧无柯何以治之】

夜泊牛渚怀古【原注此地即谢尚闻袁宏咏史处太平寰宇记牛渚山在太平州当涂县北三十五里突出江中谓为牛渚矶古津渡处也輿地志云牛渚山昔有人潜行云此处通洞庭旁达无底见有金牛状异乃惊怪而出牛渚山北谓之采石按今对采石渡口上有谢将军祠淮南记云吴初以周瑜屯牛渚晋镇西将军谢尚亦镇此城袁宏时寄运船泊牛渚尚乘月泛江闻运船中讽咏遣问之即宏诵其自作咏史诗於是大相叹赏详见七卷劳劳亭注】

牛渚西江夜青天无片云登舟望秋月空忆谢将军余亦能高咏斯人不可闻明朝挂帆席【一作洞庭去】枫叶落【一作正】纷纷【木华海赋维长綯挂帆席李善注刘熙释名曰随风张幔曰帆或以席为之故曰帆席也沧浪诗话律诗有彻首尾不对者盛唐诸公有此体如孟浩然诗挂席东南望青山水国遥舳舻争利涉来往接风潮问我今何适天台访石桥坐看霞色晚疑是赤城标又水国无际之篇又太白牛渚西江夜之篇皆文从字顺音韵铿锵八句皆无对偶赵宦光曰律不取对如李白牛渚西江夜云云孟浩然挂席东南望云云二诗无一句属对而调则无一字不律故调律则律属对非律也近有诗家窃取古调作近体自以为高者终是古诗非律也中晚之律每取一贯而下已自失欵况今日之以古作律乎杨用修云五言律八句不对太白浩然有之乃是平仄稳贴古诗也杨谬以对为律亦浅之乎观律矣古诗在格与意义律诗在调与声韵如必取对则六朝全对者正自多也何不即呼律诗乎律诗之名起於唐律诗之法严於唐未起未严偶然作对作者观者慎勿以此持心方能得一代作用之旨王阮亭曰此诗色相俱空政如羚羊挂角无迹可求画家所谓逸品者也】

姑熟十咏

姑熟溪【太平寰宇记姑熟溪在太平州当涂县南二里姑熟即古县名此水经县市中过故

溪卽因地以名之也江南通志姑熟溪在太平府当涂县南二里一名姑浦合丹阳东南之余水及诸港来会过宝积山入大江周必大泛舟游山録姑熟溪水色绀碧与河流不相杂陆放翁入蜀记姑熟溪土人谓之姑溪水色正绿而澄澈如镜纖鳞往来可数溪南皆渔家景物幽奇】

爱此溪水闲乘流兴无极漾【文苑英华作擊】楫怕鸥惊垂竿待鱼食波飏晓霜影岸叠春山色何处浣纱人红颜未相识

丹阳湖【元和郡县志丹阳湖在宣州当涂县东南七十九里周围三百余里与溧水县分湖为界六朝事迹丹阳湖图经云在溧水县西八十里与太平州当涂县分界唐李白尝游此湖酷爱其景乃张帆载酒纵意往来而作诗曰湖与元气连风波浩难止云云太平府志丹阳湖在府城东南跨多福黄池积善湖阳等乡徽池寧国广德诸州之水滙之与江寧之高淳溧水皆以湖心为界东西七十五里南北九十里太平之巨浸也】

湖与元气连风波浩难止天外贾客归云间片帆起龟游莲叶上鸟宿芦花里少女棹轻【萧本作归】舟歌声逐流水谢公宅【太平寰宇记青山在太平州当涂县东三十五里齐宣城太守谢朓筑室及池於山南其它阶址尚存路南砖井二口天宝十二年改为谢公山江南通志谢朓宅在太平府东南青山之椒南齐谢朓守宣城时建别宅於此今为保和庵路旁有井名谢公井陆放翁入蜀记青山南小市有谢玄晖故宅基今为汤氏所居南望平野极目而环宅皆流泉奇石青林文筱真佳处也由宅後登山路极险巘凡三四里许至一庵庵前有小池曰谢公池水味甘冷虽盛夏不竭】

青山日将暝寂寞谢公宅竹里无人声池中虚月白【文苑英华作有虚白】荒庭衰草徧废井苍苔积惟有清风闲时时起泉石

陵歊台【方輿胜览凌歊台在太平州城北黄山上宋武帝南游尝登此台乃建离宫焉江南通志陵歊台在太平府当涂县黄山有石如案高可五尺顶平而圆宋武帝建宫避暑处周必大泛舟游山録出北门五里余登陵歊台台在黄山上本不高而望甚远西南卽青山却顾采石天门及溧阳和州诸山皆在目中 歊音嚣】

旷望登古台台高极人目叠嶂列远【文苑英华作遥】空杂花间平陆闲云入窗牖野翠生松竹欲览碑上文苔侵岂堪读【王筠诗开窗延叠嶂丘希范与陈伯之书杂花生树羣莺乱飞谢瞻诗夕陰暖平陆尔雅大野曰平高平曰陆】

桓公井【一统志桓公井在太平府城东五里白紵山晋桓温所凿】

桓公名已古废井曾未竭石甃冷苍苔寒泉湛孤月秋来桐暂落春至桃还发路远人罕窥谁能见清澈【霏玉本作洁】
按广韵湛与沉同音皆直深切兼引汉书从俗浮湛句於湛字下盖沉湛古通用也】

慈姥竹【艺文类聚丹阳记曰江寧县南四十里有慈母山积石临江生箫管竹王褒洞箫赋所称卽此竹也其竹圆致异於衆处自伶伦采竹嶰谷其後惟此干见珍故历代常给乐府俗呼为鼓吹山李善文选注江图曰慈母山此山竹作箫笛有妙声太平府志慈姥山在当涂县北四十里积石俯江岸壁峻絶风涛汹涌估舟尝依此以避其山产竹圆体而疎节堪为箫管声中音律 姥音母】

野竹攢【文苑英华作钻】石生含烟映江岛翠色落波深虚声带寒早龙吟曾未听凤曲吹应好不学蒲柳凋贞心常自保【龙吟用马融笛赋中语见五卷注凤曲用箫史事见六卷注晋书顾悦之曰蒲柳常质望秋先零蒲柳今之水杨也其叶易凋落】

望夫山【太平寰宇记望夫山在太平州当涂县北四十七里昔有人往楚累岁不还其妻登此山望夫乃化为石其山临江周围五十里高一百丈】

顒【繆本作写】望临碧空怨情感离别江草不知愁岩花但争发云山万重隔音信千里絶春去秋复来相思几时歇【广韵顒仰也】

牛渚矶【江南通志牛渚山在太平府城西北三十五里山下有矶曰牛渚矶与采石矶相属亦名燃犀浦晋温峤燃犀照水族於此太平府志牛渚矶在当涂县采石山下江渚有石柱高丈许突兀峭壁间相传古有金牛见此故名後汉志丹阳疆域独称南有牛渚孙吴东晋每宿重兵其地】

絶壁临巨川连峰势相向乱石流湫间回波自成浪但惊羣木秀莫测精灵状更听猿夜啼忧心醉江上【韵会湫水洄也异苑晋温峤至牛渚矶闻水底有音乐之声水深不可测传言其下多怪物乃燃犀角而照之须臾见水族覆火奇形异状或乘车马着赤衣幘其夜梦人谓曰与君幽明道隔何意相照耶诗国风忧心如醉】灵墟山【方輿胜览灵墟山在当涂县南十里一统志灵墟山在太平府城东北三十五里世传丁令威学道飞昇於此山椒坛址犹在山有洞後有井大旱不竭】

丁令辞世人拂衣向仙路伏链九丹成方随五云去松萝蔽幽洞桃杏深隐处不知曾化鹤辽海归几度【搜神後记丁令威本辽东人学道於灵墟山後化鹤归辽集城门外华表柱时有少年举弓欲射之鹤乃飞徘徊空中而言曰有鸟有鸟丁令威去家千年今始归城郭如故人民非何不学仙冢累累遂高上冲天今辽东诸丁云其先世有升仙者但不知名字耳江南通志丁令威辽东人为涇县令游姑熟乐灵墟山泉石幽秀链丹於此丹成翔虚去抱朴子第一之丹名曰丹华第二之丹名曰神符第三之丹名曰神丹第四之丹名曰还丹第五之丹名曰餌丹第六之丹名曰链丹第七之丹名曰柔丹第八之丹名曰伏丹第九之丹名曰寒丹凡服九丹欲昇天则去欲且止人间亦任意皆能出入无间不可得而害之矣五云见七卷注】

天门山【太平寰宇记天门山在太平州当涂县西南三十里有二山夹大江东曰博望西曰天门按郡国志云天门山亦名蛾眉山楚获吴觥於此两山相对时人呼为东梁山西梁山

輿地志云博望梁山东西隔江相对如门相去数里谓之天门宋孝武诏曰梁山层岫云峙流同海岳天表象魏以旌国形仍以二山立阙故曰天门焉太平府志天门山在郡西南三十里亦称东梁山与和州西梁山夹大江对峙自江中远望色如横黛修妩静好宛宛不异蛾眉故又名蛾眉山】

迴出江上山【萧本作山上】双峰自相对岸映松色寒石分浪花碎参差远天际缥缈晴霞外落日舟去遥回首沉青霭【柳顾言诗泱泱浪花生江淹诗虚空起青霭崦嵫生暮霞苏东坡曰过姑熟亭下读李白十咏疑其浅近孙邈云闻之王安国此乃李赤诗秘阁下有赤集此诗在焉白集中无此赤见柳子厚集自比李白故名赤其後为厠鬼所惑而死今观其诗只如此可以比李白则其人心恙已久非厠鬼之罪也陆放翁入蜀记李太白集有姑熟十咏予族伯父彦远尝言东坡自黄州还过当涂读之抚手大笑曰?物败矣岂有李太白作此语者郭功父争以为不然东坡笑曰恐是太白後身所作耳盖功父少时诗句俊逸前辈或许之以为太白後身功父亦遂以自负故东坡因是戏之或曰十咏及归来乎笑矣乎僧伽歌怀素草书歌太白旧集本无之宋次道再编时贪多务得之遇也】

李太白集注卷二十二

卷二十三

钦定四库全书

李太白集注卷二十三

钱塘 王琦 撰

古近体诗共四十七首

与元丹丘方【一作仙】城寺谈玄作

茫茫大梦中惟我独先觉腾转风火来假合作容貌灭除昏疑尽领略入精要澄虑观此身因得通寂照朗悟前後际始知金仙妙幸逢禅居人酌玉坐相召彼我俱若丧云山岂殊调清风生虚空明月见谈笑怡然清莲宫永愿恣游眺【庄子且有大觉而後知此其大梦也释家以此身为地水火风四大假合而成坚者是地润者是水暖者是火动者是风楞严经净极光通達寂照含虚空却求观世间犹如梦中事湛然常定之谓寂莹然不昧之谓照寂其体也照其用也体用不离寂照双遣即是定慧交修止观互用之妙谛维摩诘所说经法无有人前後际断故华严经虽知诸法无有前际而广说过去虽知诸法无有後际而广说未来虽知诸法无有中际而广说现在金仙谓佛释成时曰李白诗云朗悟前後际始知金仙妙束文人如稻麻竹苇吐不出此十字】

寻高凤石门山中元丹丘

寻幽无前期乘兴不觉远苍崖渺难涉白日忽欲晚未穷三四山已历千万转寂寂闻猿愁行行见云收高松来好月空谷宜清秋谿深古雪在石断寒泉流峯峦秀中天登眺不可尽丹丘遥相呼顾我忽而哂遂造穷谷间始知静者闲留欢达永夜清晓方言还【中天半天也穷谷深谷也永夜长夜也】

安州般若寺水阁纳凉喜遇薛员外父【安州唐时隶淮南道又谓之安陆郡般若读若百惹释言般若华言智慧也寺依此立名】

翛然金园赏远近含晴光楼台成海气草木皆天香忽逢青云士共解丹霞裳水退池上热风生松下凉吞讨破万象褰窥临衆芳而我遗有漏与君用无方心垢都已灭永言题禅房【翛然犹悠然也庄子翛然而往翛然而来详见二十二卷注金园寺中园圃也须達长者欲买祇陀太子园为佛住处太子戏言金布满地中即当卖与须達遂出金饼布地周满园中厚及五寸广惟十里买此园地奉施如来起立精舍後人用金园事本此王褒诗带楼疑海气含盖似浮云庾信诗天香下桂殿仙梵入伊笙谢朓七夕赋厌白玉而为饰霏丹霞而为裳大般若经云何有漏法佛告善现世间五蘊十二处十八界四静虑四无量四无色定所有一切墮三界

法是有漏法庄子行乎无方郭象注随物转化也四十二章经心垢灭尽净无瑕秽维摩诘所说经心垢故众生垢心净故众生净妄想是垢无妄想是净颠倒是垢无颠倒是净取我是垢不取我是净】

鲁中都东楼醉起作【按唐书河南道有中都县本平陆县天宝元年更名】

昨日东楼醉【一作城饮】还应【一作归来】倒接?阿谁扶上马不省下楼时【接?帽也用山公醉归事见五卷注三国志龐统传向者之论阿谁为失】

对酒醉题屈突明府厅【按通志氏族略屈突氏乃代北复姓也本居玄朔後徙昌黎孝文改为屈氏至西魏复为屈突】

陶令八十日长歌归去来故人建昌宰借问几时回风落吴江雪纷纷入酒杯山翁今已醉舞袖为君开【陶潜归去来辞序予家贫耕殖不足以自给幼稚盈室瓶无储粟亲故多劝予为长吏家叔以予贫苦遂见用于小邑於时风波未静心惮远役彭泽去家百里公田之利足以为酒故便求之及少日眷然有归与之情自免去职仲秋至冬在官八十余日因事顺心命篇曰归去来辞唐时江南西道有建昌县隶洪州豫章郡】

月下独酌四首

花间【一作下文苑作前】一壶酒独酌无相亲举杯邀明月对影成三人月既不解饮影徒随我身暂伴月将影行乐须及春我歌月徘徊我舞影零乱醒时同交欢醉後各分散永结无情游相期邈云汉【文苑作碧岩畔】

其二

天若不爱酒酒星不在天地若不爱酒地应无酒【文苑作醴】泉天地既爱酒爱酒不媿天已闻清比圣复道浊如贤贤圣既已饮何必求神仙三杯通大道一斗合自然但得酒【繆本作醉】中趣勿为醒者传【孔融与曹操论酒禁书天垂酒星之耀地列酒泉之郡晋书轩辕右角南三星曰酒旗酒官之旗也主宴享酒食汉书酒泉郡武帝太初元年开应劭注其水若酒故曰酒泉也顏师古注相传俗云城下有金泉泉味如酒艺文类聚魏略曰太祖禁酒而人窃饮之故难言酒以浊酒为贤人清酒为圣人晋书孟嘉好酣饮愈多不乱桓温问嘉酒有何好而卿嗜之嘉曰公未得酒中趣耳胡震亨曰此首乃马子才诗也胡元瑞云近举李墨迹为证诗可伪笔不可伪耶琦按马子才乃宋元佑中人而文苑英华已载太白此诗胡说恐误】

其三

三月咸阳城【一作时】千花昼如锦【一作好鸟吟清风落花散如锦一作园鸟语成歌庭花笑如锦】谁能春独愁对此径须饮穷通与修短造化夙所禀一樽齐死生万事固难审醉

後失天地兀然就孤枕不知有吾身此乐最为甚【梁元帝诗黄龙戍北花如锦洛阳伽蓝记春风扇柳花树如锦淮南子轻天下细万物齐死生同变化】

其四

穷愁千万【一作有千】端美酒三百【一作惟数】杯愁多酒虽少酒倾愁不来所以知酒圣【一作圣贤】酒酣心自开辞粟卧首阳【一作饿伯夷】屡空饥【一作悲】颜回当代不乐饮虚名安用哉蟹螯即金液糟丘是蓬莱且须饮美酒乘月醉高台【晋书毕卓尝谓人曰得酒满数百斛船四时甘味置两头右手持酒杯左手持蟹螯拍浮酒船中便足了一生矣金液见五卷注糟丘见七卷注】

春归终南山松龙旧隐【地理今释终南山在今陕西西安府长安县南五十里东至蓝田县西至凤翔府郿县绵亘八百余里】

我来南山阳事事不异昔却寻溪中水还望岩下石蔷薇缘东窗女萝遶北壁别来能几日草木长数尺且复命酒樽独酌陶永夕【韩诗陶畅也】

冬夜醉宿龙门觉起言志【通志河南府河南县有□塞山俗曰龙门太平寰宇记阙塞山左氏传晋赵鞅纳王使女寛守阙塞服虔谓南山伊阙是也杜预注洛阳西南伊阙口也俗名龙门】

醉来脱宝剑旅憩高堂眠中夜忽惊觉起立明灯前闲轩聊直望晓雪河水壮哀哀歌苦寒鬱鬱独惆怅传说板筑臣李斯鹰犬人歟【缪本作鹘】起匡社稷宁复长艰辛而我胡为者叹息龙门下富贵未可期殷忧向谁写去去泪满襟举声梁甫吟青云当自致何必求知音【古乐府有苦寒行因行役遇寒而作传说板筑见廿二卷注李斯鹰犬见三卷注韵会?暴起也陈琳为袁绍檄豫州文举师扬威并匡社稷阮籍诗感物怀殷忧李善注韩诗曰耿耿不寐如有殷忧诗国风以写我忧毛传曰写除也梁甫吟见三卷注史记范睢传不意君能自致於青云之上】

寻山僧不遇作

石径入丹壑松门闭青苔闲塔有鸟迹禅室无人开窥窗见白拂挂壁生尘埃使我空叹息欲去仍徘徊香云徧【缪本作隔】山起花雨从天来已有空乐好况闻青【当作清】猿哀了然絶世事此地方悠哉【华严经乐音和悦香云照耀楞严经即时天雨百宝莲花青黄赤白间错粉糝】

过汪氏别业二首

游山谁可游子明与浮丘叠岭碍河汉连峯横斗牛汪生面北阜池馆清且幽我来感意气搥

炰列珍羞扫石待归月开池涨寒流酒酣益爽气为乐不知秋【列仙传陵阳子明上黄山采五石脂沸水而服之黄山图经黄帝与容成子浮丘公合丹於此山故有浮丘容成诸峯斗牛谓南斗牵牛二星史记正义吴地斗牛之分野谢灵运诗卜室倚北阜刘良注阜陵也】

其二

畴昔未识君知君好贤才随山起馆宇凿石营池台星【一作大】火五月中景风从南来数枝石榴发一丈荷花开恨不当此时相过醉金罍我行值木落月苦清猿哀永夜達五更吴歊送琼杯酒酣欲起舞四座歌相催日出远海明轩车且徘徊更游龙潭去枕石拂莓苔【杜预左传注畴昔犹前日也书尧典日永星火以正仲夏蔡沈集传星火东方苍龙七宿火谓大火夏至昏之中星也淮南子清明风至四十五日景风至史记律书景风居南方景者言阳气道竟故曰景风王叔斋籟记景风一曰凯风又曰薰风亦曰巨风起自赤天之暑门从南方来谢灵运诗行觞奏悲?永夜继白日金罍酒器也详七卷注楚辞吴歊蔡讴奏大吕些王逸注歊讴皆?也歊音于莓音梅】

待酒不至

玉壶系青丝沽酒来何遲山花向我笑正好衔杯时晚酌东窗下流莺复在兹春风与醉客今日乃相宜

独酌

春草如有意罗生玉堂陰东风吹愁来白髮坐相侵独酌劝孤影闲?面芳林长松尔何知【一作本无情】萧瑟为谁吟手舞石上月膝横花间琴过此一壶外悠悠非我心【一本云春草遍野绿新莺有佳音落日不尽欢恐为愁所侵独酌劝孤影闲歌面芳林清风寻空来岩松与共吟手舞石上月膝横花下琴过此一壶外悠悠非我心繆本第一句作春草变緑野第七句作碧松尔何知四字不同 楚词秋兰兮靡芜罗生兮堂下王逸注环其堂下罗列而生陶渊明诗挥杯劝孤影素问松吟高山虎啸岩岫张正见诗松吟欲舞风】

友人会宿

滌荡千古愁留连百壶饮良宵宜清谈皓月【一作然】未能寝醉来卧空山天地即衾枕

春日独酌二首

东风扇淑气水木荣春晖白日照绿草落花散且飞孤云还空山衆鸟各已归彼物皆有托吾生独无依对此石上月长醉歌【繆本作歌醉】芳菲【南史衡阳王义季传阳和扇气播厥之始陆机诗蕙草饶淑气张铄注淑善也陶潜诗万族各有托孤云独无依谢灵运诗暝还云际宿弄此石上月】

其二

我有紫霞想缅怀沧洲间且【萧本作思】对一壶酒澹然万事闲横琴倚高松把酒望远山
长空去鸟没落日孤云还但恐【缪本作悲】光景晚宿昔成秋颜【广韵缅远也缅音勉】

金陵江上遇蓬池隐者【太白自注时於落星石上以紫绮裘换酒为欢地理广记开封县有蓬池亦曰蓬泽故卫国之匡地竹书纪年云梁惠王发逢忌之藪以赐民即此太平寰宇记蓬池在开封府尉氏县北五里按述征记云大梁西南九十里尉氏县有蓬池阮籍诗云徘徊蓬池上回顾望大梁即此也隐者盖居於其间故因以为号江南通志落星冈在应天府西北九里一名落星墩又曰落星石景定建康志落星冈一名落星墩在城西北九里周回二十六里高一十二丈又江宁县西五十里临江亦有落星冈李白尝於落星石以紫绮裘换酒为欢此地也】

心爱名山游身随名山远罗浮麻姑台此去或未返遇君蓬池隐就我石上饭空言不成欢强笑惜日晚绿水向雁门【缪本作关】黄云蔽龙山叹息两客鸟徘徊吴越间共【缪本作一】语一执手留连夜将久解我紫绮裘且换金陵酒酒来笑复歌兴酣乐事多水影弄月色清光奈愁何明晨挂帆席离恨满沧波【广东通志麻姑峯在罗浮山之南其前有麻姑台下有白莲池池水注朱明洞罗浮山志冲虚观西南有石峯峭拔名曰麻姑峯旁有岩曰麻姑台树石清幽其上常有彩云白鹤仙女集焉晋唐以来人多有见之者景定建康志雁门山在城东南六十里周回二十里高一百二十五丈西连彭城山南连大城山北连陵山山势连绵类北地雁门故以为名輿地志云山东北有温泉可以浴饮之能治冷疾江南通志雁门山在江宁府上元县东南六十里太平寰宇记岩山在昇州江宁县南四十五里其山岩险故曰岩山宋孝武改曰龙山六朝事蹟鷄笼山寰宇记云在城西北九里西接落星涧北临栖玄塘輿地志云鷄笼山在覆舟山之西二百余步其状如鸡笼因以为名宋文帝元嘉中改为龙山以黑龙尝见真武湖此山此山正临湖上因以为名今去县六里又景定建康志龙山在城西南九十五里周回二十四里高一百二十丈太平州当涂县北有水以其山似龙形因以为名木华海赋维长綯挂帆席】

月夜听卢子顺弹琴

闲夜坐【萧本作坐夜】明月幽人弹素琴忽闻悲风调宛若寒松吟白雪乱纖手绿水清虚心鍾期久已没世上无知音【释居月琴曲谱录有悲风操寒松操白雪操白帖阳春白雪绿水悲风幽兰别鹤并琴曲名风俗通伯子牙方鼓琴鍾子期聽之而意在高山子期曰善哉乎巍巍若泰山顷之间而意在流水子期曰善哉乎汤汤若江河子期死伯牙破琴絕弦终身不复鼓以世无足为知音者也】

青溪半夜闻笛【青溪当作清溪在江南池州府城西北五里其地在唐时为秋浦县】

羌笛梅花引吴溪陇水情【一作清】寒山秋浦月【一作空山满明月】肠断玉关声【一

作情 羌笛见四卷注杨齐贤曰梅花引曲名乐府诗集梅花落本笛中曲也古?陇头流水分离四下念我行役飘然旷野详见愁阳春赋注玉关见四卷注】

日夕山中忽然有怀

久卧青【一作名】山云遂爲青【一作名】山客山深【一作春】云更好赏弄终日夕月衔楼间峯泉漱阶下石素心自此得真趣非外借【萧本作惜】鼯啼桂方秋风?籁归寂?思洪崖术欲往沧海【一作岛】隔云车来何迟抚已空叹息【□礼善沟者水漱之鼯飞生鸟也见七卷注初学记风吹万物有声曰籁广韵?远也神仙传卫叔卿与数人博戏其子度世曰是谁也叔卿曰洪崖先生魏武帝诗乘驾云车骖驾白鹿古诗轩车来何迟 借音积?音勉】

夏日山中

嬾摇白羽扇裸袒【繆本作体】青林中脱巾挂石壁露顶洒松风【北堂书钞语林云武侯乘素輿执白羽扇羽猎赋布乎青林之下】

山中与幽人对酒

两人对酌山花开一杯一杯复一杯我醉欲眠卿且去明朝有意抱琴来【宋书陶潜性嗜酒贵贱造之者有酒辄设潜若先醉便语客我醉欲眠卿可去其真率如此】

春日醉起言志

处世若大梦胡为劳其生所以终日醉颓然卧前楹觉来盼【繆本作眄】庭前一鸟花间鸣借问此何时春风语流莺感之欲叹息对酒还自倾浩歌待明月曲尽已忘情【宋书顔延之得酒必颓然自得张景阳诗借问此何时胡蝶飞南园浩?大?也楚辞临风悦兮浩?堂诗话太白天才絶出真所谓秋水出芙蓉天然去雕饰今所传石刻处世若大梦一诗序称大醉中作贺生为我读之此等诗皆信手纵笔而就他可知已琦尝见石刻於星凤楼帖中觉来盼庭前作揽衣覧庭际一鸟作有鸟对酒还自倾作未叹酒已倾数字不同贺生不知为谁若指知章恐无此理其出於後人伪托也】庐山东林寺夜怀【江西通志东林寺在庐山之?晋太元九年慧远建此山仪形九叠峻竦天絶而寺之所居尤尽林壑之美背负炉峰旁带瀑布清流环阶白云生栋别营禅室最居深静凡在瞻礼神气为之清爽慎蒙名山记庐山有东林寺寺始於晋慧远法师谢灵运为凿池种莲师与隐者十八人同修净土社缁素咸在谓之莲社师送客至虎溪而止常与陶渊明陆修静谈不觉过溪共笑而反今三门内屋於桥上水淹塞云即虎溪旁稻田中有莲数本即莲池也出寺有大溪度石桥或云此为虎溪】

我寻青莲宇独往谢城阙霜清东林钟水白虎溪月天香生虚空天乐鸣不歇宴坐寂不动大千入毫髮湛然冥真心旷劫断出没【陈子昂诗闻道白云居窈窕青莲宇杨齐贤曰青莲宇梵宫也楚词章句谢去也阿弥陀经彼佛国土常作天乐维摩诘经舍利弗言忆念我昔会於

林中宴坐树下释氏要覽宴坐又作燕坐燕安也安息貌也李善文选注大千者谓一三千界下至阿毗地狱上非想天为一世界千世界为小千世界千小世界为中千世界千中世界为大千世界法苑珠林须菩提答阿难曰我念一时入於三昧此大千世界弘广若斯置一毛端往来旋转如陶家轮南史帝问大僧正慧念曰见不可思议事不慧念答曰法身常住湛然不动楞严经一切衆生从无始来生死相续皆由不知常住真心韵会梵书以一世为一劫谢灵运山居赋析旷劫之微言说象法之遗旨】

寻雍尊师隐居

羣峭碧摩天逍遥不记年拔【萧本作拔】云寻古道倚树聽流泉花暖青牛卧松高白鹤眠语来江色暮独自下寒烟【列仙传老子乘青牛车去入大秦玉策记千岁之鹤随时而鸣能登於木其未千岁者终不集於树上也色纯白而脑尽成丹杨齐贤曰青牛花叶上青虫也有两角如蜗牛故云琦按青牛白鹤不过用道家事耳不必别作创解】

与史郎中钦【繆本作钦】聽黄鹤楼上吹笛【湖广通志黄鹤楼在武昌府城西南隅世传仙人乘黄鹤过此因名雄据江山为楚会大观】

一爲迁客去长沙西望长安不见家黄鹤楼中吹玉笛江城五月落梅花【江淹恨赋迁客海上乐府诗集梅花落本笛中曲也】

对酒

劝君莫拒杯春风笑人来桃李如旧识倾花向我开流莺啼碧树明月窥金罍昨日【繆本作来】朱顔子今日白髮催棘生石虎殿鹿走姑苏台自古帝王宅城阙闭黄埃君若不饮酒昔人安在哉【十六国春秋石虎飡羣臣於太武前殿佛图澄殿上褰衣而行吟曰殿乎殿乎棘子成林将坏人衣虎令发石下而视之有棘子生焉汉书伍被传子胥谏吴王不用迺曰臣今见麋鹿游姑苏之台也鲍照芜城赋直视千里外唯见起黄埃李善注埃尘也又鲍照诗壮士皆死尽余人安在哉】

醉题王汉阳厅

我似鷓鴣鸟南迁嬾北飞时寻汉阳令取醉月中归【张华禽经注广志云鷓鴣似雌雉飞但徂南不北也异物记云鷓鴣白黑成文其鸣自呼象小雉其志怀南不北徂也】

嘲王历阳不肯饮酒

地白风色寒雪花大如手笑杀陶渊【繆本作泉】明不饮杯中酒浪抚一张琴虚栽五株柳空负头上巾吾於尔何有【陶渊明畜素琴一张宅边有五柳树见十卷戏赠郑溧阳诗注陶渊明诗若复不快饮空负头上巾】独坐敬亭山【江南通志敬亭山宁国府城北十里古名

昭亭山东临宛溪南俯城闔?市风帆极目如画】

衆鸟高飞尽孤云独去闲相看两不厌只有敬亭山

自遣

对酒不觉暝落花盈我衣醉起步溪月鸟还人亦稀【韵会暝夕也】

访戴天山道士不遇【西溪丛语绵州图经云戴天山在县北五十里有大明寺开元中李白读书於此寺又名大康山即杜甫所谓康山读书处也一统志大匡山在绵州彰明县北三十里一名康山亦名戴天山】

犬吠水声中桃花带露【萧本作雨】浓树深时见鹿溪午不闻钟野竹分青霭飞泉挂碧峯无人知所去愁倚两三松【王筠诗日坂散朱雱天隅敛青霭陆机诗飞泉漱鸣玉唐仲言曰今人作诗多忌重叠右丞早朝妙絶古今犹未免五用衣冠之议如此诗水声飞泉树松桃竹语皆犯重吁古人於言外求佳今人於句中求隙失之远矣】

秋日与张少府楚城韦公藏书高斋作

日下空亭暮城荒古迹余地形连海尽天影落江虚旧赏人虽隔新知乐未疎彩云思作赋丹壁问藏书查拥随流叶萍开出水鱼夕来秋兴满回首意何如【谢朓诗山川隔旧赏朋僚多雨散楚词乐莫乐兮新相知彩云作赋用宋玉赋朝云事是赞其才思之美韵会植水中浮木也】

秋夜独坐怀故山

小隐慕安石远游学子【萧本作屈】平天书访江海云卧起咸京入侍瑶池宴出陪玉辇行夸胡新赋作谏猎短书成但奉紫霄顾非邀青史名庄周空说剑墨翟耻论兵拙薄遂踈絶归闲事耦耕顾无苍生望空爱紫芝荣寥落暝霞色微茫旧壑情秋山绿萝月今夕爲谁明【王康琚诗小隐隐林藪大隐隐朝市谢安石高卧东山见七卷注向于平肆意游五岳名山见十三卷注楚词远游者屈原之所作也其词曰悲时俗之迫厄兮愿轻举而远游鲍照诗云卧恣天行穆天子传天子觴西王母於瑶池之上潘岳籍田赋天子乃御玉辇夸胡用扬雄赋长杨事见一卷大猎赋注史记司马相如常从上至长杨猎是时天子方好自撃熊彘驰逐野兽相如上疏谏之梁简文帝赋升紫霄之丹地排玉殿之金扉青史见二十二卷注庄子说剑篇赵文王喜剑剑士夹门而客三千余人日夜相撃於前死伤者岁百余人如是三年国衰诸侯谋之太子悝患之募左右曰孰能说王之意止剑士者赐之千金左右曰庄子当能太子乃使人以千金奉庄子庄子弗受太子乃与见王王曰夫子所御杖长短何如曰臣有三剑唯王所用有天子剑有诸侯剑有庶人剑今大王有天子之位而好庶人之剑臣窃为大王薄之吕氏春秋墨子爲守攻公输般服而不肯以兵知高诱注公输般在楚楚王使设云梯爲攻宋之具墨

子闻而往说之楚王曰公输般天下之巧工也寡人使攻宋之城何爲不得墨子曰使公输般攻宋之城臣请爲宋守之备公输般九攻之墨子九却之又令公输般守备墨子九下之不肯以善用兵见知於天下也墨子名翟鲁人也周礼二耜爲耦贾公彦疏二耜爲耦者两人各执一耜若长沮桀溺耦而耕也礼记命农计耦耕事修耒耜具田器陈澧注耦谓二人相耦也通监谢安少有重名前後徵辟皆不就寓居会稽以山水文籍自娱虽爲布衣时人皆以公辅期之士大夫至相谓曰安石不出当如苍生何四皓歌莫莫高山深谷逶迤晔晔紫芝可以疗饥宋之问诗镜愁玄髮改心爱紫芝荣】忆崔郎中宗之游南阳遗吾孔子琴抚之潜然感旧【崔宗之见十卷注唐书地理志山南道邓州南阳郡有南阳縣文献通考琴有一十八樣究之雅度不过伏羲大舜夫子灵开云和五等而已夫子樣长三尺六尺四分说略古琴惟夫子列子二樣皆肩垂而濶非若今聳而狭也惟此二樣乃合古制或以夫子樣周遍皆作竹节樣非古制】

昔在南阳城唯淩独山蕨忆与崔宗之白水弄素月时过菊潭上纵酒无休歇泛此黄金花颓然清歌发一朝摧玉树生死殊飘忽留我孔子琴琴存人已没谁传广陵散但哭邙山骨泉户何时明长归【萧本作扫】狐兔窟【太平寰宇记独山在南阳縣西三十里一统志豫山在南阳府城东北十五里孤峯峭立俗名独山下有三十六陂白水即淩水也见二十卷游南阳白水诗注通典南阳郡菊潭县有菊水傍水居人饮此水多壽也太平寰宇记菊水出南阳縣东石涧山一名菊溪水或云水出石马峯峯如马焉其水重於诸水盛弘之荊州记云源旁悉生芳菊被崖浸潭涧流滋液其水极甘香谷中有三十余家不复穿井仰饮此水上壽百二十岁中壽百余其七十八十者犹以爲夭菊能轻身益气令人久壽於此有徵矣一统志菊潭在南阳府内乡县西北源出析谷东石涧山或曰出石马峯水旁生甘菊水极甘馨有数十家惟饮此水壽多至百岁之上其菊茎短花大其味甘美异於他菊人多收其种传於四方纵酒出史汉田儉传顔师古曰纵放也放意而饮酒也陶潜诗泛此忘忧物世说嵇中散临刑东市神气不变索琴弹之奏广陵散曲终曰袁孝尼尝请学此散吾靳固不与广陵散於今絶矣太平寰宇记芒山一作邙山在河南縣北十里一名平逢山亦邙山之别名也都城所枕杨仝期洛城记云北山连岭修亘四百余里实古今东洛九原之地也又戴延之西征记云西岸东垣亘阜相属伊尹苏秦张仪扁鹊田横刘寛杨修孔融吴後主蜀後主张华嵇康石崇何晏陆陲阮籍羊祜皆有冢在此山一统志北邙山在河南府城北十里山连偃师巩孟津三县绵亘西百余里东汉诸陵及唐宋名臣坟多在此琦按邙山即崔葬处隋炀帝秦孝王諫仲秋卜宅将归泉户张孟阳诗狐兔窟其中芜秽不复扫】

忆东山二首【施宿会稽志东山在上虞縣西南四十五里晋太傅谢安所居也一名谢安山巍然特出於衆峯间拱揖亏蔽如鸾鹤飞舞其巔有谢公调马路白云明月二堂遗址千嶂林立下视沧海天水相接盖絶景也下山出微径爲国庆寺乃太傅故宅旁有薔洞俗传太傅携伎女游宴之所】

不向东山久薔薇几度花白云还【繆本作他】自散明月落谁家

其二

我今携谢妓长啸絕人羣欲报东山客开关扫白云

望月有怀

清泉映疎松不知几千古寒月摇清【繆本作轻】波流光入窗户对此空长吟思君意何深
无因见安道兴尽愁人心【王子猷雪夜访戴安道详九卷注】

对酒忆贺监二首【并序】

太子宾客贺公於长安紫极宫一见余呼余爲谪仙人因解金龟换酒爲乐【繆本下多没後
对酒四字】怅然有怀而作是诗【本事诗李太白初自蜀至京师舍於逆旅贺知章闻其名
首访之既奇其姿复请所爲文出蜀道难以示之读未竟称叹者数四号爲谪仙解金龟换酒
与倾尽醉期不间日由是声誉光赫金龟盖是所佩杂玩之类非武后朝内外官所佩之金龟
也杨升庵因杜诗有金鱼换酒之句偶尔相似遂谓白弱冠遇贺知章在中宗朝未改武后之
制云云考武后天授元年九月改内外官所佩鱼爲龟中宗神龙元年二月诏文武官五品以
上依旧式佩鱼袋当是时太白年未滿十齡何能与知章相遇於长安又知章自开元以前官
不过太常博士品居从七於例亦未得佩鱼杨氏之说殆未之考也】

四明有狂客风流【一作霞衣】贺季真长安一相见呼我谪仙人昔好杯中物今【一作翻
】爲松下尘金龟换酒处却忆泪沾巾【名山洞天福地记四明山周围一百八十里名丹山
赤水之天在明州唐书贺知章字季真越州永兴人性旷夷善谈说陆象先尝谓人曰季真清
谈风流吾一日不见则鄙吝生矣证圣初擢进士超拔羣类科累迁太常博士开元十三年迁
礼部侍郎兼集贤院学士一日并谢迁太子右庶子充侍读徙工部肃宗爲太子知章迁宾客
授秘书监晚节尤诞放遨嬉里巷自号四明狂客及秘书外监每醉辄属词笔不停书咸有可
观未始刊饰善草隶好事者具笔研从之意有所愜不复拒然纸才十数字世传以爲宝陶潜
诗天运苟如此且尽杯中物释昙迁诗我住邗江侧终爲松下尘】

其二

狂客归四明山陰道士迎敕赐镜湖水爲君台沼荣人亡余故宅空有荷花生念此杳如梦凄
然伤我情【唐书贺知章天宝初病梦游帝居数日寤乃请爲道士还乡里诏许之以宅爲千
秋观而居又求周宫湖数顷爲放生池有诏赐镜湖剡川一曲既行帝赐诗皇太子百官饯送
擢其子僧子爲会稽郡司马赐绯鱼使侍养幼子亦聽爲道士卒年八十六施宿会稽志唐贺
秘监宅在会稽县东北三里八十步今天长观是琦按窰蒙述书赋注贺知章天宝二年以年
老上表请入道归乡里特诏许之知章以羸老乘輿而往到会稽无几老终九年冬十二月诏
曰故越州千秋观道士贺知章神清志逸学富才雄挺会稽之美箭蘊崑冈之良玉故飞名仙
省侍讲龙楼愿追二老之奇踪克遂四明之狂客允協初志脱落朝衣驾青牛而不还狎白□
而长往舟壑靡息人琴两亡推旧之怀有深追悼宜加殯礼式展哀荣可赠兵部尚书据此书
及唐书本传知章归後无几即迁化矣乃许鼎撰通和祖先生墓志云贺监得摄生之妙近数

百年不死荷笈卖药如韩康伯近在天台山升□徧於人聽元和己亥先生遇之谓曰子寬中柔外可以语至道也後十岁遇尔於小有乃授断谷丹经徐鉉序云贺监以天宝二年始得还乡既而天下多事遂与世絶止於吴越故老亦不能知其所终是皆以知章仙去耶读此诗所云今爲松下尘又云人亡余故宅无稽之口可以杜矣】

重忆一首

欲向江东去定将谁举杯稽山无贺老却棹酒船回【将与也稽山谓会稽山】

春滞沅湘有怀山中【史记浩浩沅湘兮正义曰说文云沅水出牂牁东北流入江湘水出零陵县海山北入按二水皆经岳州而入大江也後人以沅湘为岳州之异称 沅音原又音阮】

沅湘春色还风暖烟草绿古之伤心人於此肠断续予非怀沙客但美采菱曲所愿归东山寸心於此足【史记屈原乃作怀沙之赋於是怀石遂自投汨罗以死尔雅翼楚之风俗当菱熟时士女相与采之故有采菱之歌以相和爲繁华流荡之极招魂云涉江采菱发阳阿阳阿者采菱之曲也沈约诗所愿从之游寸心於此足】

落日忆山中

雨後烟景绿晴天散余霞东风随春归发我枝上花花落时欲暮见此令人嗟愿游名山去学道飞丹砂【谢朓诗余霞散成绮】

忆秋浦桃花旧游时窜夜郎

桃花春水生白石今出没摇荡女萝枝半挂【萧本作摇】青天月不知旧行径初拳几枝蕨三载夜郎还於兹链金骨【埤雅蕨初生无叶可食状如大雀拳足又如其足之蹙也故谓之蕨尔雅翼蕨初生如小兒拳紫色而肥杨升庵曰黄山谷诗蕨芽初长小儿拳以爲奇句然太白已有不知行径下初拳几枝蕨之句山谷落第二义矣】

李太白集注卷二十三

卷二十四

钦定四库全书

李太白集注卷二十四

钱塘 王琦 撰

古近体诗共六十五首

越中秋怀【越中唐时之越州又谓之会稽郡隶江南东道】

越水遶碧山周回数千里乃是天镜中分明画【萧本作尽】相似【一本首四句云蹈海思仲连游山慕康乐攀云穷千峯弄水涉万壑】爱此从冥搜永怀临湍游【一作林湍幽】一为沧波客十见红蕖秋观涛壮天险望海令人愁路遐迫西照岁晚悲东流何必探禹穴逝【繆本作誓】将归蓬丘不然五湖上亦可乘扁舟【孙绰天台山赋序远寄冥搜李善注搜访幽冥也梁简文帝诗红蕖间青琐紫露湿丹楹越地左绕浙江江有涛水昼夜再上枚乘七发曰观涛於广陵之曲江正谓此江也汉书司马迁传上会稽探禹穴张晏曰禹巡狩至会稽而崩因葬焉上有孔穴民间云禹入此穴水经注会稽山东有剡去庙七里深不见底谓之禹井云东游者多探其穴也诗国风逝将去女适彼乐土朱传云逝往也十洲记蓬丘蓬莱山也国语范蠡乘轻舟以泛於五湖莫知其所终极史记范蠡乃乘扁舟浮於江湖变名易姓适齐为鸱夷子皮之陶为陶朱公】

效古二首

朝入天苑中谒帝蓬莱宫青山映辇道碧树摇烟空谬题金闺籍得与银台通待诏奉明主抽毫颂清风归时落日【胡本作花】晚蹀躞浮云骢人马本无意飞驰自豪雄入门紫鸳鸯金井双梧桐清歌弦古曲美酒沽新丰快意且为乐列筵坐羣公光景不可留生世如转蓬早达胜晚遇羞比垂钓翁【天苑禁苑也唐书大明宫在禁苑东南西接宫城之东北隅长千八百步广千八十步曰东内本永安宫贞观八年置九年曰大明宫以备太上皇清暑百官献饗以助役高宗以风痹厌西内湫湿龙朔三年始大兴葺曰蓬莱宫咸亨元年曰含元宫长安元年复曰大明宫上林赋辇道纚属顔师古注辇道谓阁道可以乘辇而行者也谢朓诗既通金闺籍李善注金闺即金门也应劭汉书注曰籍者为尺二竹牒纪其年纪名字物色悬之宫门案省相应乃得入也唐大明宫有银台门详六卷注通监玄宗即位始置翰林院密迓禁廷延文章之士下至僧道书画琴碁数术之工皆处之谓之待诏胡三省注唐天子在大明宫翰林院在右银台门内在兴庆宫院在金明门内若在西内院在显福门内若在东都及华清宫皆有待诏之所其待诏者有词学经术合链僧道卜祝术艺书弈各别院以廩之日晚而退其所重者词学谢庄月赋抽毫进牍以命仲宣李善注毫笔毫也诗大雅吉甫作诵穆如清风韵会蹀躞行貌浮云骢见四卷注紫鸳鸯见二卷注金井见三卷注梁元帝诗试酌新丰酒谢灵运诗

列筵皆静寂吕延济注列筵谓四座也转蓬见九卷注南史张纘年二十二累迁尚书吏部郎俄而长兼侍中时人以为早达垂钓翁谓吕尚年八十钓於渭滨始遇文王蹠躅音叠燮】

其二

自古有秀色西施与东邻蛾眉不可妬况乃效其矚所以尹婕妤羞见邢夫人低头不出气塞默少精神寄语无盐子如君何足珍【西施效矚见二卷注东邻见四卷注史记武帝时幸夫人尹婕妤与邢夫人同时幸有诏不得相见尹夫人自请武帝愿望见邢夫人帝许之即令他夫人饰从御者数十人为邢夫人来前尹夫人前见之曰非邢夫人身也帝曰何以言之对曰视其身貌形状不足以当人主矣於是帝乃诏使邢夫人衣故衣独身来前尹夫人望见之曰此真是也於是乃低头俛而泣自痛其不如也史记日者传伏轼低头卒不能出气顔氏家训公私宴集谈古赋诗塞默低头欠伸而已无盐丑妇见四卷注 婕音接妤音于】

拟古十二首

青天何历历明星如白石【缪本作白如石】黄姑与织女相去不盈尺银河无鹊桥非时将安适闺人理统素游子悲行役瓶冰知冬寒霜露欺远客客似秋叶飞飘飏不言归别後罗带长愁寛去时衣乘月托宵梦因之寄金徽【当作微 古诗衆星何历历行列貌太平御览尔雅云河鼓谓之牵牛又古歌云东飞伯劳西飞燕黄姑织女时相见黄姑者即河鼓也为吴音讹而然锦绣万花谷牵牛谓之河鼓声转而为黄姑也初学记天河亦曰银河白帖淮南子乌鹊填河以成桥而渡织女中华古今注鹊一名神女俗云七日填河成桥顔师古汉书注纨素今之绢也柳惲诗念君方远游贱妾理纨素吕氏春秋见瓶水之冰而知天下之寒旧唐书贞观二十二年契苾回纥等十余部落相继归国太宗各因其地土择其部落置为州府以回纥部为瀚海都督府仆骨为金微都督府云云新唐书金微都督府以仆固部置隶安北都护府 萧士贇曰此篇伤穷兵黷武行役无期男女怨旷而不得遂其室家之情感时而悲者焉哀而不伤怨而不诽真有国风之体此晦庵所谓圣於诗者与】

其二

高楼入青天下有白玉堂明月看欲堕当窻悬清光遥夜一美人罗衣沾秋霜含情弄柔瑟弹作陌上桑弦声何激烈风卷绕飞梁行人皆踟躅栖鸟去回翔但写妾意苦莫辞此曲伤愿逢同心者飞作紫鸳鸯【古诗黄金为君门白玉为君堂江总诗并胜余人白玉堂长门赋悬明月以自照兮遥夜长夜也楚辞靚杪秋之遥夜陌上桑古相和歌曲详六卷注歌声绕梁见十一卷注鲁灵光殿赋飞梁偃蹇以虹指韵会踟躅住足也 踟躅音掷逐】

其三

长绳难系日自古共悲辛黄金高北斗不惜买阳春石火无留光还如世中人即事已如梦後來我谁身提壺莫辞贫取酒会四邻仙人殊恍惚未若醉中真【傅玄诗岁暮景迈羣光絶安

得长绳系白日唐书尉迟敬德传王曰公之心如山岳然虽积金至斗岂能移之又唐人诗身後堆金柱北斗疑当时俚语有此刘勰新论人之短生犹如石火炯然以过法苑珠林石火无恒焰电光非久停】

其四

清都綠玉树灼烁瑶台春攀花弄秀色远赠天仙人香风送紫蘂直到扶桑津耻【萧本作取】掇世上艳所贵心之珍相思传一笑聊欲示情亲【楚辞造句始而观清都朱子注清都列子以为帝之所居也左思蜀都赋晖丽灼烁刘渊林注灼烁艳色也刘良注灼烁光彩貌鲍照诗朝日灼烁发园华拾遗记崑仑山傍有瑶台十二各广千步皆五色玉为台基抱朴子上士举形昇虚谓之天仙木华海赋翔阳逸骇於扶桑之津吕延济注扶桑之津日出之处】

其五

今日风日好明日恐不如春风笑於人何乃愁自居吹箫舞彩凤酌醴醢神鱼千金买一醉取乐不求余達士遗天地东门有二疏愚夫同瓦石有才知卷舒无事坐悲苦块然涸辙鲋【鲋古本作鱼萧氏以鱼字重上一韵当作鲋音蒲无疑今从之吹箫致凤用萧史事见六卷注嵇康诗鸾觞酌醴神鼎烹鱼说文醴酒一宿熟者曹植诗玉尊盈桂酒河伯献神鱼汉书疏广为太傅兄子受为少傅太子每朝因进见太傅在前少傅在後父子并为师傅朝廷以为荣在位五岁广谓受曰吾闻知足不辱知止不殆功遂身退天之道也今仕宦至二千石宦成名立如此不去惧有後悔岂如父子相随出关归老故乡以壽命终不亦善乎受叩头曰从大人议即日父子俱称病满三月赐告广遂称笃上疏乞骸骨上以其年笃老皆许之加赐黄金二十斤皇太子赠以五十斤公卿大夫故人邑子设祖道供帐东都门外送者车数百两辞决而去及道路观者皆曰贤哉二大夫广既归乡里日令家供具设酒食请族人故旧宾客与相娱乐涸辙鲋用庄子事见二十卷注】

其六

运速天地闭胡风结飞霜百草死冬月六龙颺西荒太白出东方彗星扬精光鸳鸯非越鸟何为眷南翔惟昔鷹将犬今为侯与王得水成蛟龙争池夺凤凰北斗不酌酒南箕空簸扬【周易天地闭贤人隐月令孟冬之月天气上腾地气下降天地不通闭塞而成冬六龙谓天子大驾详八卷注汉书太白出西方失其行夷狄败出东方失其行中国败宋书太白出东方利用兵西方不利晋书彗星所谓扫星本类星末类彗小者数寸长或竟天见则兵起大水主扫除除旧布新有五色各依五行本精所主史臣按彗本无光傅日而为光故夕见则东指晨见则西指在日南北皆随日光而指顿挫其芒或长或短光芒所及则为灾唐书乾元三年四月丁巳有彗星见於东方在娄胃间色白长四尺东方疾行历昴毕觜参东井舆鬼柳轩辕至右执法西凡五旬余不见闰四月辛酉朔有彗星出於西方长数丈至五月乃灭娄为鲁胃昴毕为赵觜参为唐东井舆鬼为京师分柳其半为周分二彗仍见者荐祸也曹植诗愿随越鸟翻飞南翔陈琳檄文谓其鷹犬之才爪牙可任韵会将与也魏书杨大眼传时将南伐李冲典

选征官用为军主大眼顾谓同僚曰吾之今日所谓蛟龙得水之秋自此一举终不复与诸君齐列矣晋中兴书荀勗徙中书监为尚书令人贺之乃发恚曰夺我凤凰池卿诸人何贺我耶诗小雅惟南有箕不可以簸扬维北有斗不可以挹酒浆孔颖达正义云言惟此天上其南则有箕星不可以簸扬米粟其北则有斗星不可以挹其酒浆运速天地闭喻国家否运之至如四运将终之时天地之气亦为之闭塞不通胡风结飞霜喻禄山起兵为害百草死冬月喻人民遭乱而死六龙颓西荒喻明皇西幸蜀中太白出东方彗星扬精光谓仰观天象昭昭可察灾害不知何日可除鸳鸯非越鸟何为眷南翔谓已非南人而向南奔走疑太白於此时偕妇同行故用鸳鸯为喻此诗其作於流夜郎之前耶惟昔鹰将犬今为侯与王谓出身微劣不过效鹰犬之用而能得尺寸之功以致身高位者多也得水成蛟龙谓将帅郭子仪李光弼一流争池夺凤凰谓宰相房琯张镐一流北斗不酌酒南箕空簸扬伤已无人荐达如彼天星之中北斗虽有斗名而不可用之以酌酒南箕虽有箕名而不可用之以簸扬米穀徒有高才不为人用其自悲之意深矣萧氏以为太白从永王时作诗讽其勤王而王不从故作是诗者非也】

其七

世路今太行回车竟何托万族皆凋枯遂无少可乐旷野多白骨幽魂共销铄荣贵当及时春华宜照灼人非崑山玉安得长璀璨身没期不朽荣名在麟阁【刘孝标广絶交论世路嶮巇一至於此太行孟门岂云嶮絶太行山路最为险峻见五卷注陶潜诗万族各有托魏许昌碑表白骨既交辉於旷野苏武诗努力爱春华李善注春华喻少时也古读曲歌千叶红芙蓉照灼緑水边韩诗外传玉出於崑山说文璀璨玉光也鲁灵光殿赋下崑崙以璀璨汉宣帝图画功臣於麒麟阁详四卷注 璀璨纬切催上声】

其八

月色不可扫客愁不可道玉露生秋衣流萤飞百草日月终销毁天地同枯槁蟋蟀啼青松安见此树老金丹宁误俗昧者难精讨尔非千岁翁多恨去世早饮酒入玉壶藏身以为宝【岁华纪丽秋露白故曰玉露楚辞白日晚晚其将入兮明月销铄而灭毁蟋蟀寒蟬也详五卷注费长房见老翁卖药市罢辄跳入壶中详九卷注】

其九

生者为过客死者为归人天地一逆旅同悲万古尘月兔空捣药扶桑已成【一作以为】薪白骨寂无言青松岂知春前後更叹息浮荣何足珍【列子古者谓死人为归人夫言死人为归人则生人为行人矣左传保於逆旅杜预注逆旅客舍也孔颖达正义逆迎也旅客也迎止宾客之处也庄子悲夫世人直为物逆旅耳傅玄拟天问月中何有白兔捣药楚辞章句东方有扶桑之木其高万仞日下浴於汤谷上拂其扶桑爰始而登照耀四方】

其十

仙人骑彩凤昨下阆风岑海水三清浅桃源一见寻遗我緑玉盃兼之紫琼琴盃以倾美酒琴以闲素心二物非世有何论珠与金琴弹松里风盃劝天上月风月长相知世人何倏忽【十洲记崑仑山三角其一角正北干辰之辉名曰阆风巅神仙传麻姑云接待以来见东海三为桑田向到蓬莱水又浅於往日桃源见二卷注江淹诗素心正如此李善注方言曰素本也】

其十一

涉江弄秋水爱此荷花鲜攀荷弄其珠荡漾不成圆佳期彩云重欲赠隔远天相思无由见怅望凉风前【吴均诗愿君早旋反及此荷花鲜楚辞与佳期兮夕张】

其十二

去去复去去辞君还忆君汉水既殊流楚山亦此分人生难称意岂得长为羣越燕喜海日燕鸿思朔云别久容华晚琅玕不能饭日落知天昏梦长觉道远望夫登高山化石竟不返【古诗行行重行行与君生别离鲍照诗人生不得常称意吴越春秋胡马望北风而立越燕向日而熙谁不爱其所近悲其所思者乎酉阳杂俎紫胸轻小者是越燕尔雅翼越燕小而多声颌下紫巢於门楣上谓之紫燕亦谓之汉燕顔延之赭白马赋眷西极而骧首望朔云而蹠足张衡南都赋珍羞琅玕充溢圆方李周翰注琅玕玉名饮食比之所以为美初学记刘义庆幽明録曰武昌北山上有望夫石状若人立古传云昔有贞妇其夫从役远赴国难携弱子餞送此山立望其夫而化为石因以为名焉】

感兴八首

瑶姬天帝女精彩化朝云宛转入梦宵无心向楚君锦衾抱秋月绮席空兰芬茫昧竟谁测虚传宋玉文【瑶姬见一卷惜余春赋注宋玉高唐赋见二卷古诗第五十八首注诗国风锦衾烂兮江淹诗绮席生浮埃】

其二

洛浦有宓妃飘飏雪争飞轻云拂素月了可见清辉解佩欲西去【缪本作走】含情讵相违香尘动罗袜淥水不沾衣陈王徒作赋神女岂同归好色伤大雅多为世所讥【楚辞九叹迎宓妃於伊雒王逸注宓妃神女盖伊洛水之精也史记索隐如淳曰宓妃伏羲女溺死洛水遂为洛水之神曹植洛神赋序黄初三年余朝京师还济洛川古人有言斯水之神名曰宓妃感宋玉对楚王说神女之事遂作斯赋髣髴兮若轻云之蔽月飘飏兮若流风之回雪愿诚信之先达解玉佩以要之凌波微步罗袜生尘皆赋中语也陈王即曹植植以太和六年封陈王萧士贇曰高唐神女二赋乃宋玉寓言以成文章洛神赋则子建拟之而作後世之人如痴子听人说梦以为诚有其事太白知其托词而讥其伤大雅可谓识见高远矣宓当作慮即古伏字後人有作宓者误也或作密音读更非】

其三

裂素持作书将寄万里怀眷眷待远信竟岁无人来征鸿务随【繆本作从】阳又不为我栖委之在深篋蠹【繆本作尘】鱼坏其题何如投水【繆本作火】中流落他人开不惜他人开但恐生是非【後汉书范式传裂素为书以遗巨卿李善文选注纂文曰书缣曰素东观余论古者谓使为信故逸少帖云信遂不取答真诰云公至山下又遣一信见告谢宣城传云荆州信去倚待陶隐居帖云明旦信还仍过取反凡言信者皆谓使人也近世犹有此语故虞永兴帖云事已信人口具而今之流俗遂以遣书馈物为信故谓之书信而谓前人之语亦然不复知魏晋以还所谓信者乃使之别名耳江淹诗远心何所慕云边有征鸿郑康成毛诗笺雁者随阳而处孔安国尚书传随阳之鸟鸿雁之属孔穎达正义曰之行也夏至渐南冬至渐北鸿雁之属九月而南正月而北左思蜀都赋所云木落南翔水判北徂是也曰阳也此鸟南北与日进退随阳之鸟故称阳鸟古人谓书籤为题传所云隋唐藏书皆金题玉躒是矣此所云题者乃书札面上手笔封题之处】

其四

芙蓉娇绿波桃李夸白日偶蒙春风荣生此艳阳质岂无佳人色但恐花不实宛转龙火飞零落互相失讵知凌寒松千载长守一【守一不变其常也萧士贇曰按此篇已见二卷古诗四十七首必是当时传写之殊编诗者不能别姑存於此卷观者试以首句比并而论美恶显然识者自见之矣注已见前不复重出】

其五

十五游神仙仙游未曾歇吹笙吟松风泛瑟窥海月西山玉童子使我鍊金骨欲逐黄鹤飞相呼向蓬阙【江淹诗泛瑟卧遥帷张铣注泛瑟抚瑟也魏文帝诗西山一何高高高殊无极上有两仙童不饮亦不食灵宝经鍊骨成金】

其六

西国【胡本作北】有美女结楼青云端蛾眉艳晓月一笑倾城欢高节不可夺【繆本作夺明主】炯心如凝丹常恐彩色晚不为人所观安得配君子共乘【繆本作成】双飞鸾【古诗君亮执高节晋书张华曰臣先帝老臣中心如丹江淹诗彩色世所重琦按此篇与二卷中古诗之二十七首互有同异想亦是其初藁编诗者不审遂重列於此耳注已见前者不复重出】

其七

竭来荆山客谁为珉玉分良宝絶见弃虚持三献君直木忌先伐芬兰哀自焚盈满天所损沉冥道所羣东海有碧水西山多白云鲁连及夷齐可以蹶清芬【竭来详见十三卷怀友人岑

伦诗注说文珉石之美者鲍照诗泾渭不可杂珉玉当早分萧士贇曰此篇已见二卷古风之三十六章但有数语之异是亦当时初本传写之殊编诗者不忍弃两存之耳注已见前者不复重出】

其八

嘉谷隐丰草草深苗且稀农夫既不异【胡本作易】孤穗将安归常恐委畴陇忽与秋蓬飞乌得荐宗庙为君生光辉【书吕刑农殖嘉谷说文禾嘉谷也二月始生八月而熟得时之中故谓之禾诗大雅芾厥丰草陶潜诗草盛豆苗稀曹植诗黍稷委畴陇农夫安所获萧士贇曰此篇比兴之诗刺时贤不能引类拔萃以为国用者与嘉谷隐丰草草深苗且稀喻贤人在野混於常人之中农夫既不异孤穗将安归农夫见谷之在草而不别异之犹贤者见贤之在野而不荐引之也常恐委畴陇忽与秋蓬飞喻在野之贤唯恐老之将至与草木俱腐也乌得荐宗庙为君生光辉在野之贤冀在位之贤引而进之以羽仪朝廷也嗟乎士怀才而不遇千载读之犹有感激穗音遂】

寓言三首

周公负斧扆成王何夔夔武王昔不豫剪爪投河湄贤圣遇谗慝不免人君疑天风拔大木禾黍咸伤萎管蔡扇苍蝇公赋鸛鵒诗金縢若不启忠信谁明之【逸周书成王嗣幼弱未能践天子之位周公摄政君天下弭乱六年而天下大治乃会方国诸侯於宗周大朝诸侯明堂之位天子之位负斧扆南面立礼记明堂位昔者周公朝诸侯於明堂之位天子负斧依南乡而立郑康成注负之言背也斧依为斧丈屏风於户牖之间周公於前立焉孔颖达礼记正义天子当依而立者依状如屏风以绦为质高八尺东西当户牖之间绣为斧文也亦曰斧依故艸礼曰天子设斧依於户牖之间左右凡天子衮冕负斧依郑注云依如今绦素屏风也有绣斧文所以示威也尔雅云牖户之间谓之扆郭注云窻东户西也依此诸解是设依於庙堂户牖之间天子见诸侯则依而立负之而南面以对诸侯也扆依古字通用书舜典夔夔斋栗孔安国传夔夔悚惧貌尚书既克商二年王有疾弗豫二公曰我其为王穆卜周公曰未可以戚我先王公乃自以为功为三坛同墠为坛於南方北面周公立焉植璧秉珪乃告太王王季文王公归纳册於金縢之匮中王翼日乃瘳武王既丧管叔及其羣弟流言於国曰公将不利於孺子周公乃告二公曰我之弗辟我无以告我先王周公居东二年则罪人斯得於後公乃为诗以贻王名之曰鸛鵒王亦未敢诮公秋大熟未获天大雷电以风禾尽偃大木斯拔邦人大恐王与大夫尽弁以启金縢之书得周公所自以为功代武王之说王执书以泣曰昔公勤劳王家惟予冲人勿及知今天动威以彰周公之德惟朕小子其亲迎我国家礼亦宜之王出郊天乃雨反风禾则尽起岁则大熟史记蒙恬列传昔周成王初立未离襁褓周公旦负王以朝卒定天下及成王有病甚殆周公旦自揃其爪以沈於河曰王未有识是旦执事有罪殃旦受其不祥乃书而藏之记府及王能治国有贼臣言周公旦欲为乱久矣王若不备必有大事王乃大怒周公旦走而奔於楚成王观於记府得周公旦沈书乃流涕曰孰谓周公旦欲为乱乎杀言之者而反周公旦鲁世家亦载此事太白此诗盖合二事而互言之萧士贇曰此惧谗诗也隐括金縢之事以申其意扆隐绮切衣上声同倚】

其二

遥裔双彩凤婉娈三青禽往还瑶台里鸣舞玉山岑以欢秦娥意复得王母心区区【缪本作驱驱】精卫鸟衔木空哀吟【卢思道诗丰茸鸡树密遥裔鹤烟稠毛苌诗传婉娈少好貌山海经三青鸟皆西王母使也详六卷注瑶台玉山皆西王母之居见五卷注江淹诗愿乘青鸟翼径出玉山岑秦娥谓秦穆公女弄玉也见六卷注精卫衔木填海见一卷大鹏赋注萧士贇曰此刺当时出入宫掖取媚后妃公主以求爵位者彩凤青禽以比佞幸瑶台玉山以比宫掖秦娥以比公主王母以比后妃精卫衔木以比小臣怀区区报国之心尽忠竭诚而不见知其意微而显矣 裔音曳】

其三

长安春色归先入青门道绿杨不自持从风欲倾倒海燕还秦宫双飞入帘栊相思不相【缪本作可】见托梦辽城东【雍录青门在汉都城为东面南来第一门即邵平种瓜之地也谢惠连诗升月照帘栊说文栊房室之疏也秦置辽西辽东二郡因在辽水之西东而名在唐时辽西为柳城郡及北平郡之东境辽东为安东都护府之地外与奚契丹室韦靺鞨诸夷相接皆边城也有兵戎之萧士贇曰此闺思诗也良人从军滔滔不归感时触物而动怀人之思者欬绿杨海燕以起兴也婉然国风之体所谓圣於诗者此哉】

秋夕旅怀

凉风度秋海吹我乡思飞连山去无际流水何时归目极【缪本作日夕】浮云色心断明月晖芳草歇柔艳白露催寒衣梦长银汉落觉罢天星稀含悲【缪本作叹】想旧国泣下谁能挥

感遇四首

吾爱王子晋得道伊洛滨金骨既不毁玉颜长自春可怜浮丘公猗靡与情亲举手白日间分明谢时人二仙去已远梦想空殷勤【王子晋浮丘公事详见五卷凤笙篇注子虚赋扶舆猗靡张铄注猗靡相随貌阮籍诗猗靡情欢爱萧士贇曰此诗盖有所怀托二仙而言也】

其二

可叹东篱菊茎疎叶且微【胡本作肥】虽言异兰蕙亦自有芳菲未泛盈樽酒徒沾清露辉当荣君不采飘落欲何依【陶潜诗采菊东篱下】

其三

昔余闻姮娥窃药驻云发不自娇玉颜方希链金骨飞去身莫返含笑坐明月

紫宫夸蛾眉随手会凋歇【淮南子羿请不死之药於西王母姮娥窃以奔月高诱注姮娥羿妻羿请不死药於西王母未及服之姮娥盗食之得仙奔入月中为月精也左思诗列宅紫宫里李周翰注紫宫天子所居处】

其四

宋玉事楚王立身本高洁巫山赋彩云郢路歌白雪举国莫能和巴人皆卷舌一惑【萧本作惑】登徒言恩情遂中絶【宋玉高唐赋言巫山彩云及对楚王问言客有歌於郢中为阳春白雪其曲弥高其和弥寡俱详二卷注登徒子好色赋大夫登徒子侍於楚王短宋玉曰玉为人体貌闲丽口多微辞又性好色愿王勿与出入後宫王以登徒子之言问宋玉玉曰体貌闲丽所受於天也口多微辞所学於师也至於好色臣无有也王曰子不好色亦有说乎有说则止无说则退班婕妤诗弃捐篋笥中恩情中道絶萧士贇曰太白此篇借宋玉事以申已意也】

翰林读书言怀呈集贤【缪本多院内二字】诸学士【唐书百官志开元十三年改丽正修书院为集贤殿书院五品以上为学士六品以下为直学士宰相一人为学士知院事常侍一人为副知院事又置判院一人押院中使一人玄宗常选耆儒日一人侍读以质史籍疑义至是置集贤院侍读学士侍讲直学士其後又增置修撰官校理官待制官留院官知校讨官文学直之员又云学士之职本以文学言语被顾问出入侍从因得参谋议纳谏诤其礼尤宠而翰林院者待诏之所也唐制乘舆所在必有文词经学之士下至卜医伎术之流皆直於别院以备宴见而文书诏令则中书舍人掌之自太宗时名儒学士时时召以草制然犹未有名号乾封以後始号北门学士玄宗初置翰林待诏以张说陆坚张九龄等为之掌四方表疏批答应和文章既而又以中书务剧文书多壅滞乃选文学之士号翰林供奉与集贤院学士分掌制诏书勅开元二十六年又改翰林供奉为学士别置学士院专掌内命凡拜免将相号令征伐皆用白麻其後选用益重而礼遇益亲至号为内相又以为天子私人凡充其职者无定员自诸曹尚书下至校书郎皆得预选】

晨趋紫禁中夕待金门诏观书散遗帙探古穷至妙片言苟会心掩卷忽而笑青蝇易相点白雪难同调本是疎散人屡貽褊促诮云天属清朗林壑忆游眺或时清风来闲倚栏【一作檐】下啸严光桐庐溪谢客临海峤功成谢人间【一作君】从此一投钓【谢庄宋孝武宣贵妃谏收华紫禁李善注王者之宫以象紫微故谓宫中为紫禁李延济注紫禁即紫宫天子所居也汉书东方朔传待诏金门稍得亲近说文帙书衣也谢灵运诗散帙问所知散帙者解散其书外所裹之帙而翻阅之也陈子昂诗青蝇一相点白璧遂成冤盖青蝇遗粪白玉之上致成点污以比谗譖之言能使修洁之士致招罪尤也白雪曲名其曲弥高其和弥寡见二卷注章华太子後汉书注桐庐县南有严子陵渔钓处今山边有石上下可坐十人临水名曰严陵钓坛也谢客即谢灵运客是其小名详十六卷注灵运有登临海峤诗张铉注临海郡名峤山顶也】

浔阳紫极宫感秋作【旧唐书开元二十九年正月制两京诸州各置玄元皇帝庙天宝二年

三月改西京玄元庙为太清宫东京为太微宫天下诸郡为紫极宫方輿胜览江州紫极宫去州二里即今天庆观苏东坡曰李太白有浔阳紫极宫感秋诗紫极宫今天庆观也道士胡洞微以石本示予盖其师卓玘之所为】

何处闻秋声 𦵑𦵑北窗竹回薄万古心揽之不盈掬静坐观衆妙浩然媚幽独白云南山来就我檐下宿 𦵑从唐生决羞访季主卜四十九年非一往不可复野情转萧散世道有翻覆陶令归去来田家酒应熟【谢朓诗飒飒满池荷𦵑𦵑窗竹古塘上行边地多悲风树木何𦵑𦵑皇娥歌万象回薄化无方陆机诗揽之不盈手老子衆妙之门谢灵运诗幽独赖鸣琴陶潜诗白云宿檐端张衡思玄赋感蔡子之慷慨从唐生以决疑用唐举相蔡泽事见十七卷注史记司马季主者楚人也卜於长安东市淮南子蘧伯玉年五十而知四十九年非陶潜问来使诗归去来山中山中酒应熟 𦵑音宵】

江上秋怀

餐霞卧旧壑散发谢远游山蝉号枯桑始复知天秋朔雁别海裔越燕辞江楼飒飒风卷沙茫茫雾萦洲黄云结暮色白水扬寒流惻怆心自悲潺湲泪难收蘼兰方萧瑟长叹令人愁【餐霞吞食霞气仙家修鍊之法详十三卷注散发不冠而发披乱也张华诗散髮重陰下谢灵运撰征赋眷转蓬之辞根悼朔雁之赴越淮南子游於江浔海裔高诱注裔边也越燕今之紫燕已见本卷注楚辞横流涕兮潺湲王逸注潺湲流貌郭璞尔雅注杜蘼似葵而香邢昺疏本草唐本注云杜蘼叶似葵形如马蹄故俗云马蹄香生山之陰水泽下湿地根似细辛白前等山海经云天帝山有草其状如葵其臭如麝芑名曰杜蘼可以走马食之已癯是也】

秋夕书怀【一作秋日南游书怀】

北风吹海雁南渡落寒声感此潇湘客凄其流浪情海怀结沧洲【一作远心飞苍梧】霞【一作遐】想游【繆本作遥】赤城始探蓬壶事【一作始采蓬壶术】旋觉天地轻澹然吟【一作思】高秋闲卧瞻太清萝月掩【一作隐】空幕松霜结【繆本作霜皓一作云散】前楹灭见息羣动猎微穷至精桃花有源水可以保吾生【初学记名山略记云赤城山一名烧山东卿司命君所居洞周围三百里上有上玉清平天详见七卷注拾遗记蓬壶蓬莱也陶潜诗日入羣动息庄子至精无形桃花源见二卷注】

避地司空原言怀【一统志司空山在安庆府太湖县西北一百六十里山极高峻山半有洗马池即古司空原李白尝避地於此太平寰宇记司空山在舒州太湖县东北一百三十里】

南风昔不竞豪圣思经纶刘琨与祖逖起舞鸡鸣晨虽有匡济心终为乐祸人我则异於是潜光皖水滨卜筑司空原北将天柱邻雪霁万里月云开九江春俟乎太阶平然後托微身倾家事金鼎年貌可【繆本作何】长新所愿得此道终然保清真弄景奔日驭攀星戏河津一随王乔去长年玉天宾【左传晋人闻有楚师师旷曰不害吾骤歌北风又歌南风南风不竞多死声楚必无功杜预注歌者吹律以咏八风南风音微故曰不竞也太白借用作晋朝南渡兵

力不竞解晋书祖逖与刘琨俱为司州主簿情好绸缪共被同寝中夜闻荒鸡鸣蹴琨觉曰此非恶声也因起舞论曰祖逖散穀周贫闻鸡暗舞思中原之燎火幸天步之多艰原其素怀抑为贪乱者矣太白乐祸之论盖本於此梁书高祖覩海内方乱有匡济之心曹植诗潜光养羽翼进趣且徐徐太平寰宇记皖水在舒州怀宁县西北自壽州霍山县南流入经县北二里又东南流二百四十里入大江谓之皖口一统志皖水在潜山县北下流会潜水经府城西達大江江南通志太白书堂在太湖县司空山李白避地於此有卜筑司空原之句韵会将与也唐六典注霍山一名天柱在舒州怀宁县自汉以来为南岳通典舒州怀宁县有灊山一名天柱山方輿胜览天柱峯在皖山高三千七百丈周三百五十里山东有瀑布汉武帝尝登此山即司元洞府九天司命真君所主也江南通志天柱山在安庆府潜山县与潜山连其峯最高突出衆山之上峭拔如柱屹然为尊道书谓之司元洞天汉武帝尝登封於此以代南岳山有魏左慈炼丹遗迹九江在浔阳见十四卷注长杨赋玉衡正而泰阶平详一卷明堂赋注江淹别赋链金鼎而方坚李善注链金为丹之鼎也广雅日御谓之羲和陈子昂诗还丹奔日驭却老餌云霞河津谓天河之津王乔有三一是上古之仙人或称王子乔或称王乔楚辞中累引之见十二卷注一是周灵王之太子晋亦称王子乔见五卷注一是後汉时河东人为叶县令者见十一卷注玉天道家所谓玉清境之天天宝君所治即清微天也又王绩诗三山银作地八洞玉为天 逖音剔皖音近缓】上崔相百忧章【原注时在浔阳狱 崔相即崔涣详十一卷注按太白为宋中丞自荐表云避地庐山遇永王东巡胁行中道奔走却至彭泽具已陈首前後经宣慰大使崔涣及臣推覆清雪寻经奏闻此诗及万愤词皆作於是时】

共工赫怒天维中摧鯤鲸喷荡扬涛起雷鱼龙陷人成此祸胎火焚崑【繆本作昆】山玉石相碰仰希霖雨洒宝炎煨箭发石开戈挥日回邹衍恸哭燕霜飒来微诚不感犹縶【一作贄】夏台苍鹰搏攫丹棘崔嵬豪圣凋枯王风伤哀斯文未丧东岳岂颓穆逃楚难邹脱吴灾见机苦迟二公所哈骥不骤进麟何来哉星离一门草擲二孩万愤结缡【萧本作习一作緡】忧从中催金瑟玉壶尽为愁媒举酒太息泣血盈杯台星再朗天网重恢屈法申恩弃瑕取材治长非罪尼父无猜覆盆傥举应照寒灰【列子共工氏与颡顓争为帝怒而触不周之山折天柱絶地维成公綏天地赋共工赫怒天柱摧折宋玉大言赋壮士愤兮絶地维鯢北溟大鱼也鲸亦海中大鱼俱见大鹏赋注汉书枚乘传福生有基祸生有胎书胤征火炎崑冈玉石俱焚广韵碓落也韵会煨烬也西京杂记李广猎於冥山之阳见卧虎射之没矢饮羽进而视之乃石也其形类虎退而更射鏃破干折而石不伤予尝以问扬子云子云曰至诚则金石为开班固幽通赋李虎发而石开淮南子鲁阳公与韩构战酣日暮援戈而挥之日为之反三舍李善文选注淮南子曰邹衍尽忠於燕惠王惠王信谮而系之邹衍仰天而哭正夏而天为之降霜史记桀召汤而囚之夏台已而释之索隐曰夏台狱名广雅狱犴也夏曰夏台殷曰羑里周曰圜圉汉书郅都迁为中尉是时民朴畏罪自重而都独先严酷致行法不避贵戚列侯宗室见都侧目而视号曰苍鹰顔师古曰言其鸷击之甚周易寘於丛棘虞翻注狱外种九棘故称丛棘孔颖达正义谓囚执之处以丛棘而禁之也初学记春秋元命苞曰树棘槐听讼於其下棘赤心有刺言治人者原其心不失赤实事所以刺人其情令各归实槐之言归也情见归实尔雅翼棘有赤白二种丹棘即赤棘也陈子昂诗终古代兴没豪圣莫能争又云丘陵徒自出贤圣几凋枯杨齐贤注豪圣周公也遭流言之变王道凋枯故幽以下诸诗伤哀之礼记孔子早作负手曳杖逍遥於门歌曰泰山其颓乎梁木其坏乎哲人其萎乎子贡闻之曰泰山其颓

则吾将安仰梁木其坏哲人其萎则吾将安放夫子殆将病也盖寝疾七日而没初学记泰山五岳之东岳也汉书楚元王以穆生白生申公为中大夫穆生不嗜酒元王每置酒常为穆生设醴及王戊即位常设後忘设焉穆生退曰可以逝矣醴酒不设王之意怠不去楚人将钳我於市称疾卧申公白生强起之曰独不念先王之德欤今王一旦失小礼何足至此穆生曰易称知几其神乎君子见几而作不俟终日先王之所以礼吾三人者为道之存故也今而忽之是忘道也忘道之人胡可以久处岂为区区之礼哉遂谢病去申公白生独留王戊稍淫暴乃与吴通谋二人諫不听胥靡之衣之赭衣使杵臼雅舂於市邹阳齐人也仕吴以文辩着名吴王以太子事怨望称疾不朝陰有邪谋阳奏书諫吴王不纳其言於是邹阳知吴不可说去之梁从孝王游广韵哈笑也宋玉九辩驥不骤进而求服兮家语叔孙氏之车士曰子鉏商采薪於大野获麟焉折其前左足载以归叔孙以为不祥弃之於郭外使人告孔子曰有麋而角者何也孔子往观之曰麟也胡为来哉胡为来哉反袂拭面涕泣沾襟叔孙闻之然後取之子贡问曰夫子何泣尔孔子曰麟之至为明王也出非其时而见害吾是以伤焉鲍照舞鹤赋忽星离而云罢李善注星离分散也楚辞九思心结縵兮折摧博雅结縵不解也江淹诗白露滋金瑟清风荡玉琴晋书三台六星两两而居起文昌列抵太微三公之位也在人曰三公在天曰三台老子天网恢恢疎而不漏说文恢大也台星再朗谓崔相之明察能照见幽微天网重恢冀其赦已之罪丘迟与陈伯之书主上屈法申恩吞舟是漏陈琳为袁绍檄豫州文收罗英雄弃瑕取用史记公冶长齐人字子长孔子曰长可妻也虽在縲紲之中非其罪也以其子妻之抱朴子是责三光不照覆盆之内也三国志起烟於寒灰之上生华於已枯之木鲸音琴碓音堆煨音近威繫音执哈呼来切海平声恢音魁瑕音遐】

万愤词投魏郎中

海水渤【当作淖】涵人罗鲸鲵翫胡沙而四塞始滔天於燕齐何六龙之浩荡迁白日於秦西九土星分嗷嗷凄凄【萧本作栖栖下韵重出恐误】南冠君子呼天而啼恋高堂而掩泣泪血地而成泥狱户【霏玉本作时当】春而不草独幽怨而沈迷兄九江兮弟三峡悲羽化之难齐穆陵关北愁爱子豫章天南隔老妻一门骨肉散百草遇难不复相提携树榛拔桂囚鸾宠鸡舜昔授禹伯成耕犁德自此衰吾将安栖好我者恤我不好我者何忍临危而相挤子胥鸱夷彭越醢醢自古豪烈胡为此繫苍苍之天高乎视低如其听卑脱我牢狴傥辨美玉君收白珪【木华海赋天纲淖涵李善注淖涵沸涌貌桓子新论曰夏禹之时洪水淖涵鲸鲵以喻不靖之人详八卷注此以指禄山作乱也李善文选注翫聚也书尧典浩浩滔天禄山自范阳起逆遂据燕地燕与齐接壤故兼言之曰始滔天於燕齐也淮南子注言曰乘车驾以六龙详三卷注以喻明皇幸蜀也蜀在秦之西故曰秦西国语能平九土韦昭曰九土九州之土也淮南子何谓九州东南神州曰农土正南次州曰沃土西南戎州曰滔土正西弇州曰并土正中冀州曰白土西北台州曰肥土正北济州曰成土东北薄州曰隐土正东阳州曰伸土左思蜀都赋九土星分万国错峙左传晋侯观於军府见锺仪问之曰南冠而縶者谁也有司对曰郑人所献楚囚也使税之召而吊之再拜稽首问其族对曰伶人也使与之琴操南音公语范文子文子曰楚囚君子也萧士贇曰高堂喻朝廷也琦按世之称父母多曰高堂太白诗中绝无思亲之句疑其迁化久矣考汉书贾谊传曰人主之尊譬如堂羣臣如陛衆庶如地故陛九级上廉远地则堂高陛亡级廉近地则堂卑高者难攀卑者易陵理势然也萧氏以高堂为喻

朝廷其说近是梁书抱痛圜门含愤狱户刘公干诗沈迷簿领书回回自昏乱文献通考九江在江州之西北详十四卷注四川通志巫峡在巫山县东三十里与西陵峡归峡并称三峡上自夔州下至归州夷陵州凡七百里中皆三峡之地羽化如仙人之化生羽翼盖谓弟兄天各一方欲如飞仙之轻举远逝而相聚会不能得也唐书地理志沂州沂水县北有穆陵关山东通志穆陵关在沂水县北一百二十里古齐关也一统志穆陵关在青州大岷山上左传齐桓公曰赐我先君履南至於穆陵即此又元和郡县志穆陵关在黄州麻城县西八十八里在穆陵山上是穆陵关有二处而太白所称者则齐地之穆陵关也盖是时伯禽尚在东鲁未归耳豫章郡名唐时属江南西道又谓之洪州在浔阳郡之南疑太白卧庐山时家室寓此流夜郎寄内诗曰南来不得豫章书可见後汉书公卿所举率党其私所谓放鸱鸢而囚鸾凤庄子尧治天下伯成子高立为诸侯尧授舜舜授禹伯成子高辞为诸侯而耕禹往见之则耕在野禹趋就下风立而问焉曰昔尧治天下吾子立为诸侯尧授舜舜授予吾子辞为诸侯而耕敢问其故何也子高曰昔尧治天下不赏而民劝不罚而民畏今子赏罚而民日不仁德自此衰刑自此立後世之乱自此始矣夫子闾行耶无落吾事但偃乎耕而不顾说苑吴王赐子胥属镂之剑曰子以此死子胥乃自刺杀吴王取子胥尸盛以鸱夷浮之江中汉书比干剖心子胥鸱夷应劭曰吴王取马革为鸱夷盛子胥而沈之江鸱夷榼形顔师古曰鸱夷即今之盛酒鸱夷膾高诱吕览注革囊之大者为鸱夷史记索隐韦昭云以皮作鸱鸟形名曰鸱夷鸱夷皮榼也服?云用马革作囊以裹尸投之於江史记汉诛梁王彭越醢之盛其醢徧赐诸侯广韵繫辞也韵会繫语助也庄子天之苍苍其正色耶吕氏春秋天之处高而听卑初学记狴牢者亦狱别名家语孔子为鲁司寇有父子讼者夫子同狴执之王肃注狴狱牢也诗小雅白圭之玷尚可磨也琦按太白集中称其兄者五人新平长史粲也襄阳少府皓也虞城宰锡也中都明府某也徐王延年也称其弟者十七人金城尉叔卿也临洛令皓也舍人台卿也南平太守之遥也宣州长史昭也单父主簿凝也鄱阳司马昌岨也溧阳尉济也京兆参军令问也不言职位者延陵也冽也幼成也况也襄也绾也鎔也浮屠谈皓也大抵皆从兄弟也此诗所云兄九江兮弟三峡与下文爱子老妻并言似指其亲兄弟而言上有兄下有弟则太白乃其仲欵然兄弟之名则无可据姑表出之以俟淹博者之详考

濡音聿繫音近衣狴边述切音篋又音批珪与圭同】

荆州贼乱【萧本作平】临洞庭言怀作【通监乾元二年八月襄州将康楚元张嘉延据州作乱刺史王政奔荆州楚元自称南楚霸王九月张嘉延袭破荆州荆南节度使杜鸿渐弃城走沔朗郢峡归等州官吏闻之争潜窜山谷十一月康楚元等衆至万余人商州刺史充荆襄等道租庸使韦伦发兵讨之驻於邓之境招谕降者厚抚之伺其稍怠进军击之生擒楚元其衆遂溃得其所掠租庸二百万缗荆襄皆平】

修蛇横洞庭吞象临江岛积骨成巴陵遗言闻楚老水穷三苗国地窄三湘道岁晏天峥嵘时危人枯槁思归阻丧乱去国伤怀抱郢路方丘墟章华亦倾倒风悲猿啸苦木落鸿飞早日隐西赤沙月明东城草关河望已絶氛雾行当扫长叫天可闻吾将问苍昊【淮南子尧乃使羿断修蛇於洞庭高诱注修蛇大蛇吞象三年而出其骨之类元和郡县志昔羿屠巴蛇於洞庭其骨若陵故曰巴陵孔安国尚书传三苗之国在洞庭右彭蠡在荒服之例去京师二千五百里通典岳州古苍梧之野亦三苗国之地青草洞庭湖在焉二湖相连青草在南洞庭在北注

云凡今长沙衡阳诸郡皆古三苗之地三湘详一卷悲清秋赋注楚辞岁既晏兮孰华予王逸注晏晚也鲍照舞鹤赋岁峥嵘而愁暮李善注广雅曰峥嵘高貌岁之将尽犹物之高也通典江陵郡今之荆州春秋以来楚国之都谓之郢都西通巫巴东接云梦亦一都会也楚辞惟郢路之辽远左思魏都赋临淄牢落鄢郢丘墟吕延济注丘墟谓居人少也方輿胜览江陵府有章华台晋杜预云在今南郡华容城中华容即今监利水经注洞庭湖水广圆五百余里日月若出没於其中方輿胜览洞庭湖在巴陵县西西吞赤沙南连青草横亘七八百里岳阳风土记赤沙湖在华容县南夏秋水泛与洞庭洪通杜甫道林岳麓诗所谓殿角插入赤沙湖也一统志赤沙湖在洞庭湖西夏秋水泛与洞庭为一湖时惟见赤沙旧记云洞庭南连青草西亘赤沙七八百里又谓之三湖初学记盛弘之荆州记云巴陵南有青草湖周回数里湖南有青草山因以为名一统志青草湖一名巴丘湖北连洞庭南接潇湘东纳汨罗之水每夏秋水泛与洞庭为一水湖则此湖先乾青草生焉琦按城草恐是青草之讹然青草在南而诗云东青草则又未敢定也江淹诗皇晋遘阳九天下横氛雾张铣注氛雾喻乱贼也王延寿鲁灵光殿赋承苍昊之纯殷张载注苍昊皆天之称也春为苍天夏为昊天】

览镜书怀

得道无古今失道还衰老自笑镜中人白发如霜草扪心空叹息问影何枯槁桃李竟何言终成南山皓【史记桃李不言下自成蹊南山四皓见二十二卷注】

田园言怀

贾谊三年谪班超万里侯何如牵白犊饮水对清流【汉书贾谊为长沙傅三年有鵬飞入谊舍止於坐隅谊既以谪居长沙长沙卑湿谊自伤悼以为壽不得长乃为赋以自广後汉书班超行诣相者曰祭酒布衣诸生耳而当封侯万里之外超问其状相者指曰生燕颌虎头飞而食肉此万里侯相也後使西域西域五十余国悉皆纳质内属封超为定远侯淮南子宋人好善者家无故黑牛生白犊高士传许由尧召为九州长由不欲闻之洗耳於颍滨时其友巢父牵犊欲饮之见由洗耳问其故对曰尧欲召我为九州长恶闻其声是故洗耳巢父曰子若处高岸深谷人道不通谁能见子子故浮游欲闻求其名誉污吾犊口牵犊上流饮之诗意谓仕宦而不得志如贾谊一流得志如班超一流皆羈旅异方不如巢许隐居独乐安步田园之为善也其旨深矣】

江南春怀

青春几何时黄鸟鸣不歇天涯失乡【一作归】路江外老华发心飞秦塞云影滞楚关月身世殊烂漫田园久芜没岁晏何所从长歌谢金阙【埤雅黄鸟亦名黎黄其色黎黑而黄也鸣则蚕生韩子曰以鸟鸣春若黄鸟之类其善鸣者也陰阳运作推移时至气动不得不尔故先王以候节令华发见九卷注岁晏见本卷注楚辞章句谢去也金阙犹金门长歌谢金阙见不复有仕进之意】

听蜀僧濬弹琴

蜀僧抱绿绮西下峨眉峯为我挥手如听万壑松客心洗流水遗响入霜钟不觉碧山暮秋云暗几重【绿绮司马相如之琴也见二十卷注唐书地理志嘉州罗目县有峨眉山嵇康琴赋伯牙挥手李善注挥动也流水见十六卷注山海经丰山有九钟焉是知霜鸣郭璞注霜降则钟鸣故言知也】

鲁东门观刈蒲【埤雅蒲水草也似莞而?有脊生於水涯柔滑而温可以为席】

鲁国寒事早初霜刈渚蒲挥镰若转月拂水生连珠此草最可珍何必贵龙须织作玉牀席欣承清夜娱罗衣能再拂不畏素尘芜【陆倕诗江关寒事早夜露伤秋草梁简文帝诗渚蒲变新节方言刈钩自关而西或谓之钩或谓之?顔师古急就篇注钩即镰也形曲如钩因以名云蜀本草龙刍丛生茎如綖所在有之俗名龙须草可为席谢朓咏席诗但愿罗衣拂无使素尘弥 镰音廉】

咏邻女东窗海石榴【太平广记新罗多海红并海石榴唐赞皇李德裕言花名中带海者悉从海东来】

鲁女东窗下海榴世所稀珊瑚映绿水未足比光辉清香随风发落日好鸟归愿为东南枝低举拂罗衣无由一【萧本作共】攀折引领望金扉【潘岳安石榴赋似长离之栖邓林若珊瑚之映绿水古诗清商随风发潘岳诗引领望京室王延寿鲁灵光殿赋排金扉而北入张铣注扉门扉也】

南轩松

南轩有孤松柯叶自绵幂清风无闲时萧洒终日夕陰生古苔绿色染秋烟碧何当凌云霄直上数千尺【绵幂枝叶稠密而相覆之意 幂音密】

咏山樽二首【前一首一作咏柳少府山瘿木樽】

蟠木不雕饰且将斤斧【缪本作斧斤】疎樽成山岳势材是栋梁余外与金罍并中?玉醴虚慙君垂拂拭遂忝玳筵居【汉书蟠木根柢轮囷离奇顔师古注蟠木屈曲之木也金罍酒器见七卷注张衡思立赋喻青岑之玉醴兮吕向注玉醴玉泉也嵇康琴赋玉醴涌其前吕延济注玉醴玉浆也味如酒此诗之意则以玉醴为酒也江总诗玳筵欢趣密】

其二

拥肿寒山木嵌空成酒樽悔无江海量偃蹇在君门【庄子吾有大树人谓之樗其大本拥肿而不中绳墨甘泉赋嵌岩岩其龙鳞顔师古注嵌开张貌 嵌丘衍切音近覓】

初出金门寻王侍御不遇咏壁上鸂鶒【一作勅放归山留别陆侍御不遇咏鸂鶒】

落羽辞金殿孤鸣托【萧本作吒】绣衣能言终见弃还向陇西【缪本作山】飞【御史绣衣见十一卷注张华禽经注鸂鶒出陇西能言鸟也】

紫藤树【笔谈黄环即今之朱藤也叶如槐其花穗悬紫色如葛花可作菜食火不熟亦有小毒京师人家园圃中作大架种之谓之紫藤花者是也实如阜萸蜀都赋所谓青珠黄环者黄环即此藤之根古今皆种以为庭槛之饰】

紫藤挂云木花蔓宜阳春密叶隐歌鸟香风留【萧本作流】美人

观放白鹰二首

八月边风高胡鹰白锦毛孤飞一片雪百里见秋毫

其二

寒冬十二月苍鹰八九毛寄言燕雀莫相啁自有云霄万里高【苏武诗寒冬十二月晨起距严霜鹰一岁色黄二岁色变次赤三岁而色始苍矣故谓之苍鹰八九毛者是始获之鹰剪其劲翮令不能远举扬去啁衆口貌太白借用作嘲谑意
此诗河岳英灵集以为高适之作题云见薛大臂鹰作适集亦载此诗 啁音捉】

观博平王志安少府山水粉图【唐河北道博州博平郡有博平县】

粉壁为空天丹青状江海游云不知归日见白鸥在博平真人王志安沈吟至此愿挂冠松溪石磴【缪本作磴】带秋色愁客思归坐【缪本作生】晓寒【南史萧朏素为诸暨令到县十余日挂衣冠於县门而去释常谈休官谓之挂冠西汉冯萌见王莽篡逆乃曰不去祸将及身遂解冠挂於城东门而去韵会磴登涉之道也 磴音磴或作磴音义同】

题雍丘崔明府丹竈【唐河南道汴州陈留郡有雍丘县】

美人为政本忘机服药求仙事不违叶县已泥丹竈毕瀛洲当伴赤松归先师有诀神将助大圣无心火自飞九转但能生羽翼双鳧忽去定何依【瀛洲海中仙山见十五卷注赤松子古仙人见二卷注抱朴子古之道士合作神药必入名山山神必助之为福药必成又云一转之丹服之三年得仙二转之丹服之二年得仙三转之丹服之一年得仙四转之丹服之半年得仙五转之丹服之百日得仙六转之丹服之四十日得仙七转之丹服之二十日得仙八转之丹服之十日得仙九转之丹服之三日得仙魏文帝诗服药四五日身轻生羽翼风俗通俗说孝明帝时尚书郎河东王乔迁为叶令乔有神术每月朔尝诣台朝帝怪其来数而无车骑密令太史候望言其临至时常有双鳧从南飞来因伏伺见鳧举罗但得一双鳧耳使尚方识视

四年中所赐尚书官属履也】

观元丹丘坐巫山屏风

昔游三峡见巫山见画巫山宛相似疑是天边十二峯飞入君家彩屏里寒松萧飒如有声阳台微茫如有情锦衾瑶席何寂寂楚王神女徒盈盈高咫尺如千里翠屏丹崖粲如绮苍苍远树围荆门历历行舟泛巴水水石潺湲万壑分烟光草色俱氤氛溪花笑日何年发江客听猿几岁闻使人对之心缅邈疑入高【萧本作嵩误】丘梦彩云【太平寰宇记巫山县有巫山盛弘之荆州记云沿峡二十里有新崩滩至巫峡因山而名也首尾一百六十里旧云自三峡取蜀数千里恒是一山此盖好大之言也惟三峡七百里两岸连山略无缺处重岩叠嶂隐天蔽日自非亭午夜分不见日月所谓高山寻云怒湍流水絶非人境神女庙在峡之岸四川省志巫山在夔州巫山县东三十里形如巫字有峯十二曰望霞翠屏朝云松峦集仙聚鹤净坛上升起云栖凤登龙望圣也此十二峯者不聚一面乃江绕此山周遭有十二峯绘者不得不彙为一图耳阳台山在巫山县治西北高丘山亦在其间高唐赋载巫山神女与楚王梦遇自言妾在巫山之阳高丘之岨旦为朝云暮为行雨朝朝暮暮阳台之下是也後人立神女庙於山下今谓妙用真人祠楚辞瑶席兮玉璫王逸注瑶玉为席汤惠休诗锦衾瑶席为谁芳南史萧贲善画於扇上图山水咫尺之内便觉万里为遥荆门在巫山之下流巴水在巫山之上流一统志荆门山在湖广荆州宜都县西北五十里大江南与虎牙相对水经注巴水出晋昌郡宣汉县巴岭山西南流历巴中经巴城故城南李严所筑大城北西南入江四川通志巴江在重庆府巴县东北阆水与白水合流曲折三回如巴字因名巴江琦谓诗中所云巴水似指巴地所经之水而言不专谓曲折三回之巴江也广韵潺湲水流貌氛氤祥气也谢灵运诗缅邈区中缘张诂注缅邈髣髴也】

求崔山人百丈崖瀑布图【天台山志百丈岩在天台县西北二十五里崇道观西北与琼台相望峭险束隘四山墙立下为龙湫翠蔓蒙络水流声淅然盘涧绕麓入为灵溪由高视下凄神寒骨】

百丈素崖裂四山丹壁开龙潭中喷射昼夜生风雷但见瀑泉落如淅云汉来闻君写真图岛屿备萦回石黛刷幽草曾青泽古苔幽絨悦相传何必向天台【韵会瀑飞泉悬水也淅水会也徐陵玉台新咏序南都石黛最发双蛾韵会黛说文画眉墨也本作𩇑今作黛荀子王制篇南海则有羽翮齿革曾青丹干焉杨倞注曾青铜之精可绘画及化黄金者出蜀山越崖又正论篇加之以丹矸重之以曾青杨倞注曾青铜之精形如珠者其色极青故谓之曾青谢惠连诗盈筐自予手幽絨候君开李延济注幽密絨封也瀑音仆淅音丛】

见野草中有名【萧本作曰】白头翁者【名医别录白头翁处处有之近根处有白茸状似白头老翁故以为名唐本草白头翁其叶似芍药而大抽一茎茎头一花紫色似木槿花实大者如鸡子白毛寸余皆披下如麤头正似白头老翁故名焉陶言近根有白茸似不识也】

醉入田家去行歌荒野中如何青草里亦有白头翁折取对明镜宛将衰鬓同微芳似相谗留

【繆本作流】恨向东风

流夜郎题葵叶

慙君能卫足叹我远移根白日如分照还归守故园【左传鲍庄子之智不如葵葵犹能卫其足杜预注葵倾叶向日以蔽其根】

莹禅师房观山海图

真僧闭精宇灭迹含逵观列障【繆本作嶂】图云山攒峯入霄汉丹崖森在目清昼疑卷幔蓬壶来轩窗瀛海入几案烟涛争喷薄岛屿相凌乱征帆飘空中瀑布洒天半峥嵘若可陟想像徒盈叹杳与真心冥遂谐静者翫如登赤城里揭涉【繆本作步】沧洲畔即事能娱人从兹得萧【萧本作消】散【谢灵运诗灭迹入云峯韵会障步障也广韵幔帷幔也拾遗记蓬壶蓬莱也瀛海大海也见十二卷注初学记海中山曰岛海中洲曰屿登真隐诀云赤城山下有丹洞在三十六洞天数其山足丹韵会褰裳渡水由膝以下曰揭屿音序】

白鹭鸶

白鹭下秋水孤飞如坠霜心闲且未去独立沙洲傍咏槿二首【槿繆本作桂琦察诗辞前首是咏槿次首乃咏桂也二本各有误处识者定之本草衍义木槿花如小葵淡红色五叶成一花朝开暮敛湖南北人家多种植之以为篱障韵会】

【槿木名尔雅棻也其花朝生暮落一名日及一名薜华盖取一瞬之义】

园花笑芳年池草艳春色犹不如槿花嬋【繆本作?】娟玉阶侧芬荣何天促零落在瞬息岂若琼树枝终岁长翦翳【广韵嬋娟好姿态貌?娟美貌又云舞貌江淹诗终岁如琼草红华长翦翳又曰瑶草正翦翳吕向注翦翳茂郁貌 嬋音禅?音近骈翳音释又音赫】

其二

世人种桃李多【萧本作皆】在金张门攀折争捷径及此春风暄一朝天霜下荣耀难久存安知南山桂绿叶垂芳根清陰亦可托何惜树君园【汉书盖寛饶传上无许史之属下无金张之托顔师古注许氏史氏有外属之恩金氏张氏自托在於近狎也离骚夫唯捷径以窘步王逸注捷疾也径邪道也】

白胡桃

红罗袖里分明见白玉盘中看却无疑是老僧休念诵腕前推下水精珠【初学记沈怀远南越志云海中有火珠明月珠水精珠】

巫山枕障

巫山枕障画高丘白帝城边树色秋朝云夜入无行处巴水横天更不流【巫山在巫山县白帝城在奉节县俱在夔州之东高丘在巫山之阳巴水即巫山下所经之水俱见前注】

南奔书怀【一作自丹阳南奔道中作】

遥夜何漫漫【一作时旦】空歌白石烂甯戚未匡齐陈平终佐汉揜抢扫河洛直割鸿沟半历数方未迁云雷屡【一作起】多难天人秉旄钺虎竹光藩翰侍笔黄金台传觞青玉案不因秋风起自有思归叹主将动谗疑王师忽离叛自来白沙上【一作兵罗沧海上】鼓噪丹阳岸宾御如浮云从风各消散舟中指可掬城上骸争草草出近关行行昧前筭南奔剧星火北寇无涯畔顾乏七宝鞭留连道傍【缪本作边】翫太白夜食昴长虹日中贯秦赵兴天兵茫茫九州乱感遇【一作结】明主恩颇高祖逖言过江誓流水志在清中原拔剑击前柱悲歌难重论【孟子疏三齐记云齐桓公夜出迎客甯戚疾击其牛角高歌曰南山粲白石烂生不遭尧与舜禅短布单衣适至骭从昏饭牛薄夜半长夜漫漫何时旦桓公乃召与语悦之遂以为大夫楚辞靓杪秋之遥夜遥夜长夜也史记陈平曰臣事魏王魏王不能用臣说故去事项王项王不能信人其所任爱非诸项即妻之昆弟虽有奇士不能用平乃去楚闻汉王之能用人故归大王尔雅彗星为欃枪曹植武帝诔欃枪北扫举不浹辰史记项羽乃与汉王约中分天下割鸿沟而西者为汉鸿沟而东者为楚书大禹谟天之历数在汝躬孔安国传历数谓天道也正义云历数谓天历运之数帝王易姓而兴故言历数为天道云雷用周易屯卦义其卦以震遇坎故取象云雷其义以乾坤始交而遇险难故名屯屯难也魏略邯鄲淳诣临淄侯植归对其所知叹植之才以为天人周书王左杖黄钺右秉白旄以麾虎竹铜虎符竹使符也见五卷塞下曲注诗大雅价人维藩大宗维翰黄金台见二卷注青玉案见十三卷注张翰为齐王问东曹掾因秋风起思吴中菰菜蓴羹鲈鱼脍遂命驾而归见三卷注文献通考真州本唐扬州扬子县之白沙镇胡三省通监注今真州治所唐之白沙镇也时属广陵郡扬州府志白沙洲在仪真县城外滨江地多白沙故名按南史南齐於白沙置一军即此左传越子为左右句卒使夜或左或右鼓噪而进按唐书地理志江南东道润州又谓之丹阳郡领丹徒丹阳金坛延陵四县鲍照诗宾御纷飒沓左传楚疾进师车驰卒奔乘晋军桓子不知所为鼓於军中曰先济者有赏中军下军争舟舟中之指可掬也又左传华元夜入楚师登子反之牀起之曰寡君使元以病告曰敝邑易子而食析骸以炊也魏书陆真传东平王道符反於长安杀雍州刺史鱼元明关草洛中草草犹不自安左传蘧伯玉遂行从近关出谢惠连诗倚伏昧前筭晋书明帝纪王敦将举兵内向帝密知之乃乘巴滇骏马微行至于湖阴察敦营垒而出有军士疑帝非常人又敦方昼寝梦日环其城惊起曰此必黄须鲜卑奴来也於是使五骑物色追帝帝亦驰去马有遗粪辄以水灌之见逆旅卖食姬以七宝鞭与之曰後有骑来可以此示也俄而追者至问姬姬曰去已远矣因以鞭示之五骑传玩稽留遂久又见马粪冷以为信远而止不追汉书荆轲慕燕丹之义白虹贯日太子畏之卫先生为秦画长平之事太白食昴昭王疑之应劭曰燕太子丹质於秦始皇遇之无礼丹亡去厚养荆轲令西刺秦王精诚感天白虹为之贯日也苏林曰白起为秦伐赵破长平军欲遂灭赵遣卫先生说昭王益兵粮为应侯所害事用不成其精诚上达於天故太白为之食昴昴赵分也将有

兵故太白食昴食者干历之也晋书祖逖为奋威将军豫州刺史渡江中流击楫而誓曰祖逖不能清中原而复济者有如大江词色壮烈衆皆慨叹江淹恨赋拔剑击柱吊影慙魂琦按此篇首引甯戚陈平盖以自况思得见用於世之意揜抢扫河洛直割鸿沟半谓禄山反逆覆陷两京河北河南半为割据天人谓永王璘至德元载七月上皇制以永王璘充山南东路岭南黔中江南西路四道节度使江陵大都督出镇江陵所谓天人秉旄钺虎竹光籓翰也侍笔黄金台传觞青玉案不因秋风起自有思归叹谓在永王军中虽蒙礼遇而早动思归之志当是察其已有逆谋不可安处矣太白之於永王璘与张翰之於齐王冏事略相类故引以为喻惜乎其不能如翰之勇决洁身早去致遭污累也璘以季广琛浑惟明冯季康为将及淮南采访使李成式与河北招讨判官李铣合兵讨璘季广琛召诸将谓曰吾属从王至此天命未集人谋已堕不如及兵锋未交早图去就死於锋镝永为逆臣矣诸将皆然之於是季广琛以麾下奔广陵浑惟明奔江宁冯季康奔白沙所谓主将动谗疑王师忽离畔也自来白沙上鼓噪丹阳岸宾御如浮云从风各消散言军中扰乱宾幕奔逃之状璘与成式将赵侃战新丰而败非水战也璘至鄱阳郡司马陶备闭城拒之璘怒命焚其城非久攻也其曰舟中指可掬城上骸争?甚言其挠败之形有若此耳草草出近关行行昧前筭南奔剧星火北寇无涯畔顾乏七宝鞭留连道傍翫自言奔走匆遽之状太白夜食昴长虹日中贯喻已为国之精诚可以上干天象秦赵兴天兵茫茫九州乱感遇明主恩颇高祖逖言过江誓流水志在清中原明已之所以从璘者实因天下乱离四方云扰欲得一试其用以扩清中原如祖逖耳非敢有逆志也拔剑击前柱悲歌难重论自伤其志之不能遂而反有从王为乱之名身败名裂更向何人一为申论拔剑击柱慷慨悲歌出处之难太白盖自嗟其不幸矣萧士贇曰此篇用事偏枯句意倒杂决非太白之作果真灼见其为非太白之诗耶抑为太白讳而故为此言耳
揜初衔切插平声抢音撑与欃枪同】

李太白集注卷二十四

卷二十五

钦定四库全书

李太白集注卷二十五

钱塘 王琦 撰

古近体诗共九十首

题随州紫阳先生壁【唐时随州又谓之汉东郡属山南东道紫阳先生见二十九卷汉东紫阳先生碑铭】

神农好长生风俗久已成复闻紫阳客早署丹台名喘息飡妙气步虚吟真声道与古仙合心将元化并楼疑出蓬海鹤似飞玉京松雪窗外晓池水堦下明忽耽笙歌乐颇失轩冕情终愿惠金液提携凌太清【史记正义括地志云厉山在随州随县北百里山东有石穴曰神农生于厉乡所谓列山氏也春秋时为厉国艺文类聚真人周君传曰紫阳真人周义山字委通汝阴人也入蒙山遇姜门子乘白鹿执羽盖仗青毛之节侍从十余玉女乃再拜叩头乞长生要诀姜门子曰子名在丹台玉室何忧不仙抱朴子闭藏喘息又曰粗气是喘息之气也楚辞飠六气而饮沆瀣兮异苑陈思王游山忽闻空里诵经声清远邈亮解音者则而写之为神仙声道士效之作步虚声乐府古题要解步虚词道观所唱备言衆仙缥缈轻举之美陈子昂诗古之得仙道信与元化并玉京详五卷注又一统志玉京洞在赤城山道书十大洞天之第六晋许迈尝居此与王羲之书云自山阴至临海多有金庭玉堂仙人芝草谓此庾信诗玉京传相鹤太乙授飞龟颜延年诗山明望松雪金液仙家上药详十三卷注楚辞若王乔之乘云兮载赤霄而游太清】

题元丹丘山居

故人栖东山自爱丘壑美青春卧空林白日犹不起松风清襟袖石潭洗心耳羡君无纷喧高枕碧霞里题元丹丘颍阳山居【并序

唐河南府有颍阳县本武林县载初元年析河南伊阙嵩阳置开元十五年更名颍阳】

丹丘家於颍阳新卜别业其地北倚马岭连峯嵩丘南瞻鹿台极目汝海云岩映郁有佳致焉白从之游故有此作【元和郡县志马岭山在河南府密县南十五里清水所出一统志鹿台山在南阳府汝州北二十里有台状若蹲鹿枚乘七发南望荆山北望汝海李善注汝称海大言之也一统志汝水源出嵩县分水岭经流郑县合扈涧长桥等水戴液团造等溪东流入淮】

仙游渡颍水访隐同元君忽遗苍生望独与洪崖羣卜地初晦迹兴言且成文却顾北山断前

瞻南岭分遥通汝海月不隔嵩丘云之子合逸趣而我钦清芬举迹倚松石谈笑迷朝曛益【
繆本作终】愿狎青鸟拂衣栖江濱【通监谢安虽为布衣时人皆以公辅期之士大夫至相
谓曰安石不出当如苍生何薛综西京赋注洪崖三皇时伎人陆机文赋诵先人之清芬江淹
诗青鸟海上游李善注吕氏春秋曰海上有人好青者朝至海上而从青游青至者前後数百
其父曰闻汝从青游盍取来吾欲观之其子明旦至海上羣青翔而不下刘良注青鸟海鸟也
琦按此诗所谓青鸟当是用此事然考今吕氏春秋本青作蜻而注以为蜻蛉小虫与李氏所
引不同疑今本之讹也诗意谓颍阳别业固尽丘壑之美而已之所好更在江湖是以欲与青
鸟相狎而栖息江濱范传正称太白偶乘扁舟一日千里或遇胜境终年不移逸情所寄不即
此可见欤】

题瓜州新河饯族叔舍人贲【胡三省通监注扬州江都县南三十里有瓜洲镇正对京口北
固山所谓新河即今之瓜洲运河是也】

齐公凿新河万古流不絶丰功利生人天地同朽灭两桥对双阁芳树有行列爱此如甘棠谁
云敢攀折吴【萧本作美】关倚北固天险自兹设海水落斗门潮【萧本作湖】平见沙汭
【繆本作汭】我行送季父弭棹徒流悦杨花满江来疑是龙山雪惜此林下兴怆为山阳别
瞻望清路尘归来空寂蔑【萧本作灭复第二韵恐误旧唐书玄宗纪开元二十六年润州刺
史齐澣开伊娄河於扬州南瓜州浦又齐澣传开元二十五年迁润州刺史润州北界隔大江
至瓜步沙尾纡漕六十里船绕瓜步多为风涛所漂损澣乃移其漕路於京口埭下直渡江二
十里又开伊娄河二十五里即达扬子县自是免漂损之患岁减脚钱数十万迄今利济焉风
俗通召公当农桑之时重为所烦劳不舍乡亭止於棠树之下听讼决狱百姓各得其所壽九
十余乃卒後人思其德美爱其树而不敢伐诗甘棠之所作也宋文帝诗极望周天险留察泱
神京新唐书江南送租庸调物以岁二月至扬州入斗门木华海赋云锦散文於沙汭之际李
善注毛萇诗传曰芮崖也芮与汭通左传集解水之隈曲曰汭说文汭水相入也汭水从空穴
絶出也或疑广韵韵会诸书屑薛韵中无汭字当以汭为是者琦按江淹拟古诗赤玉隐瑶溪
云锦被沙汭昨发赤亭渚今宿浦阳汭皆作熬音读与设絶灭雪别字相叶何疑于此诗耶江
淹诗弭棹阻风雪李善注弭止也鲍照诗胡风吹朔雪千里度龙山阮籍阮咸叔侄与嵇康等
寓居河内山阳共为竹林之游见十二卷注曹植诗君若清路尘谢灵运诗各勉日新志音尘
慰寂蔑寂蔑犹寂寞也汭而拙切音熬汭音血弭音米】

洗脚亭【诗乃送行之作题内似有缺文】

白道向姑熟洪亭临道旁前有吴【萧本作昔】时井下有五丈牀樵女洗素足行人歇金装
西望白鹭【繆本作鸟】洲芦花似朝霜送君此时去回首泪成行【一作双白道大路也人
行迹多草不能生遥望白色故曰白道唐时多用之郑谷白道晓霜迷韦庄白道向村斜是也
通典宣州当涂县城即晋姑熟城也胡三省通监注姑熟前汉丹阳春谷县地今太平州当涂
县即姑熟地县南二里有姑熟溪西入大江陆游曰姑熟城在当涂北牀井栏也傅玄秋胡行
遂下黄金装梁简文登山马诗间树识金装景定建康志白鹭洲在城之西与城相望周回十
五里江南志白鹭洲在江寧县西南大江中】

劳劳亭【景定建康志劳劳亭在城南十五里古送别之所吴置亭在劳劳山上今顾家寨大路东即其所江南通志劳劳亭在江寧府治西南】

天下伤心处劳劳送客亭春风知别苦不遣柳条青题金陵王处士水亭【原注此亭盖齐朝南苑又是陆机故宅江南通志南苑在江寧府城外瓦棺寺东北方輿胜览陆机宅图经云在上元县南五里秦淮之侧有二陆读书堂在焉】

王子猷玄言贤豪多在门好鷺寻道士爱竹啸名园树色老【一作秀】荒苑池光荡华轩北【诸本皆作此今校从文苑英华本】堂见明月更忆陆平原扫拭【诸本皆作地今校从文苑英华本】青玉簪为余置金尊醉罢【一作後】欲归去花枝宿鸟喧何时复来此再【一作更】得洗器烦【法书要録王羲之性好鷺山陰县村有一道士养好鹅十余王清旦乘小船故往意大愿乐乃告求市易道士不与百方譬说不能得道士乃言性好道久欲写河上公老子缣素早办而无人能书府君若能自屈书道德经各两章便合羣以奉羲之便住半日为写毕笼鷺以归世说王子猷尝行过吴中见一士大夫家极有好竹主已知子猷当往乃洒埽施设在厅事坐相待王肩輿径造竹下讽啸良久王微诗长想凭华轩吕延济注轩楼上鈎栏也华者有华饰文彩也陆机诗安寝北堂上明月入我牖照之有余辉揽之不盈手晋书陆机传成都王颖以机参大将军军事表为平原内史】

题嵩山逸人元丹丘山居【并序】

白久在庐霍元公近游嵩山故交深情出处无间岩信频及许为主人欣然适会本意当冀长往不返欲便举家就之兼书共游因有此赠【庐山在今江西九江南康二府界内霍山在今江南庐州界内嵩山在今河南登封洛阳巩密四县界内详见前注 岩古岩字】

家本紫云山道风未沦落沉【繆本作况】怀丹丘志冲赏归寂寞竭来游闽荒扞涉穷禹凿夤缘泛潮海偃蹇陟庐霍凭雷蹶天窗弄景憩霞阁且欣登眺美颇愜隐沦诺三山旷幽期四岳聊所托故人契嵩颖高义炳丹雘灭迹遗纷嚣终言本峯壑自矜林湍好不羨市朝乐偶与真意并顿觉世情薄尔能折芳桂吾亦采兰若拙妻好乘鸾娇女爱飞鹤提携访神仙从此链金药【紫云山在绵州彰明县西南四十里峯峦环秀古木樛翠地里书谓常有紫云结其上故名冈来自北为天仓为龙洞其东为风洞为仙人青龙洞为露香台其西为慕颐为白云洞其南为天台为帝舜洞为桃溪源为天生桥有道宫建其中名崇仙观观中有黄籙宝宫世传为唐开元二十四年神人由他山徙置于此宫之三十六柱皆檀木铁绳隐迹在焉此山地志不载宋魏鹤山作记载集中太白生于绵州所谓家本紫云山者盖谓是山欽梁书道风素论坐镇雅俗楚辞仍羽人於丹丘兮留不死之旧乡竭来详见十三卷注闽今福建地在唐时为建州福州泉州漳州汀州五郡之地东瓠与闽地相连接在唐时为温州台州处州三郡之地秦时立闽中郡合东瓠在内至汉始分东瓠以立东海王太白生平未尝入闽而温台处三州则游历多见於诗歌疑此诗所谓闽荒者指东瓠之地而言也说苑禹凿龙门辟伊阙平治水土左思吴都赋夤缘山岳之岳三山谓海中三神山左传四岳三涂杜预注四岳东岳岱西岳华南岳衡北岳恒盖古称四岳不兼中岳在内後世兼中岳而言故称五岳也嵩山颍水详见

九卷注史记扁鹊传窃闻高义之日久矣书梓材惟其涂丹雘孔穎达正义雘是采色之名有青色者有朱色者炳丹雘即炳若丹青之义顏延年诗芬馥歇兰若李周翰注兰若香草幽兰杜若也金药金丹上药也 雘屋角切汪入声】

题江夏修静寺【原注此寺是李北海旧宅

李邕为北海太守以文字名天下时人称为李北海详十九卷注】

我家北海宅作寺南江滨空庭无玉树高殿坐幽人书带留青草琴堂【一作台】羃素尘平生种桃李寂灭不成春【三齐记郑元教授于不期山山下生草形如薤长尺余坚韧异常土人名曰康成书带韵会羃覆也 羃音觅】

改九子山为九华山聯句【并序】

青阳县南有九子山山高数千丈上有九峯如莲华按图徵名无所依据太史公南游略而不书事絶【许本作出】古老之口复阙名贤之纪虽灵仙往复而赋咏罕闻子乃削其旧号加以九华之目时访道江汉憩於夏侯回之堂开檐岸帙坐眺松雪因与二三子联句传之将来【太平御览九华山録曰此山奇秀高出云表峯峦异状其数有九故号九子山焉李白因游江汉觀其山秀异遂更号曰九华山之上有池塘数亩水田千石其池有鱼长者半寻颁首頽尾朱髻丹腹人欲观之叩木鱼即跃以可食之物散於池中食讫而藏焉其水流泄为龙池溢为暴泉入龙潭溪太平寰宇记青阳县天宝元年割秋浦南陵泾三县置在青山之阳故号曰青阳属宣州永泰元年隶池州史记太史公自序二十而南游江淮上会稽探禹穴闢九疑浮于沅湘说文髮有巾曰帙岸帙谓脱其巾而露额也世说谢奕在桓温座席岸帙啸咏无异常日】

妙有分二气灵山开九华【李白】层标遏迟日半壁明朝霞【高霁】积雪曜陰壑飞流歎【萧本作歎】阳崖【韦权兴权一作瓘】青荧玉树色缥缈羽人家【李白 孙绰天台山赋太虚辽廓而无阂运自然之妙有融而为川渌结而为山阜李善注妙有谓一也言大道运彼自然之妙一而生万物也老子曰道生一王弼曰一数之始而物之极也谓之为妙有者欲言有不见其形则非有故谓之妙欲言其无物由之以生则非无故谓之有斯乃无中之有谓之妙有也层标谓山峯之层叠者标当作?一作?广韵?山峯是也迟日春日也见五卷注谢灵运诗朝旦发阳崖羽猎赋玉石璿玕眩耀青荧顏师古注青荧言其色青而有光荧也李善注青荧光明貌羽人仙人也见二十卷注歎音喷荧音萤】

题宛溪馆

吾怜宛溪好百尺照心明【一作久照心益明】何【萧本作可】谢新安水千寻见底清白沙留月色綠竹助秋声却笑严湍上於今独擅名【江南通志宛溪在寧国府东水至清澈新安江在徽州府其源有四一出歙之黟山一出休寧之率山一出绩溪之大鄣山一出婺源之浙岭四水皆達歙浦会流至严州合金华水入浙江为滩凡三百六十水至清深浅皆见底一

统志七里滩在严州桐庐县西一名严陵濑即汉严光垂钓处】

题东谿公幽居

杜陵贤人清且廉东溪卜筑岁将淹宅近青山同谢朓门垂碧柳似陶潜好鸟迎春歌後院飞花送酒舞前檐客到但知留一醉盘中祇有水晶盐【雍録杜陵在长安东南二十里韵会淹久留也滯也久也方輿胜覧青山在当涂县东南三十里齐宣城太守谢朓筑室於山南遗址犹存絶顶有谢公池唐天宝间改为谢公山山下有青草市一名谢家市南史陶潜少有高趣宅边有五柳树故尝着五柳先生传盖以自况梁书中天竺国有真盐色正白如水精魏书太宗赐崔浩御缥醪酒十斛水精戎盐一两金楼子胡中白盐产于山崖映日光明如水精胡人以供国厨名君王盐亦名玉华盐】

嘲鲁儒

鲁叟谈五经白髮死章句问以经济策茫如坠烟雾足着远游履首戴方山【繆本作头】巾缓步从直道未行先起尘秦家丞相府不重褒衣人君非叔孙通与我本殊伦时事且未達归耕汶水滨【曹植洛神赋践远游之文履庄子宋鉏尹文作华山之冠以自表注云华山上下均平作冠象之表己心均平也後人所谓方山冠盖出于此秦家丞相谓李斯史记李斯传丞相谬其说绌其辞乃上书请诸有文学诗书百家语者蠲除去之令到三十日弗去黥为城旦始皇可其议收去诗书百家之语以愚百姓汉书隼不疑褒衣博带盛服至门上谒顔师古注褒大裾也言着褒大之衣广博之带而说者乃以为朝服垂褒之衣非也史记叔孙通说上曰臣愿徵鲁诸生与臣弟子共起朝仪於是叔孙通使徵鲁诸生三十余人鲁有两生不肯行曰今天下初定死者未葬伤者未起又欲起礼乐礼乐所由起积德百年而後可兴也吾不忍为公所为公所为不合古吾不行公往矣无污我叔孙通笑曰若真鄙儒也不知时变遂与所徵三十人西说文汶水出琅邪朱虚东泰山东入潍桑钦说汶水出泰山莱芜西南入沛褒音包】

惧谗

二桃杀三士讎假剑如霜衆女妬蛾眉双花竞【萧本作竟】春芳魏姝信郑袖【萧本作褒古字同】掩袂对怀王一惑巧言子朱顔成死【一作损】伤行将泣团扇戚戚愁人肠【晏子以二桃杀三士见三卷梁甫吟注魏文帝诗欧氏宝剑何为低昂白如积雪利若秋霜离骚衆女嫉予之蛾眉兮謡詠谓予以善淫战国策魏王遗楚王美人楚王悦之夫人郑袖知王之悦新人也甚爱新人衣服玩好择其所喜而为之宫室卧具择其所善而为之爱之甚於王王曰郑袖知寡人之悦新人也其爱之甚于寡人此孝子之所以事亲忠臣之所以事君也郑袖知王以已为不妬也因谓新人曰王爱子美矣然恶子之鼻子见王则必掩鼻新人见王因掩其鼻王谓郑袖曰新人见寡人则掩其鼻何也郑袖曰妾不知也王曰虽恶必言之郑袖曰其似恶闻王之臭也王曰悍哉令劓之无使逆命班婕妤怨歌行新制齐纨素皎洁如霜雪裁为合欢扇团团似明月出入君怀袖动摇微风发常恐秋节至凉风夺炎热弃捐篋笥中恩情中

道絕】

观猎

太守耀清威乘间弄晚辉江沙横猎骑山火绕行围箭逐云鸿落鹰随月兔飞不知白日暮欢赏夜方归【庾信诗山火即时燃山火猎者烧草以驱逼禽兽之火也抱朴子飞?墮云鸿沉纶引魴鲤】

观胡人吹笛

胡人吹玉笛一半是秦声十月吴山晓梅花落敬亭愁闻出塞曲泪满逐臣缨却望长安道空怀恋主情【汉书杨惲传家本秦也能为秦声杨齐贤曰古者羌笛有落梅花曲輿地广记宣州宣城县有敬亭山古今注横吹胡乐也张博望入西域传其法於西京惟得摩诃兜勒二曲李延年因胡曲更造新声二十八解魏晋以来二十八解不复具存世用者黄鹤陇头出关入关出塞入塞折杨柳黄覃子赤之阳望行人十曲 塞音赛】

军行

骝马新跨【一作夸】白玉鞍战罢沙场月色寒城头铁鼓声犹震匣里金刀血未乾【史记集解徐广曰赤马黑髦曰骝吴均诗白玉镂衢鞍黄金马脑勒胡三省通监注唐人谓沙漠之地为沙场】

从军行

百战沙场碎铁衣城南已合数重围突营射杀呼延将独领残兵千骑归【晋书匈奴传其四姓有呼延氏卜氏兰氏乔氏而呼延氏最贵】

平虏将军妻

平虏将军妇入门二十年君心自不悦妾宠岂能专出解牀前帐行吟道上篇古人不吐井莫忘昔纏绵【古乐府王宋者平虏将军刘勲妻也入门二十余年後勲悦山阳司马氏女以宋无子出还于道中作诗二首曰翩翩牀前帐张以蔽光辉昔将尔同去今将尔同归緘藏篋笥里当复何时披又曰谁言去妇薄去妇情更重千里不吐井况乃昔所奉远望未为遥踟蹰不得并程大昌曰千里不吐井况乃昔所奉谓尝饮此井虽舍而去之千里知不复饮矣然犹以尝饮乎此而不忍吐也况昔所尝奉以为君子者乎陆机诗畴昔之游好合纏绵】

春夜洛城闻笛

谁家玉笛暗飞声散入春风满洛城此夜曲中闻折柳何人不起故园情【折杨柳古曲名见

前四首注】

嵩山采菖蒲者

神人【萧本作仙】多古貌双耳下垂肩嵩岳逢汉武疑是九疑仙我来采菖蒲服食可延年言终忽不见灭影入云烟喻帝竟莫悟终归茂陵田【神仙传汉武上嵩山登大愚石室起道宫使董仲舒东方朔等斋洁思神至夜忽见有仙人长二丈耳出头巅垂下至肩武帝礼而问之仙人曰吾九疑之人也闻中岳石上菖蒲一寸九节可以服之长生故来采耳忽然失人所在帝顾侍臣曰彼非复学道服食者必中岳之神以喻朕耳为之采菖蒲服之经三年帝觉闷不快遂止时从官多服然莫能持久惟王兴闻仙人教武帝服菖蒲乃采服之不息遂得长生隣里老少皆云世世见之竟不知所之谢灵运山居赋广灭影於崆峒许遁音于箕山汉书武帝纪後元二年二月丁卯帝崩于五柞宫三月甲申葬茂陵臣瓚曰茂陵在长安西北八十里田即後人所谓墓田也卢照隣诗花月茂陵田】

金陵听韩侍御吹笛

韩公吹玉笛倜傥流英音风吹绕锺山万壑皆龙吟王子停风管师襄掩瑶琴余韵【萧本作响】渡江去天涯安可寻【广韵倜傥不羈也江淹横吹赋出天下之英音景定建康志锺山一名蒋山在城东北一十五里马融笛赋近世双笛从羌起羌人伐竹未及已龙鸣水中不见已截竹吹之声相似列仙传王子乔者周灵王太子晋也好吹笙作凤皇鸣沈约诗沃若动龙骖参差凝凤管家语孔子学琴於师襄子襄子曰吾虽以擊磬为官然能于琴江淹诗金箫哀夜长瑶琴怨暮多 倜音惕】

流夜郎闻酺不预【汉书文帝纪赐酺五日服?曰酺音蒲文穎注酺音步汉律三人以上无故羣饮酒罚金四两今诏横赐得令聚会饮食五日也顏师古注酺之为言布也王德布於天下而合聚饮食为酺服音是也唐时无三人羣饮之禁所谓赐酺者盖聚伎乐年高者得赐酒食耳唐书至德二载十二月赐民酺五日此诗当是至德二载所作】

北阙圣人歌太康南冠君子窜遐荒汉酺闻奏钧天乐愿得风吹到夜郎【北阙见五卷注诗国风无已太康毛传曰康乐也魏明帝野田黄雀行百姓讴吟咏太康南冠君子用左传鍾仪事见二十四卷注汉书韦贤传抚寧遐荒遐荒谓远方荒僻之地钧天乐用赵简子事见一卷注】

放後遇恩不沾

天作云与雷霈然德泽开东风日本至白雉越裳来独弃长沙国三年未许回何时入宣室更问洛阳才【首二句暗用周易雷雨作解君子以赦过宥罪意史记正义倭国西南大海中岛居凡百余小国在京师南万三千五百里武后改倭国为日本国韩诗外传成王之时有越裳氏重九译而至献白雉东风白雉二句言远人皆蒙恩泽之意史记贾生名谊洛阳人也为长

沙王太傅三年有鶚飞入贾生舍止于座隅楚人命鶚曰服贾生既以谪居长沙长沙卑湿自以爲壽不得长伤悼之乃为赋以自广後岁余贾生徵见孝文帝方受厘坐宣室因感鬼神事而问鬼神之本贾生具道所以然之状至夜半文帝前席既罢曰吾久不见贾生自以爲过之今不及也三辅黄图宣室未央前殿正室也庾信诗欣兹河朔饮对此洛阳才】

宣城见杜鹃花

蜀国曾闻子规鸟宣城还见杜?花一叫一回肠一断三春三月忆三巴【子规一名杜?蜀中最多春暮则鸣闻者凄惻杜?花处处有之即今之映山红也以二三月中杜鹃鸣时盛开故名三巴巴郡巴西巴东也详见四卷注太白本蜀地绵州人绵州在唐时亦谓之巴西郡因在异乡见杜鹃花开想蜀地此时杜?应巴鸣矣不觉有感而动故国之思杨升庵引此诗以爲太白是蜀人非山东人之一证或以此诗为杜牧所作子规诗非也】

白田马上闻莺【白田地名今江南宝应县有白田渡当是其处】

黄鹂啄紫椹五月鸣桑枝我行不记日误作阳春时蚕老客未归白田已缲丝【一作吴人欲蚕丝】驱马又前去扪心空自悲【一作嗤陆机诗疏黄鸟黄鹂留也或谓之黄栗留幽州人谓之黄莺一名仓庚一名商庚一名鷺黄一名楚雀齐人谓之搏黍关西谓之黄鸟一云鹂黄当椹熟时来在桑间故里语曰黄栗留看我麦黄椹熟不亦是应节趋时之鸟也椹本作葚桑实也生青熟则紫色埤雅蚕足于叶三俯三起二十七日而老宋之问诗越俗鄙章甫扪心空自怜 椹音甚】

三五七言【杨齐贤曰古无此体自太白始】

秋风清秋月明落叶聚还散寒鸦【缪本作鸟】栖复惊相思相见知何日此时此夜难为情【本草纲目慈乌北人谓之寒鸦以冬月尤盛也沧浪诗话以此诗为隋郑世翼之诗臞仙诗谱以此篇为无名氏作俱误】

杂诗

白日与明月昼夜尚【一作常】不闲况尔悠悠人安得久世间传闻海水上乃有蓬莱山玉树生绿叶灵仙每登攀一食驻玄髮再食留红颜吾欲从此去去之无时还【列子蓬莱山在渤海之东其山高下周旋三万里其顶平处九千里其上珠玕之树皆丛生华实皆有滋味食之皆不老不死所居之人皆仙圣之种孙绰天台山赋玄圣之所游化灵仙之所窟宅江淹诗玄髮已改素】

寄远十二首

三鸟别王母衔书来见过肠断若剪弦其如愁思何遥知玉窗里纖手弄云和奏曲有深意青

松交女萝写水山【繆本作落】井中同泉岂殊波秦心与楚恨皎皎为谁多【三鸟三青鸟西王母使也见六卷相逢行注鲍照伤逝赋离若剪弦梁简文帝诗何时玉窗里夜夜更缝衣旧唐书如箏稍小曰云和文献通考云和琵琶如箏用十三弦施柱弹之足黄钟一均而倍六声其首为云象因以名之非周官云和琴瑟之制也又唐清乐部有云和箏盖其首象云与云和琴瑟之制同矣】

其二

青楼何所在乃在碧云中宝镜挂秋水【一作月】罗衣轻春风新粧坐落日怅望金【一作锦】屏空念此【一作剪彩】送短书愿因【一作同】双飞鸿【江淹诗袖中有短书愿寄双飞燕李周翰注短书小书也】

其三

本作一行书殷勤道相忆一行复一行满纸情何极瑶台有黄鹤为报青楼人朱颜凋落尽白髮一何新自知未应还【一作老】离居【一作君】经三春桃李今若为当窗发光彩莫使香风飘留与【一作取】红芳待【何逊诗欲寄一行书江淹去故乡赋愿使黄鹤兮报佳人楚辞将以遗兮离居江淹诗瑶色行应罢红芳几为乐】

其四

玉筯落春【一作清】镜坐愁湖阳水闻【一作且】与阴丽华风烟接隣里青春已复过白日忽相催但恐荷【一作飞】花晚令人意已摧相思不惜梦日夜向阳台【白帖甄后面白泪双垂如玉筯刘孝威诗谁怜双玉筯流面复流襟古西门行何能坐愁拂郁湖阳县本汉旧县唐时隶唐州淮安郡阴丽华汉光武帝之后南阳新野人见七卷南都行注自新野至湖阳道里远近不及百里所谓风烟接隣里也阳台见二卷注】

其五

远忆巫山阳花明渌江暖踌躇未得往泪向南云满春风复无情吹我梦魂断不见眼中人天长音信短【此诗与乐府大堤曲相同惟首三句异耳编者重入注已见前者不复再出】

其六

阳台隔楚水春草生黄河【一作阴云隔楚水转蓬落渭河】相思无日夜浩荡若流波流波向海去欲见终无因【一作定绕珠江滨】遥将一点泪远寄如花人

其七

妾【一作昔】在春陵东君游汉江岛百里望花光往来成白道【一作日日采靡芜上山成白道又百里萧本作一日】一为云雨别此地生秋草秋草秋蛾飞相思愁落晖何由一相见灭烛解罗衣【末二句一作昔时携手去今时流泪归遥知不得意玉筍点罗衣四句 通典汉春陵故城在今随州枣阳县东本草别录云芎藭叶名靡芜苏颂曰四五月生叶似水芹胡荽蛇牀辈作丛而茎细其叶倍香江东蜀人采以作饮七八月开碎白花古诗上山采靡芜下山逢故夫白道注见本卷洗脚亭注江淹扇上彩画赋促织兮始鸣秋蛾兮载飞子夜四时歌开窗秋月光灭烛解罗裳】

其八

忆昨东园桃李红碧枝与君此时初别离金瓶落井无消息令人行叹复坐思坐思行叹成楚越春风玉颜畏销歇碧窗纷纷下落花青楼寂寂空明月两不见但相思空留锦字表心素至今减愁不忍窥【阮籍诗嘉树下成蹊东园桃与李淮南王篇金瓶素绠汲寒浆释宝月诗莫作瓶落井一去无消息鲍照诗安能行叹复坐愁又鲍照诗容华坐销歇江总诗横波翻泻泪束素反减愁】

其九

长短春草绿缘堦【缪本作门】如有情卷施心独苦抽却死还生覩物知妾意希君种後庭闲时当采掇念此莫相轻【艺文类聚南越志曰寧乡县草多卷施拔心不死江淮间谓之宿莽】

其十

鲁缟如玉霜笔【一作剪】题月支【萧本作氏】书寄书白鹦鹉西海慰【缪本作畏】离居行数虽不多字字有委曲天末如见之开缄泪相续泪尽恨转深十里同此心【缪本作千里若在眼万里若在心】相思千万里一书值千金【颜师古汉书注缟缁之精白者也鲁缟鲁地所作之缁详十七卷注月支汉时西域国名史记汉书皆作月氏史记正义氏音支凉甘肃瓜沙等州本月氏国之地汉书云本居敦煌祁连间是也後人皆作月支初学记南方异物志曰鹦鹉有三种青者大如乌白一种白大如鹅鶡一种五色大於青者交州巴南皆有之桂海虞衡志白鹦鹉大如小鹅亦能言羽毛玉雪以手抚之有粉粘着指掌如蛱蝶翅用白鹦鹉寄书奇而未详所本谢庄月赋气霁地表云敛天末 缟音稿】

其十一【此首一作赠远】

美人在时花满堂美人去後余空牀牀中绣被卷不寝【一作更不卷】至今三载闻余【一作犹闻】香香亦竟不灭人亦竟不来相思黄叶落【一作尽】白露湿【一作点】青苔

其十二

爱君芙蓉婵娟之艳色若【萧本作色】可飡兮难再得怜君冰玉清迥之明心情不极兮意已深朝共琅玕之绮食夜同鸳鸯之锦衾恩情婉娈忽为别使人莫错乱愁心乱愁心涕如雪寒灯灭梦魂欲绝觉来相思生白髮盈盈汉水若可越可惜凌波步罗袜美人美人兮归去来莫作朝云暮雨兮【缪本缺暮雨兮三字】飞阳台【西京杂记卓文君姣好脸际常若芙蓉广韵婵娟好貌陆机诗鲜肤一何盛秀色若可飡鲍照舞鹤赋抱清迥之明心阮籍诗朝餐琅玕实西京杂记赵飞燕女弟在昭阳殿遗飞燕鸳鸯被陈子昂诗闻有鸳鸯绮复有鸳鸯衾韵会婉娈美好也古诗盈盈一水间脉脉不得语曹植洛神赋凌波微步罗袜生尘云雨阳台见二卷注】

长信宫【汉书赵飞燕姊弟从自微贱兴踰越礼制寝盛於前班婕妤失宠稀复进见赵氏姊弟骄妬婕妤恐久见危求供养太后长信宫上许焉三辅黄图长信宫汉太后常居之按通灵记太后成帝母也后宫在西秋之象也秋主信故宫殿以长信为名】

月皎昭阳殿霜清长信宫天行乘玉辇飞燕与君同更有欢娱【一作别有留情】处承恩乐未穷谁怜团扇妾独坐怨秋风【西京杂记赵飞燕女弟居昭阳殿李德林诗天行肃辇路沈炯诗玉辇迎飞燕金山赏邓通班婕妤诗新制齐纨素鲜洁如霜雪裁为合欢扇团团似明月出入君怀袖动摇微风发常恐秋风至凉飈夺炎热弃捐篋笥中恩情中道绝按汉书成帝游於後庭尝欲与班婕妤同辇载婕妤辞曰观古图画圣贤之君皆有名臣在侧三代末主乃有嬖女今欲同辇得无近似乎上善其言而止太白翻其事而用之言飞燕与君同辇而行化实为虚畦径都别】

长门怨二首【乐府古题要解长门怨为汉武帝陈皇后作也后长公主嫖女字阿娇及卫子夫得幸后退居长门宫愁闷悲思闻司马相如工文章奉黄金百斤令为解愁之词相如作长门赋帝见而伤之复得亲幸者数年後人因其赋为长门怨焉】

天回北斗挂西楼金屋无人萤火流月光欲到长门殿别作深宫一段愁【宋之问诗地隐东岩室天回北斗车金屋见四卷注】

其二

桂殿长愁不记春黄金四屋起秋尘夜悬明镜青天上独照长门宫里人【沈约诗恩畅兰席欢同桂殿鲍照诗高墉宿寒雾平野起秋尘长门赋悬明月以自照兮徂清夜於洞房吕向注月在空如悬也】

春愁

白马金羁辽海东罗帷绣被卧春风落月低轩窥烛尽飞花入户笑牀空【卢思道诗白马金羁侠少年辽海即古辽东郡地方千有余里南临大海故文人多称辽海梁简文帝序愁赋玩飞花之入户看斜辉之度寮萧子范诗落花徒入户何解妾牀空】

代赠远【一作寄远】

妾本洛阳人狂夫幽燕客渴饮易水波由来多感激胡马西北驰香鬃摇绿丝鸣鞭从此去逐虏荡边陲昔去有好言不言久离别燕支多美女走马轻风雪见此不记人恩情云雨绝啼流玉筋尽坐恨金闺切织锦作短书肠随回文结相思欲有寄恐君不见察焚之扬其灰手迹自此灭【元和郡县志河北道易州易县有易水一名故安河出县西宽中谷周官曰并州其浸涑易燕太子丹送荆柯易水之上即此水也陶潜诗渴饮易水流曹植诗白马饰金羁联翩西北驰广韵鬃马鬣也谢灵运诗鸣鞭适大河左传刘我边陲广韵陲边也燕支山见四卷注玉筋见本卷注武后璇玑图序符坚时秦州刺史扶风窦滔妻苏氏名蕙字若兰知识精明仪容秀丽然性近於急颇伤嫉妬滔拜安南将军留镇襄阳不与偕行苏悔恨自伤因织锦为回文五采相宣莹心辉目纵广八寸题诗二百余首计八百余言纵横反覆皆为文章才情之妙超今迈古名曰璇玑图读者不能悉通苏氏笑曰徘徊宛转自为语言非我家人莫之能解遂发苍头齎至襄阳滔览之感其妙绝迎苏氏於汉南恩好愈重古有所思曲闻君有他心拉襍摧烧之摧烧之当风扬其灰】

陌上赠美人【一云小放歌行一首在第三此是第二篇】

骏马骄行踏落花垂鞭直拂五云车美人一笑褰珠箔遥指红【一作青】楼是妾家【真诰赤水山中学道者朱孺子八月五日西王母遣迎即日乘五色云车登天庾信步虚词东明九芝盛北烛五云车五云车仙人所乘者此盖夸美言之】

闺情

流水去绝国浮云辞故关水或恋前浦云犹归旧山恨君流【一作龙】沙去弃妾渔阳间玉筋夜垂【一作日夜】流双双落朱颜黄鸟坐相悲绿杨谁更攀织锦心草草挑灯泪斑斑窥镜不自识况乃狂夫还【张协诗流波恋旧浦行云思故山元和郡县志居延海在甘州张掖县东北一百六十里即居延泽古文以为流沙者其沙风吹流行故曰流沙通典沙州古流沙地其沙风吹流行在郡西八十里太平御览流沙在玉门关外唐书西域传吐谷浑西北有流沙数百里地理今释流沙在今陕西嘉峪关外索科鄂模以北东至贺兰山西至废沙州界几南北千余里东西数百里其沙随风流行堕处有之渔阳古北戎无终子国也战国时属燕秦於其地置渔阳郡二汉及隋因之唐为幽州地开元十八年析幽州置蓟州後谓蓟州为渔阳郡玉筋见前注】

代别情人

清水本不动桃花发岸旁桃花弄水色波荡摇春光我悦子容艳子倾我文章风吹绿琴去曲度紫鸳鸯昔作一水鱼今成两枝鸟哀哀长鸡鸣夜夜达五晓起折相思树归赠知寸心覆水不可收行云难重寻天涯有度鸟莫绝瑶华音【绿绮琴司马相如之琴也曲度犹度曲谓隐度作新曲俱见二十卷注紫鸳鸯疑即所度之曲名焦仲卿妻诗中有双飞鸟自名为鸳鸯仰

头相向鸣夜夜達五更左思吴都赋相思之树刘渊林注相思大树也材理坚邪斫之则文可作器其实如珊瑚历年不变东冶有之三国志注覆水不可收也楚辞折疎麻兮瑶华将以遗兮离居王逸注瑶华玉华也谢朓诗惠而能好我间以瑶花音】

代秋情

几日相别离门前生藁葵寒蝉聒梧桐日夕长鸣悲白露湿萤火清霜零兔丝空掩紫【一作闺掩】罗袂长啼无尽时【广韵藁自生稻也广雅葵菜也尝倾叶向日不令照其根蔡邕月令章句寒蝉应陰而鸣鸣则天凉故谓之寒蝉也兔丝蔓草也多生荒野古道中蔓延草木之上有茎而无叶细者如线粗者如绳黄色子入地而生初生有根及纏物而上其根自断盖假气而生亦一异也 藁音吕】

对酒

蒲萄酒金叵罗吴姬十五细马驮青黛画眉红锦靴道字不正娇唱歌玳瑁筵中怀里醉芙蓉帐里【一作底】奈君何【史记大宛左右以蒲萄为酒富人藏酒至万余石久者至数十岁不败太平寰宇记蒲萄酒西域有之前代或有贡献及贞观中破高昌收马乳蒲萄实於苑中种之并得其酒法太宗自损益之造酒酒成凡有八色芳香酷烈味兼醍醐既颁赐羣臣京师始识其味北齐书神武宴僚属于坐失金叵罗窦泰令饮酒者皆脱帽於租珽髻上得之邵氏闻见後録近世以洗为叵罗若洗岂可置之髻上未知叵罗是何物唐六典注陇右诸牧监使每年简细马五十匹进其翔麟凤苑廐别简粗壮敦马一百匹与细马同进按此知所谓细马乃骏马之小者耳中华古同注梁天监中武帝诏宫人作白妆青黛眉韵会青黛似空青而色深本草青黛从波斯国来今以太原并庐陵南康等处染淀瓮上沫紫碧色者用之昭明太子七契身托玳瑁之筵鲍照诗七彩芙蓉之羽帐九华蒲萄之锦衾 叵音颇】

怨情

新人如花虽可宠故人似玉犹来重花性飘扬不自持玉心皎洁终不移故人昔新今尚故还见新人有故时请看陈后黄金屋寂寂珠帘生网丝【江總诗故人虽故昔经新新人虽新复应故金屋见四卷注】

湖边采莲妇

小姑织白紵未解将人语大嫂采芙蓉溪湖千万重长兄行不在莫使外人逢愿学秋胡妇贞心比古松【韵会将与也古今注芙蓉一名荷花生池泽中实曰莲花之最秀异者列女传洁妇者鲁秋胡子妻也既纳之五日去而官於陈五年乃归未至家见路旁妇人采桑秋胡子悦之下车谓曰若曝采桑吾行道远愿托桑荫下飡下齎休焉妇人采桑不辍秋胡子谓曰力田不如逢丰年力桑不如见国卿吾有金愿以与夫人妇人曰嘻夫采桑力作纺绩织紵以供衣食奉二亲养夫子吾不愿金所愿卿无有外意妾亦无淫佚之志收子之齎与笥金秋胡子遂

去至家奉金遗母使人唤妇至乃向采桑者也秋胡子惭妇曰子束髮辞亲往仕五年乃还当所悦驰骤扬尘疾至今也乃悦路旁妇人下子之粮以金与之是忘母也忘母不孝好色淫佚是污行也污行不义夫事亲不孝则事君不忠处家不义则治官不理孝义并忘必不遂矣妾不忍见遂去而东走投河而死范云寒松诗凌风知劲节负雪见贞心】

怨情

美人卷珠帘深坐颦蛾眉但见泪痕湿不知心恨谁

代寄情【缪本多人字】楚辞体

君不来兮徒蓄怨积思而孤吟云阳【当作阳云】一去以【萧本作已】远隔巫山绿水之沉沉留余香兮染绣被夜欲寝兮愁人心朝驰余马於青楼恍若空而夷犹浮云深兮不得语却惆怅而怀忧使青鸟兮衔书恨独宿兮伤离居何无情而雨【缪本作两】絶梦虽往而交疎横流涕而长嗟折芳洲之瑶花送飞鸟以极目怨夕阳之西斜愿为连根同死之秋草不作飞空之落花【楚辞九辨蓄怨兮积思心烦憺兮忘食事子虚赋於是楚王乃登阳云之台孟康注云梦中高唐之台宋玉所赋者言其高出云之阳也琦按诗意正暗用高唐赋中神女事知云阳乃阳云之误为无疑也曹摅诗薄暮愁人心楚辞九歌朝驰余马兮江皋夕济兮西澨又云君不行兮夷犹王逸注夷犹犹豫也沈约诗衔书必青鸟嘉客信龙鑣又九歌将以遗兮离居传玄诗昔君与我兮形影潜结今君与我兮云飞雨絶又九歌横流涕兮潺湲又云采芳洲兮杜若王逸注芳洲香草丛生水中之处又九歌折疏麻兮瑶花王逸注瑶花玉花也谢灵运诗瑶花未堪折李周翰注瑶花麻花也其色白故比于瑶此花香服食可致长壽故以为美刘琨诗夕阳忽西流】

学古思边

衔悲上陇首肠断不见君流水若有情幽哀从此分苍茫愁边色惆怅落日曛山外接远天天际复有云白雁从中来飞鸣苦难闻足系一书札寄言叹【萧本作难】离羣离羣心断絶十见花成雪胡地无春晖征人行不归相思杳如梦珠泪湿罗衣

思边【一作春怨】

去年何时君别妾南园草緑飞蝴蝶今岁何时妾忆君西山白雪暗秦云玉关去此三千里欲寄音书那可闻【张景阳诗蝴蝶飞南园西山即雪山又名雪岭上有积雪经夏不消在成都之西正控吐蕃唐时有兵戍之杜子美诗西山白雪高西山白雪三城戍正指此地玉关详见三卷注】

口号吴王美【缪本作舞】人半醉【口号即口占也详九卷注】

风动荷花水殿香姑苏台上见【繆本作宴】吴王西施醉舞娇无力笑倚东窗白玉牀【徐陵诗荷开水殿香十六国春秋石虎正会殿上施白玉牀流苏帐琦按吴王即为庐江太守之吴王也以其所宴之地比之姑苏以其美人比之西施乃席上口占以寓笑谑之意耳若作咏古味同嚼蜡】

折荷有赠

涉江翫秋水爱此红蕖鲜攀荷弄其珠荡漾不成圆佳人彩云里欲赠隔远天相思无因见怅望凉风前【红蕖红荷也此篇即前卷拟古之第十一首只五字不同】

代美人愁镜二首

明明金鹊镜了了玉台前拂拭皎【萧本作交】冰月光辉何清圆红颜老昨日白发多去年鉛粉坐相误照来空凄然【太平御覽神异经曰昔有夫妻将别破镜人各执半以为信其妻与人通镜化为鹊飞至夫前夫乃知之後人因铸镜为鹊安背上自此始也女红余志淑文所宝有对凤垂龙玉镜台淑文名婉姓李氏贾充妻韵会鉛粉胡粉也以鉛烧炼而成故曰鉛粉鉛音沿与铅同】

其二

美人赠此盘龙之宝镜烛我金缕之罗衣时将红袖拂明月为惜普照之余辉影中金鹊飞不灭台下青鸾思独絶藁砧一别若箭弦去有日来无年狂风吹却妾心断玉筯并堕菱花前【萧子显诗明镜盘龙刻簪羽凤凰雕刘孝威诗琼筵玉筯金缕衣抱朴子三光以普照着明艺文类聚宋范泰鸾鸟诗序曰昔罽宾王结置峻卯之山获一鸾鸟甚爱之欲其鸣而不能致也乃饰以金笼享以珍羞对之愈戚三年不鸣其夫人曰尝闻鸟见其类而後鸣何不悬镜以映之王从其意鸾覩影悲鸣哀响冲霄一奋而絶刘昭後汉书注补鸾凤类而色青乐府古题要解古词藁砧今何在藁砧砧也盖妇人谓其夫之隐语也玉筯泪也江总诗红楼千愁色玉筯两行垂飞燕外传七出菱花镜一奁埤雅羣说镜谓之菱花以其面平光影所成如此庾信镜赋云照壁而菱花自生是也尔雅翼昔人取菱花六觚之象以为镜】

赠段七娘

罗袜凌波生网尘那能得计访情亲千杯緑酒何辞醉一面红粧恼杀人【曹植洛神赋凌波微步罗袜生尘】

别内赴徵三首

王命三徵去未还明朝离别出吴关白玉高楼看不见相思须上望夫山【望夫山见二十二卷注】

其二

出门妻子强牵衣问我西行几日归归【繆本作来】时傥佩黄金印莫见【萧本作学】苏秦不下机【初学记卫宏汉旧仪曰列侯黄金印龟纽文曰印丞相将军黄金印龟纽文曰章新书天子之相号为丞相黄金之印战国策苏秦说秦王书十上而说不行去秦而归至家妻不下紵嫂不为炊父母不与言】

其三

翡翠为【一作高】楼金作梯谁人独宿倚门啼【一作卷帘愁坐待鸣鸡】夜坐【繆本作泣】寒灯连晓月行行泪尽楚关西【郭璞诗翹手攀金梯】

秋浦寄内

我今寻阳去辞家千里余结荷见【萧本作卷】水宿却寄大雷书虽不同辛苦怆离各自居我自入秋浦三年北信疎红颜愁落尽【萧本作日】白髮不能除有客自梁苑手携五色鱼开鱼得锦字归问我何如江山虽道阻意合不为殊【寻阳郡唐时之江州也隶江南西道鲍照登大雷岸与妹书吾自发寒雨全行日少加秋潦浩汗山溪猥至渡泝无边险径游历栈石星饭结荷水宿旅客辛贫波路壮濶始以今日食时仅及大雷涂发千里日踰十晨严霜惨节悲风断肌去亲为客如何如何太平寰宇记舒州望江县有大雷池水西自宿松县界流入雷池又东流经县南去县百里又东入於海江行百里为大雷口又有小雷口宋鲍明远有登大雷岸与妹书乃此地唐时秋浦县隶江南西道之池州梁苑在唐为河南道宋州之宋城县鱼书详十一卷注】

自代内赠

宝刀裁【繆本作截】流水无有断絶时妾意逐君行纏绵亦如之别来门前草秋巷春转碧【巷当是黄字之讹繆本作春尽秋转碧】扫尽更还【繆本作还更】生萋萋满行迹鸣凤始相【萧本作何】得雄惊雌各飞游云落何山一往不见归估客发大楼【一作东海】知君在秋浦梁苑空锦衾阳台梦行雨妾家三作相失势去西秦犹有旧歌管凄清闻四隣曲度入紫云啼无眼中人【繆本多女弟争笑弄悲羞泪盈巾二句】妾似井底桃开花向谁笑君如天上月不肯一回照窥镜不自识别多憔悴深安得秦吉了为人道寸心【估客商人也古乐府有估客乐大楼山在池州府城南唐为秋浦县地阳台行雨盖言惟梦中得相见耳事见二卷注宗楚客三为宰相曲度曲之节奏俱详十五卷注陆机诗髣髴眼中人井底桃即四卷桃李出深井之意今庭中天井是也萧子显诗桐生井底叶交加太平广记秦吉了容管廉白州产此鸟大约似鸚鵡嘴脚皆红两眼後夹脑有黄肉冠善效人言语音雄大分明於鸚鵡以熟鸡子和饭如枣饲之桂海虞衡志秦吉了如鸚鵡紺黑色丹喙黄距目下连项有深黄文项毛有缝如人分髮能人言比於鸚鵡尤慧大抵鸚鵡声如儿女吉了声则如丈夫出邕州溪洞中】

秋浦感主人归燕寄内

霜凋【繆本作朽】楚关木始知杀气严寥寥金天廓婉婉緑红潜胡燕别主人双双语前檐
三飞四回顾欲去复相瞻岂不恋华屋终然谢珠帘我不及此鸟远行岁已淹寄书道中叹泪
下不能緘【月令仲秋之月杀气浸盛江淹诗杀气起严霜刘良注杀气寒气也陈子昂诗金
天方肃杀白露始专征尔雅翼胡燕比越燕而大臆前白质黑章其声亦大巢悬于大屋两椽
间其长有容匹素者谓之蛇燕谢灵运诗华屋非蓬居吕向注华画饰也】

送内寻庐山女道士李腾空二首【方輿胜覧延真观在南康军城北四十里旧名昭德唐女
真李腾空所居腾空宰相李林甫之女庐山志蔡寻真侍郎蔡某女也李腾空宰相李林甫女
也幼并超异生富贵而不染遂为女冠同入庐山蔡居屏风叠之南李居屏风叠之北学三洞
法以丹药符籙救人疾苦至三元八节会於咏真洞以相师讲贞元中九江守许浑以状闻昭
德皇后赐以金帛土田已而蜕去门人收簪简瘞之乡俗岁时祭祀不絶昭德崩许浑入朝因
乞赐观额以昭追奉诏以咏真洞寻真观腾空所居为昭德观】

君寻腾空子应到碧山家水春云母碓风扫石楠花若恋幽居好相邀弄紫霞【白居易诗有
何处水边碓夜春云母声及云碓无人水自春之句自注云庐山中云母多故以水碓捣链俗
呼为云碓本草衍义石楠叶似枇杷叶之小者而背无毛正二月间开花冬有二叶为花苞苞
既开中有十余花大小如椿花甚细碎每一苞约弹许大成一球一花六叶一朵有七八球淡
白緑色花罢去年叶尽脱渐生新叶 诗人玉屑诗体有借对孟浩然厨人具鸡黍稚子摘杨梅
太白水春云母碓风扫石楠花少陵竹叶于人既无分菊花从此不须开是也 碓音对】

其二

多君相门女学道爱神仙素手掬青靄罗衣曳紫烟一往屏风叠乘鸾着玉鞭【一作不着鞭
多犹重也鲍照与妹书左右青靄表里紫霄韵会靄云集貌屏风叠在庐山见十一卷注
靄哀上声】

赠内

三百六十日日醉如泥虽为李白妇何异太常妻【後汉书周泽为太常洁清循行尽敬宗
庙常卧病斋宫其妻哀泽老病闚问所苦泽大怒以妻干犯斋禁遂收送诏狱谢罪当世疑其
诡激时人为之语曰生世不谐作太常妻一岁三百六十日三百五十九日斋一日不斋醉如
泥】

在浔阳非所寄内【後汉书陈蕃传或禁锢闭隔或死徙非所晋书曹摅传狱有死囚岁夕摅
行狱愍之曰卿等不幸致此非所後人以囹圄为非所本此刘长卿有非所留系闻长州军笛
声亦用其字】

闻难知恸哭行啼入府中多君同蔡琰流泪请曹公知登吴章岭昔与死无分崎岖行石道外折入青云相见若悲叹哀声那可闻【後汉书陈留董祀妻者同郡蔡邕女也名琰字文姬祀为屯田都尉犯法当死文姬诣曹操请之时公卿名士及远方使驿坐者满堂操谓宾客曰蔡伯喈女在外今为诸君见之及文姬进蓬首徒行叩头请罪音辞清辩旨甚酸哀衆皆改容操曰诚实相矜然文状已去奈何文姬曰明公廐马万匹虎士成林何惜疾足一骑而不济垂死之命乎操感其言乃追原祀罪江西通志吴章山在九江南康二府之界西去九江府城三十里南去南康府城四十五里与庐山相接岭路峻隘宋孔武仲吴章岭诗云庐山北转是吴章岩草纷纷静有香或云昔有吴章者居此故名或谓吴障山以其为吴之障也周必大泛舟游山録上吴章岭乱石聳牙颇亦险峻岭脊分江东西两路界过界便见五老峯是为山南韵会崎岖山险也琰以冉切音近究】

南流夜郎寄内

夜郎天外怨离居明月楼中音信疎北雁春归看欲尽南来不得豫章书【古诗同心而离居忧伤以终老一统志章山在湖广德安府城东四十里古文以为内方山左传吴自豫章与楚夹汉旧图经云豫章即今之章山唐李白娶安陆许氏逮流夜郎妻在父母家有寄内诗云南来不得豫章书亦言安陆之豫章也琦按魏顓序太白始娶于许终娶于宗则此时之妇乃宗也因寓居豫章故云一统志犹以流夜郎时妇为许相之女以豫章为德安府之豫章山俱误】

越女词五首

长干吴儿女眉目艳星月屐上足如霜不着鸦头袜【江南通志长千里在江寧府城南五里梁武帝诗容色玉耀眉如月晋书五行志初作屐者妇人头圆男子头方圆者顺之义所以别男女也至太康初妇人屐乃头方与男无别则知古妇人亦着屐也】

其二

吴儿多白皙好为荡舟剧卖眼掷春心折花调行客【史记齐桓公与蔡女戏船中夫人荡舟桓公止之不止卖眼即楚骚目成之意梁武帝子夜歌卖眼拂长袖含笑留上客调嘲笑也世说康僧渊目深而鼻高王丞相每调之】

其三

耶溪采莲女见客棹歌回笑入荷花去佯羞不出【缪本作肯】来【云笈七籤若耶溪在越州会稽县南】

其四

东阳素足女会稽素舸郎相看月未堕白地断肝肠【唐书地理志婺州东阳郡有东阳县越州会稽郡有会稽县俱隶江南东道白地犹俚语所谓平白地也按谢灵运有东阳溪中赠答二诗其一曰可怜谁家妇绿流洗素足明月在云间迢迢不可得其一日可怜谁家郎绿流乘素舸但问情若何月就云中堕此诗自二作点化而出 舸音歌】

其五

镜湖水如月耶溪女如雪新粧荡新波光景两奇絶【镜湖在会稽山阴两县界若耶溪在会稽县东南流入于镜湖详见六卷注】

浣纱石上女【一统志浣纱石在若耶溪侧是西施浣纱之所或云在苕萝山下】

玉面耶溪女青蛾红粉粧一双金齿屐两足白如霜【古诗娥娥红粉粧南越志军安县女子赵姬着金箱齿屐】

示金陵子【一作金陵子词 粧楼记金陵子能作醉来粧】

金陵城东谁家【一作金陵】子窃听琴声碧【一作夜】窗里落花一片天上来随人直渡西江水楚歌吴语娇不成似能未能最有情谢公正要东山妓携手林泉处处行【通监谢安每游东山常以妓女自随】

出妓金陵子呈卢六四首

安石东山三十春傲然携妓出风尘楼中见我金陵子何似阳台云雨人

其二

南国新丰酒东山小妓歌对君君不乐花月【萧本作有】奈愁何【梁元帝诗试酌新丰酒遥劝阳台人陆放翁入蜀记早发云阳过新丰小憩李太白诗云南国新丰酒东山小妓歌又唐人诗云再入新丰市犹闻旧酒香皆谓此地非长安之新丰也然长安新丰亦出名酒见王摩诘诗至今居民市肆颇盛】

其三

东道烟霞主西江诗酒筵相逢不觉醉日堕历阳川【左传若舍郑以为东道主唐书地理志淮南道和州历阳郡有历阳县】

其四

小妓金陵歌楚声家僮丹砂学凤鸣我亦为君饮清酒君心不肯向人倾【丹砂太白奴名见魏颢李翰林集序中学凤鸣谓吹笙也梁武帝凤笙曲朱唇玉指学凤鸣】

巴女词

巴水急如箭巴船去若飞十月三千里郎行几岁归【唐之渝州涪州忠州万州等处皆古时巴郡地其水流经三峡下至夷陵当盛涨时箭飞之速不是过矣】哭晁卿衡【萧本作行旧唐书日本国开元初遣使来朝因请儒士授经诏四门助教赵元默就鸿胪寺教之所得锡賚尽市文籍泛海而还其偏使朝臣仲满慕中国之风因留不去改姓名为朝衡仕历左补阙仪王友衡留京师五十年好书籍放归乡逗遛不去上元中擢衡为左散骑常侍镇南都护新唐书朝衡历左补阙仪王友多所该识久乃还天宝十二载朝衡复入朝云云王维有送秘书晁监还日本国诗序赵 有送晁补阙归日本诗储光羲有洛中贻朝校书衡诗盖晁字即古朝字朝衡晁衡实一人也新旧唐书俱不言衡终于何年据太白是诗则衡返棹日本而死矣岂上元以後事耶抑得之传闻之譌耶】

日本晁卿辞帝都征帆一片遶蓬壶明月不归沉碧海白云愁色满苍梧【唐书日本古倭奴也去京师万四千里直新罗东南在海中岛而居国无城郭聯木为栅落以草茨屋左右小岛五十余皆自名国而臣附之後稍习夏音恶倭名更号日本使者自言国近日所出以为名或曰日本乃小国为倭所并故冒其号使者不以情故疑焉拾遗记蓬壶蓬菜也水经注东北海中有大洲谓之郁洲山海经所谓郁山在海中者也言是山自苍梧徙此云山上犹有南方草木崔季珪之叙述初赋言郁洲者故苍梧之山也心悅而怪之闻其上有仙人石室也乃往观见一道人独处休休然不谈不对顾非已及也即其赋所云吾夕济於郁洲者也一统志淮安府海州朐山东北海中有大洲谓之郁洲又名郁洲一名郁州山一名苍梧山或云昔从苍梧飞来】

自溧水道哭王炎三首【说文溧水出丹阳溧水县元和郡县志溧水在宣州溧水县南六里江南通志溧水一名濑水在溧阳县西北上承丹阳湖东流为宜兴之荆溪入太湖旧名永阳江又名中江一统志王炎宣城人与李白为友尝游蜀及死白诗挽之】

白杨双行行白马悲路傍晨兴见晓月更似发云阳溧水通吴关逝川去未央故人万化尽闭骨茅山冈天上坠玉棺泉中掩龙章名飞日月上义与风云翔逸气竟莫展英图俄夭伤楚国一老人来嗟龚胜亡有言不可道雪泣忆【繆本作惜】兰芳【谢灵运庐陵王墓下诗晓月发云阳落日次朱方李善注越絶书曲阿为云阳县任昉哭范仆射诗一朝万化尽犹我故人情江淹恨赋烟断火絶闭骨泉里太平寰宇记茅山在句容县南五十里本名句曲山其山形如句字三曲昔茅山君得道於此後人遂名焉其山接句容金坛延陵三县界玉棺汉王乔事见十一卷注赵景真与嵇茂齐书表龙章於裸壤李善注龙袞龙之服也章章甫之冠也陆云南征赋雄声泉涌逸气风亮汉书王莽传遣谒者持安车印绶即拜楚国龚胜为太子师友祭酒胜不应徵不食而死龚胜本传胜死有老父来吊哭甚哀既而曰嗟乎薰以香自烧膏以明自销龚生竟夭天年非吾徒也遂趋而出莫知其谁谢灵运诗楚老惜兰芳吕氏春秋吴起雪

泣而应之高诱注雪拭也】

其二

王公希代宝弃世一何早吊死不及哀殡宫已秋草悲来欲脱剑挂向何枝好哭向茅山虽未摧一生泪尽丹阳道【言吊死而不及其新哀之时殡宫之上已生秋草盖言久也与左传赠死不及尸吊生不及哀句同意异陆机诗哀鸣兴殡宫论衡延陵季子过徐徐君好其剑季子以当使於上国未之许与季子使还徐君已死季子解剑带其冢树御者曰徐君已死尚谁为乎季子曰前已心许之矣可以徐君死故负吾心乎遂带剑於冢树而去溧水在两汉时乃丹阳郡之地故曰丹阳道】

其三

王家碧瑶树一树忽先摧海内故人泣天涯吊鹤来未成霖雨用先天【许本作失】济川材一罢广陵散鸣琴更不开【淮南子绹树在其南碧树瑶树在其北世说王戎云太尉神姿高彻如瑶林琼树自然是风尘表物陶侃别传侃丁母忧在墓下忽有二客来吊不哭而退仪服鲜异知非常人遣随视之但见双鹤冲天而去书说命若济巨川用汝作舟楫若岁大旱用汝作霖雨晋书嵇康将刑东市顾视日影索琴弹之曰昔袁孝尼尝从吾学广陵散吾每靳固之广陵散于今絶矣初康尝游乎洛西暮宿华阳亭引琴而弹夜分忽有客诣之称是古人与康共谈音律辞致清辩因索琴弹之而为广陵散声调絶伦遂以授康仍誓不传人亦不言其姓氏】

哭宣城善釀纪叟

纪叟黄泉里还应釀老春夜台无晓日沽酒与何人【一作题戴老酒店云戴老黄泉下还应釀大春夜台无李白沽酒与何人老春是纪叟所釀酒名唐人名酒多带春字陆机诗送子长夜台李周翰注坟墓一闭无复见明故云长夜台後人称夜台本此沈约伤美人赋忽沦躯于夜台卢照隣诗夜台无晓箭朝奠有虚尊】

宣城哭蒋徵君华

敬亭埋玉树知是蒋徵君安【缪本作果】得相如草空【缪本作仍】余封禅文池台空有月词赋旧凌云独挂延陵剑千秋在古坟【一统志蒋华墓在敬亭山华唐人尝与李白游白诗曰敬亭山下墓知是蒋徵君世说庾文康亡何扬州临葬云埋玉树着土中使人情何能已已史记相如既病免家居茂陵天子曰司马相如病甚可往从悉取其书若不然後失之矣使所忠往而相如已死家无书问其妻对曰长卿固未尝有书也时时着书人又取去即空居长卿未死时为一卷书曰有使来求书奏之无他书其遗札言封禅事所忠奏其书天子异之汉书武帝好神仙相如上大人赋欲以讽帝反缥缥有凌云之志延陵剑见前三首注】

李太白集注卷二十五

卷二十六

钦定四库全书

李太白集注卷二十六

钱塘 王琦 撰

表书共九首

为吴王谢责赴行在迟滞表【通监天宝十四载十二月安禄山以张通晤为睢阳太守与陈留长史杨朝宗将胡骑千余东略地郡县官多望风降走惟东平太守嗣吴王祗济南太守李随起兵拒之郡县之不从贼者皆依吴王为名十五载二月上以吴王祗为灵昌太守河南都知兵马使三月戊辰吴王祗击谢元同走之拜陈留太守河南节度使五月太常卿张垪荐夷陵太守虢王巨有勇略上徵吴王祗为太仆卿以巨为陈留谯郡太守河南节度使至德二载十一月张镐率鲁炅来瑱吴王祗李嗣业李奂五节度徇河南河东郡县皆下之其赴行在疑在徵为太仆卿时事汉书徵诣行在所顔师古曰天子或在京师或出巡狩不可豫定故言行在所耳三辅黄图行在所天子以四海为家不以京师宫室居处为常则当乘车輿以行天下车輿所至奏事皆曰行在独断天子所在曰行在所十六国春秋天子以四海为家故行曰乘輿止曰行在】

臣某言伏蒙圣恩追赴行在臣诚惶诚恐顿首顿首【缪本少二字】臣闻胡马矫首嘶北风以局顾越禽高飞恋南枝而刷羽所以流波思其旧浦落叶坠於木根在物尚然矧於臣子【齐东野语今臣僚上表所称诚惶诚恐及诚懼诚喜顿首稽首者谓之中谢中贺自唐以来其体如此盖臣某以下略叙数语便入此句然後敷陈其详古诗胡马依北风越鸟巢南枝水经注胡马感北风之思遂顿羈絶绊骧首而驰晨发京城食时至炖煌北塞外长鸣而去扬雄甘泉赋仰矫首以高视兮刘良注矫举也潘岳寡妇赋马悲鸣而局顾刘良注局顾蜷局顾盼不前也潘岳诗徒怀越鸟志眷恋想南枝梁简文帝诗衔苔入浅水刷羽向沙洲张协诗流波恋旧浦张骏东门行休否有终极落叶思本茎】臣位叨盘石辜负明时才阙总戎谬当强寇弩拙有素天实知之伏惟陛下重组乾纲再清国步慙【当作愍】臣不逮赐臣生全归见白日死无遗恨【韵会叨滥也汉书高帝王子弟地犬牙相制所谓盘石之宗也韵会孤负也毛氏曰孤负之孤当作孤俗作辜非隋书总戎塞表胡虏清尘卢思道孤鸿赋序才本弩拙性实疏嬾范甯谷梁传序周道衰陵乾纲絶纽疏曰乾纲者乾为阳喻天子坤为陰喻诸侯天子总统万物若纲纪衆纽故曰乾纲絶纽者纽是连系之词诸侯背叛四海分崩若纽之絶故曰絶纽诗大雅国步斯频朱子注步犹运也广韵愍怜也慙聪也二字异义世多以愍作慙非是】然臣年过耳顺风瘳日加锋镝残骸劣有余喘虽决力上道而心与愿违贵贪尺寸之程转增犬马之恋非有他故以疾淹留【郭璞尔雅注今江东呼病曰瘳广韵劣弱也少也陈书高祖纪决力取之曹植上责躬应诏诗表不胜犬马恋主之情瘳音倩镝音的】今大举天兵扫除戎羯所在邮驿徵发交驰臣逐便水行难於陆进瞻望丹阙神魂若飞慙坠履之还收喜遗簪之

再御不胜涕恋屏营之至谨奉表以闻【繆本少谨奉表以闻五字 韵会羯本地名上党武乡羯室也晋匈奴别部居之後因号胡戎为羯说文邮境上行书舍也驿置骑也一云步传为邮马传为驿新书楚昭王与吴人战楚军败昭王走而履决背而行失之行三十步复旋取履及至於随左右问曰王何惜一踣履乎昭王曰楚国虽贫岂爱一踣履哉恶与偕出勿与俱反也自是之後楚国之俗无相弃者韩诗外传孔子出游少源之野有妇人中泽而哭其音甚哀孔子使弟子问焉曰夫子何哭之哀妇人曰向者刈蓍薪亡吾蓍簪吾是以哀也弟子曰刈蓍薪而亡蓍簪有何悲焉妇人曰非伤亡簪也盖不忘故也广雅屏营征佞也国语屏营傍徨於山林之中後汉书夙夜屏营未知所立盖言惶惧之意後人表笺言激切屏营正是此义羯音揭屏音并】

为宋中丞请都金陵表【宋名若思为御史中丞】

臣某言臣诚惶诚恐顿首顿首臣闻社稷无常奉明者守之君臣无定位闇者失之所以父作子述重光叠辉天未絕晋人惟戴唐以功德有厚薄运数有修短功高而福祚长永德薄而政教陵迟三后之姓於今为庶非一朝也【左传社稷无常奉君臣无定位自古已然杜预注奉之无常人言惟德也书顾命昔君文王武王宣重光左传介之推曰献公之子九人唯君在矣惠怀无亲外内弃之天未絕晋必将有主主晋祀者非君而谁汉书谷永传以功德有厚薄期质有修短王嘉传纵心恣欲法度陵迟顔师古注陵迟即陵夷也言渐颓替也魏书政教陵迟至於凋薄左传三后之姓於今为庶主所知也杜预注三后虞夏商也】伏惟陛下钦六圣之光训拥千载之鸿休有国之本羣生属望粤自明两光岐之阳昔有周太王之兴发迹於此天后有类岂人事与【六圣高祖太宗高宗中宗睿宗玄宗也书顾命用答扬文武之光训孔安国传用对扬圣祖文武之大教隋书鸿休永播久而弥新北齐书太子国之根本周易明两作离大人以继明照於四方唐时岐州领天兴岐山扶风麟游普润宝鸡盩厔虢郿九县属关内道去京师三百七十里周太王迁国於岐山之下即其地也鲁颂云后稷之孙实惟太王居岐之阳实始翦商天宝元年改称扶风郡肃宗即位於灵武改称扶风为凤翔郡二载遂驻蹕於凤翔其年十月克复两京始还长安】皇朝百五十年金革不作逆胡窃号剥乱中原虽平嵩丘填伊洛不足以掩宫城之骸骨决洪河洒秦雍不足以荡犬羊之羶臊毒侵区宇愤盈穹旻此乃猛士奋剑之秋谋臣运筹之日夫不拯横流何以彰圣德不斩巨猾无以兴神功十乱佐周而克昌四凶及虞而乃去去元凶者非陛下而谁【嵩丘嵩山也为河南巨镇伊洛二水为河南巨川见一卷明堂赋注唐书地理志西京宫城长千四百四十步广九百六十步周四千八百六十步其崇三丈有半东都宫城长千六百二十步广八百有五步周四千九百二十一步其崇四丈八尺以象北辰藩卫曰紫微城雍録唐都城三重外一重名京城内一重名皇城又内一重名宫城亦名子城洪河黄河也西京赋带以洪河泾渭之川唐之西京古秦地在禹贡为雍州之域故曰秦雍周礼羊泠毛而毳羶犬赤股而躁臊正义云依庖人职注臊谓犬也羶谓羊也泠毛谓毛长也毳谓毛别聚结者此羊肉必羶也赤股者股里无毛谓之赤股非谓肉赤而走又躁疾犬有如此者其肉必臊郑康成周礼注杜子春云臊犬膏羶羊脂也张衡东京赋区宇义宁穹旻天也尔雅疏李巡云仰视天形穹隆而高其色苍苍故曰穹苍旻闵也言其以仁慈之恩覆闵在下则称旻天今日穹旻盖变文称之汉书运筹帡幄之中决胜千里之外傅亮修张良庙教夷项定汉大拯横流东京赋巨猾间叠窃弄神器书泰誓予有乱臣十人

同心同德正义云乱治也谓我治理之臣有十人也论语引此而孔子论之有一妇人焉则十人之中其一是妇人故先儒郑玄等皆以十人为文母周公太公召公毕公荣公太颠闾夭散宜生南宫适也左传昔帝鸿氏有不才子天下之民谓之浑敦少皞氏有不才子天下之民谓之穷奇颛顼氏有不才子天下之民谓之捣杙此三族也世济其凶增其恶名以至於尧尧不能去缙云氏有不才子天下之民以比三凶谓之饕餮舜臣尧宾於四门流四凶族投诸四裔以御魑魅宋书志梟元凶少雪仇耻】且道有兴废代有中季汉当三七莽亦为灾赤伏再起丕业终光非陛下至神至圣安能勃然中兴乎【汉书谷永传时世有中季天道有盛衰顔师古注中读为仲宋书汉元成世道士言?者云赤厄三七三七二百一十年有外戚之篡阹极三六当有龙飞之秀兴复祖宗及莽篡汉汉二百一十年矣莽十八年而败光武兴焉赤伏见九卷注司马相如封禅文天下之壮观王者之丕业】以臣料人事得失敢献疑於陛下臣犹望愚夫千虑或冀一得【列子北山愚公其妻献疑汉书广武君曰臣闻智者千虑必有一失愚者千虑亦有一得】何【当作向】者贼臣杨国忠蔽塞天聪屠割黎庶女弟席宠倾国弄权九土泉货尽归其室怨气上激水旱荐臻重罗暴乱百姓力屈即欲平殄螫贼恐难应期且图万全之计以成一举之策【魏书树列朋党蔽塞天聪旧唐书杨国忠传太真妃即国忠从祖妹也书毕命兹殷庶土席宠惟旧孔安国传居宠日久正义云席者人之所处故为居之义太真外传杨氏权倾天下每有嘱请台省府县若奉诏勅四方奇货童仆驼马日输其门潇湘録杨国忠权势渐高四方奉贡珍宝莫不先献之豪富奢华朝廷间无敌通监天宝十三载自去岁水旱相继关中大饥诗大雅饥馑荐臻左传率我螫贼以来摇荡我边疆杜预注螫贼食禾稼虫名 螫音茅】今自河以北为胡所凌自河之南孤城四垒大盗蚕食割为洪沟宇宙 岬【繆本作机】昭然可觀【凌凌辄谓践踏也礼记四郊多垒郑康成注垒军壁也汉书稍蚕食六国顔师古注蚕食谓渐吞灭之如蚕食叶也孔穎達毛诗正义蚕食者蚕之食桑渐渐以食使桑尽也洪沟即鸿沟见十一卷注 岬不安也见三卷注】臣伏见金陵旧都地称天险龙盘虎踞开局自然六代皇居五福斯在雄图霸迹隐軫由存咽喉控带紫错如绣天下衣冠士庶避地东吴永嘉南迁未盛於此【龙盘虎踞见七卷注石林燕语太一有五福大游小游四神天一地一直符君綦臣綦民綦凡十神皆天之贵神而五福所临无兵疫玉海说者谓太一贵神有十而尊曰五福迁徙有常率四十五岁而易灵游所直之方祥庆骈集雨阳时叙农扈屡丰民物阜康无或疵疢晋书武略雄图比踪前烈谢灵运诗隐軫邑里密邇江海辽史记秦韩之地形相错如绣宋书晋永嘉大乱幽冀青并兖州及徐州之淮北流民相率过淮亦有过江在晋陵郡界者】臣又闻汤及盘庚五迁其邑典谟训诰不以为非卫文徙居楚丘风人流咏【尚书序盘庚五迁将治亳殷民咨胥怨作盘庚三篇孔安国传自汤至盘庚凡五迁都史记帝盘庚之时殷已都河北盘庚渡河南复居成汤之故居乃五迁无定处殷民咨胥皆怨不欲徙盘庚乃告谕诸侯大臣正义曰汤自南亳迁西亳仲丁迁敖河亶甲居相祖乙居耿盘庚渡河南居西亳是五迁也毛诗传定之方中美卫文公也卫为狄所灭东徙渡河野处漕邑齐桓公攘夷狄而封之文公徙居楚丘始建城市营宫室得其时制百姓悦之国家殷富焉】伏惟陛下因万人之荡析乘六合之譟张去扶风万有一危之近邦就金陵太山必安之成策苟利於物断在宸衷【书盘庚今我民用荡析离居书无逸无或胥譟张为幻孔安国传譟张诳也刘琨答卢湛书自顷輶张困於逆乱李善注輶张惊惧之貌旧说輶譟通用是太白所用譟张字当作惊惧解 譟音舟】况齿革羽毛之所生梗楠豫章之所出元龟大贝充牣其中银坑铁冶连绵相属剡铜陵为金穴煮海水为盐山以征则兵强以守则国富横制八极克

复两京俗畜来苏之欢人多徯后之望【禹贡扬州厥贡齿革羽毛惟木孔安国传齿象牙革犀皮羽鸟羽毛旄牛尾木楸梓豫章正义曰楸梓豫章此三者是扬州美术故传举以言之所贡之木不止於此大禹谟昆命於元龟正义曰元龟谓大龟也白虎通江出大贝海出明珠尚书正义伏生书传云散宜生之江淮取大贝如大车之渠子虚赋充牣其中者不可胜纪唐书地理志扬州广陵郡有丹阳监广陵监钱官二江都县有铜六合县有铜有铁海陵县有盐官天长县有铜昇州江宁郡上元县有铜有铁句容县有铜溧水县有铜溧阳县有铜有铁剡削也铜陵出铜之山金穴藏金之窟汉书采山铜以为钱煮海水以为盐书仲虺之诰攸徂之民室家相庆曰徯我后后来其苏徯待也后君也苏复生也 楸音胼剡音产】陛下西以峨嵋为壁垒东以沧海为沟池守海陵之仓猎长洲之苑虽上林五柞复何加焉【峨嵋山见三卷注汉书枚乘传转粟西向陆行不絶水行满河不如海陵之仓修治上林杂以离宫积聚玩好圈守禽兽不如长洲之苑晋灼曰海陵海中山为仓也臣瓚曰海陵县名也有吴太仓服?曰长洲吴苑孟康曰以江水洲为苑也韦昭曰长洲在吴东太平寰宇记海陵仓即汉吴王濞之仓也枚乘上书曰转粟西向水行满河不如海陵之仓谓海渚之陵因以为仓今已堙灭长洲苑在苏州长洲县西南七十里艺文类聚吴地记曰长洲在姑苏南太湖北岸阖闾所游猎处也吴先主使徐详至魏魏太祖谓详曰孤愿越横江之津与孙将军游姑苏之上猎长洲之苑吾志足矣上林苑五柞宫俱见一卷大猎赋注 柞音昨】上皇居天帝运昌之都储精真一之境有虞则北闭剑阁南扃瞿塘蚩尤共工五兵莫向二圣高枕人何忧哉飞章问安往复巴峡朝发白帝暮宿江陵首尾相应率然之举【左思蜀都赋远则岷山之精上为井络天帝运期而会昌刘渊林注河图括地象曰岷山之地上为井络帝以会昌神以建福上为天井昌庆也言天帝於此会庆建福也甘泉赋储精垂恩李善注储精储蓄精诚也罗苹路史注三皇经云皇人者泰帝之所使在峨眉山黄帝往受真一五牙之法扬谷授道记云黄帝见天皇真一之经而不决遂周流四方谒皇人於峨眉山而问真一之道其言大率论水火绛宫大渊之事云剑阁见三卷蜀道难注瞿塘见四卷长干行注说文扃外闭之关也述异记轩辕之初立也有蚩尤氏兄弟七十二人铜头铁额食铁石轩辕诛之於涿鹿之野蚩尤能作云雾涿鹿今在冀州有蚩尤神俗云人身牛蹄四目六手今冀州人掘地得髑髅如铜铁者即蚩尤之骨也秦汉间说蚩尤氏耳鬓如剑戟头有角与轩辕鬪以角触人人不能向罗苹路史注世本云蚩尤作五兵戈矛戟酋矛夷矛黄帝诛之涿鹿之野淮南子昔共工之力触不周之山使地东南倾与高辛争为帝遂潜於渊宗族残灭继嗣絶祀文献通考女媧末年共工氏任智刑以强霸而不王与祝融战不胜怒触不周山以死朝发白帝暮宿江陵详见二十卷早发白帝城诗注礼记正义兵书云善用兵者如率然率然者常山蛇也击其首则尾至击其尾则首至击其中则首尾俱至储音除扃涓荧切音駟】不胜屏营瞻云望日之至谨先奉表陈情以闻【谨先以下八字缪本缺 晋书张轨传瞻云望日孤愤义伤】

为宋中丞自荐表

臣某闻天地闭而贤人隐云雷屯而君子用【周易天地闭贤人隐孔颖达正义谓二气不交通天地否闭贤人潜隐又周易云雷屯君子以经纶王弼注君子经纶之时也】臣伏见前翰林供奉李白年五十有七天宝初五府交辟不求闻达亦由子真谷口名动京师上皇闻而悦之召入禁掖既润色於鸿业或间草【郭本作进】於王言雍容揄扬特见褒赏为贼臣诈

诡遂放归山闲居制作言盈数万属逆胡暴乱避地庐山遇永王东巡胁行中道奔走却至彭泽具已陈首前後经宣慰大使崔涣及臣推覆清雪寻经奏闻【後汉书张楷传五府连辟举贤良方正不就章怀太子注五府太傅太尉司徒司空大将军也三国志诸葛亮遭汉末扰乱随叔父玄避难荆州躬耕於野不求闻达华阳国志郑子真褒中人也玄静守道履至德之行乃其人也教曰忠孝爱敬天下之至行也神中五徵帝王之要道也成帝元舅大将军王凤备礼聘之不应家谷口世号谷口子真汉书谷口郑子真不诎其志耕於岩石之下名震於京师顔师古汉书注掖门非正门而在两旁若人之臂掖也雍録御览曰出禁省为殿门外出大道为掖门禁掖者谓禁中之掖门也班固两都赋序以兴废继絶润色鸿业李善注言能发起遗文以光讚大业也唐书宰相表至德元载七月庚午蜀郡太守崔涣为门下侍郎同中书门下平章事十一月戊午涣为江南宣慰使】臣闻古之诸侯进贤受上赏蔽贤受明【郭本作显】戮若三适【郭本作道】称美必九锡光【繆本作先】荣垂之典谟【繆本作谋】永以为训臣所管李白实审无辜怀经济之才抗巢由之节文可以变风俗学可以究天人一命不沾四海称屈【汉书元朔元年诏曰进贤受上赏蔽贤蒙显戮古之道也其与中二千石礼官博士议不举贤者罪有司奏议曰古者诸侯贡士一适谓之好德再适谓之贤贤三适谓之有功乃加九锡服?曰适适得其人也应劭曰九锡一曰车马二曰衣服三曰乐器四曰朱户五曰纳陛六曰虎贲七曰鈇钺八曰弓矢九曰秬鬯此皆天子制度尊之故事事锡予但数少耳张晏曰九锡经本无文周礼以为九命春秋说有之臣瓚曰九锡备物伯者之盛礼齐桓晋文犹不能备今三进贤便受之似不然也当受进贤之一锡尚书太传云三适谓之有功赐以车服弓矢是也梁书鍾嵘传文丽日月学究天人周礼一命受职再命受服三命受位四命受器五命赐则六命赐官七命赐国八命作牧九命作伯孔穎達礼记正义天子上士三命中士再命下士一命後世以受初品官为一命本此】伏惟陛下大明广运至德无偏收其希世之英以为清朝之宝昔四皓遭高皇而不起翼惠帝而方来君臣离合亦各有数岂使此人名扬宇宙而枯槁当年传曰举逸人而天下归心伏惟陛下回太阳之高辉流覆盆之下照特请拜一京官献可替否以光朝列则四海豪俊引领知归不胜悽悽之至敢陈荐以闻【四皓见四卷注抱朴子是责三光不照覆盆之内也後汉书君以兼览博照为德臣以献可替否为忠尔雅替止也广韵替废也灭也潘岳秋兴赋序摄官承乏猥厕朝列後汉书杨赐传岂敢爱惜垂没之年而不尽其悽悽之心哉章怀太子注悽悽犹勤勤也悽音楼又音矐】

代壽山答孟少府移文书【方輿胜览壽山在常德府安陆县西北六十里昔山民有壽百岁者前人德安府记西揖白兆峯峦秀出其下李太白之庐想见拏丹砂抚青海而凌八极北壽山即太白所谓攢吸霞雨隐居灵仙者也入境之胜如此一统志壽山在湖广德安府城西北六十里与应山接境山下居民有壽至百余岁者故名】

淮南小壽山谨使东峯金衣双鹤衔飞云锦书於维扬孟公足下曰仆包大块之气象生洪荒之间连翼軫之分野控荆衡之远势盘薄万古邈然星河凭天霓以结峯倚斗极而横嶂颇能攢吸霞雨隐居灵仙产隋侯之明珠蓄卞氏之光宝罄宇宙之美殫造化之奇方与崑仑抗行阊风接境何人间巫庐台霍之足陈耶【按唐书地理志安州安陆郡隶淮南道鹤色白而曰金衣双鹤谓黄鹤也维扬扬州也摘禹贡淮海维扬州之句以成文也高诱淮南子注大块天地之间也汉书楚地翼軫之分野也今之南郡江夏零陵桂阳武陵长沙及汉中汝南郡尽楚分

也宋书翼軫荆州之分也韵会控引也荆衡谓荆州衡州之地或曰荆山衡山也荆山在湖广襄阳府南漳县西北八十里衡山在衡州府衡山县西三十里薛综东京赋注霓天边气也世说注旧说云隋侯出行有蛇斩而中断者侯连而续之蛇遂得生而去後衔明月珠以报其德光明照夜同画因曰隋珠卞和宝玉见四卷注水经注崑仑之山三级下曰樊桐一名板松二曰玄圃一名闾风上曰增城一名天庭是谓太帝之居又曰崑仑山有三角其一角正北干辰星之辉名曰闾风巔其一角正西名曰玄圃台其一角正东名曰崑仑宫巫山在四川夔州府巫山县庐山在湖广九江府德化县天台山在浙江台州府天台县霍山在江南六安州霍山县】昨於山人李白处见吾子移文【繆本作一昨於山人李白处奉见吾子移文】责仆以多奇鄙【繆本作叱】仆以特秀而盛谈三山五岳之美谓仆小山无名无德而称焉观乎斯言何太谬之甚也吾子岂不闻乎无名为天地之始有名为万物之母假令登封禪祀曷足以大道讥耶然能损人费物庖杀致祭暴殄草木镌刻金石使载图典亦未足为贵乎且达人庄生常有余论以为尺鷃不美於鹏鸟秋毫可并於太山由斯而谈何小大之殊也【老子无名天地之始有名万物之母河上公注无名者谓道无形故不可名也始者道之本吐炁布化出於虚无为天地本也有名谓天地有形位陰阳有刚柔是其有名也万物母者天地含气生万物长大成熟如母之养子汉书武帝纪夏四月癸卯上登封泰山孟康曰王者功成治定告成功於天封崇也助天之高也刻石纪号有金策石函金泥玉检之封焉应劭曰封者坛广十二丈高二丈阶三等封於其上示增高也刻石纪绩也立石三丈一尺其辞曰事天以礼立身以义事亲以孝育民以仁四守之内莫不为郡县四夷八蛮咸来贡职与天无极人民蕃息天禄永得尚玄酒而俎生鱼下禪梁父祀地主示增广此古制也周礼以禪祀祀昊天上帝孔安国尚书传精义以享谓之禪杜预左传注洁齐以享谓之禪说文镌琢石也尺鷃鹏鸟见一卷大鹏赋注庄子天下莫大於秋毫之末而太山为小郭象注夫以形相对则太山大於秋毫也若各据其性分物冥其极则形大未为有余形小不为不足苟各安於其性则秋毫不独小其小而太山不独大其大矣若以性足为大则天下之足未有过於秋毫也若性足者非大则虽太山亦可称小矣故曰天下莫大於秋毫之末而太山为小太山为小则天下无大矣秋毫为大则天下无小矣】又怪於诸山藏国宝隐国贤使吾君榜道烧山披访不获非通谈也夫皇王登极瑞物昭至蒲萄翡翠以纳贡河图洛书以应符设天网以掩贤穷月竈以率职天不秘宝地不藏珍风威百蛮春养万物王道无外何英贤珍玉而能伏匿於岩穴耶所谓榜道烧山此则王者之德未广矣昔太公大贤傅说明德栖渭川之水藏虞虢之岩卒能形诸兆朕感乎梦想此则天道闇合岂劳乎搜访哉果投竿诣麾舍筑作相佐周文讚武丁总而论之山亦何罪乃知岩穴为养贤之域林泉非秘宝之区则仆之诸山亦何负於国家矣【晋书孙惠诡称南岳逸士秦秘之以书干东海王越越省书榜道以求之惠乃出见越越即以为记室参军专掌文疏预参谋议三国志注文士传曰太祖雅闻阮瑀名辟之不应连见迫促乃逃入山中太祖使人焚山得瑀送至梁邵陵王贞白先生陶君碑榜道求贤焚林招士锤嵘诗品属词比事乃为通谈酉阳杂俎尉瑾曰蒲萄出自大宛张骞所致有黄白黑三种成熟之时子实逼侧星编珠聚西域多酿以为酒每来岁贡周书王会解成周之会仓吾翡翠翡翠者所以取羽琦按蒲萄西域所产翡翠南越所产略举二物以见远方纳贡之意淮南子洛出丹书河出緑图白虎通王者德至渊泉则河出龙图洛出龟书宋书黄帝轩辕氏游於洛水之上见大鱼杀五牲以醺之天乃甚两七日七夜鱼流於海得图书焉龙图出河龟书出洛赤文篆字以授轩辕礼纬含文嘉伏羲德合上下天应以鸟兽文章地应以河图洛书则而象之乃作八卦曹植与杨

修书吾王於是设天网以该之顿八紘以掩之顏延年宋郊祀歌月竈来宾吕延济注竈窟也月窟西极顏延年赭白马赋五方率职四隩入贡家语昔武王克商通道於九夷百蛮王肃注百蛮夷狄百种也汉书威震百蛮武暢西海後汉书杜笃传屠裂百蛮章怀太子注百蛮夷狄之总称也公羊传桓八年王者无外楚辞章句周文王梦立令狐之津太公在後帝曰昌赐汝名师文王再拜太公梦亦如此文王出田见识所梦载与俱归以为太师傅说抱怀道德而遭遇於刑罚操筑作於傅岩武丁思想贤者梦得圣人以其形象求之因得傅说登以为公道用大兴孔安国尚书传傅氏之岩在虞虢之界通道所经有涧水坏道常使胥靡刑人筑护此道说贤而隐代胥靡筑之以供食正义曰尸子云傅岩在北海之州傅言虞虢之界孔必有所案据而言之也皇甫谧云高宗梦天赐贤人胥靡之衣蒙之而来曰我徒也姓傅名说天下得我者岂徒也哉武丁悟而推之曰傅者相也说者懽悦也天下当有傅我而说民者哉明以梦视百官百官皆非也乃使百工写其形像求诸天下果见筑者胥靡衣褐带索执役於虞虢之间傅岩之野名说以其得之傅岩谓之傅说淮南子欲与物接而未成兆朕高诱注兆朕形怪也广韵吉凶形兆谓之兆朕韵会麾旗属周礼建大麾以田 竈音毳又音串义同朕直引切陈上声】近者逸人李白自峨眉而来尔其天为容道为貌不屈已不干人巢由以来一人而已乃虬蟠龟息遁乎此山仆尝弄之以緑绮卧之以碧云 之以琼液餌之以金砂既而童顏益春真气愈茂将欲倚剑天外挂弓扶桑浮四海横八荒出宇宙之寥廓登云天之渺茫俄而李公仰天长吁谓其友人曰吾未可去也吾与尔達则兼济天下穷则独善一身安能浪君紫霞?君青松乘君鸾鹤驾君虬龙一朝飞腾为方丈蓬莱之人耳此则未可也乃相与卷其丹书匣其瑶瑟申管晏之谈谋帝王之术奋其智能愿为辅弼使寰区大定海县清一事君之道成荣亲之义毕然後与陶朱留侯浮五湖戏沧洲不足为难矣即仆林下之所隐容岂不大哉必能资其聪明辅以正气借之以物色发之以文章虽烟花中贫没齿无恨其有山精木魅雄虺猛兽以驱之四荒磔裂原野使影迹絶灭不干户庭亦遣清风扫门明月侍坐此乃养贤之心实亦勤矣【庄子道与之貌天与之形左思吴都赋轮囷虬蟠说文虬龙子无角者抱朴子史记龟策传云江淮间居人为儿时以龟支牀至後死家人移牀而龟故生此亦不减五六十岁也不饮不食如此之久而不死其与凡物不同亦远矣仙家象龟之息岂不有以乎广博物志司马相如作玉如意赋梁王悦之赐以緑绮之琴琴铭曰桐梓合精见古琴疏琼液玉液也金砂仙药也俱见二十一卷注阮籍诗弯弓挂扶桑长剑倚天外方丈蓬莱见四卷注陆机诗佳人理瑶瑟孔丛子王者前有凝後有丞左有辅右有弼谓之四近後汉书蝉蜕器埃之中自致寰区之外隋书皇明御历仁深海县後汉书宪度既张远迩清一吴都赋川渚为之中贫後汉书以为没齿之恨章怀太子注没终也齿年也木魅山精见二十二卷注雄虺见一卷注猛兽猛虎也唐人讳虎或易称武或易称兽韵会磔裂也

虬音求磔音窄】孟子孟子无见深责耶明年青春求我於此岩也

上安州李长史书【今湖广之德安府在唐时为安州地属淮南道州设长史一人正五品上】

白嶽崎历落可笑人也虽然颇尝览千载观百家至於圣贤相似厥衆则有若似於仲尼纪信似於高祖牢之似於无忌宋玉似於屈原而遥观君侯窃疑魏冶便欲趋就临然举鞭迟疑之间未及回避且理有疑误而成过【一本无过字】事有形似而类真惟大雅含弘方能恕之

也【晋书桓彝字茂伦雅为周顗所重顗尝叹曰茂伦嶷崎历落固可笑人也汉书武帝罢黜百家表章六经顔师古注百家谓诸子杂说史记孔子既没弟子思慕有若状似孔子弟子相与共立为师师之如夫子时也史记汉书载纪信诳楚事不言其貌似高祖惟白帖云纪信貌似汉王乘黄屋车左纛诈称汉王出降项羽不详出於何书要必有所本晋书何无忌刘牢之之甥酷似其舅襄阳耆旧传宋玉识音而善文襄王好乐而爱赋既美其才而憎其似屈原也曰子盍从俗使楚人贵子之德乎汉书注如淳曰汉仪注列侯为丞相称君侯师古曰杨惲传丘常谓惲为君侯是则通呼列侯之尊称耳非必在於丞相也卢谿赠刘琨诗序大雅含弘量苞山藪】白少颇周慎忝闻义方入暗室而无欺属昏行而不变今小人履疑误形似之迹君侯流愴涕矜恤【繆本作舍】之恩戢秋霜之威布冬日之爱睟容有穆怒顔不彰虽将军息恨於长孺【一作孙】之前此无慙德司空受揖於元淑之际彼未为贤一言见冤【当作免】九死非谢【後汉书龙伯高敦厚周慎口无择言嵇康诗万石周慎安亲保荣周慎谓周详审慎也左传臣闻爱子教之以义方邢昺曰方犹道也南史梁简文帝纪弗欺暗室岂况三光又阮长之为中书郎直省夜往隣省误着屐出阁依事自列门下以暗夜人不知不受列长之固遣送曰一生不侮闇室列女传卫灵公与夫人夜坐闻车辚辚至阙而止过阙复有声公问夫人曰知此为谁夫人曰此蘧伯玉也公曰何以知之夫人曰妾闻礼下公门式路马所以广敬也夫忠臣与孝子不为昭昭变节不为冥冥堕行蘧伯玉卫之贤大夫也仁而有智敬於事上此其人必不以暗昧废礼是以知之刘勰新论蘧瑗不以昏行变节诗小雅既见君子孔燕岂弟毛传曰岂乐弟易也苟悦申鉴喜如春阳怒如秋霜十六国春秋去秋霜之威垂三春之泽左传赵襄冬日之日也赵盾夏日之日也杜预注冬日可爱夏日可畏也王融三月三日曲水诗序睟容有穆宾仪式序张诰注睟润泽之貌也穆和也汉书汲黯字长孺为人性倨少礼大将军青既益尊姊为皇后然黯与亢礼或说黯曰自天子欲令羣臣下大将军大将军尊贵诚重君不可以不拜黯曰夫以大将军有揖客反不重耶大将军闻愈贤黯数请问以朝廷所疑遇黯加於平日司空受揖事未详後汉书赵壹字元叔汉阳西县人光和元年举郡上计到京师是时司徒袁逢受计计吏数百人皆拜伏庭中莫敢仰视壹独长揖而已逢望而异之命左右往让之曰下郡计吏而揖三公何也对曰昔酈食其长揖汉王今揖三公何遽怪哉逢即敛衽下堂延置上坐因问西方事大悦顾谓坐中曰此汉阳赵元叔也朝臣莫有过之者吾请为诸君分坐坐者皆属观或用其事司空当是司徒元淑当是元叔之误未可知也楚辞虽九死其犹未悔 睟音粹】白孤剑谁托悲歌自怜迫於恓惶席不暇暖寄絶国而何仰若浮云而无依南徙莫从北游失路远【繆本作言】客汝海近还?【萧本作邛】城昨遇故人饮以狂药一酌一笑陶然乐酣困河朔之清觞饫中山之醇酎属早日初眩晨霾未收之离朱之明昧王戎之视青白其眼瞢而前行亦何异抗庄公之轮怒螳螂之臂御者趋召明其是非入门鞠躬精?飞散昔徐邈缘醉而赏魏王却以为贤无盐因丑而获齐君待之逾厚白妄人也安能比之上挂国风相鼠之讥下怀周易履虎之惧慙【当作慙】以固陋礼而遣之幸容甯越之辜深荷王公之德铭刻心骨退思狂???五情冰炭罔知所措昼愧於影夜慙於魄后处不遑战局无地【陈子昂诗孤剑将何托长謡塞上风班固答宾戏圣哲之治栖栖遑遑孔席不煖墨突不黔李善注栖遑不安居之意也韦昭曰煖温也言坐不煖席也淮南子墨子无煖席高诱曰坐席不至於温历行诸国汲汲於行道也宋书竈不得黔席未暇煖絶国谓远地见六卷注汝海见十三卷注史记正义括地志云安州安陆县城本春秋时郕国城杜预春秋经传集解郕国在江夏云杜县东南有郕城?城即郕城也古字通用晋书长水校尉孙季舒尝与石崇酣燕

慢傲过度崇欲表免之裴楷闻之谓崇曰足下饮人狂药责人正礼不亦乖乎初学记魏文帝典论曰大驾都许使光禄大夫刘松北镇袁绍军与绍子弟日共晏饮常以三伏之际昼夜酣饮极醉至於无知云以避一时之暑故河朔有避暑饮江总玛瑙盃赋获阿宗之美宝命河朔之名觴左思魏都赋醇酎中山流湏千日刘渊林注中山出好酎酒其俗传云昔有人曰玄石者从中山酒家沽酒酒家与之千日之酒语其节度比归百里可至於醉如其言饮之至家而醉其家不知其醉以为死也敛棺而葬之中山酒家计向千日忆曰玄石前来沽酒其醉可解也遂往问其隣人曰玄石死来三年服已阕矣於是与其家至玄石冢上掘而开其棺玄石於是醉始解起於棺中其俗语曰玄石饮酒一醉千日说文酎三重醇酒也晨霾早时昏雾之气赵岐孟子注离娄古之明目者盖以为黄帝时人也黄帝亡其玄珠使离朱索之离朱即离娄也能视於百步之外见秋毫之末晋书王戎幼而颖悟神彩秀彻视日不眩裴楷见而目之曰戎眼烂烂如岩下电又晋书阮籍能为青白眼见礼俗之士以白眼对之及嵇喜来吊籍作白眼喜不悵而退喜弟康闻之乃齎酒挟琴造焉籍大悦乃见青眼韵会薈日不明也韩诗外传齐庄公出猎有螳螂举足将搏其轮问其御曰此何虫也对曰此螳螂也其为虫知进而不知退不量力而轻就敌庄公曰以为人必为天下勇士矣於是回车避之而勇士归焉庄子汝不见夫螳螂乎怒其臂以当车辙不知其不胜任也魏志徐邈为尚书郎时科酒禁而邈私饮至於沈醉校士赵达问以曹事邈曰中圣人达白之太祖太祖甚怒鲜于辅进曰平日醉客谓酒清者为圣人浊者为贤人邈性修慎偶醉言耳竟坐得免刑文帝践阼车驾幸许昌问邈曰颇复中圣人否邈对曰昔子反毙於阳穀御叔罚於饮酒臣嗜同二子不能自惩时复中之然宿瘤以丑见传而臣以醉见识帝大笑顾左右曰名不虚立无盐丑女见四卷注诗国风相鼠有皮人而无仪人而无仪不死何为周易履虎尾咥人凶世说王安期作东海郡吏録一犯夜人来王问何处来云从师家受书还不觉日晚王曰鞭撻甯越以立威名恐非致理之本使吏送令归家广韵愆过也俗作???五情见二卷注郭象庄子注喜惧战於胷中固已结冰炭於五藏矣诗小雅王事靡盬不遑后处毛传云遑暇后跪处居也?音云饫於据切於去声酎音宙霾音埋薈音梦】伏惟君侯明夺秋月和均韶风扫尘词塲振发文雅陆机作太康之杰士未可比肩曹植为建安【繆本作武误】之雄才惟堪捧驾天下豪俊翕然趋风白之不敏窃慕余论【南齐书挺清誉於弱龄发韶风於早日韶风和风也鍾嵘诗品陈思为建安之杰陆机为太康之英太康西晋年号时则有左思潘岳二张二陆之诗建安汉末年号时则有曹氏父子及邺中七子之诗说苑比肩继踵而在何为无人】何图叔夜潦倒不切於事情正平猖狂自貽於耻辱一忤容色终身厚顔敢昧【繆本作沐芳】负荆请罪门下倘免以训责恤其愚蒙如能伏剑结纓谢君侯之德【嵇叔夜与山巨源絶交书足下旧知吾潦倒麤疎不切事情後汉书祢衡字正平孔融深爱其才数称述於曹操操欲见之而衡素相轻疾自称狂病不肯往而数有恣言操怀忿以其才名不欲杀之闻衡善击鼓乃召为鼓吏因大会宾客试阅音节诸吏过者皆令脱其故衣更着岑牟单绞之服次至衡衡方为渔阳掺挝蹀而前容态有异音节悲壮听者莫不慷慨衡进至操前而止吏呵之曰鼓吏何不改装而轻敢进乎衡曰诺於是先解袒衣次释余服裸身而立徐取岑牟单绞而着之复掺挝而去顔色不怍操笑曰本欲辱衡衡反辱孤孔稚珪北山移文芳杜厚顔薛荔无耻史记廉颇肉袒负荆至藺相如门谢罪索隐曰负荆者荆楚也可以为鞭者也左传魏绛将伏剑士魴张老止之孔穎達正义将伏剑谓仰剑刃身伏其上而取死也左传太子下石乞孟黶敌子路以戈击之断纓子路曰君子死冠不免结纓而死江淹上建平王书结纓伏剑少谢万一犹云杀身以报德也】敢以近所为【

繆本作敢一夜力撰】春游救苦寺诗一首十韵石岩寺诗一首八韵上杨都尉诗一首三十韵辞旨狂野贵露下情轻干视听幸乞详览【方輿胜览救苦寺在常德府西四里今名胜业院李白有春游救苦寺诗今考集中三诗皆不传】

与贾少公书【唐人通呼县尉曰少府少公即少府也书内有中原横溃及王命崇重大总元戎辟书三至严期迫切等语疑是永王璘胁行时所作】

【上似有阙文】宿昔惟清胜白绵疾疲薾去期恬退才微识浅无足济时虽中原横溃将何以救之王命崇重大总元戎辟书三至人轻礼重严期迫切难以固辞扶力一行前观进退【谢灵运诗疲薾慙贞坚吕向注疲薾困极之貌宋书孝武帝纪恬退自守不交当世南史儒林传中原横溃衣冠道尽汉书统辟元戎顔师古注元戎大衆也庾信哀江南赋实总元戎身先士卒阮籍奏记辟书始下下走为首李善注辟犹召也徐陵与宗室书扶力为书多不谄次扶力犹勉力也】旦殷深【繆本缺深字】源庐岳十载时人观其起与不起以卜江左兴亡谢安高卧东山苍生属望白不树矫抗之迹耻振玄邈之风混游渔商隐不絶俗岂徒贩卖云壑要射虚名方之二子实有慙德徒尘忝幕府终无能为【世说殷深源在墓所几十年於时朝野以拟管葛起不起以卜江左兴亡谢安高卧东山见七卷注刘琨劝进表存舜禹至公之情狭巢由矫抗之节桓温荐譙元彦表洗耳投渊以振玄邈之风後汉书郭林宗传隐不违亲贞不絶俗孔稚珪北山移文诱我松桂欺我云壑书仲虺之诰惟有慙德孔传曰慙德慙德不及古也】唯当报国荐贤持以自免斯言若谬天实殛之以足下深知具申中款惠子知我夫何间然勾当小事但增悚惕【一作佩陆云诗何用结中款仰指北辰星曹子建与杨德祖书其言之不慙恃惠子之知我也李周翰注我有此言而不慙者恃子恩惠之知我也一云惠子惠施也勾当干办也唐宋时俚语今北人犹有此言俱作去声呼】为赵宣城与杨右相书【赵宣城宣城太守赵悦也唐书天宝十一载十一月庚申杨国忠为右相】

某启辞违积年伏恋轩屏首冬初寒伏惟相公尊体起居万福某蒙恩才朽齿迈徒延圣日少忝末吏本乏远图中年废缺分归园壑昔相公秉国宪之日一拔九霄拂刷前耻昇腾晚官恩贷稠叠实戴丘山落羽再振枯鳞旋跃运以大风之举假以磨【当作摩】天之翔衣绣霜台含香华省宰剧慙强项之名酌贪砺清心之节三典列郡寂无成功但宣布王泽式酬天獎【陆云与陆典书年长而志新齿迈而曾勤唐书杨国忠传天宝七载擢给事中兼御史中丞蔡邕文烈侯杨公碑逮作御史允执国宪阮籍诗高岛摩天飞凌云共游戏绣衣御史之服霜台御史之府俱见十一卷注初学记应劭汉官仪曰尚书郎含鷄舌香伏奏事黄门侍郎对揖跪受故称尚书郎怀香握兰趋走丹墀宋书尚书郎口含鸡舌香以其奏事对答欲使气息芬芳也潘岳秋兴赋独展转於华省汉光武呼洛阳令董宣为强项令见十二卷注晋书广州包带山海珍异所出一簋之寄可资数世然多瘴疫人情憚焉惟贫窶不能自立者求补长史故前後刺史皆多黠货朝廷欲革岭南之弊隆安中以吴隐之为广州刺史未至州二十里地名石门有水曰贪泉饮者怀无厌之欲隐之既至语其亲人曰不见可欲使心不乱越岭丧清吾知之矣乃至泉所酌而饮之赋诗曰古人云此水一畝怀千金试使夷齐饮终当不易心在州清操逾厉典守也班固两都赋序王泽竭而诗不作任昉奏答勅示七夕诗启牵率庸陋式酬天獎刘良注式用也酬答也獎犹恩也】伏惟相公开张徽猷寅亮天地入夔龙之室持造化之

权安石高枕苍生是仰【诗小雅君子有徽猷毛传曰徽美也郑笺曰猷道也君子有美道以得声誉也书周官贰公弘化寅亮天地孔传曰敬信天地之教安石不出当如苍生何见七卷注】某鸣跃无已剪拂因人银章朱绂坐荣宦逵身荷宸眷【缪本作睠】目识龙颜既齐飞於鹄【郭本作驾】鹭复寄迹於门馆皆相公大造之力也而钟鸣漏尽夜行不息止足之分实愧古人犬马恋主迫於西汜所冀枯松晚岁无改节於风霜老骥余年期尽力於蹄足上答明主下报相公缕缕之诚屏息於此【剪拂见三卷注银章朱绂见十一卷注北史刘炫传以此庸虚屡动宸眷隋书音乐志怀黄绶白鹄鹭成行三国志田豫屡乞逊位司马宣王以为豫克壮书喻未听豫书答曰年过七十而以居位譬犹钟鸣漏尽而夜行不休是罪人也潘岳闲居赋序览止足之分庶浮云之志晋书陶侃季年怀止足之分不与朝权犬马恋主见本卷注楚辞出自汤谷入於蒙汜王逸注泛水涯也言日出东方汤谷之中入西极蒙水之涯也谢瞻诗扶光迫西汜吕延济注扶光日也迫薄也西汜日入处也缕缕见本卷注卢思道劳生论云违时薄宦屏息穷居】伏惟相公收遗簪於少昊【当作原】念亡弓於楚泽衰当益壮结草知归瞻望恩光无忘景刻【独异志孔子行过少陵原闻妇人哭甚哀使子贡问焉何哭之悲也妇人曰向者刈薪而遗簪孔子复问曰刈薪遗簪乃常也而哭悲者何也答曰非惜一簪所以悲不忘故也家语楚王出游亡弓 之弓左右请求之王曰已之楚王失弓楚人得弓又何求之後汉书马援尝谓宾客曰丈夫为志穷当益坚老当益壮左传魏颗败秦师於辅氏获杜回秦之力人也初魏武子有嬖妾无子武子疾命颗曰必嫁是疾病则曰必以为殉及卒颗嫁之曰疾病则乱吾从其治也及辅氏之役颗见老人结草以亢杜回杜回蹶而颠故获之夜梦之曰予尔所嫁妇人之父也尔用先人之治命予是以报江淹上建平王书大王惠以恩光顾以颜色谢灵运诗爱客不告疲饮讌遗景刻李善注刻漏刻也】

与韩荆州书【唐书韩朝宗初历左拾遗累迁荆州长史开元二十二载初置十道采访使朝宗以襄州刺史兼山南东道坐所任吏擅赋役贬洪州刺史天宝初召为京兆尹出为高平太守贬吴兴别驾卒喜识拔後进尝荐崔宗之严武於朝当时士咸归重之】

白闻天下谈士相聚而言曰生不用万户侯但愿一识韩荆州何令人之景慕一至於此耶岂不以有周公之风躬吐握之事使海内豪俊奔走而归之一登龙门则声誉十倍所以龙盘凤逸之士皆欲收名定价於君侯愿君侯不以富贵而骄之寒贱而忽之则三千宾中有毛遂使白得脱穎而出即其人焉【梁简文帝启矧彼前贤宁忘景慕韩诗外传周公曰吾文王之子武王之弟成王之叔父也又相天下吾於天下亦不轻矣然一沐三握发一饭三吐哺犹恐失天下之士淮南子智过万人者谓之英千人者谓之俊百人者谓之豪十人者谓之杰世说李元礼风格秀整高自标持欲以天下名教是非为己任後进之士有升其堂者皆以为登龙门史记平原君合从於楚约与食客门下有勇力文武备具者二十人偕得十九人有毛遂者前自赞於平原君平原君曰贤士之处世也譬若锥之处囊中其末立见今先生处胜之门下三年於此矣左右未有所称诵胜未有所闻是先生无所有也毛遂曰臣乃今日请处囊中耳使遂早得处囊中乃脱穎而出非特其末见而已】白陇西布衣流落楚汉十五好剑术徧干诸侯三十成文章历抵卿相虽长不满七尺而心雄万夫王公大人【旧本作臣今从唐文粹本】许与气义此畴曩心迹安敢不尽於君侯哉【缪本作为太白本蜀人称陇西者本先世族望而言也尔雅曩向也畴曩犹畴昔 曩乃党切曩上声】君

侯制作侔神明德行动天地笔参造化学究天人【旧本作笔参於造化学究於天人今从唐文粹本】幸愿开张心顔不以长揖见拒必若接之以高宴纵之以清谈请日试万言倚马可待今天下以君侯为文章之司命人物之权衡一经品题便作佳士而君侯何惜阶前盈尺之地不使白扬眉吐气激昂青云耶【何承天達性论妙思穷幽颐制作侔造化後汉书言行动天地举厝移陰阳梁书鍾嶸传文丽日月学究天人北史崔?常与萧祗明少?等高宴终日独无言世说桓宣武北征袁虎时从会须露布文唤袁倚马前令作手不辍笔俄得七纸殊可观】昔王子师为豫州未下车即辟荀慈明既下车又辟孔文举山涛作冀州甄拔三十余人或为侍中尚书先代所美而君侯亦荐一严协律入为秘书郎中间崔宗之房习祖黎昕许莹之徒或以才名见知或以清白见赏白每观其衔恩抚躬忠义奋发以此感激知君侯推赤心於诸贤腹中所以不归他人而愿委身国士倘急难有用敢效微躯【繆本作驱 後汉书王允字子师太原祁人也中平元年特选拜豫州刺史辟荀?孔融等为从事晋书江统传昔王子师为豫州未下车辟荀慈明下车辟孔文举晋书山涛出为冀州刺史冀州俗薄无相推轂涛甄拔隐屈搜访贤才旌命三十余人皆显名当时人怀慕尚风俗颇革唐书百官志太常寺有协律郎二人正八品上掌和律吕後汉书光武自乘轻骑案行部阵降者更相语曰萧王推赤心置人腹中安得不投死乎 昕音欣莹音荣】且人非尧舜谁能尽善白谟猷筹画安能自【旧本作尽今从唐文粹本】矜至於制作积成卷轴则欲尘秽视听恐雕虫小技不合大人若赐观刍蕘请给纸墨兼之书人【旧本作兼人书之今从唐文粹本】然後退扫【旧本作归今从唐文粹本】闲轩繕写呈上庶青萍结緑长价於薛卞之门幸惟下流大开獎饰惟君侯图之【任昉齐竟陵文宣王行状所造箴铭积成卷轴三国志陆凯传秽尘天听隋书李德林传经国大体是贾生晁错之侑雕虫小技殆子云相如之辈雕虫见二卷注诗大雅先民有言询於刍蕘南齐书高啸闲轩韵会编録文字谓之繕写青萍剑名结緑玉名俱见九卷注越絶书客有能相剑者名薛烛详见二卷注新序荆人卞和得玉璞详见四卷注】上安州裴长史书【通典安州今理安陆县春秋?子之国云梦之泽在焉後楚灭?封鬬辛为郢公即其地也注?或作郢】

白闻天不言而四时行地不语而百物生白人焉非天地【繆本多一也字】安得不言而知乎敢剖心析肝【萧本作刻心?肝】论举身之事便当谈笑以明其心而粗陈其大纲一快愤懣惟君侯察焉【北史长孙绍远曰夫天不言四时行焉地不言万物生焉史记邹阳传两臣二主剖心析肝相信岂移於浮词哉汉书司马迁传是仆终已不得舒愤懣以晓左右顔师古注懣烦闷也?即析字懣音闷又音满】白本家金陵世为右姓遭沮渠蒙逊难奔流咸秦因官寓家少长江汉五岁诵六甲十岁观百家轩辕以来颇得闻矣常横经藉书制作不倦迄於今三十春矣【按晋书凉武昭王讳暠字玄盛陇西成纪人姓李氏汉前将军广之十六世孙也广曾孙仲翔後汉初为将军讨叛羌於素昌素昌乃狄道也衆寡不敌死之仲翔子伯考奔丧因葬於狄道之东川遂家焉世为西州右姓玄盛当吕氏之末为群雄所奉遂启霸图兵不血刃坐定千里进号大都督大将军凉公领秦凉二州牧据河右迁都酒泉薨子歆嗣位为沮渠蒙逊所灭诸弟酒泉太守翻新城太守预领羽林监密左将军姚右将军亮等西奔炖煌翻及弟炖煌太守恂与诸子等弃炖煌奔於北山郡人宋承张弘以恂在郡有惠政推为冠军将军凉州刺史蒙逊屠其城歆子重耳脱身奔於江左仕於宋後归魏为弘农太守蒙逊徙翻子宝等於姑藏岁余北奔伊吾後归於魏胡应麟续笔丛凉武昭王之世南北瓜分已久即云先

世金陵後迁陇蜀亦万万不通盖後人因白侨寓白门而伪为此书云云琦按自本家金陵至少长江汉二十余字必有缺文讹字否则金陵或是金城之谬亦未可知断为伪作者非是唐书柳冲传江左定氏族凡郡上姓第一则为右姓太和以郡四姓为右姓齐浮屠昙刚类例凡甲门为右姓周建德氏族以四海通望为右姓隋开皇氏族以上品茂姓则为右姓唐贞观氏族志凡第一等则为右姓路氏着姓略以盛门为右姓李冲氏族系録凡四海望族则为右姓礼记九年教之数目郑康成注朔望与六甲也汉书八岁入小学学六甲五方书计之事南史顾欢年六七岁知推六甲六甲今之六十甲子史记贾生年少颇通诸子百家之书北齐书儒林传横经受业之侣遍於乡邑汉书叙传徒乐枕经藉书紆体横门沮音蒞】以为士生则桑弧蓬矢射乎四方故知大丈夫必有四方之志乃仗【繆本作杖】剑去国辞亲远游南穷苍梧东涉溟海见乡人相如夸云梦之事云楚有七泽遂来观焉而许相公家见招妻以孙女便憩迹【繆本无迹字】於此至移三霜焉【礼记男子生桑弧蓬矢六以射天地四方天地四方者男子之所有事也故必先有志於其所有事仗持也古杖仗通用汉书韩信传项梁渡淮信乃杖剑从之陈平传平身闲行杖剑亡渡河顔师古曰言直带一剑更无余资苍梧见五卷注云梦七泽见一卷注许相公谓许圜师按旧唐书许绍字嗣宗本高阳人梁末徙於周因家於安陆累官硤州刺史封安陆郡公少子圜师有器干博涉艺文举进士显庆三年累迁黄门侍郎同中书门下三品龙朔中为左相为李义山所挤左迁?州刺史寻转相州刺史上元中再迁户部尚书仪凤四年卒】曩昔东游维扬不逾一年散金三十余万有落魄公子悉皆济之此则是白之轻财好施也【向秀思旧赋序追思曩昔游晏之好禹贡淮海维扬州落魄见三卷注魄音薄】又昔与蜀中友人吴指南同游於楚指南死於洞庭之上白禪服恸哭若丧天伦炎月伏屍泣尽而【郭氏本无而字】继之以血行路闻者悉皆伤心猛虎前临坚守不动遂权殡於湖侧便之金陵数年来观筋肉【集本作骨今从唐文粹本】尚在白雪泣持刃躬申洗削裹骨徒步负之而趋寝兴携持无辍身手遂丐营葬於鄂城之东故乡路遥魂魄无主礼以迁窆式昭朋情此则是白存交重义也【礼记中月而禫禫而紼郑康成注黑经白纬曰紼旧说紼冠者采纓也孔穎達正义禫而紼者禫祭之时玄冠朝服禫祭既訖而首着紼冠身着素端黄裳以至吉祭禫服即素服之义天伦兄弟也见十五卷注雪泣拭泪也见二十五卷注鄂城谓江夏郡城本名鄂州故曰鄂城小尔雅下棺谓之窆 禫徒感切覃上声窆音贬】又昔与逸人东严子隐於岷山之阳白巢居数年不迹城市养奇禽千计呼皆就掌取食了无惊猜广汉太守闻而异之诣庐亲覩因举二人以有道并不起此则白养高忘机不屈之迹也【尚书蔡传晁氏曰蜀以山近江源者通为岷山连峯接岫重叠险阻不详远近青城天彭之所环绕皆古之岷山青城乃其第一峯也地理今释岷山跨古雍梁二州自陕西巩昌府岷州卫以西大山重谷谿谷起伏西南走蛮箐中直抵四川成都府之西境凡茂州之雪岭灌县之青城皆其支脉而导江之处则在今松潘卫北西番界之浪架岭汉书地理志所云岷山在湔道县西徼外是也太白巴西郡人唐之巴西郡即汉之广汉郡地取旧名以代时称唐人多有此习其实唐时无广汉太守之名也有道唐取士科名唐书高适传举有道科中第是也】又前礼部尚书苏公出为益州长史白於路中投刺待以布衣之礼因谓羣寮曰此子天才英丽下笔不休虽风力未成且见专车之骨若广之以学可以相如比肩也四海明识具知此谈【唐书苏颋字廷硕开元四年进同紫微黄门平章事八年罢为礼部尚书俄检校益州大都督长史按察节度剑南诸州释名书姓字於奏白曰刺北齐书杨愔传神武至信都遂投刺辕门便蒙引见扬雄甘泉赋命羣寮历吉日班固与弟超书傳武仲以能属文为兰台令史下笔不

能自休国语昔禹致羣臣於会稽之山防风氏後至禹杀而戮之其骨节专车】前此郡督马公朝野豪彦一见尽【繆本少尽字】礼许为奇才因谓长史李京之曰诸人之文犹山无?霞春无草树李白之文清雄奔放名章俊语络绎间起光明洞彻【繆本作澈】句句动人此则故交元丹亲接斯议【按唐书安州安陆郡设中都督府置都督一人正三品盖即刺史之任长史一人正五品上】若苏马二公愚人也复何足【繆本多一尽字】陈悦贤贤也白有可尚夫唐虞之际於斯为盛有妇人焉九人而已是知才难不可多得白野人也颇工於文惟君侯顾之无按剑也伏惟君侯贵而且贤鹰扬虎视齿若编贝肤如凝脂昭昭乎若玉山上行朗然映人也而高义重诺名飞天京四方诸侯闻风暗许倚剑慷慨气干虹蜺月费千金日宴羣客出跃骏马入罗红顔所在之处宾朋成市故时人【繆本作节】歌曰宾朋何喧喧日夜裴公门愿得裴公之一言不须驱马埒【繆本作将】华轩白不知君侯何以得此声於天壤之间岂不由重诺好贤谦以得也而晚节改操栖情翰林天材超然度越作者屈佐郾【繆本作?】国时惟清哉棱威雄雄下嚮【繆本作熠】羣物【应休璉与侍郎曹长思书王肃以宿德显授何曾以後进见拔皆鹰扬虎视有万里之望汉书目若悬珠齿若编贝诗国风肤如凝脂世说见裴叔则如玉山上行光映照人江淹诗倚剑临八荒曹植七启挥袂则九野生风慷慨则气成虹蜺说文埒卑垣也韵会檐宇之末曰轩魏都赋注长廊之有窗也华轩谓华美之轩见二十五卷注晚节暮年也见十五卷注汉书籍翰林以为主人子墨为客卿李善注韦昭曰翰笔也翰林文翰之多若林也诗大雅有壬有林是也此云林即文翰林犹儒林之意也元和郡县志安州春秋时郾国太平寰宇记左氏传曰郾人军於蒲骚杜预注云郾国在江夏郡云杜县楚灭之按郾国今安州城是也威棱见一卷大猎赋注广韵嚮懾也埒音劣棱音楞懾音叠】白窃慕高义已经十年云山间之造谒无路今也运会得趋末尘承顔接辞八九度矣常欲一雪心迹崎岖未便何图谤言【繆本作詈】忽生衆口攢毁将恐【繆本作欲】投杼下客震於严威然自明无辜何忧悔吝孔子曰畏天命畏大人畏圣人之言过此三者?神不害若使事得其实罪当其身则将浴兰沐芳自屏於烹鲜之地惟君侯死生不然投山窜海转死沟壑岂能明目张胆托书自陈耶【史记臣所以去亲戚而事君者徒慕君之高义也度犹次也投杼用曾母事见十一卷注楚辞浴兰汤兮沐芳老子治大国若烹小鲜河上公注鲜鱼也烹鲜之地犹云鼎镬也南史王藻传便当刊肤剪髮投山窜海史记陈余传将军瞋目张胆出万死不顾一生之计杼音紵】昔王东海问犯夜者曰何所从来答曰从师受学不觉日晚王曰吾岂可鞭撻甯越以立威名想君侯通人必不尔也【晋书王承迁东海太守有犯夜者为吏所拘承问其故答曰从师受学不觉日暮承曰鞭撻甯越以立威名非政化之本使吏送令归家论衡博览古今者为通人又曰通书千篇以上万卷以下弘畅雅言审定文读而以教授为人师者通人也】愿君侯惠以大遇洞开心顔终乎前恩再辱英盼白必能使精诚动天长虹贯日直度易水不以为寒若赫然作威加以大怒不许门下逐之长途白即膝行於前再拜而去西入秦海一观国风永辞君侯黄鹄举矣何王公大人之门不可以弹长剑乎【谢朓诗俯仰流英盼虹贯日易水寒见一卷注汉书项羽见诸侯将入辕门膝行而前莫敢仰视秦海秦地也古以秦地为陆海故谓之秦海田饶谓鲁哀公曰臣将去君黄鹄举矣详见二卷注弹剑见三卷注容斋四笔李太白上安州裴长史书裴君不知何如人至誉其贵而且贤名飞天京天才超然度越作者棱威雄雄下嚮羣物予谓白以白衣入翰林其盖世英姿能使高力士脱靴於殿上岂拘拘然怖一州佐者耶盖时有屈伸正自不得不尔大贤不偶神龙困於蝼蚁可胜叹哉白此书自序其生平云昔与蜀中友人吴指南同游指南死於洞庭之上白禪脉恸哭

炎月伏尸猛虎前临坚守不动遂权殡於湖侧数年来观筋肉尚在雪泣持刃躬申洗削里骨徒步负之而趋遂丐贷营葬於鄂城其存交重义如此又与逸人东严子隐於岷山巢居数年不迹城市养奇禽千计呼皆就掌取食了无惊猜其养高忘机如此而史传不为书之亦为未尽】

李太白集注卷二十六

卷二十七

钦定四库全书

李太白集注卷二十七

钱塘 王琦 撰

序二十首

暮春江夏送张祖监丞之东都序

吁咄哉仆书室坐愁亦已久矣每思欲遐登蓬莱极目四海手弄白日顶摩青穹挥斥幽愤不可得也而金骨未变玉颜已缙何常不扪松伤心抚鹤叹息误学书剑薄游人间紫微九重碧山万里有才无命甘於後时刘表不用於祢衡暂来江夏贺循喜逢於张翰且乐船中【宋书乐志旋驾耸汎青穹庄子挥斥八极神气不变郭象注挥斥犹纵放也说文缙黑色也谢朓诗薄游第从告紫微天子所居之宫以拟天之紫微垣而名也後汉书祢衡传刘表及荆州士大夫先服其才名甚宾礼之後侮慢於表表耻不能容以江夏太守黄祖性急故送衡与之祖亦善待焉晋书会稽贺循赴命入洛经吴阊门於船中弹琴张翰初不相识乃就循言谈便大相钦悦问循知其入洛翰曰吾亦有事北京便同载即去而不告家人】达人张侯大雅君子统泛舟之役在清川之湄谈玄赋诗连兴数月醉尽花柳赏穷江山王命【繆本作国祖】有程告以行迈烟景晚色惨为愁容系飞帆於半天泛渌水於遥海欲去不忍更开芳樽乐虽寰中趣逸天半平生酣畅未若此筵至於清谈浩歌雄笔丽藻笑饮醪酒醉挥素琴余实不愧於古人也【左传秦输粟於晋自雍及绛相继命之曰泛舟之役诗国风行迈靡靡毛传曰迈行也郑笺曰行道也道行犹行道也刘孝绰诗芳樽散绪寒梁简文帝大爱敬寺刹下铭序功超域外道迈寰中楚辞临风怵兮浩歌郭璞尔雅序英儒瞻闻之士洪笔丽藻之客疏曰洪大也丽美也藻水藻也有文以喻人之文章言大有词笔美於文章之客也素琴见二卷注】扬袂远别何时归来想洛阳之秋风将脍鱼以相待诗可赠远无乃阙乎【张翰在洛见秋风起因思吴中蓴菜羹鲈鱼脍遂命驾而归见廿二卷注】

奉饒十七翁二十四翁寻桃花源序【名山洞天福地记桃源山周围七十里名白马玄光之天在朗州武陵县一统志桃源山在湖广常德府桃源县南二十里其西南有桃源洞一名秦人洞洞北有桃花溪故老传云晋太元中武陵渔人沿溪行忽逢桃树夹岸复前行得一山山有小口便舍船入行数十步豁然平旷屋舍俨然桑竹交通鸡犬相闻男女耕种怡然自乐见渔人惊问所从来为设酒馔村中闻有此人咸来问讯自云先世避秦乱率妻子来此不复出停数日送出渔人志之太守即遣人随所志迷不复得路琦按桃花源自陶渊明作记之後无人复至其地後人多云是仙境或云乃托言耳非实境也好奇之士慕想不可得而指近地之山以当之遂有桃源山其实非昔之桃花源矣】

昔祖龙灭古道严威刑煎熬生人若坠大火三坟五典散为寒灰筑长城建阿房并诸侯杀豪俊自谓功高羲皇国可万世思欲凌云气求仙人登封太山风雨暴作虽五松受职草木有知而万象乖度礼刑将弛则绮皓不得不遁於南山鲁连不得不蹈於东海则桃源之避世者可谓超升先觉夫指鹿之俦连颈而同死非吾党之谓乎【祖龙见二卷注谓秦始皇楚辞九思我心兮煎熬孔安国尚书序伏羲神农黄帝之书谓之三坟言大道也少昊颛顼高辛唐虞之书谓之五典言常道也史记秦始皇三十四年丞相李斯请史官非秦纪皆烧之非博士官所职天下敢有藏诗书百家语者悉诣守尉杂烧之有敢偶语诗书弃市以古非今者族吏见知不举者与同罪令下三十日不烧黥为城旦贾生过秦论乃使蒙恬北筑长城而守藩篱却匈奴七百余里胡人不敢南下而牧马士不敢弯弓而报怨三辅黄图阿房宫亦曰阿城惠文王造宫未成而亡始皇广其宫规恢三百余里离宫别馆弥山跨谷辇道相属阁道通骊山八十余里表南山之巅以为阙络樊川以为池作阿房前殿东西五十步南北五十丈上可坐万人下建五丈旗以木兰为梁以磁石为门周驰为复道度渭属之咸阳以象太极阁道抵营室也过秦论堕名城杀豪俊史记秦始皇二十六年制曰朕闻太古有号无諡中古有号死而以为諡如此则子议父臣议君也甚无谓朕勿取焉自今以来除諡法朕为始皇帝後世以计数二世三世至於万世传之无穷二十八年始皇上太山立石封祠祀下风雨暴至休于树下因封其树为五大夫野客丛书按应劭云秦皇逢暴雨得五松因封为五大夫独异志始皇二十八年登封太山至半道忽大风雨雷电路旁有五松树?翳数亩乃封为五大夫忽闻松上有人言曰无道德无仁礼而王天下妄名帝何以封左右咸闻始皇不乐归崩於沙丘绮皓遁南山见二十二卷注鲁连蹈东海见四卷注史记赵高欲为乱恐羣臣不听乃先设验持鹿献於二世曰马也二世笑曰丞相误矣谓鹿为马问左右左右或默或言马以阿顺赵高或言鹿者高因阴中诸言鹿者以法後羣臣皆畏高李善文选注风俗通曰秦相赵高指鹿为马束蒲为脯二世不觉】二翁耽老氏之言继少卿之作文以述大雅道以通至精卷舒天地之心脱落神仙之境武陵遗迹可得而窥焉问津利往水引渔者花藏仙谿春风不知从来落英何许流出石洞来入晨光尽开有良田名池竹果森列三十六洞别为一天耶今扁舟而行笑谢人世阡陌未改古人依然白云何时而归来青山一去而谁往诸公赋桃源以美之【史记老子修道德其学以自隐无名为务居周久之见周之衰乃遂去至关关令尹喜曰子将隐矣强为我着书於是老子乃着书上下篇言道德之意五千余言而去莫知其所终文选有李少卿与苏武诗三首老氏之言少卿之作俱切李氏事用何许犹何处也何晏景福殿赋晨光内照流景外燁李善注晨光日光也述异记人间三十六洞天知名者十耳余二十六天出九微志扁舟特舟也阡陌田间道也俱详二卷注】

夏日【繆本於日字下多一奉字】陪司马武公与羣贤宴姑熟亭序【武公名幼成为宣州司马见後赵公西候亭颂江南通志太平府当涂县有采虹桥即下浮桥唐李阳冰建亭在其上李白序之名姑熟亭盖走芜湖道也】

通驿公馆南有水亭焉四葢翬飞巉絶浦屿盖有前摄令河东薛公栋而宇之今宰陇西李公明化开物成务又横其梁而阁之昼鸣闲琴夕酌清月盖为接輶轩祖远客之佳境也【说文葢屋栋也徐锴曰所以承瓦故从瓦诗小雅如鸟斯革如翬斯飞郑笺曰伊洛而南素质五色皆备成章曰翬翬者乌之奇异者也孔颖达正义斯革斯飞言檐阿之势似鸟飞也周易夫易

开物成务冒天下之道左思吴都赋輶轩蓼扰李周翰注輶轩轻车也昔人多以輶轩为使车之通称见九卷注 薨音萌翬音挥輶音由】制置既久莫知何名司马武公长材博古独映方外因据胡牀岸帻啸咏而谓前长史李公及诸公曰此亭跨姑熟之水可称为姑熟亭焉嘉名胜槩自我作也【世说桓宣武引谢奕为司马奕既上犹推布衣交在温座席岸帻啸咏无异常日宣武每曰我方外司马方輿胜览姑熟溪在太平州当涂县南二里西入大江】且夫曹官绂冕者大贤处之若游青山卧白云逍遥偃傲何适不可小才居之窘而自拘悄若桎梏则清风朗月河岳秀皆为弃物安得称焉所以司马南隣当文章之旗鼓翰林客卿挥辞锋以战胜名教乐地无非得俊之場也千载一时言诗纪志【司马指武公翰林白自谓於时为客故曰客卿晋书思绪云骞辞锋景焕世说王平子胡母彦国诸人皆以任放为达或有裸体者乐广笑曰名教中自有乐地何为乃尔也】

江夏送林公上人游衡岳序

江南之仙山黄鹤之爽气偶得英粹後生俊人林公世为豪家此土之秀落髮归道专精律仪白月在天朗然独出既洒落於彩翰亦讽诵【繆本作诗】於人【繆本作金】口【方輿胜览黄鹤山一名黄鹄山在江夏县东九里去县西北二里有黄鹤矶顔延之宋武帝諡议英粹之照正性自天南史王规传王威明风韵遒上神峯标映千里絶迹百尺无枝实俊人也梁书慈心深广律仪清淨法苑珠林西方一月分为黑白初月一日至十五日名为白月十六日已去至於月尽名为黑月此文所云白月则指满月而言也笔严经何况如来金口所说】闲云无心与化偕往欲将振五楼之金策浮三湘之碧波乘杯泝流考室名岳瞰憩冥壑凌临诸天登祝融之峯岵望长沙之烟火遥谢旧国誓遗归踪百千开土稀有此者【金策锡杖也见十五卷注三湘见一卷注神僧杯度常乘木杯渡河见十卷注初学记衡山一峯名石困下有石室中常闻讽诵声冥壑幽谷也诸天见十九卷注一统志祝融峯在衡山县西北三十里位值离宫以配火德乃祝融君游息之所上有青玉坛道书以为第二十四福地湖广通志衡山有七十二峯其最高者为祝融峯旧传高九千七百三十丈或云祝融峯去地二万丈唐卢载诗五千里地望皆见七十二峯中最尊是也峯顶有风穴每将雨则风自穴发又有雷池祷雨皆验按唐书地里志潭州长沙郡隶江南西道领长沙湘潭湘乡益阳醴陵浏阳六县开土见廿一卷赠衡岳僧方外诗注】予所以叹其峻节扬其清波龙象先辈回眸拭视比夫汨泥沙者相去如牛之一毛昔智者安禅於台山远公托志於庐岳高标胜槩斯亦向慕哉【顔延年诗峻节贯秋霜僧中能负荷大法者谓之龙象见十二卷注张九龄诗相去九牛毛慙叹知何已传灯録智顗禅师荆州华容人十五礼佛像誓志出家悦焉如梦见大山临海际峯顶有僧招手接入一伽蓝云汝当居此年十八依僧法绪出家陈大建七年隐天台山佛陇峯有定光禅师先居此峯谓弟子曰不久当有善知识领徒至此俄而师至光曰忆畴昔举手招引否师即悟礼像之徵悲喜交怀乃执手共至庵所其夜闻空中钟磬之声师曰是何祥也曰是犍椎集僧得住之相此处金地吾已居之北峯银地汝宜居焉开山後宣帝建修禅寺割始丰县调以充衆费及隋炀帝请师受菩萨戒号师为智者师自始受禅教终乎灭度常披一坏衲冬夏不释来往居天台山二十二年建造大道場一十二所国清最居其後神僧传释慧远欲往罗浮及届浔阳见庐峯清淨足以息心始住龙泉精舍此处去水本远远乃以杖叩地曰若此中可得栖立当使朽坏抽泉言毕清流引出浚以成溪於是率衆行道昏晓不絶释迦余化於斯复

兴自远卜居庐阜三十余年影不出山迹不入俗每送客游履常以虎溪为界
汨音骨】紫霞摇心青枫夹岸目断川上送君此行羣公临流赋诗以赠

金陵与诸贤送权十一序

斯高柄秦嬴世不二三杰伏草与汉并出莽夷朱晖耿邓乃起自古英达未必尽用於当年去就之理在大运尔【李斯赵高执秦国之柄毒痛天下致嬴氏甫二世而亡於是三杰辅汉高以出定天下王莽篡汉耿弇邓禹之徒乃起而佐光武以致中兴夷灭也朱晖火之光晖也汉以火德王故云史记高祖曰运筹策帷帐之中决胜於千里之外吾不如子房镇国家抚百姓给馈饷不絶粮道吾不如萧何连百万之衆战必胜攻必取吾不如韩信此三人皆人杰也吾能用之此吾所以取天下也三国志注江表传曰有周瑜者与孙策同年亦英达夙成】我君六叶继圣熙乎玄风三清垂拱穆然紫极天人其一哉所以青云豪士散在商钓四坐明哲皆清朝旅人【韵会熙兴也又广也玄风清静之风也玉海唐大明宫内有三清殿杨巨元诗金台殿角直三清雍録阁本大明宫图有三清殿又韩诗外传寒暑均则三光清三光清则风雨时垂拱无为之意详见二十一卷注汉书东方朔传於是吴王穆然俛而深思顔师古注穆然静思貌紫极王者之居也见八卷注商钓或隱於市或渔於水也四坐明哲谓坐中诸贤旅人谓未登仕籍奔走四方犹仲尼旅人之意】吾希风广成荡漾浮世素受宝诀为三十六帝之外臣即四明逸老贺知章呼余为谪仙人盖实录耳而尝采姹女於江华收河车於清溪与天水权昭夷服勤炉火之业久矣【後汉书海内希风之流遂共相标榜章怀太子注希望也广成子古之仙人见二卷注宝诀道家修炼之诀三十六帝见三卷注陈书出者称为元首处者谓之外臣贺知章事见二十四卷注姹女汞也河车铅也皆炼丹药物参同契河上姹女灵而最神得火则飞不见埃尘阴真君金液还丹歌云北方正气名河车唐书地理志道州江华郡属江南西道清溪在池州秋浦县唐书宰相世系表权氏出自子姓商武丁之裔封於权其地南郡当阳县权城是也楚武王灭权迁於那处其孙因以为氏秦灭楚迁大姓于陇西因居天水姹丑下切㗎去声】之子也冲恬渊静翰才峻发【唐文粹作才翰骏发】白每一篇一札皆昭夷之所操吁舍我而南若折羽翼时岁律寒苦【唐文粹作色】天风枯声云帆涉汉罔若絶电【繆本作电】举目四顾霜天崢嶸衔杯叙离羣子赋诗以出饯酒仙翁李白辞【马融广成颂张云帆鲍照诗人生倏忽如絶电崢嶸言天气之高也刘伶酒德颂衔杯漱醪】

春於姑熟送赵四流炎方序【在晋时为姑熟在唐时为宣州当涂县详见廿五卷注赵盖为当涂县尉者也】

白以邹鲁多鸿儒燕赵饶壮士盖风土之然乎赵少翁【文苑英华作公为是】才貌瓌雅志气豪烈以黄绶作尉泥蟠当涂亦鸡栖鹤笼不足以窘束鸾凤【一作凰】耳【晋书儒林传鸿儒硕学无乏於时顔师古汉书注丞尉职卑皆黄绶後汉书中遭倾覆龙德泥蟠三国志秦宓传扬子云潜心著述有补于世泥蟠不滓行参圣师韵会栖鸡所止也瓌音规栖音细或亦从西音读】以疾恶抵法迁於炎方辞高堂而坠心指絶国以摇恨天与水远云连山长借光景於顷刻开壶觞於洲渚黄鹤晓别愁闻命子之声青枫冥色尽是伤心之树【絶国谓絶远之地见五卷注楚辞湛湛江水兮上有枫目极千里兮伤春心】然自吴瞻秦日见喜气上当

攫玉弩摧狼狐洗清天地雷雨必作冀白日回照丹心可明巴陵半道坐见还吴之棹令雪解而松柏振色气和而兰蕙开芳仆西登天门望子於西江之上【秦者长安帝都之地日见喜气谓其有振兴之象上者指元宗攫玉弩谓亲东征伐之柄摧狼狐谓剿灭安禄山之徒洗清天地谓宇宙清泰雷雨必作谓大赦天下尚书帝命验玉弩发惊天下易解卦雷雨作解君子以赦过宥罪巴陵岳州也天门山在当涂县西南详二十二卷注】吾贤可流水其道浮云其身通方大适何往不可何戚戚於路歧哉

秋於敬亭送从侄端游庐山序【敬亭山在今江南寧国府宣城县北庐山在今江西九江府德化县南山北隶南康星子县详见前注 端音端】

余小时大人令诵子虚赋私心慕之及长南游云梦覽七泽之壮观酒隐安陆蹉跎十年初嘉兴季父谪长沙西还时予拜见预饮林下端乃稚子嬉游在傍今来有成郁负秀气吾衰久矣见尔慰心申悲导【当作道】旧破涕为笑【子虚赋见一卷注方輿胜览云梦泽在安陆县南五十里预饮林下用阮籍叔侄为竹林之游事见十二卷注刘琨答卢谌书举觞对膝破涕为笑】方告我远涉西登香炉长山横蹙九江却转瀑布天落半与银河争流腾虹奔电灏射万壑此宇宙之奇诡也其上有方湖石井不可得而窥焉【庐山有香炉峯有瀑布水详二十一卷注韵会灏水会也远法师游庐山记自托此山二十三载再践石门四游南岭东望香炉峯北眺九江传闻有石井方湖中有赤鳞涌出野人不能叙直叹其奇而已 灏音丛】美君此行抚鹤长啸恨丹液未就白龙来迟使秦人着鞭先往桃花之水孤负夙愿惭归名山【文苑英华作惭未归於名山】终期後來携手五岳情以送远诗寧闕乎【丹液仙药见二卷注白龙用陵阳子明事见十二卷注桃花水即桃花源见二卷注】

送黄钟之鄱阳谒张使君序【鄱阳郡即饶州隶江南西道 鄱音婆】

东南之美者有江夏黄公焉白窃饮风流尝【郭本作始】接谈笑亦有抗节玉立光辉炯【繆本作罔】然气高时英辩折天口道可济物志栖无垠【任昉宣德皇后令辩折天口而似不能言李善注七略曰齐田骈好谈论故齐人为语曰天口骈天口者言田骈子不可穷其口若事天吕向注辩折谓分别事理也】鄱阳张公朝野荣望爱客接士即原尝春陵之亚焉每钦其辞华悬榻见往【当作待】而黄公因访古迹便从贵游乃侨装撰行去国遐陟【原尝春陵见七卷注陈蕃悬榻见十四卷注鲍照诗侨装多阙絶广韵侨客也撰定也侨装谓客行之装撰行谓定行日遐陟远行也】诸子衔酒惜别沾【繆本作脱】巾分赠沉醉烟夕惆怅凉月天南回以变夏火西飞而献秋汀葭飒然海草微落夫子行迈我心若何母金玉尔音而有遐心湖水演【繆本作悠】沔聶哉是行共赋武昌钓台篇以慰别情耳【火心星也下而西流则为秋候详五卷注谢朓诗汀葭稍靡靡广韵汀水际平沙也葭芦也周朗报羊希书池上海草岁荣日蔓行迈见本卷注诗小雅母金玉尔音而有遐心正义曰言汝虽不来当传书信母得自爱音声贵如金玉不以遗问我而有疏远我之心恐遂疏已故以恩责之冀音信不絶广韵演水长流貌韵会沔流满貌太平寰宇记钓台在武昌城下有石圻临江悬峙四眺极目武昌记云钓台在城南方輿胜覽钓台在武昌北门外大江中郡志孙权尝整陈于钓台汀音厅葭音加演音衍沔音免】

早春於江夏送蔡十还家云梦序

吾观蔡侯奇人也尔其才高气远有四方之志不然何周流宇宙太多耶白遐穷冥搜亦以早矣海草三绿不归国门又更逢春再结乡思一见夫子冥心道存穷朝晚以作宴驱烟霞以辅赏朗笑明月时眠落花斯游无何寻告睽索来暂观我去还愁人【孙绰天台山赋序远寄冥搜李善注冥搜搜访幽冥也何逊诗五载共衣裘一朝异睽索】乃浮汉阳入云梦乡榘云叩归魂亦飞且青山绿枫累道相接遇胜因赏利君前行既非远离曷足多叹【广韵榘楫也陶潜诗叩榘新秋月临流别友生榘音曳】秋七月结游镜湖无????我期先子而往敬慎好去终当早来无使耶川白云不得复弄尔乡中廖公及诸才子为诗略谢之【诗国风匪我愆期毛传曰愆过也????与愆同耶川即若耶溪与镜湖俱在会稽详见六卷注】秋日於太原南栅饯阳曲王赞公贾少公石艾尹少公应举赴上都序【按唐书地理志太原府有阳曲县有石艾县天宝元年更石艾为广阳县容斋随笔唐人呼县令为明府丞为赞府尉为少府李太白集有钱阳曲王赞公贾少公石艾尹少公序盖阳曲丞尉石艾尉也赞公少公之语益奇班固西都赋实用西迁作我上都张铣注上都西京也】

天王三京北都居一其风俗远盖陶唐氏之人欵襟四塞之要冲控五原之都邑雄藩剧镇非贤莫居【三京谓西京东京北京也唐以雍州为西京河南为东京太原为北京通典开元十一年以并州高祖起义之地置太原府号曰北京太平寰宇记并州大都督府天授元年置北都兼都督府开元十一年元宗行幸至此以此州王业所兴又建北都仍改并州为太原府立起义堂碑以纪其事通典今之并州为太原府古唐国也昔帝尧为唐侯所封之国太平寰宇记并州太原郡其人有唐尧之遗教君子深思小人俭陋卢谌理刘司空表咸以并州之地四塞为固东阻井陘西限蓝谷前有太行之岭後有句注之关广韵控引也五原汉武帝所置郡唐时盐州丰州胜州皆其故地去太原四百余里详见五卷注张载剑阁铭形胜之地匪亲勿居】则阳曲丞王公神仙之胄也尔其学镜千古知周万殊又若少府贾公以述作之雄也螯弄笔海虎攫辞塲又若石艾尹少公廊庙之器口折黄马手挥青萍咸道贯於人伦名飞於日下实难沉屈永怀青霄剑有隐而气冲七星珠虽潜而光照万壑【王氏一支相传出自周灵王太子晋即与浮丘公仙去者故曰神仙之胄骆宾王饯尹大官序请振词锋同开笔海王勃夫子庙碑虚舟独泛乘学海之波澜直轡高驱践词塲之阊阖蜀志许靖夙有名誉既以笃厚为称又以人物为意虽行事举动未悉允当蒋济以为大较廊庙器也庄子黄马骊牛三司马彪曰牛马以二为三曰牛曰马曰牛马形之三也曰黄曰骊曰黄骊色之三也曰黄马曰骊牛曰黄马骊牛形与色为三也故曰一与言为二二与一为三也刘孝标广絶交论骋黄马之剧谈吕延济注庄子曰惠施云黄马骊牛三谓黄骊色为三也言辨者以此为剧谈也青萍剑名见九卷注後汉书郭林宗虽善人伦而不为危言核论许劭少峻名节好人伦多所赏识晋书桓彝有人伦识鉴拔才取士或出於无闻或得之孩抱时人方之许郭人伦者品目人物之高下各为伦类也日下谓帝都见八卷注左思蜀都赋干青霄而秀出张铣注霄天也七星谓北斗之星暗用丰城剑气冲牛斗间事见三卷注】今年春皇帝有事千亩湛恩八埏大搜羣才以缉邦政而王公以令宰见举贾公以王霸昇闻海激伫乎三千天飞期於六月必有以也岂徒然哉【礼记天子为籍千亩冕而朱紘躬秉耒玉海开元二十三年正月巳亥耕籍田大赦赐勲爵所谓湛恩八埏大搜羣才正指斯事汉书威武纷云湛恩汪濊顔师古注湛读曰沉沉

深也八埏八方也详九卷注法苑珠林庄周说云有大鹏其形极大大鹏之背不知几千里将欲飞时击水三千里翼若垂天之云抟扶摇而上去地九万里方乃得逝要从北溟至於南溟一飞六月终不中息诗国风何其久也必有以也】有从兄太原主簿舒才华动时规谋匠物乃黻翠幕筵虹梁琼羞霞开羽觞电举然後抗目远览凭轩高吟【繆本於此下多汾河镜开涨蓝都之气色晋山屏列横朔野之郊原四句】屏俗事於烦襟结浮欢於落景俄而皓月生海来窥醉客黄云出关半起秋色数君乃辍酌慷慨摇心促装望丹阙而非远挥玉鞭而且去【太原县隶河东道之太原府设主簿一人正九品上後汉书百官志注蕃维盘固规谋弘远潘岳籍田赋翠幕黻以云布班固西都赋抗应龙之虹梁李善注梁形似龙而曲如虹也楚辞瑶浆蜜勺实羽觞些王逸注羽翠羽也觞觚也汉书酌羽觞兮销忧刘德注羽觞酒疾行如羽也孟康曰羽觞酌也作生爵形有头尾羽翼如淳曰以瑋瑋覆翠羽於下彻上见师古曰孟说是也张衡西京赋羽觞行而无数刘良注羽觞杯上缀羽以速饮也谢灵运诗浮欢昧眼前沈照贯终始顔延年诗流云蔼青阙皓月鉴丹宫谢灵运诗恭承古人意促装返柴荆 黻都感切耽上声】白也不敏先鸣翰林幸叨玳瑁之筵敢竭麒麟之笔请各探韵赋诗宠行【左传平阴之役先二子鸣刘桢瓜赋布象牙之席薰玳瑁之筵王勃春日孙学宅宴序侠客时有且倾鹦鹉之杯文人代轻聊举麒麟之笔卢照邻释疾文东郊絶此麒麟笔西山秘此凤凰柯 按唐书改京城为西京东都为东京北都为北京乃天宝元年事而太白供奉翰林正在天宝初年此文有天王三京及先鸣翰林二句疑是其去国以後之作然天宝改元以後不见有耕籍事或是史臣失书亦未可定而改石艾县为广阳则正在天宝元年此文犹称石艾不称广阳知为天宝以前作也三京之称或在先时已有此名而翰林谓文翰之林盖先作诗以为文林之倡耳】

送戴十五归衡岳序

白上探玄古中观人世下察交道海内豪俊相识如浮云自谓德参夷顔才亚孔墨莫不名由口进实从事退而风义可合者厥惟戴侯【人物志夫名非实用之不效故曰名由口进而实从事退中情之人名不副实用之有效故名由衆退而实从事彰】戴侯寓居长沙【繆本缺戴侯字郭本缺寓字】稟湖岳之气少长咸洛窥霸王之图精微可以入神懿重可以崇德谲猷可以尊主文藻可以成化兼以五材统以四美何往而不济也【长沙之地在唐为潭州长沙郡隶江南西道有洞庭湖有衡岳咸阳洛阳有古昔帝王霸主争据之迹姜子所谓五材者勇智仁信忠也勇则不可犯智则不可乱仁则爱人信则不欺忠则无二心四美承上四句而言】其二三诸昆皆以才秀擢用辞翰炳发昇闻天朝而此君独潜光後世【一作时】以期大用鲲海未跃?霄悠然不远千里访予以道?【郭本作却误】国之秀有廖侯焉人伦精鉴天下独立每延以宴谑许为通人独孤有邻及薛诸公咸亦以为信然矣【韵会郢说文汉南之国地理沿革表德安府古郢子国一云在江夏集韵郢或作?人伦已见前二篇注言其有知人之明独立犹独步之意後汉书袁绍客多豪俊并有才说见郑元儒者未以通人许之】属明主未梦且归衡阳憩祝融之云峯弄茱萸之湍水轩骑纠合祖於魏公之林亭笙歌鸣秋剑舞增气况江叶坠绿沙鸿冥飞登高送远使人心醉见周张二子为论平生鸡黍之期当速赴也【祝融峯见本卷送林公上人序注水经注邵陵水东北出益阳县其间迳流山峡名之为茱萸江海録碎事潯江一名茱萸江在衡山县一统志茱萸滩在湖广宝庆府城北四十里潯

江水势险恶昔人置铜柱於岸侧以固牵挽俗谓五十三滩四十八滩此其首也纠亦合也左传纠合诸侯而谋其不协高唐赋登高远望使人心瘁李善文选注谢承後汉书山阳范式字巨卿与汝南张元伯为友春别京师以秋为期至九月十五日杀鸡作黍二亲笑曰山阳去此几千里何必至元伯曰巨卿信士不失期者言未絕而巨卿至】

早夏於【繆本於字下多一江字】将军叔宅与诸昆季送傅八之江南序

易曰观乎人文以化成天下穷此道者其惟傅侯耶侯篇章惊【当作警】新海内称善五言之作妙絕当时陶公愧田园之能谢客慚山水之美佳句籍籍人为美谈【北齐书雕虫之美独步当时陶渊明诗多言田园之适谢灵运诗多言山水之趣灵运小字客儿详十六卷注】前许州司马宋公蘊冰清之姿重傅侯玉润之德妻以其子凤凰于飞潘杨之好斯为睦矣【唐时许州颍川郡隶河南道州设司马一人从五品下刘孝标世说注卫玠别传玠娶乐广女裴叔道曰妻妇有冰清之姿壻有璧润之望所谓秦晋之匹也左传初懿氏卜妻敬仲其妻占之曰吉是谓凤凰于飞和鸣锵锵杜预注雄曰凤雌曰凰雄雌俱飞相和而鸣锵锵然犹敬仲夫妻相随适齐有声誉潘岳杨仲武诔潘杨之睦有自来矣盖岳乃杨之壻也故云潘杨之睦】仆不佞也忝於芳尘宴同一筵心契千古清酌连晓玄谈入微欢携无何【郭本作间】旋告睽拆【一本作析繆本作坼】将军叔雄【旧本皆作英今依刘本】略盖古英明洞神天王贵宗诞育贤子八龙增秀以列次五色相辉而有文会言高乐晓饯金门洗德弦觴怡顏【上下似有缺文後汉书荀淑有子八人俭缙靖熹汪爽肃专益有名称时人谓之八龙初荀氏旧里名西豪颍陰令苑康以为昔高阳氏有才子八人今荀氏亦有八子故改其里曰高阳里】朱明草木已盛且江嶂若画赏盈前途自然屏间坐游镜里行到霞月千里足供文章之用哉【屏间谓列嶂如屏镜里谓江明若镜】征帆空悬落日相逼二季挥翰诗其赠焉

冬日於龙门送从弟京兆参军令问之淮南觀省序【龙门山在河南府城西南详十三卷注京兆即雍州也详十八卷注参军京兆尹之属官】

紫云仙季有英风焉吾家见之若衆星之有月贵则天王之令弟宝则海岳之奇精游者所谓风生玉林清明萧洒真不虚也【紫云仙似其从弟之号季谓季弟也出曜经独尊只步无有俦匹犹如明月在衆星中】常醉日吾曰兄心肝五藏皆锦绣耶不然何开口成文挥翰雾散吾因抚掌大笑扬眉当之使王澄再闻亦复絕倒观夫笔走羣象思通神明龙章炳然可得而见【晋书琅邪王澄有高名少所推服每闻卫玠言辄叹息絕倒故时人为之语曰卫玠谈道平子絕倒龙章言其文采炳焕若龙章之服也礼记有虞氏服赳夏后氏山殷火周龙章王勃文研精麝墨运思龙章】岁十二月拜省於淮南思白华之长吟眺黄云之晚色目断心尽情悬高堂倾兰醕而送行赫金鞍而照地错轂蹲野朝英满筵非才名动时何以及此【束皙补亡诗白华朱萼被於幽薄吕延济注喻孝子事父母之洁白如朱萼承白华于幽薄之中而鲜洁也唐高宗诗华冠列绮筵兰醕申芳宴玉篇醕美酒也鲍照诗鞍马光照地楚辞车错轂兮短兵接王逸注错交也轮轂交错也牛弘乐府揖让皆时杰升降尽朝英醕私吕切胥上声】日落酒罢前山陰烟殷勤惠言吾道东坐想洛桥春色先到淮城见千条之緑杨折一枝以相赠则华萼情在吾无恨焉羣公赋诗以光荣饯【谢瞻诗花萼相光饰吕延济注花萼喻兄弟

也琦按萼花蒂也花萼相倚附不能相离故古人取之以为兄弟之喻】江夏送倩公归汉东序【汉东随州也本春秋时随子之国其地在汉水之东左传汉东之国随为大是也後世以其地置州谓之随州隋时改称汉东郡盖依此立名唐自天宝以前名随州天宝初改汉东郡乾元初复为随州】

谢安四十【繆本作昔谢安四十】卧白云於东山桓公累徵为苍生而一起常与支公游赏贵而不移大人君子神冥契合正可乃尔仆与倩公一【郭本缺一字】面不忝古人言归汉东使我心瘳夫汉东之国圣人所出神农之後季【郭本作李误】良为大贤尔来寂寂无一物可纪有唐中兴始生紫阳先生先生六十而隐化若继迹而起者惟倩公焉蓄壮志而未就期老成於他日且能倾产重诺好贤攻文即惠休上人与江鲍往复各一时也仆平生述作罄其草而授之思亲遂行流涕惜别今圣朝已舍李布当徵贾生开颜洗目一见白日冀相视而笑於新松之山耶作小诗絶句以写别意【世说注续晋阳秋曰谢安悠游山水以敷文析理自娱桓温在西藩钦其盛名讽朝廷请为司马以世道未夷志存匡济年四十起家应务晋书谢安寓居会稽与王羲之及高阳许询桑门支遁游处出则渔弋山水入则言咏属文无处世意东山苍生已见七卷注诗国风愿言思伯使我心瘳毛传曰瘳病也元和郡县志厉山亦名烈山在随州随县北百里礼记曰厉山氏炎帝也起于厉山故曰厉山氏太平寰宇记荆州记云随地有厉乡村有厉山下有一穴是神农所生穴也穴口方一步容数人立今穴口石上有神农庙在方輿胜覽荆州记随州厉山有石穴云是神农所生遂即此地为神农社常年祀之季良随之贤大夫諫随君无追楚师事载左传桓公六年紫阳先生胡公见三十卷紫阳先生碑铭惠休上人见十二卷注广韵罄尽也季布事见十一卷注徵贾生见二十五卷注瘳音昧】辞曰【繆本少辞曰二字】彼美汉东国川藏明月辉寧知丧乱後更有一珠归【新序珠产江汉玉产崑山荆州记荆蕴玉以润其区汉含珠而清其域按繆本诗中重録此文而寂寂作寂寞辞曰作李白辞彼美作路入凡六字不同盖未及删正也】

钱李副使藏用移军广陵序【通监上元元年宋州刺史刘展领淮西节度副使刚强自用为其上者多恶之时有謠言曰手执金刀起东方节度使王仲昇使监军使内左常侍邢延恩入奏展倔僵不受命姓名应謠?请除之延恩因说上曰展方掘强兵宜以计去之请除展江淮都统代李峘俟其释兵赴镇中道执之此一夫之力耳上从之以展为都统淮南东江南西浙西三道节度使密勅旧都统李峘及淮南东道节度使邓景山图之延恩以制书授展展疑之曰展自陈留参军数年至刺史可谓暴贵矣江淮租赋所出今之重任展无勲劳又非亲贤一旦恩命宠擢如此得非有谗人间之乎因泣下延恩惧曰公素有才望主上以江淮为忧故不次用公公反以为疑何哉展曰事苟不欺印节可先得乎延恩曰可乃驰诣广陵与峘谋解印节以授展展得印节乃上表谢恩悉举宋州兵七千趋广陵延恩知展已得其情还奔广陵与李峘邓景山发兵拒之移檄州县言展反展亦移檄言峘反州县莫知所从峘引兵渡江屯京口景山将万人屯徐城展素有威名御军严整江淮人望风畏之展倍道先期至使人问景山曰吾奉诏书赴镇此何兵也景山不应展使其将孙待封张法雷擊之景山衆溃与延恩奔壽州展引兵入广陵遣其将屈突孝标将兵三千徇濠楚王峘将兵四千略淮西展军於白沙设疑兵於瓜州若将趋北固者峘悉銳兵守京口以待之展乃自上流济袭下蜀峘军闻之自溃峘奔宣城甲午展陷润州丙申陷昇州李峘之去润州也副使李藏用谓峘曰处人尊位食人重

禄临难而逃之非忠也以数十州之兵食三江五湖之险固不发一矢而弃之非勇也失忠与勇何以事君藏用请收余兵竭力以拒之岨乃悉以後事授藏用藏用收散卒得七百人东至苏州募壮士得二千人立栅以拒展与展将张景超孙待封战於郁墅兵败奔杭州景超逐据苏州待封进陷湖州景超进逼杭州藏用使其将温晁屯余杭展将下江州徇江西於是屈突孝标陷濠楚等州王晁陷舒和滁庐等州所向无不摧靡聚兵万人骑三千横行江淮间上命平卢兵马使田神功将所部精兵三千讨展展闻之始有惧色自广陵将兵八千拒之选精兵二千渡淮击神功於都梁山展败走至天长以五百骑据桥拒战又败展独与一骑亡渡江上元二年正月张景超引兵攻杭州败李藏用将李疆於石夷门孙待封自武康南出将会景超攻杭州温晁据险擊敗之辛亥夜神功遣特进范知新等将四千人自白沙济西趋下蜀展击之不胜弟殷劝展引兵逃入海可延岁月展曰若事不济何用多杀人父子乎死早晚等耳遂更率衆力战将军贾隐林射展中目而仆遂斩之孙待封诣藏用降张景超聚兵至七千余人闻展死悉以兵授张法雷使攻杭州景超逃入海法雷至杭州李藏用擊敗之余党皆平】

夫功未足以盖世威不可以震主必挟此者持之安归所以彭越醢於前韩信诛於後况权位不及於此者虚生危疑而潜包【繆本作芭】祸心小拒王命是以谋臣将啖以节钺诱而烹之亦由借鸿涛於奔鲸鱣生人於哮虎呼吸江海横流百川左萦右拂十有余郡国计【文苑英华作讨】未及谁当其锋【抱朴子功盖世者不赏威震主者身危汉书高帝纪十一年春正月淮阴侯韩信谋反长安夷三族三月梁王彭越谋反夷三族此云越醢於前信诛于後恐误汉书黔布传汉诛梁王彭越盛其醢以徧赐诸侯何承天鼓吹铙歌西川无潜鳞北渚有奔鲸诗大雅阒如虓虎史记若夫泗上十二诸侯左萦而右拂之可一旦而尽也】我副使李公勇冠三军衆无一旅横倚天之剑挥驻日之戈吟啸四顾熊罴雨集蒙轮扛鼎之士杖干将而星罗上可以决天云下可以絶地维翕振虎旅赫张王师退如山立进若电逝转战百胜殭屍盈川水膏於沧溟陆血於原野一扫瓦解洗清全吴可谓万里长城横断楚塞不然五岭之北尽餌於修蛇势盘地蹙不可图也【梁书马仙埤每战勇冠三军当其冲者莫不摧破左传有田一成有衆一旅杜预注方十里为成五百人为旅宋玉大言赋长剑耿耿倚天外淮南子鲁阳公与韩构战酣日暮援戈而挥之日为之返三舍陆机辨亡论哮一之郡风驱熊罴之衆雾集王褒四子讲德论莫不风驰雨集袞袞并至左传狄虎弥建大车之轮而蒙之以甲以为櫓左执之右拔戟以成一队杜预注蒙覆也史记项籍长八尺余力能扛鼎裴駮注韦昭曰扛举也索隐曰说文云扛横关对举也音江卢思道为隋檄陈文扛鼎蒙轮之卒事均驱兕干将剑名又戟名见十一卷注班固西都赋列卒周匝星罗云布吕延济注星罗云布言衆也庄子说剑篇上决浮云下絶地纪列子折天柱絶地维张衡西京赋陈虎旅於飞廉李善注周礼虎贲下大夫旅贲氏中士也鬻子纣虎旅百万陈於商郊琦按太白所谓虎旅指有力如虎之衆耳与李氏所解有异礼记總干而山立武王之事也曹植七启飞轩电逝兽随轮转嵇康诗风驰电逝蹶景追飞此借用其字以喻士卒进退用命之状山立言其如山之峙卒难动摇电逝言其如电之流倏忽骤至淮南子纣之地左东海右流沙前交趾後幽都师起容关至浦水土亿有余万然皆倒矢而射傍戟而战武王左操黄钺右执白旄以麾之则瓦解而走遂土崩而下杜氏通典自北徂南入越之道必由岭峤时有五处塞上岭一也今南康郡大庾岭是骑田岭二也今桂阳郡腊岭是都龐岭三也今江华郡永明岭是毗渚岭四也今江华界白芒岭是越城岭五也今始安郡北零陵郡南临源岭是西自衡山之南东穷于海一山之限也文谓五岭

之北盖指江南江西二道而言】而功大用小天高路遐社稷虽定於刘章封侯未施於李广使慷慨之士长吁青云且移军广陵恭揖後命组练照雪楼船乘风箫鼓沸而三山动旌旗扬而九天转【汉书文帝纪高后崩诸吕谋为乱欲危刘氏丞相陈平太尉周勃朱虚侯刘章等共诛之李广传广与望气王朔语曰自汉征匈奴广未尝不在其中而诸妄校尉以下材能不及中以军功取侯者数十人广不为後人然终无尺寸功以得封邑者何也岂吾相不当侯耶朔曰将军自念岂尝有恨者乎广曰吾为陇西守羌尝反吾诱降者八百余人诈而同日杀之至今恨独此耳朔曰祸莫大於杀已降此乃将军所以不得侯者也恭揖後命敬谨逊让而俟天子之後命也组练见十一卷注楼船见四卷注元和郡县志三山在湖州上元县西南五十里晋王濬伐吴宿於牛渚部分明日前至三山即此也江南通志三山在江寧府江寧县西南五十七里下临大江三峰排列故名昔王濬伐吴顺流鼓棹径造三山即此地】良牧出祖烈将登筵歌酣易水之风气振武安之瓦海日夜色云帆【繆本作河】中流席阑赋诗以壮三军之事白也笔已老矣序何能为【良牧见十一卷注易水风见一卷注武安瓦见六卷注云帆见三卷注按通监上元二年秋七月以试少府监李藏用为浙西节度副使冬十月江淮都统崔圆署李藏用为楚州刺史考异曰刘展乱纪云刘展既平诸将争功酬赏未及李藏用崔圆乃署藏用为楚州刺史领二城而居盱眙按实録七月藏用已除节度副使盖恩命未到耳又独孤及有为杭州李使君论李藏用守杭州功表云今都统使停本职已罢孤军无主莫知适从将士嗷嗷未有所隶天高听邈无人为言遂使殊勲见委忠节未録口不言赏赏亦不及恐非圣朝旌有德表有功之义此文所谓社稷虽定於刘章封侯未施于李广盖亦有深慨矣未几而藏用之牙将高干挟故怨使人诣广陵告藏用反先以兵袭之藏用走干追杀之崔圆不能明其冤遂薄责藏用将吏以验之将吏畏皆附成其状独孙待封坚言不反且曰吾始从刘大夫奉诏书来赴镇人谓吾反李公起兵灭刘大夫今又以李公为反如此谁则非反者吾寧就死不能诬人以非罪圆亦斩之盖大乱之後刑赏之谬乃如此】

泽畔吟序【郭本作泽畔吟诗序】

泽畔吟者逐臣崔公之所作也公代业文宗早茂才秀起家校书蓬山再尉关辅中佐於宪车因贬湘阴从宦二十有八载而官未登於郎署何遇时而不偶耶所谓大名难居硕果不食流离乎沅湘摧颓【繆本作頽】於草莽【後汉书是时学者称东观为老氏藏室道家蓬萊山太仆邓康遂荐窦章入东观为校书郎关辅关中三辅之地详十八卷注湘阴县名隶岳州巴陵郡後汉书马融传安帝亲政召还郎署史记大名之下难以久居周易剥之上九硕果不食孔颖達正义云处卦之终独得完全不被剥落犹如硕大之果不为人食也沅湘谓沅水湘水二水俱经长沙入洞庭详二十三卷注】同时得罪者数十人或才长命夭覆巢荡室崔公忠愤义烈形於清辞恸哭泽畔哀形翰墨犹风雅之什闻之者无罪覩之者作镜书所感遇总二十章名之曰泽畔吟惧奸臣之猜常韬之於竹简酷吏将至则藏之於名山前後数四蠹伤卷轴【汉书司马迁传仆诚已着此书藏之名山传之其人通邑大都】观其逸气顿挫英风激扬横波遗流腾薄万古至於微而彰婉而丽悲不自我兴成他人岂不云怨者之流乎余览之怆然掩卷挥涕为之序云夏日诸从弟登汝州龙兴阁序【汝州唐时隶河南道】

夫槿荣芳园蝉啸珍木盖纪乎南火之月也可以处台榭居高明【月令仲夏之月鹿角解蝉

始鸣半夏生木堇荣是月也可以居高明可以远眺望可以升山陵可以处台榭郑康成注顺阳在上也高明谓楼观也閤者谓之台有木者谓之榭珍木见二卷注南火谓大火星於仲夏昏时正当南方详九卷注】吾之友于顺此意也遂卜精胜得乎龙兴留宝马於门外步金梯於阁上渐出轩户霞瞻云天晴山翠远而四合暮江碧流而一色屈指乡路还疑梦中开襟危栏宛若空外【宝马见五卷注金梯见二十五卷注】呜呼屈宋长逝无堪与言起予者谁得我二季当挥尔风藻挹予霞觴【郭本缪本作搜乎需觴文苑英华作飞乎鸾觴今从刘本】与白云老兄俱莫负古人也【卢照邻释疾文謁龙主於武帐挥风藻於文昌】

秋夜於安府送孟赞府兄还都序【安府安州也唐於州设中都督府故曰安府赞府县丞已见本卷注】

夫士有饰危冠佩长剑扬眉吐诺激昂青云者咸夸炫意气托交王侯若告之急难乃十失八九我义兄孟子则不然耶【庄子使子路去其危冠解其长剑陆德明音释李云危高也子路好勇冠似雄鸡形】道合而襟期暗亲志乖而肝胆楚越鸿鸾凤立不循常流孔明披书每观於大略少君读易时作於小文四方贤豪眩然景慕虽长不过七尺而心雄万夫至於酒情中酣天机俊发则谈笑满席风云动天非嵩丘腾精何以及此【庄子自其异者视之肝胆楚越也沈约齐故安陆昭王碑文鸿鸾旧吴作守东楚吕向注鸾飞也江淹诗一言凤独立再说鸾无羣三国志注魏略曰诸葛亮在荆州以建安初与颖川石广元徐元直汝南孟公威等俱游学三人务於精熟而亮独观其大略汉武帝外传蓊辽字子训齐国临淄人李少君之邑人也见少君有不死之道遂以弟子之礼事少君而师事焉性好清淨尝闲居读易时作小小文疏皆有意义此文以为少君事疑误嵩丘腾精谓嵩山精灵之气降生孟赞府】白以弱植早饮香名况亲承光辉恩甚华萼他乡此别谁无恨耶【顔延年诗弱植慕端操卢思道卢记室谏善价斯待香名允集华萼已见本卷注太白与孟虽异姓而情不啻昆弟故曰恩甚华萼而称之曰义兄也】时林风吹霜散下秋草海鴈嘶月孤飞朔云惊魂动骨戛瑟落涕抗手缅迈伤如之何且各赋诗以宠行【缪本作歧】路【江淹四时赋軫琴情动戛瑟涕落戛瑟犹鼓瑟也抗手举手拜别也见十七卷注缅迈远行也张九龄诗云胡当此时缅迈复为客】

春夜宴从弟桃花园序

夫天地者万物之逆旅也光阴者百代之过客也而浮生若梦为欢几何古人秉烛夜游良有以也况阳春召我以烟景大块假我以文章会桃李之芳园序天伦之乐事羣季俊秀皆为惠连吾人咏歌独慙康乐幽赏未已高谈转清开琼筵以坐花飞羽觴而醉月不有佳作何伸雅怀如诗不成罚依金谷酒数【缪本数字上多一斗字逆旅客舍也详二十四卷注魏文帝与吴质书古人思秉烛夜游良有以也江淹诗烟景抱空意蘅杜缀幽心大块天地也见三卷注天伦兄弟也见十五卷注宋书谢惠连幼而聪敏年十岁能属文族兄灵运深相知爱谢朓诗琼筵妙舞絶桂席羽觴陈羽觴已见前注左思吴都赋飞觴举白刘良注飞觴行觴疾如飞也成公綏洛禊赋列樽罍飞羽觴石崇金谷诗序遂各赋诗以叙中怀或不能者罚酒三斗】

冬夜於随州紫阳先生漉霞楼送烟子元演隐仙城山序

吾与霞子元丹烟子元演气?道合结神仙交殊身同心誓老云海不可夺也历行天下周求名山入神农之故乡得胡公之精术【文苑英华作字元丹疑即元丹丘也盖名与字之稍殊耳上安州裴长史书曰故交元丹亲接斯议是其结纳固已久矣元演约是其弟胡公即紫阳先生详见三十卷注紫阳先生碑铭初学记盛弘之荆州记曰随郡北界有厉乡村南有厉山山下有一穴父老相传云神农所生林西有壑两重壑内周围一顷二十亩地中有九井神农既育九井自穿汲一井则衆井水动即以此为神农社年常祀之庖牺生乎陈神农育乎楚考籍应图於是乎在】胡公身揭日月心飞蓬莱起滄霞之孤楼链吸井之精气延我数子高谈混元金书玉诀尽在此矣【庄子昭昭乎若揭日月而行後汉书外运混元内侵毫芒章怀太子注混元天地之总名也武帝内传尊母欲得金书秘字六甲灵飞左右策精之文十二事授刘彻梁丘子黄庭内景玉经序黄庭内景经一名大帝金书扶桑大帝君宫中尽诵此经以金简刻书之故曰金书太平广记张楷有玉诀金匱之学坐在立亡之道】白乃语及形胜紫阳因大夸仙城元侯闻之乘兴将往别酒寒酌醉青田而少留梦魂晓飞度淥水以先去【古今注乌孙国有青田核莫测其树实之形至中国者但得其核耳得清水则有酒味出如醇美好酒核大如六升瓠空之以盛水俄而成酒刘章得两核集宾客设之尝供三十人之饮一核尽一核所盛以复饮饮尽随更注水随尽随盛不可久置久置则苦不可饮名曰青田酒】吾不凝滯於物与时推移出则以平交王侯遁则以俯视巢许朱绂狎我绿萝未归恨不得同栖烟林对坐松月有所款然铭契潭石乘春当来且抱琴卧花高枕相待诗以宠别赋而赠之【楚辞渔父曰圣人不凝滯於物而能与世推移朱绂见十一卷注陆云与戴季甫书钦爱之情款然至实】

李太白集注卷二十七

卷二十八

钦定四库全书

李太白集注卷二十八

钱塘 王琦 撰

记颂赞共二十首

任城县厅壁记【元和郡县志任城县本汉县也属东平国古任国太昊之後风姓也僖二十一年左传曰任宿须句皆风姓也实司太皞与有济之祀注曰任今任城县也魏志曰文帝封鄢陵侯彰为任城王齐天保七年移高平郡於此任城县属焉隋开皇三年罢高平郡县属兖州任音壬】

风姓之後国为任城盖古之秦县也【文苑英华作盖秦之古县也】在禹贡则南徐之分当周成【文苑英华作成周】乃东鲁之邦自伯禽到於顺【当作顷】公三十二【当作三】代遭楚荡灭因【文苑英华作国】属楚焉炎汉之後更为郡县隋开皇三年废高平郡移任城於旧居邑乃【文苑英华作虽】屡迁井则不改【元和郡县志兖州鲁郡禹贡兖州之域兼得徐州之地春秋时为鲁国按史记封周公旦於曲阜是为鲁公周公不就封留佐武王使其子伯禽代就封於鲁其後有考公炀公幽公魏公厉公献公真公武公懿公孝公惠公隐公桓公庄公闵公僖公文公宣公成公襄公昭公定公哀公悼公元公穆公共公康公景公平公文公顷公顷公二十四年楚考烈王伐灭鲁鲁起周公至顷公凡三十四世谓三十四君也自伯禽起至顷公当云三十三世此云顺公又云三十二代皆悞周易改邑不改井】鲁境七百里郡有十一县任城其冲要东?琅邪西控钜野北走厥国南驰互乡青帝太昊之遗墟白衣尚书之旧里土俗古远风流清高贤良间生掩映天下【按元和郡县志鲁郡州境东西三百三十一里南北三百五十三里管县十一瑕丘金乡鱼台邹县龚丘乾封莱芜曲阜泗水任城中都今新旧唐书所载只十县以贞元中割中都入郛州故也汉书齐东东有淄川东莱琅邪高密胶东赵岐孟子注琅邪齐东境上邑也唐时以河南道所属之沂州为琅邪郡其地正在鲁郡之东相去三百八十里水经注何承天曰钜野湖泽广大南通洙泗北连青济旧县故城正在泽中故欲置戍於此城城之所在则钜野泽也衍东北为大野矣昔西狩获麟於是处也元和郡县志大野泽一名钜野在郛州钜野县东五里南北二百里东西百余里尔雅十薮鲁有大野西狩获麟於此泽琦按鲁郡之东与郛州接境乃钜野泽之故区但屡遭河患冲决填淤高下易形涸为平陆迄今畔岸不可复识矣章怀太子後汉书注东平陆县名古厥国也属东平国今兖州平陆县地太平寰宇记郛州中都县古中都之地汉为东平陆县属东平国亦古之厥国地今邑界有厥亭存太平寰宇记徐州沛县合乡故城古互乡之地按刘芳徐州记云古之互乡盖孔子云难与言者又曰互乡在陈州项城县北一里古老传云互乡之地一统志互乡在河南开封府商水县论语云互乡难与言即此古今言互乡者凡三处今考鲁郡之南与徐州接壤则此文所指与沛县之互乡为合独断注青帝太昊木行三皇本纪太皞庖牺氏

风姓代燧人氏继天而王都於陈其後裔当春秋时有任宿须句颛臾皆风姓之胤也後汉书郑均字仲虞东平任城人帝东巡过任城乃幸均舍勅赐尚书禄以终其身时人号为白衣尚书】地博厚川疎明汉则名王分茅魏则天人列土所以代变豪侈家传文章君子以才雄自高小人则鄙朴难治【後汉书任城孝王尚元和六年封食任城亢父樊三县魏志任城威王彰黄初三年立为任城王】况其城池爽垲邑屋丰润香阁倚日凌丹霄而欲飞石桥横波惊彩虹而不去其雄丽块圯有如此焉【左传请更诸爽垲者杜预注爽明垲燥也正义曰垲高地故为燥也香阁见二十一卷注梁武帝诗青城接丹霄金楼带紫烟贾谊服赋大钧播物块圯无垠刘良注块圯无涯际也扬雄甘泉赋据軼轩而周流兮忽块圯而无垠李善注块圯广大貌汉书作軼軼顔师古注軼軼远相映也 垲音块块音央圯音札】故万商往来四海縣历实泉货之橐龠为英髦之咽喉故资大贤以主东道制我美锦不易其人今乡二十六户一万三千三百七十一帝择明德以贺公宰之【东道见十卷注制锦见九卷注】公温恭克修俨硕有立季野备四时之气士元非百里之才拨烦弥闲剖剧无滞镒百发克破於杨叶刀一鼓必合於桑林寛猛相济弦韦适中一之岁肃而教之二之岁惠而安之三之岁富而乐之然後青衿向训黄髮履礼耒耜就役农无游手之夫杼轴和鸣机罕嚙哦之女物不知化陶然自春权豪鋤纵暴之心黠吏返淳和之性行者让於道路任者并於轻重扶老携幼尊尊亲亲千载百年再复鲁道非神明博远孰能契于此乎【诗国风有美一人硕大且俨毛传曰俨矜庄貌世说谢太傅絶重褚公常称褚季野虽不言而四时之气亦备三国志龐统以从事守耒阳令在县不治免官吴将鲁肃遗先主书曰龐士元非百里才也使处治中别驾之任始当展其骥足耳南史丘仲孚为山陰令长於拨烦善适权变吏人敬服号称神明广韵镒箭簇也汉书养由基楚之善射者也去杨叶百步百发百中杨叶之大加百中焉可谓善射矣鼓刀以刀擊物也合於桑林之舞庖丁事见十卷注上句喻其举措无不中理下句喻其谋猷无不合宜左传政寛则民慢慢则纠之以猛猛则民残残则施之以寛寛以济猛猛以济寛政是以和韩非子西门豹之性急故佩韦以自缓董安於之性缓故佩弦以自急华阳国志西门豹佩韦以自寛宓子贱带弦以自急毛萇诗传青衿青领也学子之所服论衡人少则发黑老则髮白白久则黄顔师古汉书注黄髮老称谓白髮尽落更生黄者韵会柄曲木曰耒耒端曰耜易斲木为耒剡木为耜家语虞芮二国争田而讼连年不决乃相谓曰西伯仁人也盍往质之入其境则耕者让畔行者让路礼王制轻任并重任分正义曰任谓有担负者俱应担负老少并轻则并与少者担之老少并重不可并与少者一人则分为轻重重与少者轻与老者汉书鲁灊洙泗之水其民涉度幼者扶老而代其任淮南子太公问周公曰何以治鲁周公曰尊尊亲亲太公曰鲁从此弱矣 镒音的黠音辖】白探奇东蒙窃听輿论辄记於壁垂之将来俾後贤之操刀知贺公之絶迹者也【太平寰宇记东蒙山在沂州费县西北七十五里以其在蒙山之东故曰东蒙晋书王沉传自古贤圣乐闻诽谤之言听輿人之论操刀而割见九卷注】

赵公西侯新亭颂

惟十有四载皇帝以岁之骄阳秋五不稔乃慎择明牧恤南方凋枯伊四月孟夏自淮陰迁我天水赵公作藩於宛陵只明命也【广韵稔岁熟也广雅秋穀熟也谢朓诗陆危赖宗袞微管寄明牧左思诗俛仰生荣华咄嗟复凋枯晋书陶侃传作藩於外八州肃清唐时楚州淮阴郡治山阳县属淮南道宣州宣城郡治宣城县属江南西道按宣城郡本汉之丹阳郡宣城县本

汉之宛陵县今为寧国府地太白称宛陵盖本汉县名也稔音衽】惟公代秉天宪作程【繆本作保】南台洪柯大本聿生懿德宜乎哉横风霜之秀气鬱王霸之奇略初以铁冠白笔佐我燕京威雄振肃虜不敢视而後鸣琴二邦天下取则起草三省朝端有声天子识面宰衡动听殷南山之雷剖赤县之剧强项不屈三州所居大化咸列碑颂【後汉书手握王爵口含天宪李周翰注天宪谓帝王法令也通典御史所居之署汉谓之御史府亦谓之御史大夫寺亦谓之宪台後汉以来谓之御史台亦谓之兰台寺梁及後魏北齐或谓之南台後魏之制有公事百官朝会名簿自尚书令仆以下悉送南台胡三省通监注御史台谓之南台杜佑曰御史台在宫阙西南故名南台陶潜诗洪柯百万寻森散覆阳谷诗周颂我求懿德郑笺曰懿美也铁冠白笔见十一卷注陶潜诗君子死知己提剑出燕京说苑宓子贱治单父弹鸣琴身不下堂而单父治唐以尚书省中书省门下省为三省晋中兴书谢安石上疏曰尸素朝端忽焉五载宰衡相臣也见十二卷注诗召南殷其雷在南山之阳毛传曰殷雷声也郑笺曰雷以喻号令於南山之阳又喻其在外也召南大夫以王命施号令於四方犹雷隐然发声於山之阳赤县强项令俱见十二卷注金石録淮陰太守赵悦遗爱碑张楚金撰行书天宝十四载立其二州碑颂无考】至於是邦也酌古以训俗宣风以布和平心理人兵镇唯静画一千里时无莠言【汉书萧何为法讲若画一顔师古曰画一言整齐也诗小雅莠言自口毛传曰莠丑也】退公之暇清眺原隰以此郡东堑巨海西襟长江咽三吴扼五岭輶轩错出无旬时而息焉出自西郭苍然古道道寡列树行无清陰至有疾雷破山狂飈震壑炎景烁野秋霖灌途马逼侧於谷口人周章於山顶亭候靡设逢迎缺如【诗国风自公之食小雅皇皇者华於彼原隰毛传曰高平曰原下湿曰隰三吴见八卷注五岭见十八卷注輶轩使车也见九卷注庄子疾雷破山风震海而不能惊曹植诗寒水辟炎景凉风吹我身庄子秋水时至百川灌河子虚赋偪侧泌 顔师古曰逼侧相逼也楚辞聊翱翔兮周章王逸注周章犹周流也吕向注周章往来迅疾貌後汉书光武纪筑亭候修烽燧章怀太子注亭候伺候望敌之所】自唐有天下作牧百数因循齷齪罔恢永图及公来思大革前弊实相此土陟降观之壮其回冈龙盘沓岭波起胜势交至可以有作方农之隙廓如是营遂铲崖【繆本崖字下多一坦字】堙卑驱石翦棘削污壤堵高隅以门以墉乃栋乃宇俭则不陋丽而不奢森沈閤閤燥湿有庇若鼈【郭本作鳧】之涌如鹏斯騫紫流镜转涵映池底纳远海之余清泻连【郭本作莲】峰之积翠信一方雄胜之郊五马踟蹰之地也【韵会齷齪急促局陬貌诗小雅赧然来思大雅陟则在巘复降在原郑笺曰陟升也降下也广韵墉垣也鲍照诗铜溪昼森沈左传高其閤閤孔颖达正义说文云閤閤也汝南平舆里门曰閤释宫云衙门谓之閤李巡云衙头门也然则閤閤皆门名言高为其门耳左传吾侪小人皆有闔卢以辟燥湿寒暑古罗敷行使君从南来五马立踟蹰閤音岸】长史齐公光义人伦之师表司马武公幼成衣冠之髦彦録事参军吴镇宣城令崔钦令德之後良材间生纵风教之乐地出人伦之高格卓絶映古清明在躬金谋僇功不日而就总【郭本作然】是役也伊二公之力欤【按唐书百官志每州自刺史而下有长史一人司马一人録事参军事一人南史蔡兴宗为郢州引沈约为安西外兵参军兼记室兴宗尝谓其诸子曰沈记室人伦师表宜善事之陈书後主纪思所以登显髦彦式备周行诗小雅显允君子莫不令德毛传曰令善也左传非令德之後谁能若是礼记清明在躬气志如神正义云言圣人清静光明之德在於躬身书经集传金衆共之辞尧典共工方鳩僝功孔传曰僝见也音释僝马云具也僝音栈总即揔字】过客沈吟以称叹邦人聚舞以相贺金曰我赵公之亭也羣寮献议请因謠颂以名之则必与谢公北亭同不朽矣白以为谢公德不及後世亭

不留要冲无勿拜之言鲜登高之赋方之今日我则过矣【太平寰宇记北亭在温州北五里枕永嘉江谢灵运罢郡於北亭与吏民别诗云前期眇已住後会邈无因诗国风蔽芾甘棠勿翦勿拜召伯所说郑笺曰拜之言拔也施士丐曰如人身之拜小低屈也严粲曰挽其枝以至地也韩诗外传孔子游於景山之上子路子贡顔渊从孔子曰君子登高必赋小子愿言者何其愿丘将启汝】敢询耆老而作颂曰耽耽高亭赵公所营如鰲背突兀於太清如鹏翼开张而欲行赵公之宇千载有覩必恭必敬爰游爰处瞻而思之罔敢大语赵公来翔有礼有章煌煌锵锵如文翁之堂清风洋洋永世不忘【张衡西京赋大厦耽耽薛综注耽耽深邃貌水经注文翁为蜀守立讲堂作石室於南城太平寰宇记文翁学堂一名周公礼殿华阳国志云文翁立学讲堂精舍作石室一作玉堂在城南安帝永初後学堂遇火太守陈留高朕更修立又增造一石室任豫云其桷桷节制犹古建堂基高六尺夏屋三间通皆图画古人之像及礼器瑞物堂西有二石李膺记云後汉中平火延学观廂廊一时荡尽惟此堂燁焰不及构制虽古巧异特奇】

崇明寺佛顶尊胜陀罗尼幢颂【并序 梵语陀罗尼者华言总持谓总统摄持无有遗失即呪之别名也法苑珠林陀罗尼者西天梵音东华人译则云持也持善不失持恶不生幢者释家幡盖之类此则以石为幢形而刻呪字於其上即谓之幢也 幢音牀】

共工不触山娲皇不补天其鸿【繆本作洪】波泊汨流伯禹不治水万人其鱼乎礼乐大坏仲尼不作王道其昏乎而有功包陰阳力掩造化首出衆圣卓称大雄彼三者之不足徵矣【论衡儒书言共工与颛顼争为天子不胜怒而触不周之山使天柱折地维絶女媧销炼五色石以补苍天断鰲足以立四极天不足西北故日月移焉地不足东南故百川注焉左传刘子曰美哉禹功明德远矣微禹吾其鱼乎法华经大雄猛世尊诸释之法王 媧音戈汨音骨】粤有我西方金仙之垂范觉旷劫之大梦碎羣愚之重昏寂然不动湛而常存使苦海静滔天之波疑山灭炎崑之火囊括天地置之清凉日月或坠神通自在不其伟与【宋书谢灵运传方轨前秀垂范後昆涅盘经我旷劫来已入大寂王巾头陀寺碑文曜慧日於康衢则重昏易晓李善注头陀经心王菩萨曰我见覆蔽饮杂毒酒重昏常寝云何得悟慈心示语使得开解易系辞寂然不动感而遂通天下之故南齐书顾欢传仙化以变形为上泥洹以陶神为先变形者白首还淄而未能无死陶神者使尘惑日损湛然常存梁简文帝唱导文苦海易沈慈波空荡书尧典浩浩滔天下民其咨胤征火炎崑冈玉石俱焚贾谊过秦论囊括四海之意说文伟奇也】鲁郡崇明寺南门佛顶尊胜陀罗尼石幢者盖此都之壮观昔善住天子及千大千游於园观又与天女游戏受诸快乐即於夜分中闻有声曰善住天子七日灭後当生七反畜生之身於是如来授之吉祥真经遂脱诸苦盖之天徵【一作从】为大法印不可得而闻也我唐高宗时有鬬宾桑门持入中土犹日藏大宝清园虚空檀金净彩人皆悦见所以山东开【郭本作闻】士举国而崇之时有万商投珍士女云会衆布蓄沓如陵琢文石於他山耸高标於列肆鑱珉错彩为鲸为螭天人海怪若叱若语贝叶金言刊其上荷花水物形其隅良工草莱献技而去【大般若经是如来真实法印亦是一切声闻缘觉真实法印翻译名义佛陀波利鬬宾国人忘身徇道遍观灵迹闻文殊师利在清凉山远涉流沙躬来礼谒高宗仪凤元年杖锡五台?礼圣容忽见一翁从山出来作婆罗门语谓波利曰师何所求波利曰闻文殊隐此欲求瞻礼翁曰师将佛顶尊胜陀罗尼经来不此土衆生多造诸罪佛顶呪乃除罪秘方若不

将经徒来无益纵见文殊未必能识可还西国取经传此弟子当示文殊所在波利作礼举头不见老人遂反本国取得经来状奏高宗遂令杜行顓及日照三藏於内共译经留在内波利泣奏志在利人请布流行帝愍专志遂留所译之经还其梵本波利将向西明与僧顺贞共译佛顶尊胜陀罗尼经所愿已毕持经梵本入於五台不出唐书西域传罽宾隋漕国也居葱岭南距京师万二千里而羸南距舍卫三千里王居修鲜城常役属大月氏地暑湿人乘象俗治浮屠法魏书释老志诸服其道者则剃落须髮释累辞家结师资遵律度相与和居治心修净行乞以自给谓之沙门或曰桑门亦声相近总谓之僧皆胡言也僧译为和命衆桑门为息心比丘为行乞华严经譬如天上阎浮檀金惟除心王大摩尼宝余宝无及者开士有德行之僧详见二十一卷注诗小雅如冈如陵山海经瞻诸之山其阳多金其阴多文石诗小雅他山之石班固西都赋游士拟於公侯列肆侈於姬姜吕向注肆市也说文螭若龙而黄北方谓之地蝼从虫离声或云无角曰螭丑知切酉阳杂俎贝多出摩伽陀国长六七丈经冬不凋此树有三种一者多罗婆力义贝多二者多梨婆力义贝多三者部闍婆力义贝多多罗多梨并书其叶部闍一色取其皮书之贝多是梵语汉翻为叶婆力义贝多者汉言树叶也西域经书用此三种皮叶若能保护亦得五六百年】圣君垂拱南面穆清而居大明广运无幽不烛以天下所立兹幢多临诸旗亭喧嚣湫隘本非经行网绕之所乃颁下明诏令移於宝坊吁百尺中标矗若云断委翳苔藓周流星霜俾龙象兴嗟仰瞻无地良可叹也【垂拱见二十一卷注穆清见一卷大猎赋注史记集解西京赋曰旗亭五重薛综曰旗亭市楼也立旗於上故取名焉左传景公欲更晏子之宅曰子之宅近市湫隘嚣尘不可以居杜预注湫下隘小嚣声尘土也经行谓僧衆周幢循行所以致其敬礼之心网绕谓以网围绕其幢所以使鸟雀不得栖止污秽梁简文帝答湘东王书鸣银鼓於宝坊转金轮於香地西方供佛宫殿以七宝增饰故谓僧坊曰宝坊韵会翳隐也奄也障也龙象高僧也见十二卷注 罽音记】我太官广武伯陇西李公先名琬奉诏书改为辅其从政也肃而寛仁而惠五镇方牧声闻於天帝乃加剖竹於鲁鲁道粲然可观方将和陰阳於太阶致吾【旧本少吾字今从刘本】君於尧舜岂徒闭合坐啸鸿?二千哉乃再崇厥功发挥象教【广武县名隶陇右道之兰州乾元二年更名金城所谓五镇方牧者辅历官郢海?唐陈五州刺史也所谓剖竹於鲁又为鲁郡都督也见後虞城令李公去思碑但碑文之名作浦颂文之名作辅未知孰是孰訛左传晋公子其从者肃而寛忠而能力杜预注肃敬也後汉书刘宠徐东平陵令以仁惠为吏民所爱剖竹见十一卷注太阶见一卷明堂赋注尔雅小闰谓之合说文合门旁户也後汉书吴佑迁胶东相政惟仁简以身率物民有争诉者辄闭合自责然後断其讼以道譬之此用其字却另作闭门不理事解坐啸见十四卷注周易渐卦六二鸿渐於磐饮食衎衎吉王弼注磐山石之安者也进而得位居中而应本无禄养进而得之其为欢乐愿莫大焉鸿盘二千谓以二千石之职为宴安之地也王巾头陀寺碑文正法既没象教陵夷李周辅注象教谓为形象以教人也 合音鸽】於是与长史卢司马李公等咸明明在公绰绰有裕韬大国之宝钟元精之和荣兼半刺道光列岳才或大而用小识无微而不通政其有经谈岂更仆【唐制鲁郡为上都督府设长史一人从三品司马二人从四品下诗鲁颂夙夜在公在公明明郑笺曰言时臣忧念君事早起夜寐在於公之所在於公之所但明义明德也诗小雅此令兄弟绰绰有裕毛传曰绰绰寛也裕饶也後汉书元精所生王之佐臣章怀太子注元为天元精谓天之精气论衡天禀元气人受元精蔡邕陈太丘碑文含元精之和应期运之数吕向注元精大道也北堂书钞庾亮答郭豫书曰别驾旧与刺史别乘同宣王化於万里者其任居刺史之半安可任非其人唐书百官志高宗即位改别

驾皆为长史徐陵为陈武帝与岭南酋豪书身居列岳自御强兵礼记遽数之不能终其物悉数之乃留更仆未可终也孔颖达正义更代也言若委细悉说之则大久仆侍疲倦宜更代之若不代仆则事未可尽也】有律师道宗心总羣妙量包【繆本作苞】大千日何莹而常明天不言而自运识岸浪注玄机清发每口演金偈舌摇电光开关延敌罕有当者由万窍同号於一风衆流俱纳於溟海若乃严饰佛事规矩梵天法堂郁以雾开香楼岌乎岛峙皆我公之缔构也以天宝八载五月一日示灭大寺百城号天四衆泣血焚香散花扶櫟卧辙仙鹤数十飞鸣中絶非至德动天深仁感物者其孰能与於此乎三纲等皆论穷弥天惠湛清月传千灯於智种了万法於真空不谋同心克树圣迹【大千世界见二十三卷注金偈佛所说之偈也扬雄解嘲上说人主下谈公卿目如耀星舌如电光李周翰注电光谓辞辩速如电光之闪也过秦论秦人开关延敌九国之师逡巡逃遁而不敢进庄子大块噫气其名为风是惟无作作则万窍怒呿法苑珠林色界有十八天初禅三天一名梵衆天二名梵辅天三者大梵天此大梵天无别住处但於梵辅有层台高显严博大梵天王独於上位以别羣下於此三天之中梵衆是庶民梵辅是臣大梵是君惟此初禅有君臣民庶之则自此以上悉皆无也梁武帝诗长涂横翠微香楼闲紫烟缔构结构也见一卷注翻译名义自古皆以比丘比丘尼优婆塞优婆夷为四衆礼记高子臯之执亲之丧也泣血三年正义云凡人涕泪必因悲声而出若血出则不由声也今子臯悲无声其涕出如血之出故云泣血说文櫟棺也翻译名义寺立三纲上座维那典座也晋书时有桑门释道安俊辩有高才自北至荆州与习凿齿初相见道安曰弥天释道安凿齿曰四海习凿齿人以为佳对维摩诘经譬如一灯燃千百灯冥者皆明明终不尽菩萨开导衆生令发阿耨多罗三藐三菩提心於其道意亦不灭尽随所说法而自增益一切善法是名无尽灯也法华经成一切种智一切种智即佛智也又谓之般若释典以一切万有终归於无谓之为空人法皆空则谓之真空即般若智也梵扶泛切音近范櫟音近寸湛音沈】太官李公乃命门於南垣庙通衢曾盘旧规累构余石壮士加勇力侔拔山才击鼓以雷作拖鸿縻而电掣千人壮万夫势转鹿卢於横梁泯环合而无际常六合之振动崛九霄之峥嵘非鬼神功曷以臻此【项羽歌力拔山兮气盖世雷作谓如雷之发声鸿縻大索电掣谓疾如电之掣也韵会辘轳并上汲水木一作櫟广韵圜转木也通作鹿卢縻音麋】况其清景烛物香风动尘羣形所沾积苦都雪粲星辰而增辉挂文字而不灭虽汉家金茎伏波铜柱拟兹陋矣【班固西都赋抗仙掌以承露擢双立之金茎章怀太子注前书曰武帝时作铜柱承露仙人掌之属三辅故事云建章宫承露盘高二十丈大七围以铜为之上有仙人掌承露和玉屑饮之金茎即铜柱也後汉书交趾女子徵侧徵贰反玺书拜马援伏波将军南击交趾水经注俞益期牋曰马文渊立两铜柱於林邑岸北山水移易铜柱今复在海中林邑记曰建武十九年马援树两铜柱於象林南界与西屠国分汉之南疆也】或日月圆满方檀散华清心讽持诸佛称赞夫如是亦可以从一天至一天开天宫之门见羣圣之顔巍巍功德不可量也【按释典欲界有六天一四天王天二忉利天三夜摩天四兜率天五化乐天六他化自在天色界有十八天一梵衆天二梵辅天三大梵天四少先天五无量光天六光音天七少淨天八无量淨天九徧淨天十无云天十一福生天十二广果天十三无想天十四无烦天十五无热天十六善见天十七善现天十八色究竟天无色界有四天一空处天二识处天三无所处天四非有想非无想天凡三界共二十八天天者言其清淨光洁最胜最尊故名为天乃神境世界之位与苍苍在上之天不同一解能修至胜之因方能生其处功有优劣故所生之处有不同】其録事参军六曹英寮及十一县官属有宏才硕德含香绣衣者皆列名碑陰此不具载【

按唐书兖州鲁郡为上都督府上都督府之属官有録事参军事一人正七品上有功曹仓曹户曹田曹兵曹法曹土曹参军事各一人正七品下其曰六曹者田曹後置故仍其旧称不称七而称六也所管瑕丘曲阜乾封泗水邹县任城龚丘平陆金乡鱼台莱芜凡十一县晋书郭璞传景纯通秀夙振宏才索袭传索先生硕德名儒含香尚书郎事见三十六卷注绣衣御史事见十一卷注】郡人都水使者宣道先生孙太冲得真人紫藁玉笈之书能令太一神自成还丹以献於帝帝服享万壽与天同休功成身退谢病而去不谓古之玄通微妙之士欤乃谓白曰昔王文考观艺於鲁骋雄辞於灵光陆佐公知名在吴铭双阙於盘石吾子盍可美盛德扬中和恭承话言敢不惟命【册府元龟孙太冲隐於嵩山元宗天宝三年河南尹裴敦复上言太冲於嵩山合链金丹自成於竈中精华特异变化非常请宣付史官颁示天下以彰灵瑞仙圣之应从之又孙逖有为宰相贺中岳合链药自成表臣等伏见道士孙太冲奏事奉进止令中使薛履信监臣於中岳嵩阳观合炼其竈中着水置炭於竈侧封固却回已经数月泥拭既密緘封并全即与县官等对开门其炭并尽灰又别聚不动人力其药已成初乃五色发端终则太阳辉於炉际又河南尹裴敦复所奏并奉勅令右补阙李成式往验并同者唐书百官志都水监使者二人正五品上掌川泽津梁渠堰坡池之政此云都水使者乃宠异方士而以虚衔加之耳後汉书王延壽字文考有儒才少游鲁国作灵光殿赋後蔡邕亦造此赋未成及见延壽所为甚奇之遂辍翰而已王延壽鲁灵光殿赋序鲁灵光殿者盖景帝程姬之子恭王余之所立也初恭王始都下国好治宫室遂因鲁僖基兆而营焉遭汉中微盗贼奔突自西京未央建章之殿皆见隳坏而灵光岿然独存予客自南鄙观艺於鲁覩斯而眙曰嗟乎诗人之兴感物而作故奚斯颂僖歌其路寝而功绩存乎辞德音昭乎声物以赋显事以颂宣非赋非颂将何述焉遂作赋张载注艺六经也李周翰注言鲁有周孔遗风思礼乐之美故云观艺梁书陆倕字佐公吴郡吴人也高祖雅爱倕才诏为石阙铭记奏之敕曰太子中舍人陆倕所制石阙铭辞义典雅足为佳作昔虞丘辨物邯鄲献赋赏以金帛前史美谈可赐绢三十匹六朝事迹县北五里有四石阙在台城之门南高五丈广三丈六尺梁武帝所造及成朝士铭之陆倕字佐公其文甚佳士流推伏】遂作颂曰

揭高幢兮表天宫嶷独出兮凌星虹神纵纵【繆本作攢攢当是总总】兮来空伫扶倾兮苍穹西方大圣称大雄横絶苦海舟羣蒙陀罗尼万万法宗善住天子获厥功明明李君牧东鲁再新颓规扶衆苦如大云王注法雨【郭本作再】邦人清凉喜聚舞扬鸿名兮振海浦铭丰碑兮昭万古【揭?立也嶷如山之嶷然独出也凌星虹谓其高若与星辰虹蜺相凌历也楚辞纷总总其离合兮王逸注总总聚貌说文伫勇壮也扬雄甘泉赋神莫莫而扶倾详见二十一卷注法苑珠林济生灵於苦海救愚迷於火宅法华经悲体戒雷震慈意妙大云澍甘露法雨灭除烦恼焰华严经如大龙王能雨一切妙法雨故鸿名大名也见三卷注张衡西京赋光炎矚天庭雷声振海浦说文浦滨也徐陵孝义寺碑谨勒丰碑陈其舞咏揭音杰伫鱼乞切银入声】

当涂李宰君画赞【薛方山浙江通志李阳水字少温赵郡人以辞翰名乾元间为缙云令修孔子庙自为文记之岁旱祷雨於城隍神与之约五日不雨焚其祠及期雨沾足秋满退居吏隐山後迁当涂令阳水篆书尤着舒元舆谓其不下李斯云】

天垂元精岳降粹灵应期命世大贤乃生吐奇献策敷闻王庭帝用休之扬光泰清滥觞百里
涵量八溟缙云飞声当涂政成雅颂一变江山再荣举邑拚舞式图丹青眉秀华盖目朗明星
鹤矫阆风麟腾玉京若揭日月昭然运行穷神阐化永世作程【元精已见前注诗大雅嵩高
惟岳骏极於天惟岳降神生甫及申三国志赵俨谓繁钦曰曹镇东应期命世必能匡济华夏
阮孝绪七録序大圣挺生应期命世书多士夏迪简在王庭有服在百僚却正释讥虽尺枉而
直寻终扬光以发辉家语江始出於岷山其源可以滥觞王肃注觞可以盛酒言其微也此借
言始仕之意缙云县唐时隶江南东道之处州缙云郡西南至州八十五里当涂县唐时隶江
南西道之宣州宣城郡东南至州一百九十里卢谿诗日碑效忠飞声有汉黄庭内景经眉号
华盖覆明珠太平广记西王母所居宫阙在龟山春山西那之都崑仑之圃阆风之苑玉京见
五卷注庄子昭昭乎若揭日月而行也周书与国咸休永世无穷】

金陵名僧顏公粉图慈亲讚【顏音均】

神妙不死惜【当作借】生此身托体明淑而称厥亲粉为造化笔写天真貌古松雪心空世
尘文伯之母可以为邻【谢朓新安公生墓铭诞兹明淑玉振兰芳家语公父文伯之母纺绩
不懈文伯諫焉其母曰古者王后亲织玄紵公侯之夫人加之以紃紵卿之内子为大带命妇
成祭服列士之妻加之以朝服自庶士以下各衣其夫秋而戒事烝而献功男女纺绩????则有
辟圣王之制也今我寡也尔又在位朝夕恪勤犹恐亡先人之业况有怠惰其何以避辟孔子
闻之曰弟子志之季氏之妇可谓不淫矣】

李居士讚

至人之心如镜中影挥斥万变动不离静彼质我斤挥风是骋了物无二皆为匠郢吾族贤老
名喧写真貌图粉绘生为垢尘从白得衰与天为邻默然不灭【唐文粹作俨然不语】长存
此身【挥斥犹纵横见二十七卷注庄子郢人垩漫其鼻端若蝇翼使匠石斲之匠石运斤成
风听而斲之尽垩而鼻不伤详见三卷注嵇康养生论积损成衰从衰得白从白得老从老得
终】安吉崔少府翰画讚【唐时安吉县隶江南东道湖州吴兴郡按唐书宰相世系表有崔
翰字叔清汴宋观察使巡官试大理评事未知即其人否】

齐表巨海吴嗟大风崔为令族出自太公克生奇才骨秀神聪炳若秋月骞然云鸿爰图伊人
夺妙真宰卓立欲语谓行而在清晨一观爽气十倍张之座隅仰止光彩【左传吴公子札来
聘请观於周乐为之歌齐曰美哉泱泱乎大风也哉表东海者其太公乎国未可量也杜预注
太公封齐为东海之表式陶潜诗於穆令族允构斯堂唐书崔氏出自姜姓齐丁公汲嫡子季
子让国叔乙食采於崔遂为崔氏】

宣城吴録事画讚【吴名镇为宣城郡之録事参军见赵公西候亭颂】

大名之家昭彰日月生此髦士风霜秀骨图真像贤传容写髮束带岳立如朝天阙岩岩兮谓
四方之削成澹澹兮申【刘本作曰】五湖之澄明武库肃穆辞峯峥嵘大辩若讷大音希声

默然不语终为国桢【诗小雅烝我髦士毛传曰髦俊也岳立见十卷注梁简文帝诗重门远照耀天阙复穹窿山海经太华之山削成而四方其高五千仞其广十里史记正义韦昭曰五湖湖名耳实一湖今太湖是也在吴西南史记索隐五湖者郭璞江赋云具区兆溇彭蠡青草洞庭或云太湖周五百里故曰五湖晋书裴頠弘雅有远识博学稽古自少知名御史中丞周弼见而叹曰頠若武库五兵纵横一时之杰也陆绩别传风化肃穆郡内大治王勃山亭兴序辞峯直上振笔札而前驱翰苑横开列文章於後殿老子洪德章大辩若讷河上公注大辩者谓无疑若讷者口无词又同异章太音希声河上公注大音犹雷霆待时而动喻常变气希言也任昉诗式瞻在国桢後汉书故北中郎将卢植名著海内学为儒宗士之楷模国之桢干也】

壁画苍鹰讚【讥主人】

突兀枯树傍无寸枝上有苍鹰独立若愁胡之攢眉凝金天之杀气凜粉壁之雄姿觜銛剑戟爪握刀锥羣宾失席以?眙未悟丹青之所为吾尝恐出户牖以飞去何意终年而在斯【孙楚鹰赋疎尾濶臆高髻頰颇深目蛾眉状似愁胡魏彦深?赋资金方之猛气擅火德之炎精传玄鹰赋雄姿邈世逸气横生广韵銛利也班固西都赋犹愕眙而不能阶章怀太子注字书曰愕惊也音五谷反字林曰眙惊貌也音丑吏反 銛音纤愕音愕眙音近帙亦音怡】

方城张少公厅画师猛讚【郭本少上七字

方城县名唐时隶山南东道唐州春陵郡少公犹少府见二十七卷注】

张公之堂华壁照雪师猛在图雄姿奋发森竦【一作疎】眉目?洒毛骨锯牙衔霜钩爪抱【一作把】月掣蹲胡以震怒谓大【繆本作有】厦之 岬【繆本作嶢机】永观厥容神骇不歇【一本少末二句 广韵掣挽也说文蹲踞也蹲胡谓调狮之胡蹲踞而牵挽者狮方震怒曳狮之胡方若为狮所曳也淮南子大厦成而燕雀相贺说文厦屋也 岬不安也见三卷注曹植洛神赋精移神骇 蹲音存 音孽】

羽林范将军画讚【羽林将军见十七卷注】

羽林列卫壁奎南垣四十五星【郭本作里】光辉至尊范公拜将遥承主恩位宠虎臣封传雁门瞻天蹈舞踊跃精魂逐逐鸛视昂昂鸿骞心豪祖逖气爽刘琨名震大国威扬列藩麟阁之阶粉图华轩胡兵百万横行纵吞爪牙帝室功业长存【甘氏星经羽林军四十五星奎壁十二星并在室南主翊卫天子之军入安飞将星欲威明天下安星暗兵尽失西入室五度去北辰一百二十三度史记正义羽林四十五星三三而聚散在奎壁南天军也亦天宿卫之兵革奎壁陈十二星横列在营室南天军之垣奎诗鲁颂矫矫虎臣在泮猷猷孔颖达正义矫矫然有威武如虎之臣雁门郡即代州唐隶河东道梁书鸛视争先龙骧并驱晋书祖逖刘琨并有英气每语世事或中宵起坐相谓曰若四海鼎沸豪杰并起吾与足下当相避於中原耳晋书列藩九服式叙王官麟阁见四卷注华轩见二十五卷注横行见五卷注诗小雅祈父予王之爪牙孔颖達正义鸟用爪兽用牙以防卫已身此人自谓王之爪牙以鸟兽为喻也】

金银泥画西方淨土变相讚【并序 西方淨土即西方极乐国土也法苑珠林世界皎洁目之为淨即淨所居名之为土故摄论云所居之土无於五浊如玻瓈珂等名清淨土法华论云无烦恼衆生住处名为淨土】

我闻金天【唐文粹作方】之西日没之所去中华十万亿刹有极乐世界焉彼国之佛身长六十万亿恒【繆本作常】沙由旬眉间白毫向右宛转如五须弥山目光清白若四海水【唐文粹作若四大海水】端坐说法湛然常存沼明金沙岸列珍树栏楯弥覆罗网周张车渠瑠璃为楼殿之饰颇黎码瑙耀阶砌之荣皆诸佛所证无虚言者【佛说阿弥陀经佛告长老舍利弗从是西方过十万亿佛土有世界名曰极乐其土有佛号阿弥陀今现在说法彼土何故名极乐乐其国衆生无有衆苦但受诸乐故名极乐极乐国土七重栏楯七重罗网七重行树皆是四宝周匝围绕有七宝池八功德水充满其中池底纯以金沙布地四边阶道金银琉璃玻瓈合成上有楼阁亦以金银琉璃玻瓈车渠赤珠玛瑙而严饰之池中莲花大如车轮青色青光黄色黄光赤色赤光白色白光微妙香洁彼佛国土常作天乐黄金为地昼夜六时雨天曼陀罗花其土衆生常以清旦各以衣祴盛衆妙花供养他方十万亿佛即以食时还到本国饭食经行彼国常有种种奇妙杂色之鸟白鹤孔雀鸚鵡舍利迦陵频伽共命之鸟是诸衆鸟昼夜六时出和雅音其音演畅五根五力七菩提分八圣道分如是等法其土衆生闻是音已皆悉念佛念法念僧舍利弗汝勿谓此鸟实是罪报所生彼佛国土无三恶道尚无恶道之名何况有实是诸衆鸟皆是阿弥陀佛欲令法音宣流变化所作彼佛国上微风吹动诸宝行树及宝罗网出微妙音譬如百千种乐同时俱作闻是音者自然皆生念佛念法念僧之心彼佛何故号阿弥陀彼佛光明无量照十方国无所障碍彼佛壽命及其人民无量无边阿僧只劫故名阿弥陀阿弥陀佛成佛以来於今十劫彼佛有无量无边声闻弟子皆阿罗汉非是算数之所能知诸菩萨衆亦复如是彼佛国土成就如是功德庄严又极乐国土衆生生者皆是阿鞞跋致其中多有一生补处其数甚多非是算数所能知之但可以无量无边阿僧只说衆生闻者应当发愿生彼国土所以者何得与如是诸上善人俱会一处不可以少善根福德因缘得生彼国若有善男子善女人闻说阿弥陀佛执持名号若一日若二日若三日若四日若五日若六日若七日一心不乱其人临命终时阿弥陀佛与诸圣衆现在其前是人终时心不颠倒即得往生阿弥陀佛极乐国土我见是利故说此言若有衆生闻是说者应当发愿生彼国土如我今者称讚阿弥陀佛不可思议功德之利东方亦有阿閼鞞佛须弥相佛大须弥佛须弥光佛妙音佛如是等恒河沙数诸佛南方世界有日月灯佛名闻光佛大焰肩佛须弥灯佛无量精进佛如是等恒河沙数诸佛西方世界有无量壽佛无量相佛无量幢佛大光佛大明佛宝相佛淨光佛如是等恒河沙数诸佛北方世界有焰肩佛最胜音佛难沮佛日生佛网明佛如是等恒河沙数诸佛下方世界有师子佛名闻佛名光佛达磨佛法幢佛持法佛如是等恒河沙数诸佛上方世界有梵音佛宿王佛香上佛香光佛大焰肩佛杂色宝华严身佛婆罗树王佛宝华德佛见一切义佛如须弥山佛如是等恒河沙数诸佛各於其国出广长舌相遍覆三千大千世界说诚实言汝等衆生当信是称讚不可思议功德一切诸佛所护念经何故名为一切诸佛所护念经若有善男子善女人闻是经受持者及闻诸佛名者皆为一切实诸佛之所护念皆得不退转於阿耨多罗三藐三菩提是故汝等皆当信受我语及诸佛所说若有人已发愿今发愿当发愿欲生阿弥陀佛国者是诸人等皆得不退转於阿耨多罗三藐三菩提於彼国土若已生若今生若当生是故舍利佛谓善男子善女人若有信者应当发愿生

彼国土云云刹谓诸佛所住国土观无量寿经无量寿佛身高六十万亿那由陀恒河沙由旬眉间白毫右旋宛转如五须弥山佛眼如四大海水青白分明法苑珠林毗昙论云四肘为二弓五百兮为一拘卢舍八拘卢舍为一由旬以中国道里较之一由旬合得十六里南齐书顾欢传陶神者使尘惑日损湛然常存湛然常存言其永无迁坏也】金银泥画西方净土变相盖冯翊郡秦【唐文粹作太】夫人奉为亡夫湖州刺史韦公之所建也【按唐书地理志同州冯翊郡隶关内道湖州吴兴郡隶江南东道冯音凭翊音翼】夫人蕴冰玉之清敷圣善之训以伉俪大义【唐文粹无以字大义作义大】希拯拔於【郭本缺於字】幽涂父子恩深用重【唐文粹作薰】修於景福誓舍珍物构求名工图金创端绘银设像【诗国风母氏圣善郑笺曰母有叡智之善德韵会伉俪敌也配耦也详五卷注後汉书父子恩深不觉自失耳释氏要览薰义者显识论云譬如烧香薰衣香体灭而香气在衣此香不可言有香体灭故不可言无香气在衣故诗大雅介尔景福毛传曰景大也图金创端者泥金为质地而以为创始绘银设像者以银代彩色而绘成形像】八法功德【唐文粹作八功德水】波动青莲之池七宝香花光映黄金之地清风所拂如生五音百千妙乐咸疑动作若已发愿未及【唐文粹作及未】发愿若已当生未及【唐文粹作及未】当生精念七日必生其国功德罔极酌而难明【观无量寿经极乐国上有八池水一一池水七宝所成其宝香輒从如意珠王生分为十四支一一支作七宝色黄金为渠渠下皆以杂色金刚以为底砂一一水中有六十亿七宝莲花一一莲花团圆正等十二由旬其摩尼水流注花间寻树上下其声微妙是为八功德水法苑珠林八功德水依顺正理论云一甘二冷三暖四轻五清淨六不臭七饮时不损喉八饮已不伤腹观无量寿经其诸宝树七宝华叶无不具足一一花叶作异宝色琉璃色中出金色光玻瓈色中出红色光码瑙色中出砗磲光砗磲色中出緑真珠光珊瑚琥珀一切衆宝以为映饰大阿弥陀经七宝所谓黄金白银水晶琉璃珊瑚 珀砗磲精念即所谓一心不乱也今人念念迁流不能终日若能注心淨土无二无杂至於七日终不散乱则心中佛境自然全现矣或有不信是事良由业障深重故耳罔极不可限量也】赞曰

向西日没处遥瞻大悲顔目淨四【唐文粹作碧】海水身光紫金山勤念必往生是故称极乐珠网珍宝树天花散香阁图画了在眼愿托彼道場以此功德海冥佑为舟梁八十一【当作亿】劫罪如风扫轻霜庶【唐文粹作谛】观无量寿长愿【唐文粹作放】玉毫光【佛报恩经我见佛身相喻如紫金山法苑珠林狮子月佛本生经云遥见世尊身放光明如紫金山普令大衆同於金色法苑珠林衆生功德海无能测量者北齐书慕容俨传相率祈请冀获冥佑观无量寿佛经若观是地者除八十亿劫生死之罪拾身他世必生淨国大阿弥陀经阿弥陀佛号无量寿佛观无量寿佛经观无量寿佛者一一相好入但观眉间白毫极令明了见眉间白毫者八万四千相好自然当现渔隐丛话司空图云尝观杜子美祭太尉房公文李太白佛寺碑赞宏拔清厉乃其歌诗也】江寧杨利物画讚【唐之江南东道有江寧县隶润州丹阳郡至德二载改隶昇州江寧郡】

太华高岳三峯倚天洪波经海百代生贤为夔为龙廓土济川赵城开国玉树凌烟笔鼓元化形分自然明珠独转秋月孤悬作宰作程摧刚挫坚德合窈冥声播兰茝鸿渐麟阁英图可传【初学记太华山其上有三峯直上晴霁可观後汉书朱浮传六国之时其势各盛廓土数千里将兵数百万书说命若济巨川用汝作舟楫唐书地理志河东道晋州平阳郡有赵城县百

官志封爵之制开国郡公食邑二千户正二品开国县公食邑千五百户从二品开国县侯食邑千户从三品开国县伯食邑七百户正四品上开国县子食邑五百户正五品上开国县男食邑三百户从五品上讚言杨氏出自关西关西之地山有华岳川有黄河山川精灵之气蓄积百世挺生伟人而为当代之夔龙出将则有廓土之功入相则有济川之蹟以爵酬功得封赵城盖推言其祖父之贤而且贵如此玉树以下始讚利物世说谢太傅问诸子侄子弟亦何预人事而正欲使其佳诸人莫有言车骑答曰譬如芝兰玉树欲使其生於阶庭耳凌烟犹凌云也老子窈兮冥兮其中有精河上公注道惟窈冥无形其中有精实神明相薄陰阳交会也韵会荃香草也周易渐卦初六鸿渐於干孔颖達正义鸿水鸟也渐进之道自下升上故进譬鸿飞自下而上也後汉书蔡邕传鸿渐盈阶振鹭充庭章怀太子注易曰鸿渐於陆鸿水鸟也渐出於陆喻君子仕进於朝麟阁见四卷注 荃音詮】

金乡薛少府厅画鹤讚【唐河南道有金乡县隶兗州鲁郡】

高堂闲轩兮虽听讼而不扰图蓬山之奇禽想瀛海【唐文粹作洲】之缥缈【繆本作瞋眇】紫顶烟赭丹眸星皎昂昂伫眙【一作欲飞】霍若惊矫形留座隅势出天表谓长鸣【一作唳】於风霄终寂立於露晓凝翫益古俯察愈妍舞疑倾市听似闻弦恍感至精以神变可弄影而浮烟【鲍照舞鹤赋晴含丹而星曜顶凝紫而烟华说文赭大赤也左思吴都赋士女伫眙刘渊林注伫眙立视也霍若犹忽若惊矫惊飞也班固西都赋若游目於天表刘良注表外也艺文类聚易通卦验曰立夏清风至而鹤鸣春秋感精符八月白露降鹤即高鸣相警风土记白鹤性警至八月露降流於草叶上滴滴有声则鸣张华禽经注露下则鹤鸣鹤之驯养於家庭者饮露则飞去吴越春秋吴王有女滕玉因谋伐楚与夫人及女会蒸鱼王前尝半而与女女怒曰王食鱼辱我不忍久生乃自杀阖闾痛之葬於国西阊门外凿池积土文石为椁题凑其中金鼎玉杯银樽珠襦之宝皆以送女乃舞白鹤於吴市令万民随而观之还使男女与鹤俱入羡门因发机以掩之杀生以送死鲍照舞鹤赋出吴都而倾市韩非子师旷援琴而鼓一奏之有玄鹤二入道南方来集於廓门之境再奏之而列三奏之延颈而鸣舒翼而舞音中宫商之声声闻於天舞鹤赋叠霜毛而弄影振玉羽而临霞 赭音释又音赫眙音夷】

志公画讚【传灯録宝志禅师金城人姓朱氏少出家止道林寺修习禅定宋太始初忽居止无定饮食无时髮长数寸徒跣执锡杖杖头擐剪刀尺铜监或挂一两尺帛数日不食无饥容时或歌吟词如讖记士庶皆共事之齐建元中武帝谓师惑衆收付建康狱明旦人见其入市及检狱如故建康令以事闻帝延之於宫中之後堂师在华林园忽一日重着三布帽亦不知於何所得之俄而武帝崩豫章王文惠太子相继薨由是禁师出入梁高祖即位下诏曰志公迹拘尘垢神游冥寂水火不能焦濡蛇虎不能侵惧语其佛理则声闻以上谈其隐沦则遯仙高者乃以俗士常情空相拘制何其鄙陋一至於此自今勿得复禁天监十二年冬忽告衆僧令移金刚神像出置寺外密谓人曰菩萨将去未及旬日无疾而终举体香煖临亡燃一烛以付後阁舍人吴庆庆以事闻帝叹曰大师不复留矣烛者将以後事嘱我也因厚礼葬於鍾山独龙阜仍立开善精舍敕陆倕制铭於冢内王筠勒碑於寺门处处传其遗像焉南史沙门释宝志虽剃须髮而常冠下裙帽衲袍故俗呼为志公】

水中之月了不可取虚空其心【一作身】寥廓无主锦幘鸟爪独行【一作游】絶侶刀齐尺梁【繆本作量】扇迷陈语丹青圣容何往【一作何住一作去往】何所【水中之月只一影耳初非真实幻軀亦尔虽贤圣降生化身灵变显迹甚奇要亦无殊於此故曰了不可取楚辞下崢嶸而无地兮上寥廓而无天寥廓即空虚之处说文幘盖衣也南史宝志出入钟山往来都邑年已五六十矣齐宋之交稍显灵迹被髮徒跣语默不伦或被锦袍饮啖同於凡俗神僧传宝志面方而莹彻如镜手足皆鸟爪每行游市中其锡杖上尝悬剪刀一事尺一枝麈尾扇一柄剪刀者齐也尺者量也麈尾扇者尘也盖隐语历齐梁陈三朝耳 杨士奇曰今灵谷寺有石刻志公像赞吴道子画李白赞顔真卿书世称三絶旧刻已坏此重刻者不复见书法之妙矣】

琴赞

峰阳孤桐石聳天骨根老冰泉叶苦霜月斲为緑绮徽声粲发秋风入松万古奇絶【尚书峰阳孤桐孔氏传孤特也峰山之阳特生桐中琴瑟蔡氏集传地志云东海郡下邳县西有葛峰山古文以为峰山阳者山南也孤桐特生之桐其材中琴瑟诗曰梧桐生矣於彼朝阳盖草木之生以向日为贵也封氏见闻记兗州邹峰山南面平复东西长数十步广数步其处生桐柏传以为禹贡峰阳孤桐者也土人云此桐所以异於常桐者诸山皆发地兼土惟此山大石攢倚石间周围皆通人行山中空虚故桐木絶响是以珍而入贡也緑绮琴见二十卷注徽琴节也见四卷注秋风入松喻琴声之清韵 峰音亦】

朱虚侯讚【史记孝惠帝崩吕太后称制齐哀王弟章入宿卫於汉吕太后封为朱虚侯朱虚侯年二十有气力忿刘氏不得职尝入侍高后燕饮高后令朱虚侯刘章为酒吏章自请曰臣将种也请得以军法行酒太后曰可酒酣章进饮歌舞已而曰请为太后言耕田歌高后儿子畜之笑曰顾而父知田耳若生而为王子安知田乎章曰臣知之太后曰试为我言田章曰深耕溉种立苗欲疏非其种者鋤而去之太后默然顷之诸吕有一人醉亡酒章追拔剑斩之而还报曰有亡酒一人臣谨行法斩之太后左右皆大惊业已许其军法无以罪也自是诸吕惮朱虚侯虽大臣皆依朱虚侯其明年高后崩吕禄为上将军吕产为相国皆居长安中聚兵以威大臣欲为乱朱虚侯与太尉勃丞相平等诛之朱虚侯首先斩吕产於是太尉勃等乃得尽诛诸吕】

嬴氏稊德金精摧伤秦鹿克获汉风飞扬赤龙登天白日昇光陰虹贼虐诸吕扰攘朱虚来归会酌高堂雄剑奋擊太后震惶爰鋤产禄大运乃昌功冠帝室於今不忘【史记秦之先柏翳舜赐姓嬴氏书泰誓稊德彰闻陆机汉高祖功臣颂金情仍顔米光以渥秦在西方西为金行故曰金精汉书昔秦失其鹿刘季逐而擒之汉高祖歌大风起兮云飞扬威加海内兮归故乡赤龙登天谓高祖升遐白日昇光谓惠帝即世陰虹贼虐谓吕后比杀三赵王後汉书明帝纪朕承大运继体守文】观欻飞斩蛟龙图讚【淮南子荆有欻非得宝剑於干队还及渡江至於中流阳侯之波两蛟夹绕其船欻非谓柅船者曰尝有如此而得活者乎对曰未尝见也於是欻非瞑目勃然攘臂拔剑曰武士可以仁义之礼说也不可劫而夺也此江中之腐肉朽骨弃剑而已予有奚爱焉赴江刺蛟遂断其头船中人尽活风波毕除荆爵为执珪欻飞即欻非

古字通用 伙音次】

伙飞斩长蛟遗图画中见登舟既虎啸激水方龙战惊波动连山拔剑曳雷电鳞摧白刃下血染沧江变感此壮古人千秋【一作载】若对面【赵景真与嵇茂齐书龙睇大野虎啸六合周易龙战於野木华海赋波如连山】

地藏菩萨讚【并序 地藏菩萨本愿经地藏菩萨於过去久远不可说劫为大长者子时世有佛号曰师子奋迅具足万行如来时长者子见佛相好千福庄严因问彼佛作何行愿而得此相佛告长者子欲证此身当须久远脱度一切受苦衆生时长者子因发愿言我今尽未来际不可计劫为是罪苦六道衆生广说方便尽令解脱而我自身方成佛道以是於彼佛前立斯大愿於今百千万亿那由他劫尚为菩萨】

大雄掩照日月崩落惟佛知慧大而光生死雪赖假普慈力能救无边苦独出旷劫导开横流则地藏菩萨为当仁矣【大雄掩照谓释迦入般涅槃也楞严经我旷劫来心得无碍旷劫谓久远之劫也横流谓苦海也地藏菩萨本愿经尔时世尊舒金色臂摩百千万亿无量阿僧只世界诸分身地藏菩萨顶而作是言汝观吾累劫勤苦度脱如是等难化刚强罪苦衆生其有未调伏者随业报应若堕恶趣受大苦时汝当应念吾在忉利天宫殷勤付嘱令娑婆世界至弥勒出世已来衆生悉使解脱永离诸苦过佛授记尔时诸世界分身地藏菩萨各复一形涕泪哀恋白佛言我从久远劫来蒙佛接引使获不可思议神力具大智慧我所分身遍满百千万亿恒河沙世界每一世界化百千万亿身每一身度百千万亿人今归敬三宝永离生死至涅槃乐但於佛法中所为善事一毛一谛一沙一尘或毫髮许我渐度脱使获大利惟愿世尊不以後世恶业衆生为虑】弟子扶风窦滔少以英气爽迈结交王侯清风豪侠极乐生疾乃得惠【当作慧】剑於真宰湛本心於虚空愿图圣容以祈景福庶冥力凭助而厥苦有瘳【地藏菩萨本愿经临命终时男女眷属将是命终人舍宅财物宝贝衣服塑画地藏形像或使病人眼耳闻见知其眷属将舍宅宝贝等为其自身塑画地藏形像若是业报合受重病承斯功德寻即除愈壽命增益唐时扶风郡即岐州也属关内道维摩诘经以智慧剑破烦恼网庄子若有真宰而特不得其朕韵会湛澄也景福已见本卷注说文瘳疾愈也】爰命小才式讚其事讚曰

本心若虚空清淨无一物焚荡淫怒痴圆寂了见佛五彩图圣像悟真非妄传扫雪万病尽爽然清凉天讚此功德海永为旷代宣【人心虚淨本无一物耽着於色则起而为淫触於忿戾则发而为怒蔽於邪见昧於大道则流而为痴三者谓之三毒皆心之累也苟能一切捐弃若火之焚若水之荡而尽去之不使一毫少累其心则心之本体见矣心即佛也见心不即见真佛哉翻译名义涅槃装三藏翻为圆寂贤首云德无不备称圆障无不尽称寂功德海已见本卷注谢灵运伤已赋丁旷代之渥惠】

鲁郡叶和尚讚【通典鲁郡今之兗州古少皞之墟也东岳太山在焉】

海英岳灵诞彼开士了身皆空观月在水如薪传大朗彻生死如云开天廓然万里寂灭为乐

江海而□逆旅形内虚舟世间邈彼崑阊谁云可攀【东岳在鲁郡境内东海虽不在其境内以其相去不远故广言及之诞育也开士谓僧之有德行者见二十一卷注四大幻身本来空无故智者观之如水中月影初非真实慧远形尽神不灭论火之传於薪犹神之传於形火之传异薪犹神之传异形前薪非後薪则知指穷之术妙前形非後形则悟情数之感深惑者见形朽於一生便以谓神情俱丧犹覩火穷於一本谓终期都尽耳涅槃经诸行无常是生灭法生灭灭已寂灭为乐逆旅见二十四卷拟古注虚舟见十卷赠僧崖公注楚辞章句阊风山名在崑仑之上 诞音但阊音浪】

李太白集注卷二十八

卷二十九

钦定四库全书

李太白集注卷二十九

钱塘 王琦 撰

铭碑祭文共九首

化城寺大钟铭【并序 化城寺详见二十卷注】

噫天以震雷鼓羣动佛以鸿钟惊【唐文粹作警】大梦而能发挥沈潜开觉茫蠢则钟之取象其义博哉夫扬音大千所以清真心警俗虑协响广乐所以达元气彰天声铭勲皇宫所以旌丰功昭茂德莫不配美金鼎增辉宝坊仍事作制岂徒然也【扬雄羽猎赋撞鸿钟大千世界见二十三卷注广乐见一卷注张衡东京赋铭勲彝器历世弥光薛综注铭勒也勲功也勒铭於宗庙之器钟鼎万世弥益光明宝坊见二十八卷注】粤有唐宣城郡当涂县化城寺大钟者量函千盈【唐文粹作量函千钧声盈万壑八字】盖邑宰李公之所剏也公名有则系玄元之英蕤茂列圣之天枝生於公族贵而秀出少蕴才略壮而有成【唐文粹作闻】西逾流沙立功絶域帝畴乎厥庸始学古从政历宰洁白声闻於天天书褒荣辉之简牘稽首三复子孙其传天宝之初鸣琴此邦不言而治【唐文粹作理】日计之无近功岁计之有大利物不知化潜臻小康神明其道越不可尚【唐追号老子为玄元皇帝嵇康琴赋飞英蕤於昊苍李善注蕤草木花貌吕延济注英蕤花也王僧孺礼佛唱导发愿文天枝峻密帝叶英芬汉书地理志张掖郡居延县居延泽在东北古文以为流沙颜师古曰流沙在炖煌西韵会流沙地名在居延海南甘州张掖县汉书陈汤传讨絶域不羁之君系万里难制之虏宣帝纪复其後世畴其爵邑张晏曰畴者等也广韵庸功也书周官学古入官议事以制政乃不迷鸣琴邑令事见二十卷注庄子曰计之而不足岁计之而有余诗小雅汔可小康郑笺曰康安也】方入於禅关覩天宫峥嵘闻钟声琐屑乃谓诸龙象曰盍不建大法鼓树之层台使羣聋六时有所归仰不亦美乎於是发一言以先觉举百里而咸【缪本作感】应秋毫不挫人多子来铜崇朝而山积工不日而云会【峥嵘高峻貌琐屑细小貌龙象谓高僧见十二卷注大法鼓谓钟见二十一卷注西域记时极短者谓刹那也百二十刹那为一旦刹那六十旦刹那为一腊缚三十腊缚为一牟呼栗多五牟呼栗多为一时六时合成一日一夜是中国以一昼夜分作十二时者西国只分为六时也庄子北宫奢为卫灵公赋斂以为钟为坛乎国门之外三月而成上下之悬王子庆忌见而问焉曰子何术之设奢曰一之问无敢设也奢闻之既雕既琢复归於朴侗乎其无识僂乎其怠疑萃乎芒乎其送往而迎来来者勿禁往者勿止从其强梁随其曲传因其自穷故朝夕赋斂而毫毛不挫而况有大途者乎诗大雅庶民子来赵岐曰衆民自来趣之若子来为父使之也诗国风崇朝其雨毛传曰崇终也从旦至食时为终朝南史邓元起之在蜀也崇於聚斂财货山积】乃采鳧氏撰鸣【唐文粹作鸿】钟火天地之炉扇陰阳之炭回禄奋怒飞廉震惊金精转潜以融熠铜液星荧【缪本作紫】而燿灿光喷日道气歆

【郭本作敌唐文粹作蔽】天维红云点於太清紫烟矗於遥海烜赫宇宙功侔鬼神莹而察之吁骇人也【周礼鳧氏为钟韵会撰造也贾谊服赋天地为炉造化为冶陰阳为炭万物为铜国语回禄信於聆隧韦昭解回禄火神博雅风师谓之飞廉说文潜滔溢也今河朔方言谓沸溢为潜韵会熠说文盛光也又闪铄貌隋书日循黄道东行一日一夜行一度三百六十五日有奇而周天六经天文编日所行之路谓之黄道与赤道相交半出赤道外半入赤道内说文歊气出貌宋玉大言赋壮士愤兮絶天维韵会矗长直貌增韵耸上貌庄子梓庆削木为鐻鐻成见者惊犹鬼神鲁灵光殿赋吁可畏乎其骇人也潜音达熠音逸歊音器矗音触】尔其龙质炳发虎形躩踞縻金索以上絙悬宝楼而迭擊傍振万壑高闻九天声动山以隐隐【唐文粹作殷殷】响奔雷而阗阗赦汤镬於幽途息剑轮於苦海景福胙蟹被於人天非李公好谋而成弘济羣有【唐文粹作物】孰能兴【郭本作与】於此乎【梁简文帝元圃园讲颂预入宝楼窃窥妙简宋玉九辨属雷师之阗阗兮广雅阗阗声也法苑珠林阿鼻地狱有十八剑轮地狱十八汤镬地狱翻译名义集若打钟时一切恶道诸苦并得停止法苑珠林济生灵於苦海救愚迷於火宅左思蜀都赋景福胙蟹而兴作吕向注胙蟹湿生虫蚊类是也其羣望之如气之布写也言大福之兴有如此虫羣飞而多也絙居恒切音近耕阗音田镬音获胙义乙切欣入声蟹音响】丞尉等并衣冠之龟龙人物之标准大雅君子同僚尽心闻善贾勇赞成厥美【蔡邕郭有道碑文犹百川之归巨海鳞介之宗龟龙也李善注曾子曰介虫之精曰龟鳞虫之精曰龙左传同官为僚吾尝同寮敢不尽心乎左传欲勇者贾予余勇】寺主昇朝闲心古容英骨秀气洒落毫素谦柔笑言海受水而皆纳镜无形而不烛直道妙用乃如是言【繆本作然】常虚怀忘情洁已利物是人行空寂不动见如来【翻译名义集僧史略云详寺主起乎东汉白马寺也寺既爰处人必主之於时虽无寺主之名而有知事之者东晋以来此职方盛故梁武造光宅寺名法云为寺主创立僧制鲍照诗陵令无人事毫墨时洒落南史姚察将终曾无痛恼但西向坐正念云一切空寂】有若上座灵隐都维那则舒名僧日晖蘊虚常因调护贤哉六开士普闻八万法深入禅惠精修律仪【郭本作义唐六典每寺上座一人寺主一人都维那一人共纲纪衆事翻译名义集五分律佛言上更无人名上座道宣勅为西明寺上座列寺主维那之上毗尼母云从无夏至九夏是下座自十夏至十九夏是中座自二十夏至四十夏是上座毗婆娑论云有三上座一生年上座即尊长者具旧戒名真生故二世俗上座即知法富贵大财大位大族大力大眷属虽年二十皆应和合推为上座三法性上座即阿罗汉维那南山云声论翻为次第谓知僧事之次第寄归传云华梵兼举也维是纲维华言也那是梵语删去羯磨陀三字也僧史略云梵语羯磨陀那译为事知亦云悦衆谓知其事悦其衆也开士高僧也见二十一卷注报恩经八万法者如树根茎枝叶名为一树佛为衆生始终说法名为一藏如是八万又云佛一坐说法名为一藏如是八万又云十六字为半偈三十二字为一偈如是八万又云长短偈四十二字为一偈如是八万又云如半月说戒为一藏如是八万又云佛自说六万六千偈为一藏如是八万又云佛说尘劳有八万法藏亦八万名八万法藏禅惠即禅慧王巾头陀寺碑文惟此名区禅慧攸托李善注禅慧禅定智慧即六度之二行也】将博我以文章求我以述作功德大海酌而难名遂与六曹豪吏姑熟贤老乃缙乃黄鳧趋梵庭请扬宰君之鸿美白昔忝侍从备於辞臣恭承德音敢阙清风之颂【法苑珠林衆生功德海无能测量者通典州府佐吏有司功司仓司户司兵司法司士等六参军在府为曹在州为司府曰仓曹功曹州曰司功司仓缙谓僧人缙服者黄谓道士黄冠者埤雅雕鹗丑善立鳧鸞丑善趋又云鹄善步鳧善趋鷹善立鳧趋谓羣趋如鳧鸞也江淹诗誓寻青莲

果永入梵庭期诗大雅吉甫作诵穆如清风】其辞曰

雄雄鸿钟砰隐天雷鼓霆擊警大千含【郭本作合】号烜爍声无边摧慴魑魅招灵仙傍极六道极【唐文粹作下】九泉剑轮辍苦期息肩汤镬猛火停炽燃悵悌贤宰人父母兴功利物信可久德方【唐文粹作芳】金钟永不朽【汉书礼乐志休嘉砰隐溢四方顔师古注砰隐盛意又列子砰然闻之如雷广韵慴慴也杜预左传注魑魅山林异气所生为人害者又云魑山神兽形魅水物释家以天人阿修罗地狱饿鬼畜生六种衆生谓之六道九泉见九卷注息肩见一卷注诗大雅岂弟君子民之父母苕溪渔隐丛话司空图云尝观杜子美祭太尉房公文李太白佛寺碑赞宏拔清厉乃其歌诗也砰音烹慴音叠】

天门山铭【江南通志博望山在太平府西南三十里梁山在和州南六十里两山石状巉岩东西相向横夹大江对峙如门俗呼梁山曰西梁山呼博望山曰东梁山总谓之天门山春秋时楚获吴舡於此实大江要害之地自六代建都金陵皆於此屯兵扞御两山山顶各有一城宋将王元谟所筑】

梁山博望关扁楚滨夹据洪流实为吴津两坐错落如鲸张鳞惟海有若唯川有神牛渚怪物目围车轮光射岛屿气凌星辰卷沙扬涛溺马杀人国泰呈瑞时讹返珍开则九江纳锡闭则五岳飞尘天险之地无德【繆本作安】匪亲【初学记海神曰海若牛渚矶在太平州当涂县西北三十里大江之滨与天门山相去不及百里晋书牛渚矶水深不可测世云其下多怪物温峤毁犀角而照之须臾见水族覆火奇形异状或乘车马着赤衣者其夜梦神谓曰与君幽明道别何意相照也禹贡九江纳锡大龟孔穎达正义龟不常用故锡命乃纳之蔡氏集传大龟尺有二寸所谓国之守龟非可常得故不为常贡若偶得之则使之纳锡於上谓之纳锡者下与上之词重其事也陆机汉高帝功臣颂波振四海尘飞五岳波振尘飞以喻乱也】

溧阳濑水贞义女碑铭【并序 六朝事迹大唐贞义女碑李白文在溧阳县潁阳江北周必太泛舟游山録去溧阳县四十里有贞义女庙女姓史黄山人李太白作记题云濑水上古贞义女碑铭并序前翰林院内供奉学士陇西李白述景定建康志溧水一名濑水在溧阳县西北四十里东流为潁阳江江上有渚曰濑渚伍子胥乞食投金处故又曰投金濑吴越春秋子胥奔吴疾於道中乞食溧阳适会女子擊绵於濑水之上簋中有饭子胥谓曰夫人可得一餐乎女子曰妾独与母居三十未嫁饭不可得子胥曰夫人賑穷途少饭亦何嫌哉女子知非恒人遂许之发其簋笥饭其盎浆长跪而与之子胥再餐而止女子曰君有远逝之行何不饱而餐之子胥已餐而去谓女子曰掩夫人之壶浆无令其露女子叹曰嗟乎妾独与母居三十年自守贞明不愿从适何宜馈饭而与丈夫越亏礼仪妾不忍也子行矣子胥行反顾女子已自投於濑水矣於乎贞明执操其丈夫女哉】

皇唐叶有六圣再造八极镜照万方幽明咸熙天秩有礼自太【唐文粹无太字】古及今君君臣臣烈士贞女采其【唐文粹下多史传二字】名节尤彰可激清颓俗者皆扫地而祠之兰蒸椒浆岁祀罔缺而兹邑贞义女光灵翳然埋冥【唐文粹作名】古远琬琰不刻岂前修博达者为邦之意乎【六圣高祖太宗高宗中宗睿宗玄宗也再造八极谓玄宗平韦氏之难

而天下复定也楚辞九思三光朗兮镜万方书尧典庶绩咸熙孔安国传咸皆也熙广也皐陶谟天秩有礼自我五礼有庸哉正义云天次序爵命使有礼法谓使贱事贵卑承尊是天道使之然也人君当顺天意用我公侯伯子男五等之礼以故人君为政当奉用我公侯伯子男五等之礼接之使五者皆有常哉唐会要天宝七载五月十五日诏上古之君存诸氏号虽事先书契而道着皇王缅怀厥功宁王咸秩其三皇以前帝王宜於京城内共置一庙仍与三皇五帝庙相近以时致祭天皇氏地皇氏人皇氏有巢氏燧人氏其祭料及乐请准三皇五帝庙以春秋二时享祭历代帝王肇迹之处未有祠宇者所由郡置一庙享祭仍取当时将相德业可称者二人配享令郡县长官春秋二时择日粢盛蔬饌时果酒脯洁诚置祭其忠臣义士孝妇烈女史籍所载德行弥高者所在宜置祠宇量事致祭殷相传说等忠臣十六人吴泰伯等义士八人周太王妃太姜等孝妇七人周宣王齐姜等烈女十四人并令郡县长官春秋二时择日准前致祭礼记至敬不坛扫地而祭楚辞蕙肴蒸兮兰藉奠桂酒兮椒浆王逸注蕙肴以蕙草蒸肉也椒浆以椒置浆中也司马相如上林赋鼂采琬琰顔师古曰琬琰美玉也琬琰不刻谓未刊立碑石楚辞蹇吾法夫前修兮吕向注前修谓前代修习道德之人後汉书刘愷传景化前修有伯夷之节章怀太子注前修前贤也汉书陈汤少好书博达善属文琬音宛琰以冉切盐上声】贞义女者溧阳黄山里史氏之女也以家溧阳史阙书之岁三十弗移天於人【唐文粹作不移其志】清英洁白事母纯孝手柔荑而不龟身擊漂以自业【移天谓嫁也见六卷去妇词注诗国风手如柔荑毛传曰如荑之新生也庄子宋人有善谓不龟手之药者世以泝泝紬为事陆德明音释龟手司马云文拆如龟文也又云如龟挛缩也李云泝泝紬者擊漂於水上 荑音题龟音麇】当楚平王时平【文粹缺平字】王虐忠助谗苛虐厥政芟於尚斩於奢血流於朝赤族伍氏怨毒於人何其深哉【史记伍子胥者楚人也名员员父曰伍奢兄曰伍尚楚平王有太子名曰建使伍奢为太傅费无极少傅无极不忠於太子日夜言太子短於王曰自太子居城父将兵外交诸侯且欲入为乱平王乃召伍奢考问之伍奢知无极谗太子因曰王奈何以谗贼小臣疏骨肉之亲乎无极曰王今不制其事成矣王且见禽於是平王怒囚伍奢无极曰伍奢有二子皆贤不诛且为楚忧可以其父质而召之王使人召二子曰来吾免而父不来今杀奢也伍尚欲往员曰楚之召我兄弟非欲以生我父也恐有脱者後生患故以父为质诈召二子二子去则父子俱死不如奔他国借力以雪父之耻俱灭无为也伍尚曰我知往终不能全父命然恨父召我以求生而不往後不能雪耻终为天下笑耳谓员可去汝能报杀父之仇我将归死尚既就执使者捕伍胥伍胥贯弓执矢向使者使者不敢进伍员遂亡伍尚至楚楚并杀奢与尚也扬雄解嘲不知一跌将赤吾之族也顔师古注见诛杀者必流血故云赤族李善注赤谓诛灭也海録碎事古人谓空尽无物曰赤如赤地千里南史称其家赤贫是也赤族言尽杀无类也汉书注以为流血丹其族大谬】子胥始东奔勾吴月涉星遁或七日不火伤弓於飞逼迫於昭关匍匐於濞渚舍车而徒告穷此女目色以臆授之壶浆全人自沈形与口灭卓絶千古声凌浮云激节必报之讎雪诚无疑之地难乎哉【汉书太伯初奔荆蛮荆蛮归之号曰勾吴顔师古注勾音钩夷俗语之发声也亦犹越为於越也庄子孔子穷於陈蔡之间七日不火食史记伍胥奔吴到昭关昭关欲执之伍胥独身步走几不得脱索隐云昭关其关在西江乃吴楚之境江南通志昭关在和州含山县小岷西伍子胥自楚奔吴过此周易贲卦贲其趾含车而徒】借如曹娥潛波理贯於孝道聂姊殒肆槩动於天伦鲁姑弃子以却三军之衆漂母进饭没受千金之恩方之於此彼或易耳【会稽典録孝女曹娥者上虞人父盱能抚节按歌婆娑乐神汉安二年迎伍君神泝涛而上为水所掩不得其

尸娥年十四号慕思盱乃投瓜於江祝其父尸曰父在此瓜当沈旬有七日瓜偶沈遂自投於江而死县令度尚悲怜其意为之改葬命其弟子邯鄲子礼为之作碑史记聂政刺杀侠累因自皮面决眼自屠出肠遂以死韩取聂政屍暴於市购问莫知谁子於是韩购悬之有能言杀相侠累者予千金久之莫知也政姐荣闻人有刺杀韩相者贼不得国不知其名姓暴其尸而悬之千金乃於邑曰其是吾弟欬立起如韩之市而死者果政也伏屍哭极哀曰是軹深井里所谓聂政者也市行者诸衆人皆曰此人暴虐吾国相王悬购其姓名千金夫人不闻欬何敢来识之也荣应之曰闻之然政以妾尚在之故重自刑以絶从妾其奈何畏没身之诛终灭贤弟之名乃大呼天者三卒於邑悲哀而死政之旁晋楚齐卫闻之皆曰非独政能也乃其姊亦烈女也列女传鲁义姑姐者鲁野之妇人也齐攻鲁至郊望见一妇人抱一儿携一儿而行军且及之弃其所抱抱其所携而走山儿随而啼妇人遂行不顾齐将乃追之问所抱者谁也所弃者谁也对曰所抱者妾兄之子也所弃者妾之子也见军之至力不能两护故弃妾之子齐将曰子之於母其亲爱也痛甚於心今释之而反抱兄之子何也妇人曰已之子私爱也兄之子公义也夫背公义而向私爱亡兄子而存妾子幸而得全则鲁君不吾畜大夫不吾养庶民人不吾与也夫如是则胁肩无所容而累足无所履也子虽痛乎独谓义何故忍弃子而行义不能无义而视鲁国於是齐将按兵而止使人言於齐君曰鲁未可伐也乃至於境山泽之妇人耳犹知持节行义不以私害公而况於朝臣士大夫乎请还齐君许之鲁君闻之赐妇人束帛百端号曰义姑姐漂母事见六卷注】卒使伍君开张闔閭倾荡鄢郢吴师鞭屍於楚国申胥泣血於秦庭我亡尔存亦各壮志张英风於古今雪大愤於天地微此女之力虽云为之士焉能咆哮烜赫【唐文粹作虽云为忠孝之士亦焉能咆哮烜赫】施於後世也【文苑英华作耶开张闔閭谓开大吴君之霸业鄢楚之别都唐时为襄州之宜城县郢楚之正都唐时为荆州之江陵县二地相去约二百五十余里史记伍员与申包胥为交员之亡也谓包胥曰我必覆楚包胥曰我必存之及吴兵入郢伍子胥求昭王不得乃掘楚平王墓出其尸鞭之三百然後已於是申包胥走秦告急求救於秦秦不许包胥立於秦庭昼夜哭七日七夜不絶其声秦哀公怜之曰楚虽无道有臣若是可无存乎乃遣车五百乘救楚擊吴北山移文张英风於海甸韵会微非也】望其溺所怆然低徊而不能去每风号吴天月苦荆水响像如在精魂可悲惜其投金有泉而刻石无主哀哉【荆水荆溪也溧阳县志溧水在县西北一名濑水上承丹阳湖东流为宜兴县之荆溪下注於太湖旧名永阳江又曰中江吴越春秋子胥既破楚过溧阳濑水之上乃长叹息曰吾尝饥於此乞食於一女子女子饲我遂投水而亡将欲报以百金而不知其家乃投金水中而去有顷一老姬行哭而来人问曰何哭之悲姬曰吾有女子守志三十不嫁往年击绵於此遇一穷途君子而辄饭之恐事泄自投於濑水今闻伍君来不得其偿自伤虚死是故悲耳人曰子胥欲报百金不知其家投金水中而去矣老姬遂取金而归一统志投金濑在溧阳县西北四十里】邑宰荥阳郑公名晏家康成之学世子产之才琴清心闲百里大化有若主簿扶风窦嘉宾县尉广平宋陟丹阳李济南郡【诸集本皆作朝今从文苑英华唐文粹本作郡】陈然清河张昭皆有卿才霸略同事相协缅纪英淑勒铭道周虽陵颓海竭文或不死【按唐时荥阳郡即郑州属河南道扶风郡即岐州属关内道广平郡即洺州属河北道丹阳郡即润州属江南东道南郡即荆州属山南东道清河郡即贝州属河北道皆诸人之族望故冠於姓名之上而实非产於其地者也犹之太白生於蜀而自称陇西李白退之生於南阳而自称昌黎韩愈耳後汉书郑元字康成北海高密人通京氏易公羊春秋三统历九章算术周官礼记左氏春秋韩诗古文尚书史记子产者郑成公少子也为仁

爱人事君忠厚孔子尝遇郑与子产如兄弟云及闻子产死孔子为泣曰古之遗爱也唐时上县置尉二人而此之列名者四人岂一时之制稍有增益与左传晋卿不如楚其大夫则贤皆卿才也华阳国志陈登曰雄姿杰出有霸王之略吾敬刘元德骆宾王诗霸略今何在王宫尚岿然书洪范相协厥居孔颖达正义相助也协和也广韵缅远也勒刻也诗国风有杕之杜生於道周毛传曰周曲也 茱音蜚缅音免】其辞曰

粲粲贞女孤生寒门上无所天下报母恩春风三十花落无言乃如之人激漂清源碧流素手萦彼潺湲求思不可秉节而存伍胥东奔乞食於此女分壶浆灭口而死声动列国义形壮士入郢鞭屍还吴雪耻投金濞沚报德称美明明千秋如月在水【粲粲美洁貌上无所天言无父无夫也详六卷注广韵潺湲水流貌诗国风汉有游女不可求思史记李园陰养死士欲杀春申君以灭口】

天长节使【使字疑误】鄂州刺史韦公德政碑【并序 唐书地理志鄂州江夏郡隶江南西道胡三省通监注鄂州春秋夏汭之地江夏记云一名夏口一名鲁口吴始筑郡城晋末始立鄂州隋平陈改为鄂州因鄂渚为名】

太虚既张惟天之长所以白帝真人当高秋八月五日降西方之金精采天长为名将传之无穷纪圣诞之节也【孙绰游天台山赋太虚辽廓而无阙李善注太虚天也玉海实録元宗以垂拱元年八月五日生於东都开元十七年八月癸亥宴百寮於花萼楼下左相乾曜右相说上表曰少昊着流虹之感商汤本元鸟之命陛下二气合神九龙浴圣月惟仲秋日在端五长星不见之夜祥光照室之朝请以为千秋节着之甲令布之天下咸令宴乐羣臣以是日献甘露醇酎上万岁壽酒王公戚里进金镜绶带士庶以结承露囊相遗问村社作壽酒宴乐名为赛白帝报田祖至天宝七载八月己亥改为天长节】高祖创业太宗成之三后继统王猷如一大盗间起开元中兴力倍造化功包天地不然何能遏牺农之颓波返淳朴於太古虽轩后至道由闻蚩尤之师今网漏吞舟而胡夷起於穀下【三后谓高宗中宗睿宗张协七命王猷四塞函夏谧静李善注毛诗曰王犹允塞犹与猷同张铣注猷道也大盗指韦武诸贼臣以其谋危宗社故曰大盗史记五帝纪蚩尤作乱不用帝命於是黄帝乃徵师诸侯与蚩尤战於涿鹿之野遂命杀蚩尤酷吏传漏网於吞舟之鱼司马相如谏猎书是胡越起於穀下而羌夷接軫也李善文选注胡广汉官解故注曰穀下喻在輦轂之下京城之中也】先天文武孝感皇帝越在明两总戎扶风正帝车於北斗拯横流於鲸口回日辔於西山拂蒙尘於帝顔呼吸而收两京烜赫而安六合历列辟而罕匹顾将来而无俦太阳重轮合耀并出宇宙翕变草木增荣一麾而静妖氛成功不处五让而传剑玺德冠乐推【旧唐书至德三载正月戊寅上皇御宣政殿册皇帝尊号曰光天文武大圣孝感皇帝上以徽号中有大圣二字上表固让不允乾元二年春正月己巳朔上御含元殿受尊号曰乾元大圣光天文武孝感皇帝越与粤通发语声明两见二十二卷注总戎扶风见干一卷注甘氏星经北斗星谓之七政天之诸侯亦谓帝车第一名天枢第二名璇第三名玑第四名权第五名衡第六名闔阳第七名瑶光横流见十一卷注沈佺期诗魂魄游鬼门骸骨遗鲸口庾信歌回日辔动天关左传天子蒙尘於外敢不奔问官守班固典引德臣列辟功君百王章怀太子注列辟谓古之帝王也任昉宣德皇后令白羽一麾黄鸟底定李善注鬻子曰武王率兵车以伐纣纣虎旅百万陈於商郊起自黄鸟至

於赤斧三军之士靡不失色武王乃命太公把白旄以麾之纣军反走汉书袁盎曰陛下至代邸西向让天子者三南向让天子者再夫许由一让陛下五以天下让过许由四矣传剑玺见十一卷注肃宗克定两京迎上皇还京请归东宫及涕泣受传国玺详见十一卷注】於戏昔尧及舜禹皆无圣子审历数去已终大宝假人饰让以成千载之美未若以文明鸿业授之元良与天同休相统亿祀则我唐至公而无私越三圣而殊轨腾万人之喜气烂八极之祥云上皇思汾阳而高蹈解负重於吾君能事斯毕与人更始【尧舜无圣子文乃兼禹言之误也书大禹谟天之历数在汝躬蔡氏集传历数者帝王相继之次第犹岁时节气之先後周易圣人之大宝曰位鸿业大业也後汉书皇帝幼冲承统鸿业礼记一有元良万国以贞世子之谓也汉书曹褒传三五步骤优劣殊轨尚书大传卿云烂兮礼漫漫兮庄子尧治天下之民平海内之政往见四子藐姑射之山汾水之阳杳然丧其天下焉淮南子尧举天下而传之於舜若解重负然非直辞让诚无以为也汉书夫赦令者将与天下更始後汉书荡涤宿恶与人更始】乃展祀郊庙望秩山川方掩骼於河洛吊人於幽燕但诛元凶不问小罪噫大块之气歌炎汉之风云滂沱雨汪濊澡渥泽除瑕纇削平国步改号乾元至矣哉其雄图景命有如此者【韵会展诚也书舜典望秩於山川孔氏传诸侯境内名山大川如其秩次望祭之谓五岳牲礼视三公四渎视诸侯其余视伯子男蔡氏集传望而祭之故曰望秩者其牲币祝号之次第吕氏春秋掩骼薶髀高诱注白骨曰骼宋书志泉元凶少雪仇耻庄子大块噫气其名为风汉高祖大风歌见二十卷注司马相如难蜀父老文威武纷纭湛恩汪濊颜师古注汪濊深广也王僧孺谢除吏部郎启自遇休明多逢渥泽诗大雅国步斯频集传曰步犹运也江淹恨赋雄图既溢武力未毕诗大雅君子万年景命有仆 骼音格濊音穉音类】我邦伯韦公大彭之洪胤扶阳【郭本作杨】之贵族雄略迈古高文变风运当一贤才堪三事历职剖剧能声旁流振【繆本作衣】綉而白笔横冠分符而彤檐入境曩者永王以天人授钺东巡无名利剑承喉以胁从壮心坚守而不动房陵之俗安於太山休奕列郡去若始至帝召岐下深嘉直诚【邦伯谓刺史见六卷注唐书韦氏出自风姓颡顓孙大彭为夏诸侯少康之世封其别孙元哲於豕韦其地滑州韦城是也豕韦大彭迭为商伯周赧王时始失国徙居彭城以国为氏韦伯□二十四世孙孟为汉楚王傳去位徙居鲁国邹县孟四世孙贤汉丞相扶阳节侯又徙京兆杜陵晋书乐志载德奕世垂庆洪胤後汉书荀彧闻曹操有雄略甄鸾笑道论文始传云五百年一贤千年一圣三事三公也见十九卷注綉衣白笔御史事见十一卷注分符彤檐刺史事分符谓郡守得分虎符竹使符详五卷注彤檐见十四卷注天人见五卷注薛道衡高祖文皇帝颂授钺天人豁然清荡永王东巡事详後三十卷注艺文类聚摯虞新礼仪曰汉魏故事遣将出征符节郎授钺於朝堂新礼遣将御临轩尚书授节钺古兵书跪而推毂之义也唐六典凡大将出征皆告庙授斧钺唐书地理志山南东道有房州房陵郡汉书易於反掌安於泰山岐下岐山之下唐时为岐州扶风郡肃宗时改称凤翔郡未复京师以前驻蹕其地者凡八月吁音吁】移镇夏口救时艰也慎厥职康乃人减兵归农除害息暴大水灭郭洪霖注川人见忧於鱼鼈岸不辨於牛马公乃抗辞正色言於城隍曰若三【繆本作一】日雨不歇吾当伐乔木焚清祠精心感动其应如响无何中【郭本作巾】使衔命徧【繆本作常】祈名山广徵牲牢骤欲致祭公又吁衡而称曰今主上明圣怀於百灵此淫昏之鬼不载祀典若烦国礼是荒巫风其秉心达识皆此类也物不知化如登春台【杜氏通典鄂州吴时常为重镇历代亦为兵冲其地亦曰夏口亦曰鲁口曹毗霖雨诗洪霖弥旬日翳翳四区昏刘勰新论禹为匹夫未有功名尧深知之使治水焉使百川东注於海西被於流沙生人免为鱼鼈之患庄子秋水

时至百川灌河泾流之大两涘渚涯之间不辨牛马按城隍之祀莫详所自芜湖城隍相传建於吴赤乌二年则其来久矣南史梁邵陵王纶祭城隍神北史慕容俨镇郢城城中先有神祠一所号城隍神唐李阳冰缙云县城隍神记城隍神祀典无之惟吴越有尔风俗水旱疾疫必祷焉太平广记吴俗畏鬼每州县必有城隍神陆游云唐以来郡县皆祭城隍今世尤谨守令谒见仪在他神祠上社稷虽尊特以令式从事至祈禳报赛独城隍而已诗国风南有乔木毛传曰乔上竦也唐书肃宗尝不豫太卜建言崇在山川王屿遣女巫乘传分祷天下名山大川巫皆盛服中人护领此文所云中使衔命常祈名山即其事也汉书盱衡厉色孟康注眉上曰衡盱衡举目扬眉也左思魏都赋有睟其容乃盱衡而诰刘渊林注盱衡举眉大视也班固东都赋礼神祈怀百灵左传又用诸淫昏之鬼书伊训敢有恒舞於宫酣歌於室时谓巫风老子衆人熙熙如享太牢如登春台河上公注春陰阳交通万物咸动登台观之意志淫淫然也】有若江夏县令薛公揖四豪之风当百里之寄干蛊有立含章可贞遵之典礼恤疲於和乐政其成也臻於小康【江夏县鄂州附郭之县四豪见十二卷注易蛊卦初六干父之蛊坤卦六三含章可贞孔穎达正义云六三处下卦之极既居陰极能自降退不为事始惟内含章美之道待命乃行可以得正故曰含章可贞诗大雅迄可小康】中京重覩於汉仪列郡还闻於舜乐选鄂之胜帐於东门乃登豳歌击土鼓祀蓐收迎田祖招摇回而大火乃落闾阖启而凉风始归笙竽和龠之音象星辰而迭奏吴楚巴渝之曲各土风而备陈礼容有穆簪笏列序罗衣蛾眉立乎玳筵之上班剑虎士森乎翠幕之前千变百戏分曹贾勇藺【当作兰】子跳剑迭跃流星之辉都卢寻橦倒挂浮云之影百川绕郡落天镜於江城四山入牖照霜空之海色献觴醉於晚景舞袖纷於广庭【唐书地理志上都初曰京城天宝元年曰西京至德二载曰中京上元二年复曰西京选鄂之胜选择鄂城名胜之区也周礼龠章掌土鼓豳龠凡国祈年於田祖豳豳雅擊土鼓以乐田畯郑康成注杜子春云土鼓以瓦为匡以草为两面可擊也田祖始耕田者谓神农也豳雅七月也七月有于耜举趾饁彼南亩之事是以亦歌其类谓之雅者以其言男女之正蓐收司秋令之神见二卷注诗小雅琴瑟擊鼓以御田祖毛传曰田祖先嗇也正义曰郊特牲注云先嗇若神农春官龠章注云田祖始耕田者谓神农是也以祖者始也始教造田谓之田祖先为稼穡谓之先嗇神其农业谓之神农名殊而实同也郑康成礼记注招摇星在北斗杓端主指者正义曰招摇北斗七星也北斗居四方宿之中以斗末从十二月建而指之则四方宿不差大火心星也见五卷注闾阖西极之门见十九卷注礼月令孟秋之月凉风至荀子鼓似天钟似地磬似水竽箫箛龠似星辰日月鼗祝拊 枳 似万物隋书匏之属一曰笙一曰竽并女娲之所作也笙列管十九于匏内施簧而吹之竽大三十六管风俗通大笙谓之巢小笙谓之和郭璞尔雅注龠如笛三孔面短小广雅云七孔汉书乐志巴俞鼓员三十六人顔师古注巴巴人也俞俞人也当高祖初为汉王得巴俞人并趨捷善鬪与之定三秦灭楚因存其武乐巴俞之乐因此始也巴即今之巴州俞即今之渝州各其本地晋书汉高祖自蜀汉汉将定三秦闾中范因率賁人以从帝为前锋及定秦中封因为闾中侯复賁人七姓其俗喜舞高祖乐其猛锐数观其舞後使乐人习之闾中有渝水因其所居故名曰巴渝舞舞曲有矛渝本歌曲弩渝本歌曲安台本歌曲行辞本歌曲总四篇王融三月三日曲水诗序睟容有穆宾仪式序刘楨瓜赋布象牙之席薰玳瑁之筵班剑按文选注李善曰晋公卿礼秩曰诸公及开府位从公者给虎贲二十人持班剑焉汉官仪曰班剑者以虎皮饰之李周翰曰班剑本剑无刃假作剑形画之以文故曰班也文献通考班剑本汉朝服带剑晋易以木谓之象剑取装饰斑斓之义此一说也又文选注刘良曰班剑谓执剑而从行者也吕向曰班列

也言使勇士行列持剑以为仪仗也胡三省通监注班剑持剑为班立在车前也又曰班列也持剑成列夹道而行也以班为行列之义又一说也未知孰是虎士见八卷注潘岳籍田赋翠幕黻以云布分曹分为二曹以较优劣贾勇争先炫耀其技与左传贾勇之义微异列子宋有兰子者以技干宋元宋元召而使见其伎以双枝长倍其身属其胫并趋并驰弄七剑迭而跃之五剑常在空中元君大惊立赐金帛音释所谓兰子以技妄游者也旧唐书梁有长躡伎擲倒伎跳剑伎吞剑伎今并存张衡西京赋都卢寻橦汉书武帝幸四夷之客作巴俞都卢详见一卷大猎赋注初学记寻橦今之缘竿文献通考缘橦之技衆矣汉武帝时谓之都卢都卢国名其人体轻而善缘也渝音于贾音古橦音牀】鹤发之叟雁序而进曰恭闻天子无戏言恐转公以大用老父不畏死愿留公以上闻悦坐棠而飡风庶刻石以宾【繆本作真】美【庾信竹杖赋鹤发鸡皮蓬头历齿雁序犹雁行雁之飞也若有行列先後之序不相紊乱史记史佚曰天子无戏言言则史书之礼成之乐歌之风俗通召公当农桑之时重为所烦劳不舍乡亭止於棠树之下听讼决狱百姓各得其所壽百九十余乃卒後人思其德美爱其树而不敢伐诗甘棠之所作也隋书王贞传坐棠听讼事絶咏歌】白观乐入楚闻韶在齐采诸行謡遂作颂曰【左传吴公子札来聘请观於周乐说苑孔子至齐郭门之外遇一婴儿挈一壶相与俱行其视精其心正其行端孔子谓御曰趣驱之韶乐方作孔子至彼闻韶三月不知肉味鄂州本楚国之地故曰入楚因入楚而观乐亲见其美犹之在齐而闻韶二句乃流水对法或疑入楚为误者非也】

爽朗太白雄光下射峥嵘金天华岳旁连降精腾气赫矣昭然诞圣五日垂休万年孽胡挺灾大人有作雷霆发扬揜抢乃落九服交泰五云縈薄扫雪屯蒙洗清寥廓轩后访道来登峨嵋【郭本作娥眉】上皇西去异代同时六龙转驾两曜回规重遭唐主更覩汉仪肃肃韦公大邦之翰秀骨岳立英谋电断宣风树声远威逆乱不长不极乐奏争观丸剑挥霍鱼龙屈盘东回舞袖西笑长安颂声载路丰碑是刊【史记正义天官占云太白者西方金之精白帝之子王上公大将军之象也径一百里太白即金星也附日而行或行在日之先或行在日之後虽无定所而总之日行一度其光芒所射五星之中惟太白最为明朗金天见三卷注华岳见七卷注韵会说文方言楚部谓取物而逆曰挺一曰揉也增韵引也尔雅彗星为揜抢周礼乃辨九服之邦国方千里曰王畿其外方五百里曰侯服又其外方五百里曰甸服又其外方五百里曰男服又其外方五百里曰采服又其外方五百里曰卫服又其外方五百里曰蛮服又其外方五百里曰夷服又其外方五百里曰镇服又其外方五百里曰藩服周易天地交泰五云见七卷注屯蒙见十一卷注寥廓见一卷注抱朴子昔黄帝到峨嵋山见天真皇人於玉堂请问真一之道皇人曰子既君四海复欲求长生不亦贪乎六龙见八卷注复见汉官威仪见十一卷注诗大雅大邦维屏大宗维翰又曰维申及甫维周之翰毛传曰翰干也郑笺曰为周桡干之臣陆机诗吴实龙飞刘亦岳立周书英谋电发神旆风驰孙楚白起赞神机电断气济师然宋书树声列藩宣风铉德礼记教不可长乐不可极张衡西京赋跳丸剑之挥霍薛综注挥霍谓丸剑之形也张铄注跳弄也丸铃也挥霍铃剑上下貌汉书作巴俞都卢海中砀极曼衍鱼龙角抵之戏顔师古注鱼龙者为舍利之兽先戏於庭极毕乃入殿前激水化成比目鱼跳跃漱水作雾障日毕化为黄龙八丈出水敖戏於庭炫耀日光西京赋云海鳞变而成龙即为此色也西笑长安见十二卷注诗大雅厥声载路集传曰载满也徐陵孝义寺碑谨勒丰碑陈其舞咏挺音羶揜初衔切揜平声抢音撑】

比干碑【唐文粹载李翰所作殷太师比干碑即此篇也虽文句之间略有不同然异者只八十余字而已按唐书李翰传翰擢进士第调卫尉天宝末房琯韦陟俱荐为史官宰相不肯拟与此文所云天宝十祀余尉於卫极为脗合疑是太白代翰起草而翰窜改数字以上石者欤或谓翰亦以文鸣似无倩人代笔之理不知一行作吏簿书鞅掌之不遑代言视草势所不免如李卫公一品集序郑亚所作亦命李义山起草而自加更定者也又何疑於翰焉第其文质实疏达与集中诸作另成一格恐实出自翰手後之编辑者或误以李翰为李翰林遂尔采入集中耶巨眼者必能辨之】

太宗文皇帝既一海内明君臣之义贞观十九年征岛夷【唐文粹作东征岛夷】师次殷墟乃诏赠少师【文粹作乃下诏追赠殷少师】比干为太师諡曰忠烈公遣大臣持节吊祭【文粹作赠】申命郡县封墓葺祠置守冢【文粹多五家二字】以少牢时享着於甲令刻於金石故比干之忠益彰臣子得述其志【文粹作得以述其志也 岛夷高丽国也其地在东海之滨故曰岛夷左传命以康诰而封於殷墟杜预注殷墟朝歌也册府元龟贞观十九年二月庚戌舆驾发洛阳丁巳诏曰昔望诸列国之相汉主尚求其後夷吾霸者之臣魏君犹礼其墓况正直之道迈青松而孤絶忠勇之操掩白玉而振彩者哉殷故少师比干贞一表德邻几成性以明允之量属无妄之辰王马遽驰愍其邦之殄瘁宝衣将燎惜其君之覆亡其义不回怀忠蹈节谗言才发轻百龄之命淫刑既逞碎七尺之躯虽复周王封墓莫救焚如之祸孔圣称仁宁追剖心之痛朕自赵魏问罪辽碣途经麦秀之墟缅怀桑梓之地驻蹕而瞻荒陇愿以为臣抚躬而想幽泉思闻其谏岂可使慎终之义久阙於往册易名之典无闻於後代宜锡宠命以展宿心可追赠太师諡曰忠烈所司崇其墓而葺其祠州县春秋二时祀以少牢给随近五户以供洒扫帝自为文以祭之郑康成仪礼注礼将祭祀必先择牲繫於牢而刲之羊豕曰少牢汉书吴芮传着於甲令而称忠也顔师古注甲者令篇之次也又叙传着於甲令民用宁康】昔商王受毒痛於四海【文粹下多一德字】悖於三正肆厥淫虐下罔敢诤【文粹作谏】於是微子去之箕子囚之而公独死之【书泰誓今商王受弗敬上天降灾下民又云作威杀戮毒痛四海孔安国传痛病也史记今殷王纣乃用其妇人之言自絶於天毁坏其三正裴駰注马融曰动逆天地人也史记纣愈淫乱不止微子数谏不听乃与太师少师谋遂去比干曰为人臣者不得不以死争乃强谏纣怒曰吾闻圣人心有七窍剖比干观其心箕子惧乃佯狂为奴纣又囚之痛音铺】非夫捐生之难处死之难【文粹作非捐生之难处死之难非处死之难得死之难】故不可死而死【文粹下多一之字】是轻其生非孝也可死【文粹作得其死】而不死是重其死非忠也王曰【文粹作之】叔父亲其【文粹作莫】至焉国之元臣位莫崇焉亲【文粹作崇高二字】不可以观其危昵【文粹作亲昵二字】不可以忘其祖则我臣【文粹作成汤二字】之业将坠於泉商王之命将絶於天整扶其颠遂谏而死剖心非痛亡殷为痛【文粹作殷亡是痛】公之忠烈【文粹下多一也字】其若是焉【文粹作乎 楚辞章句比干纣之诸父也书泰誓自絶於天结怨於民】故能独立危邦横抗兴运周武以三分之业有诸侯之师实【文粹作资】其十乱之谋总其一心之衆【文粹少二其字】当公之存也乃【文粹作则】戢彼西土及公之丧也乃观乎【文粹作於】孟津公存而殷存公丧而殷丧兴亡两【郭本作而文粹作所】系岂不重与【史记文王伐崇密须犬夷大作丰邑天下三分其二归周十乱见二十六卷注书泰誓受有臣亿万惟亿万心予有臣三千惟一心孔安国传三千一心言同欲也又泰誓西土有衆咸听朕言孔安国传武王在

西故称西土史记武王渡河诸侯不期而会孟津者八百诸侯皆曰纣可伐矣武王曰女未知天命未可也乃还师归居二年闻纣昏乱暴虐滋甚杀王子比干囚箕子於是武王徧告诸侯曰殷有重罪不可以不毕伐遂率戎车三百乘虎贲三千人甲士四万五千人以东伐纣十一年十二月戊午师毕渡孟津孔安国尚书传武王三年服毕观兵孟津以卜诸侯伐纣之心】且圣人立教惩恶劝善而已矣人伦大统父子君臣而已矣少师存则垂【文粹作正】其统歿则垂其教奋乎千古之上行乎百王之末俾夫淫者惧佞者慙义【文粹作睿】者思忠者劝其为戒【文粹作式】也不亦大哉而【文粹缺而字】夫子称殷有三仁是【文粹缺是字】岂无微旨尝敢颐【文粹作论】之曰存其身存其宗亦仁矣存其名【一作身】存其祀亦仁矣亡其身图其国亦仁矣【文粹作存其身存其祀亦仁也亡其身存其国亦仁也缺中间九字】若进死者退生者狂狷之士将奔走之【文粹作焉】褒生者贬死者宴安之人将寘力焉故同归诸仁各顺其志殊涂而一揆异行而齐致俾後【文粹多之字】人优柔而自得焉盖春秋微婉之义【杜预春秋左传序将令学者原始要终寻其枝叶究其所穷优而柔之使自得之賡而饫之使自趋之左传春秋之称微而显婉而辨杜预注文微而义着辞婉而旨别寘与置同】必将建皇极立彝伦辟在三之门【文粹作弥在三之规】垂不二之训以明知於世【文粹作以昭於世】则夫人臣者既移孝於亲而致之於君焉有闻亲失而不诤【文粹下多一覩字】亲危而不救从容安地而自得甚哉不然矣【文粹作从容安地而称得理是不然矣书洪范建用皇极孔安国传皇大也极中也凡立事当用大中之道正义云施政教治下民当使大得其中无有邪僻也又曰彝伦攸叙集传曰彝常伦理也所谓秉彝人伦也国语民生於三事之如一父生之师教之君食之非父不生非食不长非教不知生之族也故一事之韦昭曰三君父师也如一服勤至死也抱朴子民生在三奉之如一史记王蠋曰忠臣不闻二君贞女不更二夫】夫孝於其亲人之亲皆欲其子忠於其主人之主皆欲其臣【文粹作孝於其亲者人之亲皆愿其为子忠於其君者人之君皆欲其为臣】故历代帝王皆欲精显【文粹作莫不欲旌显】周武下车而封其墓魏武【文粹作氏琦按当作文】南迁而创其祠我太宗有天下禮百神【文粹多一而字】盛其礼追赠太师諡曰忠烈申命郡县封坟【文粹作墓】葺祠置守冢五家以少牢时享着於甲令刻於金石於戏哀伤列辟主君封德【文粹作主食旧封】正与神明秩视郡王【文粹作德为神明秩视羣望】身灭而荣【文粹作名】益大世絶而祀愈长然後知忠烈之道激天感人【文粹作感激天人】深矣【礼记武王克殷反商下车封王子比干之墓郑康成注积土为封封比干墓崇贤也史记命閼夭封比干之墓正义曰封谓益其土及画疆界括地志云比干墓在卫州汲县北十里二百五十步水经注牧野有殷大夫比干冢前有石铭题隶云殷大夫比干之墓所记惟此今已中折不知谁所志也太和中高祖孝文皇帝南巡亲幸其坟而加吊焉刊石树碑列於墓隧墨庄漫錄比干墓在卫州西山去城数十里有汉唐以来碑刻甚多墓周围数里生异木樛结不可入河南通志殷太师庙在卫辉府城北十五里祀殷太师比干魏文帝建唐贞观中修葺北史魏孝文迁洛路由朝歌见殷比干墓怆然悼怀为文以吊之据二书所云乃魏文帝也文言魏武恐误韦氏国语解洁祀曰禮列辟见前篇注】天宝十祀余尉於卫拜首【文粹作手】祠堂魄感精动而庙在邻邑官非式闕【文粹作刊】石铭表以志丕烈【翰官於卫县而比干庙在汲县故曰邻邑周书式商容闕孔穎达正义式者车上之横木男子立乘有所敬则俯而凭式遂以式为敬名说文云闕族居里门也武王过其闕而式之言此内有贤人式之礼贤也】铭【文粹作词】曰

靡軀非仁蹈難非智死於其死然後為義忠無二軀【文粹作體】烈有餘氣正直聰明至今猛【文粹作猶】視咨爾來代為臣不易【盧諲贈劉琨詩序意氣之間靡軀不悔李善注說文曰靡爛也靡與糜古字通東方朔七諫子胥諫而靡軀兮】

武昌宰韓君去思頌碑【并序 新唐書韓愈傳七世祖茂有功於後魏封安定王父仲卿為武昌令有美政既去縣人刻石頌德終秘書郎則韓君乃昌黎公之父也】

仲尼大聖也宰中都而四方取則子賤大賢也宰單父人到於今而思之乃知德之休明不在位之高下其或繼之者得非韓君乎【史記孔子為中都宰一年四方皆則之家語孔子弟子有宓子賤者仕於魯為單父宰得行其政於是單父治焉躬敦厚明親親尚篤敬施至仁加惠誠致忠信百姓化之 單父音善甫】君名仲卿南陽人也昔延陵知晉國之政必分於韓獻子雖不能遏屠岸之誅存孤嗣趙【郭本作起】太史公稱天下陰德也其賢才羅生列侯十世不亦宜哉【南陽郡即鄧州也唐時屬山南東道新唐書韓氏出自姬姓晉穆侯少子曲沃桓叔成師生武子萬食采韓原生定伯定伯生子與子與生獻子厥從封遂為韓氏史記晉世家吳延陵季子來使與趙文子韓宣子魏獻子語曰晉國之政卒歸此三家矣又韓世家晉景公之三年司寇屠岸賈將作亂誅靈公之賊趙盾盾已死矣欲誅其子趙朔韓厥止賈賈不聽厥告趙朔令亡朔曰子必能不絕趙祀死不恨矣韓厥許之及賈誅趙氏厥稱疾不出程嬰公孫杵臼之藏趙孤趙武也厥知之景公十一年晉作六卿而韓厥在一卿之位號為獻子景公十七年疾卜大業之後不遂者為崇韓厥稱趙成季之功今後無祀以感景公景公問曰尚有世乎厥於是言趙武而復與故趙氏田邑續趙氏祀太史公曰韓厥之感晉景公紹趙孤之子武以成程嬰公孫杵臼之義此天下之陰德也韓氏之功於晉未覩其大者也然與趙魏終為諸侯十餘世宜乎哉琦按全趙孤者韓獻子厥也延陵季子所稱者韓宣子起也今太白似作一人用疑誤】七代祖茂後魏尚書令安定王五代祖鈞金部尚書曾祖峻銀青光祿大夫雅州刺史祖泰曹州司馬考睿素朝散大夫桂州都督府長史分茅納言剖符佐郡奕叶【郭本作業】明德休有烈光君乃長史之元子也【北史韓茂字元兴安定安武人為武賁郎將錄前後功拜散騎常侍殿中尚書進爵安定公文成踐祚拜尚書令加侍中征南大將軍卒贈安定王長子備襲爵安定公備弟均字天德初為中散賜爵范陽子遷金部尚書兄備卒均襲爵安定公征南大將軍歷定青冀三州刺史除大將軍廣阿鎮大將加都督三州諸軍事復授定州刺史按此則鈞字是均字之誤但均乃茂之子非茂之孫與七代五代之文不合而唐書宰相世系表亦以為茂生二子備均均生峻峻生仁泰仁泰生叡素則疑文之誤也唐書之誤又因此文之誤而誤欤李翱韓文公行狀曾祖泰皇任曹州司馬祖濬素皇任桂州長史父仲卿皇任秘書郎皇甫湜韓文公神道碑曾祖叡素為唐桂州長史善化行於江嶺之間通典魏尚書有金部郎其後歷代多有之北齊金部主才量尺度內外諸庫藏文帳唐書百官志文散階從三品曰銀青光祿大夫從五品下曰朝散大夫雅州盧山郡屬劍南道曹州濟陰郡屬河南道桂州始安郡屬嶺南道分茅見十五卷注漢書龍作納言出入帝命應劭注納言如今尚書官王之喉舌也北堂書鈔尚書唐虞官也唐虞曰納言周官為內史大唐新語尚書古之納言潘岳馬汧督誅剖符專城紆青拖墨之司李善注東觀漢紀韋彪上議曰二千石皆以選出京師剖符典千里張銑注剖符謂剖竹分符猶今之印也分茅謂加王爵納言謂為尚書剖符謂為刺史長史佐郡謂為司馬詩周頌儔革有鵠休有烈光魯頌建爾元子俾侯於魯毛傳曰元首

也 唆音俊】妣有吴【郭本作吾】钱氏及长史即世夫人早孀弘圣善之规成名四子文伯孟轲二母之俦欵【诗国风母氏圣善列女传鲁季敬姜者鲁大夫公父穆伯之妻文伯之母也博达知礼穆伯先死敬姜守养文伯出学而还归敬姜侧目而盼之见其友上堂从後阶降而却行奉剑而正履若事父兄文伯自以为成人矣敬姜召而数之曰以子年之少而位之卑所与游者皆为服役子之不益亦以明矣文伯乃谢罪於是乃择严师贤友而事之所与游处者皆黄髻倪齿也文伯引衽攘卷而亲馈之敬姜曰子成人矣君子谓敬姜备於教化又曰邹孟轲之母也号孟母孟子既学而归孟母方绩问曰学所至矣孟子曰自若也孟母以刀断其机孟子惧而问其故孟母曰子之废学若吾断斯织也夫君子学以立名问以广知是以居则安宁动则远害今而废之是不免於厮役而无以离於祸患也何以异於织绩而食中道废而不为宁能衣其夫子而长不乏粮食哉女则废其所食男则堕於修德不为窃盗则为虏役矣孟子惧旦夕勤学不息师事子思遂成天下之名儒君子谓孟母知为人母之道矣】少卿当涂县丞感槩重诺死节於义云卿文章冠世拜监察御史朝廷呼为子房绅卿尉高邮才名振耀幼负美誉【皇甫湜韩文公神道碑叔父云卿当肃宗代宗朝独为文章冠李翱韩君夫人韦氏墓志铭礼部郎中云卿好立义节有大功於昭陵其文章出於时而官不甚高韩愈科斗书後记愈叔父当大历世文辞独行中朝天下之欲铭述其先功行取信於来世者咸归韩氏昌黎集注韩云卿上元辛丑特进试鸿胪卿兼御史中丞仕终礼部侍郎唐书百官志御史台有监察御史十五人正八品下韩愈虢州司户韩府君墓志铭安定桓王五世孙叡素为桂州长史化行南方有子四人最季曰绅卿文而能言尝为扬州录事参军事故宰相崔圆圆狎爱州民丁某至顾省其家後大衙会日司录君趋以前大言曰公与小民狎至至其家害於政圆惊谢曰录事言是圆实过乃自署罚五十万钱由是迁涇阳令破豪家水碾利名田顷凡百万琦按此文本颂韩公德政而兼及其诸弟盖因上文成名四子而叙其事以实之也又此文序其凡弟少长名讳皆与昌黎集合乃唐书宰相世系表以叡素生七子无少卿而有晋卿季卿子卿升卿与此大异夫以欧阳公所修之史表而与其家传不能无误缪信史盖难言矣唐时淮南道有高邮县隶扬州广陵郡】君自潞州铜鞮尉调补武昌令未下车人惧之既下车人悦之惠如春风三月大化奸吏束手豪宗侧目有?玉者三江之巨横【此下似有缺文】白额且去清琴高张兼操刀永兴二邑同化【唐时河东道有铜鞮县隶潞州上党郡江南西道有武昌县有永兴县俱隶鄂州江夏郡吴録陆稠为广陵太守奸吏斂手广陵谚曰解结理烦我国陆君後汉书廉范传汉兴以廉氏豪宗自苦径徙焉史记郅都行法不避贵戚列侯宗室见都侧目而视号曰苍鹰?玉盖当时盗贼之名为横於江上者白额虎也见一卷注清琴高张用子贱事见二十卷注操刀用子产事见九卷注鞮音低】时啗齿磨牙而【当作於】两京宋城易子而炊骨吴楚转输苍生熬然而此邦晏如襁负云集居未二载户口三倍其初铜铁曾青未择地而出太【当作大】冶鼓铸如天降神既烹且烁数盈万亿公私其赖之官絶请托之求吏无?毫之犯【扬雄长杨赋昔有强秦封豕其土窳窳其民啗齿之徒相与磨牙而争之应劭曰淮南子云尧之时窳窳封豨啗齿皆为民害啗齿齿长五尺食人李奇曰以喻秦贪婪残食其民也此以喻禄山陷两京而肆暴也史记楚庄王围宋五月城中食尽易子而食析骸而炊按春秋时宋国在唐时为宋州睢阳郡当至德二载三月贼将尹子奇围睢阳至五月始退去七月复围睢阳张巡许远据城死守至十月救兵不至城遂陷先是城中食尽士卒食茶纸茶纸既尽遂食马马尽罗雀掘鼠鼠雀又尽括城中妇人食之继以男子老弱人知必死莫有叛者所谓宋城易子炊骨正指其事汉书夫敖仓天下转输久矣曹植求自试表方今天下

一统九州晏如三国志注博物记曰襁织缕为之广八寸长丈二以约小儿於背上负之而行习凿齿文故能德音悦畅襁负云集唐书地理志永兴县有铜有铁武昌县有银有铜有铁太平御览本草经曰曾青出蜀郡名山其山有铜者曾青出其阳曾青者铜之精能化金银庄子今大冶铸金大冶谓鼓铸之所】本道采访大使皇甫公侁闻而贤之擢佐輶轩多所弘益尚书右丞崔公禹称之於朝相国崔公涣特奏授鄱阳令兼摄数县所谓投刃而皆虚为其政而则理成去若始至人多怀恩【本道谓江南西道册府元龟开元中始置节度使其後又置诸道采访使皆以刺史为之节度使以司戎事采访使以听民政輶轩使车也见九卷注唐书百官志尚书省有右丞一人正四品下唐时江南西道有鄱阳县隶饶州鄱阳郡孙绰天台赋投刃皆虚目无全牛李周翰注庖丁解牛三年之後所见皆非全牛已见其骨节但以神为不以目视而投刃皆虚为其政句似有缺文 侁音华】新宰王公名庭璘岩【郭本作严】然太华浼然洪河含章可贞干蛊有立接武比德弦歌连声服美前政闻诸耆老与邑中贤者胡思泰一十五人及诸寮吏式歌且舞愿扬韩公之遗美【岩然太华喻其高峻如华岳浼然洪河喻其广大如黄河韵会浼浼水流平貌诗河水浼浼含章干蛊已见本卷注礼记堂上接武郑康成注武迹也孔丛子昔者虢叔闕天太颠散宜生南宫适五臣同寮比德以赞文武诗小雅虽无德与女式歌且舞 浼音美】白采謡刻石而作颂曰

峨峨楚山浩浩汉水黄金之车大吴天子武昌鼎据实为帝里时囍世讹薄俗如毁韩君作宰抚兹遗人滂汪【缪本作注】王泽犹鸿得春和风潜畅惠化如神刻石万古永思清尘【通典鄂州自春秋以来皆属楚有江汉二水在州西合秦属南郡汉高祖置江夏郡吴分江夏更置武昌郡孙权尝都之孙皓又徙都之常为重镇三国志孙权传黄龙元年春公卿百司皆劝权正尊号夏四月丙申即皇帝位大赦改年初兴平中吴中童謡曰黄金车班兰耳开阊门出天子薄俗如毁谓如火之焚坏而贫薄也诗国风王室如毁惠化见九卷注 囍与艰同】

虞城县令李公去思颂碑【并序 虞城县唐时隶河南道之宋州睢阳郡金石録唐虞城令李公去思颂李白撰王遹书碑侧题云元和四年二月重篆盖遹不与白同时此碑後来始建欧阳集古録云遹在阳水前者误也按此则此碑宋未南渡以前犹存】

王者立国君人聚散六合咸土以百里雷其威声革【缪本作华】其俗而风之渔其人而涵之其犹衆鲜洋洋乐化在水波而动之则忧頽尾之刺作焉徐而清之则安颀首之颂兴焉苟非大贤孰可育物而能光昭弦歌卓立振古则有虞城宰公焉【赵岐孟子注诸侯方百里象雷震也艺文类聚论语?曰雷震百里声相附近宋均注曰雷动百里故因以制国也雷声谓诸侯之政教所至相附近也诗国风鲋鱼頽尾毛传曰赭赤也鱼劳则尾赤正义曰言鲋鱼劳则尾赤以兴君子苦则容悴诗小雅鱼在在藻有頍其首毛传曰頍大首貌郑笺曰鱼之依水草犹人之依明王也鱼处於藻既得其性则肥充其首頍然诗周颂振古如兹毛传曰振自也 頍音称頍音焚】公名锡字元勲陇西成纪人也高祖楷隋上大将军縣益原三州刺史封汝阳公曾祖腾云皇朝广茂二州都督广武伯祖立节起家韩王府记室参军袭广武伯父浦郢海淄唐陈五州刺史鲁郡都督广平太守袭广武伯皆纳忠王庭名镂钟鼎侯伯继迹故可略而言焉【唐时成纪县属秦州天水郡不属渭州陇西郡此云陇西成纪盖叙族望本古郡县而言也按隋书百官志上大将军高祖所置其位在柱国之下大将军之上盖散爵也所以酬功

臣者隋时絳州益州皆在蜀地原州在秦地汝阳县名蔡州汝南郡所统唐时广州南海郡隶岭南道设中都督府有都督一人正三品茂州通化郡隶剑南道设下都督府有都督一人从三品广武县名陇右道兰州所属乾元二年更名金城唐书百官志王府官有记室参军事二人掌表启书疏郢州富水郡隶山南东道海州东海郡淄州淄川郡皆隶河南道唐州淮安郡隶山南东道陈州淮阳郡隶河南道鲁郡即兖州隶河南道设上都督府有都督一人从二品广平郡即洺州隶河北道】公即广武伯之元子也年十九拜北海壽光尉心不挂细务口不言人非羣吏罕测望风敬惮【壽光县唐时隶河南道之青州北海郡】秩满转右武卫仓曹参军次任赵郡昭庆县令奉诏修建初启运二陵总徒五郡支用三万贯举筑雷野不鞭一人功成余八千贯其干能之声大振乎齐赵矣时名卿巡按陵有黄赤气上冲太微散为庆云数千处盖精勤动天地也如此因粉图奏名编入国史【唐书百官志左右武卫有仓曹参军事各二人正八品下元和郡县志河北道赵州有昭庆县东北至州九十里隋为大陆县武德四年改为象城县天宝元年改为昭庆县皇十三代祖宣皇帝建初陵高四丈周回八十步皇十二代祖光皇帝启运陵高四丈周回六十步二陵共茔周回一百五十六步在县西南二十里唐会要献祖宣皇帝葬赵州昭庆县界仪凤二年五月一日追封为建昌陵开元二十八年七月十八日诏改为建初陵懿祖光皇帝葬赵州昭庆县仪凤二年五月一日追封为延光陵开元二十八年七月十八日诏改为启运陵後汉书光武纪长穀雷野高锋彗云章怀太子注雷野言其声盛也太微垣十星见一卷注汉书若烟非烟若云非云郁郁纷纷萧索轮囷是为庆云庆云见喜气也】天宝四载拜虞城令而天章宠荣俾金玉王度炯【繆本作罔】若七曜昭回堂隅於戏敬之哉【左传思我王度式如玉式如金谷梁传疏七曜者日月五星皆照天下故谓之七曜】宸威【郭本作灭】临顾作训以理其俗鲁而木舒而徐急则狼【繆本作狠】戾缓则鸟散公酌以钧【繆本作钧】道和之琴心於是安四人敷五教处必粝食行惟单车观其约而吏俭仰其敬而俗让激直士之素节扬廉夫之清波三月政成邻境【郭本作坟】取则【史记夫赵王之狼戾无亲大王之所明见汉书夫匈奴兽聚而鸟散从之如博影此言其风俗之敝事急则狼戾无相亲之意事缓则鸟散无相顾之意说苑宓子贱为单父宰过於阳昼阳昼曰吾少也贱不知治民之术有钧道二请以送子王俭褚渊碑文参以酒德间以琴心此文借用其字垂钓鼓琴皆能令人心静承上文缓急之事而言其当静以治之也四人即四民士农工商也尚书汝作司徒敬敷五教孔安国传布五常之教也广韵粝麤也米不精也北史裴邃之任正平也以廉约自守每行春省俗单车而已粝音赖又音厉】因行春见枯骸於路隅惻然疚怀出俸而葬由是百里掩骼【繆本作骸】四封归仁有居丧行号城市者习以成俗公勗之亲邻厄以凶事而鰥寡惸独衆所赖焉可谓变其颓风永锡尔类【後汉书郑弘传太守第五伦行春见而深奇之章怀太子注太守常以春行所主县劝人农桑振救乏絶见续汉志月令孟春之月掩骼埋胔郑康成注骨枯曰骼左传我有四封而诘其盗三国志注晋阳秋曰足以镇静颓风轨训器俗诗大雅孝子不匮永锡尔类郑笺曰永长也孝子之行非有竭极之时长以与汝之族类谓广之以教导天下也 骼音格】先时邑中有聚党横猾者实惟二耿之族几百家焉公训为纯人易其里曰大忠【当作中】正之里北境黎丘之古鬼焉或醉父以刃其子自公到职蔑闻为灾【太平寰宇记黎丘在虞城县北二十里高二丈吕氏春秋梁北有黎丘部有奇鬼焉善效人之子侄昆弟之状邑丈人有之市而醉归者黎丘之鬼效其子之状扶而道苦之丈人归酒醒而诮其子曰吾为汝父也岂谓不慈哉我醉汝道苦我何故其子泣而触地曰孽矣无此事也昔也往责於东邑人可问也其父信之曰嘻是必

夫奇鬼也我固尝闻之矣明日端复饮於市欲遇而刺杀之明旦之市而醉其真子恐其父之不能反也遂逝迎之丈人望见其真子拔剑而刺之丈人智惑於其似子者而杀其真子按此事在战国时引此以颂德政近乎戏言岂唐时此鬼复作欤】官宅旧井水清而味苦公下车尝之莞尔而笑曰既苦且清足以符吾志也遂汲用不改变为甘泉【河南通志李令泉在虞城县治内县令李锡有清操李白撰锡去思颂载其事後因以名韵会莞小笑貌 莞音缓】蠡【繆本作蠡即蠡字省文】丘馆东有三柳焉公往来憩之饮水则去行路勿剪比於甘棠乡人因树而书颂四十有六篇【史记召公之治西方甚得兆民和召公巡行乡邑有棠树决狱政事其下自侯伯至庶人各得其所无失职者召公卒而民人思召公之政怀棠树不敢伐歌咏之作甘棠之诗诗曰蔽芾甘棠勿剪勿伐召伯所茇 蠡音离又音里】惟公志气塞乎天地德音发乎声容缟乎若寒崖之霜湛乎若清川之月弹恶雪善速若箭飞尤能笔工新文口吐雅论天下美士多从之游非汝阳三公三【郭本作二】伯之积德则何以生此邑之贤老刘楚瓌等乃相谓曰我李公以神明之化大赖於虞人虞人陶然歌咏其德官则敬去则思山川鬼神犹怀之况於人乎乃咨羣寮兴去思之颂县丞王彦暹员外丞魏陟主簿李诜县尉李向赵济卢荣等同德比义好谋而成相与采其瓌踪茂行俾刻石篆美庶清风令名奋乎百世之上【广韵赖利也善也扬雄甘泉赋乃命羣寮历吉日後汉书李膺请孔融问曰高明祖父尝与仆有恩旧乎融曰先君孔子与君先人李老君同德比义而相师友 缟音稿湛涣上声瓌音规诜音辛】其词曰

激扬之水兮白石有凿李公之来兮雪虞人之恶厥德孔昭折狱既清五教大行殷云雷之声既父其父又子其子春之以风化成草靡乃影我冈乃雨我田阳无骄???【繆本作???】四载有年人戴公之贤犹百里之天弃余往矣茫如坠川哀丧惠博掩骼仁深苦井变甘凶人易心三柳勿剪永思清音【诗国风扬之水白石凿凿毛传曰凿凿鲜明貌郑笺曰激扬之水波流湍疾洗去垢浊白石凿凿然兴者喻桓叔盛强除民所恶民得以有礼义也韵会雪除也洗也诗小雅我有嘉宾德音孔昭郑笺曰孔甚也昭明也说苑吾不能以春风风人陆贾新语上之化下犹风之靡草潘岳闲居赋训若风行应如草靡诗大雅既景乃冈郑笺曰以日景定其经界於山之脊】

为窦氏小师祭璿和尚文【释氏要览受戒十夏以前西天皆称小师毘奈耶云难陀比丘呼十七衆比丘为小师此盖轻呼之也亦通沙门之谦称也梵言乌波遮迦于阗国翻为和尚华言力生即亲教师也谓出家者因师之力生长法身出功德财养智慧命 璿音旋】

年月日某谨以斋蔬之奠敢昭告於和尚之灵伏惟和尚降灵自天依化游世角立独出嶷然生知凤凰开九苞【繆本作包二字通用】之翼豫章横万顷之陂始传灯而纳照因落发以从师迈龙象以蹴踏为天人之羽仪绍释风於西域回佛日於东维若大块之噫气鼓和风而一吹热恼清洒道芽荣滋走吴楚以宗仰将扫地而归之【後汉书徐穉传爰自江南单薄之域而角立杰出章怀太子注角立如角之特立也诗大雅克岐克嶷毛传曰岐知意也嶷识也正义曰岐为有智之意嶷为有识之貌九苞见三卷注神异经东方荒外有豫章焉此树主九州其高千丈围百尺本上三百文始有枝条敷张如帐上有元狐黑猿枝主一州南北并列面向西南有九力士操斧伐之以占九州吉凶斫之复生其州有福创者州伯有病积岁不复者

其州灭亡释家师弟子以佛法通相传受继续不絕如以灯通相燃点光明常在终不熄灭故谓之传灯迈者勇往力行之意维摩诘经十方无量菩萨或有人从乞手足耳鼻头目脑髓血肉皮骨聚落城邑妻子奴婢象马车乘金银琉璃砗磲玛瑙珊瑚琥珀真珠珂贝衣服饮食如此乞者多是住不可思议解脱菩萨以方便力而往试之令其坚固所以者何住不可思议解脱菩萨有威德力故行逼迫示诸衆生如是难事凡夫下劣无有力势不能如是逼迫菩萨譬如龙象蹴蹋非驴所堪是名住不可思议解脱菩萨智慧方便之门释者梵语具云释迦此云能仁佛之性也凡出家者皆以释为姓阿含经云四河入海同一盐味四姓出家皆名为释是也梁简文帝大法颂佛日出世同遣惑霜隋书李士谦传客问三教优劣士谦曰佛曰也道月也儒五星也韵会维方隅也庄子大块噫气其名为岚法苑珠林愿我出大风微密满虚空诸有热恼处扇之以清凉嵇康琴赋乐百卉之荣滋韵会滋益也蕃也荣滋犹荣茂也○疑音逆】呜呼来无所从去复何适水还火归萧散本宅宝舟辍棹禅月掩魄痛一往而无踪怆双林之变白【谢灵运逸民赋来无所从去无所至圆觉经我今此身四大和合所谓毛发齿皮肉筋骨脑垢色皆归於地吐涕浓血津液涎沫痰泪精气大小便利皆归於水暖气归火动转归风四大各离今者妄身当在何处陶渊明自祭文陶子将辞逆旅之馆永归於本宅涅槃经如来应正徧知乘大涅槃大乘宝船周旋往返济度衆生王僧孺礼佛文鹜法轮於长路棹宝舟於遥壑尚书正义魄者形也谓月之轮郭无光之处名魄也朔後明生而魄死望後明死而魄生律历志云死魄朔也生魄望也涅槃经佛在拘尸那城力士生地阿利罗跋提河边娑罗双树间二月十五日临涅槃时尔时拘尸那城娑罗树林其林变白犹如白鹤後分曰娑罗树林四双八只西方一双在如来前东方一双在如来後北方一双在佛之首南方一双在佛之足尔时世尊娑罗林下寝卧宝牀於其中夜入第四禅寂然无声於是时顷便盘涅槃其娑罗林东西二双合为一树南北二双合为一树垂覆宝牀盖於如来其树即时惨然变白犹如白鹤枝叶华果皮干悉皆爆裂堕落渐渐枯悴摧折无余】某早承训诲偏荷恩慈忝餐风於法侶旋落?【郭本作陰】於禅枝号无辍响泣有余悲手撰茗药精诚严思冀神道之昭格庶明灵而飨之【谢灵运庐山慧远法师诔同法餐风栖运道门洛阳伽蓝记名僧德种负锡为羣信徒法侶持花成藪庾信碑禅枝四静慧窟三明广韵撰持也】

为宋中丞祭九江文【汉书地理志禹贡九江在寻阳南皆东合为大江应劭曰江自庐江寻阳分为九水经注刘歆云湖汉等九水入彭蠡故言九江矣】

谨以三牲之奠敬祭於长源公之灵【按旧唐书天宝六载封河渚为灵源公济渚为清源公江渚为广源公淮渚为长源公今祭江神而曰长源公盖字之误也】惟神包括乾坤平准天地划三峡以中断流九道以争奔纲纪南维朝宗东海牲玉有礼祀典无亏【三峡见八卷注九道见十四卷注纲纪南维为南方衆流之纲纪也朝宗东海见二十二卷注玉告神时荐於座之玉器与牲币俱陈者】今万乘蒙尘五陵惨黷【当作塹黷郭本作惨黷尤非】苍生悉为白骨赤血流於紫宫宇宙倒悬揜抢未灭含识结愤思剪元凶【左传天子蒙尘於外敢不奔问官守五陵谓高祖太宗高宗中宗睿宗五帝陵寝详见八卷注陆机汉高祖功臣颂茫茫宇宙上塹下黷李善注天以清为常地以静为本今上塹下黷言乱常也塹不清澄之貌也黷黷也李周翰注塹垢也黷浊也庾信哀江南赋溃溃沸腾茫茫塹黷尔雅彗星为欃枪梁武帝孝思赋彼含识而异见同有色而殊形高允贞妇咏结愤捶心甘就幽冥塹楚锦切参上声揜

初銜切挿平声抢音撑与櫂枪同】若思【郭本作而况】参列雄藩各当重寄遵奉王【繆本作天】命大举天兵照海色於旌旗肃军威於原野而洪涛渤潏狂飈振惊【北史宿当重寄早预心膂天兵见三卷注渤潏水沸涌貌见二十二卷注狂飈狂暴之风】惟神使阳侯卷波羲和奉命楼船先济士马无虞扫妖孽於幽燕斩鲸鲵於河洛惟神佑我降休於民敬陈精诚庶垂歆飡【高诱淮南子注阳侯陵阳国侯也溺死於水其神能为大波有所伤害因谓之阳侯之波也羲和日御也与江水无涉恐误楼船见四卷注鲸鲵见八卷注说文歆神食气也】

李太白集注卷二十九

卷三十

钦定四库全书

李太白集注卷三十

钱塘 王琦 撰

诗文拾遗共五十七首

杂言用投丹阳知己兼奉宣慰判官【唐时丹阳郡即润州也属江南东道肃宗至德元载十一月以崔涣为江南宣慰使所谓宣慰判官乃涣之僚属也太白有上崔相涣诗数首此诗乃与其僚属者欤】

客从崑仑来遗我双玉璞云是古之得道者西王母食之余食之可以凌太虚爱之颇谓絶今昔求识江淮人犹乎比石如今虽在卞和手【缺文】正憔悴了了知之亦何益?闻士有调相如始从镐京还复欲镐京去能上秦王殿何时回光一相盼欲投君保君年幸君持取无弃捐无弃捐服之与君俱神仙【抱朴子玉亦仙药经曰服金者寿如金服玉者寿如玉也又曰服元真者其命不极元真者玉之别名也令人身轻飞举不但地仙而已不可用已成之器伤人无益当得璞玉乃可用也】此诗多有缺文讹字与下八首萧氏本皆不録唯姑苏缪氏依宋本所刊者有之】

南陵五松山别荀七【南陵五松山俱见十二卷注】

六即颍水荀何慙许郡宾【六即唐诗类苑作轩昂琦按六字恐是草书君字之讹】相逢太史奏应是聚贤人玉隐且在石兰枯还见春俄成万里别立德贵清真【後汉书陈寔字仲弓颍川许人也荀淑字季和颍川颍阴人也异苑陈仲弓从诸子侄造荀季和父子于时德星聚太史奏五百里内有贤人聚论衡美玉隐在石中左传太上有立德】

观鱼潭

观鱼碧潭上木落潭水清日暮紫鳞跃圆波处处生凉烟浮竹尽秋月照沙明何必沧浪去兹焉可濯缨【左思蜀都赋鲜以紫鳞潘岳诗游鱼动圆波刘良注圆波谓鱼动波起而图也】

自广平乘醉走马六十里至邯鄲登城楼览古书怀【广平唐时郡名即洺州也隶河北道邯鄲县名初隶洺州代宗永泰中改隶磁州 邯鄲音寒单】

醉骑白花骆【一作马】西走邯鄲城扬鞭动柳色写鞚春风生入郭登高楼山川与云平深宫翳绿草【一作雄都半古塚】万事伤人情相如章华【当作台】巔猛气折秦嬴两虎不

可鬪廉公终负荆提携袴中儿杵臼及程婴空孤献【一作立孤就】白刃必死耀丹诚平原三千客谈笑尽豪英毛君能颖脱二国且同盟皆为黄泉土使我涕纵横磊磊石子岗萧萧白杨声诸贤【一作贤豪】没此地碑版有残铭太古共今时由来互衰荣伤哉何足道感激仰空【一作虚】名赵俗爱长剑文儒少逢迎闲从博徒【一作陵】游帐饮雪朝醒【一作中醒】歌酣易水动鼓震丛台倾日落把烛归凌晨向燕京方陈五饵策一使胡尘清【毛萇诗传白马黑鬣曰骆吴均诗聊为路旁人写鞚长楸北韵会鞚马勒也史记蔺相如传以相如功大拜为上卿位在廉颇右廉颇曰我为赵将有攻城野战之大功蔺相如徒以口舌为劳而位居我上吾羞不忍为之下宣言曰我见相如必辱之相如闻不肯与会每朝时常称病不欲与廉颇争列相如出望见廉颇引车避匿舍人相与谏相如曰公视廉将军孰与秦王夫以秦王之威而相如廷叱之辱其羣臣独畏廉将军哉顾强秦之不敢加兵於赵者徒以吾两人在也今两虎共鬪其势不俱生吾所以为此者以先国家之急而後私仇也廉颇闻之肉袒负荆至相如门谢罪曰鄙贱之人不知将军宽之至此也卒为刎颈之交索隐曰负荆者荆楚也可以为鞭其章台见秦王事见十五卷注秦本纪孝王曰昔伯翳为舜主畜畜多息故有土赐姓嬴今其後世亦为朕息马朕其分土为附庸邑之秦使复续嬴氏祀号曰秦嬴赵世家屠岸贾攻赵氏於下宫杀赵朔灭其族赵朔妻成公姊有遗腹走公宫匿赵朔客曰公孙杵臼谓朔友人程婴曰胡不死程婴曰朔之妇有遗腹幸而男吾奉之即女也吾徐死耳居无何而朔妇免身生男屠岸贾闻之索於宫中夫人置儿絝中祝曰赵宗灭乎若号即不灭若无声及索儿竟无声程婴谓公孙杵臼曰今一索不得後必且复索之奈何二人谋取他人婴儿负之衣以文葆匿山中程婴出谬谓诸将曰谁能与吾千金吾告赵氏孤处许之发师随程婴攻杀杵臼与孤儿然赵氏真孤乃反在居十五年晋景公疾卜之大业之後不遂者为祟景公问韩厥厥知赵孤在乃曰大业之後在晋絶祀者其赵氏乎具以实告景公与韩厥谋立赵孤召而匿之宫中诸将入问疾景公因韩厥之衆以胁诸将而见赵孤赵孤名曰武遂攻屠岸贾灭其族及赵武冠为成人程婴乃谓赵武曰昔下宫之难我非不能死我思立赵氏之後今赵武既立为成人复故位我将下报赵宣孟与公孙杵臼遂自杀毛遂脱颖见十六卷及二十六卷注说文磊衆石也太平寰宇记邯鄲县有石子冈隋图经云历陵城西十里有石子冈实山也而高大有冢如砚子世谓之砚子冢是赵简子家古诗驱车上东门遥望北郭墓白杨何萧萧松柏夹广路诸贤另指当时贤豪死葬於石子冈者故下文以太古今时双承言之谢灵运诗碑版谁闻传史记信陵君传公子闻赵有处士毛公藏於博徒薛公藏於卖浆家公子欲见两人两人自匿不肯见公子公子闻所在乃间徒步从此两人游甚欢易水在燕地去邯鄲甚远用之此处恐误元和郡县志丛台在磁州邯鄲县城内东北隅陶潜诗提剑出燕京汉书贾谊传及欲试属国施五饵三表以系单于顔师古注贾谊书谓赐之盛服车乘以坏其目赐之盛食珍味以坏其口赐之音乐妇人以坏其耳赐之高堂邃宇仓库奴婢以坏其腹于来降者上以召幸之相娱乐亲酌而手食之以坏其心此五饵也 骆音洛鞚苦贡切空去声磊音儡】

月夜金陵怀古

苍苍金陵月空悬帝王州天文列宿在霸【一作鼎】业大江流淥水絶驰道青松摧古丘台倾鵙观宫没凤皇楼别殿悲清暑芳园罢乐游一闻歌玉树萧瑟後庭秋【一作千古不胜愁】谢朓诗江南佳丽地金陵帝王州三辅黄图驰道天子所行道也今之中道宋书大明五年

初立驰道自阊阖门至于朱雀门又自承明门至于元武湖六朝事迹宋孝武帝作驰道自阊阖北出承明抵元武湖十余里为调马之所也古丘谓六代时陵墓鵙鵙观六朝所建宫室今不可考景定建康志案宫苑记凤凰楼在凰台山上宋元嘉中建有凤凰集此为名晋书太元二十一年春正月造清暑殿景定建康志清暑殿在台城内晋孝武帝建殿前重楼复道通华林园爽垲奇丽天下无比虽暑月常有清风故以为名太平寰宇记乐游苑在覆舟山南北连山筑台观苑内起正阳林光等殿六朝事迹乐游苑輿地志云在晋为药园宋元嘉中以其地为北苑更造楼观後改为乐游苑宋孝武大明中造正阳林光殿于内侯景之乱焚毁略尽陈天嘉六年更加修葺陈亡遂废其地在覆舟山南去县六里隋书陈祯明初後主作新歌词甚哀怨令後宫美人习而歌之其辞曰玉树後庭花花开不复久时人以歌?此其不久兆也】

金陵新亭【方輿胜覽新亭在建康府城南十五里江南通志新亭在江寧府城西南十五里俯近江渚一名中兴亭】

金陵风景好豪士集新亭举目山河异偏伤周顓情四坐楚囚悲不忧社稷倾王公何慷慨千载仰雄名【晋书过江人士每至暇日相邀出新亭饮宴周顓中座而叹曰风景不殊举目有江山之异皆相视流涕惟王导愀然变色曰当共戮力王室克复神州何至作楚囚相对泣耶衆收泪而谢之 顓音以】

庭前晚开花

西王母桃种我家三千阳春始一花结实苦迟为人笑攀折唧唧长咨嗟【汉武内传七月七日王母至侍女以玉盘盛仙桃七颗大如鸭卵形圆青色以呈王母母以四颗与帝三颗自食桃味甘美口有盈味帝食辄收其核王母问帝帝曰欲种之王母曰此桃三千年一开花三千年一结实中夏地薄种之不生帝乃止】

宣城长史弟昭赠余琴溪中双舞鹤诗以见志【琴溪在寧国府泾县见十九卷注】

令弟佐宣城赠余琴溪鹤谓言天涯雪忽向窗前落白玉为毛衣黄金不肯博当风振六翮对舞临山阁顾我如有情长鸣似相托何当驾此物与尔腾寥廓【韵会博贸易也】

暖酒

热暖将来宾铁文暂时不动聚白云拨却白云见青天掇头里许便乘仙【宝藏论宾铁出波斯坚利可切金玉琦按庭前晚开花及此首语尤凡俗不类太白】

右九首见繆氏本

戏赠杜甫

饭颗山头【摭言作饭颗山前一作长乐坡前】逢杜甫头戴笠子日卓午借问别来【摭言作因何一作新来】太瘦生总为从前【摭言作只为从来】作诗苦【元和郡县志长乐坡在京兆府万年县东北十三里即滻川之西岸旧名滻阪隋文帝恶其阪名改曰长乐坡雍録通化门东七里有长乐坡下临滻水本名滻阪隋文帝恶其名音与反同故改阪为坡自其北可望长乐宫故名长乐坡也欧阳永叔曰太瘦生唐人语也至今犹以生为语助如作麼生何似生之类是也】右一首见唐本事诗【唐本事诗李白才逸气高与陈拾遗齐名先後合德其论诗云梁陈已来艶薄斯极沈休文又尚以声律将复古道非我而谁故陈李二集律诗殊少尝言寄兴深微五言不如四言七言又其靡也况使束于声调俳优哉故戏杜曰饭颗山头逢杜甫云云盖讥其拘束也此诗又见摭言唐诗纪事云此诗载唐旧史】

寒女吟

昔君布衣时与妾同辛苦一拜五官郎便索邯郸女妾欲辞君去君心便相许妾读靡芜书悲歌泪如雨忆昔嫁君时曾无一夜乐不是妾无堪君家妇难作起来强歌舞纵好君嫌恶下堂辞君去去後悔遮莫【按通典汉时中郎将分掌三署郎有议郎中郎侍郎郎中凡四等无员多至千人三署者五官左右也凡郎官皆主更直执戟宿卫诸殿门出充车骑年五十以上者属五官五官中郎将比二千石五官中郎比六百石五官侍郎比四百石五官郎中比三百石鲍照诗洛阳少年邯郸女古诗上山采靡芜下山逢故夫长跪问故夫新人复何如新人虽言好未若故人妹顔色类相似手爪不相如新人从门入故人从阁去新人工织缣故人工织素织缣日一匹织素五丈余将缣来比素新人不如故遮莫俚语尽教也见六卷注】

会别离

结发生别离相思复相保如何日已远五变庭中草渺渺天海途悠悠汉江岛但恐不出门出门无远道道远行既难家贫衣复单严风吹雨雪晨起鼻何酸人生各有志岂不怀所安分明天上日生死誓同欢【梁元帝纂要冬风曰严风文苑英华郭茂倩乐府俱作孟云卿诗诗题文苑作离别曲乐府作生别离】

右二首见才调集

初月

玉蟾离海上白露湿花时云畔风生爪沙头水浸眉乐哉弦管客愁杀战征儿因絶西园赏临风一咏诗【曹子建诗清夜游西园飞盖相追随明月澄清景列宿正参差】

雨後望月

四郊阴霭散开户半蟾生万里舒霜合一条江练横出时山眼白高後海心明为惜如团扇长吟到五更【班婕妤怨歌行裁成合欢扇团团似明月】

对雨

卷帘聊举目露湿草绵绵古岫披云毳空庭织碎烟水红【文苑英华注云疑作纹】愁不起
风线重难牵尽日扶犁叟往来江树前【广韵山有穴曰岫兽毛之縠细者为毳又曰毳细布
也犁垦田器也 岫音?毳音脆】

晓晴

野凉疎雨歇春色偏萋萋鱼跃青池满莺吟緑树低野花妆面湿山草纽斜齐零落残云片风
吹挂竹溪

望夫石【见二十四卷注】

髣髴古容仪含愁带曙辉露如今日泪苔似昔年衣有恨同湘女无言类楚妃寂然芳靄内犹
若待【一作带】夫归【楚辞章句尧以二女妻舜有苗不服舜往征之二女从而不反道死
于沅湘之中因为湘夫人左传楚子灭息以息妫归生堵敖及成王焉未言楚子问之对曰吾
一妇人而事二夫纵勿能死其又奚言】

冬日归旧山

未洗染尘缨归来芳草平一条藤径緑万点雪峰晴地冷叶先尽谷寒云不行嫩篁侵舍密古
树倒江横白犬离村吠苍苔上壁生穿厨孤雉过临屋旧猿鸣木落禽巢在篱疎兽路成拂牀
苍【一作山】鼠走倒篋素鱼惊洗砚修良策敲松拟素贞此时重一去去合到三清【素鱼
白鱼也即书篋中蠹鱼】

邹衍谷【太平御覽刘向别録曰方士传言邹衍在燕燕有谷地美而寒不生五谷邹子居之
吹律而温气至谷中生黍至今名黍谷焉一统志黍谷山在顺天府怀柔县东四十里跨密云
县界亦名燕谷山刘向云燕有谷地美而寒不生黍稷邹衍吹律以温其气故名山曰黍谷衍
庙基犹存】

燕谷无暖气穷岩闭严阴邹子一吹律能回天地心

入清溪行山中

轻舟去何疾已到云林境起坐鱼鸟间动摇山水影岩中响自合【文苑英华注云疑作荅】
溪里言弥静无事令人幽停桡向余景【文苑英华一百六十六卷载李白入清溪行山中凡
二首其一即本集七卷中清溪清我心一首其一乃此首也按崔颢集亦载此首题云入若耶
溪当是颢作也】

日出东南隅行【日出东南隅行即乐府之陌上桑也一日艶歌罗敷行古辞曰日出东南隅照我秦氏楼秦氏有好女自名为罗敷云云後人拟之或即以首句名篇】

秦楼出佳丽正值朝日光陌头能驻马花处复添香【郭茂倩乐府载此首以为殷谋诗】

代佳人寄翁参枢先辈【演繁露唐世举人呼已第者为先辈国史补互相推敬谓之先辈】

等闲经夏复经寒梦里惊嗟岂暂安南国风光当世少西陵演浪过江难周旋小字挑灯读重叠遥山隔雾看直是为君谿不得书来莫说更加谿【说文演长流也旧注云此诗总目及李集皆不载惟英华诸本有之】

送客归吴

江村秋雨歇酒尽一帆飞路历波涛去家唯坐卧归岛花【一作山桃】开灼灼汀柳细依依别後无余事还应扫钓矶【诗国风桃之夭夭灼灼其华毛传曰灼灼花之盛也广韵汀水际平沙也李善文选注韩诗曰昔我往矣杨柳依依薛君曰依依盛貌】

送友生游峡中

风静杨柳垂看花又别离几年同在此今日各驱驰峡里闻猿叫山头见月时殷勤一杯酒珍重岁寒姿【此诗亦载张籍集中】

送袁明府任长江【唐书地理志剑南道遂州遂寧郡有长江县】

别离杨柳青樽酒表丹诚古道携琴去深山见峡迎暖风花遶树秋雨草沿城自此长江内无因夜犬惊【晋书披露丹诚不敢不尽後汉纪刘宠为会稽太守正身率下郡中大治徵入为将作大匠山阴县有数老父年各八十余居若耶山下去郡十里相率共往送宠曰他时吏发不去民间或狗吠竟夕民不得安自明府下车以来吏稀至民间狗不夜吠今闻当见弃故自力来送】

送史司马赴崔相公幕【诗题上一本多赋得鹤三字】

峥嵘丞相府清切凤凰池美尔瑶台鹤高栖琼树枝归飞晴日暖吟弄惠风吹正有乘轩乐初当学舞时珍禽在罗网微命苦犹丝愿托周周羽相衔汉水湄【魏书对九重之清切望八袭之峥嵘凤凰池见十一卷注琼树见二卷注王筠诗优游清露点微穆惠风吹左传卫懿公好鹤鹤有乘轩者埤雅鹤生二年落子毛三年产伏七年飞薄云汉後七年学舞後七年应节周周衔羽见二卷注既以鹤比司马以珍禽自喻复以周周衔羽事作结似乎凌杂恐有错误沧浪诗话文苑英华有送史司马赴崔相公幕一首云云此或太白之逸诗也不然亦是盛唐人之作琦按末二聯或是太白在寻阳狱中之作所谓崔相公者即是崔涣似亦近之而岑参集

中亦载此诗一云无名氏诗】

战城南【乐府汉鼓吹饶歌详三卷注】

战地何昏昏战士如羣蚁气重日轮红血染蓬蒿紫乌鸟衔人肉食闷飞不起昨日城上人今日城下鬼旗色如罗星鼙声殊未已妾家夫与儿俱在鼙声里【文苑英华一百九十六卷太白去年战桑乾源之後载此一首不録作者姓名後人采太白遗诗兼入此作】

胡无人行【乐府瑟调曲见三卷注】

十万羽林儿临洮破郅支杀添胡地骨降足汉营旗寒阔牛羊散兵休帐幕移空余陇头水呜咽向人悲【羽林儿见十八卷注唐时陇右道有临洮郡即洮州也其地东北二面并枕洮水故名汉书使护西域骑都尉甘延寿副校尉陈汤矫发戊己校尉屯田吏士及西域胡兵攻郅支单于斩其首传诣京师陇头歌陇头流水鸣声幽咽文苑英华一百九十六卷太白严风吹霜海草凋之後载此一首不録作者姓名後人采入太白遗诗然考】

【陈陶集中亦载此作当是陶诗 洮音叨郅音质】

鞠歌行【乐府平调曲见四卷注】

丽莫似汉宫妃谦莫似黄家女黄女持谦齿发高汉妃恃丽天庭去人生容德不自保圣人安用推天道君不见蔡泽嵌枯诡怪之形状大言直取秦丞相又不见田千秋才智不出人一朝富贵如有神二侯行事在方册泣麟老人终困厄夜光抱恨良叹【一作扑】悲日月逝矣吾何之【世说汉元帝宫人既多乃令画工图之欲有呼者辄披图召之其中常者皆行货赂王明君姿容甚丽志不苟求工遂毁为其状後匈奴来和求美女于汉帝帝以明君充行既召见而惜之但名字已去不欲中改于是遂行尹文子齐有黄公者好谦卑有二女皆国色以其美也常谦辞毁之以为丑恶丑恶之名远布年过而一国无聘者卫有鰥夫时冒娶之果国色然後曰黄公好谦故毁其子其妹美于是争礼之亦国色也国色实也丑恶名也此违名而得实矣史记蔡泽燕人也曷鼻巨肩魑顔蹙髑膝挛西入秦秦昭王与语大说之拜为客卿范雎免相昭王新说蔡泽计画遂拜为秦相汉书车千秋本姓田氏卫太子为江充所譖败久之千秋上急变讼太子冤武帝见而悦之立拜千秋为大鸿胪数月遂代刘屈氂为丞相封富民侯千秋无他材能术学又无伐阅功劳特以一言寤意旬月取宰相封侯世未尝有也孔丛子叔孙氏之车子曰鉏商樵于野而获兽焉衆莫之识以为不祥弃之五父之衢冉有告夫子曰麋身而肉角岂天下之妖乎夫子曰今何在吾将观焉遂往谓其御高柴曰若求之言其必麟乎到视之果信言偃问曰飞者宗凤走者宗麟为其难致也敢问今见其谁应之子曰天子布德将致太平则麟凤龟龙先为之祥今宗周将灭天下无主孰为来哉遂泣曰予之于人犹麟之于兽也麟出而死吾道穷矣乃歌曰唐虞世兮麟凤游今非其时来何求麟兮麟兮我心忧文苑英华二百三卷太白玉不自言如桃李之後载此一首失録作者姓名後人遂编入太白遗诗嵌音同龔】

右十七首见文苑英华【前十四首皆注太白姓名于下後三首録于太白诗之後空白其下不书姓名後人以为皆太白之作也编太白遗诗者遂并及焉今因之附録于此沧浪诗话文苑英华有太白代寄翁参枢先辈七言律一首乃晚唐之下者又有五言律三首其一送客归吴其二送友生游峡中其三送袁明府任长江集本皆无之其家数正在大历贞元间亦非太白之作又有五言雨後望月一首对雨一首望夫石一首冬日归旧山一首皆晚唐之语又有秦楼出佳丽四句亦不类太白是皆後人假名也】

题许宣平庵壁

我吟传舍诗来访真人居烟岭迷高迹云林隔太虚窥庭但萧索倚柱空踟躇应化辽天鹤归当千岁余【太平广记许宣平新安歙人也唐睿宗景云中隐于城阳山南捣结庵以居不知其服饵但见不食顏色若四十许人行如奔马时或负薪以卖担常挂一花瓠及曲竹杖每醉腾腾拄之以归独吟曰负薪朝出卖沽酒日西归路人莫问归何处穿入白云行翠微迹来三十余年或拯人悬危或救人疾苦城市人多访之不见但览庵壁题诗曰隐居三十载筑室南山巅静夜玩明月闲朝饮碧泉樵人歌陇上谷鸟戏岩前乐矣不知老都忘甲子年好事者多咏其诗有时行长安于驿路洛阳同华间传舍是处题之天宝中李白自翰林出东游经传舍览之吟咏嗟叹曰此仙诗也乃诘之于人得宣平之实白于是游及新安涉溪登山屡访之不得乃题其庵壁曰云云是冬野火燎其庵莫知宣平踪迹百余年後咸通七年郡人许明奴家有姬尝逐伴入山采樵独於南山中见一人坐石上方食桃甚大问姬曰汝许明奴家人也我明奴之祖宣平姬言尝闻已得仙矣曰汝归为我语明奴言我在此山中与汝一桃食之不可将出山虎狼甚多山神惜此桃姬乃食桃甚美宣平遣姬随樵人归家言之明奴之族甚异之传闻于郡人出续仙传太平寰宇记城阳山在歙县南环迴孔高为城郭之衿带居郡之南故号为城阳山焉即许宣平得道之所亦为李白所寻不遇今山上有遗迹存汉书沛公至高阳传舍顔师古注传舍者人所止息前人已去後人复来转相传也一音张恋反谓传置之舍也其义两通後汉书光武乃称邯郸使者入传舍章怀太子注传舍客馆也辽天鹤见二十一卷注】

右一首见太平广记

题峰顶寺

夜宿峰顶寺举手扪星辰不敢高声语恐惊天上人【侯鯖録曾阜为蕲州黄梅令县有峰顶寺去城百余里在乱山羣峰间人迹所不到阜按田偶至其上梁间小榜流麀昏晦乃李白所题诗也其字亦豪放可爱诗云夜宿峰顶寺云云或曰王元之少登楼诗云危楼高百尺手可摘星辰不敢高声语恐惊天上人渔隐丛话西清诗话云蕲州黄梅县峰顶寺在水中央环伏万山人迹所罕到曾阜为令时因事登其上见梁间一粉板尘暗粉落拂涤视之乃谪仙诗云夜宿峰顶寺云云世传杨大年幼时诗非也邵氏闻见後録舒州峰顶寺有李太白题诗夜宿峰顶寺云云曾子山始见之不出于集中恐少作耳太仓稊来集云闻道长庚曾入梦已应能作上楼诗注云唐人载李白在襁褓中其家携之上楼问颇能作诗否即应声作絶句一首所

谓不敢高声语恐惊天上神者是也又竹坡诗话世传杨文公方离襁褓犹未能言一日家人携以登楼忽自语如成人因戏问之今日上楼汝能作诗乎即应声曰危楼高百尺手可摘星辰不敢高声语怕惊天上人旧见古今诗话载此一事後又见一石刻乃李太白夜宿山寺所题字画清劲而大且云布衣李白作岂好事者窃太白之诗以神文公之事欤仰亦太白之碑为伪耶】

右一首见侯鯖録等书

瀑布

断崖如削瓜岚光破崖緑天河从中来白云涨川谷玉案赤文字落落不可读摄衣凌青霄松风吹我足【二老堂诗话司空山在舒州太湖县界初经重报寺过马玉河至金轮院有僧木净肉身塔及不受叶莲花池连理山茶自塔院乃上山至本净坐禅岩精巧天成中途断崖絶壑旁临万仞号牛背石宗室善修者言石如剑脊中起侧足覆身而过危险之甚度此步步皆佳上有一寺及李太白读书堂一峰玉立有太白瀑布诗云断崖如削瓜岚光破崖緑天河从中来白云涨川谷玉案赤文字落落不可读摄衣凌青霄松风吹我足予兄子中守舒日得此于宗室公霞今胡仔渔隐丛话载蔡绦西清诗话不言此山但云太白仙去後人有见其诗略云断崖如削瓜岚光破崖緑天河从中来白云涨川谷玉案敕文字世眼不可读摄身凌青霄松风吹我足又云举?露条脱招我饭胡麻真烟云中语也既误以断崖为断崖与第二句相重赤文作敕文落落作世眼摄衣作摄身皆浅近与前句大相远当涂太白集本原无此诗因子中録寄郡守遂刻于後然皆从蔡绦误本子中争之不从仅能改勅为赤而已唐诗纪事近世传白诗云断崖如削瓜岚光破崖緑天河从中来白云涨川谷玉案赤文字落落不可读摄衣凌清云松风拂我足又不同者数字】

断句

举袖露条脱招我饭胡麻【太平广记条跳似指环而大唐诗纪事文宗问宰臣古诗云轻衫衬跳脱跳脱是何物宰臣未对上曰即今之腕钏也真诰言安妃有斲栗金跳脱是臂饰跳脱即条脱也太平广记刘晨阮肇入天台采药有二女子邀还家其饌有胡麻饭山羊脯按胡麻即今之芝麻也相传张骞自大宛得其种以归以其出自胡中故曰胡麻唐诗纪事亦载此句举袖作举手】

野禽啼杜宇山蝶舞庄周【杜宇杜鹃也见三卷注渔隐丛话法藏碎金云予记太白有诗云野禽啼杜宇山蝶舞庄周後又见潘佑有感怀诗幽禽唤杜宇宿蝶梦庄周席地一尊酒思与元化浮但莫孤明月何必秉烛游予谓才思暗合古今无殊不可怪也】

右三首见渔隐丛话诸书

阳春曲【沈约作江南弄四曲其三曰阳春曲】

茱萸生前径含桃落小园春心自摇荡百舌更多言【陆玕草木疏茱萸一名马舄一名车前一名当道喜在牛马迹中生故曰车前当道今药中车前子是也幽州人谓之牛舌草可鬻作茹大滑其子治妇人难产埤雅樱桃为木多阴其果先熟一名含桃许慎曰莺之所含食故曰含桃也谓之莺桃则亦以莺之所含食故谓之莺桃也尔雅翼樱桃朱实甘美飞鸟所含故又名含桃尔雅谓之荆桃其花在梅後至果熟则最先本草纲目百舌处处有之居树孔窟穴中状如鸚鵡而小身略长灰黑色微有班点喙亦尖黑行则头俯好食蚯蚓立春後鸣啖不已夏至後则无声十月後则藏蛰月令仲夏反舌无声即此 茱音浮萸音以一作苜】

舍利佛【舍利见七卷注】

金绳界宝地珍木荫瑶池云间妙音奏天际法蠡吹【法华经时娑婆世界即变清净琉璃为地宝树庄严黄金为绳以界入道又云雨大法雨吹大法螺文献通考贝之为物其大可容数升蠡之大者也南蛮之国取而吹之所以节乐也今之梵乐用之以和铜钹释氏所谓法螺赤土国吹螺以迎隋使是也法蠡即法螺也古螺字一作蠡通用】

摩多楼子

从戎向边北远行辞密亲借问阴山候还知塞上人【陆机诗总辔登长路呜咽辞密亲阴山在北边外见五卷注陆机诗往问阴山候劲虏在燕然刘良注候伺望者】右三首见万首唐人絶句【郭茂倩乐府诗集三首俱作无名氏】

春感

茫茫南与北道直事难谐榆荚钱生树杨花玉糝街尘紫游子面蝶弄美人钗却忆青山上云门掩竹斋【彰明逸事太白游成都赋春感诗云云益州刺史苏颋见而奇之春秋元命苞三月榆荚落 荚音劫糝桑感切鞞上声】右一首见彰明逸事

殷十一赠栗冈砚

殷侯三玄士赠我栗冈砚洒染中山毫光映吴门练天寒水不冻日用心不倦携此临墨池还如对君面【王羲之笔经诸郡毫惟中山兔肥而毫长可用练熟绢也韩诗外传顔回望吴门马见一匹练孔子曰马也此用其字而意则指吴中所出之绢素与原事无涉九域志越州会稽县有王右军墨池】

右一首见高似孙砚笈

普照寺

天台国清寺天下为四絶今到普照游到来复何别栢木白云飞高僧顶残雪门外一条溪几

回流岁月【咸淳临安志净明寺在富阳县北五里旧名普照天福五年重建治平二年改今额寺枕高山名曰舒壁山?有龙潭涧水横流上有桥亭李翰林白诗天台国清寺天下为四絶云云一统志国清寺在浙江台州府天台县北十里隋炀帝为智顗禅师建晏殊类要云齐州灵岩荆州玉泉涧州栖霞台州国清世称四絶本草拾遗栴木高大叶如桑出南方山中栴音楠】

右一篇见咸淳临安志【苏东坡曰予旧在当阳见国清院太白诗絶凡近即此篇也渔隐丛话新安水西寺寺依山背下瞰长溪太白题诗断句云檻外一条溪几回流碎月今集中无之琦按渔隐所引即此篇末二句也盖未覩全篇故讹以为题水西寺断句耶】

钓台

磨尽石岭墨寻阳钓赤鱼霭峰尖似笔堪画不堪书【方輿胜覽钓台在徽州黟县南十八里亦名寻阳台相传李白尝钓於此有诗云磨尽石岭墨云云太平寰宇记墨岭山在黟县南十八里岭上石如墨色岭有穴中有墨石软膩土人取为墨色碧甚鲜明可以记文字方輿胜覽霭峰在黟县南十五里孤峭如削九域志锦绣万花谷一统志皆引霭峰尖似笔之句以为太白诗罗愿新安郡志曰太白常称金华五百滩之胜而思为新安之游又尝自回溪十六渡至黄山汤泉之下则吾土山川胜槩颇已寄于逸想其赠许宣平诗沈汾述以为传当不虚也又荅山中人所谓桃花流水杳然去别有天地非人间相传以为入黟所作而俗又有石墨岭与水西兴唐寺诗语不类太白东坡尝疑富阳国清彭泽兴唐诗及姑熟十咏非太白所作而王平甫疑十咏出于李赤按南唐自有一翰林学士李白会子固以为十咏是此人所为然则此间墨岭兴唐诗岂亦此类耶】

小桃源

黟县小桃源烟霞百里间地多灵草木人尚古衣冠【方輿胜覽樵贵谷在徽州黟县北昔土人入山行七日至一穴豁然周三十里中有十余家云是秦人避入此地按邑图有潜村至今有数十家同为一村或谓之小桃源李白诗黟县小桃源云云锦绣万花谷亦载此诗以为太白作琦按此诗乃南唐许坚诗其後尚有二韵非太白作也 黟音衣】

题窰圖山【圖音纏】

樵夫与耕者出入画屏中【方輿胜覽窰圖山在绵州彰明县李白题窰圖山诗樵夫与耕者出入画屏中又送窰主簿诗愿随子明去炼火烧金丹窰子明名圖隐此山故名琦按後二句已见集中之十二卷所谓子明者是陵阳子明以为窰圖之字殊不可信】

右三则见方輿胜覽

赠江油尉【唐时江油县隶剑南道之龙州应灵郡】

岚光深院里 傍砌水泠泠 野燕巢官舍 溪云入【缺一字】厅 日斜孤吏过 帘卷乱峰青 五色神仙尉 焚香读道经 右一首见杨升庵全蜀艺文志

清平乐令【翰林应制】

禁庭春昼 莺羽披新绣 百草巧求花下鬪 只赌珠玑满斗 日晚却理残粧 御前闲舞霓裳 谁道腰肢窈窕 折旋消得君王【说文玕珠不圆也梦溪笔谈霓裳羽衣曲刘禹锡诗云三乡陌上望仙山归作霓裳羽衣曲王建诗云听风听水作霓裳白乐天诗注云开元中西凉府节度使杨敬述造郑嵎津阳门诗注云叶法善尝引上入月宫闻仙乐及上归但记其半遂于笛中写之会西凉府都督杨敬述进婆罗门典与其声调相符遂以月中所闻为散序用敬述所进为其腔名霓裳羽衣曲诸说不同礼记周还中规折还中矩折旋即折还也旋还二字经史通用】

其二

禁帟秋夜 月探金窗罅【升庵词品作明月探窗罅】玉帐鸳鸯喷沉【词品作兰】麝时落银灯香爇 女伴莫话孤眠 六宫罗绮三千 一笑皆生百媚 宸游【词品作衷】教在谁边【鸳鸯薰香器也说文爇烛炆也爇才野切斜上声】

右二首见絶妙词选【欧阳炯花间集序曰在明皇朝则有李太白应制清平乐词四首絶妙词选曰唐吕鵬遏云集载太白应制词四首以後二首无清逸气韵疑非太白所作故只存其二胡应麟笔丛曰太白清平乐盖五代人伪作因李有清平调故贗作此词传之】

清平乐三首

烟深水濶 音信无由达 惟有碧天云外月 偏照悬悬离别 尽日感事伤怀 愁眉似锁难开 夜夜长留半被 待君魂梦归来

其二

鸾衾凤褥 夜夜常孤宿 更被银台红蜡烛 学妾泪珠相续 花貌些子时光 抛人远泛潇湘 欹枕悔听寒漏 声声滴断愁肠

其三

画堂晨起来 报雪花坠高 卷帘梳看佳瑞 皓色远迷庭砌 盛气光引炉烟 素草寒生玉佩 应是天仙狂醉 乱把白云揉碎【帘枕见十一卷注】

桂殿秋

仙女下董双成汉殿夜凉吹玉笙曲终却从仙官去万户千门惟月明 河汉女玉链顔云駢往往在人间九霄有路去无迹嫋嫋香风生佩环【汉武内传王母来命侍女董双成吹云和之笙黄庭经却灭百邪玉链顔云駢见三卷注 吴虎臣曰此太白词也有得于石刻而无其腔刘无言倚其声歌之音极清雅邵氏闻见後録以此词为李文饶迎神送神二曲予游秦尚有能宛转度之者或并为一曲谓李太白作许彦周诗话亦作李卫公步虚词 駢音瓶】

连理枝

雪盖宫楼闭罗幕昏金翠鬪压阑干香心澹薄梅梢轻倚喷宝猊香烬麝烟浓馥红绡翠被【猊音倪绡音宵】

其二

浅画云垂帔点滴昭阳泪咫尺宸居君恩断絶似遥千里望水晶帘外竹枝寒守羊车未至【晋书武帝多内宠平吴之後复纳孙皓宫人数千自此掖庭殆将万人而并宠者甚衆帝莫知所适常乘羊车恣其所之至便宴寝宫人乃取竹叶插户以盐汁洒地而引帝车 帔音譬】

右六首见

御定全唐诗

汉东紫阳先生碑铭

呜呼紫阳竟夭其志以默化不昭然白日而升九天乎或将潜宾皇王非世所测【缺十一字】

挺列仙明拔之英姿明堂平白长耳广颡挥手

振骨百关有声殊毛秀采居然逸异【缺十字】

而直达何龟鹤早世螭蛄延秋元命乎遭

命乎予长息三日懵於变化之理【黄庭经明堂四达法海源梁邱子注眉头一寸为明堂螭蛄见五卷注论衡传曰说命有三一曰正命二曰随命三曰遭命遭命者行善得恶非所冀望遭逢於外而得凶祸故曰遭命礼记正义按援神契云命有三科有受命以保庆有遭命以谪暴有随命以督行受命谓年壽也遭命谓行善而遇凶也随命者谓随其善恶而报之云陈子昂弟孜墓志铭云岂其夭絶丧兹良图呜呼其元命欤遭命欤东方朔荅客难东方先生喟然长息】先生姓胡氏【缺六字】族也代业黄老门清儒素皆龙脱世网鸿冥高云但贵天爵何徵阙阙【史记胶西有盖公善治黄老言张晏曰黄帝老子之书也晋书王隐以儒素自守

不交势援法言鸿飞冥冥弋人何篡焉韵会闕闕史记明其等曰闕积其功曰闕又有功曰闕有劳曰闕汉车千秋传无伐闕功劳师古曰伐积功也闕经历也今人以世家门户为闕闕误矣琦按人臣有功于国方得世禄闕闕之家犹言世禄之家耳又通监裴子野论曰降及季年专限闕闕胡三省注门在左曰闕在右曰闕则以世家门户为闕闕更有由也】始八岁经仙城

山【缺十一字】

有清都紫微之遐想九岁出家十二休粮二十游衡山云寻洞府水涉冥壑神

王【缺八字】召为威仪及天下采经使因遇诸真人受赤丹阳精石景水母故常吸飞根吞日魂密而修之【缺六字】所居苦竹院置浪霞之楼手植双桂栖迟其下【列子王实以为清都紫微钧天广乐帝之所居威仪道家职名如释家维那之类白玉蟾玉降万寿宫道院记唐有左右街威仪五代末周太祖因避讳改为道录是威仪即今之道录司也真诰日中五帝字曰日魂珠景昭韬绿映回霞赤童元炎颺象凡十六字此是金阙圣君采服飞根之道昔受之于太微天帝君一名赤丹金精石景水母玉胞之经梁丘子黄庭内景经注上清紫文灵书有采飞根之法常以日初出东向叩齿九通毕阴呪日魂名日中五帝字曰日魂珠景昭韬绿映回霞赤童元炎颺象呪呼此十六字毕瞑目握固存日中五色流霞来绕一身于是日光流霞俱入口中名曰日华飞根玉胞水母也诗国风衡门之下可以栖迟毛传曰栖迟游息也】闻金陵之墟道始盛於三茅波乎

四许华阳【缺七字】陶隐居传昇元子昇元子传体元体元传贞一先生贞一先生传天师李含光李含光合契乎紫阳【真诰句曲山汉有三茅君来治其上时父老又转名茅君之山三君往会各乘一白鹄各集山之三处时人互有见者是以发於歌謡乃复因鹄集之处分句曲山为大茅君中茅君小茅君三山焉总而言之尽是句曲之一山耳山生黄金汉灵帝时诏敕郡县采句曲之金以充武库逮孙权时又遣宿卫人采金常输官兵帅百家遂屯居伏龙之地因改为金陵之墟名也三茅者汉景帝中元间人长兄名盈次弟名固又次弟名衷俱得仙道老君拜盈为司命真君固为定录真君衷为保生真君故号为三茅君四许者许穆汝南平与人官至护军长史晋太和中入茅山修道功成仙去为上真人第三子玉斧先於太和五年在茅山尸解为上清仙官长子揆次子虎牙并亦得道南史陶弘景丹阳秣陵人为诸王侍读除奉朝请上表辞禄止於句容之句曲山恒曰此山下是第八洞宫名金坛华阳之天周回一百五十里昔汉有咸阳三茅君得道来掌此山故谓之茅山乃中山立馆自号华阳陶隐居人间书疏即以隐居代名旧唐书王远知琅琊人少聪敏博综羣书入茅山师事陶弘景传其道法太宗登极将加重位固请归山贞观九年谓弟子潘师正曰吾见仙格以吾少时误损一童子吻不得白日昇天见署少室伯将行在即翌日沐浴如冠衣焚香而寝卒年一百二十六岁调露二年追赠太中大夫諡曰昇真先生天授二年改諡曰昇元先生潘师正赵州赞皇人师事王远知尽以道门隐诀及符籙授之高宗幸东都因召见焉永淳元年卒时年九十八高宗追思不已赠太中大夫赐諡曰体元先生司马承祯字子微河内温人少好学薄於为吏遂为道士事潘师正传其符籙及辟谷导引服饵之术师正特赏异之卒时年八十九其弟子表称死之日有双鹤?坛及白云从坛中涌出上连於天而师容色如生元宗深叹异之赠银青光

禄大夫号贞一先生顏真卿元静先生李君碑先生姓李讳含光广陵江都人本姓弘以孝敬皇帝庙讳改焉提孩则有殊异晬日独取孝经如捧读焉开元十七年从司马链师于王屋山传授大法灵文金记一覽无遗综核古今该明奥旨元宗知先生徧得子微之道乃诏先生居王屋山阳台观以继之岁余请归茅山纂修经法频徵皆谢病不出天宝四载冬乃命中官賁玺书徵之既至延入禁中每欲諮稟必先斋沐他日请传道法先生辞以足疾不任科仪者数焉元宗知不可强而止先生常以茅山灵蹟翦焉将坠真经秘録亦多散落请归修葺特诏於杨许旧居紫阳观以宅之仍赐绢二百匹法衣两副香炉一具御制诗及序以饯之初隐居先生以三洞真经传昇元先生昇元付体元先生体元付正一

先生正一付先生自先生距於隐居凡五叶矣皆总袭妙门大正真法】於神农之里南抵朱陵北越白水禀训门下者三千余人邻境牧守移风问道忽遇先生之宴坐【缺五字】隐几雁行而前为时见重多此类也【路史世言神农生而九井自出按九井在赖山荆州记云江夏随县北界厉乡村南重山也井在山北重堑周之广一顷一十亩内有地云神农宅神农生此神农既育九井自穿旧说汲一井则八井皆动寰宇记在县北百里人不敢触按今惟存一穴大木旁荫人即其处为神农社年常祀之亦引荆州记所言厉乡村厉山下之穴神农所生穴口方一步容数人上有神农庙即荆州图永阳县西北二百三十里厉乡山东石穴也高三十丈长二百尺谓之神农穴名山洞天福地记南岳衡山周回七百里名朱陵之天在衡州衡山县白水即白河也一名淅水在南阳府详七卷注宴坐静坐也见二十三卷注埤雅雁行斜步侧身故庄子谓士成绮雁行避影而问老子】天宝初威仪元丹丘道门龙凤厚礼致屈传籙於嵩山东京大唐【缺二字】宫三请固辞偃卧未几而诏书下责不得已而行入宫一革轨仪大变都邑然海鸟愁臧文之享猿狙裂周公之衣志往迹留称疾辞帝尅期离阙临别自祭其文曰神将厌予予非厌世乃顾命侄道士胡齐物具平肩輿归骨旧土王公卿士送及龙门入叶县次王乔之祠目若有睹泊然而化天香引道尸轻空衣及本郡太守裴公以幡花郊迎举郭雷动【缺四字】开顏如生观者日万羣议骇俗至其年十月二十三日葬於郭东之新松山春秋六十有二【海鸟见大鹏赋注庄子今取猿狙而衣以周公之服彼必齕啮挽裂尽去而後慊观古今之异犹猿狙之异乎周公也晋书王献之尝经吴郡闻顾辟强有名园先不相识乘平肩輿径入文章正宗龙门在河南县地志曰阙塞山一名伊阙而俗名龙门王乔祠在南阳府叶县治东北相传即乔飞鳧之所故後人立祠於此以祀之今谓之双鳧观晋书葛洪卒时年八十一视其顏色如生体亦柔软举尸入棺甚轻如空衣世以为尸解得仙云狙子余切音狙】先生含弘光大不修小节书不尽妙郁有崩云之势文非凤工时动雕龙之作存也宇宙而无光歿也浪化而蝉蜕岂【缺八字】

乎【周易含弘光大品物咸亨正义云包含以厚光着甚大也後汉书刘陶为人居简不修小节梁昭明】

【太子锦带书丛谈发流水之源笔阵引崩云之势史记齐人颂曰谈天衍雕龙爽裴駮注刘向别録曰驺衍之所言五德终始天地广大书言天事故曰谈天驺爽修衍之术文饰之若雕镂龙文故曰雕龙左思吴都赋赤须蝉蜕而附丽刘渊林注言此人昇仙如蝉之脱殻也】有乡僧贞倩雅仗才气请予为铭予与紫阳神交饱飧素论十得其九弟子元丹丘等咸思鸾凤

之羽仪想珠玉之云气洒扫松月载扬仙风篆石颂德与兹山不朽其词曰

贤哉仙士六十而化光光紫阳善与时而为龙蛇固亦以生死为昼夜有力者挈之而趋劫运颓落终归於无惟元神不灭湛然清都延陵既没仲尼呜呼青青松柏离离山隅篆石颂德名扬八区【庄子一龙一蛇与时俱化而无肯专为淮南子以利害为尘垢以死生为昼夜方輿胜覽延陵季子墓在常州晋陵县北七十里申浦之西孔子尝题曰呜呼有吴延陵季子之墓旧石湮灭唐元宗命殷仲容摹以传扬雄长杨赋洋溢八区李善注八区八方之区也按宋敏求後序谓吕缙叔出汉东紫阳先生碑而残缺间莫能辨不复收入本集太平寰宇记紫阳先生塔铭李白譔在废光化县今不知存否此本从道藏刘大彬茅山志中録出虽有缺文然与集中所称紫阳先生元丹丘僧倩公仙城山殢霞楼等句多所取证且其文系太白真作铭词元奥可喜宋氏弃之不收固矣】右一篇见刘大彬茅山志

杂题

乘兴踏月西入酒家不觉人物两忘身在世外

其二

夜来月下卧醒花影零乱满人衿袖疑如濯魄於冰壶也【方輿胜覽象耳山在眉州彭山县有太白书台有石刻太白留题夜来月下卧醒云云】

其三

楼虚月白秋宇物化於斯凭阑身势飞动非把酒自忘此兴何极

其四

吾头懵懵试书此不能自辨贺生为我读之

右四则见龙江梦余録【唐锦龙江梦余録胡文穆记李白三帖其一云乘兴踏月其二云月下卧醒其三云楼虚月白余亦见其一帖云吾头懵懵虽其字迹真贋有不可必者然词语豪爽趣韵自别信非太白不能道也】

类书中多摘引太白诗句然不能无错缪海録碎事锦绣万花谷二编学士家以其出自宋人尤珍尚之其所引太白断句甚多亦有误者如雨吟春破碎贫饮客雕零山含红树随时老天带黄昏一例愁茶褐园林新柳色鹿胎田地落梅香江边石上谁知处緑战红酣别是春只有人间闲妇女一枚煎饼补天穿皆是李觏诗【因觏字太伯遂譌作太白】上有万仞山下有千丈水苍苍两崖间阔狭各一苇是白乐天诗晚花红艷静高树緑阴初亭午清无比溪山画不如是杜牧诗虬须顚顚羽林郎会入甘泉侍武皇鵬没夜云知御苑马随仙仗识天香是李

郢诗而皆以为太白诗矣又若霜结梅稍玉阴凝竹干银竹粉千腰白桃皮半颊红心为杀人剑泪是报恩珠绮楼何氛氲朝日正杲杲玉颜上哀喉絶耳非世有佳人微醉玉颜酡笑倚粧楼澹小蛾借问单楼与同穴可能银汉胜重河露暗烟浓草色新一番流水满溪春可怜渔父重来访只见桃花不见人昔日狂秦事可嗟直驱鸡犬入桃花至今不出烟峦口万古潺湲一水斜庭中繁树乍含芳红锦重重翦作囊还合炎蒸留烁景题来消得好篇章诸句未详为谁氏之作其句法皆与太白不相似亦皆以为太白诗矣罗鄂州新安郡志谓南唐时另有一翰林学士李白姑熟十咏是其所作然则後人所传李白诸逸诗及断句之为诸书所误引而其名莫可考者乌知非斯人之作耶昔人论杜诗真伪谓人才之不同如其面焉耳目口鼻相去亦无几谛视之未有不差殊者诗至少陵固不可得而乱也斯言良是夫学力如少陵其诗不可得而乱天才若青莲其诗固可得而乱耶然知其不可乱而犹彙之编之而附之於本集之後岂曰务博良欲存此以为後人辨其真贋而知所取法焉耳

宋魏菊庄诗人玉屑十四卷载历论诸家一条其下有旁注李太白集四字厥後汉魏诗乘因而采之而昧者互相引用遂以为真太白之文矣今按其前曰诗之兴也兆基邃古唐歌虞咏始载典谟商颂周雅方陈金石其後研志缘情二京弥甚含毫沥思魏晋弥繁李都尉鸳鸯之辞纏绵巧妙班婕妤霜雪之句发越清迴平子桂林理在文外伯喈翠鸟意尽行间河朔人物王刘为称首洛阳才子潘左为觉先乃若子建之牢笼羣彦士龙之籍甚当时并文苑之羽仪诗人之龟监凡一百二十五字是骆宾王和闺情诗启之前数行其後云骆宾王为诗格高旨远若天上物外神仙会集云行物驾想见飘然之状凡二十九字其二十六字是裴敬所作太白墓碑中数语盖骆宾王之下为诗格高旨远之上皆有缺文原属两条抄録者不察其舛误而相聯属为一则在菊庄原本要未尝缪误至此汉魏诗乘因菊庄俗本之误而承其误盖有由矣即是推之今所编辑拾遗安知不类于是而宋次道所裒益全集之诗文又安知不亦类于是耶後之读者尚有鑒于斯哉

郑樵通志艺文略别集内载云李白草堂集二十卷李阳冰录又度北门集一卷於制诰类中复载云李白度北门集一卷刘少彝曰度北门集当是供奉翰林时代言之草岂通考所谓翰林集者故已彙入然今本无一字存者其为湮佚无疑矣余考旧唐书之经籍志新唐书之艺文志及太白列传皆不载此书而他籍亦鲜有言之者岂亦南唐之翰林学士李白所作耶抑李白度者其人名北门集者其书名而後人误读之耶聊志于末以俟博学者辩之

李太白集注卷三十

卷三十一

钦定四库全书

李太白集注卷三十一

钱塘 王琦 撰

序志碑传【十二首】

草堂集序 李阳冰

李白字太白陇西成纪人凉武昭王暠九世孙蝉聯珪组世为显着中叶非罪谪居条支易姓与【繆本作为】名然自穷蝉至舜五世为庶累世不大曜亦可叹焉神龙之始逃归於蜀复指李树而生伯阳惊姜之夕长庚入梦故生而名白以太白字之世称太白之精得之矣【唐世陇西郡渭州也无成纪县而秦州天水郡乃有成纪此云陇西成纪人盖推其先世郡邑而云耳汉书李广传言广为陇西成纪人在汉初成纪本属陇西至武帝元鼎三年分陇西置天水郡於是成纪属天水而不属陇西矣唐李氏族望推为广所出者皆曰陇西成纪盖本此也凉武昭王讳暠系出李广之後当晋安帝之末为羣雄所奉推为炖煌太守遂启霸图兵不血刃坐据河西五郡国号曰凉自称为公在位十八年薨国人上諡曰凉武昭王暠子曰歆歆子曰重耳重耳子曰熙熙子曰天赐天赐子曰虎虎子曰曷曷子曰渊於是代隋而有天下是为唐高祖元宗天宝二年追尊凉武昭王曰兴圣皇帝南史王筠传爵位蝉聯文才相继诗商颂昔在中叶毛传曰叶世也按范传正墓碑云隋末多难一房被窜於碎叶与此文所谓中叶非罪谪居条支地名不同新唐书略之但言隋末以罪徙西域考汉书西域传乌弋山离国去长安万二千二百里条支国又在其西行百余日方至其国与中国絶远疑非谪戍者所居唐书地理志西域羁縻州有条支都督府以诃达罗支国伏宝瑟颠城置领州九隶安西都护府乃唐龙朔元年所置隋时无之恐碎叶为是条支乃借言作西域极远之地说耳史记虞舜者名重华重华父曰瞽瞍瞽瞍父曰桥牛桥牛父曰句望句望父曰敬康敬康父曰穷蝉穷蝉父曰帝顓頊顓頊父曰昌意以至舜七世矣自从穷蝉以至帝舜皆微为庶人艺文类聚老子姓李名耳字伯阳楚国苦县赖乡人也其母感大流星而有娠虽受气於天然生於李家犹以李为姓又云母到李树下生老子生而能言指李树曰以此为我姓左传郑武公娶於申曰武姜生庄公庄公寤生惊姜氏故名曰寤生 暠音稿】不读非圣之书耻为郑卫之作故其言多似天仙之辞凡所着述言多讽兴自三代以来风骚之後驰驱屈宋鞭撻扬马千载独步唯公一人故王公趋风列岳结轨羣贤翕习如鸟归凤卢黄门云陈拾遗横制颓波天下质文翕然一变至今朝诗体尚有梁陈宫掖之风至公大变扫地并尽今古文集遏而不行唯公文章横被六合可谓力敌造化矣【後汉书周燮专精礼易不读非圣之书司马相如难蜀父老文结轨还轅东向将报顔师古曰结屈也轨车迹也张华鷟鷟赋飞不飘扬翔不翕习李善注翕习盛貌新唐书卢藏用字子潜幽州范阳人神龙中累擢中书舍人历吏部黄门侍郎陈子昂字伯玉梓州射洪人文明初举进士擢麟台正字迁右拾遗唐兴文章承徐庾余风天下祖尚子昂始

变雅正初为感遇诗三十八章王适曰是必为海内文宗子昂所论着当世以为法卢藏用陈氏集序君名子昂字伯玉蜀人也崛起江汉虚视函夏卓立千古横制颓波天下翕然质文一变非夫岷峨之精巫庐之灵则何以生此大唐新语梁简文之为太子好作艳诗境内化之浸以成俗谓之宫体陈书後主使诸贵人及女学士与狹客共赋新诗互相赠答采其尤艳丽者以为曲辞班固西都赋横被六合】天宝中皇祖下诏徵就金马降辇步迎如见绮皓以七宝牀赐食御手调羹以饭之谓曰卿是布衣名为朕知非素蓄道义何以及此置於金銮殿出入翰林中问以国政潜草诏诰人无知者丑正同列害能成谤格言不入帝用疏之公乃浪迹纵酒以自昏秽咏歌之际屡称东山又与贺知章崔宗之等自为八仙之游谓公谪仙人朝列赋谪仙之歌凡数百首多言公之不得意天子知其不可留乃赐金归之遂就从祖陈留采访大使彦允请北海高天师授道籙於齐州紫极宫将东归蓬莱仍羽人驾丹丘耳【皇祖元宗也元宗於代宗为祖是文作於代宗即位之後故曰皇祖雍録金銮殿在学士院之左长安志大明宫有金銮殿在环周殿西北唐会要翰林院开元初置在银台门内麟德殿西厢重廊之後盖天下之艺能技术见召者之所处也唐书地理志河南采访使治汴州陈留郡即汴州北海郡即青州济南郡即齐州俱属河南道楚辞仍羽人於丹丘兮留不死之旧郷王逸注山海经言有羽人之国不死之民或曰人得道身生羽毛也朱子注仍因就也羽人飞仙也丹丘昼夜常明之处也】阳冰试弦歌於当涂心非所好公遐不弃我乘扁舟而相顾【繆本缺乘字相顾作相欢】临当挂冠公又疾亟草藁万卷手集未修枕上授简俾予为序论关雎之义始媿卜商明春秋之辞终慙杜预自中原有事公避地八年当时着述十丧其九今所存者皆得之他人焉时宝应元年十一月乙酉也【韩诗外传子夏问曰关雎何以为国风始也孔子曰关雎至矣乎夫关雎之人仰则天俯则地幽幽冥冥德之所藏纷纷沸沸道之所行虽神龙化斐斐文章大哉关雎之道也万物之所系羣生之所悬命也河洛出图书麟凤翔乎郊不由关雎之至则关雎之事将奚由至矣哉夫六经之策皆归论汲汲盖取之乎关雎关雎之事大矣哉冯冯翊翊自西自东自南自北无思不服子其勉强之思服之天地之间生民之属王道之原不外此矣子夏喟然叹曰大哉关雎乃天地之基也家语卜商卫人字子夏习於诗能通其义以文学著名晋书杜预立功之後从容无事乃沈思经籍为春秋左氏经传集解又参考衆家谱第谓之释例又作盟会图春秋长历备成一家之学比老乃成当时论者谓预文义质直世人未之重惟秘书监摯虞赏之曰左丘明本为春秋作传而左传遂自孤行释例本为传说而所发明何但左传故亦孤行】

李翰林集序 魏 颢

自盘古划天地天地之气艮於西南剑门上断横江下絶岷峨之曲别为锦川蜀之人无闻则已闻则杰出是生相如君平王褒扬雄降有陈子昂李白皆五百年矣【艮限也蜀於方位居中州之西南剑门岷山峨眉山锦江皆在其地司马相如扬雄皆蜀郡成都人严君平王褒亦称蜀人未详生何县陈子昂梓州射洪人俱见前注】白本陇西乃放形因家於绵身既生蜀则江山英秀伏羲造书契後文章滥觞者六经六经糟粕离骚离骚糠粃建安七子七子至白中有兰芳情理宛约词句妍丽白与古人争长三字九言鬼出神入瞠若乎後耳【唐时緜州隶剑南道又谓之巴西郡古广汉郡地在成都东北三百五十里孔安国尚书序古者伏牺氏之王天下也始画八卦造书契以代结绳之政由是文籍生焉音释云书者文字契者刻木而

书其侧故曰书契也一云以书契约其事也郑元云以书书木边言其事刻其木谓之书契也滥觞谓原本也详见二十八卷注庄子桓公读书於堂上轮扁斲轮於堂下释椎凿而上问桓公曰敢问公之所读为何言耶公曰圣人之言也曰圣人在乎公曰已死矣曰然则君之所读者古人之糟魄已夫陆德明注糟李云酒滓也司马云烂食曰魄一云糟烂为魄本文作粕音同许慎云粕已漉粗糟也典论今之文人鲁国孔融广陵陈琳山阳王粲北海徐干陈留阮瑀汝南应?东平刘桢斯七子者於学无所遗於词无所假咸自以骋骐骥於千里仰齐足而并驰建安者汉献帝年号七人聚於其时故世谓之建安七子庄子夫子奔逸絕尘而回瞠若乎後矣陆德明注瞠敕庚反又丑郎反字林云直视貌一云斜视 粼音彼】白久居峨眉与丹丘因持盈法师达白亦因之入翰林名动京师大鹏赋时家藏一本故宾客贺公奇白风骨呼为谪仙子由是朝廷作歌数百篇上皇豫游召白白时为贵门邀饮比至半醉令制出师诏不草而成许中书舍人以张垪谗逐游海岱间年五十余尚无禄位禄位拘常人横海鲲负天鹏岂池笼荣之【持盈法师玉真公主号公主出家为道士故曰法师金石錄玉真公主墓志王缙撰志云公主法号无上真字元元天宝中更赐号曰持盈而唐史但言字持盈耳琦按旧唐书元宗本纪玉真公主先为女道士天宝三载让号及实封赐名持盈以为字持盈乃新唐书之误唐书百官志中书省有舍人六人正五品上掌侍进奏议表章凡诏旨制勅玺书册命皆起草进画既下则署行张垪丞相说之子尚元宗女宁亲公主以中书舍人供奉翰林海岱间古青齐二州地也文献通考翰林学士唐元宗开元二十六年置初以中书务繁乃选文学之士号翰林供奉与集贤学士分掌制诰书命至是号供奉为学士别建学士院专掌内命以张垪刘光谦首居之而集贤所掌於是罢息自後给事中张淑中书舍人张渐窦华等相继而入焉其後有韩雄阎伯璵孟匡朝陈兼蒋镇李白等皆在翰林中但假其名而无所职雍錄开元前北门本无学士亦无职守如李白辈供奉翰林乃以其能文特许入翰林不曰以某官供奉也俗传白衣入翰林者此也又曰上数欲命白以官为宫中所扞而止是白在天宝竟无官也 垪音忌】顓始名万次名炎万之日不远命驾江东访白游天台还广陵见之眸子炯然哆如饿虎或时束带风流醞籍【韵会哆大貌汉书薛广德为人温雅有醞籍服?曰寬博有余也顏师古曰醞言如醞酿也籍有所荐籍也史炤曰醞籍有雅度之称北史王昕母清河崔氏学识有风训生九子皆风流醞籍 哆昌者切车上声音与撻同顓音浩】曾受道籙於齐有青綺冠帔一副少任侠手刃数人【史记季布为气任侠有名於楚如淳曰相与信为任同是非为侠所谓权行州里力折公卿者也应劭曰任谓有坚完可任托以事也顏师古曰任谓任使其气力侠之言侠也以权力侠辅人也任音人禁反侠音下颊反】与友自荆徂扬路亡权窆回棹方暑亡友糜溃白收其骨江路而舟【事详上安州裴长史书内】又长揖韩荆州荆州延饮白误拜韩让之白曰酒以成礼荆州大悦【世说鍾毓兄弟小时值父昼寝因其偷饮药酒其父时觉且托寐以观之毓拜而後饮会饮而不拜既而问毓何以拜毓曰酒以成礼不敢不拜又问会何以不拜荅曰偷本非礼所以不拜太白盖借毓语以解嘲也】白始娶於许生一女一男曰明月奴女既嫁而卒又合於刘刘诀次合於鲁一妇人生子曰颇黎终娶於宋【太白上安州裴长史书云见鄉人相如大夸云梦之事云楚有七泽遂来观焉而许相公家见招妻以孙女是其始娶乃许圜师之孙女也太白甯夜郎留别宗十六環诗有君家全盛日台鼎何陆离斩鰲冀娲皇三入凤凰池令姊忝齐眉等语是其终娶者乃宗楚客之家也而此云宋盖是宗字之讹耳若刘若鲁妇则无所考太白後只一子伯禽则未知其明月奴与其颇黎与】间携昭阳金陵之妓迹类谢康乐世号为李东山骏马美妾所适二千石郊迎饮数斗醉则妓丹砂

抚青海波满堂不乐白宰酒则乐【太白有小妓金陵歌楚声家童丹砂学凤鸣之句又有示金陵子诗昭阳妓无考其东山吟云酣来自作青海舞据此抚字乃舞字之讹】顓平生自负人或为狂白相见混合有赠之作谓余尔後必着大名於天下无忌老夫与明月奴因尽出其文命顓为集顓今登第岂符言耶解携明年四海大盗宗室有潭者白陷焉谪居夜郎罪不至此屡经昭洗朝廷忍白久为长沙汨罗之俦路远不存否极则泰白宜自宽【陆机诗抚膺解携手永叹结遗音盖言解散其携手之欢也宋之问诗骨肉初分爱亲朋忽解携张九龄诗义沾投分末情及解携初皆用其义】吾观白之文义有济代命然千钧之弩魏王大瓠用之有时议者奈何以白有叔夜之短倪黄祖过称晋帝罪阮古无其贤所谓仲尼不假盖於子夏【史记穰侯传以天下攻齐如以千钧之弩决溃痈也庄子惠子谓庄子曰魏王贻我大瓠之种我树之成而实五石以盛水浆其坚不能自举也剖之以为瓢则瓠落无所容非不鸣然大也吾为其无用而掊之庄子曰夫子固拙於用大矣有五石之瓠何不虑以为大樽而浮乎江湖而忧其瓠落无所容则夫子犹有蓬之心也夫叔夜之短谓其饮酒恃才如嵇叔夜也称衡事见二十二卷注晋书山涛举阮咸典选曰阮咸贞素寡欲深识清浊万物不能移若在官人之职必绝於时武帝以咸耽酒浮虚遂不用家语孔子将行雨而无盖门人曰商也有之孔子曰商之为人也甚愴於财吾闻与人交推其长者违其短者故能久也嵇康与山涛绝交书仲尼不假盖於子夏护其短也】经乱离白章句荡尽上元末顓於绛偶然得之沈吟累年一字不下今日怀旧援笔成序首以赠顓作顓酬白诗不忘故人也次以大鹏赋古乐府诸篇积薪而録文有差互者两举之白未绝笔吾其再刊付男平津子掌其他事迹存於後序【唐时河东道绛州有绛县沈吟累年谓讽咏不倦一字不下谓不敢妄加评隲积薪而録谓随所得而编次不论先後如积薪然两举之谓两存之再刊谓後有所得再加续补其他事迹存於後序谓事迹之未尽者俟有访问作後序以纪之也○琦按是篇钩章棘句期期不易读度其阙文譌字必多若笔体如是太白必着大名於天下之语毋乃为不虞之褒乎】

李翰林别集序 乐 史

李翰林歌诗李阳冰纂为草堂集十卷史又别收歌诗十卷与草堂集互有得失因校勘排为二十卷号曰李翰林集今於三馆中得李白赋序表赞书颂等亦排为十卷号曰李翰林别集【新唐书艺文志李白草堂集二十卷李阳冰録此云十卷盖唐书误也三馆昭文馆集贤院史馆也皆寓崇文院中名虽有三实止一地宋时藏书之府玉海按六典武德四年始置修文馆贞观二年建史馆於禁中专掌国史开元五年乾元殿东廊写四部书十三年改集仙殿为集贤殿以修书院为集贤殿书院三馆之名肇於此矣其昭文馆隶门下省史馆寓集贤尚未合为一自梁徙汴都旧志未备正明中始於今右长庆门东北小屋数十楹为三馆湫隘庳陋仅庇风雨太平兴国中诏有司度左升龙门东北车府地为三馆栋宇之制皆上亲授三年二月毕功尽迁西馆之书分於两庑贮焉东廊为昭文书库南廊为集贤书库西廊为史馆书库凡六库分经史子集四部正副本凡八万卷初乾德中平蜀得书万三千卷开宝中平吴得书二万余卷参以旧书为八万卷凡六库书籍皆以类相从用雕木为架青绫帕幕之简册之府翕然一变矣】翰林在唐天宝中贺秘监闻於明皇帝召见金銮殿降步辇迎如见绮皓草和蕃书思若悬河帝嘉之七宝方丈赐食於前御手调羹於是置之金銮殿出入翰林中其诸事迹草堂集序范传正撰新墓碑亦略而详矣史又撰李白传一卷事又稍周然有三事近方

得之【旧唐书上皇諡曰至道大圣大明孝皇帝庙号元宗晋书郭象能清言太尉王衍每云听象语如悬河泻水注而不竭和蕃书集中不载盖已亡軼史所撰李白传即宋史艺文志所载乐史李白外传一卷是也今亦不传尝见合璧事类中引李白传云每宴饮无不先及每庆具无不先沾中廐之马代其劳内厨之膳给其食疑即乐史所撰者与】开元中禁中初重木芍药即今牡丹也得四本红紫浅红通白者上因移植於兴庆池东沉香亭前会花方繁开上乘照夜车太真妃以步辇从诏选梨园弟子中尤者得乐一十六色李龟年以歌擅一时之名手捧檀板押衆乐前将欲歌之上曰赏名花对妃子焉用旧乐辞焉遽命龟年持金花牋宣赐翰林供奉李白立进清平调词三章白欣然承诏旨由若宿醒未解因援笔赋之其一曰云想衣裳花想容春风拂槛露华浓若非羣玉山头见会向瑶台月下逢其二曰一枝红艳露凝香云雨巫山枉断肠借问汉宫谁得似可怜飞燕倚新粧其三曰名花倾国两相欢长得君王带笑看解释春风无限恨沉香亭北倚阑干龟年以歌辞进上命梨园弟子略约调抚丝竹遂促龟年以歌之太真妃持颇梨七宝杯酌西凉州蒲萄酒笑领歌词意甚厚上因调玉笛以倚曲每曲徧将换则迟其声以媚之太真妃饮罢歛绣巾重拜上自是顾李翰林尤异於诸学士会高力士终以脱靴为深耻异日太真妃重吟前辞力士曰始以【繆本作为】妃子怨李白深入骨髓何翻拳拳如是耶太真妃因惊曰何翰林学士能【繆本下多一欲字】辱人如斯力士曰以飞燕指妃子贱之甚矣太真妃颇深然之上尝三欲命李白官卒为中宫所扞而止【此一事盖得之唐人所着松窗録太白入翰林在天宝初年此云开元中是叙得木芍药之由不指赋清平调之时也原注开元天宝花木记云禁中呼木芍药为牡丹通志略牡丹其花可爱如芍药宿枝如木故得木芍药之名芍药着於三代之际风雅之所流咏也牡丹初无名故依芍药以为名亦如木芙蓉之依芙蓉以为名也牡丹晚出唐始有名太真外传载沉香亭赏牡丹事照夜车作照夜白按明皇杂録上所乘马有玉花骢照夜白开元记照夜白封太山回令陈闳图之画监曹霸人马图红衣美髯奚官牵玉面驄緑衣阉官牵照夜白则车字殆白字之讹坎通监武惠妃薨上悼念不已後宫数千无当意者或言壽王妃杨氏之美絶世无双上见而悦之乃令妃自以其意乞为女冠号太真更为壽王娶左卫郎将韦昭训女潜纳太真宫中太真肌态丰艶晓音律性警颀善承迎上意不期岁宠遇如惠妃宫中号曰娘子凡仪礼皆如皇后天宝四载八月册为贵妃旧唐书元宗於听政之暇教太常乐工子弟三百人为丝竹之戏音响齐发有一声误元宗必觉而正之号为皇帝弟子又云梨园弟子以置院近於禁苑之梨园玉海梨园在光化门北韵会玻璃西国玉此云水玉千年冰化亦书作颇梨唐时诸州有凉州无西凉州考晋末凉州之地为羣雄割据分裂为三李嵩都酒泉谓之西凉秃髮乌孤都乐都谓之南凉沮渠蒙逊都张掖谓之北凉西凉之地在唐时则肃州酒泉郡也又西魏於古之张掖郡置西凉州寻改为甘州在唐亦为甘州又谓之张掖郡则甘肃二郡皆有西凉之名及考白乐天诗注有西凉节度杨敬述以唐书元宗本纪校之杨敬述乃凉州都督也集异记叶法善言西凉府今夜之灯元稹乐府吾闻昔日西凉州人烟扑地桑麻稠疑唐时槩谓凉州为西凉耳倚曲以声合曲也今谓之倚声】白尝有知鑒客并州识汾阳王郭子仪於行伍间为脱其刑责而獎重之及翰林坐永王之事汾阳功成请以官爵赎翰林上许之因而免诛翰林之知人如此汾阳之报德如彼【此一事得之裴敬所作翰林学士李公墓碑按唐书子仪以上元三年封汾阳郡王去太白贬夜郎时已四岁矣史盖追书其爵如此学圃蘧苏引乐史李白序曰郭子仪初在行伍李白客并州於哥舒翰坐中见之曰此壮士目光如火照人不十年当拥节旄屡脱其刑责翰因署为牙门将後子仪戡定安史之乱历诸道节度及永王璘

反事干李白子仪请以官爵赎翰林上许之因而免诛与此文不同考唐书子仪未尝为哥舒部下将而太白流夜郎时安庆绪尚在史思明方强何云戡定此盖出自诸家稗说而此书误以为乐史序耳】白之从弟令问尝目白曰兄心肝五臟皆锦绣耶不然何开口成文挥翰霞散尔尔【萧本只一尔字○此一事得之太白所作送从弟京兆参军令问之淮南觀省序】传中漏此三事今书於序中自有歌云吟诗作赋北窗里万言不及一杯水盖叹乎有其时而无其位呜呼以翰林之才名遇元宗之知见而乃飘零如是宋中丞荐於圣真云一命不沾四海称屈得非命与白居易赠刘禹锡诗云诗称国手徒为尔命压人头不奈何斯言不虚矣凡百有位无自轻焉撰集之次聊存梗概而已时在绕溜州中咸平元年三月三日序【圣真谓肃宗按唐书肃宗諡文明武德大圣大宣孝皇帝圣真疑是圣宣之讹绕溜州商州也汉书王莽传绕溜之固南当荆楚顔师古注谓之绕溜者言四面塞厄其道屈曲谿谷之水回绕而溜也其处即今之商州界七盘十二?是也咸平宋真宗即位改年之年号时乐史由著作郎值史馆迁职方出知商州见宋史】故翰林学士李君墓志【并序】李华

呜呼姑熟东南青山北址有唐高士李白之墓呜呼哀哉夫仁以安物公其懋焉义以济难公其志焉识以辩理公其博焉文以宣志公其懿焉宜其上为王师下为伯友年六十有二不偶赋临终歌而卒悲夫圣以立德贤以立言道以恒世言以经俗虽曰死矣吾不谓其亡矣也有子曰伯禽天然长能持幼能辩数梯公之德必将大其名也已矣【姑熟即当涂县之旧名详见二十五卷注青山在太平府城东南三十里太白初葬龙山後乃迁葬青山此云青山北址谓龙山在青山之北耳左传太上有立德其次有立功其次有立言虽久不废此之谓不朽】铭曰

立德谓圣立言谓贤嗟君之道奇於人而侔於天哀哉【庄子子贡曰敢问畸人曰畸人者畸於人而侔於天陆德明注司马云畸不偶也侔等也亦从也按唐书李华传言天下士大夫家传墓板及州县碑颂时时賫金帛往请今华之文多见於文苑英华唐文粹中乃作太白墓志不特於生平行事一切不言即郡邑世系表字配偶亦略而不书寥寥数言何其惜墨如金乃尔即其揄扬之辞亦与太白泛而不切较之元微之所作杜子美墓志相去天渊矣 畸音鸡】

唐故翰林学士李君碣志【碣即碑也韵会方者谓之碑圆者谓之碣】

刘全白撰

顾游秦建

君名白广汉人性倜傥好纵横术善赋诗才调逸迈往往兴会属词恐古人【繆本缺人字】之善诗者亦不逮尤工古歌少任侠不事产业名闻京师【太白绵州人而此云广汉盖绵州在唐为巴西郡在汉属广汉郡本旧时地名而言谓之广汉唐时实无广汉郡名也】天宝初元宗辟翰林待诏因为和蕃书并上宣唐鸿猷一篇上重之欲以纶诰之任委之同列者所谤诏令归山遂浪迹天下以诗酒自适又志尚道术谓神仙可致不求小官以当世之务自负流离轆轳竟无所成名有子名伯禽偶游至此遂以疾终因葬於此文集亦无定卷家家【萧本

少一家字】有之代宗登极广拔淹瘁时君亦拜拾遗闻命之後君亦逝矣呜呼与其才不与其命悲夫【困学纪闻李白上宣唐鸿猷一篇即本传所谓诏见金銮殿奏颂一篇者也今集中阙沈约齐安陆昭王碑文始以文学游梁俄而入掌纶诰李周翰注纶诰谓天子制勅之言韵会轆轳车行不利故人不得志谓之轆轳亦作輶轳楚辞輶轳留滞王逸曰不遇也唐书百官志门下省有左拾遗六人中书省有右拾遗六人皆从八品上掌供奉讽谏大事廷议小则上封事轆音坎輶音可】全【俗本作李误】白幼则以诗为君所知及此投吊

荒坟将毁追想音容悲不能止邑有贤宰顾公游秦志好为诗亦尝慕效李君气调因嗟盛才冥寞遂表墓式坟乃题贞石冀传於往来也【顏延年诗衣冠终冥漠陵邑转葱菁刘良注冥漠虚无也後汉书明帝纪遣使者以中牢祠萧何霍光帝谒园陵过式其墓章怀太子注式敬也礼记曰行过墓必式王巾头陀寺碑文胜幡西振贞石南刊刘良注贞坚也】贞元六年四月七日记沙门履文书坟去墓记一百二十步【贞元德宗年号贞元六年去宝应元年大白没时二十九年】

唐左拾遗翰林学士李公新墓碑【并序】

范传正

骐驎筋力成意在万里外历块一蹶毙於空谷惟余骏骨价重千金大鹏羽翼张势欲摩穹昊天风不来海波不起塌翅别岛空留大名人亦有之故左拾遗翰林学士李公之谓矣【王褒圣主得贤臣颂过都越国蹶如历块顏师古注如经历一块言其疾速之甚也诗小雅皎皎白驹在彼空谷毛传空大也骏骨见十一卷注楚辞为凤凰作鹖笼兮虽翕翅其不容塌翅犹翕翅之谓又陈琳檄文垂头塌翼莫所冯恃或用其字误塌作塌亦未可定】公名白字太白其先陇西成纪人絕嗣之家难求谱牒公之孙女搜於箱篋中得公之亡子伯禽手疏十数行纸坏字缺不能详备约而计之凉武昭王九代孙也隋末多难一房被窜於碎叶流离散落隐易姓名故自国朝已来漏於属籍神龙初潜还广汉因侨为郡人父客以逋其邑遂以客为名高卧云林不求禄仕【唐书地理志焉耆都督府贞观十八年灭焉耆置有碎叶城调露元年都护王方翼所筑四面十二门为屈曲隐出伏没之状隶安西都护府其叙自安西入西域道里安西西出约千余里至碎叶川口八十里至裴罗将军城又西四十里至碎叶城城北有碎叶水韵会侨寓也增韵旅寓而居也】公之生也先府君指天枝以复姓先夫人梦长庚而告祥名之与字咸所取象受五行之刚气叔夜心高挺三蜀之雄才相如文逸瓌奇宏廓拔俗无类少以侠自任而门多长者车常欲一鸣惊人一飞冲天彼渐陆迁乔皆不能也由是慷慨自负不拘常调器度弘大声闻於天【天枝谓帝室之支???王僧孺发愿文天枝峻密帝叶英芬长庚亦谓之太白即五星之金星也五星各聚五行之精气而成象五行之中金得其刚故曰得五行之刚气三国志注嵇康字叔夜少有雋才旷迈不羣高亮任性不修名誉寬简有大量学不师授博学多闻长而好老庄之业恬静无欲性好服食常采御上药善属文论弹琴咏诗自足於怀抱之中三蜀蜀郡广汉郡犍为郡也见四卷注世说注晋阳秋曰吕安志量开旷有拔俗风气史记陈平家乃负郭穷巷以弊席为门然门外多长者车辙齐威王之时喜隐淳于髡说之以隐曰国中有大鸟止王之庭三年不蜚又不鸣王知此鸟何也王曰此鸟不飞则已一

飞冲天不鸣则已一鸣惊人周易渐卦九三鸿渐于陆诗小雅伐木丁丁鸟鸣嚶嚶出自幽谷迁于乔木 瓊音規】天宝初召见於金銮殿元宗明皇帝降辇步迎如见园綺论当世务草荅蕃书辩如悬河笔无停缀元宗嘉之以宝牀方丈赐食於前御手和羹德音褒美褐衣恩遇前无比俦遂直翰林专掌密命将处司言之任多陪侍从之游他日泛白莲池公不在宴皇欢既洽召公作序时公已被酒於翰苑中仍命高将军扶以登舟优宠如是既而上疏请还旧山元宗甚爱其才或虑乘醉出入省中不能不言温室树恐掇後患惜而遂之【衞衡鸛鵒赋序笔不停缀文不加点旧唐书宦官传天宝初加高力士冠军大将军右监门卫大将军进封渤海郡公七载加骠骑大将军范不称力士名而称高将军非尊力士也以见元宗优宠太白之至耳汉书长公主共养省中伏俨曰蔡邕云本为禁中门合有禁非侍御之臣不得妄入孝元皇后父名禁避之改曰省中顔师古曰省察也言入此中皆当察视不可妄也汉书或问孔光温室省中树皆何木也光嘿不应更荅以他语其不泄如是】公以为千钧之弩一发不中则当摧撞折牙而永息机用安能傲碌碌者苏而复上哉脱屣轩冕释羈縻锁因肆情性大放宇宙间饮酒非嗜其酣乐取其昏以自富作诗非事於文律取其吟以自适好神仙非慕其轻举将不可求之事求之欲耗壮心遣余年也【太平御覽王琚教射经曰张弩左手承橈右手迎上释名弩钩弦者曰牙似齿牙也是橈者弩之匣牙者弩之机钩也史记平原君传公等録等録録所谓因人成事者也索隱曰说文云録録随从貌酷吏传九卿碌碌奉其官救过不瞻碌碌犹録録也左传主人悬布堇父登之及堇而絶之坠则又悬之苏而复上者三正义曰苏者死而更生之名也堇父坠而闷絶似若死然得苏悟而复缘布上脱屣见二十二卷注】在长安时秘书监贺知章号公为谪仙人吟公乌栖曲云此诗可以哭鬼神矣时人又以公及贺监汝阳王崔宗之裴周南等八人为酒中八仙朝列赋谪仙歌百余首俄属戎马生郊远身海上往来干斗牛之分优游没身偶乘扁舟一日千里或遇胜境终年不移【繆本移下多一时字】长江远山一泉一石无往而不自得也晚岁渡牛渚矶至姑熟悦谢家青山有终焉之志盘桓利居竟卒於此其生也圣朝之高士其往也当涂之旅人代宗之初搜罗俊逸拜公左拾遗制下於彤庭礼降於玄壤生不及禄没而称官呜呼命与【老子天下无道戎马生於郊河上公注战伐不止戎马生於郊境之上久不还也史记正义吴地斗牛之分野今之会稽九江丹阳豫章庐江广陵六安临淮郡也牛渚矶姑熟青山俱见前注青山有谢朓旧宅故曰谢家青山周易屯卦初九盘桓利居贞孔穎达正义盘桓不进之貌处屯之初动则难生故盘桓也不可进惟宜利居处贞正彤庭见一卷注】传正共【繆本缺共字】生唐代甲子相悬常於先大夫文字中见与公有浔阳夜宴诗则知与公有通家之旧【新唐书范传正字西老邓州顺阳人父伦为户部员外郎与赵郡李华善有当世名传正举进士宏辞皆高第授集贤殿校书郎历歙湖苏三州刺史有殊政进拜宣歙观察使代还改光禄卿】早於人间得公遗篇逸句吟咏在口无何叨蒙恩獎廉问宣池按图得公之坟墓在当涂属【繆本缺属字】邑因令禁樵采备洒扫访公之子孙欲【繆本作故】申慰荐凡三四年乃获孙女二人一为陈云之室一为【繆本作乃】刘劝之妻皆编户甿也因召至郡庭相见与语衣服村落形容朴野而进退闲雅应对详諦且祖德如在儒风宛然问其所以则曰父伯禽以贞元八年不禄而卒有兄一人出游一十二年不知所在父存无官父歿为民有兄不相保为天下之穷人无桑以自蚕非不知机杼无田以自力非不知稼穡况妇人不任布裙粝食何所仰给偁於农夫救死而已久不敢闻於县官惧辱祖考乡间逼迫忍耻来告言讫泪下余亦对之泫然因云先祖志在青山遗言宅兆顷属多故殡於龙山东麓地近而非本意坟高三尺日益摧圯力且不及知如之何

闻之惘然将遂其请因当涂令诸葛纵会计在州得论其事纵亦好事者学为歌诗乐闻其语便道还县躬相地形卜新宅於青山之阳以元和十二年正月二十三日迁神於此遂公之志也西去旧坟六里南抵驿路三百步北倚谢公山即青山也天宝十二载勅改名焉因告二女将改适於士族皆曰夫妻之道命也亦分也在孤穷既失身於下俚仗威力乃求援於他门生纵偷安死何面目见大父於地下欲败其类所不忍闻余亦嘉之不夺其志复并税免徭役而已【宣池二州唐时属江南西道史记而况匹夫编户之民乎说文甿田民也武庚切谛审也都计切礼记士曰不禄庶人曰死孔穎达正义不禄者士禄以代耕而今遂死是不终其禄也韵会粝米不精也俚偶也孝经卜其宅兆而安措之唐明皇注宅墓穴也兆莹域也周礼司会以逆羣吏之治而听其会计元和十二年去宝应元年公卒时得五十六年史记留侯世家大父开地相韩昭侯应劭曰大父祖父也粝音赖杼音紆会音桧】今士大夫之葬必志於墓有勲庸道德之家兼树碑於道余才术贫虚不能两致今作新墓铭兼刊二石一寘於泉扃一表於道【一作通】路亦岷首汉川之义也庶芳声之不泯焉【晋书杜预好为後世名常言高岸为谷深谷为陵刻石为二碑纪其勲绩一沈万山之下一立岷山之上曰安知此後不为陵谷乎】文集二十卷或得之於时之文士或得之於宗族编辑断简以行於代铭曰

嵩岳降神是生辅臣蓬萊遣真斯为逸人晋有七贤唐称八仙应彼星象唯公一焉晦以麴蘖暢於文篇万象奔走乎笔端万虑泯灭乎罇前卧必酒瓮行惟酒船吟风咏月席地幕天但贵乎适其所适不知夫所以然而然至今尚疑其醉在千日宁审乎壽终百年谢家山兮李公墓异代诗流同此路旧坟卑庠风雨侵新宅爽垲松栢林故乡万里且无嗣二女从民永於此猗欵琢石为二碑一藏幽隧一临歧岸深谷高变化时一存一毁名不亏【诗大雅崧高维岳骏极於天维岳降神生甫及申晋七贤见十二卷注应星象谓梦长庚而生也尚书说命若作酒醴尔惟麴蘖说文麴酒母也蘖牙米也刘伶酒德颂幕天席地纵意所如博物志昔刘元石於中山酒家酤酒酒家与千日酒忘言其节度归至家当醉而家人不知以为死也权葬之酒家计千日满乃忆元石前来酤酒醉向醒耳往视之云元石亡来三年已葬於是开棺醉始醒俗云元石饮酒一醉千日左传宫室卑庠广韵庠下也爽垲高地详二十八卷注宋孝武帝诗深松朝已雾幽隧晏未明韵会隧墓道也谓地通道以葬诗商颂猗与那与毛传曰猗叹辞正义曰谓美而叹之也庠音陞垲音凯】

翰林学士李公墓碑 裴敬

李翰林名白字太白以诗着名召入翰林世称才名占得翰林他人不复争先其後以胁从得罪既免遂放浪江南死宣城葬当涂青山下李阳冰序诗集粗具行止敬尝游江表过其墓下爱其才壮其气味其嗜酒知其取适作碑於墓【夏书胁从罔治江表谓江南之地】且曰先生得天地秀气耶不然何异於常之人耶或曰太白之精下降故字太白故贺监号为谪仙不其然乎故为诗格高旨远若在上天物外神仙会集云行鹤驾想见飘然之状视尘中屑屑米粒虫睫纷扰菌蠢羈絆蹂躪之比【张衡南都赋芝房菌蠢生其隈三国志注曹植上书固当羈絆於世绳维系於禄位班固东都赋蹂躪其十二三李善注字林曰蹂践也汝九切说文躪𨔵也与躪同力振切睫音接又音札菌音窘躪音吝】又尝有知鑒客并州识郭汾阳於行伍间为免脱其刑责而獎重之後汾阳以功成官爵请赎翰林上许之因免诛其报也又常心许

剑舞裴将军予曾叔祖也尝投书曰如白愿出将军门下其文高其气雄世稀其本惧失其传故序传之太和初文宗皇帝命翰林学士为三絶赞公之诗歌与将军剑舞泊张旭长史草书为三絶夫天付上才必同灵气贤杰相投龙虎两合可为知者言非常人所知也【张长史草书见六卷注太平广记开元中将军裴旻居母丧诣吴道子请於东都天宫寺画神鬼数壁以资冥助道子曰废画已久若将军有意为吾纒结舞剑一曲庶因猛励获通幽冥旻於是脱去縗衣若常时装饰走马如飞左旋右抽掷剑入云高数十丈若电光下射旻引手执鞘承之剑透室而入观者数千百人无不惊栗道子於是援毫图壁?然风起为天下之壮观】夫古以名德称占其官諡者甚希前以诗称者若谢吏部何水部陶彭泽鲍参军之类唐朝以诗称若王江宁宋考功韦苏州王右丞杜员外之类以文称者若陈拾遗苏司业元容州萧功曹韩吏部之类以德行称者元鲁山阳道州以直称者魏文贞狄梁公以忠烈称者顔鲁公段太尉以武称者李卫公英公以学行文翰俱称者虞秘监唐之得人於斯为盛翰林其以诗称之一也【谢吏部谓谢朓南齐时为尚书吏部郎何水部谓何逊梁天监中起家奉朝请为安西安成王参军事兼尚书水部郎陶彭泽谓陶潜晋末为彭泽令鲍参军谓鲍照宋临海王子项为荆州以照为前军参军掌书记之任王昌龄字少伯江宁人第进士中宏词科为汜水尉後贬龙标尉史称昌龄工诗世称王江宁盖以其地名称之宋考功名之问字延清虢州弘农人景龙中为考功员外郎韦应物长安京兆人贞元初为苏州刺史世号韦苏州王维字摩诘太原祁人官至尚书右丞杜甫字子美河南巩人严武出镇成都美为节度参谋检校工部员外郎陈子昂字伯玉梓州射洪人则天朝举进士官右拾遗苏源明京兆武功人天宝间举进士第累迁国子司业擢考功郎中知制诰终秘书少监元结字次山河南人天宝十二年举进士累官容管经略使萧穎士字茂挺兰陵人开元二十三年举进士对策第一後为扬州功曹参军韩愈字退之邓州南阳人历官吏部侍郎元德秀字紫芝河南人开元二十一年登进士第为鲁山令士大夫高其行谓之元鲁山而不名阳城字元宗北平人隐中条山远近慕其德行多从之学李泌荐为著作郎迁谏议大夫改国子司业出为道州刺史魏徵字元成钜鹿曲城人当太宗朝知无不言每犯顔进谏虽逢帝甚怒神色不移官至侍中特进諡曰文贞狄仁杰字怀英并州太原人则天朝前後匡正奏对凡数万言睿宗时追封梁国公顔真卿字清臣琅邪临沂人官刑部尚书封鲁郡公出使李希烈不屈而死真卿立朝正色刚而有礼非公言直道不萌於心天下不以姓名称而独曰鲁公段秀实字成公陇州汧阳人累官司农卿朱泚盗据宫阙将欲僭位秀实夺象笏擊之中其颞泚流血而走凶党羣至遂遇害诏赠太尉諡曰忠烈李靖字药师京兆三原人南平萧铣擒辅公祐北破突厥颉利西定吐谷浑累封卫国公李积字懋功曹州狐离人从太宗平窦建德降王世充破刘黑闥斩徐圆朗与赵郡王孝恭平辅公祐与李靖破颉利又破薛延陀磧北悉定平高丽虜其王累封英国公唐初名将推英卫二公虞世南字伯施越州余姚人累官秘书监太宗尝称世南有五絶一曰德行二曰忠直三曰博学四曰文辞五曰书翰】予尝过当涂访翰林旧宅又於浮屠寺化城之僧得翰林自写访贺监不遇诗云东山无贺老却棹酒船回味之不足重之为宝用献知者又於历阳郡得翰林与刘尊师书一纸思高笔逸又尝游上元蒋山寺见翰林赞志公云水中之月了不可取刀齐尺量扇迷陈语文简事备诚为作者附於此云【江南通志李白宅在太平府当涂县青山之麓白至姑熟依当涂令族人李阳冰见山水幽邃营宅以居古化城寺在太平府城内向化桥西礼贤坊巷内道林寺在江宁府之独龙阜梁改开善寺宋改太平兴国寺後改蒋山按此文称蒋山寺谓蒋山中所建之寺也与刘尊师书今不存】会昌三年二月中敬自淝水草堂南游江左

过公墓下四过青山两发涂口徘徊不忍去与前濮州鄆城县尉李劭同以公服拜其墓问其墓左人毕元宥实备洒扫留绵帛具酒饌祭公知公无孙有孙女二人一娶刘劝一娶陈云皆农夫也且曰二孙女不拜墓已五六年矣因告邑宰李君都杰请免毕元宥力役俾专洒扫事【会昌武宗年号会昌三年去宝应元年太白没时盖八十二年矣江南通志淠水亦曰淝水一名白沙河源出六安州霍山之北下流经壽州入於淮江左大江以南之地详十二卷注唐书地理志河南道濮州有鄆城县 淠音譬又音备鄆音眷劭音邵】嘻享名甚高後事何薄谢公旧井新墓角落青山白云共为萧索巨竹拱木如公卓犖天长地久其名不朽此为祭文写授元宥【一统志谢公井在青山路侧齐宣城太守谢朓所凿左传尔墓之木拱矣杜预注合手曰拱】又为碑曰贵尽皆然名存则难故予重名不重官作李翰林碑十五字而已

旧唐书文苑列传 刘 昉

李白字太白山东人少有逸才志气宏放飘然有超世之心父为任城尉因家焉【李阳冰魏颢刘全白范传正诸人之作皆以太白为蜀人即以太白之诗考之亦以巴蜀为故乡东鲁乃寄寓昭然分别而刘氏独以为山东人按杜子美诗近来海内为长句汝与山东李白好元微之杜工部墓系铭是时山东人李白亦以奇文取称疑太白寓家山东日久故以山东称之旧史遂承其误坎若言父为任城尉因家焉则更与范传正新墓碑所云父客高卧云林不求禄仕者全不同未知又何所本】少与鲁中诸生孔巢父韩准裴政张叔明陶沔等隐於徂徕山酣歌纵酒时号竹溪六逸天宝初客游会稽与道士吴筠隐於剡中筠徵赴阙荐之於朝与筠俱待诏翰林白既嗜酒日与饮徒醉於酒肆元宗度曲欲作乐府新词亟召白白已卧於酒肆矣召入以水洒面即令秉笔顷之成十余章帝颇嘉之尝沈醉殿上引足令高力士脱靴由是斥去乃浪迹江湖终日沈饮时侍御史崔宗之谪官金陵与白诗酒唱和尝月夜乘舟自采石达金陵白衣宫锦袍於舟中顾瞻笑傲旁若无人初贺知章见白赏之曰此天上谪仙人也禄山之乱元宗幸蜀在涂以永王璘为江淮兵马都督扬州节度大使白在宣州谒见遂辟从事永王谋乱兵败白坐长流夜郎【太白避地庐山为永王所迫致见於忆旧书怀诗及为宋中丞自荐表甚明旧史谓白在宣州谒见者误也】後遇赦得还竟以饮酒过度死於宣城有文集二十卷行於时

新唐书文艺列传 宋 祁

李白字太白兴圣皇帝九世孙其先隋末以罪徙西域神龙初遁还客巴西【兴圣皇帝谓李昪唐高祖之七世祖详见前注巴西蜀中郡名即绵州也】白之生母梦长庚星因以命之十岁通诗书既长隐岷山州举有道不应苏頲为益州长史见白异之曰是子天材英特少益以学可比相如然喜纵横术擊剑为任侠轻财重施更客任城与孔巢父韩准裴政张叔明陶沔居徂徕山日沈饮号竹溪六逸天宝初南入会稽与吴筠善筠被召故白亦至长安往见贺知章知章见其文叹曰子谪仙人也言於元宗召见金銮殿论当世事奏颂一篇帝赐食亲为调羹有诏供奉翰林白犹与饮徒醉於市帝坐沉香亭子意有所感欲得白为乐章召入而白已醉左右以水頽面稍解援笔成文婉丽精切无留思帝爱其才数宴饮白常侍帝醉使高力士脱靴力士数贵耻之摘其诗以激杨贵妃帝欲官白妃辄沮止白自知不为亲近所容益放

不自修与知章李适之汝阳王璿崔宗之苏晋张旭焦遂为酒中八仙人恳求还山帝赐金放还白浮游四方尝乘舟与崔宗之自采石至金陵着宫锦袍坐舟中旁若无人安禄山反转侧宿松匡庐间永王璘辟为府僚佐【句】璘起兵潜还彭泽璘败当诛初白游并州见郭子仪奇之子仪尝犯法白为救免至是子仪请解官以赎有诏长流夜郎【此则本裴敬墓碑及乐史集序本文谓免其刑责而獎重之刑责不过谓犯笞杖小罪非谓其犯诛戮大刑新史叙笔稍晦後人乃谓子仪犯法将刑以太白言於主帅得免诛戮殆後子仪力战而启中兴皆属太白之力不特小说传奇喧腾异说而文人才士间亦入之诗笔误矣】会赦还寻阳坐事下狱时宋若思将吴兵三千赴河南道寻阳释囚辟为参谋未几辞职【琦按太白有中丞宋公以吴兵三千赴河南军次寻阳脱予之囚参谋幕府因赠之诗不言其囚系所坐何事又其为宋中丞自荐表云永王东巡胁行中道奔走却至彭泽具已陈首前後经宣慰大使崔涣及臣推覆清雪寻经奏闻则知寻阳之囚正坐永王事新史以为赦还之後在寻阳坐事下狱而宋若思释之者以一事分为二事非也曾南丰後序中已辨其误】李阳冰为当涂令白依之代宗立以左拾遗召而白已卒年六十余白晚好黄老度牛渚矶至姑熟悦谢家青山欲终焉及卒葬东麓元和末宣歙观察使范传正祭其塚禁樵采访後裔惟二孙女嫁为民妻进止仍有风范因泣曰先祖志在青山顷葬东麓非本意传正为改葬立二碑焉告二女将改妻士族辞以孤穷失身命也不愿更嫁传正嘉叹复其夫徭役文宗时诏以白歌诗裴旻剑张旭草书为三絶

李太白文集後序

唐李阳冰序李白草堂集十卷云当时着述十丧其九咸平中乐史别得白歌诗十卷合为李翰林集二十卷凡七百七十六篇史又纂杂着为别集十卷治平元年得王文献公溥家藏白诗集上中二帙凡广一百四篇惜遗其下帙熙宁元年得唐魏万所纂白诗集二卷凡广四十四篇因裒唐类诗诸编泊刻石所传别集所载者又得七十七篇无虑千篇沿旧目而厘正其彙次使各相从以别集附於後凡赋表书序碑颂记铭赞文六十五篇合为三十卷同舍吕缙叔出汉东紫阳先生碑而残缺间莫能辨不复收云夏五月晦常山宋敏求题【论太白诗集之繁富必归功於宋然其紊杂亦实由於宋盖李阳冰所序草堂诗集十卷出自太白手授乃其真确而无疑者也次则魏万所纂太白诗集二卷亦当不甚谬误乐史所得之十卷真?便不可辨若其他以讹传讹尤难考订使宋当日先後集次之时以阳冰所序者为正乐史所得者为续杂采於诸家之二百五十五篇附於後而明题其右自某篇以下四十四首得自魏万所纂自某篇以下一百四首得之王文献家所藏自某篇以下若干首得之唐类诗自某篇以下得之某地石刻自某篇以下若干首得之别集使後之覽者信其所可信而疑其所可疑不致有鱼目混珠砒砒乱玉之恨岂不甚善乃见不及此而分析诸诗以类相从遂尔真伪杂陈渭泾不辨功虽勤也过亦在焉不重可惜乎】

李白集三十卷旧歌诗七百七十六篇今千有一篇杂着六十五篇者知制诰常山宋敏求字次道之所广也次道既以类广白诗自为序而未考次其作之先後余得其书乃考其先後而次第之盖白蜀郡人初隐岷山出居襄汉之间南游江淮至楚观云梦云梦许氏者高宗时宰相圉师之家也以女妻白因留云梦者三年去之齐鲁居徂徕山竹溪入吴至长安明皇闻其

名召见以为翰林供奉顷之不合去北抵赵魏燕晋西涉岐邠历商於至洛阳游梁最久复之齐鲁南游淮泗再入吴转徙金陵上秋浦寻阳天宝十四载安禄山反明年明皇在蜀永王璘节度东南白时卧庐山璘迫致之璘军败丹阳白奔亡至宿松坐系寻阳狱宣抚大使崔涣与御史中丞宋若思验治白以为罪薄宜贯而若思军赴河南遂释白囚使谋其军事上书肃宗荐白才可用不报是时白年五十有七矣乾元元年终以污璘事长流夜郎遂泛洞庭上峡江至巫山以赦得释憩岳阳江夏久之复如寻阳过金陵徘徊於历阳宣城二郡其族人阳冰为当涂令白过之以病卒年六十有四时宝应元年也其始终所更涉如此此白之诗书所自叙可考者也范传正为白墓志称白偶乘扁舟一日千里或遇胜景终年不移则见於白之自序者盖亦其略也旧史称白山东人为翰林待诏又称永王璘节度扬州白在宣城谒见遂辟为从事而新书又称白流夜郎还寻阳坐事下狱宋若思释之者皆不合於白之自叙盖史误也白之诗连类引义虽中於法度者寡然其辞閎肆僞伟殆骚人所不及近世所未有也旧史称白有逸才志气宏放飘然有超世之心余以为实录而新书不着其语故録之使覽者得详焉南丰曾巩序【南丰据太白之诗书所自叙者以驳正新旧二史之误是矣其谓留云梦者三年去之齐鲁尚未是按上裴长史书憩迹於此至移三霜盖谓上书之时羁留云梦已及三年非谓三年之後遂去云梦而他适也太白有送侄端游庐山序曰南游云梦覽七泽之壮观酒隐安陆蹉跎十年云云南丰偶失之考证耳然南丰云杂着六十五篇今本有六十六篇岂此一篇系後人增益而南丰所见尚无之耶又谓太白之卒年六十有四按李华墓志乃六十二也以代宋中丞自荐表校之寻阳清雪之日年五十有七合其即世之岁当以六十有二为是】

临川晏公知止字处善守苏之明年政成暇日出李翰林诗以授於渐曰白之诗历世浸久所传之集率多讹缺予得此本最为完善将欲镂板以广其传渐切谓李诗为人所尚以宋公编类之勤而曾公考次之详世虽甚好不可得而悉见今晏公又能镂板以传使李诗复显於世实三公相与成始而成终也元丰三年夏四月信安毛渐校正谨题【刻本有删去此篇者以其无關於太白之事蹟耳然宋公编类之藁镂木传世实始於是今所传诸刻无不滥觞焉不敢泯其所自故仍旧本存之】

李太白集注卷三十一

卷三十二

钦定四库全书

李太白集注卷三十二

钱塘 王琦 撰

诗文【二十一首】

赠李白 杜甫

秋来相顾尚飘蓬未就丹砂媿葛洪痛饮狂歌空度日飞扬跋扈为谁雄

赠李白 杜甫

二年客东都所历厌机巧野人对羶腥疏食常不饱岂无青精饭使我颜色好苦乏买药资山林迹如扫李侯金闺彦脱身事幽讨亦有梁宋游方期拾瑶草

与李十二白同寻范十隐居 杜甫

李侯有佳句往往似阴铿余亦东蒙客怜君如弟兄醉眠秋共被携手日同行更想幽期处还寻北郭生入门高兴发侍立小童清落景闻寒杵屯云对古城向来吟橘颂谁欲讨蓴羹不愿沦簪笏悠悠沧海情【文献通考杜子美云李侯有佳句往往似阴铿今考之未见铿之所以似太白者太白固未易似也子美云尔殆必有说 渔隐丛话学林新编曰或云杜甫李白同时以诗名相轧不能不无毁誉甫赠白诗云李侯有佳句往往似阴铿此句乃所以鄙白也某按子美夔州咏怀寄郑监李宾客诗曰郑李光时论文章并我先阴何尚清省沈宋歟连翩盖谓阴铿何逊沈佺期宋之问也四人皆能诗文为时所称者而子美又以阴铿居四人之首则知赠太白之诗非鄙之也乃深美之也陈书阮卓传曰武威阴铿字子坚五岁能诵诗日赋千言及长博涉史传尤善五言诗为当时所重有集三卷行于世以此观之则子美赠太白诗往往似阴铿者乃美太白善为五言诗似阴铿也 西溪丛话杜甫忆李白诗云俊逸鲍参军亦有讥焉鲍照白紵辞一篇白用之杜又云李侯有佳句往往似阴铿如柳色黄金嫩梨花白雪香乃阴铿诗也 挥麈余话柳色黄金嫩梨花白雪香阴铿诗也李太白取用之杜子美赠太白诗云李侯有佳句往往似阴铿後人以为以此讥之然子美诗有蛟龙得云雨鵬鹖在秋天一联已见晋书记载矣 顾修远杜诗注解毕致中曰王荆公言子美赠太白诗云清新庾开府俊逸鲍参军但比之庾鲍而已又曰李侯有佳句往往似阴铿则又在庾鲍下矣荆公此说不惟不知太白庾鲍阴铿亦不知少陵甚矣少陵解闷絶句曰陶冶性灵存底物新诗改罢自长吟熟知二谢将能事颇学阴何苦用心少陵尝苦学阴铿而不至太白则往往似之此少陵所以见太白而心醉也太白能兼昔人独专之妙故其诗无敌于天下少陵欲与细论文正以此】

送孔巢父谢病归游江东兼呈李白

杜甫

巢父掉头不肯住东将入海随烟雾诗卷长留天地间钓竿欲拂珊瑚树深山大泽龙蛇远春寒野阴风景暮蓬莱织女回云车指点虚无引归路自是君身有仙骨世人那得知其故惜君只欲苦死留富贵何如草头露蔡侯静者意有余清夜置酒临前除罢琴惆怅月照席几岁寄我空中书南寻禹穴见李白道甫问信今何如【一作若逢李白骑鲸鱼道甫问信今何如】

饮中八仙歌 杜甫

知章骑马似乘船眼花落井水底眠汝阳三斗始朝天道逢麴车口流涎恨不移封向酒泉左相日兴费万钱饮如长鲸吸百川衔杯乐圣称避贤宗之潇洒美少年皎如玉树临风前苏晋长斋绣佛前醉中往往爱逃禅李白一斗诗百篇安市上酒家眠天子呼来不上船自称臣是酒中仙张旭三杯草圣传脱帽露顶王公前挥毫落纸如云烟焦遂五斗方卓然高谈雄辨惊四筵

冬日有怀李白 杜甫

寂寞书斋里终朝独尔思更寻嘉树传不忘角弓诗短褐风霜入还丹日月迟未因乘兴去空有鹿门期

春日忆李白 杜甫

白也诗无敌飘然思不羣清新庾开府俊逸鲍参军渭北春天树江东日暮云何时一尊酒重与细论文【柳亭诗话少陵怀供奉诗白也诗无敌飘然思不羣徐子能诗说曰李白天材甫虽称其敏捷而于法律上有所未安其视白如老先生见少年门生恐其不肯进故赞他极有分寸云云按太白生于武后圣历二年己亥子美生于睿宗先天元年壬子相望已十四年则太白实前辈也杜诗于人或称官闕或称爵里或曰丈人或曰先生而于太白辄呼其名者意是忘年之交不妨尔汝也若谓少年门生视白则大不然 渔隐丛话雪浪斋日记云或云太白诗其源流出於鲍明远如乐府多用白苧故子美云俊逸鲍参军盖有讥也琦按杜用古人诗句亦时有之如白云岩际宿蓝本何逊乃欲以此讥李恐无此自是非人之少陵 朱鹤龄杜诗注曰公与太白之诗皆学六朝前诗以李侯佳句比之陰铿此又比之庾鲍盖举生平所最慕者以相方也王荆公谓少陵于太白仅比于庾鲍阴铿则又下矣或遂以细论文讥其才疎此真瞽说公诗云颇学陰何苦用心又云庾信文章老更成又云流传江鲍体相顾免无儿公之推服诸家甚至则其推服太白为何如哉荆公所云必是俗子伪托耳 容斋随笔维摩诘经言文殊从佛所将诣维摩丈室问疾菩萨随之者以万亿计曰二士共谈必说妙法予观杜少陵寄太白诗云何时一樽酒重与细论文使二公真践此言时得洒扫撰杖履于其侧所谓不二法门不传之妙启聪发蒙出肤寸之泽以润千里者可胜道哉】

梦李白二首 杜甫

死别已吞声生别常恻恻江南瘴疠地逐客无消息故人入我梦明我常相忆恐非平生魂路远不可测魂来枫林青魂返关塞黑君今在罗网何似有羽翼落月满屋梁犹疑照颜色水深波浪濶无使蛟龙得【西清诗话李太白历见司马子微谢自然贺知章或以为可与神游八极之表或以为谪仙人其风神超迈英爽可知後世词人状者多矣亦间于丹青见之俱不若少陵之落月满屋梁犹疑照颜色熟味之百世之下想见风采此与李太白传神诗也】

其二

浮云终日行游子久不至三夜频梦君情亲见君意告归常局促苦道来不易江湖多风波舟楫恐失坠出门搔白首若负平生志冠盖满京华斯人独顛顚孰云网恢恢将老身反累千秋万岁名寂寞身後事【吴山民曰子美天末怀李白诗其尾联云应共冤魂语投诗吊汨罗今上篇云水深波浪濶无使蛟龙得此又云江湖多风波舟楫恐失坠疑是时必有妄传太白死者故子美云云後世遂有沉江骑鲸之说盖因公诗附会耳太白卒于当涂李阳冰家葬于谢家青山二史可考安有沉江事乎】

天末怀李白 杜甫

凉风起天末君子意如何鸿雁几时到江湖秋水多文章憎命达魑魅喜人过应共冤魂语投诗吊汨罗

寄李十二白二十韵 杜甫

昔年有狂客号尔谪仙人笔落惊风雨诗成泣鬼神声名从此大汨没一朝伸文采承殊渥流传必絶伦龙舟移棹晚兽锦夺袍新白日来深殿青云满後尘乞归优诏许遇我宿心亲未负幽栖志兼全宠辱身剧谈怜野逸嗜酒见天真醉舞梁园夜行歌泗水春才高心不展道屈善无邻处士称衡俊诸生原宪贫稻粱求未足薏苡谤何频五岭炎蒸地三危放逐臣几年遭鵬鸟独泣向麒麟苏武先还汉黄公岂事秦楚筵辞醴日梁狱上书辰已用当时法谁将此义陈老吟秋月下病起暮江滨莫?恩波隔乘槎与问津【本事诗李白出入宫中恩礼殊厚竟以疎纵乞归上亦以非廊庙器优诏罢遣之後以不羈流落江外又以永王招礼累谪于夜郎及放还卒于宣城杜所赠二十韵备叙其事读其文尽得其故迹杜逢禄山之难流离陇蜀毕陈于诗推见至隐殆无遗事故当时号为诗史金銮子杜少陵平生何独于太白数数然耶至读寄白二十韵有云才高心不展道屈善无邻处士称衡俊】

【诸生原宪贫稻粱求未足薏苡谤何频五岭炎蒸地三危放逐臣几年遭鵬鸟独泣向麒麟苏武先还汉黄公岂事秦楚筵辞醴日梁狱上书辰已用当时法谁将此意陈予三复而深悲之数语为太白洒谤事具而情皦太白无濡迹于永王璘事省然矣白亦尝有书怀赠江夏韦太守诗云仆卧香炉顶飡霞饮瑶泉门开九江转枕下五湖连半夜水军来浔阳满旌旛空名

适自误迫胁上楼船徒赐五百金弃之若浮烟辞官不受赏翻谪夜郎天夜郎万里道西上令人老扫荡六合清仍为负霜草日月无偏照何由诉苍昊甚详然不若杜诗之可?盖亲父不得为其子媒其父誉之不若他人誉之之为信也 王嗣爽曰此诗分明为李白作传其生平履历备矣白才高而狂人或疑其乏保身之哲公故为之剖白如未负幽栖志兼全宠辱身及楚筵辞醴梁狱上书数句皆刻意辩明与赠王维诗一病缘明主三年独此心相同总不欲使才人含冤千载耳卢世?谓是天壤间维持公道保护元气文字 仇沧柱曰按太白本传白喜纵横术击剑为任侠杜公向赠诗云飞扬跋扈为谁雄盖恐其负材任气至于僨事也后来永王璘起兵迫致不能自脱观其作东巡歌云永王正月东出师天子遥分龙虎旗又云二帝巡游俱未回五陵松柏使人哀又云南风一扫胡尘静西入长安到日边是以勤王望永王意中实未尝忘朝廷也及璘败而白遂系狱殆所遭时势之不幸耳少陵惓惓系念亦曲谅其苦心而深为之悲耳】

不见【近无李白消息】 杜 甫

不见李生久佯狂真可哀世人皆欲杀吾意独怜才敏捷诗千首飘零酒一盃匡山读书处头白好归来【沧浪诗话少陵与太白独厚于诸公诗中凡言太白可十四处至谓世人皆欲杀吾意独怜才醉眠秋共被携手日同行三夜频梦君情亲见君意其情好可想遯斋闲覽谓二人名既相逼不能无忌是以庸俗之见而度贤哲之心也予故不得不辨】

苏端薛复筵简薛华醉歌【以下三篇皆断章】

杜 甫

坐中薛华能醉歌歌辞自作风格老近来海内为长句汝与山东李白好何刘沈谢力未工才兼鲍照愁絶倒【计东曰长句谓七言歌行太白所擅場者太白长句其源出于鲍照故言何刘沈谢但能五言于七言则力有未工必若鲍照七言乐府如行路难之类方为妙絶耳公尝以俊逸鲍参军称太白诗正称其长也】

昔游 杜 甫

昔者与高李【适白】晚登单父台寒芜际碣石万里风云来桑柘叶如雨飞藿去徘徊清霜大泽冻禽兽有余哀

遣怀 杜 甫

忆与高李辈【适白】论交入酒垆两公壮藻思得我色敷腴气酣登吹台怀古视平芜芒砀云一去雁鹜空相呼【容斋四笔李太白杜子美在布衣时同游梁宋为诗酒会心之友以杜集考之其称太白及赠怀之篇甚多如李侯金闺彦脱身事幽讨南寻禹穴见李白道甫问讯今何如李白一斗诗百篇自称臣是酒中仙近来海内为长句汝与山东李白好昔者与高李

晚登单父台李侯有佳句往往似陰铿忆与高李辈论交入酒垆白也诗无敌飘然思不羣昔年有狂客号尔谪仙人落月滿屋梁犹疑照顏色三夜頻夢君情亲見君意秋來相顧尚飄蓬未就丹砂媿葛洪寂寞書齋里終朝獨尔思涼風起天末君子意何如不見李生久佯狂真可哀凡十四五篇至于太白与子美詩略不見一句或謂堯祠亭別杜補闕者是也乃殊不然杜但為右拾遺不曾任補闕兼自諫省出為華州司功迺避難入蜀未嘗復至東州所謂飯顛山頭之嘲亦好事者所撰耳 漁隱叢話藝苑雌黃云洪駒父詩話言子美集中贈太白詩最多而李白初無一篇与杜者按段成式酉陽雜俎云李集有堯祠贈杜補闕者即老杜也其詩云我覺秋興逸誰云秋氣悲山將落日去水与晴空宜云归碧海少雁度青天迟相失各万里茫然空尔思又不独飯顛山之句也予嘗考之太白集中有沙丘城下寄杜甫云我来竟何事高卧沙丘城城边有古树日夕连秋声魯酒不可醉齊歌空復情思君若汶水浩荡寄南征又有魯郡東石門送杜二甫云醉別復几日登臨徧池台何時石門路重有金尊開秋波落泗水海色明徂徠飛蓬各自远且尽手中杯洪駒父略不見此何也】

初至巴陵与李十二白裴九同泛洞庭湖三首

贾至

江上相逢皆旧游湘山永望不堪愁明月秋风洞庭水孤鸿落叶一扁舟

其二

枫?纷纷落叶多洞庭秋水晚来波乘兴轻舟无近远白云明月吊湘娥

其三

江畔枫叶初带霜渚边菊花亦已黄轻舟落日兴不尽三湘五湖意何长

洞庭送李十二赴零陵 贾至

今日相逢落叶前洞庭秋水远连天共说金华旧游处回看北斗欲潸然

杂言寄李白 任华

古来文章有奔逸气耸高格清人心神惊人魂魄我闻当今有李白大鹏赋鸿猷文嗤长卿笑子云班张所作琐细不入耳未知卿云得在嗤笑限否登庐山观瀑布海风吹不断江月照还空余爱此两句登天台望渤海云垂大鹏飞山压巨鳌背斯言亦好在至于他作多不拘常律振摆超腾既俊且逸或醉中操纸或兴来走笔手下忽然片云飞眼前划见孤峯出而我有时白日忽欲睡睡觉忽然起攘臂任生知有君君还知有任生未中间闻道在长安及余戾止君已江东访元丹邂逅不得见君面每常把酒向东望良久见说往年在翰林胸中矛戟何森森

新诗传在宫人口佳句不离明主心身骑天马多意气目送飞鸿对豪贵承恩召入凡几回待诏归来仍半醉权臣妬盛名羣犬多吠声有敕放君却归隐沦处高歌大笑出关去且向东山为外臣诸侯交迓驰朱轮白璧一双买交者黄金百镒相知人平生傲岸其志不可测数十年为客未尝一日低顔色八咏楼中坦腹眠五侯门下无心忆繁花越台上细柳吴宫侧緑水青山知有君白云明月偏相识养高兼养闲可望不可攀庄周万物外范蠡五湖间又闻访道沧海上丁令王乔时往还蓬莱经是曾到来方丈岂惟方一丈伊余每欲乘兴远相寻江湖拥隔劳寸心今朝忽遇东飞翼寄此一章表胸臆倘能报我一片言但访任华有人识

送李白之曹南序 独孤及

曩子之入秦也上方览子虚之赋喜相如同时由是朝诣公车夕挥宸翰一旦襜被金马蓬累而行出入燕宋与白云为伍然则适来时行也适去时止也彼碌碌者徒见三河之游倦百镒之金尽乃议子于得失亏成之间曾不知才全者无亏成志全者无得失进与退于道德乎何有是日也出车桐门将驾于曹仙药满囊道书盈篋异乎庄舄之辞越仲尼之去鲁矣送子何所平台之隅短歌薄酒击筑相和大丈夫各乘风波未始有极哀乐且不足累上士之心况小别乎请偕赋诗以见交态

李太白集注卷三十二

卷三十三

钦定四库全书

李太白集注卷三十三

钱塘 王琦 撰

诗文【五十九首】

调张籍 韩 愈

李杜文章在光焰万丈长不知羣儿愚那用故谤伤蚍蜉撼大树可笑不自量伊我生其後举
颈遥相望夜梦多见之昼思反微茫徒观斧凿不瞩治水航想当施手时巨刃磨天扬垠崖划
崩豁乾坤摆雷硠惟此两夫子家居率荒凉帝欲长吟哦故遣起且僵剪翎送笼中使看百鸟
翔平生千万篇金薤垂琳琅仙官勅六丁雷电下取将流落人间者泰山一毫芒我愿生两翅
捕逐出八荒精诚忽交通百怪入我肠刺手拔鲸牙举瓢酌天浆腾身跨汗漫不着织女襄顾
语地上友经营无天茫乞君飞霞佩与我高颀颀【渔隐丛话隐居诗话云元稹作李杜优劣
论先杜而後李韩愈不以为然作诗曰李杜文章在光焰万丈长不知羣儿愚那用相谤伤蚍
蜉撼大树可笑不自量为微之发也】

读李杜诗集因题卷後 白居易

翰林江左日员外剑南时不得高官职仍逢苦乱离暮年逋客恨浮世谪仙悲吟咏留千古声
名动四夷文场供秀句乐府待新词天意君须会人间要好诗

江行无题 钱 起

高浪如银屋江风一发时笔端降太白才大语终奇

漫成 李商隐

李杜操持事略齐三才万象共端倪集仙殿与金銮殿可是苍蝇惑曙鸡

读李白集 郑 谷

何事文星与酒星一时锺在李先生高吟大醉三千首留着人间伴月明

吊李翰林 曹 松

李白虽然成异物逸名犹与万方传昔朝曾侍元宗侧大夜应归贺老边山木易高迷故壠国
风长在见遗编投金渚畔春杨柳自此何人系酒船

李翰林【七爱诗七首之一】 皮日休负逸气者必有真放以李翰林为真放焉

吾爱李太白身是酒星魄口吐天上文迹作人间客礫砢千丈林澄澈万寻碧醉中草乐府十
幅笔一息召见承明庐天子亲赐食醉曾吐御牀傲几触天泽权臣妬逸才心如斗筭窄失恩
出内署海岳甘自适刺謁戴接?赴宴着谷屐诸侯百步迎明君九天忆竟遭腐脇疾醉魄归八
极大鹏不可笼大椿不可植蓬壶不可见姑射不可识五岳为辞锋四海作胸臆惜哉千万年
此俊不可得

古意 释贯休

常思李太白仙笔驱造化元宗致之七宝牀虎殿龙楼无不可一朝力士脱靴後玉上青蝇生
一个紫皇案前五色鳞忽然制断黄金鑰五湖大浪如银山满船载酒挝鼓过贺老成异物颠
狂谁敢和宁知江边坟不是犹醉卧

读李白集 释齐己

竭云涛剝巨鳌搜括造化空牢牢冥心入海海神怖骊龙不敢为珠主人间物象不供取饱饮
游神向元圃鏘金铿玉千余篇脰吞炙嚼人口传须知一二丈夫气不是绮罗儿女言

李翰林 徐 夔

谪下三清列八仙获调羹鼎侍龙顔吟开锁闥窥天近醉卧金銮待诏闲旧隐不归刘备国旅
魂常寄谢公山遗编往简应飞去散入祥云瑞日间

经李翰林庐山屏风叠所居 许 彬

放逐非多罪江湖偶不回深居应有为济代岂无才叠巘晴舒障寒川暗动雷谁能续高兴醉
死一千杯

太白戏圣俞【一作读李集效其体】 欧阳修

开元无事二十年五兵不用太白闲太白之精下人间李白高歌蜀道难蜀道之难难于上青
天李白落笔生云烟千奇万险不可攀却视蜀道犹平川宫娃扶来白已醉醉里成诗醒不记
忽然乘兴登名山龙咆虎啸松风寒山头婆娑弄明月九域尘土悲人寰吹笙饮酒紫阳家紫
阳真人驾云车空山流水空落花飘然已去流青霞下视区区郊与岛萤飞露湿吟秋草

李太白杂言 徐 积

噫嘻歔奇哉自开辟以来不知几千万余年至于开元间忽生李诗仙是时五星中一星不在天不知何物为形容何物为心胸何物为五臟何物为喉咙开口动舌生云风当时大醉骑游龙开口向天吐玉虹玉虹不死蟠胸中然後吐出光焰万丈凌虚空盖自有诗人以来我未尝见大泽深山雪霜冰霰晨霞夕霏千变万化雷轰电掣花葩玉洁青天白云秋江晓月有如此之人如此之诗屈生何悴宋玉何悲贾生何戚相如何疲人生何用自縲紲当须莘莘不可羈乃知公是真英物万叠秋山清耸骨当时杜甫亦能诗恰如老骥追霜鹘戴乌纱着宫锦不是高歌即酣饮饮时独对月明中醉来还抱清风寝嗟君逸气何飘飘枉教谪下青云霄大抵人生有用有不用岂可戚戚反効儿女曹采蟠桃於海上寻紫芝於山腰吞汉武之金茎沆瀣吹弄玉之秦楼凤箫

读李白集戏用奴字韵 李 纲

谪仙英豪盖一世醉使力士如使奴当时左右悉佞谀惊怪恇怯应逃逋我生端在千载後祭公只用一束刍遗编凛凛有生气玩味无斁谁如吾

读四家诗选【四首之一】 李 纲

谪仙乃天人薄游人间世词章号俊逸迈往有英气明皇重其名召见如绮李万乘尚僚友公卿何芥蒂脱靴使将军故耳非为醉乞身归旧隐来去同一戏沉吟紫芝歌缅邈青霞志笑着官锦袍江山聊傲睨肯从永王璘此事不须洗垂天赋大鹏端为真隐子神游八极表捉月初不死

题汉阳郎官湖 夏 倪

太白当年夜郎谪一樽聊与故人留南湖乞得郎官号自此名传五百秋

读李杜诗 陆 游

濯锦沧浪客青莲澹荡人才名塞天地身世老风尘士固难推挽人谁不贱贫明窗数编在长与物华新

读李翰林诗 陈 藻

杜陵尊酒罕相逢举世谁堪入此公莫怪篇篇吟妇女别无人物与形容

经采石渡留一絕句 吴 璞

抗议金銮反见仇一抔蟬蛻楚江头当时醉弄波闲月今作寒光万里流

白下亭 任斯庵

金銮殿上脱靴去白下亭东索酒尝一自青山冥漠後何人来道柳花香【见景定建康志】

杂书 方回

人言太白豪其诗丽以富乐府信皆尔一扫梁陈腐余篇细读之要自有朴处最于赠答篇肺腑露情愫何至昌谷生一一雕丽句亦焉用玉溪纂组失天趣沈宋非不工子昂独高步画肉不画骨乃以帝闲故

过池阳有怀唐李翰林 萨天锡

我思李太白有如云中龙垂光紫皇案御笔生青红羣臣不敢视射目目尽盲脱靴手污蔑蹴踏将军雄沉香走白兔玉环失顔容春风不成雨殿阁悬妖虹长啸拂紫髯手捻青芙蓉挂席千万里遨游江之东濯足五湖水挂巾九华峰放舟玉镜潭弄月秋浦中羈怀正浩荡行乐未及终白石烂齿齿貂裘淚蒙蒙神光走霹雳水底鞭雷公采石波浪恶青天云雾重我有一斗酒和泪洒天风

采石怀李白 萨天锡

梦断金鸡万里天醉挥秃笔扫鸾笺锦袍日进酒一斗采石江空月满船金马重门深似海青山荒塚夜如年祇应风骨蛾眉妬不作天仙作水仙

李谪仙 舒逊

召对金銮殿荣膺白玉堂气吞高力士眼识郭汾阳醉骨生疑蛻诗名死更香何由见顔色月落照空梁

夜闻谢太史读李杜诗 高启

前歌蜀道难後歌偃仄行商声激烈出破屋林鸟夜起邻人惊我愁寂寞正欲眠听此起坐心茫然高歌隔舍与相和双泪迸落青灯前李供奉杜拾遗当时流落俱堪悲严公欲杀力士怒白骨江海常忧饥二公高才且如此君今谓我将何如

吊李白 方孝孺

君不见唐朝李白特達士其人虽亡神不死声名流落天地间千载高风有谁似我今诵诗篇

乱髮飘萧寒若非胸中湖海濶定有九曲蛟龙蟠却忆金銮殿上见天子玉山已颓扶不起脱靴力士只羞颜捧砚杨妃劳玉指当时豪侠应一人岂爱富贵留其身归来长安弄明月从此不复朝金阙酒家有酒频典衣日日醉倒身忘归诗成不管?神泣笔下自有烟云飞丈夫襟怀真磊落将口谈天日月薄泰山高兮高可夷沧海深兮深可涸惟有李白天才夺造化世人孰得窥其作我言李白古无双至今采石生辉光嗟哉石崇空豪富终当埋没声不扬黄金白璧不足贵但愿男儿有笔如长杠

过采石吊李谪仙 邱 濬

蛾眉亭下吊诗魂千古才名世共闻江上洪涛生德色矶头草木带余醺光争日月常如在思入风云迴不羣岸芷汀兰无限意临风三复楚骚文

丁卯岁过采石吊李白 邱 濬

采石江头黄土一抔其东有蛾眉之亭其西有谪仙之楼谪仙仙去不复返惟有江水日夜流人生一世几何久不如眼前一杯酒饥来文字不堪餐死後虚名竟何有请君看此李谪仙掀揭天地声轰然长安市上眠不足长来采石江头眠百世光陰一大梦衾天枕地无人共宁知浩浩长江流不是醺丘春酒瓮此翁自是太白精星月自合相随行当时落水非失脚直驾长鲸归紫清至人虽死神不灭终古长庚伴月明

李太白 李东阳

醉别蓬莱定几年被人呼是谪神仙人间未有飞腾地老去骑鲸却上天

过采石怀李白 宗 臣

阊阖天门夜不关酒星何事谪人间为君五斗金茎露醉杀江南千万山

其二

忆君乘月下金陵何处吴山不夜登一曲潇湘秋万里至今疑在白云层

其三

楚水秋风薛荔高千帆明月大江涛蛾眉亭下芙蓉色犹似当年宫锦袍

其四

夜夜银河倒不流长虹西挂彩云愁醉来江底抱明月惊落天心万片秋【抱字本音之外又

有庖浮裊三平声皆作引取义释】

其五

到处孤槎秋万重沧江终夜卧鱼龙天风驱尽潇湘色祇为仙人破醉容

其六

秋山万仞落秋潭无限青枫好驻骖君跨长鲸去不返独留明月照江南

其七

采石矶头望白云青枫满地落纷纷夜深吹笛江亭上明月窥人恐是君

其八

楚江南折是天门江上蛟龙日夜喧为尔片帆开暮雨至今秋色锁云根

其九

短筇踏破楚山青日日苍梧醉洞庭何事淹留姑熟水千秋风雨怨湘灵

其十

西望匡庐接九华当年醉色傲烟霞可怜一片寒江月犹为千峰护落花

采石矶吊李太白 王叔承

插江采石三千尺何处苍苔酣李白乘风夜上金陵船宫锦袍明浪花赤天子将袍覆酒仙沉香亭下百花前幸臣脱靴紫貂耻贵妃捧砚青娥怜词成投笔六宫美教坊回首新声传一斗百篇犹未半零落风骚走江汉夜郎遂客浔阳囚一片青山魂烂漫山头问月呼苍旻笑傲万古空无人古人既往君亦去盃中旧月年年新古今一明月大化同精灵人间传羽蜕天上悬才名椒浆酹君还自倾钓矶采采如飞鲸安知太白不在此江东忽见长庚星

采石矶吊李太白 梁辰鱼

停桡矶下奠椒觞草木犹闻翰墨香飞燕已辞青琐闥长鲸自上白云乡他年有梦游天姥此夕无魂到夜郎西望长安漫惆怅金銮春殿久荒凉

过南陵太白酒坊 许梦熊

谪仙过日酒初熟此日犹传新酒坊
风度不随茅屋改山川时作锦衣香
千秋客到千留佩一岁花开一举觞
莫向斜阳嗟往事人生不朽是文章

五君咏【五首之一】 尤侗

酒星不在天谪向人间住玉环敛绣巾
笑领春风句采石漾兰舟足踏鼉龙去
却入广寒宫醉倒珊瑚树

七思【七首之一】 尤侗

我思李供奉醉草金花笺玉笛媚新声
天香照婵娟一朝夜郎去锦绣埋蛮烟
惟余一杯酒搔首问青天

读李青莲集 郑日奎

青莲诗负一代豪横扫六宇无前矛
英雄心魄神仙骨溟渤为濶天为高
兴酣染翰恣狂逸独任天机摧格律
笔锋缥缈生云烟墨骑纵横飞霹雳
有如怀素作草书崩腾历乱龙蛇攄
更如公孙舞剑器浑脱浏漓雷电避
冥心一往搜微茫乾端坤倪失伏藏
佛子嵌空母泣千秋词臣孰雁行
我读君诗起我意飘然如有凌云思
便欲挥手谢尘缘相从饮酒学仙去

读李太白诗 魏裔介

三谢与鲍庾江左称独步太白更絶尘
汗血如飞兔掷笔振金石有文悬瀑布
万象罗胸中百代生指顾是气曰浩然
不祗为章句沉香亭畔词讽谏有微趣
奴视高将军才人岂能慕羽翮落九天
挂席逐烟雾留滞东鲁云蹭蹬采石路
我思汾阳王再衍晋阳祚云谁识此人
青莲慧眼故无知功未酬夜郎竟远戍
璘也实蠢愚偶而被笼笈龙章与凤姿
岂若争食鹜古今称谪仙斯言良不误
黄金如可成须并子美铸

论诗絶句 王士正

青莲才笔九州横六代淫哇总废声
白紵青山魂魄在一生低首谢宣城

李太白碑陰记 苏轼

李太白狂士也又尝失节于永王璘此岂济世之人哉而毕文简公以王佐期之不亦过乎曰士固有大言而无实虚名不适于用者然不可以此料天下士士以气为主方高力士用事公卿大夫争事之而太白使脱靴殿上固已气盖天下矣使之得志必不肯附权幸以取容其肯

从君于昏乎夏侯湛赞东方生云开济明豁包含宏大大陵辄卿相嘲哂豪杰笼罩靡前踰藉贵势出不休显贱不忧戚戏万乘若僚友视俦列如草芥雄节迈伦高气盖世可谓拔乎其萃游方之外者也吾于太白亦云太白之从永王璘当由迫胁不然璘之狂肆寝陋虽庸人知其必败也太白识郭子仪之为人杰而不能知璘之无成此理之必不然者也吾不可以不辨端明殿学士兼翰林侍读学士眉山苏轼撰

代人祭李白文 曾 巩

子之文章杰立人上地辟天开云蒸雨降播产万物玮丽瑰奇大巧自然人力何施又如长河浩浩奔放万里一泻末势犹壮大骋厥辞至于如此意气飘然发扬倜傥飞黄馱馱軼羣絶类摆弃羈□脱遗辙轨捷出横步志狭四裔侧睨驾与无物比始来玉堂旋去江湖麒麟凤凰世岂能拘古今僻儒鉤章摘字下里之学辞卑义鄙士有一曲拘牵泥滞亦或狡巧争驰势利子之可异岂独兹文轻世肆志有激斯人姑熟之野予来长民举觴墓下感叹余芬

李太白赞 马光祖

天地英灵之气旷千载而几人恍天仙之下堕骖云雾而絶风尘以匹夫而动九重乃供奉乎翰林将国论其与闻之奚儿女子之云云盖其抱负霸王之略或庶几乎少伸手携郭令公足蹋贺季真至于奉珪印以赠之有以信志业之等伦岂为其道骨之可蜕诗思之不羣耶鬱郁此山悠悠大川公不来游今五百年

李太白赞 方孝孺

唐治既极气郁弗舒乃生人豪泄天之奇矫矫李公雄盖一世麟游龙骧不可控制粃糠万物瓮盎乾坤狂呼怒叱日月为奔或入金门或登玉堂东游沧海西历夜郎心触花机喷珠涌玢翰墨所在百灵护持此气之充无上无下安能瞋目閤于黄土手抐长鲸鞭之如羊至于扶桑飞腾帝乡惟昔战国其豪庄周公生虽後其文可侔彼何小儒气馁如?仰瞻英风犹虎与鼠斯文之雄实以气充後有作者尚视于公

李白赞 杨 荣

匡庐之山神秀所鍾瀑布千尺宛然飞虹伟哉谪仙银河在目咳吐天风灿然珠玉

补注李太白集序例 萧士贇

唐诗大家数李杜为称首古今注杜诗者号千家注李诗者曾不一二见非诗家一欠事与仆自弱冠知诵太白诗时习举子业虽好之未暇究也厥後乃得专意于此间趋庭以求闻所未闻或从师以薪解所未解冥思遐想章究其意之所寓旁搜远引句考其字之所原若夫义之显者槩不赘演或疑其贗作则移置卷末以俟巨眼者自择焉此其例也一日得巴陵李粹甫

家藏左绵所刊春陵杨君齐贤子见注本读之惜其博而不能约至取唐广德以後事及宋儒记录诗词为祖甚而并杜注内伪作苏东坡笺事已经益守郭知達删去者亦引用焉因取其本类此者为之节文择其善者存之注所未尽者以予所知附其後混为一注全集有赋八篇子见本无注此则并注之标其目曰分类补注李太白集吁晦庵朱子曰太白诗从容于法度之中盖圣于诗者则其意之所寓字之所源又岂予寡陋之见所能知乃欲以意逆志于数百载之上多见其不自量矣注成不忍弃置又从而刻之枣者所望于四方之贤师友是正之发明之增而益之俾笺注者由是而十百千焉与杜注等顾不美欤其毋笑以注虫鱼幸甚至元辛卯中秋日章贡金精山北冰厓後人粹斋萧士贊粹可

李诗选题辞 杨慎

南丰曾子固曰李白字太白蜀郡人游江淮娶云梦许氏去之齐鲁入吴至长安明皇召为翰林供奉不合去北抵赵魏燕晋西涉岐邠历商於至洛阳游梁最久复之齐鲁南游淮泗再入吴转金陵上秋浦浔阳卧庐山永王璘以伪命逼致之璘败白奔宿松坐系浔阳狱宣抚崔涣与御史宋若思验治谓其罪薄荐其才不报先是白尝识郭子仪于未遇时子仪请解官赎白罪乃长流夜郎遂泛洞庭上峡江至巫山以赦得释复如浔阳族人阳冰为当涂令白过之以病卒年六十四成都古今记云李白生于彰明之青莲乡而刘全白李翰林墓碣记以为广汉人盖唐代彰明属广汉故独举郡称云载考公之自序上裴长史书曰白少长江汉见乡人相如大夸云梦之事云楚有七泽遂来观焉又与逸人东岩子隐于岷山之阳巢居数年不迹城市广汉太守闻而异之因举二人有道并不起今按东岩子梓州盐亭人赵蕤字云卿岷山之阳则指匡山杜子美赠诗所谓匡山读书处其说见晏公类要郑谷诗所谓雪下文君沽酒店云藏李白读书山者也广汉太守则苏颋也颋荐疏曰赵蕤术数李白文章即其事也【按太白上裴长史书所谓礼部尚书苏公出为益州长史者乃苏颋也其广汉太守不载姓名寻文索义自是两人升庵以广陵太守即是苏颋非是】公後在淮南寄赵徵君诗曰国门遥天外乡路远山隔朝忆相如台夜梦子云宅可证矣五代刘昫修唐书以白为山东人自元稹序杜诗而误诗云汝与山东李白好乐史云李白慕谢安风流自号东山李白杜子美所云乃是东山後人倒读为山东元稹之序亦由于倒读杜诗也【升庵外集一则亦引乐史李太白诗序云太白游山水每以声妓自随慕谢安之风自号东山李白杜诗云汝与东山李白好是也今之浅妄倒改其字云云琦按今本乐史序中无此数语而魏颉序有间携昭阳金陵之妓迹类谢康乐世号李东山之辞升庵盖误忆耳】不然则太白之诗云学剑来山东又云我家寄东鲁岂自诬乎宋有晁公武者孟浪人也信旧唐书及元稹之误乃曰太白自序及诗皆不足信噫世安有己之族姓己自迷之而傍取他证乎新唐书知其误乃更之为唐宗室盖以陇西郡望为标也善乎刘子元之言曰作史者为人立传皆取旧号施之于今为王氏传必曰琅琊临沂人为李氏传必曰陇西成纪人欲求实録不亦难乎且人无定所因地而生生于荆者言皆成楚生于晋者齿便成黄岂有世历百年人更七叶而犹以本国为是此乡为非则是孔子里于昌平陰氏家于新野而系纂微子源承管仲乃为齐宋之人非曰邹鲁之士乎宋景文修唐书其弊正坐此夫族姓郡国关系亦大矣诵其诗不知其人可乎予故详着而明辨之以订史氏之误姓谱之缺焉若夫公之诗歌泣?神而冠古今矣岂容喙哉吾友禹山张子愈光自童习至白纷与走共为诗者尝谓予曰李杜齐名杜公全集外节抄选本凡数十家而李何独无之

乃取集中脍炙人口者一百六十余首刻之明诗亭中属慎题辞其端云

合刻李杜诗集序 王穉登

李杜诗无合刻刻之自许子元佑始既成问序于王子王子曰是乌可序乎非独不可盖有所不能且不敢也夫此光焰万丈者谁何伧父偃然任为嚆矢哉曰奈何刻者一李而九杜耶学之者亦若是请问袒将谁左王子曰余曷敢言诗闻诸言诗者有云供奉之诗仙拾遗之诗圣圣可学仙不可学亦犹禅人所谓顿渐李顿而杜乃渐也杜之怀李曰诗无敌李之寄杜曰作诗苦二先生酬赠亦各语其极耳今试语杜之极如彤庭所分帛本自寒女出鞭挞其夫家聚敛贡城阙或红如丹砂或黑如点漆雨露之所濡甘苦齐结实中丞髑髅血模糊手提掷还崔大夫非夫所谓惊人泣?者哉斯盖匠心独苦而非不似从人间来也至如语李之极则如罗帏舒卷似有人开明月直入无心可猜莫卷龙须席从他生网丝且留琥珀枕或有梦来时东风尔来为阿谁蝴蝶忽然满芳草江上相逢借问君语笑未了风吹断若其言犹含霞吸月火食腹肠畴能贮此仙与圣顿与渐之分何俟更仆数耶然乃分路扬镳或同一轨二先生诗不同而语其极则一耳今之学杜者不惊人泣?而木僵肤立学李者不含霞吸月而空疎无当是安得为李杜为李杜罪人矣许子工于诗能去彼取此曷患不李杜哉是刻既出二先生之集将同运并行且俾学者各法其极不空疎无当与木僵肤立乎剗剗之功实宏多矣余之序姑述昔人之论明刻者之旨以复许子之问若曰评隲二先生诗是蛙坐井而谈苍旻广狭鼠饮河而测洪流浅深也则吾岂敢

李翰林分体全集序 王穉登

古今论诗者自三百十九而後必遵李杜李才情俊杜才情郁李情旷达杜情孤愤李若飞将军用兵不按古法士卒逐水草自便杜则肃部伍严刁斗西宫卫尉之师也供奉读书匡山鸟雀就掌取食散金十万如飞尘沉湎至尊之前啸傲御座之侧目中不知有开元天子何况太真妃高力士哉当其稍能自屈可立跻华要乃掉臂不顾飘然去之坎 以终其身迨长流夜郎与魑魅为伍而其诗无一羁旅牢愁之语读之如餐霞吸露欲蜕骨冲举非天际真人胸臆畴能及此其放浪于麴生柔曼醉月迷花特托而逃焉耳子友刘少彝取李杜集合刻之前此非无合刻者然苍素溷淆元黄杂遯笺注训诂人自为政蒙茸猥琐犹疥疔虬虱使二先生之作不免珠残玉碎未尝不扼腕【缺】体掩卷太息少彝皆削去之正其舛讹定其真贋芟薙其重复靡杂品列昭分诸体各以类从名曰分体以李序见属展读之际使耳目涤清神情开朗诚哉千古大快也予生平敬慕青莲愿为执鞭而不可得窃谓李能兼杜杜不能兼李李盖天授杜由人力轨辙合迹鞅轡异趋如禅宗有顿有渐难与耳食之士言也少彝工于诗清俊似太白沉郁似子美故于二集恒津津焉此刻成而纸价当十倍矣予怪夫宗李者画虎难成妄加訾议指永王璘之事为从逆嗟乎禄山篡乱翠华西幸灵武之位未正社稷危于累棋璘以同姓诸王建义旗倡忠烈恢复神器不使未央井中玺落羣凶手白亦王孙帝胄慨然从之识郭令公于行间卒复唐祚甫虽间关行在流离秦陇非不谓忠然视白之功眇矣夫璘非逆而从璘者乃为逆乎王维亦尝陷贼以凝碧管弦诗获免青莲故不幸而罗销骨之口岂不冤哉予序其集而并论其人若此少彝以为然与否耶

合刻李杜分体全集序 刘世教

自三百篇後学士大夫称诗之盛前无踰汉而後宜莫唐若开元天宝间陇西襄阳二先生出遂穷诗律之能事观于是止矣是二先生者其雄材命世同其横絕来禩同坎 弗得志又无弗同顾千载而下使人披其编想见其为人若陇西不胜乐而襄阳不胜忧者何也陇西趋风风故荡誅出于情之极而以辞羣者也襄阳趋雅雅故沉郁入于情之极而以辞怨者也趋若异而轨无勿同故无有能轩轅之者盖自唐以後诸尚论之士人持其指而莫之一迨近世琅琊长公而二先生之论始定顾陇西好称古调其于近体若雅意所不屑而襄阳沾沾此技篇什最称繁富意又若不屑古调者然陇西之于古离之不啻远而襄阳象貌色泽犹若未尽澌灭也者是又二先生同异之微指可解而不可解者也於戏当汉盛时子虚之赋奏至使人主冀幸同时而虑不可得而是二先生者俛遇而俛失之终其身抑塞而弗获少信彼中郎大中文园都尉诸人即遇合虽殊要之无一废弃者胡二先生之湮没甚也盖观汉诸君子之无失职而知其时人无弗尽之材观二先生之矢志而知其时材多未尽之用此固当世得失之林而二代治乱之朕也其故盖难言之矣不佞少习其言薄有当阳之癖而不无憎其编次之淆杂时从藏书家询求善本弗可得每读昔人所笺诂往往未终简而辄弃去窃不自量间尝区分其体裁拟尽蒐诸家训诂之籍笔削为一家言方屈首俗业困京兆者十年已困公车者又十年铅槧屡更杀青未竟客岁南迈从子鉴进而请曰先生必将笺而後行乎夫解者之不必笺而笺者之不必解也于是相与谋之梓人而二竖肆眚乃与友人姚君孟承往复参订始克卒業诸所厘正颇极苦心语具凡例中再逾年始获竣事辄论着其事质诸同好夫自二先生分轡而驰而士各以其质之所近尸且祝焉有能祿享一堂之上者吾未见其人也今而後庶几有并擷其精而上探盛汉以直遡风雅之绪者必自兹籍始矣万历元默困敦夏六月朔平原刘世教序

又 刘 鉴

予伯父少彝先生刻李杜分体全集役将竣客有以私问者曰青莲少陵两公并为诗坛不祧之主固也然而饭颗之逢陰铿之拟尔时两公相轻已甚自唐迄今贤豪扬扞左右互袒几成聚讼意者都宫南面各全其尊而埒享一堂吾未见灵之妥也夫诗之合离主兴象不主体裁篇之瑜类徵识力亦徵齿候昔人编年不为无据矧二公集中一题而古今具体诂容擘裂今妄顾原本惟体之从分则分矣奈剥肤何予曰唯唯否否客曙其一未曙其二夫坝簏异窍而叶奏圭璧殊制而俪珍物固有之人亦宜然李杜齐名光焰千古後之君子谁能轩轅即或偏嗜者畸赞颺指者谬诎抑何关两公之殿最耶至如杜之推李倾倒郑重层见篇什李之心服宁自口出偶摭一语谓其相轻二公有知政堪颐解夫诗有古近律絕体莫备于唐代而妙莫兼于两公第世行本少有善者编年杂陈作者之心目交昧分类糺龐作者之形神不凑衷而裁之无如分体虽然更有说焉太史公曰诗三百篇大抵圣贤发愤之所为作也予伯父固云李源风杜源雅相提而论乃知两公之诗体从风雅出而情从愤入矣李何愤愤宫邻之阶厉杜何愤愤皇輿之游倾然青莲梁父行路诸吟巧言巷伯之伦也少陵骊山洞房等咏匪风下泉之思也其存君兴国发于性情心术之隐者夫既合不翅合而或风或雅互为经纬非古近殊体几于分无可分伯父殫二十余年丹铅之功于二集而以纂次当穷愁之着书史迁所称

发愤述之于作将无同乎哉而子犹规规然猜其後吾亦谓子望洋向若不免见笑于大方之家客哑然谢去书成爰志其语于末简

又 李维桢

盐官刘氏世绍雕龙之庆而孝廉少彝着名文苑最早其于供奉工部二家讨论穷精盖垂二十年二家分体全集始成其集以古近诸体分而先後仍本编年古赋及杂文如之其体则古近律絶各以类从而删长短句之目其以他人集误入者黜之其确为二家所作而偶遗者收之其本古体而误入律及二家自注误入目中若字句之讹音释之谬者更之其诸家注与评不尽佳可笔则笔之可削则削之校双 几无纖微憾而要领莫重于分体矣盖论二家者杨诚斋以李为神如列子御风无待者也以杜为圣如灵均乘桂舟驾玉车有待而未尝有待者也允矣而体未分也王弼州以李五七言絶为神七言歌行为圣五言次之杜五言律七言歌行为神七言律为圣而总论二家五言古选各有所宗所主所贵体分矣而体所从来未晰也少彝以李好称古于近体若不屑而于古离之不啻远杜若不屑古而气象色泽若未尽离李趋风故跌宕杜趋雅故沉郁即弼州亦言读李使人飘扬欲仙读杜使人情事欲絶第就歌行一端论而少彝则以全集举矣夫诗至唐而体备体至李杜而衆长备而李杜所以得之成体者则本三百篇学记曰三王之祭川也先河而後海或原也或委也此之谓务本後人知有李杜不知有三百篇是以学李学杜往往失之少彝为之分体直指其本于风雅学人得所从来可以为李可以为杜可以兼为李杜可以为风可以为雅可以兼为风雅可以自为圣可以自为神不至为李杜作使宁惟有功二家其于诗道岂曰小补之哉是说也少彝亦本之李杜李之言曰兴寄深远五言不如四言若七言靡矣况束于声调俳优哉杜戏为六絶句其末章意以通相祖述未及前贤惟裁伪体亲风雅则转益多师而得汝师夫李杜学诗必本三百篇人安能舍三百篇学李杜少彝见及此宜其诗駸駸李杜齐名也同参订者姚君孟承从子伯临皆名下士

李太白集注卷三十三

卷三十四

钦定四库全书

李太白集注卷三十四

钱塘 王琦 撰

丛说【二百二十则】

国朝能为歌诗者不少独李太白为称首盖气骨高举不失颂咏风刺之道【吴融禅月集序】

歌诗之风荡来久矣大抵丧於南朝坏於陈叔宝然今之业是者苟不能求古於建安即江左矣苟不能求丽於江左即南朝矣或过为艷伤丽病者即南朝之罪人也吾唐来有业是者言出天地外思出鬼神表读之则神驰八极测之则心怀四溟磊磊落落真非世间语者有李太白【皮日休刘枣强碑文】

张碧贞元中人自序其诗云碧尝读李长吉集谓春拆红翠辟门蛰户其奇峭者不可攻也及览李太白辞天与俱高青且无际鷗触巨海澜涛怒翻则观长吉之篇若陟嵩之巔视诸阜者耶【唐诗纪事】

宋景文诸公在馆尝评唐人诗云太白仙才长吉鬼才【文献通考】

人言太白仙才长吉鬼才不然太白天仙之词长吉鬼仙之词耳【沧浪诗话】

世传杜甫诗天才也李白诗仙才也长吉诗鬼才也迂斋诗话
唐人以李白为天才絶白乐天人才絶李贺鬼才絶【海录碎事】

诗总不离乎才也有天才有地才有人才吾於天才得李太白於地才得杜子美於人才得王摩诘太白以气韵胜子美以格律胜摩诘以理趣胜太白千秋逸调子美一代规模摩诘精大雄氏之学句句皆合圣教【徐而庵说唐诗】

尝戏论唐人诗王维佛语孟浩然菩萨语李白飞仙语杜甫圣语李贺才鬼语【居易录】

荆公云诗人各有所得清水出芙蓉天然去雕饰此李白所得也或看翡翠兰苕上未掣鲸鲵碧海中此老杜所得也横空盘硬语妥帖力排奂此韩愈所得也【渔隐丛话】李文叔云予尝与宋遐叔言孟子之言道如项羽用兵直行曲施逆见错出皆当大败而举世莫能当者何其横也左丘明之於辞令亦甚横自汉後千年唯韩退之之於文李太白之於诗亦皆横者【

墨庄漫錄】

李唐羣英唯韩文公之文李太白之诗务去陈言多出新意至於卢仝贯休輩效其轍张籍皇甫湜輩学其步则怪且丑僵且仆矣【珊瑚鉤诗话】

雪浪斋日记为诗欲气格豪逸当看退之太白【诗人玉屑】庄周李白神於文者也非工於文者所及也文非至工则不可为神然神非工之所可至也【杨升庵外集】

文至庄诗至太白草书至怀素皆兵法所谓奇也正有法可循奇则非神解不能及【顾璘息园存稿】

观太白诗者要识真太白处太白天才豪逸多卒然而成者学者於每篇中要识其安身立命处可也

太白发句谓之开门见山【沧浪诗话】

臞翁诗评李太白如刘安鸡犬遗响白云核其归存恍无定处【诗人玉屑】

李太白诗语带烟霞肺腑缠锦绣【释德洪跋苏养直诗】

李太白周览四海名山大川一泉之旁一山之阻神林鬼冢魑魅之穴猿狖所家鱼龙所宫往往游焉故其为诗疎宕有奇气【孙覿送删定侄归南安序】

太白歌诗度越六代与汉魏乐府争衡【黄山谷文集】

明皇世章句之风大得建安体论者推李翰林杜工部为尤【皮日休郢州孟亭记】

诗眼云建安诗辩而不华质而不俚风调高雅格力遒壮其言直致而少对偶指事情而绮丽得风雅骚人之气骨最为近古者也唐诸诗人高者学陶谢下者学徐庾惟老杜李太白韩退之早年皆学建安晚乃各自变成一家耳如老杜崆峒小麦熟人生不相见皆全体作建安语今所存集第一第二卷颇多韩退之孤臣昔放逐暮行河堤上亦皆此体但颇自加新奇李太白亦多建安句法而罕全篇多杂以鲍明远体【渔隐丛话】

李太白始终学选诗所以好杜子美诗好者亦多是倣选诗後渐放手夔州诸诗则不然也【朱子语类】

李杜韩柳初亦皆学选诗者然杜韩变多而李柳变少变不可学而不学可学【朱考亭跋病翁先生诗】

鲍明远才健其诗乃选之变体李太白专学之【朱子语类】雪浪斋日记云或云太白其源流出於鲍明远如乐府多用白紵故子美云俊逸鲍参军盖有讥也【渔隐丛话】李杜二子往往推重鲍谢用其全句甚多【李梦阳章园饯会诗引】郭璞构思险怪而造语精圆李杜精奇处皆取此谢灵运以险为主以自然为宗李杜深处多取此六朝文气衰缓惟刘越石鲍明远有西汉气骨李杜筋骨取此【陈绎会诗谱】

李太白诗逸态凌云映照千载然时作齐梁间人体段略不近浑厚【西清诗话】

李太白诗非无法度乃从容於法度之中盖圣於诗者也古风两卷多效陈子昂亦有全用其句处太白去子昂不远其尊慕之如此然多为人所乱有一篇分为三篇者有二篇合为一篇者【朱子语类】

唐之有天下陈子昂苏源明元结李白杜甫李观皆各以其所能鸣【韩退之送孟东野序】

陈子昂悬文宗之正鹄李太白曜风雅之絶麟【杨升庵四川总志序】

陈子昂为海内文宗李太白为古今诗圣【杨升庵周受庵诗选序】王荆公尝谓太白才高而识卑山谷又云好作奇语自是文章之病建安以来好作奇语故其气象衰薶愚谓二公所言太白病处正在里许【古赋辩体】

太白诗飘逸絶尘而伤於易学之者又不至玉川子是也犹有可观者有狂人李赤乃敢自比谪仙比律不应从重又有崔颢者曾未谿达李老作黄鹤楼诗颇似上士游山水而世俗云李白盖与徐凝一塲决杀醉中聯为一笑【苏东坡集】

周伯弼云言诗而本於唐非因於唐也自河梁而後诗之变至於唐而止也谪仙号为雄俊而法度最为森严况余者乎【赵宦光弹雅】

潘祜应昌尝言其父受子乡先辈曰诗有五声全备者少惟得宫声者为最优盖可以兼衆声也李太白杜子美之诗为宫韩退之之诗为角以此例之虽百家可知也【怀麓堂诗话】

诗人多蹇如陈子昂杜甫名授一拾遗而迺剥至死李白孟浩然輩不及一命穷悴终身【白乐天与元微之书】

人徒知李杜为诗人而已矣而不知其行之高识之卓也杜甫能知君故陷贼能自拔而从明肃於抢攘之中也李白能知人故陷贼而有救以能知郭汾阳於卒伍之中也【草木子】

李白杜甫陶渊明皆有志於吾道【陆象山语录】

新唐书杜甫传赞曰昌黎韩愈於文章慎许可至歌诗独推曰李杜文章在光焰万丈长诚可

信云予读韩诗其称李杜者数端石鼓歌曰少陵无人谪仙死才薄将奈石鼓何酬卢云夫曰高揖羣公谢名誉远追甫白感至诚荐士曰国朝盛文章子昂始高蹈勃兴得李杜万类困凌暴醉留东野曰昔年因读李白杜甫诗长恨二人不相从感春曰近怜李杜无检束烂漫长醉多文辞并唐书所引盖六用之【容斋四笔】

予尝论书以为鍾王之迹萧散简远妙在笔墨之外至顏柳始集古今笔法而尽发之极书之变天下翕然以为宗师而鍾王之法益微至於诗亦然苏李之天成曹刘之自得陶谢之超然盖亦至矣而李太白杜子美以英玮絕世之姿凌跨百代古今诗人尽废然魏晋以来高风絕尘亦少衰矣【苏东坡书黄子思诗集後】

作诗先看李杜如士人治本经本既立方可看苏黄以次诸家【朱子语类】

诗之极至有一曰入神诗而入神至矣尽矣蔑以加矣惟李杜得之他人得之盖寡也【沧浪诗话】

李杜数公如金翅劈海香象渡河下视郊岛辈直虫吟草间耳【沧浪诗话】

李太白杜子美诗皆掣鲸手也余观太白古风子美偶题二篇然後知二子之源流远矣李云大雅久不作吾衰竟谁陈王风委蔓草战国多荆榛则知李之所得在雅杜云文章千古事得失寸心知骚人嗟不见汉道盛於斯则知杜之所得在骚【韵语阳秋】

作诗者陶冶万物体会光景必贵乎自得盖格有高下才有分限不可强力至也譬之秦武阳气盖全燕见秦王则战掉失色淮南王安虽为神仙谒帝犹轻其举止此岂由素习哉予以为少陵太白当险阻艰难流离困蹶意欲卑而语未尝不高至于罗隐贯休得意於偏霸夸雕逞奇语欲高而意未尝不卑乃知天稟自然有不能易也【诗人玉屑】

唐自李杜之出焜耀一世後之言诗者皆莫能及【吕居仁江西宗派图序】

诗之所以为诗所以歌咏性情者只见三百篇耳秦汉之际骚赋始盛大抵怨讟烦冤从谀侈靡之文性情之作衰矣至苏李赠答下逮建安後世之诗始立根柢简静高古不事夫辞犹有三代之遗风至潘陆顏谢则始事夫辞以及齐梁辞遂盛矣至李杜兼魏晋以追风雅尚辞以咏性情则後世诗之至也然而高古不逮夫苏李之初矣【郝经与撒彦举论诗书】

唐人诸体之作与代终始而李杜为正宗【虞伯生傳于砺诗序】诗之尊李杜文之尚韩欧此犹山之有泰华水之有江河无不仰止而取益焉【吴伟业与宋尚本论诗书】

天宝末诗人杜甫与李白齐名而白自负文格放达讥甫齷齪而有饭颗山之嘲诮元和中词人元稹论李杜之优劣曰予读诗至杜子美而知小大之有所总萃焉始尧舜之时君臣以賡歌相和是後诗人继作历夏殷周千余年仲尼缉拾选拣取其干预教化之尤者三百余无所

闻骚人作而怨愤之态繁然犹去风雅日近尚相比拟秦汉以还采诗之官既废天下妖謡民讴歌颂讽赋曲度嬉戏之辞亦随时间作至汉武赋柏梁而七言之体兴苏子卿李少卿之徒尤工为五言虽句读文律各异雅郑之音亦杂而辞意简远指事言情自非有为而为则文不妄作建安之後天下之士遭罗兵战曹氏父子鞍马间为文往往横槊赋诗故其遒壮抑扬冤哀悲离之作尤极於古晋世风槩稍存宋齐之间教失根本士以简慢歛习舒徐相尚文章以风容色泽放旷精清为高盖吟写性灵留连光景之文也意义格力无取焉陵迟至於梁陈淫艶刻饰佻巧小碎之词剧又宋齐之所不取也唐兴官学大振历世之文能者互出而又沈宋之流研练精切稳顺声势谓之为律诗由是之後文体之变极焉然而莫不好古者遗近务华者去实效齐梁则不逮於魏晋工乐府则力屈於五言律切则骨格不存闲暇则纤浓莫备至於子美盖所谓上薄风骚下该沈宋言夺苏李气吞曹刘掩顔谢之孤高杂徐庾之流丽尽得古今之体势而兼人之所独专矣使仲尼考鍜其旨要尚不知贵其多乎哉苟以为能所不能无可无不可则诗人以来未有如子美者是时山东人李白亦以奇文取称时人谓之李杜余观其壮浪纵恣摆去拘束摸写物象及乐府歌诗诚亦差肩於子美矣至若铺陈终始排比声韵大或千言次犹数百词气豪迈而风调清深属对律切而脱弃凡近则李尚不能历其藩翰况堂奥乎自後属文者以稹论为是【旧唐书杜甫传】元微之作李杜优劣论谓太白不能窥杜甫之藩篱况堂奥乎唐人未尝有此论而稹始为之至退之曰李杜文章在光焰万丈长不知羣儿愚那用故谤伤则不复为优劣矣洪庆善作韩文辩证着魏道辅之言谓退之此诗为微之作也微之虽不当自作优劣然指稹为愚儿岂退之之意乎【竹坡诗话】

予评李白诗如黄帝张乐于洞庭之野无首无尾不主故常非墨工槩人所可议拟吾友黄介读李杜优劣论曰论文正不当如此子以为知言【黄山谷文集】

李杜二公正不当优劣太白有一二妙处子美不能道子美有一二妙处太白不能作子美不能为太白之飘逸太白不能为子美之沉郁太白梦游天姥吟远别离等子美不能道子美北征兵车行垂老别等太白不能作论诗以李杜为准挟天子以令诸侯也又少陵诗法如孙吴太白诗法如李广【沧浪诗话】

杜甫李白以诗齐名韩退之云李杜文章在光焰万丈长似未易以优劣也然杜诗思苦而语奇李诗思疾而语豪杜集中言李白诗处甚多如李白一斗诗百篇清新庾开府俊逸鲍参军何时一樽酒重与细论文之句似讥其太俊快李白论杜甫则曰饭颗山头逢杜甫头戴笠子日卓午为问因何太瘦生只为从来作诗苦似讥其太愁肝肾也杜牧云杜诗韩笔愁来读似倩麻姑痒处搔天外凤凰谁得髓何人解合续鸾胶则杜甫诗唐朝已来一人而已岂白所能望耶【韵语阳秋】

李太白一斗百篇援笔立成杜子美改罢长吟一字不苟二公盖亦互相讥嘲太白赠子美云借问因何太瘦生只为从前作诗苦苦之一辞讥其困雕镌也子美寄太白云何时一樽酒重与细论文细之一字讥其欠缜密也【鹤林玉露】

诗之豪者世称李白李之作才矣奇矣人不迨矣索其风雅比兴十无一焉杜诗最多可传者

千余首至於贯穿古今翾缕格律尽工尽善又过於李焉然撮其新安石壕潼关吏芦子关花门之章朱门酒肉臭路有冻死骨之句亦不过十三四【白乐天与元微之书】

李杜号诗人之雄而白之诗多在於风月草木之间神仙虚无之说亦何补於教化哉惟杜陵野老负王佐之才有意当世而肮脏不偶胷中所蘊一切写之於诗【赵次公杜工部草堂记】

李太白当王室多难海宇横溃之日作为歌诗不过豪侠使气狂醉於花月之间耳社稷苍生曾不系其心瞽其视杜少陵之忧国忧民岂可同年语哉唐人每以李杜并称韩退之识见高迈亦惟曰李杜文章在光焰万丈长无所优劣也至宋朝诸公始知推尊少陵东坡云古今诗人多矣而惟称杜子美为首岂非以其饥寒流落而一饭未尝忘君也欤又曰北征诗识君臣大体忠义之气与秋色争高可贵也朱文公曰李白见永王璘反便从愬之诗人没头脑至於如此杜子美以稷契自许未知做得与否则然子美却高其救房琯亦正【鹤林玉露】李谪仙诗中龙也矫矫焉不受约束杜则麟游灵囿凤鸣朝阳自是人间瑞物施诸工用则力牛服箱德骥驾辂李亦不能为也【艺圃折中】

李杜诗虽齐名而器识迥不全子美之言曰庙堂知至理风俗尽还淳舜举十六相身尊道何高秦时任商鞅法令如牛毛用为羲和天道平用为水土地为厚其志意可知若太白所谓为君谈笑靖胡沙又如调笑可以安储皇此皆何等语也【水东日记】

清新俊逸子美尝称太白自谓不如也耶太白得古诗之奇放专效之者久则索然老杜以平实叙悲苦而备衆体是以平实无奇而得自在者也【方以智通雅】

太白天才放逸故其诗自为一体子美学优才赡故其诗兼备衆体而植纲常系风化为多三百篇以後之诗子美其集大成也【傅若金清江集】

李白诗类其为人骏发豪放华而不实好事喜名而不知义理之所在也语用兵则先登陷阵不以为难语游侠则白昼杀人不以为非此岂其诚能也哉白始以诗酒奉事明皇遇谗而去所至不改其旧永王将窃据江淮白起而从之不疑遂以放死今观其诗固然唐诗人李杜称首今其诗皆在杜甫有好义之心白所不及也汉高祖归丰沛作歌曰大风起兮云飞扬威加海内兮归故乡安得猛士兮守四方高祖岂以文字高世者哉帝王之度固然发於中而不自知也白诗反之曰但歌大风云飞扬安用猛士守四方其不达理如此老杜赠白诗有细论文之句谓此类也哉【苏滦城集】

唐以诗取士三百年中能诗者不啻千余家专其美者独李杜二人而已李颇不及止又一杜【草木子】

李杜光焰千古人人知之沧浪并极推尊而不能致辨元微之独重子美宋人以为谈柄近时杨用修为李左袒轻俊之士往往耳传要其所得俱影响之间五言选体及七言歌行太白以

气为主以自然为宗以俊逸高畅为贵子美以意为主以独造为宗以奇拔沉雄为贵其歌行之妙咏之使人飘飘欲仙者太白也使人慷慨激烈欷歔欲绝者子美也选体太白多露语率语子美多穉语累语置之陶谢间便觉侏父面目乃欲使之夺曹氏父子位耶五言律七言歌行子美神矣七言律圣矣五言绝太白神矣七言歌行圣矣五言次之太白之七言律子美之七言绝皆变体间为之可耳不足多法也十首以前少陵较难入百首以后青莲较易厌扬之则高华抑之则沉实有色有声有气有骨有味有态浓淡深浅奇正开阖各极其则吾不能不服膺少陵也青莲拟古乐府而以己意已才发之尚沿六朝旧习不如少陵以时事创新题也少陵自是卓识惜不尽得本来面目耳太白不成语者少老杜不成语者多如无食无儿一妇人举家闻若歔及麻鞋见天子垢腻脚不韞之类凡看二公诗不必病其累句亦不必曲为之护正使瑕瑜不掩亦是大家太白五言沿洄汉魏晋乐府出入齐梁近体周旋开宝独绝句超然自得冠绝古今子美五言北征述怀新婚垂老等作虽格本前人而调由己创五七言律广大悉备上自垂拱下逮元和宋人之苍元人之绮靡不兼总故古体则脱弃陈规近体则兼该众善此杜所独长也太白笔力变化极于歌行少陵笔力变化极于近体李变化在调与辞杜变在意与格然歌行无常矍易于错综近体有定规难于伸缩词调超逸骤如骇耳索之易穷意格精深始若无奇绎之难尽此其微不同者也以古诗为律诗其调自高太白浩然所长储侍御亦多此体以律诗为古诗其格易卑虽子美不免【艺苑卮言】

才超一代者李也体兼一代者杜也李如星悬日揭照耀太虚杜若地负海涵包罗万彙李惟超出一代故高华莫并色相难求杜惟兼综一代故利钝杂陈巨细咸蓄李才高气逸而调雄杜体大思精而格浑超出唐人而不离唐人者李也不尽唐调而兼得唐调者杜也备诸体于建安者陈王也集大成于开元者工部也

青莲才之逸并驾陈王气之雄齐驱工部可谓撮胜二家第古风既乏温醇律体微乖整栗故令评者不无轩轻少陵不效四言不仿离骚不用乐府旧题自是此老胸中壁立处然风骚乐府遗意往往得之太白以百忧等篇拟风雅鸣皋等作拟离骚俱相去悬远乐府奇伟高出六朝古拙不如两汉较输杜一筹也【胡应麟诗薮】四明沈明臣嘉则尝言今人多称李杜率无定品余谓李如春草秋波无不可爱然注目易尽耳至如老杜如堪舆中然太山乔岳长河巨海纤草穠花怪松古栢惠风微波严霜烈日何所不有吾当李则雁行当杜则北面闻者惊愕

王安石所选杜韩欧李诗其置李于末而欧反在其上或亦谓有抑扬云【文献通考】

舒王以李太白杜子美韩退之欧阳永叔编为四家诗而以欧公居太白之上世莫晓其意舒王尝曰太白词语迅快无疎脱处其识污下诗词十句九句言妇人酒耳【冷斋夜话】

荆公论李杜韩欧四家诗而以欧公居太白之上曰李白诗词迅快无疎脱处然其识污下十句九句言妇人酒耳予谓诗者妙思逸想所寓而已太白之神气当游戏万物之表其于诗寓意焉耳岂以妇人与酒败其志乎不然则渊明篇篇有酒谢安石每游山必携妓亦可谓之其识不高耶欧阳公文字寓兴高远多喜为风月闲适之语盖效太白为之故东坡作欧阳公集

序亦云诗赋似李白此未可以优劣论也【扪虱新话】

世言荆公四家诗後李白以其十首九首说酒及妇人恐非荆公之言白诗乐府外及妇人者亦少言酒固多比之陶渊明辈亦未为过此乃读白诗未熟者妄立此论耳四家诗未必有次序使诚不喜白当自有故盖白识度甚浅观其诗中如中宵出饮三百杯明朝归揖二千石揄扬九重万乘主谗浪赤墀青琐贤王公大人借颜色金章紫绶来相趋一别蹉跎朝市间青云之交不可攀归来入咸阳谈笑皆王公高冠佩雄剑长揖韩荆州之类浅陋有索客之风集中此等语至多但以其辞豪俊动人故不深考耳又如以布衣得一翰林供奉此何足道遂云当时笑我微贱者却来请谒为交欢宜其终身坎 也【老学庵笔记】

鍾山语录云荆公次第四家诗以李白最下俗人多疑之公曰白诗近俗人易悦故也白识见污下十首九说妇人与酒然其材豪俊亦可取也王定国闻见录云黄鲁直尝问王荆公世谓四选诗丞相以韩欧高於李太白耶荆公曰不然陈和叔尝问四家之诗乘间签示和叔时书史适先持杜诗来而和叔遂以其所送先後編集初无高下也李杜自昔齐名者也何可下之鲁直归问和叔和叔与荆公之说同今乃以太白下韩欧而不可破也遯齐闲览云或问王荆公云编四家诗以杜甫为第一太白为第四岂白之才格词致不逮甫耶公曰白之歌诗豪放飘逸人固莫及然其格止於此而已不知变也至於甫则悲欢穷泰发歛抑扬疾徐纵横无施不可故其诗有平淡简易者有绮丽精确者有严重威武若三军之帅者有奋迅驰骤若泛驾之马者有淡泊闲静若山谷隐士者有风流蕴籍若贵介公子者盖其绪密而思深观者苟不能臻其阃奥未易识其妙处夫岂浅近者所能窥哉此甫所以光掩前人而後来无继也元稹以为兼人所独专斯言信矣或者又曰评诗谓甫期白太过反为白所诮公曰不然子美赠白诗则曰清新庾开府俊逸鲍参军但比之庾信鲍照而已又曰李侯有佳句往往似陰铿之诗又在庾鲍下矣饭颗之嘲虽一时戏剧之谈然二人名既相逼亦不能无相忌也【渔隐丛话】

介甫选四家之诗第其质文以为先後之序余谓子美诗閎深典丽集诸家之大成永叔诗温润藻艷有廊庙富贵之器退之诗雄厚雅健毅然不可屈太白诗豪迈清逸飘然有凌云之志皆诗杰也其先後固自有次第诵其诗者可以想见其为人乃知心声之发言志咏情得於自然不可以勉强到也【李纲读四家诗选序】

子美之诗非无文也而质胜文永叔之诗非无质也而文胜质退之之诗质而无文太白之诗文而无质介甫选四家诗而次第之其序如此【李纲书四家诗选後】

王荆公以杜诗後来莫继信矣若子美第一太白第四无乃太远子美怜君如弟兄之句正可为二家诗评耳或谓杜称李太过反为所诮不然也斗酒百篇遗逸多矣韩退之诗已有泰山毫芒之慨当时相赠答者可尽见耶太白虽天仙之才岂无心人黄鹤楼推崔顥不啻已出乃轻子美耶或又以杜比李於庾鲍为轻之又不然庾鲍岂可易者耶文人齐名如李杜之相得者足为古今美谈後人乃以浮薄意妄测前贤耳【方弘静千一录】五言长篇自古乐府焦仲卿而下继者絕少唐初亦不多见逮李杜二公始盛至其铺陈终始排比声韵大或千言次

犹数百词意曲折队仗森严人皆雕饬乎语言我则直露其肺腑人皆专犯乎忌讳我则回护其褒贬此少陵所长也太白次之【唐诗品彙】

李青莲是快活人当其得意斗酒百篇无一语一字不是高华气象及流窜夜郎後作诗甚少当由兴趣消索杜少陵是固穷之士平生无大得意事中间兵戈乱离饥寒老病皆其实历而所閱苦楚都于诗中写出故读少陵诗即当得少陵年谱看【江盈科雪涛诗评】

李杜齐名古今不敢轩輊予谓太白才由天纵故能以其高敌子美之大至论其胎骨则清新庾开府俊逸鲍参军杜之目李确不可易岂与攀屈宋而驾曹刘者可同日论哉【黄生白山杜诗说】

李白诗祖风骚宗汉魏下至鲍照徐庾亦时用之善掉弄造出奇怪惊动心目忽然撒出妙入无声其诗家之仙者乎格高於杜变化不及【陈绎曾诗谱】

杜子美上薄风雅下该沈宋才夺苏李气吞曹刘掩顔谢之孤高杂徐庾之流丽真所谓集大成者而诸作皆废矣并时而作有李太白宗风骚及建安七子其格极高其变化若神龙之不可羈【宋濂答章秀才论诗书】

或谓杜万景皆实李万景皆虚乃右实而左虚遂谓李杜优劣在虚实之间顾诗有虚有实有虚有实有实有虚而实有实而虚并行错出何可端倪且杜若秋兴诸篇托意深远画马行诸作神清横逸直将播弄三才鼓铸群品安在其万景皆实李如古风数十首感时托物慷慨沉着安在其万景皆虚【屠纬真文集】

太白诗宗风骚薄声律开口成文挥翰雾散似天仙之词而乐府诗连类引义尤多讽兴为近古所未有迄今称诗者推曰与少陵为两大家曰李杜莫能轩輊云【李诗通】

鍾山语录云杜甫固奇就其分择之好句亦自有数李白虽无深意大体俊逸无疎谬处【渔隐丛话】

欧公不甚喜杜诗谓韩吏部絶伦吏部於唐世文章未尝屈下独称道李杜不已欧贵韩而不悦子美所不可晓然於李白甚赏爱将由李白超羣飞扬为感动也【中山诗话】

唐世诗称李杜文章称韩柳今杜诗语及太白处无论数十篇而太白未尝有与杜子美诗只有饭颗一篇意颇轻甚论者谓以此可知子美倾倒太白至难晏元献公尝言韩退之扶导圣教剷除异端是其所长若其祖述坟典宪章骚雅上传三古下笼百氏横行阔视於綴述之場子厚一人而已然学者至今但雷同称述其实李杜韩柳岂无优劣达者观之自可默喻【扈虱新话】

论诗文雅正则少陵昌黎若倚马千言放辞追古则杜韩恐不及太白子厚也【杨升庵外集】

】

杨诚斋云李太白之诗列子之御风也杜少陵之诗灵均之乘桂舟驾玉车也无待者神於诗者与有待而未尝有待者圣於诗者与宋则东坡似太白山谷似少陵徐仲车云太白之诗神鹰瞥汉少陵之诗骏马絶尘二公之评意同而语亦相近予谓太白诗仙翁剑客之语少陵诗雅士骚人之词比之文太白则史记少陵则汉书也【杨升庵外集】

工部老而或失於俚赵宋籍为幘幘翰林逸而或流於滑朔元拾为香草歌行李飘逸而失之轻率杜沉雄而失之粗硬选家辨其两短斯为得之【诗辨坻】

以天分胜者近李以学力胜者近杜学者各自审焉可也【陶开虞说杜】

李白乐府三卷於三纲五常之道数致意焉虑君臣之义不笃也则有君道曲之篇所谓轩后爪牙常先太山稽如心之使臂小白鸿翼於夷吾刘葛鱼水本无二虑父子之义不笃也则有东海勇妇之篇所谓淳于免诏狱汉主为缙紫津妾一掉歌脱父於严刑十子若不肖不如一女英虑兄弟之义不笃也则有上留田之篇所谓田氏仓卒骨肉分青天白日摧紫荆交柯之木本同形东枝顛顛西枝荣无心之物尚如此参商胡乃寻天兵虑朋友之义不笃也则有箜篌谣之篇所谓贵贱结交心不移惟有严陵及光武轻言托朋友对面九疑峰管鲍久已死何人继其踪虑夫妇之情不笃也则有双燕离之篇所谓双燕复双燕双飞令人羡玉楼珠阁不独栖金窗绣户长相见【韵语阳秋】

近读古乐府始知後作者皆有所本至李谪仙絶出衆作真诗豪也然古词务协律而犹未工陈仲孚尝问诗工所从始予谓谢元晖杜子美云谢朓每篇堪讽咏盖尝得法於此耳李云解道澄江净如练令人却忆谢元晖与子美同意【陈傅良记陈仲孚问语】

予尝评诸家之作李太白最高而微短於韵【周紫芝古今诸家乐府序】

古乐府暂出白门前杨柳可藏乌欢作沉水香依作博山炉李白用其意衍为杨叛儿歌曰君歌杨叛儿妾劝新丰酒何许最关情乌啼白门柳乌啼隐杨花君醉留妾家博山炉中沉香火双烟一气凌紫霞古乐府朝见黄牛暮见黄牛三朝三暮黄牛如故李白则云三朝见黄牛三暮行太迟三朝又三暮不觉鬓成丝古乐府云郎今欲渡畏风波李白则云郎今欲渡缘何事如此风波不可行古乐府云春风复多情吹我罗裳开李反其意云春风复无情吹我梦魂散古人谓李诗出自乐府古选信矣其杨叛儿一篇即暂出白门前之郑笺也因其拈用而古乐府之意益显其妙益见如李光弼将子仪军旗帜益精明又如神僧拈佛祖语信口无非妙道岂生吞义山拆洗杜诗者比乎故其赠杜甫诗有饭颗山前之句盖讥其拘束也【杨升庵外集】

太白光乐府杳冥恹恹纵横变幻极才人之致然自是太白乐府【艺苑卮言】

乐府则太白擅奇古今少陵嗣迹风雅蜀道难远别离等篇出鬼入神恂恂莫测兵车行新婚别等作述情陈事恳恻如见张王欲以拙胜所谓差之毫厘温李欲以巧胜所谓谬以千里【诗薮】

乐府体不尚论宗而叙事故每以缓失之故杜少陵无乐府也太白篇什虽繁而自放者多矣然有出乎唐人之上者似晋杂曲而清隽过之天实生才岂易言哉吾定古唐诸乐府考其正变则其人与世可知矣而独於太白犹低徊三复云【李诗纬】

太白愠於羣小乃放还山而纵酒以浪游岂得已哉故於乐府多清怨盖不敢忘君也夫怨生於情而情每於儿女间为切切焉读者勿以辞害意可矣【李诗纬】

诗至开元天宝间神秀声律粲然大备李翰林天才纵逸轶荡人羣上薄曹刘下该沈鲍其乐府古调能使储光羲王昌龄失步高适岑参絶倒况其下乎【唐诗品彙】唐五言古诗凡数变约而举之夺魏晋之风骨变梁陈之俳优陈伯玉之力最大曲江公继之太白又继之感寓古风诸篇可追嗣宗咏怀景阳杂诗【王阮亭五言诗选凡例】唐五言诗杜甫沉郁多出变调李白韦应物超然复古然李诗有古调有唐调要须分别观之【居易录】

新城阮亭王先生五言诗选於汉取全於魏晋以下递严而递有所录而犹不废夫齐梁陈隋之作者於唐仅得五人曰陈子昂张九龄李白韦应物柳宗元盖以齐梁陈隋之诗虽远於古尚不失为古诗之余???唐贤风气自为畛域成其为唐人之诗而已而五人者其力足以存古诗於唐诗之中则以其类合之明其变而不失於古云尔【姜宸英阮亭选五言古诗序】

七言古诗要铺叙要开合要风度要迢递险怪雄峻铿锵忌庸俗软腐须是波澜开合如江海之波一波未平一波复起又如兵家之阵方以为正又复为奇方以为奇忽复是正奇正出入变化不可纪极备此法者惟李杜也【范德机诗评】

盛唐工七言古调者多张皇气势陟顿始终综核乎古今博大其文辞则李杜尚矣【唐诗品彙】

太白天仙之词语多率然而成者故乐府歌词咸善或谓其始以蜀道难一篇见赏於知音为明主所爱重此岂浅材者徼幸际其时而驰骋哉不然也白之所蘊非止是今观其远别离长相思乌栖曲鸣皋歌梁园吟天姥吟庐山謠等作长篇短韵驱驾气势殆与南山秋气并高可也虽少陵犹有让焉余子琐琐矣【唐诗品彙】

七言古诗惟杜子美不失初唐气格而纵横有之太白纵横往往强弩之末间杂长语英雄欺人耳【李攀龙选唐诗序】七言古初唐以才藻胜盛唐以风神胜李杜以气槩胜而才藻风神称之加以变化灵异遂为大家七言歌行垂拱四子词极藻艷然未脱梁陈也张李沈宋稍汰浮华渐趋平实唐体肇矣然而未畅也高岑王李音节鲜明情致委折浓纤修短得衷合度畅矣然而未大也太白少陵大而化矣能事毕矣

歌行至唐大畅王杨四子宛转流丽李杜二家逸宕纵横 闾辟纵横变幻超忽疾雷震电凄风急雨歌也位置森严筋脉联络走月流云轻车熟路行也太白多近歌少陵多近行

李杜歌行扩汉魏而大之而古质不及卢骆歌行衍齐梁而畅之而富丽有余 古诗窘於格调近体束於声律唯歌行大小短长错综闾辟素无定体故极能发人才思李杜之才不尽於古诗而尽於歌行

李杜歌行虽沉郁逸宕不同然皆才大气雄非子建渊明判不相入者比【诗薮】

七言歌行唐代卢骆组壮沈宋轩华高岑豪激而近质李杜迂佚而好变元白迤邐而详尽温李朦胧而绮密陈其格律校其高下各有端诣不容班杂

太白天纵逸才落笔警挺其歌行跌宕自喜不闲整栗唐初规制扫地欲尽矣【诗辨坻】

开元大历诸作者七言为盛王李高岑四家篇什尤多李太白驰骋笔力自成一家大抵嘉州之奇峭供奉之豪放更为创获【王阮亭七言诗歌行钞】

七言古诗惟杜甫横絕古今同时大匠无敢抗行李白岑参二家别出机杼语差雷全亦称奇特【居易录】

盛唐五言律句之妙李翰林气象雄逸【唐诗品彙】

太白耻为郑卫之作律诗故少编者多以律类入古中不知其近体犹存雅调耳集中五言仄律亦多【千一录】青莲五言律自流水法外颇近正始不似子美达夫诸公创体迥异昔观【诗辨坻】

吾读五言律一体知唐人反正之功为多云靡丽如南五季文敝甚矣文质彬彬唐人有之向使唐人无所取裁其不流为宋元末尚也几希然或失之矜持盖从齐梁而变也若太白五律犹为古诗之遗情深而词显又出乎自然要其旨趣所归开郁宣滞特於风骚为近焉【李诗纬】

毕忠吉曰予观唐三百年以二律并称擅长者独子美一人供奉长於五而短於七【辟疆园杜诗注解序】

李白古风六十首富於子昂之感遇倅於嗣宗之咏怀其诗宗风骚薄声律故终身作七言近体仅八首而已【陆生口谱 按阳冰诗序谓太白着述十丧其九当时翰林应制之作集贤倡和之章所作七言近体今皆不见大抵亡失者多耳陆氏谓其终身所作仅只集中所存之八首误矣】

李杜为有唐宗匠而子美不长於文太白不长於七律故集中厥体遂少【柴虎臣家诫】

五言排律开元後作者为盛声律之备独王右丞李翰林为多而孟襄阳高渤海辈实相与并

鸣【唐诗品彙】

读盛唐排律太白轻爽雄丽如明堂黼黻冠盖辉煌武库甲兵旌旗飞动少陵变幻闳深如涉崑仑泛溟渤千峰罗列万彙汪洋【诗薮】

排律宋沈二氏藻赡精工太白右丞明秀高爽【诗薮】唐人乐府多唱诗人絶句王少伯李太白为多【杨升庵外集】絶句之源出於乐府贵有风人之致其声可歌其趣在有意无意之间使人莫可捉着盛唐惟青莲龙标二家【李维桢】

五七言絶句李青莲王龙标最称擅場为有唐絶唱少陵虽工力悉敌风韵殊不逮也【艺苑卮言】

天生太白少伯以主絶句之席勿论有唐三百年两人为政亘古今来无复有驂乘者矣子美恰与两公同时又与太白同游乃恣其崛强之性颓然自放独成一家可谓巧於用拙长於用短精於用粗婉於用戇者也【卢世?紫房余论】

予尝品唐人之诗乐府本效古体而意反近絶句本自近体而意实远欲求风雅之?佛者莫如絶句唐人之所偏长独至而後人力追莫嗣者也擅长则王江寧驂乘则李彰明偏美则刘中山遗响则杜樊川少陵虽号大家不能兼善一则拘於对偶二则汨於典故拘则未成之律诗而非絶体汨则儒生之书袋而乏性情故观其全集自锦城丝管之外咸无讥焉近世有爱而忘其丑者专取而効之惑矣【杨升庵唐絶增奇序】

盛唐长五言絶而不长七言絶者孟浩然也长七言絶而不长五言絶者高达夫也五七言各极其工者太白五七言俱无所解者少陵也

少陵太白七言律絶独出词場然少陵律多险拗太白絶间率露大家故宜有此杜之律李之絶皆天授神诣然杜以律为絶如窗含西岭千秋雪门泊东吴万里船等句本七律壮语而以为絶句则断锦裂繒类也李以絶为律如十月吴山晓梅花落敬亭等句本五言絶句而以为律诗则骈拇枝指类也古人作诗各成已调未尝互相师袭以太白之才就声律即不能为杜何至遽减嘉州以少陵之才攻絶句即不能为李诎谓不若摩诘彼自有不可磨灭者无事更屑屑也【诗薮】

诗以神行使人得其意於言之外若远若近若无若有若云之於天月之於水心得而会之口不得而言之斯诗之神者也而五七言絶尤贵以此道行之昔之擅其妙者在唐有太白一人盖非摩诘龙标之所及吾尝以太白为五七言絶之圣所谓鼓之舞之以尽神繇神入化为盛德之至者也【屈绍隆粤游杂咏序】

小乐府之遗唐人裁为絶句体之流变盖微有辨焉惟李白所制犹得其遗篇什虽简而如入思妇劳人之心何婉曲可讽耶济南李氏曰李白五七言絶句实唐三百年一人盖以不用意得之即太白亦不自知其所至而工者顾夫焉至哉言乎自唐以来能为诗者多矣其词与理

未始不璀璨焉然而观止矣予读李白诗想见其心如入天际渺乎莫从其所之太史公曰诗有之高山仰止景行行止虽不能至然心向往之予於李诗亦云【李诗纬】

丁龙友曰李白乐府本晋三调杂曲其絕句从六朝清商小乐府来至其气槩挥斥迴飈掣电且令人缥缈天际此殆天授非人力也【李诗纬】

五言絕句开元後李白王维尤胜诸人【唐诗品彙】

五言絕句起自古乐府至唐而盛李白崔国辅号为擅場【宋牧仲漫堂说诗】

五言絕句惟太白擅場杜子美诗曰李侯有佳句往往似陰铿陰工此体子美之称太白者在是【徐而庵说唐诗】五言絕句李太白气体高妙【王阮亭唐人万首絕句选凡例】

七言絕句太白高於诸人王少伯次之【唐诗品彙】

七言絕句王少伯与太白争胜毫厘俱是神品【艺苑卮言】七言絕太白江宁各有至处大槩李写景入神王言情造极王宫辞乐府李不能为李览胜纪行王不能作【诗薮】龙标陇西真七絕当家足称聯璧【焦弱侯诗评】

三唐七絕并堪不朽太白龙标絕伦逸羣【漫堂说诗】

七言絕起忌矜势太白多直抒旨鬯两言後只用溢思作波掉唱叹有余响拙手往往安排起法欲留佳思在後作好首既嚼蜡後十四字中地窄而舞拙意满而词滯【诗辨坻】

李太白诗不专是豪放亦有雍容和缓的如首篇大雅久不作多少和缓【朱子语类】

古风第四十四首不言弃絕但言恩毕斯得怨而不怒之意欲言难言而又不能无言将何为三字无限深情【严沧浪评】

朱文公题广成子像云陈光泽见示此像偶记李太白诗云世道日交丧浇风变淳源不求桂树枝反栖恶木根所以桃李树吐花竟不言大运有兴没群动争飞奔归来广成子去入无穷门因写以示之今人舍命作诗开口便说李杜以此观之何曾梦见他脚板耶【鹤林玉露】李太白远别离蜀道难与子美寓居同谷七歌风骚之极致不在屈原之下【李□师友记闻】

远别离篇最有楚人风所贵乎楚言者断如复断乱如复乱而词义反复屈折行乎其间实未尝断而乱也使人一唱三叹而有遗音至於收泪讴吟又足以兴夫三纲五典之重者岂虚也哉兹太白所以为不可及也【范德机评】

文章如精金美玉经百鍊历万选而後见今观昔人所选虽互有得失至其尽善尽美则所谓凤凰芝草人人皆以为瑞閱数千百年经千万人而莫有异议焉如李太白远别离蜀道难杜子美秋兴诸将咏怀古迹新婚别兵车行终日诵之不厌也【怀麓堂诗话】

古律诗各有音节然皆限於字数求之不难惟乐府长短句初无定数最难调叠然亦有自然之声古所谓声依永者谓有长短之节非徒永也故随其长短皆可以播之律吕而其太长太短之无节者则不足以为乐若往复讽咏久而自有所得得之於心而发之乎声则虽千变万化如珠之走盘自不越乎法度之外矣如李太白远别离杜子美桃竹杖皆极其操纵曷尝按古人声调而和顺委曲乃如此固初学所未到然学而未至於是亦未可与言诗也【怀麓堂诗话】

太白公无渡河乃从尧禹治水说起迂痴有致然笔墨率肆无足取焉蜀道难等篇亦然开後人恶道【诗辩坻】李白性嗜酒志不拘检常林栖十数载故其为文章率皆纵逸至如蜀道难等篇可谓奇之又奇自骚以还鲜有此体调也【河岳英灵集】

李太白作蜀道难乃为房杜危之也其略曰剑阁峥嵘而崔嵬一夫当关万夫莫开所守或非人化为狼与豺朝避猛虎夕避长蛇磨牙吮血杀人如麻锦城虽云乐不如早还家蜀道之难难于上青天侧身西望长咨嗟李翰林作此歌朝右闻之疑严武有刘焉之志【云溪友议】李白尝为蜀道难歌曰蜀道难难于上青天以刺严武也【太平广记】

蜀道难或曰作於天宝初或曰作於天宝末二说皆出於後世以意逆之曰此为房杜危之也陆畅去白未远作蜀道易以美韦臯传之当时而蜀道难之词曰锦城虽云乐不如早还家其意必有所属房杜之说盖近之矣【南部新书】

严武传武为剑南节度使房琯以故相为部内刺史武慢倨不为礼最厚杜甫然欲杀甫数矣李白为蜀道难者乃为房杜危之也韦臯传天宝时李白为蜀道难以斥严武陆畅更为蜀道易以美韦臯摭言云太白自蜀至京以新业贄谒贺知章知章览蜀道难一篇扬眉谓之曰公非人世人岂非太白星精耶然则蜀道难之作久矣非为房杜也【唐诗纪事】

严武传李白作蜀道难者乃为房杜危之也此宋人穿凿之论其说又见韦臯传盖因陆畅之蜀道易而造为之耳李白蜀道难之作当在开元天宝间时人共言锦城之乐而不知畏涂之险异地之虞即事成篇别无寓意及元宗西幸升为南京则又为诗曰谁道君王行路难六龙西幸万人欢地转锦江成渭水山回玉垒作长安一人之作前後不同如此亦时为之矣【日知录】

蜀道之难难于上青天篇中凡三见与庄子逍遥篇同吾尝谓作古诗长篇须读庄子史记子美歌行纯学史记太白歌行纯学庄子【徐而庵说唐诗】

李太白古风两卷近七十篇身欲为神仙者殆十三四或欲把芙蓉而蹑太清或欲挟两龙而

凌倒影或欲留玉舄而上蓬山或欲折若木而游八极或欲结交王子晋或欲高揖卫叔卿或欲借白鹿於赤松或欲餐金光於安期岂非因贺季真有谪仙之目而因为是以信其说耶抑身不用郁郁不得志而思高举远引耶尝观其所作梁父吟首言钓叟遇文王又言酒徒遇高祖卒自叹已之不遇有云我欲攀龙见明主雷公砰訇震天鼓帝旁投壶多玉女三时大笑开电光倏烁晦冥起风雨阊阖九门不可通以额扣关阍者怒人间门户尚不可入则太清倒影岂易凌蹑乎太白忤杨妃而去国所谓玉女起风雨者乃怨怼妃子之词也【韵语阳秋】

黄云城边乌欲栖边一作南声调便恶此用字陰阳之殊【赵宦光弹雅】

汉魏诗多不可点所以为好者其气象自不同耳李诗好处亦难点点之则全篇有所不可择焉若乌栖曲与乌夜啼可谓精金粹玉矣【范德机评】

国初人有作九言者谓昨夜西风摆落千林稍渡头小艇卷入寒塘?以为可备一体不知九言起於高贵乡公鲍明远沈休文亦有此体唐人则李太白蜀道难然後天梯石栈相钩连上有六龙回日之高标下有冲波逆折之回川杜集中炯如一段清冰出万壑置在迎风露寒之玉壶又何时眼前突兀见此屋吾庐独破受冻死亦足此九言之最妙者诗有十字成句者太白黄帝铸鼎於荆山链丹砂丹砂成骑龙飞上太清家又有十一字成句者杜诗王郎酒酣拔剑斫地歌莫哀我能拔尔抑塞磊落之奇才李诗紫皇乃赐白兔所捣之药方韦应物诗一百二十凤凰罗列含明珠若坡公山中故人应有招我归来篇似可读作两句矣【怀麓堂诗话】

扬子云长杨赋西压月【古窟字】东震日域服?注以为日月所生恐非李太白诗天马来出月支窟月窟即指月支之国日域指日逐单于也盖借日月字以形容威伏四夷之远耳太白妙得其解矣【杨升庵外集】

王彦辅曰古之善赋诗者工於用人语浑然若出於已意予於李杜见之顔延年赭白马赋旦刷幽燕昼秣荆楚子美骢马行云昼洗须腾泾渭深夕移可刷幽并夜太白天马歌云鸡鸣刷燕晡秣越盖皆用顔赋也韩退之曰李杜文章在光焰万丈长信哉【杨升庵外集】

客言李杜诗中说马如相马经有能过之者乎仆曰毛诗过之曰六经固不可拟然亦未尝仔细说马态相行步也仆曰愿熟读之两骖如舞此駉语所谓花踏羊蹄行也两骖如手此驹语所谓熟使唤也思之便觉走过掣电倾城知与神行电迈蹶恍惚为难骑耳【许彦周诗话】东坡写李白行路难阙其中间八句道子胥屈原陆机李斯事此老不应有所遗忘意其删去必当有说【朱子语类】蔡寬夫诗话云唐末五代俗流以诗自名者多好妄立格法取前人诗句为例议论锋出甚有狮子跳踞毒龙顾尾等势览之每使人拊掌不已大抵皆宗贾岛辈谓之贾岛格而於李杜诗不少假借李白女娲戏黄土搏作愚下人散在六合间蒙蒙若埃尘目曰调笑格以为调笑之资子美冉冉谷中寺娟娟林外峰阑干更上处结绶坐来重目为病格以为言语突兀声势蹇涩此岂韩退之所谓蚍蜉撼大木可笑不自量者耶【渔隐丛话】李太白北风行云燕山雪花大如席秋浦歌云白髮三千丈其句可谓豪矣奈无此理何【渔隐丛话】

李太白侠客行云事了拂衣去深藏身与名元微之侠客行云侠客不怕死怕死事不成事成不肯藏姓名或云二诗同咏侠客而意不同如此予谓不然太白咏侠不肯受报如朱家终身不见季布是也微之咏侠欲有闻於後世如聂政姊之死恐终灭吾贤弟之名是也【邵氏闻见後录】

吕氏童蒙训云晓月出天山苍茫云海间长风几万里吹度玉门关及沙墩至梁苑二十五长亭大舶夹双橹中流鹅鸛鸣之类皆气盖一世学者能熟味之自然不褊浅矣【渔隐丛话】

李太白诗过人其生平所享如浮花浪蘂其诗云罗帷舒卷似有人开明月直入无心可猜不可及也【苏涑城集】诗言穷则尽意则丑韵软则庠杜少陵丽人行李太白杨叛儿一以雅道行之故君子言有则也【陆时雍评】李太白荆州歌有汉谣之风唐人诗可入汉魏乐府者惟太白此首及张文昌白鼉谣李长吉邕城谣三首而止杜子美却无一篇可入此格【杨升庵外集】

太白白头吟二首颇有优劣其一盖初本也天仙之才不废讨论何必不加点今人落笔便刊布纵云挥珠无怪多類耳【千一录】

闺里佳人年十余颇有四杰风格差逸宕耳要之此等是太白佳作【诗辨坻】

太白集中少年行只有数句类太白其他皆浅近浮俗决非太白所作必误入也【沧浪诗话】

六一居士曰落日欲没岷山西倒着接?花下迷襄阳小儿齐拍手大家争唱白铜鞮此常语也至於清风明月不用一钱买玉山自倒非人推然後见太白之横发所以惊千古者固不在此乎【渔隐丛话】

杜子美饮中八仙歌知章骑马似乘船又天子呼来不上船用两船字韵汝阳三斗始朝天又举觞白眼望青天用二天字韵苏晋长斋绣佛前又皎如玉树临风前又脱帽露顶王公前用三前字韵眼花落井水底眠又长安市上酒家眠用两眠字韵牵牛织女诗蛛丝小人态曲缀瓜果中又防身动如律竭力机杼中用两中字韵李太白襄阳歌鸛鵂杓鸛鵂杯百年三万六千日一日须倾三百杯用两杯字韵庐山谣影落前湖青黛光金阙前开二峰长又翠影红霞映朝日鸟飞不到吴江长用两长字韵韩退之李花诗冰盘夏荐碧实脆斥去不御慙其花又谁堆平地万堆雪剪刻作此连天花用两花字韵双鸟诗两鸟各闭口万象衔口头又百舌旧饶声从此尝低头用两头字韵示爽诗冬夜岂不长达旦灯烛然又此来南北近闻里故依然用两然字韵猛虎行猛虎死不辞但慙前所为又亲故且不保人谁信汝为用两为字韵子美太白退之於诗无遗恨矣当自有体耶【邵氏闻见後录】

絕句字少意多四句而反覆议论如李白横江词气格合歌行之盛使人叹咏其赠汪伦非必其诗之佳要见古人风致如此【范德机评】

太白橫江辭六首章虽分局意如貫珠俗本以第一首編入長短句後五首編入七言絕句首尾衡決殊失作者之意如杜詩秋興八首亦分作二處予特正之凡古人詩歌不可分類以此【楊升庵外集】

東坡送人守嘉州古詩其中云峨眉山月半輪秋影入平羌江水流謫仙此語誰解道請君見月時登樓上兩句全是李謫仙詩故繼之以謫仙此語誰解道請君見月時登樓之句此格本出於李謫仙其詩云解道澄江淨如練令人還憶謝元暉蓋澄江淨如練即元暉全句也後人襲用此格愈變愈工【漁隱叢話】

金沙集有公取古詩一條謂始於太白未必也任華贈白詩已用海風吹不斷及云垂大鵬飛等句則知彼時作此格者蓋多矣【彈雅】

元宗棄國出奔太白乃盛稱蜀中之美西巡果盛事乎猗嗟訕庄而贊其藝副筭刺宣而美其容太白虽為亡國諱而亡國之耻正在言表【唐汝詢唐詩解】

沈雲卿詩船如天上坐人似鏡中行原於王逸少語所謂山陰路上行如在鏡中游之句然李太白入清溪山詩云人行明鏡中鳥度屏風里虽有所襲而語益工【胡元任評】

竹未嘗香也而杜子美詩云雨洗娟娟靜風吹細細香雪未嘗香也而李太白詩云瑤台雪花數千點片片吹落春風香【韻語陽秋】

詩用泪字若沾衣沾裳之類不為剽竊然亦有出奇者潘岳涕泪應情隕杜子美近泪無乾土李太白泪尽日南珠劉禹錫巴人泪應猿聲落賈島泪落故山遠孟雲卿至哀反無泪【謝榛四溟山人集】

李太白以布衣入翰林既而不得官唐史言高力士以脫鞵為耻摘其詩以激楊貴妃為妃所沮止今集中有雪谗詩一章大率言婦人淫亂敗國其略云彼婦人之猖狂不如鵲之強強彼婦人之淫昏不如鶉之奔奔坦蕩君子無容箴言又云姐已滅紂褒女惑周漢祖呂氏食其在旁秦皇太后毒亦淫荒蠓螋作昏遂掩太陽萬乘尚尔匹夫何傷詞殫意窮心切理直如或妄談昊天是殛予味此詩豈貴妃與祿山淫亂而太白曾發其奸乎不然則飛燕在朝陽之句何足深怨也【容齋隨筆】

宋之問不愁明月尽自有夜珠來李白只愁歌舞散化作彩云飞語意皆殊調亦不類高下則差足雁行宋又有夜弦响松月朝楫弄苔泉李有夢月挂朝鏡松風鳴夜弦詞意皆同李直出數丈【彈雅】

李白跌宕不羈鍾情於花酒風月則有矣而肯自縛於枯禪則知淡泊之味賢於脰炙遠矣白始學於白眉空得大地了徹鏡回旋寄輪風之旨中謁太山君得冥機發天光獨照謝世氛之旨晚見道崖則此心豁然更無凝滯矣所謂启開八窗牖托宿掣雷霆又有談玄之作云茫茫

大梦中惟我独先觉腾转风火来假合作容貌问语前後际始知金仙妙则所得於佛氏者益邃【韵语阳秋】李杜长篇全集中不多见北征一首沉着森严龙门叙事之笔也忆旧书怀一首飘扬恣肆南华寓言之遗也光焰万丈於此乎见之【柳亭诗话】

李白诗清水出芙蓉天然去雕饰论诗者谓只一出字便是去雕饰也【余冬序录】

子美诗以後二句续前二句处甚多如寄张山人诗云曹植休前辈张芝更後身数篇吟可老一字买堪贫喜杜观到诗云待尔噉乌鹄抛书示鵲鵲枝间喜不去原上急曾经晴诗云啼乌争引子鸣鹤不归林下食遭泥去高飞恨久陰卧病诗云滑忆雕胡饭香闻锦带羹溜匙兼暖腹谁欲致杯罍如此之类多矣此格起於谢灵运庐陵王之墓下诗云延州协心许楚老惜兰芳解剑竟何及抚坟徒自伤李太白亦时有此格毛遂不墮井曾参寧杀人虚言误公子投杼惑慈亲是也【韵语阳秋】梁虞骞诗落晖散长足细雨织斜文太白亦用其字曰日足森海峽然其惊人泣?所谓自铸伟辞前无古人者乎【杨升庵外集】

太白杨花落尽与乐天残灯无焰体同题类而风趣高卑自觉天壤【诗辩坻】

曹植怨诗愿作东北风吹我入君怀怀徐干诗将心寄明月流影入君怀太白诗我寄愁心与明月随风直到夜郎西兼裁其意撰成奇语【梅禹金】

诗眼云山谷言学者若不见古人用意处但得其皮毛所以去之愈远若风吹柳花满店香若人能复为此句亦未是太白至於吴姬压酒劝客尝压字他人亦难及金陵子弟来相送欲行不行各尽觞益不同请君试问东流水别意与之谁短长此乃真太白妙处当潜心焉故学者先以识为主禅家所谓正法眼直须具此眼目方可入道【渔隐丛话】

金陵酒肆留别山谷云此乃真太白妙处而须溪云终是太白语别予许须溪知言云【诗辩坻】

李太白诗风吹柳花满店香温庭筠咏柳诗香随静婉歌尘起影伴妖娆舞?垂传奇诗莫唱踏阳春令人离肠结郎行久不归柳自飘香雪其实柳花亦有微香诗人之言非诬也柳花之香非太白不能道竹之香非子美不能道【杨升庵外集】

太白诗吴姬压酒唤客尝说者以为工在压字不知吴人方言至酒家有旋压酒子相待之语【云麓漫抄】

李白人分千里外兴在一杯中高适功名万里外心事一杯中如武夫之对韵士而胡元瑞云二诗甚类予谓字面则同句意悬絶【弹雅】

杜之北征述怀皆长篇叙事然高者尚有汉人遗意平者遂为元白滥觞李送魏万等篇自是齐梁但才力加雄辞藻加富耳【诗数】

太白诗浮云游子意落日故人情对景怀人意味深永少陵诗寒空巫峡曙落日渭阳情亦是写景赠别而语意浅短杜诗佳处固多此等句法却不如李【仇苍柱杜诗详注】太白读书匡山十年不下山浔阳狱中犹读留侯传以彼仙才苦心如此今忽忽白日而嚶嚶古人是自绊而希千里也【千一录】

诗贵意意贵远不贵近贵淡不贵浓浓而近者易识淡而远者难知如杜子美鉤帘宿鹭起丸药流莺转李太白桃花流水杳然去别有天地非人间王摩诘反景入深林复照青苔上皆淡而愈浓近而愈远可为知者道难与俗人言也【怀麓堂诗话】

曹子建诗譬海出明珠与太白如天落云锦句法同太白五言如菖蒲花紫茸及登华不注峯与此句皆奇崛异常【杨升庵外集】

世多言李太白以醉入水捉月溺死此谈者好奇之过太白对月能作今人不见古时月今月曾经照古人之句意气原本自超出宇宙对影三人虽醉岂复狂惑至此【玉涧杂书】

李太白云剗却君山好平铺湘水流杜子美云斫却月中桂清光应更多二公所以为诗人冠冕者胸衿阔大故也此皆自然流出不假安排【鹤林玉露】

洞庭西望楚江分水尽南天不见云日落长沙秋色远不知何处吊湘君此诗之妙不待赞前句云不见後句云不知读之不觉其复此二不字决不可易大抵盛唐大家正宗作诗取其流畅不似後人之拘拘耳【杨升庵絶句衍义】

宋之问所得骆氏灵隐警句楼观沧海日门对浙江潮李太白天台晓望诗门标赤城霞楼栖沧岛月最相似【文翔凤云梦药溪谈】

吟咏瀑水衆矣大抵比况耳未有得於所见凿空下语为兴诗者太白独曰海风吹不断江月照还空气象雄杰古今絶唱【王阮义丰集】

李白鹦鹉洲诗调既迅急而多复字兼离唐韵当是五言古诗耳【诗辩诋】

七言絶句初唐风调未谐开元天宝诸名家无美不备李白王昌龄尤为擅場昔李沧溟推秦时明月汉时关一首压卷余以为未允必求压卷则王维之渭城朝雨李白之朝辞白帝王昌龄之奉帚平明王之涣之黄河远上其庶几乎而终唐之世絶句亦无出四章之右者矣【王阮亭唐人万首絶句选凡例】

盛弘之荆州记状巫峡江水之迅云朝发白帝暮到江陵其间千二百里虽乘奔御风不以疾也杜子美诗朝发白帝暮到江陵顷来目击信有徵李太白诗朝辞白帝彩云间千里江陵一日还两岸猿声啼不尽扁舟已过万重山虽全用盛弘之语而优劣自别今人谓李杜不可以优劣论此语亦太愤愤【杨升庵升集】

盛弘之荆州记云白帝至江陵一千二百里春水盛时行舟朝发夕至云飞鸟逝不是过也太白述之为韵语惊风雨而泣鬼神矣【杨升庵绝句衍义】

越中览古诗前三句赋昔日豪华之盛末一句咏今日凄凉之景大抵唐人吊古之作多以今昔盛衰构意而从横变化存乎体裁此与韩退之游曲江寄白舍人诗【漠漠轻阴晚自开青天白日映楼台曲江水满千花树有底忙时不肯来】元微之刘阮天台诗【芙蓉脂肉绿云鬟图画楼台金碧山千树桃花万年药不知何事忆人间】皆以落句转合有抑扬有开合此格唐诗中亦不多得【敖子发】

太白诗牛渚西江夜青天无片云登舟望秋月空忆谢将军余亦能高咏斯人不可闻明朝挂帆席枫树落纷纷襄阳诗挂席几千里名山都未逢泊舟寻阳郭始见香炉峰尝读远公传永怀尘外踪东林不可见日暮空闻钟诗至此色相俱空如羚羊挂角无迹可求画家所谓逸品是也【王阮亭分甘余话】

宁国府志载胡安定先生石壁诗一首其序曰余尝览李翰林题泾川汪伦别业二章其词俊逸欲属和之今十月自新安历旌德而仙尉曾公望同游石壁盖胜境也奇峰对耸清溪中流路出半峰佳秀可爱传闻新建汪公所居不远掩映溪岫率类於此且欲寻访迫暮不获因思旌川即泾川接境也而幽胜过之汪公亦伦之别????也而儒雅胜之岂可使讽咏不及於古乎辄成一首题於汪公屋壁虽不及藻饰佳境比肩英流庶俾谪仙之诗不独专美其诗曰李白好溪山浩荡泾川游题诗汪氏壁声动桃花洲英辞逸无继尔来三百秋云云按太白本集诗题只云过汪氏别业而此序乃云题泾川汪伦别业先生非妄言者又去唐时未远当必有据诗五平五仄句或谓自宋始有之非也颜延年诗独静阙偶语阴虫先秋闻李太白诗处世若大梦胡为劳其生孟东野诗夜镜不照物朝光何时升【余冬序录】

法藏碎金云太白夜怀有句云宴坐寂不动大千入毫发潘佑独坐有句云凝神入混茫万象成虚宇予爱二子吐辞精敏之力入道深密之状合而书之聊为已用【渔隐丛话】

今人作诗多忌重叠右丞早朝妙绝古今犹未免五用衣冠之论太白访戴天山道士不遇诗水声飞泉树松桃竹语皆犯重吁古人言外求佳今人於句中求隙去之远矣【唐诗解】

太白诗斗酒渭城边炉头耐醉眠乃岑参之诗误入塞上曲驪马新跨白玉鞍乃王昌龄之诗亦误入昌龄本有二篇前篇乃秦时明月汉时关也【沧浪诗话】

蜀国曾闻子规鸟宣城还见杜鹃花一叫一回肠一断三春三月忆三巴此太白寓宣州怀西蜀故乡之作也太白为蜀人见於刘全白志铭曾南丰集序杨遂故宅记及自叙书不一而足此诗又一证也近日吾乡一士夫为山东人作诗序云太白非蜀人乃山东人也予以前所引证诘之答曰且谄山东人析綽楔资何暇核实【杨升庵外集】

哭宣城善酿纪叟予家古本作夜台无李白此句绝妙不但齐一生死又且雄视幽明矣昧者

改为夜台无晓日夜台自无晓日又与下句何人字不相干甚矣士俗不可医也【杨升庵外集】

小曲有咸阳沽酒宝钗空之句云是李白所制然李白集中有清平乐词四首独欠是诗而花间集所载咸阳沽酒宝钗空乃云是张泌所为莫知孰是【梦溪笔谈】

李太白集注卷三十四

卷三十五

钦定四库全书

李太白集注卷三十五

钱塘 王琦 撰

年谱

李太白年谱

据太白诗文自述系出陇西汉将军李广後【见赠张相镐诗】於凉武昭王为九世孙当隋之末其先世以事徙西域隐易姓名故唐兴以来漏於属籍至武后时子孙始还内地於蜀之绵州家焉因逋其邑遂以客为名即太白父也【李阳冰草堂集序曰李白陇西成纪人凉武昭王九世孙蟬聯珪组世为显着中叶非罪谪居条支易姓与名累世不大曜神龙之初逃归於蜀复指李树而生伯扬范传正翰林学士李公新墓碑曰其先陇西成纪人公之孙女於箱篋中得公之子伯禽手疏十数行纸坏字缺不能详备约而计之凉武昭王九代孙也隋末多难一房被窜於碎叶流离散落隐易姓名故自国朝以来漏於属籍神龙初潜还广汉因侨为郡人父客以逋其邑遂以客为名高卧云林不求禄仕按阳冰序乃太白在时所作所述家世必由於太白自言传正碑据太白之子所手疏二文序述无有异词此其可信而无疑者也新唐书李白本传曰李白兴圣皇帝九世孙其先隋末以罪徙西域神龙初遁还客巴西盖本二文以为依据也太白之为蜀人固彰彰矣魏颢李翰林集序亦曰白本陇西乃放形因家於绵刘全白翰林学士李君碣记云君广汉人其说皆全是知世谓太白为陇西成纪人者本其先世族望而言也或谓蜀人或谓绵州或曰巴西或曰广汉皆指其生长之地或据当时之名或援前古之名而互言之也至若杜子美元微之称为山东李白则又因其流寓之地而言之也旧唐书竟以白为山东人且云父为任城尉因家焉与诸说独异南部新书云李白山东人父为任城尉因家焉少与鲁人隐徂徕山号竹溪六逸俗称蜀人非也今任城令厅有白之词尚存盖仍旧史之误而云耳不可信也】

【传疑】輿地广记曰绵州彰明县有唐李白碑白之先世尝流雋州其後内移白生於此县杜诗补遗曰范传正李白新墓碑云白本宗室子厥先避仇客居蜀之彰明太白生焉彰明绵州之属邑有大小康山白读书於大康山有读书堂尚存其宅在清廉乡【洪迈容斋续笔曰杜子美赠李太白诗康山读书处头白好归来说者以为即庐山也吴曾能改斋漫录内辨误一卷正辨是事引杜田杜诗补遗云范传正李白新墓碑云白本宗室子厥先避仇客居蜀之彰明太白生焉彰明绵州之属邑有大小康山白读书於大康山有读书堂尚存其宅在清廉乡後废为僧房称陇西院盖以太白得名院有太白像吴君以是证杜句知康山在蜀非庐山也予按当涂所刊太白集其首载新墓碑宣歙池等州观察使范传正撰凡千五百余字初无补遗所纪七十余言岂非好事者伪为此书如开元遗事之类以附会杜老之诗耶欧阳氏輿

地广记云彰明有李白碑白生於此县盖亦相传之误当以范碑为证】方輿胜览李阳冰草堂集序李白兴圣皇帝之九世孙其先以罪谪居条支神龙之始逃归於蜀之昌明【今本李阳冰草堂集序无昌明字】按彰明县自先天以前止曰隆昌後避元宗讳始曰昌明五代时改曰彰明杨升庵文集引成都古今记云李白生於彰明之青莲乡

唐长安元年辛丑【即武后之大足元年也十月始改长安】

太白生【旧谱起於圣历二年巳亥云白生於是年按曾巩序享年六十四李阳冰序载白卒於宝应元年十一月自宝应元年逆数六十四年乃圣历二年也薛氏据之故曰白生於是年然李华作太白墓志曰年六十二则应生於长安元年以代宋中丞自荐表核之表作於至德二载丁酉时年五十有七合之长安元年为是若生圣历二年则当云五十有九矣自当以表为正故订以长安元年为太白始生之岁又按李阳冰序云神龙之始逃归於蜀复指李树而生伯阳范传正墓碑云神龙初潜还广汉今以李志曾序参互考之神龙改元太白已数岁岂神龙之年?乃神功之讹抑太白之生在未家广汉之前欤】惊姜之夕长庚入梦故名白以太白字之若青莲居士酒仙翁又其所自号者【青莲居士见荅湖州迦叶司马诗及荅僧中孚赠仙人掌茶诗序青莲花出西竺梵语谓之优鉢罗花清静香洁不染纤尘太白自号疑取此义眉公秘笈谓其生於彰明之青莲乡故号青莲按青莲乡在绵州旧彰明县内彰明遗事原作清廉乡疑後人因太白生於此故易其字作青莲耳谓太白因此而取?恐未是酒仙翁见送权十一序】

长安二年壬寅

长安三年癸卯

长安四年甲辰

神龙元年乙巳【是年中宗复位】

太白年五岁能诵六甲

神龙二年丙午

景龙元年丁未【即神龙三年九月改元景龙】

景龙二年戊申

景龙三年巳酉

景云元年庚戌【即景龙四年六月改元唐隆睿宗即位七月改元景云】

太白年十岁通诗书观百家

景云二年辛亥

先天元年壬子【是年正月改元太极五月改元延和八月元宗即位始改先天】

开元元年癸丑【即先天二年十二月始改开元】

【附考】旧谱开元元年十月甲辰帝猎渭川有大猎赋【按赋序但云以孟冬十月大猎於秦而不书年分考通监先天元年十月癸卯上幸新丰猎於骊山之下开元元年十月甲辰猎於渭川八年十月壬午畋於下邳十月而猎於秦地凡三见旧谱竟属之癸丑岁者大约以太白生於圣历二年至是合十有五岁因十五观奇书作赋凌相如一诗而附会其说若以太白生自长安元年数之至是始十有三岁耳恐未是】

开元二年甲寅

开元三年乙卯

太白年十五上韩荆州书云十五好剑术徧干诸侯赠张相镐诗云十五观奇书作赋凌相如【按太白明堂赋序历遡天皇天后中宗而不及睿宗则是赋之作不特在未改乾元殿之先并在睿宗未崩之先矣考睿宗之崩在开元四年六月制改明堂为乾元殿在开元五年七月赋之作应在三四年间岂所谓十五观奇书作赋凌相如者即是明堂一赋欤】

开元四年丙辰

开元五年丁巳

开元六年戊午

开元七年己未

开元八年庚申

太白年二十性倜傥喜纵横术擊剑为任侠尝手刃数人轻财重施不事产业是年礼部尚书苏頲出为益州长史【旧唐书苏頲传开元八年頲除礼部尚书罢政事俄知益州大都督府长史事】太白於路中投刺頲待以布衣之礼因谓羣寮曰此子天才英丽下笔不休虽风力未成且见专车之骨若广之以学可与相如比肩逸人东严子者隐於岷山之阳【东严子姓名不可考杨升庵以为即徵君赵蕤梓州盐亭人字云卿者是又曰岷山之阳即指匡山杜子美赠诗所谓匡山读书处其说见晏公类要郑谷诗所谓雪下文君沽酒店云藏李白读书山

者也俱恐未是】太白从之游巢居数年不迹城市养奇禽千计呼皆就掌取食了无惊猜郡守闻而异之诣庐亲覩因举二人以有道科并不起【上二事见太白所上安州裴长史书中自叙历历然无岁月可考而苏頲之为益州长史实惟开元八年故连其少年诸事并叙於此又书中先言隐居岷山後言投刺苏公玩其文义作两段叙述非接次而言者州举有道应是见苏公以後事新唐书本传曰白既长隐岷山州举有道不应苏頲为益州长史见白异之曰是子天才英特少益以学可比相如盖依书辞顺序之耳恐未是又杨升庵以广汉太守为苏頲且引頲荐疏所谓赵蕤术数李白文章为证今按苏頲为益州长史未尝为广汉太守据书中所说明是两人杨说殊谬】

【传疑】唐诗纪事引东蜀杨天惠彰明遗事云元符二年春正月天惠补令於此从学士大夫求问遗事闻唐李白本邑人微时募县小吏入令卧内尝驱牛经堂下令妻怒将加诘责太白亟以诗谢云素面倚栏钩娇声出外头若非是织女何必问牵牛令惊异不问稍亲招引侍砚席令一日赋山火诗云野火烧山後人归火不归思轧不属太白从旁缀其下句云焰随红日远烟逐暮云飞令惭止顷之从令观涨有女子溺死江上令复苦吟云二八谁家女飘来倚岸芦鸟窥眉上翠鱼弄口旁朱太白辄应声继之云緑髮随波散红颜逐浪无何因逢伍相应是怨秋胡令滋不悦太白恐弃去隐居戴天大匡山往来旁郡依潼江赵徵君蕤亦节士任侠有气善为纵横学着书号长短经太白从学岁余去游成都赋春感诗云茫茫南与北道直事难谐榆荚钱生树杨花玉糝街尘紫游子面蝶弄美人钗却忆青山上云门掩竹斋益州刺史苏頲见而奇之时太白齿方少英气溢发诸为诗文甚多微类宫中行乐词体今邑人所藏百篇大抵皆格律也虽颇体弱然短羽?襍已有凤雏态淳化中县令杨遂为之引谓为少作是也【遂江南人自名能诗累谪为令云琦按此编今已不传晁公武读书志曰蜀本太白集附入左绵邑人所裒白隐处少年所作诗六十篇尤为浅俗今蜀本李集亦不可见疑文苑英华所载五律数首或即是欵】始太白与杜甫相遇梁宋间结交欢甚久乃去客居鲁徂徕山甫从严武成都太白益流落不能归故甫诗云匡山读书处头白好归来然学者多疑太白为山东人又以匡山为匡庐皆非也今大匡山犹有读书台而清廉乡故居遗地尚在废为寺名陇西院有唐梓州刺史碑失其名【太平寰宇记绵州彰明县有李白碑在寧梵寺门下梓州刺史于邵文元丰九域志绵州有李太白碑唐梓州刺史于邵文】及绵州刺史高祝记太白有子曰伯禽女曰平阳皆生太白去蜀後有妹月圆前嫁邑子留不去以故葬邑下墓今在陇西院旁百步外或传院乃其所舍云

开元九年辛酉

开元十年壬戌

开元十一年癸亥

开元十二年甲子

有蟾蜍薄太清诗【新唐书开元十二年七月废皇后王氏为庶人旧注谓蟾蜍薄太清一篇

为废后而作玩诗意当是】

开元十三年乙丑

太白出游襄汉南泛洞庭东至金陵扬州更客汝海还憩云梦故相许圜师家以孙女妻之遂留安陆者十年【以上游历之处略见上安州李长史裴长史二书中其岁月皆无可考而娶於许氏约许当在是年之後故并叙於此】

访戴天山道士不遇诗登峨嵋山诗登锦城散花楼诗在蜀所作者皆是年以前诗

开元十四年丙寅

开元十五年丁卯

开元十六年戊辰

开元十七年己巳

开元十八年庚午

太白年三十上韩荆州书云三十成文章历抵卿相上安州裴长史书云五岁诵六甲十岁观百家横经枕籍制作不倦迄於今三十春矣以为士生则桑弧蓬矢射乎四方故知大丈夫必有四方之志乃杖剑去国辞亲远游南穷苍梧东涉溟海见乡人相如大夸云梦之事云楚有七泽遂来观焉而许相公家见招妻以孙女憩迹於此至移三霜焉【按太白送从侄端游庐山序云余少时大人令诵子虚赋私心慕之及长南游云梦览七泽之壮观酒隐安陆蹉跎十年是太白寓居安陆盖十年也合之此书观之约其旅游安陆娶於许氏当在开元十三年之後太白於时年二十六七矣踰三年年始三十有上裴长史书有憩迹於此至移三霜之语则开元十八年也又踰四年年三十五则开元二十三年计此十年间正是其酒隐安陆之十年自是而出游太原转之齐鲁矣其苍梧洞庭溟海维扬金陵鄂城之游皆在二十六七以前此皆参互可考者曾子固序曰白出居襄汉之间南游江淮至楚观云梦云梦许氏者高宗宰相圜师之家也以女妻白因留云梦者三年三年字尚欠精审】曩昔东游维扬不踰一年散金三十余万有落魄公子悉皆济之又昔与蜀中友人吴指南同游於楚指南死於洞庭之上白伏屍恸哭若丧天伦行路闻者悉皆伤心猛虎前临坚守不动遂权殡於湖侧便之金陵数年来观筋肉尚在雪泣持刃躬申洗削裹骨徒步寝兴携持丐贷营葬於鄂城之东又曰前此郡督马公朝野豪彦一见尽礼许为奇才因谓长史李京之曰诸人之文犹山无烟霞春无草树李白之文清雄奔放名章俊语络绎间起光明洞彻句句动人故交元丹亲接斯议

有安陆白兆山桃花岩寄刘侍御绾诗【诗有云卧三十年好闲复爱仙之句虽未必即是三十岁所作亦其上下数年间诗也旧谱列是诗於戊午年下盖既以圣历二年为太白始生之

岁又误以三十为二十耳考其时太白尚未出蜀又旧谱以门有车马客行及荅湖州迦叶司马诗皆列於三十岁之下按门有车马客诗曰叹我万里游飘飘三十春此叹其客游之久非纪其始壮之年观下文北风揚胡沙埋翳周与秦之句应是禄山残破两京之後所作荅湖州迦叶司马诗云青莲居士谪仙人酒肆藏名三十春恐是长安遇贺监以後之作故有谪仙人之称其曰三十春者是言放浪酒中约三十年非谓是时年甫及三十也兹皆不采】安州应城玉女汤诗安州般若寺水阁纳凉喜遇薛员外乂诗代壽山荅孟少府移文书秋夜於安府送孟赞府还都序上安州李长史书上安州裴长史书皆在安陆十年中之作

开元十九年辛未

开元二十年壬申

有送梁公昌从信安王北征诗【是年正月以礼部尚书信安郡王禕为河东河北道行军副元帅将兵擊奚契丹三月信安郡王禕与幽州长史赵含章大破奚契丹於幽州之北】

开元二十一年癸酉

开元二十二年甲戌

按太白与韩荆州书有三十成文章语此书当是庚午以後甲戌以前四年中之作【唐书韩朝宗传朝宗累迁荆州长史开元二十二年初置十道采访使朝宗以襄州刺史兼山南东道其为荆州长史在是年以前】其忆襄阳旧游赠济阴马少府诗曰昔为大堤客曾上山公楼高冠佩雄剑长揖韩荆州魏颢作公集序云长揖韩荆州荆州延饮白误拜韩让之白曰酒以成礼荆州大悦皆是时事

开元二十三年乙亥

太白游太原有秋日於太原南栅饯阳曲王赞公贾少公石艾尹少公应举赴上都序【是年太白游太原因南栅饯饮一序知之旧唐书开元二十三年春正月乙亥亲耕籍田加至九推而止卿以下终其亩大赦天下在京文武官及朝集采访使三品以上加一爵四品以下加一阶外官赐勲一转其才有霸王之略学究天人之际及堪将帅牧宰者令五品以上清官及刺史各举一人致仕官量与改职依前致仕赐酺三日此文所云今春皇帝有事千亩湛恩八埏大搜羣材以缉邦政王公以令宰见举贾公以王霸声闻正其事也又开元十九年春正月丙子帝亲耕於兴庆宫龙池此乃帝欲知稼穡之事故习为之虽曰亲耕与籍田大礼不同无恩典逮下与此文所言不合故订其的为是年之作】

识郭子仪於行伍中言於主帅脱其刑责与谯郡元参军攜妓游晋祠浮舟弄水【见忆旧游寄谯郡元参军诗】皆是时事已而去之齐鲁寓家任城与孔巢父韩准裴政张叔明陶沔会徂徕山酣饮纵酒号竹溪六逸【游齐鲁岁月不可详考并附於此】

有五月东鲁行荅汶上翁诗曰顾余不及仕学剑来山东举鞭访前途获笑汶上翁是初游鲁地之作又有送韩准裴政孔巢父还山诗是酣饮竹溪时之作

【附考】是年司马子微化形於天台【刘大彬茅山志司马子微於开元乙亥岁六月十八日蛻形於天台】按太白大鹏赋序云余昔於江陵见天台司马子微谓余有仙风道骨可与神游八极之表因着大鹏遇希有鸟赋以自广此赋未详作於何年【旧谱列於开元十年之下未知何据】

开元二十四年丙子

开元二十五年丁丑

开元二十六年戊寅

【附考】是年润州刺史齐澣开伊娄河於扬州南瓜洲浦太白有题瓜州新河饯族叔舍人賁诗曰齐公凿新河万古流不絶丰功利生人天地同朽灭正指其事乃是年以後之作

开元二十七年已卯

开元二十八年庚辰

太白年四十

【附考】是年孟浩然？【王士源孟浩然集序曰开元二十八年王昌龄游襄阳时浩然疾疹发背且愈相得甚欢浪情宴谑食鲜疾动终於冶城南园年五十有二】太白有赠孟浩然诗黄鹤楼送孟浩然之广陵诗春日归山寄孟浩然诗皆是年以前之作

开元二十九年辛巳

天宝元年壬午

时太白游会稽与道士吴筠共居剡中会筠以召赴阙荐之於朝元宗乃下诏徵之太白至京师与太子宾客贺知章遇於紫极宫一见赏之曰此天上谪仙人也因解金龟换酒为乐言於元宗召见金銮殿论当世务草荅蕃书辩若悬河笔不停缀又上宣唐鸿猷一篇帝嘉之以七宝牀赐食御手调羹以饭之谓曰卿是布衣名为朕知非素蓄道义何以得此命供奉翰林专掌密命本事诗曰李太白初自蜀至京师【按太白出蜀之後历游吴楚齐鲁多涉年所而後入京谓自蜀至京师误也】舍於逆旅贺监知章闻其名首访之既奇其姿复请所为文出蜀道难以示之读未竟称叹者数四号为谪仙解金龟换酒与倾尽醉期不间日由是称誉光赫贺又见其乌栖曲【或言是乌夜啼】叹赏苦吟曰此诗可以泣鬼神矣抚言曰李太白谒贺

知章知章曰公非人世之人

可不是太白星精耶 魏顥序曰白久居峨眉与丹丘因持盈法师达白亦因之入翰林【按李阳冰及乐史序皆言天宝中召入翰林刘全白碣记范传正新墓碑云天宝初太白代宋中丞作自荐表亦曰天宝初五府交辟不求闻达亦由子真谷口名动京师上皇闻而悦之召入禁掖既润色於鸿业亦间草於王言雍容揄扬特见褒赏考其时当在天宝元二年间盖太白为知章所荐而知章之辞职在天宝二年之十二月其祖钱出京在三年之正月则太白之因其荐而入朝及为饮中八仙之游在二年十二月以前不居然可知乎又按太白之召见旧唐书以为吴筠荐之新唐书以为贺知章言之新书盖本之乐史别集序考太白有别内赴徵三首则其西入京师乃应诏而至非浪游也疑当时吴筠荐之於先贺知章复言之於後在元宗於筠之荐视太白不过与豫荐诸人一例等视而已及得知章之称誉而後以奇才相待异礼有加世但知有贺之荐而不知有吴之荐殆未稽之於旧史耳至魏顥序谓丹丘因持盈法师达白亦因之入翰林持盈法师谓玉真公主也太白有玉真公主别馆苦雨诗想其才名炫耀竦动一时公主亦欲识其人而扬声於人主之前亦理之所有者乎】

有游太山诗【古本题下有注云天宝元年四月从故御史上太山则其时在鲁而不在会稽并未尝入京可知也但未知游泰山之後方入会稽抑入会稽在游太山之先皆不可考第一首云四月上太山石平御道开第五首云山花异人间五月雪中白想其时在四月五月之交矣】别内赴徵诗

【附考】按开元二十九年正月始立崇元学置生徒令习老子庄子列子文子每年准明经例考试天宝元年二月号庄子为南华真人文子为通元真人列子为冲虚真人庚桑子为洞虚真人太白有送于十八应四子举落第还嵩山诗中有炎炎四真人句应为是时以後之作

【附考】是年改郢州平陆县为中都县析泾县南陵秋浦三县置青阳县白有别中都明府兄诗酬中都小吏携斗酒双鱼於逆旅见赠诗改九子山为九华山与高霁韦权舆联句诗又有望九华山赠青阳韦仲堪诗皆是时以後所作

【附考】是年胡紫阳卒【据紫阳碑文紫阳之卒在天宝元年其葬以十月望後】白有题紫阳先生壁诗冬夜於随州紫阳先生谿霞楼送烟子元演隐仙城山序皆是年以前之作其汉东紫阳先生碑铭是年以後所作

天宝二年癸未

公在长安与贺知章汝阳王璣崔宗之裴周南为酒中八仙之游【李阳冰集序云害能成谤帝用疎之公乃浪迹纵酒以自昏秽与贺知章崔宗之等自为八仙之游谓公謫仙人朝列赋谪仙之歌凡数百首多言公之不得意?此则八仙之游乃被谗以後事贺监以天宝三载正月归越时公作诗送之则其酣饮同游正在元二年间岂供奉无多日即遭谗毁贺监未去之前已不能安其身欵八仙之名李序举其二曰贺知章崔宗之与太白而三范碑举其曰曰贺知

章汝阳王崔宗之裴周南与太白而五新唐书本传云白与知章李适之汝阳王璣崔宗之苏晋张旭焦遂为酒中八仙人盖据杜子美饮中八仙歌而记之耳钱牧斋讥其既云天宝初供奉又云与苏晋同游为自相矛盾盖苏晋以开元二十二年先?见旧唐书而谓於天宝初与李白同游恐其误也然子美与太白同时偏举其人自必不妄或者天宝初苏晋尚存旧书二十二年之下?字之上尚有缺文遂致滋误亦未可知其裴周南一人不入杜诗所咏之数意者如今时文酒之会行之日久一人或亡则以一人补之以致姓名流传参差不一其以此歟】

天宝三载甲申【五月改年为载】

太白在翰林代草王言然性嗜酒多沉饮有时召令撰述方在醉中不可待左右以水沃面稍解即令秉笔顷之而成帝甚才之数侍宴饮因沉醉引足令高力士脱靴力士耻之因摘其诗句以激太真妃帝三欲官白妃辄沮之又为张垪谗譖公自知不为亲近所容恳求还山帝乃赐金放归 本事诗云李白才逸气高与陈拾遗齐名元宗闻之召入翰林以其才藻絶人器识兼茂便以上位处之故未命以官尝因宫人行乐谓高力士曰对此良辰美景岂可徒以声伎为娱悦时得逸才词人咏出之可以夸耀於後遂命召白时寧王邀白饮酒已醉既至拜舞颓然上知其薄声律谓非所长命为宫中行乐五言律诗十首白顿首曰寧王赐臣酒今已醉悦陛下赐臣无畏始可尽臣薄技上曰可即遣二内臣掖扶之命研墨濡笔以授之又令二人张朱丝栏於其前白取笔抒思略不停缀十篇立就更无加点笔迹迺利凤跌龙拏律度对属无不精絶出入宫中恩礼殊厚竟以疎纵乞归上亦以非廊庙器优诏罢遣之 松窗録云开元中禁中初重木芍药即今牡丹也得四本红紫浅红通白者上移植於兴庆池东沉香亭前会花方繁开上乘照夜白太真妃以步辇从诏特选梨园子弟中尤者得乐十六部李龟年以歌擅一时之名手捧檀板押衆乐前将歌之上曰赏名花对妃子焉用旧乐词为遂命龟年持金花笺宣赐翰林供奉李白立进清平调辞三章白欣然承旨犹苦宿醒未解因援笔赋之其辞曰云想衣裳花想容春风拂槛露华浓若非羣玉山头见会向瑶台月下逢一枝红艳露凝香云雨巫山枉断肠借问汉宫谁得似可怜飞燕倚新粧名花倾国两相欢长得君王带笑看解释春风无限恨沈香亭北倚栏杆龟年遽以辞进上命梨园弟子约略调拂丝竹遂促龟年以歌太真妃持玻璃七宝盞酌西凉州蒲桃酒笑领歌意甚厚上因调玉笛以倚曲每曲徧将换则迟其声以媚之太真妃饮罢敛绣巾重拜上龟年常语於五王独忆以歌得自胜者无出於此抑亦一时之极致甘上自是顾李翰林尤异於他学士会高力士终以脱靴为深耻异日太真妃重吟前词力士戏曰比以妃子怨李白深入骨髓何反拳拳如是太真妃惊曰何翰林学士能辱人如斯力士曰以飞燕指妃子是贱之甚矣太真妃深然之上尝三欲命李白官卒为宫中所扞而止【松窗録唐韦叡撰今亡此则自太平广记中録出乐史别集序中所载盖本之此书】 摭言云开元【当是天宝之误】中李翰林白应诏草白莲花开序及宫辞十首时方大醉中贵人以冷水沃之稍醒白於御前索笔一挥文不加鮎【今本摭言缺此一则太平广记中引之按所谓草白莲花开序疑即范墓碑所云泛白莲池序也所谓宫词十首疑即本事诗所云宫中行乐词五言律十首也盖皆得之传闻故其说不无少异今宫词仅存八首白莲序已亡 锺泰华文苑四史云唐书曰元宗召李白草白莲辞使太真捧砚力士脱靴今唐书无此文恐出自稗官小说锺盖误引耳】 魏颢集序云上皇豫游召白白时为贵门邀饮比至半醉令制出师诏不草而成许中书舍人【诸书皆言太白以醉中应诏而作诗文宫中行乐词

多言中春之景沉香亭赋清平调值牡丹繁开则春暮矣泛白莲池又夏中事出师诏不详何时大抵各举其所闻之一事而言致有不同非传闻之错互也杜子美诗云李白一斗诗百篇长安市上酒家眠天子呼来不上船自称臣是酒中仙想其扶醉而见天子固不止偶然一次矣】唐国史补云李白在翰林多沉饮元宗令撰乐词醉不可待以水沃之白稍能动索笔一挥十数章文不加点後对御令高力士脱靴上令小阍排出之【旧唐书白尝沉醉殿上引足令高力士脱靴由是斥矣】酉阳杂俎云李白名播海内元宗於便殿召见神气高朗轩轩若霞举上不觉忘万乘之尊因命纳履白遂展足与高力士曰去靴力士失势遽为脱之及出上指白谓力士曰此人固穷相李阳冰集序云丑正同列害能成谤格言不入帝用疎之公乃浪迹纵酒以自昏秽咏歌之际屡称东山天子知其不可留乃赐金归之【按李阳冰魏颢皆尝与太白游处二序所纪出处较之他文定为真确可信阳冰所谓丑正同列害能成谤颢序所谓以张垞谗逐刘全白翰林学士李君碣记亦曰为同列者所谤诏令归山三书大约相同而新旧史皆不载知其疎略矣野客丛书曰李白事所说不一魏颢作文集序曰上皇豫游召白白时为贵朋邀饮比至半醉令制出师诏不草而就许中书舍人以张垞谗逐游海岱间年五十余尚无禄位乐史作别集序则又云上与太真在沉香亭赏木芍药令李龟年持金花笺宣赐李白立进清平调白宿醒未解援笔赋之会高力士挟脱靴之恨潜白於妃由是上三欲官白辄为妃沮刘全白作碣记曰天宝初元宗辟翰林待诏因为和蕃书并上宣唐鸿猷一篇上重之欲以纶诰之任委之为同列者所谤诏令归山遂浪迹天下范传正新墓碑曰天宝初召见於金銮殿论当世务草荅蕃书元宗嘉之遂直翰林专掌密命将处司言之任他日泛白莲池公不在宴皇欢既洽召公作序时公被酒於翰苑中命高将军扶以登舟优宠如是既而上疏请还旧山元宗甚爱其材或虑乘醉出入省中不能不言温室树恐掇後患惜而遂之其说纷纭不同如此惟乐史所说颇与传文合传曰白供奉翰林犹与饮徒醉於市帝坐沉香亭意有所感欲得白为乐章召入而白已醉左右以水頽面稍解援笔成文婉丽精切无留思帝爱其材数宴饮白尝侍帝醉使高力士脱靴力士数贵耻之摘其诗以激杨贵妃帝欲官白妃辄沮之白自知不为亲近所容恳求归山帝赐金放还所载如此仆谓李白不容於朝固由高力士之潜然其为人疎旷不密观传正所谓乘醉出入省中不能不言温室树又观李阳冰草堂集序谓出入翰林中问以国政潜草诏诰人无知者丑正同列害能成谤疑其醉中曾泄漏禁中事机或者云云明皇因是疎之】

计太白在长安不过三年所赋诸诗其玉真公主别馆苦雨赠卫尉张卿诗灞陵行送别诗送程刘二侍御独孤判官赴安西幕府诗望终南山寄紫阁隐者诗下终南山过斛斯山人宿置酒诗春归终南山松龙旧隐诗登太白峰诗杜陵絶句夕霁杜陵登楼寄韦繇诗怨歌行【注云长安见内人出嫁友人令予代为之】皆在长安中之作先後不可考其侍从宜春苑奉诏赋龙池柳色初青听新莺百啭歌宫中行乐词清平调词送贺监归四明应制诗送贺宾客归越诗【旧唐书天宝二年十二月乙酉太子宾客贺知章请度为道士还乡三载正月庚子遣左右相以下祖别贺知章於长乐坡上赋诗赠之太白二诗一乃应制一私自送行而作者也其对酒忆贺监二首又重忆一首皆知章没後之作】朝下过卢郎中叙旧游诗金门荅苏秀才诗侍从游温泉宫诗驾去温泉宫後赠杨山人诗温泉侍从归逢故人诗同王昌龄送族弟襄归桂阳诗【诗曰秦地见碧草楚谣对金樽把酒尔何思鸛鹄啼南园予欲罗浮隐犹怀明主恩踟蹰紫宫恋孤负沧洲言知此诗在翰林时之作其闻王昌龄左迁龙标遥有此寄诗

则在是时以後至德以前】皆供奉翰林时所作

翰林读书言怀呈集贤院内诸学士诗送裴十八图南归嵩山诗【诗曰何处可为别长安青绮门临当上马时我独与君言风吹芳兰折日没乌雀喧举手指飞鸿此情难具论同归无早晚颍水有清源应是被谗而去志已决之语】乃遭谗之後所作

还山留别金门知己诗初出金门寻王侍御不遇咏壁上鸛鵒诗将去长安时所作

玉壶咏【鳳凰初下紫泥诏謁帝称觴登御筵揄扬九重万乘主謗浪赤墀青琐贤朝天数换飞龙马敕赐珊瑚白玉鞭】走笔赠独孤驸马诗【是时仆在金门里待诏公车謁天子长揖蒙垂国士恩壮心剖出酬知己一别蹉跎朝市间青云之交不可攀】赠从弟南平太守之遥诗【天门九重謁圣人龙顏一解四海春彤庭左右呼万岁拜贺明主收沉沦翰林乘笔回英盼麟阁峥嵘谁可见承恩初入银台门着书独在金銮殿龙驹雕鎧白玉鞍象牀綺食黄金盘当时笑我微贱者却来请謁为交欢一朝谢病游江海畴昔相知几人在前门长揖後门关今日结交明日改】忆旧游寄譙郡元参军诗【此时行乐难再遇西游因献长杨赋北阙青云不可期东山白首还归去】寄王屋山人孟大融诗【我昔东海上劳山餐紫霞中年謁汉主不愜还归家】留别广陵诸公诗【中回日月顾挥翰凌云烟骑虎不敢下攀龙忽坠天】感时留别从兄徐王延年从弟延陵诗【小子谢麟阁雁行忝肩随】别韦少府诗【西出苍龙门南登白鹿原欲寻商山皓犹恋汉皇恩】鲁中送二从弟赴举之西京诗【鲁客向西笑君门若梦中霜凋逐臣髮日忆明光宫】送杨燕之东鲁诗【我固侯门士谬登圣主筵一辞金华殿蹭蹬长江边】送岑徵君归鸣臯山诗【余亦谢明主今称偃蹇臣】酬张卿夜宿南陵见赠诗【我昔辞林丘云龙忽相见客星动太微朝去洛阳殿】荅高山人兼呈权顾二侯诗【轻尘集嵩岳虚点盛明意谬挥紫泥诏献纳青云际谗惑英主心恩疎佞臣计旁徨庭阙下叹息光陰逝未作仲宣诗先流贾生涕挂帆秋江上不为云罗制】荅杜秀才五松山见赠诗【昔献长杨赋天开云雨欢当时待诏承明里皆道扬雄才可观敕赐飞龙二天马黄金络头白玉鞍浮云蔽日不复返□为秋风摧紫兰角巾东出商山道采秀行歌咏芝草】秋夜独坐怀故山诗【天书访江海云卧起咸京入侍瑶池宴出陪玉辇行夸胡新赋作谏猎短书成拙薄遂疎絕归闲事耦耕】皆去朝以後之作

於是就从祖陈留采访大使彦允请北海高天师授道錄於齐州紫极宫自是浮游四方北抵赵魏燕晋西涉邠岐历商於至洛阳南游淮泗再入会稽而家寓鲁中故时往来齐鲁间前後十年中惟游梁宋最久【此自天宝三载以後至十三载以前十年中游历久暂约略可考者也并錄於此太白赠蔡舍人诗曰一朝去京国十载客梁园以此知其游梁最久其梁园吟曰我浮黄河去京阙挂席欲进波连山天长水阔厌远涉访古始及平台间是去长安之後即为梁宋之游也魏颢酬白诗曰去秋忽乘兴命驾来东土谪仙游梁园爱子在邠鲁两处不一见拂衣向江东考是诗为天宝十四年所作而言去秋则十三载之秋也自天宝三载至十三载中间十年客游梁宋之间而家在东鲁往来其地有时北抵赵魏燕晋西涉邠岐历商於到洛阳皆未尝久羈而一过再过盘桓税驾多历岁时则惟梁地为然故其自言寓游之地不举其他而数称梁园良有以也】

有奉饒高尊師如貴道士傳道籙畢歸北海詩留別西河劉少府詩【太白在開元時嘗游晉矣於太原南柵饒飲一序見之天寶改元以後復游晉地於留別西河劉少府一詩見之所謂秋髮已種種所為竟無成知非壯年時語又有謂我是方朔人間落歲星白衣千萬乘何事去天庭是不得於朝而去後之作也】單父東樓秋夜送族弟沉之秦詩【有長安宮闕九天上此地曾經為近臣又曰屈平顛顛滯江潭亭伯流離遯遼海知是去朝後復歸東魯之作】送族弟單父主簿凝攝宋城主簿至郭南月橋却回栖霞山留飲贈詩送族弟凝至晏堦詩送族弟凝之滁求婚崔氏詩數詩之作大抵皆在此十年中

【附考】新唐書杜甫傳曰甫少與李白齊名時號李杜嘗從白及高適過汴州酒酣登吹台慷慨懷古人莫測也子美遣懷詩云昔與高李輩論交入酒垆兩公壯藻思得我色敷腴氣酣登吹台懷古視平蕘又昔游詩云昔者與高李晚登單父台寒蕘際碣石萬里風雲來白有魯郡東石門送杜二甫詩沙丘城下寄杜甫詩皆在是時【按杜子美寄太白二十韻詩云乞歸優詔許遇我宿心親是其結交歡好之日在太白賜金放歸之後子美未獻三大禮賦以前乃天寶三載至十載間事其與高適夫詩酒倡和為單父吹台之游正其時也】

【附考】是年三月改天下諸郡玄元廟為紫極宮白有尋陽紫極宮感秋詩是時以後之作是年改邠州為新平郡白有幽歌行上新平長史粲詩登新平樓詩贈新平少年詩皆是時以後之作

天寶四載乙酉

天寶五載丙戌

【附考】是年五月以劍南節度使章仇兼瓊為戶部尚書十月改臨淄郡為濟南郡白有荅杜秀才五松山見贈詩【聞君往年游錦城章仇尚書倒屣迎飛牋絡繹奏明主天書降問回恩榮】陪從祖濟南太守泛鵲山湖詩皆是時以後所作

天寶六載丁亥

【附考】是年正月杖殺北海太守李邕淄川太守裴敦復白有上李邕詩系少年時作有題江夏修靜寺詩蓋傷邕也系是時以後之作

天寶七載戊子

天寶八載己丑

有虞城令李公去思碑頌【舊譜列是年於天寶四載下按其文曰天寶四載拜虞城令此紀其受職之年非紀其去官之日其下又云陽無驕僭四載有年則李公在虞四年而後去去思碑頌應作於是年矣其對雪獻從兄虞城宰詩亦是此四年中所作】崇明寺佛頂尊勝陀羅

尼幢颂【文中言律师道宗以天宝八载五月一日示灭云云详其上下文义颂之作也亦当在是年间】

【附考】是年六月陇右节度使哥舒翰攻吐蕃石堡城拔之白有荅王十二寒夜独酌有怀诗云君不能学哥舒横行青海夜带刀西屠石堡取紫袍又云君不见李北海英风豪气今何在君不见裴尚书土坟三尺蒿棘居知为是时以後之作

天宝九载庚寅

太白年五十

天宝十载辛卯

有羽檄如流星诗【是年四月剑南节度使鲜于仲通伐云南战於西洱河败绩士卒死者六万人杨国忠大募两京及河南兵以伐云南诗曰借问此何为荅言楚徵兵渡泸及五月将赴云南征云云知此诗为是时之作】比干碑【文曰天宝十载余尉於卫拜首祠堂云云是代卫县尉李翰作者然此文似非白笔】

天宝十一载壬辰

【附考】是年四月御史大夫王鉞赐死礼部员外郎崔国辅以鉞近亲贬竟陵郡司马白有送崔度还吴度故人礼部员外国辅之子云云乃是年以後之作

天宝十二载癸巳

有书情赠蔡舍人诗【诗曰遭逢明圣主敢进兴亡言白璧竟何辜青蝇遂成冤一朝去京国十载客梁园是作诗时太白已去朝十年矣故定为是时之作下二首全】赠崔司户文昆季诗【诗云惟昔不自媒担簦西入秦攀龙九天上忝列岁星臣布衣侍彤墀密勿草丝纶才微惠渥重谗巧生緇磷一去已十年今来复盈旬】留别曹南羣官之江南诗【诗曰时来不关人谈笑游轩皇献纳少成事归休辞建章十年罢西笑揽镜如秋霜】自梁园至敬亭山见会公谈陵阳山水兼期同游诗【按独孤及送李白之曹南序曰出车桐门将驾於曹送子何所平台之隅合上一诗观之则公之行踪由梁园而曹南由曹南旋反遂往宣城然後游历江南各处尔後往来宣城不止一次而其始游则自兹时始矣】

天宝十三载甲午

太白游广陵与魏万相遇遂同舟入秦淮上金陵与万相别复往来宣城诸处【按魏颢集序曰解携明年四海大盗据此推之则相遇之时乃天宝十三载也又序曰命驾江东访白游天台还广陵见之太白送万诗序曰於广陵相见万酬太白诗曰雪上天台山春逢翰林伯惕然

意不尽更逐西南去同舟入秦淮建业龙蟠处故知其相遇於广陵又同舟自秦淮而上金陵也太白诗曰五月造我语知非佞儗人是其相处之久自春徂夏凡数月皆可考而知也】魏颢序云颢始名万命驾江东访白游天台还广陵见之眸子炯然哆如饿虎或时束带风流醞藉颢平生自负人或为狂白相见混合有赠之作谓余尔必着大名於天下无忘老夫与明月奴因尽出其文命颢为集

有送王屋山人魏万诗赠宣城宇文太守兼呈崔侍御诗宣城九日闻崔四侍御与宇文太守游敬亭余时登响山不同此赏醉後寄崔侍御诗【玩诗意宇文乃天宝中为宣城太守而非至德以後始官其地者也据赵公西侯新亭颂天宝十四载赵悦来为宣城守则宇文之守宣城在其前可意度也崔四侍御未详其名太白又有酬崔侍御诗云自是客星辞帝座元非太白醉扬州此是掇监察御史崔成甫未知与此崔四侍御即一人否旧唐书曰侍御史崔宗之谪官金陵与白诗酒唱和尝月夜乘舟自采石达金陵白衣宫锦袍於舟中顾瞻笑傲旁若无人按崔宗之乃崔日用之子唐书但言其袭封齐国公而不纪其官爵崔佑甫作日用集序云嗣子宗之开元中为起居郎再为尚书礼部员外郎迁本司郎中终於右司郎中其为侍御史及谪官金陵莫之载也新唐书削去侍御史及谪官等字而但云白浮游四方尝乘舟与崔宗之自采石至金陵着宫锦袍坐舟中旁若无人似亦知旧史之误故耳考太白集中有与崔宗之诗三首皆云郎中又叙其同游南阳之白水过菊潭上遗孔子琴等事而游金陵采石事不一及焉恐旧唐书所载者是侍御史崔成甫而误以为宗之耳】春日陪杨江宁及诸公宴北湖感古诗宿白鹭洲寄杨江宁诗金陵阻风雪书怀寄杨江宁诗江宁杨利物画赞【太白赠魏万诗曰吾友杨子云弦歌播清芬虽为江宁宰好与山公羣乘兴但一行且知我爱君盖谓江宁宰杨利物也集中与杨江宁诸诗皆在是时前後之作】书怀赠南陵常赞府诗与南陵常赞府游五松山诗於五松山赠南陵常赞府诗【按是年六月剑南留後李宓率兵伐云南蛮至西洱河举军陷没又关中自去秋水旱相继人多乏食谄出太仓米一百万石贱粜以济贫民太白诗所谓云南五月中频丧渡泸师毒草杀汉马张兵夺秦旗至今西洱河流血拥僵尸咸阳天下枢累岁人不足虽有数盘玉不如一斗粟正言是年事下二诗亦其时先後之作】金陵送权十一序【序言四明逸老贺知章呼余为谪仙人又言我君六叶继圣熙乎玄风三清垂拱穆然紫极是固天宝中既见贺监之後而幽燕未乱以前之作也考其送别之地在金陵当为是年先後间之作无疑】

天宝十四载乙未

太白在宣城

有赠宣城赵太守悦诗为赵宣城与杨右相书赵公西侯新亭颂【文曰惟十有四年皇帝以岁之骄阳秋五不稔乃慎择明牧恤南方凋枯四月孟夏自淮阴迁我天水赵公作藩於宛陵又具载一时僚佐长史齐光父司马武幼成録事参军吴镇宣城令崔钦之名於下知太白与诸公游处皆在是时】夏日陪司马武公与羣贤宴姑熟亭序宣城吴録事画赞

肃宗至德元载丙申【即天宝十五载也七月肃宗即位於灵武始改元至德】太白自宣城

之溧阳又之剡中遂入庐山永王璘为江陵府都督充山南东路及岭南黔中江南西路四道节度使重其才名辟为府僚佐及璘擅引舟师东下胁以偕行【旧唐书元宗幸蜀在途以永王璘为江淮兵马都督扬州节度使白在宣州谒见遂辟从事与太白诗文所自序者不同且永王官爵与其本传所载亦异】

有春於姑熟送赵四流炎方序【据文中所谓自吴瞻秦日见喜气上当攫玉弩摧狼狐洗清天地雷雨必作则禄山既反之後元宗未幸蜀以前所作也又有少府以黄绶作尉泥蟠当涂之语集中有当涂赵少府炎粉图山水歌送当涂赵少府赴长芦诗寄当涂赵少府炎诗皆是时以前之作】赠武十七谔诗【序曰门人武谔深於义者也闻中原作难西来访予爱子伯禽在鲁许将冒胡兵以致之酒酣感激援笔而赠诗曰狄犬吠东洛天津成塞垣爱子隔东鲁空悲断肠猿是此诗为东京陷後所作】猛虎行【诗曰旌旗缤纷两河道战鼓惊山欲倾倒秦人半作燕地囚胡马翻衔洛阳草一轮一矢关下兵朝降夕判幽蓟城巨鳌未斩海水动鱼龙奔走安得宁皆指是时事注见本诗注中又有昨日方为宣城客掣铃交通二千石及溧阳酒楼三月春杨花茫茫愁杀人句是知太白游宣城之溧阳而是诗之作在三月时】经乱後将避地剡中留赠崔宣城诗【太白又有江上荅崔宣城诗曰太华三芙蓉明星玉女峰寻仙下西岳陶令忽相逢当是前此之作疑另是一崔宣城】为吴王谢责赴行在迟滞表【通监天宝十五载二月以吴王祗为灵昌太守河南都知兵马使三月拜陈留太守河南节度使表所谓才缺總戎謬当强寇是也五月徵吴王祗为太仆卿表所谓愍臣不逮赐臣生全是也其曰伏蒙圣恩追赴行在又曰重整乾纲再清国步则作表之时当在元宗幸蜀太子即位於灵武之後矣疑吴王是时迂道入吴将由水路上泝荆襄转趋商洛以至灵武表中所谓大举天兵扫除戎羯所在邮驿徵发交驰臣逐便水行难於陆进是也太白於时相遇为之代作此表欵集中又有上吴王诗三首同吴王送杜秀才入京诗皆是时以前之作】赠王判官时余归隐居庐山屏风叠诗【诗曰大盗割鸿沟如风扫秋叶吾非济代人且隐屏风叠此正两京陷没之後将避地庐山时之作】与贾少公书【书有中原横溃及王命崇重大總元戎辟书三至严期逼迫等语拟其作应在是时且疑是应永王辟命时之作】门有车马客行【诗有北风扬胡沙埋翳周与秦大运且如此苍穹宁非仁亦是两京陷後之作】

至德二载丁酉

二月永王璘兵败太白亡走彭泽坐繫寻阳狱【按通监及新旧唐书永王璘元宗第十六子也天宝十五载六月元宗幸蜀至汉中郡下诏以璘为山南东路岭南黔中江南西路四道节度采访等使江陵郡大都督七月璘至襄阳九月至江陵召募士将得数万人以薛鏐李台卿韦子春刘巨鳞蔡駟为谋主补署郎官御史时江淮租赋钜亿万所在山委恣情破用肃宗闻之诏璘还覲上皇於蜀璘不从命璘生长深宫未更人事自视富强其子襄成王?勇而有力握兵权为左右眩惑遂谋狂悖劝璘取金陵以季广琛浑惟明高仙奇冯季康为将甲士五千人十二月擅引舟师东下遣浑惟明向吴郡袭采访使李希言季广琛趋广陵攻采访使李成式璘进至当涂希言遣其将元景曜及丹徒太守阎敬之将兵拒之成式亦遣其将李承庆来拒璘擊斩敬之以徇景曜承庆并降於璘江淮震动时河南招讨判官李铣在广陵有骑百八十人进屯扬子成式遣判官裴戎以广陵?卒三千拒於伊娄埭广张旗帜大閱士卒於江津璘与

登埤望之有惧色季广琛知事不集与浑惟明冯季康谋各率衆亡走是夜铄阵江北夜然束苇人执二炬以疑之影乱水中覩者以倍告璘军亦举火应之璘疑王师已济携儿女及麾下遁去迟明觉其给复入城具舟楫使驱衆趋晋陵江北之兵齐进至新丰璘使与仙奇逆擊之铄张左右翼搏战射中肩军遂败璘奔鄱阳将南走岭外江西采访使皇甫侁遣兵追及之战大庾岭璘中矢被执潜杀之於传舍为乱兵所害薛鏐等皆伏诛永王璘弄兵之始末如此太白入其幕中世颇非之然考天宝末年宗室诸王若吴王祗虢王巨皆受命将兵文人才士岂无入其幕者太白之受辟於永王璘何以异是後之擅领舟师东下命将交兵其始岂遽料其至此乎新唐书载季广琛谓诸将之言曰吾与公等从王岂欲反耶上皇播迁道路不通而诸子无贤於王者如總江淮銳兵长驱雍洛大功可成今乃不然使吾等名挂叛逆如後世何太白初见要亦类此太白本传谓永王璘辟白为府僚佐及璘起兵白逃还彭泽是广琛奔走广陵之日即太白逃亡彭泽之日也乃广琛以拥衆归降位至节度太白以只身逃遁不免窜流固遇之幸不幸也夫观其为宋中丞自荐表曰属逆胡暴乱避地庐山遇永王东巡胁行中道奔走却至彭泽其忆旧游书怀诗云仆卧香炉顶馮霞 瑶泉半夜水军来寻阳满旌旆空名适自误迫胁上楼船徒赐五百金弃之若浮烟辞官不受赏翻责夜郎天其自序固甚明也苏东坡谓太白之从永王璘当由迫胁以璘之狂肆寢陋虽庸人知其必败太白能识郭子仪之为人杰而不能知璘之无成此理之必不然者蔡寬夫谓太白岂从人为乱者盖其学本出纵横以气侠自任当中原扰攘之时欲藉之以立功名耳大抵才高意广如李北海之徒固未必有成功而知人料事尤其所难议者或责以璘之猖獗而欲仰以立事不能如孔巢父萧穎士察於未萌斯可矣若其志亦可哀矣】宣慰大使崔涣及御史中丞宋若思为之推覆清雪若思率兵赴河南释其囚使参谋军事并上书荐白才可用不报【新唐书本传长流夜郎会赦还寻阳坐事下狱时宋若思将吴兵三千赴河南道寻阳释囚辟为参谋曾南丰集序云永王璘节度东南白时卧庐山璘迫致之璘军败丹阳白奔亡至宿松坐系寻阳狱宣抚大使崔涣与御史中丞宋若思验治明白以为罪薄宜贯而若思军赴河南遂释白囚使谋其军事上书肃宗荐白才可用不报乾元元年终以污璘事长流夜郎新书称白流夜郎还寻阳坐事下狱宋若思释之者不合於白之自序盖史误也琦按太白所作为宋中丞自荐表云前後经宣慰大使崔涣及臣推覆清雪寻经奏闻是寻阳下狱而宋若思释之正坐永王璘事也新唐书以一事分为二事殊谬】

有永王东巡歌【按旧唐书至德元载十二月甲辰江陵大都督府永王璘擅领舟师下广陵新唐书元宗本纪亦以璘反为十二月甲辰事肃宗本纪又以璘反为十月事陷鄱阳郡为二载正月事与此诗所谓永王正月东出师者殊异恐正字有误】在水军宴赠幕府诸侍御诗在水军宴韦司马楼船观妓诗奔亡道中诗南奔书怀诗送张秀才谒高中丞诗【序曰余时繫寻阳狱中】寻阳非所寄内诗万愤词投魏郎中上崔相百忧章狱中上崔相涣诗杂言用投丹阳知己兼奉宣慰判官诗【按涣以至德元载十一月为江南宣慰大使次年八月罢为左散骑常侍余杭太守数诗皆其未罢使以前之作】中丞宋公以吴兵三千赴河南军次寻阳脱余之囚参谋幕府因赠之诗陪宋中丞武昌夜饮怀古诗为宋中丞祭九江文为宋中丞请都金陵表为宋中丞自荐表【武昌怀古有天河落晓霜句乃暮秋时作是年九月癸卯广平王复西京十月壬子广平王复东京请都金陵表当是未闻西京克复捷音以前之作】赠张相镐诗【通监至德二载八月以张镐为河南节度采访等使都督淮南诸军事二诗之作

在是月之後诗曰卧病古松滋苍山空四隣则其时以病暂寓宿松又不在宋中丞幕矣集中又有赠闾丘宿松赠闾丘处士二诗疑皆是时所作】上皇西巡南京歌【上皇以十二月丙午归长安戊午改蜀郡为南京诗有上皇归马若云屯及南京还有散花楼之句盖是上皇既归之後所作】

【附考】是年正月乙卯安禄山为其子庆绪所杀酉阳杂俎云禄山反太白制胡无人言太白入月敌可摧及禄山死太白入月按新旧唐书俱无太白入月事其说恐误旧唐书至德二年九月改宣州绥安县为广德县以县界广德故城为名白有送韩侍御之广德诗为是年以後之作【太白有至陵阳山登天柱石酬韩侍御见招隐黄山诗云天子昔避狄与君亦乘骢拥兵五陵下长策遏胡戎时泰解绣衣脱身若飞蓬亦是此时所作】是年以润州之江宁县置昇州至上元二年乃废白有赠昇州王使君忠臣诗是四年中之作是年十二月改西京为中京白有峨眉山月歌送蜀僧晏入中京诗乃自後五年中之作【旧谱列於开元六年误】

乾元元年戊戌【即至德三年也二月改乾元复以载为年】

终以永王事长流夜郎遂泛洞庭上三峡至巫山乐史别集序云白有知鉴客并州识汾阳王郭子仪於行伍中为脱其刑责而獎重之及翰林坐永王之事汾阳功成请以官爵赎翰林上许之因而免诛【新唐书本传璘败当诛初白游并州见郭子仪奇之子仪尝犯法白为救免至是子仪请解官以赎有诏长流夜郎】

有流夜郎於乌江留别宗十六璟诗流夜郎赠辛判官诗赠刘都使诗【有而我谢明主衔哀投夜郎句】赠易秀才诗【有窜逐我因谁句】赠别郑判官诗【有窜逐无复哀慚君问寒灰句】忆秋浦桃花旧游时窜夜郎诗流夜郎永华寺寄寻阳羣官诗流夜郎至西塞驿寄裴隐诗流夜郎至江夏陪长史叔及薛明府宴兴德寺南阁诗张相公出镇荆州寻除太子詹事予时流夜郎行至江夏与张公相去千里公因太府丞王昔使车寄罗衣二事及五月五日赠予诗予荅以此诗【按张镐为太子宾客新旧唐书皆不载年月独孤及所作洪州刺史张公镐遗爱颂曰拜公荆州大都督府长史明年元良肇建上曰畴若余乐正父师之职汝作宾客卒调护太子嘉言惟允於是授太子宾客则似在乾元二年中也考旧唐书云乾元元年五月戊子以河南节度使中书侍郎平章事张镐为荆州大都督府长史本州防御使庚寅立成王俶为皇太子则二事相去不过二日独孤及所云明年元良肇建者误也若云张公之为太子宾客在明年则可然与此题所云寻除者又不合其云詹事或传闻之误或先除詹事後除宾客亦未可知】鸛鵲洲诗【诗有迁客此时徒极目句是流夜郎至江夏时之作】泛沔州城南郎官湖诗【序云乾元岁秋八月白迁於夜郎遇故人尚书郎张谓出使夏口沔州牧杜公汉阳宰王公觴於江城之南湖乐天下之再平也】寄王汉阳诗【诗云南湖秋月白王宰夜相邀锦帐郎官醉罗衣舞女娇盖泛郎官湖以後之作】醉题王汉阳厅诗【诗有我似鸛鵲鸟南迁嬾北飞句谓迁夜郎也三诗实一时之作】放後遇恩不沾诗流夜郎闻酺不与诗题葵叶诗上三峡诗

【附考】是年六月京兆尹严武贬巴州刺史时郾昂亦自拾遗贬清化尉二人意气友善时赋诗高会【见羊士谔诗集】公有送郾昂谪巴州诗亦是此时所作

乾元二年己亥

未至夜郎遇赦得释【按唐书本纪乾元元年二月丁未以改元大赦四月乙卯以有事南郊大赦十月甲辰以册立太子大赦二年三月丁亥以旱降死罪流以下原之公之遇赦当在此数月中】还憩江夏岳阳复如寻阳

有南流夜郎寄内诗【诗有北雁春归看欲尽南来不得豫章书句盖是三月中作】留别贾舍人至【诗有君为长沙客我独之夜郎句是未遇赦以前之作】流夜郎半道承恩放还兼欣剋复之美书怀示息秀才诗经乱离後天恩流夜郎忆旧游书怀赠江夏韦太守良宰诗【诗有传闻赦书至却放夜郎回句】天长节鄂州刺史韦公德政碑【鄂州刺史韦公即江夏韦太守良宰也诗与文俱一时之作】江夏使君叔席上赠史郎中诗【诗有昔放三湘去今还万死余句】与史郎中饮听黄鹤楼上吹笛诗江夏赠韦南陵冰诗赠从弟南平太守之遥诗【赠韦南陵诗有天地再新法令宽夜郎迁客带寒霜句是遇赦以後之作又曰赖遇南平豁方寸况兼夫子持清论则知与赠从弟南平太守之遥诗皆一时所作】寄韦南陵冰余江上乘兴访之遇寻颜尚书笑有此赠诗【考肃宗时尚书而颜姓者惟鲁公一人则所寻之颜尚书必鲁公也按唐书乾元元年颜真卿由工部尚书出为饶州刺史二年六月由饶州刺史为昇州刺史充浙江西道节度使此诗应在是时前後之作】自汉阳病酒归寄王明府诗【有去岁左迁夜郎道今年勅放巫山阳句】早春寄王汉阳诗望汉阳柳色寄王宰诗陪族叔侍郎晔及中书贾舍人至游洞庭诗【李晔之贬在乾元二年四月则公与晔游饮应在是年之秋而与贾至作诗赠答亦在此时矣】陪侍郎叔游洞庭醉後诗巴陵赠贾舍人诗与贾舍人於龙兴寺剪落梧桐枝望湖诗江夏送倩公归汉东诗【诗序有圣朝已舍季布当徵贾生语是遇赦以後之作】九日登巴陵置酒望洞庭水军【注云时贼逼华容县通监乾元二年八月康楚元张嘉延据襄州作乱楚元自称南楚霸王九月张嘉延袭破荆州有衆万余人商州刺史韦伦起兵讨之十一月进军撃之生擒楚元其衆溃散荆襄皆平此诗与下二首皆是年之作】司马将军歌【有狂风吹古月窃弄章华台句当是荆州陷後之作】荆州贼平临洞庭言怀作

唐诗纪事曰韦渠牟韦述之从子也少警悟工为诗李白异之授以古乐府权载之叙其文曰初君年十一尝赋铜雀台絶句右拾遗李白见而大骇因授以古乐府之学【按旧唐书韦渠牟传渠牟以贞元十七年卒时年五十三逆数其十一岁见太白时在乾元二年中】

上元元年庚子

太白年六十

有江上赠窦长史诗【有万里南迁夜郎国三年归及长风沙句应在是时作】运速天地闭

一首【诗有胡风结飞霜六龙颓西荒句谓禄山背畔元宗西狩也有鸳鸯非越鸟何为眷南翔句谓南迁夜郎也有太白出东方彗星扬精光句按唐书乾元三年四月丁巳有彗星见於东方凡五句余闰四月辛酉朔有彗星出於西方至五月乃灭正是时事此诗为是年之作】

上元二年辛丑【是年九月制去上元年号但称元年以建子月为岁首】

太白游金陵又往来宣城历阳二郡间

有饒李副使藏用移军广陵序【通监上元二年七月以试少府监李藏用为浙西节度副使十月江淮都统崔圆署李藏用为楚州刺史领二城而居盱眙文有社稷虽定於刘章封侯未施於李广移军广陵恭揖後命等语知是十月以前之作】闻李太尉大举秦兵百万出征东南懦夫请缨冀申一割之用半道病还留别金陵崔侍御诗【通监上元二年五月以李光弼为河南副元帅太尉兼侍中都统河南淮南东西山南东荆南江南西浙江东西八道行营节度出镇临淮是其事也诗中有旧国见秋月长江流寒声之句乃是是年秋中之作】宣城送刘副使入秦诗【旧唐书上元二年正月辛卯温州刺史季广琛为宣州刺史充浙江西道节度使诗中所谓秉钺有季公凛然负英姿正指季广琛也所谓统兵扞吴越豺虎不敢窥指刘展余党张景超孙待封占据苏湖将犯抗州之事所谓大勲竟莫叙已过秋风吹是送饒之时约在冬时矣】

宝应元年壬寅【是年四月甲子改元宝应复以正月为岁首己巳代宗即位】

时李阳冰为当涂令太白往依之十一月以疾卒年六十二【曾南丰序作六十四以其序之本文考之既以乾元之前一年参谋宋若思军事时谓白年五十有七合之宝应元年病卒之岁正是六十二耳其曰四者恐是书写之讹】

范传正新墓碑曰晚岁渡牛渚矶至姑熟悦谢家青山有终焉之志盘桓利居竟卒於此李华墓志云年六十二不偶赋临终歌而卒【集中作临路歌】刘全白碣记云偶游至此遂以疾终代宗即位广拔淹滞时君亦拜拾遗闻命之後君亦逝矣

【传疑】摭言曰李白着宫锦袍游采石江中傲然自得旁若无人因醉入水中捉月而死容斋随笔曰世俗多言李太白在当涂采石因醉泛舟於江见月影俯而取之遂溺死故其地有捉月台予按李阳冰作太白草堂集序云阳冰试弦歌於当涂公疾亟草藁万卷手集未修枕上授简俾予为序又李华作太白墓志亦云赋临终歌而卒乃知俗传良不足信盖与杜子美因食白酒牛炙而死者同也二老堂杂志曰世传太白因醉溺江故有捉月台梅圣俞诗云采石月下逢谪仙夜披锦袍坐钓船醉中爱月江底悬以手弄月身翻然不应暴落饥蛟涎便当骑鲸上青天盖信此而为之说也旧唐书本传云白以饮酒过度死於宣城新唐书云李阳冰为当涂令白依之而卒阳冰之序白集亦谓白疾亟枕上授简俾予为集序初无捉月之说岂古不吊溺故史氏为白讳耶抑小说多妄而诗人好奇姑假以发新意耶方輿胜览曰李白初葬采石後迁青山去旧坟九里按李阳冰草堂集序刘全白作墓碣皆谓以疾终五侯鯖錄载太白过采石酒狂捉月恐好事者为之【干一錄杜子美之没旅殡岳阳四十余年乃克襄事

於首阳元微之之志详矣李太白卒於当涂以集托族叔邑令阳冰阳冰之序明矣而稗家之说乃云皆以溺死二公生同声而没亦同毀豈相嫉者流言而志奇者不察耶】

有献从叔当涂宰阳冰诗【诗云小子别金陵来自白下亭知太白自金陵往当涂也又云弹劒歌苦寒严风起前楹月衔天门晓霜落牛渚清则其时为秋冬之交也是非辛丑即壬寅二年中之作】当涂李宰君画赞【赞有缙云飞声当涂政成之句则所赞者为阳冰无疑集中又有陪族叔当涂宰游化城寺升公清风亭诗又有化城寺大钟铭诗称升公湖山秀粲然有辩才济人不利已立俗无嫌猜云云铭序称寺主朝昇英骨秀气虚怀忘情洁已利物云云是朝昇升公本一人而诗与铭之作大约相去不远也铭序称当涂邑宰李公以西逾流沙立功絕域帝畴乎厥庸始学古从政历宰洁白声闻于天天宝之初鸣琴此邦其时代履历与阳冰不类则所谓族叔当涂宰者乃另是一人在天宝中来为邑令者非上元後作当涂宰之李阳冰也】

翰林李太白年谱一帙宋薛仲邕所編集也【薛关中人宋绍兴间为右奉议郎】薛以吕大防为杜诗年谱韩柳二公亦有年谱而太白之集无之因采唐史及李阳冰曾巩诸序参校诗文而为此惜其疎略又不无抵牾余尝参伍诸诗而补订其先後太白生於蜀中出蜀之後不复旋返凡蜀地诸作皆少作也中年游京师出京之後不复再入凡秦地诸作皆天宝初中作也未至京师之前寓家东鲁而往来於燕晋梁宋吴越诸州郡泊去京师之後至天宝之末犹寓家东鲁复往来燕晋梁宋吴越诸州郡故凡燕晋梁宋吴越之诗有作自开元中者有作自天宝中者至德以後不复再至中原所经历者岳阳江夏金陵宣城诸处而已虽开元中亦尝游历其地然其诗要作於至德後为多以此应证诸谱分别疑似或删或补虽不能广引旁罗年经月纬悉以诗笔分隶其间然依此考之若者作於开元时若者作於天宝中若者作於至德以後泊宝应初年亦约略可定矣【太白事迹多无实在年月可考因朝廷一二巨事及同时诸人列传诗文中相关合者参互考订稍可分属故虽以诗文分繫某年之下多云其时者谓在是年先後之间其尤难分属者则云是时以前是时以後】惟是居今考古与太白相去千有余岁典籍之散亡金石之磨灭遗文旧迹日就湮销而不可复见较之薛氏之世益又倍焉薛不能广辑於前而思欲拾遗补阙於後自知其拙矣况集中亥鲁豕鱼之字错谬实多或杂以他人之作未能别其真贋证之史书年月尚多参错不一其杂家记录闻见异辞寧遂足为文献之徵乎今采其一说而依以为据虽云增益较昔为多安知其舛谬较昔不又多耶至於传闻之异辞者谓太白生於昌明之清廉乡读书於大匡山而其死也由捉月於采石之数事昔人多以为不足信然在唐时已传说如此而图经地志且引为故实名公才士亦往往见於诗文故附録之而并载昔人之辩论於其下若其出自唐以後之书本之委巷流传而依附撰拟尤不可凭槩不采辑非不知多文以为富也阙其疑正以见所存者之可信焉耳

李太白集注卷三十五

卷三十六

钦定四库全书

李太白集注卷三十六

钱塘 王琦 撰

外记【一百九十四则】

李太白少时梦所用之笔头上生花後天才贍逸名闻天下【天宝遗事】

李白有天才俊逸之誉每与人谈论皆成句读如春葩丽藻粲於齿牙之下时人号曰李白粲花之论【天宝遗事】李白嗜酒不拘小节然沉酣中所撰文章未尝错误而与不醉之人相对议事皆不出太白所见时人号为醉圣【天宝遗事】

李白於便殿对明皇撰诏诰时十月大寒笔冻莫能书字帝敕宫嫔数十人侍白左右各执牙笔呵之遂取而书其诏其受圣眷如此【天宝遗事】

明皇召诸学士宴於便殿因酒酣顾谓李白曰我朝与天后之朝何如白曰天后朝政出多门国由奸幸任人之道如小儿市瓜不择香味惟拣肥大者我朝任人如淘沙取金剖石采玉皆得其精粹明皇曰学士母乃有所饰【天宝遗事】

宁王宫有乐妓宠姐美姿色善讴唱每宴外客其诸伎女尽在目前惟宠姊客莫能见饮故半酣词客李太白恃醉戏曰白久闻王有宠姊善歌今酒馔醉饱羣公宴倦王何怯此女示於衆王笑谓左右曰设七宝花障召宠姊於障後歌之白起谢曰虽不许见面闻其声亦幸矣【天宝遗事】

李白登华山落雁峯曰此山最高呼吸之气想通天帝座矣恨不携谢朓惊人诗来搔首问青天耳搔首集【云仙杂记】

李白游慈恩寺寺僧用水松牌刷以吴胶粉捧乞新诗白为题讵僧献元沙鉢緑英梅檀香笔兰缣袴紫琼霜海墨徽言【云仙杂记】

李白开元中谒宰相封一板上题云海上钓鳌客李白相问曰先生临沧海钓巨鳌以何物为钩线白曰以风浪逸其情乾坤纵其志以虹蜺为丝明月为钩相曰何物为饵曰以天下无义丈夫为饵时相悚然【侯鯖録】唐剑具稍短常施於脇下者名腰品陇西人韦景珍有四方志呼卢酣酒衣玉篆袍佩玉???儿腰品修饰若神人李太白常识之见感遇诗云玉剑谁家子西秦豪侠儿谓景珍也【清异録】

旧闻李太白好饮玉浮梁不知其果何物余得吴婢使酿酒因促其功答曰尚未熟但浮梁耳试取一盏至则浮蛆酒脂也乃悟太白所饮盖此耳【清异录】

薛稷天后朝位至少保文章学术名冠当时学书师褚河南画踪阎令秘书省有画鹤时号一绝曾旅游新安郡遇李白因留连书永安寺额兼画西方像一壁笔力潇洒风姿逸发曹张之亚也二迹之美李翰林题赞见在【太平广记按薛稷本传稷坐窦怀贞事赐死开元元年七月中事也是时太白年甫十五未出蜀中安得与稷相遇於新安郡盖传闻之譌也】

李太白有薛稷之画赞【宣和画谱按稷薛画赞本集不载盖已佚之矣】许云封乐工知笛者贞元初韦应物自兰台郎出为和州牧轻舟东下夜泊灵璧驿时云天初莹秋露凝冷舟中吟瓢将以属词忽闻云封笛声嗟叹良久韦公洞晓音律谓其笛声酷似天宝中梨园法曲李暮所吹者遂召云封问之乃是李外孙也云封曰某任城旧士多年不归天宝改元初生一月时东封回驾次至任城【按元宗东封泰山乃开元十三年事去天宝改元时凡十八年小说家言固多舛误】外祖闻某初生相见甚喜乃抱诣李白学士乞撰令名李公方坐旗亭高声命酒当垆贺兰氏年且九十余邀李置饮於楼上外祖送酒李公握管醉书某胸前曰树下彼何人不语真吾好语若及日中烟霏谢成宝外祖辞曰本於学士乞名今不解所书之语李公曰此即名在其间也树下人是木子木子是李字也不语莫言莫言暮也好是女子女子外孙也语及日中是言午言午许也烟霏谢成宝是云出封中乃是云封也即李暮外孙许云封也後遂名之【杨巨源李暮吹笛记及甘泽谣】

李白前後三拟文选不如意悉焚之惟留恨别赋【酉阳杂俎】李白才逸气高与陈拾遗齐名先後合德其论诗云梁陈以来艷薄斯极沈休文又尚以声律将复古道非我而谁与故陈李二集律诗殊少尝言兴寄深微五言不如四言七言又其靡也况使束於声调俳优哉故戏杜曰饭颗山头逢杜甫头戴笠子日卓午借问别来太瘦生总为从前作诗苦盖讥其拘束也【本事诗】

李白有马名黄芝采兰杂志【琅嬛记】

每宴饮无不先及每庆具无不先沾中厨之马代其劳内厨之膳给其食李白传【合璧事类】

李白外传云白作乐章赐锦袍【蔡梦弼杜诗注】

李白游华陰县令开门方决事白乘醉跨驴过门宰怒引至庭下汝何人辄敢无礼白乞供状曰无姓名曾用龙巾拭吐御手调羹力士脱靴贵妃捧砚天子殿前尚容走马华陰县里不得骑驴【合璧事类】

毛文岐李太白骑驴处诗华陰道上华山侧想见当年李太白县令不许骑驴过自称天子殿中客一斗百篇逸兴豪到处山水皆故宅胸怀放旷天地小应是玉皇香案谪予亦甘载喜邀

游劳劳万里媿行役

吴筠东游会稽尝於天台剡中往来与诗人李白孔巢父诗篇酬和逍遥泉石人多从之【旧唐书】吴筠所善孔巢父李白歌诗略相甲乙云【新唐书】

唐司马承祯与陈子昂卢藏用宋之问王适毕构李白孟浩然王维贺知章为仙宗十友【海録碎事】

李太后僧伽歌曰此僧本住南天竺为法头陀来此国又云嗟予落泊江淮久罕遇真僧说空有时僧伽已显於淮泗之上矣豪杰中识郭子仪隐逸中识司马子微浮屠中识僧伽则太白亦异人也哉【邵氏闻见後録】

杜甫与李白高适卫宾相友善时宾年最少号小友【唐史拾遗】

许宣平新安歙人也睿宗景云中隐於城阳山南坞结庵以居不知其服饵但见不食顔若四十许人轻健行疾奔马时或负薪以卖薪担常挂一花瓢及曲竹杖每醉行腾腾以归吟曰负薪朝出卖沽酒日西归借问家何处穿云入翠微迺来三十余年或济人危急或救人疾苦城市之中多访之不见但览庵壁题诗曰隐居三十载筑室南山巅静夜翫明月闲朝饮碧泉樵人歌陇上谷鸟戏岩前乐矣不知老都忘甲子年好事者多诵其诗有抵长安者於驿路洛阳同华间传舍是处题之天宝中李白自翰林出东游经传舍览诗吟之叹曰此仙人诗也诘之於人得宣平之实白於是游新安涉溪登山累访之不得乃题诗於庵壁曰我吟传舍诗来访仙人烟岭迷高迹云林隔太虚窥庭但萧索倚杖空踟蹰应化辽天鹤归当千岁余宣平归庵见壁诗又吟曰一池荷叶衣无尽两亩黄精食有余又被人来寻讨着移庵不免更深居其庵後为野火烧之莫知宣平踪迹【续仙传】

李白来访许宣平於紫阳山下过渡得破船有老翁在问宣平家老翁指船篙赋曰面前一竿竹便是许公家盖即宣平也二仙相遇甚奇【方虚谷诗集】

州南数里有岸特高号浣纱阜隔溪对龙井山望城阳不远相传李太白访许宣平徘徊岸上甚久【罗愿新安郡志】浣纱阜在徽州府南二里相传李白来访许宣平阜上待渡【江南通志】

南康军图经云李白性喜名山飘然有物外志以庐阜水石佳处遂往游焉至五老峰爱其险峭奇胜曰天下壮观也卜筑於此吾将老焉今峰下有书堂旧基白後北归犹不忍去乃指庐山曰与君再会不敢寒盟丹崖緑壑神其鉴之【黄鹤杜诗注】

唐人言李白不能屈身以腰间有傲骨【鼠璞】

李太白作玉关定望远黄鹤楼玉堂清对月吟【杨正表琴谱琦按谱中对月吟凡十二段并

有词词不类太白其第八段隐括汉下白登道一诗在内第十一段有彷彿浮槎遨游赤壁之句乃後人所拟也故不錄】

唐文宗曾以时谚谓杜甫李白辈为四絕问丁居晦【册府元龟】

李白尝作长相思乐府一章末曰不信妾肠断归来看取明镜前其妇从旁观之曰君不闻武后诗乎不信比来常下泪开箱验取石榴裙太白爽然自失此即所谓相门女也具此才情固当与寻真腾空为侣第不知娇女平阳能继林下风否【柳亭诗话】

右记逸事三十三则

龙安府平武县有蛮婆渡在江油青莲坝相传李白母浣纱於此有鱼跃入蓝内烹食之觉有孕是生白广輿记白生蜀之青莲乡旧志以为彰明人盖平武实割江彰剑梓之地以为邑今蛮婆渡青莲乡俱隶平武则白生之地在今平武无疑矣【四川总志】

李白故宅在绵州彰明县南二十里古碑刻犹有存者【四川总志】

清莲坝一名青莲乡太白故宅在焉去江油县三十里坝有太白墨池【朱樟白舫集】

杨遂李太白故宅记先生讳白字太白事蹟已具范传正姑孰碑及李阳冰文集序矣夫蛟龙能神於云雨不能为人用凤凰能瑞於王者不能为人畜先生以天成之材能神於为文异人之表能瑞於当世始投袂而来竟解组而去所谓不能为人用与人畜也烁哉庚星储精参络属开元天子御宇日久天下无事聿修文教卷四溟而袂寰宇顿八紘而罗英杰先生乃拖屣剑阁西入长安天子闻其名忻若有得召见之日前席礼之延於金銮待如僚友自是畴咨若采潜俾草奏造膝说词人莫知者恩隆宠洽王公向风不浹日而声烜於华夏亦先生之遇代之盛也夫有高世之德则讪谤者伺其隙有超人之行则嫉妬者窥其衅故士无贤与不肖女无美与丑睹先生以兴叹也值非常之时遭非常之主宜必立非常之事建非常之功以开元之盛非谓无时矣以元宗之明非谓无主矣然而青蝇之营营棘藩斯止贝锦之萋菲豺虎可投贾谊既疎崔駰亦弃岂非得时不难得君难得君不难立事难立事不难建功难故功难成而易败事难就而易毁者欤先生所以卷舒无悔吝趋舍有进退遂乃北游燕赵东访梁宋南憩郢楚周流数十载思与乔松游而饵金丹为事耳由是纵情肆志刘伯伦之邀世也赋诗寓怀阮嗣宗之穷途也学仙养生嵇叔夜之迈俗也观其才思骏发浩荡无涯组绣史籍粉绘经典若鼓号钟而鬼神杂沓辟武库而剑戟森罗而又飘缈悠扬迴出风尘之外不作人间之语故当时号为谪仙人焉如蜀道难可以戒为政之人矣梁甫吟可以励有志之臣矣猛虎行可以勗立节之士矣上云曲可以化愚夫之懵矣怀古可以革浇风之俗矣其余所作虽以感物因事而发终以辅世匡君为意自西窜夜郎南流江左坎 顿蹶飘泊羈屑悲夫仆尝论蜀中自古多出名人才士其尤者汉则司马长卿王子渊扬子云唐则陈子昂暨先生耳长卿遇武皇之重终卧病而闲子渊获宣帝之好亦无用於世子云会王莽之乱复贫困而卒子昂愤文章之坏一变有道又以贬为退先生振风雅之纲再革今弊竟以放而去噫天厚其才而薄其

命乎不然以褒贬圣贤毁誉今古主陰者罚之乎又不然以才学富多器识儒茂司命者黜之乎是乌可知也然此数子千百年後莫不耸慕宗为楷则亦可谓拔乎其萃者先生旧宅在清廉乡後往戴天山读书今旧宅已为浮屠者居之仆少览先生之文每为太息辛卯谪涪斯邑因暇披莽挈侣来寻嗟乎城郭皆是丘陵如故其人已往其迹空在辽海元鹤尚千年而却归苍梧白云竟一去而不返为铭勒石寘之金田其辞曰岷山之精上为金星母乃协梦先生以生厥名与字则而象之出风尘表标天人姿词源学????若泄尾间自古王佐欲致唐虞谓予弗起苍生其如遂来京师荃芬兰蕙天子诏我金銮赐对礼为前席千载一会王公卿士莫不倾盖英声雷飞輶於区外有始有卒其惟圣人孰谓谁来我思奉身稽颡丹陛愿乞骸骨天子从之出苍龙阙鹤返青汉云归碧天缅追安期邈寻偓佺夕餌琼蕊晨漱玉泉放情肆志养吾浩然诗吟千百酒饮百船西浮南泛夫何系焉龙饮山前涪江之涘先生一去宅留故里数变乔木几千人世草蔓荒蹊棘罗废址乡人故老犹话厥美吁哉先生不为不遇命也如何拂衣自去蓬萊金阙崑仑珠树定往游否孰知其故悠悠我思伤心日暮

遵义府有太白宅在夜郎里有题碑记【四川总志】

磨鍼溪在眉州象耳山下世传李太白读书山中未成弃去过小溪逢老媪方磨铁杵问之曰欲作鍼太白感其意还卒業媪自言姓武今溪旁有武氏岩【方輿胜覽】读书台在四川眉州象耳山唐李白尝读书於此上有石刻白词宋杜光庭诗山中犹有读书台风扫晴嵐画嶂开华月冰壶依旧在青莲居士几时来【一统志】

太白台在龙州江油县太白与江油尉往来故有台在尉厅蒲翰为之记【方輿胜覽】

太白读书台在龙安府平武县牛心山宋州守史祁手书石刻并太白赠江油尉诗一在大匡山【四川總志】

太白台在四川龙州牛心山上太白尝读书於此遗址尚存【一统志】

龙安府江油县大明寺在治西南有李白读书台【四川总志】龙安府平武县有明月沉潭在明月渡旧传每夜有月影李白有诗岁久漫灭今石壁上存宋宇文通诗刻【四川通志】

龙安府平武县有匡山碑镌李白出山诗或云在江油县【四川通志】

龙安府江油县有大匡山在县治西三十里山势高耸状如匡字唐李白读书处【全蜀总志】

大匡山在保宁府江油县西三十里唐李白尝读书於此【一统志】

大匡山在成都府彰明县北三十里一名康山唐杜甫寄李白诗匡山读书处头白好归来亦名戴天山【一统志】彰明县北五十里有李白读书台【四川通志】

点灯山在龙安府江油县南二十里一名小匡山夜有光如灯故名上有李白读书台及白祠【四川通志】

杜诗云匡山读书处头白早归来李太白青州人多游匡庐故谓之匡山绵州图经云戴天山在县北五十里有大明寺开元中李白读书於此寺又名大康山即杜甫所谓康山读书处也恐图经之妄【西溪丛语】

载籍之间所言地理讹舛甚多不可胜述李白读书於匡山正绵州大匡山小匡山之处而寰海记旧注乃指江州匡庐山为白读书之所【野客丛书】

琦按太白卧庐山为永王璘迫致幕府坐是得罪杜少陵匡山读书处头白早归来之句当以匡庐之解为正至於太白读书之处不但地志所云历历可据即郑谷蜀中诗亦有雪下文君沽酒店云藏李白读书山之句在唐时已相传若此矣因杜注之援引未确乃并太白读书之处而亦疑其出於附会抑又偏矣

濯笔溪在潼川州西一里古传李白访赵蕤习书於此【四川通志】

李白彰明人周游四方泾岩渠过南阳有诗【四川通志】白云寺在夔州奉节县治北李白寓夔州有白云寺诗刻悬崖间【四川总志】

太白岩在夔州府万县西山上有絶尘龕三字在石壁有唐人诗刻相传太白读书於此【潜确居类书】

曹学佺万县西太白祠堂记县西有太白岩在西山即絶尘龕也王象之輿地碑目云絶尘龕三字在西山上石壁字画瘦劲类晋宋间物唐人题咏甚多相传李太白读书於此有大醉西岩一局棋之语太白蜀人也其诗之见於蜀者若成都散花楼汉嘉峨眉山白帝城蜀道难等篇在集中可考而纪事称其为彰明小吏时令属辞不偶辄为接之令逊其佳以此见妬则东蜀杨天惠所载也予得诸碑刻有题江油主簿厅为米芾书及象耳山留题云夜来醉卧月下花影零乱满人衣袖恍如濯魄於冰壶也此真天仙语本集皆不载而涪陵有渡曰李渡以太白曾渡此即妇人稚子能知之矣独万县西山者不甚着闻至为天仙桥以别之而过者未尝问也予诗落句云一自金陵问消息无人指向万州看盖甚致慨然黄鲁直勒风院记谓西山之胜东望巫峡西尽 鄢不敢与之争抗鲁直在蜀久斯言不诬予谓太白读书此岩中宜有太白祠而万令方君好古乐善予门人典客陆昇彤等唯唯叶力遂书原委於道士常明且系以词曰太白先生金行之精陇西帝裔产於昌明起家小吏不习逢迎牵牛堂下谐谑随身逢彼之怒离乡遂轻扁舟下峡出白帝城顾瞻西山崿崿崿崿挺然拔出巧类削成青开练石翠点秋屏絶尘龕上夫非世情栖泊厥迹读书着名何时非醉而忍独醒何事非局遑问变更事在有无语类不经人心爱之夸诩为真树若曾倚其色敷荣泉若曾酌其声清泠何以祠之厂?上平裁虹为栋架壑作楹峡江苍苍白云自横飞鸟时过嚶彼其鸣薄言访之而怀友生怅然不见涕泣沾巾聿观兹役堂构以新怀贤述古二美则并江山胜豁文明道亨千秋之後令名

不湮

锦江山在四川嘉定州北四十里太白亭在锦江山之巔唐李白尝於此赋诗宋黄庭坚因以名亭【一统志】太白亭在嘉定州北十里锦冈山上下即平羌峡相传太白曾游此黄庭坚建亭於山之絶顶遂以太白名之亭今废尚有石斗石鲸在荒址中【四川志】

竹溪六逸堂在徂徕山西北巉石峰下唐天宝间孔巢父李白韩准裴政张叔明陶沔隐居於此有金翰林承旨党怀英撰碑石刻【一统志】

方豪竹溪记李白与孔巢父韩准裴政张叔明陶沔居徂徕山日沉饮号竹溪六逸而竹溪之名满天下自予有知即慕其地意必清流之上修竹万竿萧森洁爽若神仙之居使人即之而忘去去之思复即也近予以审録之行登太山望徂徕询所谓竹溪者不过荒烟野草之区溪既非旧竹亦何尝一干之存哉然而言竹溪者不絶焉无乃六逸之力耶夫六逸者固一时之英也而唯太白为最显其他若孔巢父人亦稍知其姓名而已余则并姓名而昧之呜呼白於竹溪可谓有独力者矣

李白自幼好酒於兖州习业平居多饮又於任城县构酒楼日与同志荒宴客至少有醒时邑人皆以白重名望其闻而加敬焉【太平广记】

李白酒楼在济寧州南城上唐李白客任城时县令贺知章觴之於此今楼与当时碑刻俱存元著作郎陈俨重修李白酒楼记其末有歌曰公昔去兮乘龙宵云气兮蓬萊宫衿青霞兮佩明月横四海兮焉穷济水兮无波泰山繚兮郁堦寢思故国兮神游悦临风兮浩歌醉而生兮醉而死曩孰非兮今孰是千鍾百榼兮彼且奚适操一瓢兮吉其止揽香风兮折琼芳援北斗兮?桂浆浩溟溟兮徙倚以望归来归来兮举我觴【一统志 按太白任城县厅壁记所云邑宰贺公其名不可考後人遽以贺知章当之误也据新旧二书知章初未尝为任城令噫因一人之误致後人诗文遂因之而皆误职蒐讨者可不慎歟】

济宁州太白楼下俯漕河凭高眺远据一州之胜碑板林立惟唐人李光记大篆最古碑制六面如幢其左为二贤祠祀太白贺监其东有太白浣笔泉【王阮亭秦蜀驿程後记】沈光李白酒楼记有唐咸通辛巳岁正月壬午吴兴沈光过任城题李白酒楼夫触强者腩颺而不发乘险者帖繭而不进溃毒者隐忍而不能就其鍼砭抔猛者持疑而不能尽其胆勇而复视其强者弱之险者夷之毒者甘之猛者柔之信乎酒之作於人也如是翰林李公太白聪明才韵至今为天下倡首业术匡救天必付之矣致其君如古帝王进其臣如古药石挥直刃以血其邪者推义穀以輦其正者岂凭酒而作也凭酒而作者强非真勇太白既以峭讎矫时之状不得大用流斥齐鲁眼明耳聪恐貽颠踣故狎弄杯觴沉溺麴蘖耳一淫雅目混黑白或酒醒神健视听锐发振笔着纸乃以聪明移於月露风云使之涓洁飞动移於草木禽鱼使之妍茂轩腾移於边情闺思使之壮气激人离情溢目移於幽岩邃谷使之辽历物外爽人精魄移於车马弓矢悲愤酣歌使之驰骋决发如睨幽并而失意放怀尽见穷通焉呜呼太白触文之强乘文之险溃文之毒抔文之猛而作狎弄杯觴沉溺麴蘖是真塞其聪翳其明醒则移於赋咏宜

乎醉而生醉而死予徐思之使太白疎其聰決其明移於行事强犯时忌其不得醉而生死也当时骨鯁忠赤递有其人收其逸才萃於太白至於齐鲁结构凌云者无限独斯楼也广不踰数席瓦缺椽蠹虽樵儿牧竖过亦指之曰李白尝醉於此矣刘楚登太白酒楼记太白酒楼在故济州今济宁府南城门外上壮丽雄伟四望夷旷有汶泗二水经其前开河安山山湖诸水匯其西鳧绎龟蒙徂徕岱宗诸山复左顾聯絡於东北皆紆青浮白以舒歛出沒於云烟縹緲之际而齐鲁方千里之胜可指顾而见矣楼之規制不知重修何时其与昔之高卑大小殆不可辯意其上下千数百年间其修葺而因仍者殆皆类此耳右阶西南上有古石柱高可丈四五觚植而涌盖其上周围刻小篆记文者唐沈光之所作也其左阶东南隅有二贤祠记石刻二通盖昔之州人尝祀太白与知章贺公於其上者也祠有二贤何旧传开元中以知章为任城宰而来其来而止也尝饮於此此楼之所以名也惟李白负奇气好仙游其足迹几半天下凡江汉荆湘吴楚巴蜀与夫秦晋齐鲁山水名胜之区亦何所不登眺何日不酣畅而以酒楼名天下有二焉其在洛阳天津桥南董糟丘所造者其事尤奇伟卓絕今其存亡兴废类不可知独兹楼以沈光记文遂留传至今岂偶然哉

赵弼太白酒楼赋济城之巔有楼岿焉担阿翼以四出觚棱揭其高骖谢溷浊於埃 煥金碧於云烟可以骋遐瞩写幽悵盖太白昔所登临而盘桓者也粤惟济郡唐为任城杂舟车於水陆纷人物之俊英俗尚诗书而民勤稼穡夫岂他邦可与抗衡於是四明狂客适宰兹邑温恭克修俨硕有立讼庭闋其虚闲聊游衍乎原隰尔其长庚真人兴圣孙子薄游东鲁寄家於此邂逅之间亶其乐只想夫二贤之登斯楼也形忘兮有终心超兮无始藩五岳兮张屏隐三山兮列几?天汉兮为浆举斗筐兮作匕左浮丘伯乔以振衣右安期羨门而正履豪吟吐万丈之虹醉吻涸三江之水啸歌玩空界之日月震荡驻人寰之风雨眼空四海气盖千古风流豪迈直使人精神飞越欲凌风而遐举爰有豪梁赵子博謔好修倦游湖海养痾林丘乘休暇偕朋俦携浊醪昇芳羞而相与登兹楼仰天宇兮嶠廓俯山川兮樛流草木黄落兮气萧瑟禽兽号鸣兮悲穷秋凭阑兮四望豁我兮远眸东则鳧峰突起鋹峯摧嵬削芙蓉於半空挹苍翠於百里怅禹桐之安在慨秦碑之就毁西则平湖浸空灞滌皎洁霜露降而潦水激蒲荷瘁而蒹葭折惟 艇与鸥羣互出沒而明灭南则野芜苍苍河流汤汤涛靄波雪 注吕梁微神禹之疏凿民何由而奠康北则平原滂漫一望无极泰山岩岩远露秋色顾汶泗之萦回知发源乎其侧周覽既毕逡巡就席浩歌起舞痛饮尽石客有裴徊歔歔泪下沾襟而告赵子曰太白不云乎既无长绳系白日又无大药驻朱顏昔人安在登高望远但见山青青而水潺潺而况吾侪小人皇皇朝夕泊泊尘埃死与草木同腐不亦可哀也哉赵子逌尔而笑举酒觴客而谓之曰吾亦闻诸太白云天地者万物之逆旅光陰者百代之过客故由今而眡昔则既往之日焉穷由今而眡後则方来之日未嗇徒以区区百年之身欲与之计铢两而较寻尺良非惑与吾闻之也君子见其大而略其细薄於人而厚於躬惟修身以俟命舍圣哲吾谁从故遇则伊尹周公道行於当时不遇则仲尼孟軻言垂於无穷彼死生得丧如蠹蟲之过乎前曾何足以芥乎胸中且夫夏虫不可与语冰井鼃不可与言大非達人之大观其孰能邈圖方而无外也客於是輒然而歎洒然而饋洗觴酌酒为太白之酌已而长烟羃於林薄明月出於东山衆客皆醉尽兴而思还矣履霜磴之溜滑挟天风之高寒各扶携而云散及清夜之未阑念兹会兮不偶独喟然而永叹也

赵孟頫太白酒楼诗城迴当平野楼高属暮陰谪仙何俊逸此地昔登临慷慨空怀古徘徊独赏心峰山明眼望百里见遥岑

陈中孚题太白酒楼昔闻李太白山东饮酒有酒楼我今登楼来北风吹髮寒飕飕太白天酒仙人间不可留金光绦气九万里翩然而上骑赤虬左蹴大江涛右翻黄河流手攀北斗招摇柄琼田倒泻银湾秋银湾吸乾坤日月液蟾惊兔泣黄姑愁太白方悠然掀髯送汀鸥炯如晓霞一点映秋水红痕微涌玉色浮太虚变化如蜉蝣仙今何在不可求惟有胸中灿烂五色锦化为元气包神州我欲起从仙之游安得羽翮飞上崑仑丘

宋褰太白酒楼诗我昔在髫年知有谪仙人少壮读所作天才气凌云浔阳紫极宫往岁闻佳句采石青山头前月拜荒墓夜宿檐下云秋弄江上月何如任城楼狂饮兴豪发况有任城宰具酒复知音酒酣溢八极世事徒駸駸内子香闺梦伯禽娇且啼人间火宅漫煎逼正是玉山倾倒时散披紫绮裘倒着白接?银台金马直一吐方瀛绦阙行将去仙之酒杯失遗基楼观雄垣表暗题咏石榴海栢森西东谪仙人今何在汶水鳧山暗苍霭手挥玉鞭骑玉鲸应存浮云九州外仙人魂魄茫氛氲望之不见矧可亲明朝我亦玉京去愿谒蓬山贺季真

周权谪仙楼诗大罗仙人李太白秋水疎莲浮玉色笑傲玉堂金马中诗酒猖狂天子客飘飘豪气秋风起登楼曾醉山东市放浪形骸宫锦袍荣华富贵东流水酒酣挥洒翻河笔险语能令鬼神泣至今光焰照尘寰一字堪偿双白璧我来怀古空凄怆风月千年尚无恙何时相见崑仑丘汗漫从游九天上赵文辉登太白酒楼诗火冷昆明栋宇新笑谈应觉半天闻坐邀采石江头月卧看徂徕顶上云寓意自知非嗜酒伤心谁与共论文骑鲸一去无消息云海茫茫澹夕曛

刘基李白酒楼诗小径纡行客危楼舍酒星河分洗水碧天倚峰山青昭代空文藻斯人忆断萍登临无贺老谁与共忘形

王世贞太白酒楼诗昔闻李供奉长啸独登楼此地一垂顾高名百代流白云海色曙明月天门秋欲竟重来者潺湲济水流

陆深登太白楼诗夜郎一去几千秋尚有任城太白楼身後功名空自好眼前汶泗只交流当年狂客心偏恋近代风人谁与俦拍碎阑干呼不起月明风细忆神游

屠应峻太白楼诗当时不见谪仙人城上高楼空复春势极中原临岱岳境非吾土异三秦遥邻避世东方朔生有相知贺季真斗酒狂歌自今古志存删述与谁论

莫如忠太白楼诗缥缈层楼霄汉隈南城山色镜中开不知仙驭游何处长拟星辰谪上台林杪鹤巢珠树徧日边鲸负海涛来秦碑鲁殿俱销歇未觉浮名胜酒杯

邝尧龄太白楼诗谪仙人去已千秋河水依然尽日流满地湿云生紫阁半天晴雨落沧州名

从白雪空词苑兴到青山买酒楼遥忆贺公能醉客齐名二老至今留

汪琬李太白酒楼歌任城酒楼高插天楼东桃树非昔年骑鲸仙人不知处狂客还归四明路
谁能醉卧胡姬卢惟见春风拂花絮我作东门游携尊楼上头可怜鲁酒薄无复兰陵篘借问
当时造酒者何如纪叟董糟邱尧祠遗蹟空荒荆远望徂徕何限情放歌一曲下楼去汶水东
流日夕声

汪琬济宁太白楼诗先生本非狂古之天人也至今矚遗像丰采犹潇洒忆当供奉时才誉倾
朝野高标南山松骏气西极马勲名不能羈况乃富贵假一醉诗百篇吐纳皆大雅屹然鍾吕
鸣余子悉喑哑游戏酒中人夫岂沉湎者遗址任城隅千年构广厦隐隐面层岿鳞鳞俛万瓦
尊醞时见酌碑文每争打【其碑记为吾家文节公所作】神爽游八极乘云倪来下

王士正雨中登太白楼诗开元陈迹去悠悠犹有城南旧酒楼吴语曾呼狂太白洛阳何必董
糟丘龟鳧缥缈当窗出汶泗苍茫遶檻流眼底无人具宾主任城烟雨可怜秋

浣笔泉在兖州府济寧州东门外旧传李太白浣笔处嘉靖间主事白沛筑亭其上【潜确居
类书】

浣笔泉在济宁州城东阙外去会通河不数武出土中一方池一圆池相传李太白浣笔处【
行水金监】

太白山在汶上县东五十里李白游鲁尝登其上【山东通志】济南西北匡山济河路出其
下世传李白尝读书於此【元好问济南行记按山东通志济南府无匡山而有筐山山在府
城西十里其形如筐故名疑元氏记中所云之匡山即此山也谓李白尝读书於此殆彼土之
人将依附杜诗匡山读书处头白好归来之句以证太白为山东人耳】

浮休既投迹少陵一日有以水磨求售者相其地乃古之宜春苑也今谓之韦曲自汉唐以来
诸韦居之与後周逍遥公晒书台唐杜岐公韩退之业郑都官之园池邻里篱落垠塈皆在又
云李太白常居此也仰终南之云物俯滴水之清湍乔木隐天修竹蔽日真天下之奇观关中
之絶景也【张舜民水磨赋序】

唐吴融题兖州泗河中石牀诗一片苔牀水漱痕何人清赏动乾坤谪仙醉後云为态野客吟
时月作魂光景不同波自远风流难问石无心还来多少登临客千载谁将胜事论注云李白
杜甫皆此饮咏

李白书堂在五老峯下唐李白尝至此爱其险峭叹曰天下之壮观因卜筑读书於此【一统
志】

李白书堂在南康府青玉峡西一里太白过此爱其峭峻叹为天下壮观因筑堂读书於此杜

子美贈白詩曰匡廬讀書處頭白好歸來遂因以傳焉【江西南通志】

簡寂觀後有樵徑涉石澗攀崇岡屈折而上五六里許則日照庵四圍山色空翠欲滴香爐峯牛漢陽三峯縹緲挿云即太白讀書處也【吳道賢匡廬紀游】

太白山堂在華頂峯李白嘗游天台後人因為建堂【天台山志】

諸葛羲太白書堂詩太白已千載書堂今在茲丹青銷畫壁苔蘚沒殘碑山暝涼生早天長鳥去遲屋梁新月色彷彿見須眉

值雪山在安慶府望江縣西十八里上有平岡相傳唐李白游此山值雪故名【一統志】

太白山堂在安慶府望江縣唐李白避祿山之難於此讀書遺趾尚存【江南通志】

獨阜山在安慶府太湖縣北五十里上有石刻隴西字世傳李白嘗避地於此【江南通志】

對酌亭在安慶府宿松縣南台李白舉杯邀月處【江南通志】讀書台在安慶府宿松縣南三里唐李白避祿山亂至宿松依邑宰閻丘筑台讀書【江南通志】

李太白書堂在化城寺龍女泉之側天寶間李白訪道江漢遙望九子山顧而樂之易號九華會故人韋仲堪為邑令遂僑居焉建讀書堂於其地宋南渡後荒沒不存【九華山志】

九華山龍女泉其旁乃李太白書堂今為張氏墳地或謂書堂在半霄亭旁者非【周必大泛舟游山錄】

醉石在香泉溪許昔李青蓮游此遶石醉呼故名【黃山志】有醉石醕酤層岩上有行者懼其迎風墮也相傳李謫仙曾踏歌其旁【汪灝游黃山記】

婺源縣西七十里湖山山外有太白渡相傳唐李白過此故名【弘治徽州府記】

施愚山歙城西太平寺詩曰數峯存十字紺宇入蒼烟得徑穿雲窟從僧問雪泉江橋秋樹外山郭夕嵐邊大好留詩處何人繼謫仙注云李太白經此留詩又有集河西太平寺詩曰僧廬路入披雲嶺仙客詩留碎月篇注云唐許宣平隱居披雲嶺李白有灘前留碎月之句【學余詩集】

李白書堂在五松山李白來游乐其山水之勝建堂讀書於此【一統志】

林桷太白五松書院詩翰林最愛五松山嘗說十年未擬還而我抗時良自愧來游只得片時閑

李白岩在梧州藤县东六十里赤水峡深阔丈余顶有窍通日光相传唐李白谪夜郎时过此【一统志】

太白岩在柳州怀远县下石门李白谪夜郎筑石啸咏於此【广西通志】

问月亭在湖广施州卫城北有台孤高特出碧波峯之中建亭其上相传李白谪夜郎尝於此赏月【一统志】湖广武昌府治南三十里有李白读书堂【一统志】

大安山在湖广德安府城六十里唐相许圜师家此山下李白忤高力士放还许相家以孙女娶之黄晦叔桃花岩诗云大安妇翁舍时来枕流眠正谓此【事见方輿胜覽及一统志考太白娶於许氏在未入长安之前谓忤力士以後事大谬】

太白湖在汉阳九真山南一名白湖周二百余里半属沔阳州旧传李太白游泛於此【潜确居类书】

梁山在靖州会同县东四十里昔李白游其巔手引一泉清凉甘美久旱不竭俗名凉山【湖广通志】

輿地纪胜白社山在靖州会同县李白流夜郎时於此结社【潜确居类书】

李白宅在当涂县青山麓白至姑熟依当涂令族人阳冰见兹山幽邃营宅以居裴敬碑云余过当涂访李翰林旧宅即此【江南通志】

采石山在太平府城北二十五里牛渚北昔人於此取石因名临江有矶曰采石矶唐李白尝乘月与崔宗之自采石至金陵着宫锦?坐舟中即此【一统志】

牟存叟端明【名才子】守当涂日郡圃有脱靴亭以谪仙采石得名存叟绘以为图系以赞曰锦袍兮乌帟神清兮气逸凌轹兮万象麾斥兮八极我思古人伊李太白孰为使之朝禁林而慕采石也其天宝之嬖幸与疏擿词章浸润宫掖吾观脱靴之图未尝不嫉小人之情状而伤君子之疎直公之高躅兮霍神龙之不可以羈绁矧富贵如敝屣兮其得失又何所欣戚也【齐东野语或以赞词为元人贯酸斋之作自天宝之嬖幸以下摘去五十余字未知孰是】

捉月亭在采石山世传李白过采石酒狂水中捉月後人因以名亭【一统志】

暮云亭在采石镇唐贤坊神霄宫内旧名捉月亭元时圯後重建乃藏李白天宫锦处【太平府志】

王绶暮云亭记余治郡之二年防御使王侯明护军犀渚江波不动烽燧不惊镇以无事顾瞻唐李翰林墓下祠宇卑陋勿称揭?三年春撤而新之筑亭其旁高显廐足为游观吟眺之胜闻

与见者咸咨嗟而叹异谓侯能为人所未暇为之事是可喜也余曰太白声名在天地间犹青天白日凤凰芝草孰不知为美瑞何待骚人墨客始知敬耶又世之论太白者徒知锦绣心口明月肺肠才思清新歌词婉丽独步当时然此余事耳方高力士骤贵公卿大夫争相取容惴惴然恐失其意而太白使脱靴殿上奴视弗顾可谓气盖天下矣士以气为主脂韦嫫媠胁肩谄笑同流合污者气之不足也富贵不能淫威武不能屈称大丈夫者气之所充也使太白得时行志寄命托孤临大节而不可夺非斯人吾谁与昔毕文简公以王佐期之岂过论哉晚岁脱屣轩冕纵情诗酒乐天知命遗形释智澹乎若深渊之靚泛乎若不系之舟飘然超世之志曾不以死生动其心未可以清狂少之也余遂书其事俾刻诸石且摭杜少陵春日忆白之句名其亭曰暮云宋绍定六年

李白墓在太平府城东青山之北白尝依族人当涂令李阳冰悦谢家青山欲终焉及卒葬采石之龙山後改葬青山宋郡守赵松年为建祠给田付僧看护【一统志】姑熟青山李白墓生芦其形如笔号笔芦绩溪舒頔道原有诗云笔芦萧

笔芦星竹生青山李白墓上陶安李翰林墓诗云自别金銮抵夜郎江南有梦到朝堂酒酣采石风生袂崖老青山月满梁龙管凤笙遗韵事笔簷星竹借文章云飞荒野苔碑断时有诗人醉一觞注云墓上产芦如笔有竹散点如星【太平府志】

李白坟在太平州采石镇民家菜圃中游入亦多留诗然州之南有青山乃有正坟或曰太白平生爱谢家青山葬其处采石特空坟耳世传太白过采石酒狂捉月窃意当时藁葬於此至范侍郎为迁窆青山焉【候鯖錄】采石江之南岸田畝间有墓世传为李白葬所累甃围之其坟略可高三尺许前有小祠堂甚草草中绘白像布袍裹软脚幞头不知其传真否也白尝供奉翰林终不得官则衣白袍是矣范传正作白碑曰白之孙女言曰尝殡龙山之东麓坟高三尺传正时为宣歙观察使谕当涂令诸葛纵改葬於青山则在旧瘞之东六里矣其时元和十二年也然则龙山青山两地皆着白坟亦有实矣至谓白以捉月自投於江则传者诬也曾巩曰范传正志白墓称白偶乘扁舟一日千里白之歌诗亦自云如此或者因其豪逸又尝草瘞江边乃饰为此说耳正史及范碑皆无捉月事则可证矣【演繁露】

采石江头李太白墓在焉往来诗人题咏殆徧有客书一絶云采石江头一抔土李白诗名耀千古来的去的写两行鲁班门前掉大斧亦确论也【蓬轩别记】

白居易李白墓诗采石江边李白坟遶田无限草连云可怜荒陇穷泉骨曾有惊天动地文但是诗人多薄命就中沦落不过君

项斯经李白墓诗夜郎归未老醉死此江边葬阙官家礼诗残乐府篇游魂应到蜀小碣岂旌贤身没犹何罪遗坟野火燃

许浑途经李白翰林墓诗气逸何人识才高举世疑衿生狂善赋陶令醉能诗碧水鲈鱼兴青山鵬鸟悲不堪遗塚在荆棘楚江湄

杜荀鹤经谢公青山吊李翰林诗何谓先生死先生道日新青山明月夜千古一诗人天地空销骨声名不傍身谁移耒阳塚来此作吟邻

姚合送潘秀才归宣州诗李白坟三尺嵯峨万古名因君还故里爲我吊先生晴日移虹影空山出鹤声老郎闲未得无计此中行

殷文圭经李翰林墓诗诗中日月酒中仙平地雄飞上九天身摘蓬莱金籍外宝装方丈玉堂前虎靴醉索将军脱鸿笔悲无令子传十字遗碑三尺墓只应吟客到秋烟

曾巩谒李白墓诗世间遗草三千首林下荒坟二百年信矣辉光争日月依然精爽动山川曾无近属持门户空有乡人拂几筵顾我自惭才力薄欲将何物吊前贤

晁补之采石李白墓诗客星一点太微旁谈笑青蝇玉失光载酒五湖狂到死只今天地不能藏

陆游吊李翰林墓诗饮似长鲸快吸川思如渴冀勇奔泉客从县令初何有醉忤将军亦偶然骏马名姬如昨日断碑乔木不知年浮生今古同归此回首桓公亦故阡【桓温塚亦在当涂】

尤袤李白墓鸣呼谪仙一世之英乘云御风捉月骑鲸来游人间蜕骨遗形其卓然不朽与江山相为终始者则有万古之名吾意其峥嵘萃落决不与化俱尽或吐为长虹而聚为华星青山之下埋玉荒莹祠貌巍然断碑谁铭

高翥经李谪仙墓诗萧萧高塚倚云根父老相传太白坟白骨定随风月冷青山常共姓名存平生出处犹如见一死浮沉那可论客子开元书记後故来浇酒些清魂

宋无李翰林墓诗嗜酒傲明时何因贺监知承恩金马诏失意玉环词名与三闾并身将四皓期匡山有书读应亦叹归迟一骑紫?去空掩谢山莹落月今谁吊长庚夜自明乾坤沉秀气江水带哀声天上多官府文章不可轻

白斑李翰林墓诗出城得佳山两峯特奇诡一如植躬圭一峯拱而侍我见犹爱之而况谪仙子孤坟在其下政尔直一死谪仙真天人出处见诸史岂敢傲吾君辛苦植唐祀嗟予傴僂者尘土正如此停车不忍发载拜颡有泚仰止青山高风清与终始孰谓千载人不在天地里

施闰章经李太白墓诗共说骑鲸捉月游孤坟细草野风秋夜郎幽愤无多泪万古长江楚水流

右记遗迹七十则

退之尝言李太白得仙去元和初有人自北海来见太白与一道士在高山上笑语久之顷道士於碧雾中跨赤虬而去太白耸身健步追及共乘之而东走此亦可骇也【龙城錄】

白龟年乐天之後一日至嵩山遥望东岩古木帘幕罕地往观之一人至前曰李翰林相招龟年乃趋入其人褒衣博带风姿秀发曰吾李白也向水解今为仙矣上帝令吾掌牋奏於此已将百年汝祖乐天亦已为仙现在五台掌功德所因出素书一卷遗龟年曰读之可辩九天禽语九天兽言後白海琼亦云李白今为东华上清监清逸真人【广列仙传】

顷在秘阁抄书得续树萱錄一卷其中载隐君子元撰夜见吴王夫差与唐诸诗人吟咏事李翰林诗曰芙蓉露浓红压枝幽禽感秋花畔啼玉人一去未回马梁间燕子三见归张司业曰緑头鸭儿啞萍藻采莲女郎笑花老杜舍人曰鼓鼙夜战北窗风霜叶沿阶贴乱红三人皆全篇杜工部曰紫领寛袍漉酒巾江头萧散作闲人白少傅曰不因霜叶辞林去的当山翁未觉秋李贺曰鱼鳞砌空排嫩碧露桂稍寒挂团璧三人皆未终篇细味其体格语句往往逼真後阅秦少游集有秋兴九首皆拟唐人前所载咸在焉关子东为秦集序云拟古数篇曲尽唐人之体正谓是也【容斋随笔 何子楚云续树萱錄乃王姓之所撰而托名他人今其书才有三事其一曰贾博喻一曰全若虚一曰元撰详命名之义盖取子虚亡是公云】东坡先生在岭南言元佑中有见李白酒肆中诵其近诗云朝披梦泽云笠钓青茫茫此非世人语也少游尝手録其全篇少游序云观顷在京师有道人相访风骨甚异语论不凡自云尝与物外诸公往还口诵二篇云东华上清监清逸真人李白作也诗云人生烛上花光灭巧妍尽春风遶树头日与化工进只知雨露贪不念零落近昔我飞骨时惨见得当涂坟青松霭朝霞缥缈山下村既死明月魄无复玻璃魂【明月玻璃太白二子名】念此一脱洒长啸登崑仑醉着鸾凤衣星斗俯可扪又云朝披梦泽云笠钓青茫茫寻流得双鲤中有三元章篆字若丹蛇逸势如飞翔归来问天姥妙义不可量金刀割青紫灵文烂煌煌咽服十二环想见仙人房暮跨紫鳞去海气侵肌凉龙子善变化化作梅花粧遗我累累珠靡非明月光劝我穿绦缕系作裙间璫揖予以疾去谈笑闻余香【侯鯖錄 东坡志林都下见有人携一纸文书字则顔鲁公也墨迹如未乾纸亦新健其首两句云朝披梦泽云笠钓青茫茫此语非太公不能道也仇池笔记予顷在都下有传太白诗者其略曰朝披梦泽云笠钓青茫茫此非世人语也盖有见太白在酒肆中而得此诗者神仙之道真不可以意度胡应麟笔丛太白逸诗人生烛上花朝披梦泽云二章见宋人诗话云元佑八年东坡帅定武李方叔送别於惠济出示南岳典宝东华李真人像又出此二诗曰此李真人作近有人於江上遇得之云即太白也其词瑰玮跌宕即非真太白语亦非李赤张碧所能辨紫桃轩又缀东坡自云於京师遇一道人风骨秀异语论不几口诵此二章云东华上清监清逸真人李太白作也诗句妙丽诚然太白口吻顾予窃疑坡公好奇或拟作以诒人观其所补龙山九日语宛是晋人语脉岂难一青莲哉渔隐丛话太白诗暮跨紫鳞去海气侵肌凉亦奇语也】东坡集中载李白谪仙诗一首其词曰我居清空里君隐黄埃中声形不相吊心事难形容欲乘明月光访君开素怀天盃饮清露展翼登蓬莱佳人持玉尺度君多少才玉尺不可尽君才无时休对面一笑语共蹑金鳌头绦宫楼阙百千仞霞衣谁与云烟浮 东观余论曰我居青空表君处红埃中仙人持玉尺度君多少才玉尺不可尽君才无时休此上清宝典李太白诗也【按此诗首二句亦似观化之後所言非生前所作而遗逸者也疑其出自乩仙之笔否则好事者为之也】

处士张孜写李白真? 祷忽梦李白自天降与语诗因为歌以纪之其略曰上天知我忆其人使向人间梦中见【全唐诗】 世传张孜梦李白歌有华山秀作英雄骨黄河泻出纵横材又云梦破青霄春烟霞无去尘若夸郭璞五色笔江淹却是寻常人【唐诗纪事】

绍圣二年四月甲申山谷以史事谪黔南道间作竹枝辞二篇题歌罗驿曰撑崖挂谷蝮蛇愁入箐攀天猿掉头鬼门关外莫言远五十三驿是皇州浮云一百八盘萦落日四十九渡明鬼门关外莫言远四海一家皆弟兄又自书其後曰古乐府有巴东三峡巫峡长猿鸣三声泪沾裳但以抑怨之音和为数叠惜其声今不传余自荆州上峡入黔中备尝山川险阻因作二叠传与巴娘令以竹枝歌之前一叠可和云鬼门关外莫言远五十三驿是皇州後一叠可和云鬼门关外莫言远四海一家皆弟兄或各用四句入阳关小秦王亦可歌也是夜宿於驿梦李白相见於山间曰予往谪夜郎於此闻杜鹃作竹枝词三叠世传之否予细忆集中无有三诵而使之传焉其辞曰一声望帝花片飞万里明妃雪打围马上胡儿那解听琵琶应道不如归竹竿坡面蛇倒退摩围山腰胡孙愁杜鹃无血可续泪何日金鸡赦九州命轻人鲜瓮头船日瘦鬼门关外天北人堕泪南人笑青壁无梯闻杜鹃今豫章集所刊盖自谓梦中语也音响节奏似矣而不能掩其真亦寓言之流坎【程史】先伯父 宁九年四月二十七日夜梦至一处榜曰清香馆东偏有别院东壁有诗牌云题冀公功德院山东李白其诗曰秋风生桂子只在此山中待得春风起还应生桂丛桂丛日以满清香何处断只为爱清香故号清香馆伯父自作记梦一篇书之甚详【许彦周诗话】

徐积梦李白诗乌纱巾紫绮裘梦中太白从吾游陶陶烂醉江山秋半夜起来竟不见头背长安泪如霰陈廷敬梦太白诗太白天上人入世思沉冥昔过酒楼下扁舟系客情昨夜忽梦公千载犹峥嵘花月十年醉声名一日荣此义我赠君出处亦甚明年来至不归去惜哉身後名风雅亦细故所患在有生无生斯无死天人浑一成余语不可悉孤蓬急晨征明当过酒楼灵爽使人惊【自注十年花月西园醉一日声名北斗高予庚子岁梦中所得句】

贞元五年李白子伯禽充嘉兴监徐浦下塲余盐官塲界有蔡侍郎庙伯禽因谒庙顾见庙中神女数人中有美丽者因戏言曰娶妇得如此足矣遂沥酒祝语之後数日正书视事忽闻门外有车骑声伯禽惊起良久具服迎於门折旋而入人吏惊愕莫知其由乃命酒馔久之只叙而去後乃语蔡侍郎来明日又来旁人并不知见伯禽迎於门庭言叙云幸蒙见録得事高门再拜而坐竟夕饮食而去伯禽乃告其家曰吾已许蔡侍郎论亲治家事别亲党数日而卒出通幽録【太平广记 紫桃轩又缀通幽録载贞元中李白子伯禽为乍浦下塲盐官戏侮神祠玉女发狂而卒魏顥李翰林集叙载白初娶许生子曰明月奴又合於鲁一妇人生子曰玻璃所谓伯禽者其即明月奴耶太白一生作诗喜言酒与妇人又喜言神仙最不耐尘俗事其子纵诞乃至垂情木偶自取夭折岂其气类鍾育固有自也琦按范传正新墓碑据其二女所云伯禽以贞元八年不禄而卒与通幽録所传贞元五年者不合又云父存无官则又与所传充嘉兴监徐浦下塲余盐官者不合盖一时讹传而小说家以为异而记之其真伪固不得而定也胡应麟笔丛似欲为太白讳者乃云有两李伯禽一太白子一嘉兴监与神昏析而二之亦恐未是】

沧州李巡官之子夜读书有皂衣肥短人被酒而入子惧走其人曰李白尚与我友乃延坐皂衣以席帽盛酒共饮其父以砖掷之皂衣走帽乃酒榼盖也明日粪壤中得榼故老云此李翰林宅也【唐余錄】

右记异闻十二则

李白字太白生於巴西弥月之初母梦长庚故因以取名甫岁知通书及长好擊剑落落不羈束喜与酒徒纵饮世有六逸八仙之目贺知章一见号谪仙人荐之明皇以布衣召见金銮殿为降辇步迎如见园绮论当世务草答蕃书笔不停缀帝嘉之以宝牀赐食於前手为和羹令待诏金马门当时荣之未几不为亲近所喜有诏放还徘徊江左依李阳冰爱谢家青山有终焉之志澄江月满拏舟夜渡着宫锦袍吟啸其间端是风尘表物也唐人作诗未有如杜甫时白亦得差肩於甫至其名章俊语郁郁芊芊之气见於毫端者固已逼人是岂可与泥笔墨蹊径者争工拙哉尝作行书有乘兴踏月西入酒家不觉人物两忘身在世外一帖字画尤飘逸乃知白不特以诗名也今御府所藏五行书太华峯乘兴帖草书岁时文咏酒诗醉中帖【宣和书谱】

中兴馆阁储藏名贤墨蹟一百二十六轴有李白廿日醉题诗一送贺八归越诗一【陈騏中兴馆阁錄】

贾似道留心书画家藏名蹟多至千卷其宣和绍兴秘府故物往往乞请得之有李白乘兴帖【清和书画舫】

予评李白诗如黄帝张乐于洞庭之野无首无尾不主故常非墨工槩人所可拟议及观其藁书大类其诗弥使人远想慨然白在开元至德间不以能书传今其行草殊不减古人盖所谓不烦绳削而自合者与【黄山谷题李白诗草後】

润州苏氏家有太白天马歌真迹【墨庄漫錄】

李翰林醉墨是葛八叔忱贗作以尝其妇翁诸苏果不能别盖叔忱翰墨亦自度越诸贤可宝藏也【黄山谷跋翟公巽所藏石刻】

李太白醉草葛叔忱戏欺其妇公者山谷尝言之矣虽自九天分???不与万李同林步处雷惊电绕空余翰墨窥寻此赵德麟跋蘧所藏李太白醉草後其实自谓也【何蘧春渚纪闻】

世传李太白草书数轴乃葛叔忱偽书叔忱豪放不羣或叹太白无字画可传叔忱偶在僧舍纵笔作字一轴题之曰李太白书且与其僧约异日无语人盖欲其僧信於人也其所谓得之丹徒僧舍者乃书之丹徒僧舍也今世所传法书要録法书苑墨藪等书着古今能书人姓名尽矣皆无太白书之品第也太白自负王霸之略饮酒鼓琴论兵擊剑链丹烧金乘云仙去其志之所存者靡不振发之而草书奇崛如此宁谦退自晦无一言及之乎叔忱翰墨自絶人故

可以戏一世之士也晁以道为予言如此【邵氏闻见後録】

藁书世传李太白遗文或谓谢氏子弟诳武功苏才元所书更不复详考所出而推举过重便谓不减鲁公然此书虽少绳墨不可考以法度要是轩前轻後度越凌突令人想见酒酣赋诗时也王僧论书或以其人可想或以其法可存世人？【?小篆爱字】李太白名至伪书一卷亦声价曾重岂以人可想故耶【广川书跋】

李白在开元间不以能书名今其行草不减古人龙江梦余録载其二帖是也本事诗言太白笔迹遒利凤跌龙拏今世传有二帖【杨升庵外集】

蜀之石泉禹生之地谓之禹穴其石杳深人迹不到顷巡抚仪封刘远夫修蜀志搜访古碑刻有禹穴二字乃李白所书【杨升庵外集】禹穴在四川石泉县治之北石纽村大禹生此石穴杳深人迹不到掘地得古碑有禹穴二字乃李白所书识者因疑会稽禹穴之误【潜确居类书】壮观碑在金乡县儒学明伦堂前二大字乃唐李白所书碑陰题云贺知章为任城令与太白友善过城镇有所观览书此二字元至治初新丰里人得此碑於沛中置诸堂元末兵起付於草莱明初置今所【山东通志】

滕阳驿厅事前古槐之下有石碣刻壮观二字殊劲挺盖青莲笔也【六研斋笔记】

壮观唐李太白书刻於大同府怀仁县磁峡东崖上笔力遒劲人多摹榻【山西通志】

宴喜台在徐州碣城县东五十步台上有石刻三大字相传唐李白笔【江南通志】

吴天章雯说蓟州独乐寺观音阁凡三层其额乃李太白书【居易録】

宋牧仲蓟州独乐寺诗曰署书传太白遗碣有蒙哥注云寺有李太白书观音之阁四字及元蒙哥帝为赛典赤所立贤牧碑【西陂类稿】

李白清风亭墨蹟旧在化城寺今亡【太平府志】

金陵僧志安於化城寺得会昌中所传李太白真本知县滕宗谅绘传之【太平府志】

太白书得无法之法【郑杓衍极】

李士训纪异曰大历初霸上耕得石函绢素古文孝经初传李白受李阳冰尽通其法皆三十二章今本亦如之【墨池编】

张长史旭传顔平原真卿李翰林白徐会稽浩【解缙春雨杂述中序书学传授一条】

右记法书二十五则

中兴馆阁储藏图画有李白像一不知名氏【宋中兴馆阁续录】秘阁画有小本李白写真崔令钦题【周必大二老堂杂志】

释贯休观李翰林真二首日角浮紫气凜然尘外清虽称李太白知是那星精御宴千锺饮蕃书一笔成宜哉杜工部不错道骑鲸谁氏子丹青毫端曲有灵屹如山忽堕爽似酒初醒天马难拢勒仙房向闭扃若非如此辈何以傲彤庭

苏轼书丹元子所示李太白真诗天人几何同一沓谪仙非谪乃其游麾斥八极隘九州化为两鸟鸣相酬一鸣一止三千秋开元有道为少留縻之不得矧肯求西望太白横峨岷眼高四海空无人大儿汾阳中令君小儿天台坐忘身生平不识高将军手污吾足乃敢嗔作诗一笑君应闻【春渚纪闻士之所尚忠义节气不以摘词摘句为胜唐室宦官用事呼吸之间生杀随之李太白以天挺之才自结明王意有所疾杀身不顾王舒公言太白人品污下诗中十句九句说妇人与酒先生作太白赞则曰开元有道为少留縻之不得矧肯求文平生不识高将军手污吾足乃敢嗔二公立论正以见二公胸次也渔隐丛话李杜画像古今诗人题咏多矣若杜子美其诗高妙固不待言要当知其平生用心处则半山老人之诗得之矣若太白其高气盖世千载之下犹可叹想则东坡居士之赞尽之矣】

饶节李太白画像歌先生之气盖天下当时流辈退百舍醉中咳唾落珠玑身後声名满夷夏青山木拱三百年今晨乃拜先生画乌纱之巾白紵袍岸巾攘臂方出遨神游八极气自稳冰壶五斗霜风高呜呼先生生态絶伦仙风道骨语甚真萧然可望不可亲悬知野鹤非鸡羣天宝之初天子逸先生辞去不肯屈采石江头明月出鼓枻酣歌志愿毕只今遗像粉墨间尚有英风爽毛骨宣州长史粉黛工谁令写此人中龙细看笔意有俯仰妙处果在阿堵中人云此画人莫比吴侯得之喜不寐意侯所爱岂徒尔亦惜真才死泥滓先生朽骨如可起谁为猎之奉天子作为文章文圣世千秋万古诵盛美再拜先生泪如洗振衣濯足吾往矣

陈师道和饶节咏周昉画李白真诗君不见浣花老翁醉骑驴熊儿捉轡骥子扶金华仙伯哦七字好事不胜千金募青莲居士亦其亚斗酒百篇天所借英姿秀骨尚可似逸气高怀那得画周郎韵胜笔有神解衣磅礴未必真一朝写此英妙质似悔只识如花人醉色欲尽玉色起分明尚带金井水乌纱白苧真天人不更着山岩里平生潦倒饱须园禁省不识将军尊手犹怀脱靴气岂是从来骨相屯仰视云空鸿鹄举眼前纷纷那得顾是非荣辱不到处正恐朝来有新句勿言身後不要名尚得吴侯费百金江西胜士与长吟後來不忧身陆沉【文献通考後村刘氏曰陈後山题太白画像云江西胜士与我吟後來不忧身陆沉胜士谓饶德操按德操诗去手污吾足之作大争地位太白非德操遂陆沉耶似非笃论】

周紫芝李太白画像二首欲与天仙论等差短长何止但词华谁人解屈将军手为脱乌皮六缝靴少陵诗瘦平生苦太白才高一醉间捉得江心波底月却归天上玉京仙

李俊民李太白图谪在人间凡几年诗中豪杰酒中仙不因采石江头月那得骑鲸去上天

李端甫李白扇头岩冰涧雪谪仙才碧海骑鲸望不回今日霜纨见遗像飘然疑自月中来

王彝题李太白像青天无人代天语一星西落银云渚嫦娥戏弄青瑤波倾向人间金巨罗龙孙醉吸海为酒日月双飞织锦梭仙鬼千年王母宴谪来醉卧金銮殿玉环腮上桃花小玉尖香腻龙涎砚靴尘煖扑貂璫儿踏破青天捉月飞一声叫断扶桑鸡梅枯化作蓬莱雪梦里长庚大如月

高启题谪仙像妃子嗔来供奉归金陵酒浣旧宫衣若教直上楼船去此像人间写亦稀

徐贲题谪仙像鼙鼓声来已乱杂锦袍脱却恨归迟秋风江上长吟里不唱清平古调词

僧大圭题太白像歌罢秦楼月满阑天风两袖锦袍宽花前莫草清平调飞燕深宫不耐寒

王泽李太白像春殿龙香试彩毫诗成夺得锦宫袍归来笑拥如花妓因看蔷薇月上高

沈周题李太白像风骨神仙品文章浩荡人世间金鸞鹄天上玉麒麟江月狂歌夜宫花醉眼春独输萧颍士不见永王璘

文徵明题太白像宫袍错落洒春风玉雪淋漓滯酒容残夜屋梁栖落月碧天秋水洗芙蓉麒麟岂是人间物眉宇今从画里逢一语不酬千载话匡庐山下有云松

宋濂李太白像赞元行台治书侍御史亦怜真班所藏李太白像系秘阁传本吾友危君太朴尝为之赞自後流落於金陵骆氏酒家洪武己酉秋郡士王宗溥购获之寻以摹本见贖因造赞曰长庚降精下为列仙陵厉日月呼噏风烟锦衣玉顏挥毫帝前气吞閭竖视若乌鸢顿挫万象随机回旋金童来迎络节翠?下土秽浊孰堪後先輾然一笑骑鲸上天

唐韩干画御府所藏有李白封官图【宣和画谱】

贺知章李白合像不知谁作

楼钥题贺监李谪仙二像诗不有风流贺季真更谁能识谪仙人金龟换酒今何在相对画图如有神斗酒浇诗动百篇监湖牛渚两俱仙早知今日犹相对不向嵇山回酒船

李白送别杜子美图

华爱题李白送别杜子美发鲁郡图杜陵有客才名早却与东山李白好短褐飘飘泗水春登临落日同倾倒浮踪转盼各飞蓬石门一别风烟渺同心之谊祛形骸相期直在云霞表渭北

江东日渺茫王孙不见凄芳草由来造化蹶英贤奈尔风流天地老

李白脱靴图

陈旅题李白脱靴图威风翔寥廓妖墓窟广寒翻令赵飞燕无处倚阑干

李白还山图

刘秉忠太白还山图一片灵台照世明共传太白是元精心中有道时时乐眼底无尘物物清
千首未知诗作癖百杯寻与酒为盟长安多少风和月不尽先生吟醉情

李白骑驴图

元好问李白骑驴图八表神游下笔难画师胸次自酸寒风流五凤楼前客枉作襄阳雪里看

邵宝太白像仙人骑驴如骑鲸睥睨尘海思东瀛等闲相逢但叱咤谁知万古千秋情醉来天地小於斗鞭策雷霆鬼神走豪奇自比齐东人大雅犹怀鲁中叟青春想像华清宫解识仙人
图画中拍浮绿酒唤不醒葛巾飒飒生天风

乔仲常有李白捉月图【画继】

蔡珪太白捉月图寒江觅得钓鱼船月影江心月在天世上不能容此老画图常看水中仙

程钜夫谪仙捉月图牛渚矶前白锦袍蛾眉亭上月初高江波满眼平如地醉倒长庚一世豪

王恽李白扪月图诗中无敌饮中豪四海飘萧一锦袍千丈醉魂无处着青山矶上月轮高

李白泛月图

宋九嘉题李白泛月图江心月影尽一掬船头月影尽一吸夜凉风露点宫袍天地之间一李白

李白玩月图

余阙李白玩月图春池细雨柳纤纤手倦挥毫日上帘想得停杯江海夜月明照见水精盘

严氏书画记有戴文进李白问月图【汪砢玉珊瑚?】

张以宁题李白问月图谁提明月天上悬九州荡荡青无烟天东天西走不驻姮娥鬓霜垂两

肩中有桂树万里长吴刚玉斧声阊阖顾兔杵药宵不眠天翁下视为尔怜颇闻昔时锦袍客
乃是月中之谪仙帝命和予羽衣曲虹桥一断心茫然竹王祠前雾如雨踟躅花开啼杜鹃月
在天上缺复圆人间尘土多英贤举杯问月月不言风吹海水秋无边沧波尽卷金尊里清影
长随舞?前相期迢迢在云汉呜呼此意谁能传骑鲸寥廓忽千年金薤青荧垂万篇浮云起灭
焉足异终古明月悬青天

张以宁题李白问月图青天出皓月碧海收微烟举杯一问月我本月中仙醉狂谪人世於今
几何年桂树日已老我别何当还兔药日已熟我鬓何由玄迢迢夜郎外垂光一何偏问月月
不语举杯复陶然青天自万古皓月长在天明当蹶倒影飞步崑仑巅

李白独酌图宣和所藏李伯时笔【元遗山集】

元好问太白独酌图谪仙去世三百年海中鲸鱼渺翩翩岂知龙眠天马笔忽有玉树秋风前
金銮归来身散仙世事悠悠白髮边会稽贺老何处在千里名山入酒船清景已随诗句尽风
流合向画图传往时长安酒家眠焦遂不狂张不颠想得三更风露下醉和江月弄江烟

王恽太白独酌图九重春色醉仙桃何似江山照赐袍千丈气豪愁不管青山矾上月轮高

李白醉饮图

詹同李白醉饮图百川鲸吸散清狂岂但文章万丈光散是有功唐社稷眼中先识郭汾阳

李白扶醉图

李东阳太白扶醉图半拥宫袍拂锦鞦有谁扶醉敢朝天玉堂记得风流事知是吾宗老谪仙

李白醉归图

吕子羽李白醉归图春风醉袖玉山颓落魄长安酒肆回忙杀中官?不得沉香亭北牡丹开

刘秉忠太白醉归图五斗先生未解醒一生爱酒不曾醒人间词翰传名字天上星辰萃性灵
雁带煖回波泛緑燕衔春至草抽青纱巾醉岸南山道几处哦诗补画屏

顾观太白醉归图歌成芍药倒金壶并辔宫官马上扶乐部余音随彩旆仙班小队下清都长
庚万丈文章焰後世千年粉墨图江左青山旧时月一杯谁慰客坟孤

王恽李白醉归图云阵横陈大渡河一书能解六蛮和仙韶莫讹君王宠七宝庄严未是多

陈顥太白醉归图偶向长安醉市沽春风十里倩人扶金銮殿上文章客不减高阳旧酒徒

李白舟中醉卧图

刘秉忠太白舟中醉卧图仙籍标名世不收锦袍当在酒家楼水天上下两轮月吴越经过一叶舟壶内乾坤无昼夜江边花鸟自春秋浮云能蔽长安日万事纷纷一醉休

李白酒船图

赵孟頫题太白酒船图二首载酒向何处稽山镜水边若为无贺老兴尽便回船
潇洒稽山道风流贺季真相思不相见愁杀谪仙人

李白扁舟图

宋无太白扁舟图锦袍烟艇夜郎西酒思金銮入直时不道相思杜陵老愁吟落月屋梁诗

潘伯修题李伯时画太白泛舟小像李白自号谪仙人更得龙眠为写真一个青莲初出水千年金粟再来身胷中元气诗如海物外还丹酒借春一笑掀髯缘底事桃花潭上见汪伦

李白纳凉图

陈高题太白纳凉图六月炎天飞火乌土焦石烁河流枯迺来衰病更畏热呼叫欲狂挥汗珠饮水嚼藕废朝夕小室如炉眠不得闲将图画悬四壁漫想深山好泉石就中此图尤絶奇青林飞瀑吹凉颼何人展席坐苍藓乃是谪仙初醉时露顶裸裎投羽扇仰看云生白成练松阴如雨毛骨寒岂识人间绊促倦只今匡庐道阻修雁荡天台近可游便欲致身邱壑里挂巾石壁继风流

李白泰山观日出图

段辅题李白泰山观日出图岱宗郁郁天下雄谪仙落落人中龙兹山兹人乃相从气夺真宰愁丰隆玉堂一任云雾封长啸飞渡秦皇松夜呼日出沧海东再为斯世开鸿蒙钧天帝居深九重醉舞蹈碎青芙蓉天孙玉女为敛容却视五岳秋毫同长鲸一去不复逢乾坤万里号秋虫当年咳唾留絶峯至今树石生春风我欲追之杳无踪不意邂逅会此中屋梁六月依然空

成化戊戌仲秋姚子购得赵孟頫所制李白庐山观瀑图尺纸而匡庐五老宛如目撃妙入神品国朝钜公珠玉辉映诚古图史中之奇品也【姚绶谷庵集】

王世贞尔雅楼所藏名画有钱舜举李白观瀑图【珊瑚网】钱选舜举写李青莲观开先瀑布图无论此君神采欲飞动即一骑一从亦见生色唯两瀑不甚雄乏直下三千尺势当由小谿边幅耳图後缀舜举一诗不免蛇足又有刘文成宋文宪胡文穆题诗皆名手而首则解大绅印记及小楷五字极佳当是刘宋题後归大绅而文穆始题之耳後为上海朱太学邦宪家

物邦宪予故人也白晳美姿容酒态絶出青莲上诗亦雁行没可二十年矣嗣子上林家教举以遗予噫在人间世作太白观在上林所作邦宪观亦可也予何所与为成二歌题後还之上林聊寓雪鸿之迹而已【弇州续集】

张黄门靖之先生性喜绘事不轻与人点染余曾见其李白看庐山瀑布图泉壑树石纵横森布一唐帽红衫人仰面掀髯豪态溢出知其有倾河倒峡之气郁盘於胸也【紫桃轩杂□】

张翥题李白观瀑泉图玻璃杯中春酒绿醉墨淋漓牡丹曲平生合置七宝牀白紵乌纱美如玉阿瞞荒宴百不理宁计宫花衔野鹿何物老姬生此儿偷向金鸡帐中宿高将军才奴隶耳误使脱靴吾所辱要留汗鞦韆鲸鱼鼠子何堪烦一蹴寻常沟渎不可濯何处容伸遭污足翩然却下匡庐云五老峯前看飞瀑

僧大欣题太白观瀑布图我本白云人见山每回首披图得松泉感我尘埃久我家只在九江口从此扁舟到牛斗翻愁天下银涛堆石转云崩万雷吼水行地底不上天龙泓岂与沧溟连风叶无声飞鸟絶月光云影天茫然丈人何来自空谷谪仙招隐当不辱林梢喷雪舞飞华尚想随风唾珠玉马首青山如唤人归来好及松华春泉香入新酿解公头上巾今者孰不乐荒坟委荆榛遂令画师意万古留酸辛酸辛复何益东海飞红尘

刘基题李太白观瀑布图忆昔李谪仙泛舟彭湖东遂登庐山顶直上香炉峯遥望瀑布水自天垂白虹大声回九地浮光散虚空万木震辟易千崖殷钟镛清凉入肌骨如归广寒宫赋诗留人间至今响淅淅丹青极摹写欲代元造功逸驾不可追举头睇飞鸿倚歌无人和引袖垂长风

宋濂题李太白观瀑布图长庚晔晔天之章精英下化为酒狂匡庐五老森开张银河万丈挂石梁下马傲睨立欲僵耸肩袖手神扬扬忆昔开元朝上皇官中赐食七宝牀淋漓醉墨蛟龙骧人疑锦绣为肝肠麾斥力士如犬羊营营青蝇集於房金銮不复承龙光并州幸识郭汾阳不幸丹阳逢永王大风吹沙日为黄狻猊哀啼闻夜郎苍天欲使诗道昌顿挫万物归奚囊何处更覓延年方北海天师八尺长芙蓉作冠云为裳授以藁笈青琳琅蓬莱屹起沧海洋羣仙迟汝相翱翔谁将粉墨图缣緙顾我一见心恹恹诗成仰视天茫茫夜半太白生寒芒

方孝孺题李太白观瀑图天宝之乱唐已亡中兴幸有汾阳王孤军匹马跨河北手扶红日照万方凌烟功臣世争美李侯先识英雄面沉香亭北对蛾眉眼中已见渔阳乱故令边将储虎臣为君谈笑清胡尘朝廷策勲当第一珪组不敢縻天人西游夜郎探月窟南浮万里穷楚越云山胜地有匡庐银河挂空洒飞雪醉中信马踏清秋白眼望天天为愁金闺老奴污吾足更欲坐濯清溪流英风逸气掀宇宙千载人间宁复有梦魂飞度南斗旁笑酌庐山一卮酒云松可巢今在无九江落照连苍梧欲从李侯叫虞舜尽倾江水洗寰区

王世贞题钱舜举太白观瀑图匡庐万古瀑太白千秋才两奇偶相值後人何有哉及展舜举图悦登文殊台立起青莲枯来聽万壑雷始知丹青力可以回寒茭

王世贞尔雅楼所藏名画有周官饮中八仙图【珊瑚网】郑?遗迹传世絶少新都王氏藏?竹溪六逸卷纸本浅绛色极佳後有苏子瞻题跋米元晖鉴定绍兴御府等印记【清河书画舫】

钱舜举有竹溪六逸图【都穆寓意编】

陈旅题竹溪六逸图千亩松篁野径开一溪流水碧于苔山樽共醉徂徕石何用杨妃七宝杯

旧有唐人出游图谓宋之问王维李白高适史白岑参六人多画七贤不知第七人为谁或云是潘逍遥然未见据【楼钥攻媿集】

世传七贤过关图或以为即竹林七贤屡有人持其画来求题跋漫无所据观其画衣冠骑从当是晋魏间人物意态若将避地者或谓即论语作者七人像而为画尔姜南宾举人曰是开元间冬雪後张说张九龄李白李华王维郑?孟浩然出蓝田关游龙门寺郑?图之虞伯生有题孟浩然像诗风雪空堂破帽温七人图里一人存又有槎溪张轲诗二李清狂狎二张吟鞭遥指孟襄阳郑?笔底春风满摩诘图中诗兴长是必有所传云【玉堂漫笔 琦按开元时太白未尝至京师至天宝改元则张说已亡矣安得有并轡出蓝田关事至攻媿集所载之七人其生死先後更不同时盖出自後人以生平所慕好者而妄指以实图画中人何足据乎】

论七贤过关图者多矣会稽刘孟熙霏雪録所载差详盖黄山谷尝题之曰眉山老书生作此图人物各有意态又谓七子者皆诗人此笔乃少邱壑意以为赵云子之苗裔摹拟渐密而放浪闲远则不逮其言止此不指为谁某也元曹文贞公伯启集有诗曰清谈飘逸事陵迟七子高风世所师公室倾危无底柱服牛乘马欲何之意指当代清谈之流不知何据今汉泉集乃无此诗不知有别本否也録又称虞邵庵有题孟浩然像诗曰风雪高堂破帽温七人图里一人存又称国初唐愚士有诗曰七骑从容出帝阍蹇驴驄马襟山惇瀛洲学士参差出十八人中一半人则是皆以为唐人矣予观雪楼程钜夫集有诗曰长庚自是谪仙人子美逢时稷契臣风雪茫茫五君子醉吟犹得继清尘又尝闻吾友倪文毅公岳称其父文僖公尝见旧图人各有标目有王维史白者而不能悉记也吾甥崔礼部杰世兴近得钱舜卿白描卷自题曰七贤相顾度关时正是天寒雪又飞大抵功名俱有分跨鞍何事不知归卷後西河李进者题长句有曰开元天宝全盛时间阎卷陌皆能诗又曰承平何事有行役况复冲寒欲何适无乃渔阳兵乱後奔走天涯共为客又曰宋公七言变风雅崔李王岑名相亚谁言行辈不同时雪里芭蕉古曾画又海盐李孟璿题曰摩诘也知偏善画谪仙应是最能诗又三山泰懋题曰辋川图绘吴兴画太白文章樵李诗海盐李季衡曰谪仙之问诗无敌辋川绘事尤难匹高岑崔史总奇才岂少佳章纪行役大抵以为唐人也今此图摹写徧天下而牛驴羸马羶裘大帽关山风雪之状皆略相似盖必有所本者而鉴赏考索之家竟不能得其本末何哉崔甥间以质予予亦不能悉也姑辑旧闻以俟【李东阳七贤过关图跋】

七贤过关事不经见於书传而画家乃徧传於好事者之家究其姓名未的其谁何先师李文正公尝辨之慎近见洪武中高得阳题钱舜举寒林七贤图古风云尚疑高李六君子当时未

见潘逍遥道同气合志相感虽曠百世如同僚画史貌出有深意况自昔日传今朝屋梁落月见顔色妙气不待穷摹描又熊直题云七贤之名奚所徵七贤去国身何轻岁晚征途天雨雪数骑联翩行欲歇不如灞陵桥上翁破帽吟诗自清絶惜哉命不偶奔走半道周人生遇坎轲穷苦奚足尤左迁与投散逝者良悠悠他人未足说所惜柳与刘天涯相聚一回首往事于人亦何有莫念元都旧种桃且往愚溪賸裁柳风流画史真絶伦毫端点染太精神据此则高适李白孟浩然与刘禹锡柳宗元不同时潘逍遥宋人又在後矣合而图之繆甚亦不足深辨也博雅之士赏其画则可必凑合姓名不亦凿乎【杨升庵集】

右记图画三十二则

太白祠在彰明县治南【四川总志】

铜陵县有宝云寺李白祠堂在焉【周必大乾道庚寅奏事録】

李白祠旧在铜陵县五松山後移置县学之侧【一统志】李纲游五松山观李太白祠堂诗大江东南流鼓枻江水上薄游五松山获见谪仙像呜呼天宝间治乱如反掌兵戈暗中原豪杰多长往谪仙当此时逸气溢天壤脱身来江东缥缈青霞赏作诗几千篇醉笔笼万象迄今有遗祠识者共瞻仰嗟予岂後裔愚拙谁复尚珥笔玉殿螭谪官闽岭瘴荷恩许生还冒险理归浆於焉覩仙风足以慰遐想愿言继清芬何由挹英爽

戴昺五松山太白祠堂诗舣舟来访宝云寺快上山头寻五松捉月仙人呼不醒一间老屋战西风【自注太白读书之地诗有要回长舞袖拂尽五松山即此地也】

李白书院有四一在贵池苦竹岭一在青阳九华山化城寺西断碑存焉一在铜陵五松山一在石埭杉山【江南通志】

李翰林祠在宁国府泾县震山祀唐李白【江南通志】

李白祠在汉阳府郎官湖北宋咸淳间学官萧鑑因其亭久废重建祠塑太白像【一统志】

范梈题郎官湖李白祠诗当时郎官奉使出咸京仙人千里来相迎画船吹笛弄緑水何意芳洲遗旧名唐祠芜没知何代惟有东流水长在黎侯独起梁栋之彷彿云中昔轩盖南飞越鸟北飞鸿今古悠悠去住同富贵何如一杯酒愁来无地酹西风大别山高几千尺隔城正与祠相值青猿夜抱月光啼挂在东湖之石壁黎侯本在斗南家枕戈犹自忆烟霞只拟将身报天子不负胷中书五车昨者相逢玉关下别来几日秋潇洒黄叶当头乱打人门前系着青骢马君今归去钓晴湖我亦明年辞帝都若过湖边定相见为问仙人安稳无

屈又升太白祠诗翰林余俎豆宫锦至今香光复真由汝功名亦可王山川增气势风雅有辉光一片郎官水风流未忍忘

太平府有谪仙楼即采石山太白祠始基於唐明正統間巡撫周忱建清風亭於江汜祀之

皇清順治間毀知府吳季瀛命僧募建【江南通志】

程大約采石阻風謁太白祠詩北風遙阻渡江船因喜從容覲謫仙一代詩名誰與共千秋酒
恣自堪憐錦袍却憶清波映玉貌長瞻白日懸欲荐渚苹行又迫不堪回首隔雲烟

屈又升采石題太白祠四首才人自古蛟龍得太白三閭兩水仙辭賦已同雙日月精靈還作
一山川江間絕壁丹青出木末飛樓俎豆懸千載人稱詩聖好風流長在少陵前【朱紫陽嘗
謂太白聖于詩祠上有亭當翠螺山頂予因題曰詩聖亭】英雄有命在文章豈惜飄零蜀道
長談笑不須同

太傅功名自可比汾陽青蓮一去無仙客金粟重來只醉鄉白玉盤中雙照影輸君華髮似秋
霜牛渚西江月色新清光常見謫仙人詩多諷諫因天寶道在佯狂得季真金鉉已銷飛燕口
錦空映鳳凰身垂輝不用多刪述天與英雄只老春樂府篇篇是楚詞湘累之後汝為師烏
栖豈寫亡吳怨猿嘯唯傳幸蜀悲湘水蒼茫投賦地霜林寂歷禮魂時重華一別無消息終古
魚龍恨在茲

王士禛太白祠詩白也祠堂在前臨牛渚磯風流映江左山水尚清暉小謝東田近開元舊事
非姑溪好風月游子亦忘歸

端宏謫仙樓詩謫仙樓閣倚江頭一度登臨一系舟遺像有涯天地老雄才無敵古今留天門
雨過雙蛾出牛渚潮平萬馬收倚徧闌干追往事斷雲殘照若為愁

李東陽采石登謫仙樓詩江天日暮雨蕭蕭城邊野亭春寂寥浮雲東來蔽江色明月墮地誰
當招我懷古人坐不寐鯨背之子神仙標風鬢露鬣事恍惚豈有赤腳凌青霄舉杯問天天不
語予亦沉吟俯江渚縱有神仙亦妒才不然豈謫來中土昭陽殿前牝雞午老鳳低飛入帘戶
網羅橫空銖其羽離離和鳴竟何補燕雀之輩安足數平生豪氣隘九區寸地未可容公軀有
才如此不得意自古非一誰當吁杜陵野老憐才客思君不負青山色千古波濤百丈深至今
猶恐蛟龍得英雄一去俱陳迹楚水吳山眼中碧鳳去龍飛不復還仗劍悲歌竟何益

王寵月夜謫仙樓詩秋月出海珊瑚明舉眼忽見太白精雲光錯落照顏色草堂拂拭蛟龍驚
修眉玉頰桃李春虬須如戟真天人屋梁落月想像真彷彿猶得交其神我聞王孫豪氣昔如
龍天然不與凡骨同江湖落魄黃金盡昂霄吐氣成飛虹蓬萊閬苑在掌上長覺兩腋生清風
天子不能屈四海不足容飄飄九華山自有青芙蓉獨留神采照天地令人萬古如相逢

鄭廉謫仙樓上作昔日曾聞太白樓偶經牛渚暫維舟攀岩竹樹襟前動蹶磴風雲腳下浮圖
畫兩間驚絕調龍蛇千載枕寒流夜郎遷客留遺像記取人豪據上游

太平府采石镇唐贤坊神霄宫内有太白祠宋嘉泰年建【江南通志】

唐拾遗李白祠在太平府治青山麓每岁清明前一日祭【太平府志】

李太白祠堂在青山之西北距山尚十五里墓在祠後有小冈阜起伏盖亦青山之别支也祠莫知其始有唐刘全白所作墓碣及近岁张真甫舍人所作重修祠碑太白乌巾白衣锦袍又有道帽?裘侑食於侧者郭功甫也【陆放翁入蜀记 按郭功甫名祥正当涂人举进士元丰中知端州元佑初阶至朝请大夫请老归家青山下其生也母梦李白而生少有诗名句调俊逸梅圣俞尝称之曰天才如此真太白後身也有赠功甫诗曰采石月下访谪仙夜披锦袍坐钓船醉中爱月江底悬以手弄月身翻然不应暴落饥蛟涎便当骑鲸上青天青山有塚人漫传却来人间知几年在昔熟识汾阳王纳官贯死义难忘今观郭裔奇俊郎眉目真似工文章死生往复如康庄树穴探环知姓羊盖用其事後人以功父配享太白以此哉】

隆庆府有李杜祠按劔门题诗以太白子美为重而世未有并祠之者会後李参预璧得所赐阜陵御书蜀道难又从李左史得赵忠定汝愚大书劔门诗因建祠刻二书予前榜其堂曰文焰取韩退之诗语也【方輿胜覽】李杜祠在秦州天靖山玉泉观祀李翰林白杜工部甫【陕西通志】

杨恩李杜祠诗吁嗟天水一抔土两贤遗迹留今古磊落崎嶇千载人流离奔走一生苦淋漓醉墨帝王前怨起清平第二篇言路岂能留闇相覆师不见涛斜川祸福自掇宁自保当时无乃惑草草失脚千重云雾深去国一日乾坤老蜀道崎岖走欲僵何日金鸡下夜郎耒阳县外船难进采石江头事可伤当时不得一日乐後世徒瞻万丈光秦川城下聊回步手拂尘埃开像塑安知天靖山头今日祠不是二贤昔日经行处并?联榻俨若生安得杯酒一相賡瓣香拜罢高回首满目山川无限情

济宁州太白楼旁有二贤祠祀唐李太白贺知章【一统志】二仙祠在宁国府治後祀谢朓李白【江南通志】

五贤祠在宁国府敬亭山祀南齐谢朓唐李白韩愈宋晏殊范仲淹【江南通志】

三贤祠在开封府城东南三里吹台上祀唐李白杜甫高适以天宝中三人相遇於梁宋间共饮吹台上酒酣悲啸怀古赋诗後人因立祠以祀之【河南通志】

十贤堂在绵州学东绘龕统蒋琬杜微尹默李白陈该苏易简王仲华欧阳修黄庭坚十人之像以祀之【一统志】思贤堂在绵州治东内绘扬雄杜甫李白樊绍述苏易简欧阳修司马光苏轼唐庚九贤之像以祀之【一统志】尊贤堂在嘉定州治有唐李太白等人画像【一统志】名世堂在潼川府治画屈原司马相如王褒扬雄严君平陈子昂李太白苏子瞻八人【方輿胜覽】

思贤楼在剑州东北七十五里剑门关水门上有张载李白杜甫柳宗元画像【一统志】

安贤祠在寧国府南陵县开化寺祀张巡李白杜牧李经何时吴景【江南通志】

右记祠庙二十二则

太白事蹟自新旧二史外其杂书所载半出于好事者伪纂乃爱古嗜奇之士多乐引之非以其人可思慕故耶余既采正史及诸家文集之传信者以补薛氏年谱之阙其附会叵信及流传琐诸事另録为外记一卷并蒐辑後人诗赋碑记缀于其下自笑不免为蛇画足盖亦爱古嗜奇之癖有明知而故蹈者曹石仓作万县西山太白祠堂记有云事在有无语类不经人心爱之夸诩为真树若曾倚其色敷荣泉若曾酌其声清泠数语余最喜其警策夫非其人为人所深思而极慕者何以能至是後之人苟得斯意以读斯编一展卷而太白宛然在矣彼事之杂于真伪有无又遑论乎哉

李太白集注卷三十六

跋五则

跋五则

太白诗文当天宝之末尝命魏万集録遭乱尽失去及将终取草藁手授其族叔阳冰俾令爲序者乃得之时人所传録于生平着述仅存十之一二而已然其诗要皆脍炙人口而无阑入他人所作可知也阳冰序中不言卷数旧唐书李白列传云有文集二十卷行于时新唐书艺文志云李白草堂集二十卷李阳冰録乃乐史作序则云翰林歌诗李阳冰纂为草堂集十卷岂其时草堂原本已有亡其半者抑或未亡而後人并为十卷耶史别收其歌诗十卷与草堂集互相校勘排为二十卷号曰李翰林集又于三馆中得其赋表书序等文排为十卷号曰李翰林别集凡得诗七百七十六篇杂文若干篇 宁中宋敏求广搜逸稿又得诗二百二十五篇并其旧集总为编次题以类别析为二十四卷杂文六十五篇析爲六卷共三十卷篇数虽多于旧然不免阑入他人所作元丰中晏知止为苏守出其本刻之郡中广行于代乐史本後佚不传陈振生书録解题言其家藏李翰林集不知何处本前二十卷为诗後二十卷为杂着其本最爲完善余尝臆拟其分卷与乐史本相符岂即乐史本耶陈氏又言其首载李阳冰乐史魏顥曾巩四序李华刘全白范传正裴敬碑记卷末有宋祁新史本传而姑熟十咏笑矣悲来草书三歌行亦附焉兼缀以东坡辩语夫宋与曾苏三公皆生乐氏後据此验之即使其本出自乐氏已为後人增益而非咸平中所定之原本矣杨升庵集中亦言其家藏太白诗有乐史本最善未知即七百七十六篇之本否今之传世者皆宋氏增定之本也噫自乐氏校勘之本出而草堂原本遂湮自宋氏分类之本出而乐氏之本又亡後起之士欲求古本而观之有若丹书緑图邈然不可得见能无为之慨叹哉

李诗全集之有评自沧浪严氏始也世人多尊尚之然求其批却导窾指肯綮以示人者十不得一二其有注自子见杨氏始【子见名齐贤永州宁远人古舂陵城在其地故称舂陵杨齐贤云宋庆元五年进士两应制试第一执政以贤良方正荐授通直郎】继之者粹斋萧氏作分类补注李太白集附杨注後合刊之【粹斋名士贇一字粹可贛州寧都人淳佑进士萧立之之仲子潜心为学入元遂隐居不出】萧讥杨取唐广德以後事及宋儒记录诗词为祖并引用杜诗伪苏注之非因为节文而存其善者今所传杨注非全文也然萧注亦不能无冗泛踳駁处明季孝辕胡氏作李诗通二十一卷颇有发明及駁正旧注之纰缪最为精确但惜其不广【胡名震亨号邈叟浙江海盐人万历丁酉举人累官兵部职方员外郎】选本则有愈光张氏之李诗选【张名含云南永昌卫人正德丁卯举人】选而评则有泗源应氏之李诗纬【应本朝康熙间人】余所见只此夫自太白至今已及千载後人评注宁仅仅止此大抵散亡磨灭而不传者有矣即传而余所未见者又不知其有焉否耶

宋时李诗刊本始自苏守晏公所谓苏本也其後又有蜀本有当涂本据书录解题谓其时苏本已不复有家藏蜀刻有大小二本卷数相同首卷专载碑序余二十三卷为歌诗六卷为杂着末有宋敏求曾巩毛渐题序以此考之而知蜀本盖传自苏本云晁公武读书志谓近时蜀本附入左绵邑人所裒太白少年诗六十篇而书录不之及似其本又在陈氏所藏二本之外萧粹斋得巴陵李粹甫家藏左縣所刊杨齐贤注本斯又蜀刻而有注者之一种其当涂本周

益公二老堂诗话谓当涂太白集後有续刻司空山瀑布诗一首陆放翁渭南集中一跋谓当涂本虽字大可喜然极多谬误宋刊之见于书传而可考者有此数种今则渐已销亡不能复覩流传于世者惟萧氏注本为多其本拔古赋八篇列于前为一卷次以歌诗二十四卷凡二十五卷而止明嘉靖间吴中郭氏取而重刊之以其注之泛且复也删节约半于古风五十九首增入徐昌谷评语又取杂文五卷另为编次附其後共成三十卷【跋云是集三十卷余合别集而成之者缘旧注繁杂仿徐迪功先生古风例将不切题义者删去且恨其文之不载更以别集编次五卷附于诗後俾成全书冀四方观者免瀚漫分散之叹嘉靖癸卯春正月吴人郭云鹏谨识】嗣後有依郭氏增删之本而刊者为霏玉堂本有依旧注原本而刊者为玉几山人本为长洲许元佑本有全去其注且分析其体为五七言古律絶句者为刘世教本刘书虽缺训诂然校订同异改正譌舛殊见苦心又余三十年前于古书肆中见有毛氏汲古阁刊本问其值书之主人亦数十年前所称时文名士也性颇怪傲邂逅间不可遽售余念毛氏所梓书多本宋刻有与俗本异者足以资考订另托友人往问则益不肯售友人谓予毛氏刻去今未远其印本行世者尚多何难别购而乃刺刺不休俨若借荆州于彼哉泊求之历年竟不能得追忆前书不知归于谁氏架中噫板行之书甫及百年僂得僂失殆有缘在耶会姑苏缪氏获崑山传是楼所藏宋刊本重梓行于时其书字画悉仿古刻精整可玩贾人渍染之宛然故纸翦去卷尾重刊诸字及弁首小序伪作宋板以欺人不知者多以重价购去其本叙次先後卷帙多寡与萧郭二本稍异而与陈氏所言蜀本相合即非苏本亦蜀本也第不知较汲古阁本何如其中亦有譌字显然误笔未正者据序尚有考异一卷然未付剞劂俟之多年竟不出【序云李翰林集三十卷常山宋次道编类而南丰曾氏所考次者也岁久譌缺俗本杂出增损互异无所是正余尝病之癸巳秋得崑山徐氏所藏临川晏处善本重加校正梓之家塾其与俗本不同者别为考异一卷庶使读是编者不失古人之旧而余亦得以广其传焉康熙五十六年五月吴门缪日芑题于城西之双泉草堂】兹本自二十五卷以前略依萧本杂文四卷略依郭本而以缪本参订其间郭本杂文五卷今依缪本合序文二卷为一卷别采萧本所逸而缪本有者得诗九首【缪本较萧本多十首其送倩公归汉东一絶已载序後不复重録故只九首】及他书所录集外诸作彙为拾遗一卷以合三十卷之数友人诘予尝非宋氏本阑入他人所作今拾遗所蒐辑确知其伪槩收录之而不忍弃何耶予曰是不相妨也昔人编韩柳集者咸有外集附于後钱非纯作杜诗笺注亦附录逸诗四十八篇皆有伪作在其间夫不嫌于宋者为其混之而至于不可别也若先别之而使其无可混正足以资後学之考核而甄别其裁矣夫又何尤南丰曾氏序谓太白诗之存者千有一篇杂着六十五篇今萧本诗只九百八十八篇缪本只九百九十八篇咸不及曾氏所云之数赋与文六十六篇较旧文又多其一疑非曾氏所考次原本矣意者曾氏并数魏万崔宗之崔成甫三诗于内故云千有一篇其送倩公归汉东序已冠于小诗之首序中不应重见而後人误增人之欤世称太白斗酒百篇计其诗章不下万余阳冰作序已云十丧八九今集中所存若长干行去妇词送别军行等作互见他人集中若怀素草书等作词意浅鄙与太白手笔判若仙凡复杂然并列东坡尝言太白诗为庸俗所乱可为太息说者以咎宋次道贪多务得之所致嗟乎真者不能尽传传者又未必皆真更有妄庸之人凭臆而谈举其佳者譏譏焉妄以为贗颠倒错谬以眩後人之心目不尤可怪哉昔人称太白天才英丽其诗逸荡俊伟飘然有超世之心非常人所及读者自可别其真伪余以为才不俊识不卓学不充则是非淆杂视朱若紫混郑为雅者多矣学者欲区别其真贗而无所差失宁可轻易言之欤

世之论太白者毁誉多过其实誉之者以其脱子仪之刑责俾得奋起而遂以成中兴之功辱高力士于上前而称其气盖天下作清平调宫中行乐词得国风讽谏之体毁之者谓十章之诗言妇人与酒者有九而议其人品污下又谓其当王室多难海宇横溃之日作为歌诗不过豪侠任气狂醉花月之间视杜少陵之忧国忧民不可同年而语试为平情论之识子仪为豪杰之士救免其刑责而力为推獎知人之明诚足称矣若夫云蒸雾变戡大难而奏肤功为一朝名佐太白初亦不料其至是谓中兴勲业太白与有力焉此岂通人之论哉力士获宠于君士大夫趋附焉太白醉中令其脱靴俨以仆隶相视此其平日必先有恶之之念存于中故酒酣之後忽焉触发而故于帝前辱之其气可谓豪矣然非沉醉亦未必若是後人深快其事而多为溢美之言以称之然核其实太白亦安能如论者之期许哉若夫清平调宫中行乐词皆应诏而赋者其辞以富丽为工其意以颂美为主刺讥之语无庸涉其笔端理也或乃寻摭其引用之故事钩稽其点缀之虚词曰此为隐讽此为谏諫支离其语娓娓动人然按之正文皆节外生枝杳无当于诗人之本意殆有似夫谗人险士吹毛洗垢而求索其疵癥以为口实者驯致其弊为梗于语言文字者不浅不但有悖于温柔敦厚之教而已善言诗者骇之而勿敢道也至谓其诗多甘酒爱色之语遂目以人品污下是盖忘唐时风俗而又未明其诗之义旨也唐时侑觴多以女伎故青蛾皓齿歌扇舞衫见之宴饮诗中即老杜亦未能免俗他文士又无论已岂惟太白哉若其古风乐府怨情感兴等篇多属寓言意有托寄阳冰所谓言多讽兴者也而反以是相诋訾然则指楚词之望有娥留二姚捐袂采芳以遗湘君下女之辞而谓灵均之人品污下指闲情赋语之褻又指其诗中篇篇有酒而谓靖节之人品污下可乎若谓彼皆有所托而言之爲无害则太白又何以异于彼耶至谓其当国家多难之日而酣歌纵饮无杜少陵忧国忧民之心以此为优劣则又不然诗者性情之所寄性情不能无偏或偏于多乐或偏于多忧本自不同况少陵奔走陇蜀僻远之地频遭丧乱困顿流离妻子不免饥寒太白往来吴楚安富之壤所至郊迎而致礼者非二千石则百里宰乐饮赋诗无间日夕其境遇又异兼之少陵爵禄曾列于朝出入曾诏于国白头幕府职授郎官太白则白衣供奉未沾一命逍遥人外蟬蛻尘埃一以国事为忧一以自适为乐又事理之各殊者奈何欲比而同之而以是为优劣耶後之文士左袒太白者不甘其说而思有以矫之以杜有诗史之名则择李集中忧时悯乱之辞而摭摭史事以释之曰此亦可称诗史以杜有一饭未尝忘君之誉则索李集中思君恋主之句而极力表扬曰身在江湖心存魏阙与杜初无少异此其意不过欲揶揄李者之口而与之相抗岂知论说杜诗而沾沾于是颠倒事实强合岁时昔人已有厌而辟之者何乃拾其牙後慧而又为李集之骈拇枝指哉读者当尽去一切偏曲泛驳之说惟深?其源流熟参其指趣反覆玩味于二体六义之间而明夫敷陈情理托物比兴之各有攸当即事感时是非美刺之不可淆混更考其时代之治乱合其生平之通塞不以无稽之毁誉入而为主于中庶几於太白之歌诗有以得其情性之真太白之人品亦可以得其是非之实矣

乾隆己卯秋九月王琦漫识